


Tangoa New Testament



The New Testament in the Tangoa Language of Vanuatu

Tangoa New Testament
The New Testament in the Tangoa Language of Vanuatu
Le Nouveau Testament dans la langue Tangoa de Vanuatu

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not sell this work for a profit.

 You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2022-03-11

PDF generated using Haiola and XeLaTeX on 25 Aug 2023 from source files dated 22 Nov 2019

89356e5c-df58-558e-9b27-ae0321adb2df

Contents

Matthew	1
Mark	45
Luke	72
John	117
Acts	150
Romans	191
1 Corinthians	210
2 Corinthians	229
Galatians	242
Ephesians	249
Philippians	256
Colossians	261
1 Thessalonians	266
2 Thessalonians	270
1 Timothy	273
2 Timothy	279
Titus	283
Philemon	286
Hebrews	288
James	303
1 Peter	308
2 Peter	314
1 John	318
2 John	323
3 John	324
Jude	325
Revelation	327

Retīruhu Hin Iesu Křisto Matthew Mo Ulia

Hin Puku Nike

Hin puku nike, Iesu mo vujangi sohen harahi, haratu mo vaia aulu na Vutivuti (5.1-7.28), nona usiusi (6.9-13), peresi na 'Leu Ruhu' (7.12) 'ha vaia isana tinapua sohena ka opoia vara la vaia isamim' la lo toho hin puku akerihi.

Matthew mo uli mamahuni na hija pin Iesu (1.1-17) mo vujangia vara enia natu haratu sei God mo retitauhi vara i pa tai isan Supe David, haratu i pa nořa Tamlohi Jujuri.

Matthew mo uli na sava mo masese hin rani atu Tiapolo mo vahite Iesu na jara hasetoho (4.1-11).

Titileu nike la lo toho hin puku akerihi purongo

1. Piri řuvu (13.24-30)
2. Tavtav Tavera (13.44)
3. Huřutavila Tavera (13.45-46)
4. Tara Maji (13.47-50)
5. Tavtav Matea (13.52)
6. Volitusi Sasati Matea (18.23-35)
7. Tamlohi Isa Grape Matea (20.1-16)
8. Uluvou Mo Rua (21.28-31a)
9. La Hařai Maevo Atu (25.1-12)

Matthew mo vujangia vara hinau tari la masese isan Iesu usuri na masalon God (1.22; 2.5, 15, 17, 23; 8.17; 12.17; 13.35; 21.4; 27.9). Matthew mo uli retileu atu non Iesu mata sile na vavahināu non nona tamlohi usuri mata vano na jara tari na varama (28.18-20).

Vujangi Hai Hin Puku Nike

1. Pin Iesu Peresi Na Nona Rani Vora (1.1-2.23)
2. Vujangi Non John Tamlohi Paptijo (3.1-12)
3. Paptijo Non Iesu Peresi Na Nona Rani Vaihite (3.13-4.11)
4. Iesu Mo Lo Toho Na Jara Tavera Matan Galilee (4.12-18.35)
5. Mo Malue Galilee Mo Sahe Jerusalem (19.1-20.34)
6. Isoiso Wik Non Iesu: Nona Mateia (21.1-27.66)
7. Iesu Mo Mele Mauri (28.1-20)

Pin Iesu (Lk 3.23-38)

¹ Reti nike mo vereuli na pin Iesu Křisto, mahapin Abraham enia Supe David.

² Abraham enia taman Isaac.

Isaac enia taman Jacob,
ale Jacob enia taman Judah

tolu na voraina,

³ Judah enia taman Perez
peresi Zerah, ale tinara Tamar,
Perez enia taman Hezron,
ale Hezron enia taman Ram,

⁴ Ram enia taman Amminadab,
Amminadab enia taman Nahshon,

ale Nahshon enia taman Salmon,

⁵ ale Salmon enia taman Boaz,
ale tinana Rahab,

Boaz enia taman Obed,

ale tinana Ruth,

ale Obed enia taman Jesse,

⁶ Jesse enia taman Supe David,
Supe David enia taman Solomon,
ale tinana Bathshiba

enia malepun Uriah sei,

⁷ Solomon enia taman Rehoboam.
Rehoboam enia taman Abijah,

ale Abijah enia taman Asaph,

⁸ Asaph enia taman Jehoshaphat,
Jehoshaphat enia taman Joram,
Joram enia pin Uzziah,

⁹ ale Uzziah enia taman Jotham,
Jotham enia mahapin Ahaz,

ale Ahaz enia taman Hezekiah,

¹⁰ Hezekiah enia taman Manasseh,
Manasseh enia taman Amos,

ale Amos enia taman Josiah,

¹¹ Josiah enia pin Jechoniah

tolu na tahisana,

enira hasera purongo natu
la pa lo mauri hin pongi atu

mara Babylon la tauri

na tavtavyuin Israel

la lavira la vano Babylon. ^{2 Ki 24.14-15}

¹² Hitahun rani atu mara Babylon
la lavira la vano,

ale pina mo vano sohen harihi:

Jechoniah enia taman Shealtiel,

ale Shealtiel enia taman Zerabbabel,

¹³ Zerabbabel enia taman Abiud,

Abiud enia taman Eliakim,

ale Eliakim enia taman Azor,

¹⁴ ale Azor enia taman Zadok,

Zadok enia taman Achim,

ale Achim enia taman Eliud,
¹⁵ Eliud enia taman Eleazar,
 Eleazar enia taman Matthan,
 ale Matthan enia taman Jacob,
¹⁶ ale Jacob enia taman Joseph,
 Joseph enia tuan Mary,
 ale Iesu mo vora isan Mary,
 enia haratu la tovia Křisto.

¹⁷ Ale mo sohena natu, pin Abraham mo tikeli Supe David mo tikeli 14, ale pin Supe David mo tikeli rani atu la vano Babylon mo tikeli 14, ale pina hin rani atu tamlohi la vano Babylon mo tikeli na rani Křisto mo vora mo tikeli 14.

*Pongi Vora Non Iesu
(Lk 2.1-7)*

¹⁸ Ale reti vora non Iesu nořa Křisto mo sohen harihi: Tinana Mary, la tapuhia vara i pa naroun Joseph, pani la sopo lo lahi pani o eři hitea vara Mary mo tau natuna moiso na suihan Tanume Tapu.

¹⁹ Joseph sei enia i pa tuan Mary, ale matan enia tamlohi vokevole matea, mo sopo opoia vara i vai Mary i mahantuhanu, ale mo aleale malele vara i tinařihia, ale tea la pa sopo levosahia.

²⁰ Pani Joseph mo pa lo řomřomia, ale vahatea purongo, angelo non Moli God matea mo pala isana na mavuho, ale mo verea mara, "Joseph pin David, o sopo matahu vara o lavi Mary naroum. Hina rihirihi sei na lolona mo tai isan Tanume Tapu. ²¹ I pa vasusui na natirihi lamane matea, ale o pa tau na hijana vara Iesu matan enia i pa juri na nona tamlohi na nora hehe." ²² La hinau nike, la masese matan vara i mařivisi na sava Moli God mo verea isana přovet tuai sei mara,

²³ 'Eh! Hařai maevo matea i pa pangepange, ale i pa vasusui na natuna lamane matea.

La pa tau na hijana vara Immanuel.'

Isa 7.14

Raramin hija atu enia, 'God mo lo toho isařa'.

²⁴ Hitahuna Joseph mara mo turu, mo vai na sava angelo atu non Moli God mo lo verea, ale mo lavia narouna, ²⁵ pani mo sopo juruvi peresia mo mai mo tikeli na rani mo vasusui na natuna lamane matea, ale mo tau na hijana vara Iesu.

2

Tamlohi Lelevosahi La Pala

¹ Ale nake, Iesu mo vora Bethlehem na jara tavera Judea na pongi Herod mo lo supe ea, ale mo sopo tuai, tamlohi lelevosahi mata vitusarasara hai matan Opae la mai Jerusalem, ² la lo usia lara, "Nene natirihi atu mo vora vara i pa Supe nona Jew? Kama hite na vitusarasarana hin rani atu mo vele atuvano Opae, ale kama mai vara kama lotua."

³ Supe Herod mara mo rongo nora retiusa sei, enia tolu na tamlohi tari na lolon Jerusalem řomira la kaka matana. ⁴ Mo tovi na matavuhi matea nona moli nona přis peresi na tamlohi vujangi mata leu nona tamlohi, ale mo usia isara mara, "Sava jara natu, nořa Křisto i pa vora hinia?"

⁵ La řaramia lara, "Na vanuan Bethlehem na lolon Judea, matan přovet tuai matea mo ulia sohen harihi mara,

⁶ 'Bethlehem sei na jara tavera atu Judah, engko ko aulu ko jeu la haratu la lo aulu Judah.

Tamlohi aulu matea i pa tai isam i pa tavui sipsip mata i kilau na noku tamlohi Israel.' ⁷

Mic 5.2

⁷ Moiso, Herod mo mele tovi řořoi na matavuhi matea peresi la tamlohi lelevosahi atu, matan vara i levosahi na rani tataholo la hite vitusarasara atu mo lo pala hinia. ⁸ Moiso Herod mo řulera la vano Bethlehem, ale mo verea mara, "Ha vano, ha ale mamahuni natirihi atu, ale vara ka hitea, ha mai ha vereau hinia, ale enau sohena a pa vano a lotua."

⁹ La tamlohi lelevosahi atu la rongo la reti atu non supe moiso la turu la vano. Ale, la mele hite pa vitusarasara atu la lo hitea Opae, mo tiromara mo vano tataholo hin jara atu natirihi atu mo lo toho ea. ¹⁰ La tamlohi lelevosahi atu lara la hite vitusarasara atu, la avulahi la uloulo tavera matana. ¹¹ Lara la unu hin ima atu la hite natirihi atu mo lo toho hinia peresi tinana Mary. La popovitoho isana, ale la lotua. La roi na nora tavytav, ale la sile na nora otori mata gold peresi la hasori řuhu atu frankincense peresi na myrrh isana. ¹² Pani God mo retřořaořahai isan la tamlohi lelevosahi atu na mavuho matea

vara la sopo mele hilu la vano isan Herod. Ale la mule na jarara na malele tinapua.

La Rovo La Sivo Egypt

¹³ La tamlohi lelevosahi atu lara la mule, vahatea purongo, angelo non Moli God matea mo pala isan Joseph na mavuho matea, mo verea mara, “O turu! O lavi natirihi sei peresi tinana ha rovo ha sivo Egypt matan nakerihi Herod i pa ale natirihhi sei vara i vilimateia. Ha lo toho atu Egypt i tikeli rani atu a pa mele vere kamim hinia vara ha eři mele hilu.” ¹⁴ Vahatea purongo, Joseph mo turu mo lavi natirihi atu peresi tinana la malue la sivo Egypt hin vutepongi atu, ¹⁵ moiso, Joseph mo lo toho Egypt mo tikeli na rani Herod mo mate. Hinau nike, mo masese sohena usuri na sava přovet la verea tuai moiso lara Moli God mo verea mara, ‘Na tovi nařihi natuku Egypt’.

Hos 11.1

Herod Mo Lolokoru

¹⁶ Moiso, Herod mara mo hitevosahia vara la tamlohi lelevosahi atu la halua, ale mo lolokoru patuna, ale mo sile na retileu matea vara nona tamlohi vuro la vilimatei na pipi lamane tari sei taunira mo rua teni taunira mo sivo atano na lolon Bethlehem peresi na jara la toho řalihia, Herod mo vaia usuri rani atu la tamlohi lelevosahi atu la verea. ¹⁷ Moiso, sava hinau přovet Jeremiah mo verea mo masese sohen harhi mara,

¹⁸ ‘Na jara atu Ramah,
tamlohi la lo tangi,
ale la tangtangi tavera,
Rachel mo lo tangisi na natuna,
ale mo ſohu vara tea i nanau isana
matan natuna la mate.’ *Jer 31.15*

La Mele Hilu La Sinai Israel

¹⁹ Pani na rani Herod mo mate, Joseph mo pa lo toho Egypt, ale hin rani atu, angelo matea non Moli God mo pala isana na mavuho matea, ²⁰ angelo atu mo verea mara, “O turu! O lavi natirihi sei peresi tinana ha sahe Israel, matan la haratu sei la lo vahitea vara la vilimatei natirihi sei la pete mate moiso.” ²¹ Ale Joseph mo lavi natirihi atu peresi tinana la sahe Israel. ²² Pani mara mo rongoa vara nake natun Herod, Archelaus mo lo tauri na suiha na lolon Judea, mo matahu vara i vano atu,

ale mo mele lavi na retiroařohai na nona mavuho tinapua matea vara i sahe Galilee.

²³ Mo vano na taon tavera matea la tovia Nazareth, ale la tohoa atu vara sava přovet la verea tuai matan Křisto i pa masese lara, ‘La pa tovia vara mara Nazareth’.

3

John Tamlohi Paptijo

(Mk 1.1-8; Lk 3.1-18; Jn 1.19-28)

¹ Hin rani atu John tamlohi paptijo mo pala mo tapulo retivujavujangi na jara hasetoho matan Judea. ² Mo verea mara, “Ha posí na nomim hehe matan i pa sopo tuai suiha atu non God mo lo supe hinia i pa pala.” ³ Matan enia haratu sei přovet Isaiah mo lo retireti hinia tuai sei mara, ‘Na jara hasetoho leona mo lo ulo mara:

Ha tatamahuni na malele na mapumim matan Moli God i pa hahau hinia.’

Isa 40.3

⁴ Ale rurun John la vaia na vulu camel, mo otioti na huri buluk; hana hinau enia hatpoha peresi na wai tau sugabag sei mo meji. ⁵ Hin rani atu la haratu la lo toho Jerusalem peresi na jara tari Judea, ale na jara řalihia na wai Jordan la lo vano vara la hitea, ⁶ ale la taviti na nora hehe isana moiso John mo paptijo hinira na wai Jordan.

⁷ Pani John mara mo hitea vara Pharisee peresi na Sadducee matuvana la lo mai mata la paptijo, mo verea isara mara,

“Kamim mata sasati! Hare mo retiroařohai kamim vara ha rovo na aria tavera non God?” ⁸ Ha vai na nomim vavahinau i vujangia vara ka posí varařuhu na nomim hehe. ⁹ Ha sopo řomaulu vara, ‘Kamam kama juri matan tamamam Abraham!’ matan na verea isamim, God i eři posí la vatu nike, la mai natun Abraham! ¹⁰ Matan nakerihi, God mo lo tauri na rita matea moiso vara i tai na wari pahai. Vipahai tari atu la sopo vua řuhu, i pa taijovira, ale i pa pulahira na lolo hapu.

¹¹ Enau na lo paptijo hin la haratu la posí mata nora hehe na wai, pani i pa sopo tuai tamlohi matea i pa mai mo aulu jea hiniau, ale enau na sopo tataholo vara a uli nařihi na asi eve palona. Enia i pa paptijo hin kamim na Tanume Tapu peresi

na hapu. ¹² Mo lo tauri na nona foko tavera na limana, ale i pa vasahi na nona jara ase na piri wit, ale i pa takonahi piri wit atu na nona pea, pani i pa suli na pahapaha piri wit na hapu sei tea i sopo eři vunia hin te rani.”

John Mo Paptijo Hin Iesu (Mk 1.9-11; Lk 3.21-22)

¹³ Moiso Iesu mo tai Galilee mo vano na wai Jordan vara John i paptijo hinia. ¹⁴ Pani John mo vaihitea vara i horoa. Mo verea mara, “Mata sava ko mai isaku mata paptijo? Mo mele tataholo vara engko o paptijo hiniau!”

¹⁵ Iesu mo ūramia mara, “Nake mo tataholo vara o tinařihia i vano sohena, matan vara ū eři vai vevuhi na malele hinau tari i tataholo la masese.”

¹⁶ Ale Iesu mara mo paptijo, mo lo maraha na wai, ale vahatea purongo tuka mo roi, moiso mo hite Tanumen God mo Tapu mo sinai atano mo tau isana sohena vomahé matea. ¹⁷ Ale vahatea leo matea mo reti na tuka mo verea mara, “Harihi enia Natuku, na opoia mo tavera, ale na avulahi tavera hinia.”

4

Tiapolo Mo Vaihite Iesu (Mk 1.12-13; Lk 4.1-13)

¹ Moiso, Tanume Tapu mo tiroman Iesu mo vano na jara hasetoho vara Tiapolo i vaihitea. ² Ale Iesu mo tapuhoro na hanhāni mata rani mo ngavulu vati (⁴⁰) peresi na pongi mo ngavulu vati, (⁴⁰) moiso mo mate hana. ³ Tiapolo mo mai isan Iesu matan vara i vaihitea, ale mo verea mara, “Vara engko Natun God, o vere la vatu seila mai pereti.” ⁴ Pani Iesu mo ūramia mara, “Na Retiulia, God mo verea mara, ‘Tamlahi i sopo eři mauri na pereti purongo, pani na reti tari God mo verea.’” *Deut 8.3*

⁵ Moiso Tiapolo mo lavia mo sahe na taon tapu tavera sei Jerusalem, mo taua mo turu aulu na pingoping Temple ea, ⁶ ale mo verea isana mara, “Vara engko Natun God o kue, matan na Retiulia God mo verea mara, ‘Mo retileu isana nona angelo matam, matan vara la pa tauriho na limara,

ale o pa sopo eři vujahi na palom hin te vatu.’” *Psa 91.11-12*

⁷ Iesu mo ūramia mara, “La mele ulia na Retiulia God mo verea mara, ‘O sopo vaihite nom Moli God.’”

Deut 6.16

⁸ Ale Tiapolo mo mele lavi Iesu mo sahe aulu na vutivuti matea mo aulu jea, ale mo vujangia na jara tari na varama supe la lo tauri na suiha hinira peresi na nora tavytav tavera sei tamlohi la lo hasohasora matara. ⁹ Tiapolo mo verea isana mara, “Vara o popovitoho isaku, ale o lotuau a pa sileho hin la hinau tari sei.”

¹⁰ Moiso, Iesu mo verea isana mara, “Se-tan, o vano! Matan na Retiulia God mo verea mara, ‘O pa lotu nom Moli God,

ale o volitusi isana hasena purongo!’”

Deut 6.13

¹¹ Moiso, Tiapolo mo tinařihi Iesu, ale vahatea purongo, angelo hai la mai isana Iesu la tuenia.

Iesu Mo Tapulo Vavahinau

(Mk 1.14-15; Lk 4.14-15)

¹² Nake Iesu mara mo rongoa vara la tau John na ima ūlangi, mo mele hilu mo vano Galilee. ¹³ Ale mo tinařihi Nazareth mo vano mo lo toho Capernaum mariviti na tasi atu, na lolo jara matan Zebulun enia Naphtali, ¹⁴ matan vara retimangovi non p̄rovet Isaiah sei mara,

¹⁵ ‘La haratu na jara Zebulun enia Naphtali, peresi la haratu na tavalun tasi atu, peresi la haratu telesivo na wai Jordan, peresi Galilee jara tamlohi ūrořoha la lo toho ea,

¹⁶ la tamlohi atu la lo toho hin ūrořoha tavera atu la hite na malarani tavera atu, ale merana mo sasarami la haratu la lo toho na jara ūrořoha mata mateia.’

Isa 9.1-2

¹⁷ Hin rani atu Iesu mo tapulo vara i retivujavujangi mo verea mara, “Ha posí na nomim hehe matan i pa sopo tuai, suiha atu non God sei mo supe hinia i pa pala.”

Iesu Mo Vironi Na Nona Tamlohi

(Mk 1.16-20; Lk 5.1-11)

¹⁸ Iesu mo lo hahau na pahisa tasin Galilee, mo hite na vorai mo rua Simon la

tovia Peter enia tasina Andrew la lo tara na tasi atu matan enira tamlohi aleale maji.

¹⁹ Ale Iesu mo verea mara, "Ha mai ha usuriau a pa vai kamim ha mai tamlohi aleale tamlohi." ²⁰ Vahatea la tau na nora tara, ale la usuria.

²¹ Iesu mo mele vano makomo, mo hite na vorai mo rua, James enia John, natun Zebedee. La lo toho na boti matea peresi tamara Zebedee. La lo tulai na nora tara, ale Iesu mo tovira vara la usuria. ²² Vahatea la tinařihi tamara na boti, ale la usuri Iesu.

*Vayahinai Non Iesu Galilee
(Lk 6.17-19)*

²³ Iesu mo vano ūalihi na jara Galilee mo lo vujangi na ima lotu nona Jew, mo lo retivujavujangi na Retiřuhu matan mauri atu God mo aulu hinia isara. Iesu mo vai na tamlohi rojo peresi la haratu la majuejue mata rojoa la mele ūahu. ²⁴ Sorasoran Iesu mo vano na jara tari Syria. Tamlohi la lavi la haratu la rojo na rojoa matuvana la lo rongohaji na epera, hai la lo lavi na rani ūilangi matan tanume sasati mo lo toho hinira, hai la rave, hai la papao, Iesu mo vai mamahuni na nora rojoa tari. ²⁵ Vao tavera la tai Galilee, Decapolis, Jerusalem, Judea, ale na tavalu wai Jordan mo vano, la lo usuria.

5

*Iesu Mo Vujangi Aulu Na Vutivuti Matea
(Lk 6.20-23)*

¹ Matan Iesu mo hite na vao tamlohi la lo takonahi hin jara atu, ale mo sahe na vutivuti atu, ale mara mo sakele ea, nona tamlohi usuri la mai isana. ² Moiso mo tapulo retireti mo vujangira mo verea mara,

³ "Avulahi ūahu isan la haratu la lo kilau isan God hasena mata hinai tari, matan mauri atu God mo supe hinia i pa nora.

⁴ Avulahi ūahu isan la haratu la lo tangtangi matan God i pa nanaura.

⁵ Avulahi ūahu isan la haratu la lo ūomatano matan God i pa sile na varama isara.

⁶ Avulahi ūahu isan la haratu la lo marohati, ale la lo mařohu vara la vai na masalon God,

Isa 61.2

Psa 37.11

matan enia i pa tuenira la vai na masalona, enira la pa masu.

Isa 55.1-2

⁷ Avulahi ūahu isan la haratu la lo ūomopoi na tinapua matan God i pa ūomopoiru.

⁸ Avulahi ūahu isan la haratu mapura la vokevoke matan la pa hite God.

Psa 24.3-4

⁹ Avulahi ūahu isan la haratu la lo tueni na tamlohi vara la sari tamata matan God i pa tovira natuna.

¹⁰ Avulahi ūahu isan la haratu tamlohi la lo tipahira mata nora posposi tataholo, matan mauri atu God mo aulu hinia i pa nora. *1Pe 3.14*

¹¹ Avulahi ūahu isamim vara tamlohi la kali kamim teni vara la tipahi kamim teni la vere na retisasati tinatinapua hin kamim na retihaluhalu matan kamim noku tamlohi.

1Pe 4.14

¹² Ha uloulo, ha avulahi tavera matan nomim otori na tuka mo tavera mo sohena p̄rovet tuai sei tiroma tamlohi la lo tipahira.

2 Chron 36.16; Acts 7.52

*Solo Peresi Na Malarani
(Mk 9.50; Lk 14.34-35)*

¹³ Kamim ka sohena solo mata varama, pani vara mejina i tihai i pa mele lavi na mejina sohena sava? I pa sopo mele ūahu matan te hinau, ale la pa pulahi nařihia, ale tamlohi la pa hahau hinia. ¹⁴ Kamim ka sohena malarani mata varama. Vara te taon tavera i lo toho aulu na vutivuti i pa sopo eři luhu. ¹⁵ Ale tamlohi la sopo tauhoro na lamu hin te tanga, pani la ke-hohia aulu vara i sile na merana isana tamlohi tari na lolo ima. ¹⁶ Ale sohen haratu, ha vai na maurimim i memera i ūahu matan vara tamlohi la pa hite na nomim vayahinai ūahu ka lo vaira, ale la pa tahe aulu na hijan Tamamim na tuka.

Vujangi Mata Leu

¹⁷ Ha sopo ūomromia vara na mai vara a lavi nařihia na leu teni sava p̄rovet la verea. Na sopo mai vara a lavi nařihira, pani vara hinai tari la pa masese hinira. ¹⁸ Vararuhu na vere kamim hinia, i pa sopo te sope

maki teni te reti hatea i eři tihai na Leu non God vavano hinau tari hinia la masese tiroma moiso tuka peresi na varama la pa tihai. ¹⁹ Vara tea mo tope te retileu rihirihi matea na leu, ale mo lo vujangi na tinapua vara la vaia sohena, tamlohi atu i pa toho atano jea hin mauri atu God mo aulu hinia na tuka, pani vara tea mo lo oolo na leu, ale mo lo vujangi na tinapua vara la oolo na leu, tamlohi atu i pa lavi na hija aulu hin mauri atu God mo aulu hinia.

²⁰ Na vere kamim hinia, vara nomim posposi mo sopo tataholo varařuhu, i jue na posposi tataholo halu nona Pharisee peresi na tamlohi vujangi mata leu, ha pa sopo eři unu hin mauri atu God mo aulu hinia.

Vujangi Mata Lolokoru

²¹ Ka rongo na sava la verea isana tamlohi tuai lara, ‘Ha sopo vilimatei na tamlohi. Vara tea mo vilimatei te tamlohi i pa turu na aria.’ *Exo 20.13; Deut 5.17*

²² Pani na verea isamim, vara ka lolokoru peresi na voraimim matea, ka levosahia moiso vara ha pa turu na aria, ale vara ha kali te voraimim hatea, ka levosahia moiso vara ha pa turu na court tavera nona Jew, ale vara ha vere na voraimim matea vara mo řommate, ka levosahia moiso vara ha pa vano hin hapu atu na moruhapu.

²³ Ale matana, vara ka lo lavi na nomim silesilea vara ha pa taua na votavota mata malamalai, ale vara ka řomřomia vara voraimim matea mo lolokoru hin kamim matan ka vai te hinau matea, ²⁴ ale ha tau na nomim silesilea atu na votavota mata malamalai, ale ha vano ha vai na tamata peresia tiroma, moiso ha pa mele mai vara ha sohai na nomim silesilea. ²⁵ Vara nomim meresahi mo opoia vara i tau kamim na court ha vaia i mai tapalamim matea vila na malele ka lo vano na court. Vara i vono i pa vai kamim ha vano na lima tamlohi aria, ale i pa tau kamim na lima tamlohi mata ima řilangi, ale i pa tau kamim na ima řilangi. ²⁶ Varařuhu, na vere kamim hinia, ha pa sopo eři malue hin ima řilangi atu i tikeli na rani ha voli vevuhi na nomim ave ka vaira.

Vujangi Mata Lahi

²⁷ Ka rongo na sava la verea moiso lara, ‘O sopo juruvi peresi te hařai mo sopo naroum’. *Exo 20.14; Deut 5.18*

²⁸ Pani na vere kamim hinia, vara tea mo kilau na hařai matea ale mo řomusuri hinia, mapuna mo pete vaivaileu peresia moiso. ²⁹ Vara matua matam mo hite te hinau mo vaiho ko opoia vara o vai na hehe, o julai nařihia o pulahia. I pa mele řuhu jea vara te tavalu epem hatelete purongo i tihai hin haratu vara enira mo isoiso la pulahira na moruhapu. ³⁰ Vara marau limam mo vaiho ko opoia vara o vai na hehe, o tai rotoa o pulahia. I pa mele řuhu jea vara te tavalu epem hatelete purongo i tihai hin haratu vara enira mo isoiso la pulahira na moruhapu.

Vujangi Mata Rohu Na Naroum (Mt 19.9; Mk 10.11-12; Lk 16.18)

³¹ La ulia moiso vara tea mo opoia vara i řohu hin narouna i pa eři sile na certificate matea mata i řohu purongo hinia. ³² Pani enau na lo vere kamim hinia, vara mo sopo tataholo vara tea i řohu hin narouna matan te hinau, pani vara narouna mo vai na posposi viriu peresi na tamlohi tinapua, ale vara te tamlohi tinapua i lahi peresi na hařai sohen haratu, tamlohi atu mo vaivaileu peresia.

Vujangi Mata Retitauhi

³³ Ka rongoa la verea isana piřa tuai lara, ‘O sopo tope na nom retitauhi, ale o pa turu na nom retitauhi ko vaia na hijan Moli’. *Num 30.2*

³⁴ Pani enau na vere kamim hinia vara ha sopo vere na nomim retitauhi na hijan tuka matan tuka enia jara sakele mata suiha non God, ³⁵ ha sopo vere na nomim retitauhi na hijan varama matan varama enia jara palon God. Ha sopo vere na nomim retitauhi na hijan Jerusalem, matan haratu enia taon tavera non supe tavera atu. ³⁶ Ale ha sopo vere na nomim retitauhi na patumim matan ha sopo eři vai te vulu hatea i lulu teni i viriha. ³⁷ Vara ha vere na nomim retitauhi ha verea purongo vara ‘io!’ teni ‘mo vono!’ Ha sopo mele vere te hinau i aulu hin haratu matan hinau tinapua mo tai isan Tiapolo.

Vujangi Mata Kelekele (Lk 6.29-30)

38 Ka rongoa la verea tuai moiso lara, 'Mata matea mata mata matea' ale 'Hurū matea mata hurū matea'. *Exo 21.24; Lev 21.24*

39 Pani nake enau na lo vere kamim hinia vara ha sopo kele haratu mo komo kamim. Vara tea i vojai na tavalu esem o majinga hinia vara i mele vojai na tavalu esem tinapua. **40** Vara tea mo reveho ko vano na court matan vara o sile na nom ruru isana, o silea peresi na nom ruru mata hamariri. **41** Vara te tamlohi vuro mo lo ngurunguru hiniho vara o sapele na nona tanga mata kilometre matea, o sapelea mata kilometre i rua. **42** Vara tea i usiho matan te nona opoia o silea, ale o sopo ūahu vara tea mo opoi te nom hinau tako.

Opoi Nom Meresahi (Lk 6.27-28, 32-36)

43 Ka rongoa la verea moiso lara, 'O opoi na tahisam!' Ale lara, 'O ūahu na nom meresahi!' *Lev 19.18*

44 Pani enau na lo vere kamim hinia vara, ha opoi na nomim meresahi, ale ha usiusi matan la haratu la lo tipahi kamim, **45** matan vara ha pa vai na vavahinau non la haratu la natun Tama varauhu na tuka, matan enia mo vai na alo mo mera isana tamlohi ūahu peresi na tamlohi sasati, ale mo sile na usa isana tamlohi tataholo peresi na tamlohi lejileji. **46** Matan vara ha lo opoi la haratu purongo sei la lo opoi kamim, ha pa sopo lavi na nomim otori isan God, ale la haratu la lo lavi na mania mata takis la lo opoi na tapalara purongo, ale ka hitea, la pa sopo lavi te volira matana. **47** Ale vara ha lo retioloolo isana tapalamim purongo, ka sopo vai te hinau ūahu i jeu na tamlohi ūahu matan enira la lo retioloolo isana tapalara purongo sohemim. **48** Ale matana, na lo verea vara tarea ha pa vai na hina tataholo sohen Tamamim na tuka mo tataholo ūahu."

6

Vujangi Mata Tueni

Ale Iesu mo mele verea mara,

1 "Vara ka vai na hina ūahu na naho tamlohi, ha sopo vaia matan vara tamlohi la pa hasohaso kamim matana, matan vara

ha vaia sohena, Tamamim na tuka i pa sopo sile na otori isamim.

2 Vara ka silesile isana tamlohi tilavono, ha sopo tiv na tavue matana. Hinau atu tamlohi tapnetano la lo opoia mo tavera vara la lo vaia na naho tamlohi na ima lotu, ale na jingoima vara la pa hasohasora matana. Varauhu, na verea isamim, enira la pete lavi na volira moiso. **3** Ale vara ha sile te hinau isana tilavono, ha sopo vaia vara tinapua i levosahia, **4** matan vara sava ka silea na jara luhu, Tamamim mo lo hite na sava ka lo vaia na jara luhu, ale enia i pa sile na otori isamim matana.

Vujangi Mata Usiusi (Lk 11.2-4)

5 Vara ka usiusi, ha sopo usiusi sohena tapnetano la lo vaia na ima lotu teni na jingoima vara tamlohi la pa hasohasora matana. Varauhu, na verea isamim, enira la pete lavi na volira moiso. **6** Pani engko vara ko usiusi o sivo na lolo ima o pelati na matarua, ale o usiusi isan Tamam tea i sopo hiteho. Tamam mo lo hite na sava ko lo vaia hin jara luhu atu, moiso o pa lavi na nom otori matana.

7 Ale vara ha usiusi ha sopo verevere vono sohena tamlohi ūahu. La lo ūromūria vara nora god la pa ūaramira matan nora reti mo matuvana. **8** Matan haratu, ha sopo sohera matan Tamamim mo pete levosahi na nomim opoia moiso ka pa usia isana. **9** Ale ha usiusi sohen harihi: God Tamamam na tuka,

kama opoia vara tamlohi tari
la sile na oloolo tavera isam
mata engko ko tapu,

10 kama opoia vara nom
suiha aulu mata supe i pala,
o vai na masalom na varama

i tataholo sohen ko lo vaia na tuka,
11 o sile kamam na hanhani
matan nohorihī,

12 o ūomi kamam
mata nomam hehe,
sohen kama lo ūomi
na hehe nona tamlohi tinapua,

13 o lavi nārihi kamam na vahite,
o juri kamam hin Tiapolo.

14 Matan vara ha ūomi na tinapua na nora hehe la vaia isamim, Tamamim na tuka i pa ūomi kamim mata nomim hehe.

¹⁵ Pani vara ha sopo ūromi na tinapua, Tamamim i pa sopo ūromi na nomim hehe.

Tapuhoro Na Hanhani Mata Usiusi

¹⁶ Na rani vara ka tapuhoro na hanhani ha sopo vai na nahomim la rara sohena tapnetano la lo vaia. Vara ūruhu, na verea isamim, enira la pete lavi na volira moiso.

¹⁷ Pani vara ko tapuhoro na hanhani, o hoje na nahom, o paspasi na patum hin te makomo wel, ¹⁸ matan vara tinapua la pa sopo levosahia vara ko tapuhoro na hanhani mata usiusi, pani matan vara haratu mo sopo tea i eři hitea enia Tamam sei, enia hasena i pa hite na sava ko lo vaia na jara luhu, moiso i pa sile na nom otori matana.

Tavtav Na Tuka

(Lk 12.33-34)

¹⁹ Ha sopo takonahi na tавтав na varama, matan pepe peresi ūraha la pa komora, ale tamlohi vavanaho la pa kauti na ima la unu vara la vanahora. ²⁰ Pani ha takonahi na nomim tавтав aulu na tuka matan pepe peresi na ūraha la pa sopo eři komora, ale tamlohi vavanaho la pa sopo unu la vanahora, ²¹ matan mapum i pa lo toho tarea na jara nom tавтав mo lo toho ea.

Malarani

(Lk 11.34-36)

²² Matam enia mo sohena glas niro matea mata epem. Vara matam mo niro mo ūruhu, memera i pa mařivisi na epem.

²³ Pani vara matam mo sovsoha, epem tari la pa ūrořoha. Vara malarani na lolom mo sopo malarani, pani mo ūrořoha, ūrořoha atu i pa tavera jea.

Mania

(Lk 16.13)

²⁴ Mo sopo tea i eři volitusi varauhu isana tamlohi tavera tinapua i rua. I pa opoi matea i jeu haratu matea, teni i pa oloolo hin matea i jeu haratu matea. Ha pa sopo eři volitusi isan God na tavalu limam matea, ale na tavaluna tinapua ha volitusi isana mania! *

Romkaka

(Lk 12.22-31)

* ^{6:24:} Matam nike enia mapum, vara mapum mo hehe o pa opoi na hinau mata ūrořoha, ale hina ūrořoha la pa taurilati na maurim tari.

²⁵ Na vere kamim hinia vara ha sopo ūromkaka mata maurimim, ha sopo ūromkaka vara sava ha pa hania, teni ha pa inu te sava, teni ha pa rua na sava. Sohena sava mauri mo sopo jeu na hanhani, ale epemim mo sopo jeu na ruru? ²⁶ Ha to kilau sahe na maji avuavu na masapa! La sopo lalavo teni la vu na asitauni. La sopo takonahi na piri na ima piri, pani Tamamim na tuka mo lo kilaura. Sohena sava ka ūrom vara ka sopo ūruhu jea i jeu na maji avuavu? ²⁷ Romkaka, i eři vai kamim ha mauri i mele peravu?

²⁸ Mo sopo ūruhu vara ha lo ūromkaka mata nomim ruru. Ha kilau vano sohena sava pa vira jala la lo ulua. La sopo voko vara lakolako na epera. ²⁹ Pani na verea isamim vara supe Solomon peresi na nona tавтав tari peresi na nona ruru ūruhu mo lo rura, la sopo ūruhu sohen te vonara hatea.

³⁰ Vara God mo vai na hinau la ulua hasera na jara tavera la ūruhu jea mata makomo rani purongo, pani pavuho la mate, ale la pulahira na hapu, pani ha lo levosahia, God i pa kilau mamahuni kamim i mele ūruhu jea i jeu la vira jala sei. Mata sava nomim rasua mo rihibihi purongo?

³¹ Ha sopo ūromkaka vara, ‘ra pa hani te sava hinau?’ teni ‘ra pa inu na sava?’ teni ‘ra pa ru te sava?’ ³² Haratu sei la tamlohi ūrořoha la lo ūromkaka matan la hinau tari sei. Tamamim na tuka mo levosahia na hinau tari ka opoira. ³³ Pani ha ale mauri atu God mo aulu hinia tiroma peresi na nona posposi tataholo, ale hinau tari sei la pa nomim.

³⁴ Ha sopo ūromkaka matan pavuho, matan pavuho i pa hasena kilaua. Ale rani hatehateahi la pa lavi na nora hina ūrilangi hasera.

7

Ha Sopo Ari Na Tinapua

(Lk 6.37-38, 41-42)

¹ Ha sopo ari na tinapua matan vara God i pa sopo ari kamim. ² Na sava malele ka lo ari na tinapua hinia, la pa ari kamim hinia sohena, vara nomim aria mo puhoni isana tinapua, God i pa vaia sohena

isamim. ³ Ko eři hitevosahi na utauta rihirihi na matan voraim, pani mata sava ko sopo eři hitevosahi na masunga vipahai na matam? ⁴ Teni o pa eři verea isan voraim sohena sava vara, ‘Tapala o tinařihiau a lavi nařihi na utauta rihirihi matea na matam!’ pani ko sopo hitevosahi na masunga vipahai na matam hasem? ⁵ Engko tapnetano, o lavi nařihi na masunga vipahai na matam hasem tiroma, matan vara o pa eři kilau i ūruhvara o lavi nařihi na utauta rihirihi na matan voraim.

⁶ Ha sopo sile na hina tapu non God isana viriu, matan enira la pa posí la hatisatihihio, ale ha sopo sile na nomim huřutavila isana poi, matan la pa lo varasihira purongo.

Usia, Alea, Rerengi (Lk 11.9-13)

⁷ Ha usia, ale la pa silea isamim, ha alea, ale ha pa vileia, ha ūrerengi, ale pelati i pa roi isamim. ⁸ Haratu la usia la pa lavia, haratu la alea la pa vileia, ale la haratu la lo ūrerengi, pelati i pa roi isara. ⁹ Teni te vonamim i pa eři sile na vatu isan natuna vara mo usia na pereti? ¹⁰ Teni te vonamim i pa eři sile na mata isan natuna vara mo usia na maji tasi? ¹¹ Vara kamim tamlohi hehe ka levosahi na sava otori sei mo ūruhvara ha pa silea isana natumim, ka levosahia moiso vara posin Tamamim na tuka mo jeu na posposi tamlohi, ale i pa sile na otori ūruh isan la haratu la usia.

Leu Mata Opoia

¹² Ale matana, ha vaia isana tinapua sohena ka opoia vara la vaia isamim matan harihi mo mařivisi na Leu non God peresi na reti nona přovet tuai.

Malele Mo Rua (Lk 13.24)

¹³ Ha unu na matarua rihirihi, matan vao tavera la lo unu na matarua tavera, ale la lo usuri na malele mo tavera sei mo lo vano na talai non God, ale i pa komora. ¹⁴ Pani matarua atu mata unu na malele mata mauri mo rihirihi, malelena mo ūrlangi, ale tupu visalete purongo la vileia.

Přovet Haluhalu (Lk 6.43-45)

¹⁵ Ha lo kilau mata přovet haluhalu! La pa mai sohena tamlohi tuetueni, pani na lolora la sohen viriu varavarahati matan la pa komo na nomim rasua. ¹⁶ Ha pa eři hitevosahira na nora vavahinau. Ha sopo eři vu na vua grape na talu kaulu teni vua fig na asi matemate. ¹⁷ Hin malele atu pahai ūruh tari la pa sile na vua ūruh, pani pahai sati i pa sile na vua sasati. ¹⁸ Pahai ūruh i sopo eři sile na vua sasati, ale pahai sati i sopo eři sile na vua ūruh. ¹⁹ Pahai tari sei la sile vua sasati la pa taijovira, ale la pulahira na hapu. ²⁰ Ha pa eři hitevosahi na přovet haluhalu na nora vavahinau.

Retiroaroahai Matea (Lk 13.26-27)

²¹ Mo sopo tamlohi tari sei la lo toviau lara, ‘Moli! Moli!’ la pa lavi mauri atu God mo aulu hinia, pani la haratu purongo sei la lo ooloolo hin Tamaku na tuka la pa unu hinia. ²² Na rani mata aria, tamlohi matuvana la pa toviau vara, ‘Moli! Moli!’ La pa verea lara, ‘Kama lo retivujavujangni hijam, ale na hijam kama lo titiu na tanume sasati, ale kama lo vai na hina mařurahi matuvana hinia.’ ²³ Pani a pa verea isara vara, ‘Kamim, ka sopo noku tamlohi! Ha malue, kamim ka tamlohi tope na leu!’

Ima Mo Rua (Lk 6.47-49)

²⁴ Ale vara tea mo rongo na noku reti, ale mo vaira, mo sohena tamlohi lelevosahi matea sei mo voro na imana na vatu. ²⁵ Tavara mo jovi, ale wai mo tavei mo mai peresi na langi ūrlangi la vili ima atu, pani mo sopo jovi matan mo voroa na vatu. ²⁶ Ale vara tea mo rongo na noku reti, pani mo sopo vaira, mo sohena tamlohi rongorongo vono matea sei mo voro na imana na oneone. ²⁷ Tavara mo jovi, ale wai mo tavei mo mai peresi na langi ūrlangi la vili ima atu, ale ima atu mo jovi mo maroe.”

²⁸ Hin rani atu Iesu mo vere harihi mo isoiso, vao atu la mařurahi tavera na nona vujangji, ²⁹ matan mo vujangira sohena tamlohi aulu matea, mo sopo sohena nora tamlohi vujangji mata leu.

8

Tamlohi Lepros Matea
(Mk 1.40-45; Lk 5.12-16)

¹ Hin rani atu Iesu mo lo sevuti na vutivuti atu, vao tavera jea la lo usuria. ² Ale hin rani atu tamlohi lepros matea mo mai mo papaohi isana mo verea mara, “Moli, vara o opoia, o eři vaiau a vokevoke na noku rojoa.”

³ Iesu mo sohai na limana moiso mo tikelia, ale mo verea mara, “Enau na opoia. O vokevoke!” Vahatea purongo lepros atu mo tihai. ⁴ Moiso Iesu mo verea isana mara, “O sopo vere hinau nike isan tea, pani o vano o hase vujangihio isana pris vara ko mele ūruhu, ale o sile na hina sile-silea sohen Moses mo retileu hinia matan vara tamlohi tari la pa levosahia vara engko ko vokevoke moiso.”

Rasua Hin Iesu
(Lk 7.1-10; Jn 4.43-54)

⁵ Ale Iesu mo pa lo unu na vanuan Caper-naum, captain mata tamlohi vuro matea mo mai isana mo usia ūlangi isana, ⁶ mara, “Moli, o tueniau, noku volitusi mo lo juruvi na ima, epena mo ūira, mo lo lavi na rani ūlangi tavera.”

⁷ Moiso, Iesu mo verea isana mara, “A pa vano a vai na nona rojoa i tihai!”

⁸ Pani captain mata tamlohi vuro atu mo verea mara, “Moli, enau na sopo ūruhu matan vara o unu na imaku, pani o verea purongo, ale noku volitusi i pa ūruhu.”

⁹ Matan enau sohem, na lo toho na ruhu-ruhu suiha aulu tinapua, ale la sileau na suiha vara a aulu na noku tamlohi vuro, vara a vere isan te hatea vara, ‘O vano!’ ale i pa vano, vara a vere isan te tinapua vara, ‘O mai!’ ale i pa mai, vara a verea isana noku volitusi vara, ‘O vai haranike!’ ale i pa vaia.”

¹⁰ Ale Iesu mara mo rongo hinau sei mo mařurahi tavera, ale mo posí mo verea isan vao atu la lo usuria mara, “Varařuhu na verea isamim vara na sopo lo tapai te rasua sohen harihi na lolon Israel. ¹¹ Na verea, tamlohi matuvana na jara tari na varama la sopo Jew, la pa mai la sakele matavuhi na hanhani tavera peresi Abraham, Isaac enia Jacob hin mauri atu God

mo aulu hinia. ¹² Pani tatua tahisan Abraham la pa pulahira na ūrořha tavera, la pa tangi, ale la pa nařnařori na huřura.”

¹³ Ale Iesu mo verea isan captain atu mara, “O eři vano na imam natu. Ale i pa masese sohen ko rasua.” Vahatea nona volitusi mo mele ūruhu.

Mo Vaitihai Na Rojoa
(Mk 1.29-34; Lk 4.38-41)

¹⁴ Iesu mo pa lo unu na iman Peter, ale mo hite vepalihan Peter mo lo juruvi na vata mo sereia. ¹⁵ Mo tauri na limana, ale seserei atu mo tihai moiso hařai atu mo mele turu mo vai na hanhani hani Iesu.

¹⁶ Hin ravravi atu, tamlohi la lavi na tamlohi matuvana sei tanume sasati mo unu hinira la mai isan Iesu, ale mo reti purongo, ale nona reti atu mo titiu nařihi na tanume sasati isara, ale mo vai na tamlohi rojo tari la ūruhu. ¹⁷ Ale sava přovet Isaiah mo verea moiso mo masese sei mara: ‘Mo lavi nařihi na nořa rojoa, ale mo vairā ūruhu.’

Isa 53.4

Mauri Vara O Usuri Iesu
(Lk 9.57-62)

¹⁸ Iesu mara mo hite na vao tavera atu la lo mai la lo turu porotia, ale mo verea isana nona tamlohi vara la pa usuria la vano roto na tasin Galilee.

¹⁹ La sopo lo vano tamlohi vujangi mata leu matea mo mai isana mara, “Tija, a pa usuriho na sava jara o pa vano ea!”

²⁰ Iesu mo verea isana mara, “Viriu jala nora jara juruvi la lo toho, ale maji avuavu taura la lo toho, pani Natun Tamlohi mo sopo te jara vara i lo toho ea.”

Dan 7.14

²¹ Nona tamlohi usuri tinapua matea mara, “Tija, a pa mai, pani o tinařihia vara a tavuni tamaku tako.”

²² Pani Iesu mo verea isana mara, “O usuriau! Haratu la mate la pa tavuni na nora mate!”

Mo Horo Na Langi Tavera
(Mk 4.35-41; Lk 8.22-25)

²³ Ale Iesu mo pa lo vele hin boti atu, nona tamlohi usuri la usuria, ²⁴ ale hin rani atu la vano, ale langi tavera matea mo jovi hin tasi atu, ale mariviti suhusuhu la lo putehi na botira natu, pani Iesu mo lo juruvi, ²⁵ ale na nona tamlohi la vano isana la ūrořha lara, “Tija! O juriřa! Ra lo pute!”

26 Pani Iesu mo verea isara mara, “Ka matahu mata sava? Nomim rasua mo rihirihi hajavua!” Ale mo turu mo reti ūlangi isana langi peresi tasi atu vara la tamata, ale hinau tari la tamata.

27 Ale la nona tamlohi atu la mařurahi tavera hinia lara, “Sava tamlohi nahai sohena, matan langi peresi na tasi sohena la oolo lo hinia?”

*Mara Gadara Na Taptap
(Mk 5.1-20; Lk 8.26-39)*

28 Iesu mo hoso na tavalu tasi atu mariviti hin jara tavera atu Gadarene, ale hin jara atu tamlohi mo rua tanume sasati la lo toho hinira, la tai na taptap la mai isana. La tupra rua atu enira la putu, ale la lo vaisati na tamlohi, ale la vai na tamlohi la matahu matan vara la lo hahau hin jara atu. **29** Ale vahatea purongo, la ulo lara, “Natun God! Engko te nom sava isamam! Ko mai nakerihi matan vara o sile na talai isamam sei mo sopo lo ranina tataholo?”

30 Vao poi tavera matea mo lo toho assau makomona hinira la lo susua, **31** ale la tanume sasati atu la usia ūlangi isan Iesu lara, “Vara o tiu nařihi kamam, o ūrule kamam kama unu hin vao poi atuvano!”

32 Ale Iesu mo verea isara mara, “Ha vano!” Moiso la malue la vano la unu hin vao poi atu, ale vahatea purongo vao poi atu la maro la solesole la jovi na pesapesa atu la pute na tasi. **33** Moiso tamlohi kilau na poi atu la maro la vano na taon tavera mariviti hin jara atu la vere na hinau tari la masese hin la tamlohi putu atu tanume sasati la lo toho hinira. **34** Ale hin rani atu tamlohi tari na nora taon tavera atu la mai vara la tapai Iesu, ale lara la hitea la usia ūlangi isana vara i malue na jarara.

9

*Tamlohi Papao Matea
(Mk 2.1-12; Lk 5.17-26)*

1 Ale Iesu mo mele vele hin boti atu mo hilu mo vano roto na tasi mo hoso mariviti hin taon atu mo lo tohoa ea. **2** Ale hin rani atu, tamlohi hai la lavi na tamlohi papao matea na epa la mai isana, ale Iesu mara mo hitevosahi na rasua nona tapalan tamlohi papao atu, mo verea isana mara, “Natuku, ūromim i ūlangi! Na ūromiho mata nom hehe.”

3 Ale hin rani atu, tamlohi vujangi mata leu hai la lo toho atu la lo hasera ūromūromia na ūromira lara, “Tamlohi akerihi mo lo vaia sohena enia God.”

4 Pani Iesu mo levosahi na sava la tamlohi sei la lo ūromūromia, ale mo verea mara, “Ka lo ūromhehe na mapumim mata sava?”

5 Sahara mo mele malum vara a verea isan tamlohi papao nike? ‘Enau na ūromiho mata nom hehe!’ Teni vara a verea vara, ‘O turu! O hahau!’ **6** Pani matan vara ha pa levosahia vara Natun Tamlohi mo lavi na suiha vara i ūromi na hehe nona tamlohi na varama, ha tapurongo!” Ale Iesu mo verea isan tamlohi papao atu mara, “Na vereho hinia, o turu, o viriviri na epam, ale o mule!”

7 Ale tamlohi papao atu mo turu mo mule. **8** Vao tamlohi atu lara la hitea, matahu mo sohonira, ale la tahe na hijan God matan enia mo sile na suiha sohen harihi isana tamlohi.

*Iesu Mo Tovi Matthew
(Mk 2.13-17; Lk 5.27-32)*

9 Iesu mo pa lo vano, mo hite na tamlohi matea mo lo lavi na mania mata takis mo lo sakele na jara mata voli na takis. Iesu mo verea isana mara, “Eh! O mai o usuriau!” Ale Matthew mo turu, mo usuria.

10 Hitahu Iesu peresi na nona tamlohi usuri la lo sakele la lo hanhani na iman Matthew, ale hin rani atu tamlohi mata lavi na mania mata takis peresi na tamlohi hehe tinapua matuvana sohera la lo sakele la lo hanhani peresira. **11** Pharisee atu lara la hitea, ale la usi na tamlohi usuri non Iesu lara, “Mata sava nomim tija mo lo hanhani matavuhi peresi la haratu la lo lavi na mania mata takis peresi na tamlohi hehe tinapua sei?”

12 Pani Iesu mara mo rongoa mo verea mara, “Haratu la sopo rojo la sopo opoi na doctor, pani la haratu la rojo la opoia.

13 Ha vano ha levosahi na ūramin Retiulia sei mo verea vara, ‘Na sopo opoi na malamalai, pani na opoia vara ha ūromopoi na tinapua.’ Enau na sopo mai vara a tovi la haratu la tataholo moiso vara la mai noku tamlohi, pani na mai vara a tovi la haratu la hehe.”

Hos 6.6

*Tapuhoro Na Hanhani
(Mk 2.18-22; Lk 5.33-39)*

¹⁴ Na rani matea tamlohi usuri non John tamlohi paptijo la mai isan Iesu la usia lara, “Mata sava kamam peresi na Pharisee na rani matuvana kama lo tau na rani mata tapuhoro na hanhani mata usiusi, pani nom tamlohi usuri la sopo tapuhoro na hanhani mata usiusi?”

¹⁵ Iesu mo ūaramira mara,

“Tavtavui tamlohi i pa lahi la sopo eři tapuhoro na hanhani mata usiusi hin rani atu la lo toho peresia. Pani vara nona meresahi la mai la lavi nařihia isara, ale hin rani atu natu la pa tapuhoro na hanhani mata usiusi.

Tavalu Ruru Paro

¹⁶ Te tamlohi i sopo eři lavi te tavalu ruru paro hatea i silivi na ruru tuai hinia. Vara i vaia sohena, tavalu ruru paro atu i pa vaia i mařari tavera i jeu haratu tiroma.

Waen Paro

¹⁷ Te tamlohi i sopo eři titisi na waen paro i sivo na jara waen la vaia na huri nani tuai matan waen paro atu i pa sosohi i ūari jara waen atu, ale i pa komoa peresi waen atu matan i pa roro nařihia. Waen paro mo tataholo na jara waen la vaia na huri nani paro purongo matan vara jara waen atu la vaia na huri nani peresi waen atu la pa toho i ūahu i tuai.”

Tamlohi La Tau Na Nora Rasua Hin Iesu (Mk 5.21-43; Lk 8.40-56)

¹⁸ Iesu mo pa lo vere harihi, ale vahatea tamlohi aulu matea mo mai isana, mo papaohi isana mo verea mara, “Venatuku mo mate nakerihi. O mai o tau na limam isana, ale i pa mele mauri.”

¹⁹ Iesu peresi na nona tamlohi usuri la turu la usuri tamlohi atu. ²⁰ La lo vano, ale vahatea ūrai matea mo rojo na rojo nona ūrai tauni mo sangavulu ūromana mo rua moiso mo mai na ūrina mo tikeli na revurevu ruru non Iesu. ²¹ Mo lo verea isana hasena mara, “Vara a eři tikeli na nona ruru purongo a pa mele ūahu.”

²² Ale Iesu mo posi isana mo hitea mo verea mara, “Romim i ūilangi! Nom rasua mo vaiho ko mele ūahu.” Ale ūrai atu mo mele ūahu vahatea purongo.

²³ Hin rani atu Iesu mara mo unu na iman pa tamlohi aulu atu, mo hite na tamlohi roro la lo roro na flute peresi na vao la

lo tangtangi, ²⁴ mo verea mara, “Ha malue! Hařarihi sei mo sopo mate! Mo juruvi ūromalih purongo!” Tamlohi tari atu la manaluluhi Iesu. ²⁵ Pani lara la sohai vao atu la sahe na jingoima moiso, Iesu mo unu mo vano na pahisa vatan hařarihi atu, mo tauri na limana, ale hařarihi atu mo turu. ²⁶ Ale sorasorahina mo vano ūalihi na jara tari atu.

Iesu Peresi Na Matavuso

²⁷ Moiso Iesu mo lo malue hin jara atu, ale tamlohi matavuso mo rua la lo usuria la lo ulo lara, “Mahapin Supe David, o ūromopoi kamam!”

²⁸ Ale Iesu mara mo unu na ima matea, la matavuso atu la mai isana. Iesu mo usira mara, “Ka rasua vara a pa eři vai kamim ha ūahu?”

La ūramia lara, “He'e Moli.”

²⁹ Ale Iesu mo tikeli na matara mara, “Matan nomim rasua, i pa sohena isamim.” ³⁰ Ale la matavuso atu la kilau, pani Iesu mo retiroařohairava la pa sopo mele verea isan tea, ³¹ pani la malue la lo sorahia isana tamlohi tari sei la tapaira na jara tari atu.

Tamlohi Mengo Mo Retireti

³² Iesu peresi na nona tamlohi la pa lo vano, ale vahatea purongo tamlohi hai la lavi na mengo matea mo mai isana mo mengo matan tanume sasati matea mo lo toho hinia. ³³ Ale Iesu mara mo tiu nařihia tanume sasati atu hinia, mengo atu mo retireti. Vao tavera atu la marurahi tavera la lo verea lara, “Mo sopo lo te hinau sohen harihi i malue Israel mo tikeli nake.”

³⁴ Pani Pharisee la verea lara, “Tamlohi tavera nona tanume sasati mo silea na suiha vara i tiu nařihia na tanume sasati sohen harihi.”

Iesu Mo Romopoira

³⁵ Ale Iesu mo vano mo lo vujangi na nora ima lotu na taon tari peresi na vanua tari atu. Mo retivujavujangi na Retiřuhu hin mauri atu God mo aulu hinia isara, ale mo vai la haratu la rojo peresi la haratu la majuejue mata rojoa la mele ūahu. ³⁶ Hin rani atu Iesu mo hite la vao tamlohi atu, mo ūromopoira matan ūromira la jovi la sohena natu marua. La sohena sipsip mo sopo te tavuira.

Num 27.17

³⁷ Mo verea isana nona tamlohi usuri mara, "Vua asitauni mo tavera jea, pani tamlohi isa la tupu visalete purongo. ³⁸ Ha usi tamlohi tavera atu sei mo aulu na asitauni vara i ūrule te tamlohi isa la vano na isana vara la vu na vua asitauni!"

10

Tamlohi Usuri Non Iesu (Mk 3.13-19; Lk 6.12-16)

¹ Ale Iesu mo tovi na nona tamlohi usuri mo sangavulu ūromana mo rua, mo silera na suiha vara la eři tiu na tanume lumiha sasati, ale vara la eři vai la haratu la rojo peresi la haratu la mařemare mata rojoa la sopo mele rojo. ² Hija vahařule non Iesu mo sangavulu ūromana mo rua enira nahai:

Simon, haratu la tovia Peter,
tasina Andrew,
ale James enia John natun Zebedee,

³ Philip,
Bartholomew,
Thomas,

Matthew haratu mo lo lavi na mania
mata takis,
ale James natun Alphaeus,

Thaddeus,

⁴ Simon mara Cana sei, enia tamlohi
matea mata valum mata jarana,
ale Judas Iscariot, haratu mo lo turuposi
hin Iesu.

Mo Rule Na Nona Tamlohi (Mk 6.7-13; Lk 9.1-6)

⁵ Iesu mo ūrule la tupu sangavulu ūromana mo rua atu, mo retileu mara, "Ha toho assau na jara tamlohi ūrofaha, ale ha sopo unu hin te taon non Samaria hatea, ⁶ ha vano isana tamlohin Israel purongo matan enira la sohena vao sipsip natu mařua matea, ⁷ ale ha vano ha retivujavujangi vara suiha atu non God mata supe i pa pala nohorihi.

⁸ Ha vai mamahuni la haratu la rojo, ha sauteterahi na mate, ha vai na tamlohi lepros la vokevoke, ha tiu nařihi na tanume sasati, matan ka lavi purongoi na suiha vara ha eři vai na hinau, ale ha sopo lavi te volimim matana isan tea. ⁹ Ha sopo lavi te mania na nomim tanga korohi, ¹⁰ ha sopo lavi te tanga mata nomim hahau, teni te ruru teni sabat teni te tihonimim tinapua hatea matan mo tatahola vara tamlohi jara la pa lo kilau kamim tamlohi voko. ¹¹ Ale

vara sava taon teni vanua ka unu hinia, ha usira hinia vara sava tamlohi enia tamlohi la lo ūromaulu hinia, ale ha pa toho peresia i tikeli rani atu ha mele malue hin jara atu. ¹² Vara ha unu hin te ima, ha sile na nomim leřuhu hinira. ¹³ Vara ka avulahi hin ima atu, ha sopo tinařihi na nomim leřuhu mata tamata, i pa lo toho isara, pani vara i vono, ha mele lavi nařihi na nomim leřuhu mata tamata isara. ¹⁴ Vara tea mo ūrohu hin kamim teni vara la sopo tapurongo na nomim retisohai, ha malue hin ima atu teni taon atu, ale ha sařsařhi nařihi na tangotango palomim isara. ¹⁵ Varařuhu na verea isamim, aria non taon akerihi i pa tavera i jeu na aria non Sodom enia Gomorrah.

Gen 19.24-28

Rani Rilangi La Pa Mai (Mk 13.9-13; Lk 21.12-17)

¹⁶ Ale nake natu, na lo ūrule kamim sohena natu sipsip isana vao viriu jala, matan haratu, ha pa tamlohi patuha, ale ha sopo vai te hinau i sati isara. ¹⁷ Ha lo kilau matan tamlohi la pa reve kamim na court, ale la pa tamaji kamim na nora ima lotu. ¹⁸ La pa reve tahitahi kamim ha vano isana tamlohi aulu peresi na supe na jara tinatinapua matan vara la pa ari kamim matak, ale i pa sile na masapa vara ha vereuli na nomim rasua hiniau isana tamlohi ūrofaha. ¹⁹ Pani vara tea mo taurilati kamim ha sopo matahu vara ha pa vere na sava, teni ha pa verea sohena sava, matan hin rani atu ha pa lavi na sava retireti ha pa verea, ²⁰ matan i pa sopo kamim ha pa retireti, pani Tanume Tapu sei mo tai isan Tamamim na tuka i pa vere kamim na sava ha pa verea. ²¹ Vorai i pa turuposi hin voraina vara i mate. Tama i pa turuposi hin natuna. Natuvarihi la pa ūrohu hin tamara peresi na tinara matan vara la taura na mate. ²² Tamlohi tari la pa tipahi kamim matan ka lo rasuau, pani haratu mo turu ūlangi mo tikeli na isoisona i pa juri. ²³ Vara la tipahi kamim na taon matea ha rovo ha vano na taon tinapua mo mariviti isana. Varařuhu na verea isamim, ha pa sopo lo isoiso ūalihi na taon tari Israel, ale Natun Tamlohi i pa mele mai isamim.

²⁴ Tamlohi usuri la sopo aulu la jeu na nora tija, ale slev la sopo aulu la jeu na nora

tamlohi tavera. ²⁵ Tamlohi usuri matea i pa avulahi vara i sohen nona tija, ale slev i sohen nona tamlohi tavera. Enau na patu tamlohi tavera mata ima, pani la verea vara patu tamlohi mata ima enia Beelzebul sei supe nona tanume sasati, ha lo levosahia vara la pa retisati hin kamim noku tamlohi.

Ha Sopo Matahu (Lk 12.2-7)

²⁶ Ha sopo matahunira. Mo sopo te hina luhu vara i pa sopo malue na jara tavera, ale hina luhu tari la pa pala na jara tavera. ²⁷ Ha vere na sava na verea isamim na ūroha ha verea na malarani; ale ha pa retivujavujangi na jara tavera na sava na varavaramasa hinia isamim.

²⁸ Ha sopo matahuni na tamlohi sei la pa tipahi kamim. La eři vilimatei na epemim, pani la pa sopo eři komo na maurimim. Pani ha matahuni God, matan enia i eři komo na maurimim peresi na tarapemim na moruhapu. ²⁹ Tamlohi tari la levosahia vara ha eři voli te vakarakara i rua na selen matea purongo. Pani mo sopo te hatelete vara i jovi na lepa Tamamim na tuka mo sopo levosahia. ³⁰ Ale Tamamim mo levosahia vara vulu mo visa la lo toho na patumim. ³¹ Matan haratu, ha sopo matahu. Kamim ka aulu na nahon God ka jeu na vakarakara matuvana.

Ha Sorahi Iesu (Lk 12.8-9)

³² Ale vara tea i verea na naho tamlohi vara enia noku tamlohi, ale enau sohena a pa verea isan Tamaku na tuka vara enia noku. ³³ Pani vara tea i verea vara mo ūruhinau na naho tamlohi, a pa verea na nahon Tamaku na tuka vara tamlohi atu mo ūruhinau.

Rani La Pa Sati (Lk 12.51-53; 14.26-27)

³⁴ Ha sopo ūromōnia vara enau na mai na varama vara a sile na tamata. Na sopo mai vara a sile na tamata, pani matan vara a ase na tamlohi. ³⁵ Matan na mai vara a vai na tamlohi i pa ūruhinau, ale venatuna i pa ūruhinau, ale narou natirihia i pa ūruhinau tuana. *Mic 7.6*

³⁶ Nomim meresahi la pa tai na lolo vaomim. ³⁷ Haratu mo opoi tamana teni tinana teni na natuna peresi na venatun

mo jeuau, enia mo sopo tataholo vara i mai noku tamlohi usuri. ³⁸ Na verea vara te mo sopo soloti na nona talopeilopei i usuriau, enia mo sopo tataholo vara i mai noku tamlohi usuri.

³⁹ Vara tea mo opoi na maurina enia i pa vaitihai, ale vara tea mo ūruhinau matakau, enia i pa vilei na mauri vararuhu.

Volvoli Matan Tuka (Mk 9.41)

⁴⁰ Haratu mo avulahi vara i lavi kamim, enia mo lo laviau, ale haratu mo laviau mo lavi haratu mo lo ūruleau. ⁴¹ Haratu mo hitevosahi na p̄ovet matea, ale mo avulahi mo lavia, enia i pa lavi na volina sohena p̄ovet matea. Haratu mo hitevosahi na tamlohi tataholo matea, ale mo avulahi mo lavia, enia i pa lavi na otori sohen tamlohi tataholo atu. ⁴² Ale haratu mo hitevosahi na noku tamlohi usuri matea, ale mo silea na hina rihirihi matea sohena paniken wai hamārihi matea isana, vararuhu na verea isamim, enia i pa lavi na nona otori matana.”

11

John Tamlohi Paptijo (Lk 7.18-35)

¹ Iesu mara mo lo retileu isan la nona tamlohi usuri atu mo sangavulu ūromāna mo rua moiso, mo malue mo vano ūralihi na nora taon tavera la lo toho hin jara atu vara i vujangira ale i retivujavujangira.

² John mo lo toho na ima ūlangi, ale mara mo rongo na sava Kristo mo lo vaira, mo ūrule na nona tamlohi usuri hai isana, ³ vara la usia isana lara, “Engko sei natu, haratu sei kama pa lo kilau matana, haratu sei God i pa ūrulea i sinai? Teni kama pa mele saovi matan te mele tinapua?”

⁴ Iesu mo ūramira mara, “Ha vano ha vere John na sava ka rongoa, ale ka hitea.

⁵ Nake, matavuso la kilau, ale tamlohi papao la hahau, haratu lepros mo hatira la mele vokevoke, peropero la rongo, haratu la mate la turu na mauri, ale tilavono la lo rongo na Retiruhu. *Isa 61.1*

⁶ Vara la haratu la sopo ūromua hiniau, la pa avulahi tavera.”

⁷ Ale la tamlohi atu la pa lo tapulo malue, ale Iesu mo sorahi John isan vao atu mara, “Hin rani atu ka lo vano vara ha hite John,

ka vano hin urata hasetoho atu vara ha hite te hinau sohena talu ere sei mo sopo ūlangi, ale langi mo serea mo lo hisuhisu teni mata sava? ⁸ Sava tamlohi natu, ka vano vara ha hitea? Ka hite tamlohi atu mo ru te ruru ūru? Ka levosahia vara tamlohi sei la lo ru na ruru sohen haratu enira la tamlohi tavytav purongo sei la lo toho na ima supe. ⁹ Ka lo vano vara ha hite na sava? Te p̄ovet matea? Vara ūru enia p̄ovet matea, enjora, pani mo jeu na p̄ovet, ¹⁰ Retiulia mo retireti hin John mara,

'O lo levosahia vara,
a pa ūrule na noku vahaūule matea
i tiroma hiniho vara i tatamahuni
na hinau matam.' *Mal 3.1*

¹¹ Vara ūru na verea isamim, mo sopo lo tea i vora hin varama nike i jeu John tamlohi paptijo. Pani haratu enia tamlohi purongo hin la haratu la lavi mauri atu God mo aulu hinia, enia i pa aulu i jeu John na pongi hitahu. ¹² Mo tapulo na rani non John tamlohi paptijo mo tikeli nake, tamlohi hai la lo opoia vara la tauri na suiha vara la aulu, ale vara la vere na masalon God vara mo vano sohena saya hin varama nike, ale tamlohi sasahati sohena la lo vai-hitea vara la taurilati suiha atu, ¹³ matan p̄ovet tari peresi na Leu non Moses la lo retimangovi tuai moiso mo tikeli na rani non John. Vara ha evia ha pa levosahia vara i pa pala sohena sava. ¹⁴ Ale vara ka avulahi vara ha rasua, John enia Elijah, p̄ovet atu ka lo kilau matana, ¹⁵ haratu mo eři rongovosahia, o tapurongo!

¹⁶ Kamim nakerihi ka sohena natuvarihi sei la lo vai na roro na jara maket, ale la lo uloulo isara lara, ¹⁷ 'Kama roro na pue tangtangi, pani ka sopo velu! Kama lavi na vete mata ūromi na tamlohi mate, pani ka sopo tangtangi!' ¹⁸ Na vere harihi matan John tamlohi paptijo mo sopo vano ūalihi vara i lo hanhani teni i lo inuinu peresi na tamlohi, pani ka vara, 'Tamlohi sei tanume sasati matea mo lo toho hinia!' ¹⁹ Ale Natun Tamlohi mo lo hahau ūalihi mo lo hanhani mo lo inu peresi na tamlohi, ale ka vara, 'Tamlohi sei mo lo hanhani, ale mo lo inu hajavua. Enia tapala tamlohi la lo lavi na mania mata takis peresi la haratu la hehe.' Vara ha sopo eři hitevosahi na lelevosahi

kama lo vaia nake, ha pa eři hitevosahia na vuana hitahu.'

Tamlohi Matuvana La Sopo Rasu Iesu
(Lk 10.13-15)

²⁰ Ale Iesu mo tapulo hapuhi la taon atu sei mo lo vai na hina mařurahi tavera hinira matan tamlohi hinira la ūru vara la tinařihi na nora hehe la mai isan God, Iesu mo verea mara, ²¹ "Kamim tamlohin Chorazin, ha pa lavi na talai sasati tavera, ale kamim tamlohin Bethsaida sohena, ha pa lavi na talai sasati tavera! Matan, vara la hina mařurahi nike na vaira isamim na nomim taon la pa lo malue na taon non Tyre peresi Sidon, tamlohim la pete pos tuai moiso la vano isan God, ale la vujangia hin posposi matan tuai sei, la lo ru na parat paki, ale la tau na patmakovi na patura.

Ezek 26.1-28.26

²² Pani na verea isamim, na rani mata aria tamlohin Tyre enia Sidon la pa malue i malum i jeu kamim. ²³ Ale kamim tamlohin Capernaum ka ūromi vara God i pa tahe kamim ha tikeli na tuka? Mo vono, ha pa sivo atano na varama mata mateia! Vara la hina mařurahi atu sei la lo malue na nomim taon la pa lo malue na taon non Sodom, nake taon atu mo pa lo turu! *Gen 19.24-28*

²⁴ Pani na verea isamim, na rani mata aria tamlohin Sodom la pa malue i malum i jeu kamim."

Ha Mai Isaku Ha Mapu
(Lk 10.21-22)

²⁵ Ale hin rani atu Iesu mo verea mara, "Enau na hasohasoho, Tamaku, Moli non tuka peresi na varama, matan ko jarohi la hinau tari nike isana tamlohi lelevosahi mata varama peresi na tamlohi la lavi na lelevosahi mata varama, pani ko vujangia isana tamlohi purongo. ²⁶ He'e Tamaku, matan harihi mo lo usuri na nom masalo ūromřuhu.

²⁷ Tamaku mo sileau na hinau tari, ale mo sopo tea, pani enia hasena purongo mo levosahi Natuna. Ale haratu purongo mo levosahi Tama, enia Natuna peresi la haratu Natuna mo opoia vara i vujangia isara.

²⁸ Vara ka malokoloko matan nomim tetehi mo puhoni hajavua, ha mai isaku, ale a pa tueni kamim, ha pa lavi na mapu

varařuhu. ²⁹ Ha lavi na noku vujangi, ha lavia na maurimim, ale ha levosahi na malele isaku. Enau na malum, enau na ūomatano, ale ha pa lavi na mapu varařuhu isaku.

Jer 6.16

³⁰ Noku vujangi mo sopo puhoni, noku vavahinau mo salesale purongo.”

12

Retiusia Mata Sabbath (Mk 2.23-28; Lk 6.1-5)

¹ Na rani mata Sabbath matea, Iesu mo lo hahau roto te isa wit. Ale nona tamlohi usuri la lo tapulo vesi roto na wit, ale la lo hanira.

Deut 23.25

² Pani Pharisee lara la hitera, la verea isan Iesu lara, “O to kilau vano, nom tamlohi usuri la lo vai na hinau matea mo sopo tataholo vara la vaia na Sabbath.”

³ Iesu mo verea isara mara, “Korong ka sopo lo evi na sava David peresi la haratu la lo toho peresia la vaia na rani la marohati.” *1 Sam 21.1-6* ⁴ Ale sohena sava mo unu hin ima ruru atu la lo lotu God ea, ale mo hani na pereti sei mo sopo tataholo vara enia teni nona tamlohi vara la hania matan enia mata p̄ris hasera?

Lev 24.9

⁵ Teni korong ka sopo lo evi na Leu sohena sava na rani Sabbath, na lolo ima lotu, p̄ris na Temple la lo tope na Sabbath matan la sopo mapu matan la lo vai mamahuni na nora vavahinau, pani la pa sopo ori matana? *Num 28.9-10* ⁶ Na verea isamim, matea mo lo toho peresi kamim mo tavera jea na Temple. ⁷ Ale vara ha pa lo levosahi na ūaramin hinau sei, ‘Na opoi na posposi ūromopoi, mo sopo malamalai!’ Ha pa sopo ari la haratu la sopo ori.

Hos 6.6

⁸ Matan Natun Tamlohi enia Moli mata Sabbath.”

Vujangi Mata Posposi Ruhu (Mk 3.1-6; Lk 6.6-11)

⁹ Mo malue hin jara atu mo vano mo unu na nora ima lotu ea. ¹⁰ Ale tamlohi matea mo lo toho atu limana mo kuti. Ale la tamlohi atu la usia isana lara, “O pa tope na leu vara o vai mamahuni te tinapua na Sabbath teni mo vono?” La usia sohena matan vara la pa tuvaia hinia. ¹¹ Iesu mo verea isara mara, “Hare vonamim matea pulana sipsip matea mo jovi hin te koko na Sabbath, i pa sopo tauria i sau nařihia?”

¹² Ka levosahia vara tamlohi mo aulu jea mo jeu na sipsip. Ale matana, mo ūruhvara ūa vai na hina ūruhu na Sabbath.”

¹³ Moiso, mo verea isan tamlohi atu mara, “O ūirahi na limam.” Ale tamlohi atu mo ūirahia, ale mo ūruhu sohena tapala limana.

¹⁴ Pani Pharisee la malue atu la matavuhi na jara matea vara la aleale malele matan vara la pa vilimatei Iesu hinia.

Iesu – Volitusi Non God

¹⁵ Pani Iesu mo levosahi na sava la lo vaia, ale mo malue hin jara atu. Vao tavera la usuria, ale mo vai mamahuni vevuhira na nora rojoa, ¹⁶ ale mo retileu vara la sopo vereuli na sava nakonako mo lo vaira.

¹⁷ Harihi, enia matan vara reti sei p̄rovet Isaiah mo verea vara la pa masese mara,

¹⁸ ‘O kilau vano!

Noku volitusi sei enia noku viřoni, enia haratu na opoi jea sei mapuku mo avulahi tavera hinia.

A pa tau na Tanumeku hinia,

ale enia i pa vereuli

na noku posposi tataholo

isana tamlohi ūrořoha.

Isa 42.1-4

¹⁹ I pa sopo vas teni i ulo ūilangi,

teni la pa sopo rongo

na leona vara i lo hase tahea

na malele tavera.

²⁰ Enia i pa malum,

i pa sopo kame

te ere sei mo mahope moiso,

teni i pa sopo vuni

te vara kandeli,

i tikeli pongi atu vara

i pa vaitataholoi na hinau tari,

²¹ ale tamlohi ūrořoha tinatinapu

tari la pa lo ūomtaho na hijana.’

Iesu Mo Jeu Tiapolo

(Mk 3.20-30; Lk 11.14-23; 12.10)

²² Moiso, tamlohi hai la lavi na tamlohi matea tanume sasati matea mo unu hinia mo vaia mo matavuso mo mengo, ale la lavia mo mai isana, ale mo vai mamahuni vara i eři retireti, ale mo eři kilau.

²³ Moiso tamlohi tari la mařurahi tavera hinia lara, “Korong haranike natu, enia mahapin David sei, haratu God mo viřonia mata juriřa teni mo vono?”

²⁴ Pani Pharisee lara la rongoa lara, “Tamlohi akerihi mo lo titiu nařihi na

tanume sasati na liman Beelzebul, supe nona tanume sasati tari!"

²⁵ Matan Iesu mo levosahi na ūromira mo verea isara mara,

"Vara na lolo jara matea supe la lo aseasehira hinia, i pa maroe, ale i pa sopo te taon tavera teni te vao ima vara i lo aseasehia hasena i pa eři turu. ²⁶ Ale vara Setan mo lo titiu nařihi na tanume sasati, enia mo lo aseasehia hasena. Ale jara atu mo lo tauri na suiha hinia i pa turu sohena sava? ²⁷ Ale vara enau na lo titiu nařihi na tanume sasati na suihan Beelzebul, ale na suihan hare natu te nomim tamlohi usuri la lo titiu nařihira hinia? Matan mo sohena, enira la pa ari kamim. ²⁸ Pani matan enau na lo titiu nařihi na tanume sasati na suihan Tanumen God, ale mo ūramaria vara suiha atu non God mata supe mo pete pala isamim moiso. ²⁹ Ale sohena sava natu, tea i eři unu na iman te tamlohi suiha hatea vara i vanaho te nona hinahinau hinia, pani vara mo sopo liholatia tiroma? Ale vara i liholatia i pa eři tivesi vevuhi na imana. ³⁰ Haratu mo sopo turu peresiau, enia mo lo hasena vaia mo meresahi isaku, ale haratu mo sopo reve takonahi na tamlohi peresiau, enia mo lo levuti jalajalaira.

³¹ Matana, na lo verea isamim vara hehe tari peresi na reti sati hin God tari, God i pa ūromira, pani vara tea mo vere lejileji na Tanumena vara enia Tiapolo sohen ka lo vaia, God i pa sopo eři ūromia. ³² Ale haratu mo lo vere lejileji Natun Tamlohi, God i pa ūromia, pani haratu mo lo vere lejileji Tanume Tapu, enia, God i pa sopo eři ūromia nake teni hin na pongi mo lo mai.

Nom Reti Mo Pisuhiko (Lk 6.43-45)

³³ Vipahai matea o eři hite usuria na namana, o vai vipahai atu i ūruhu, namana i pa ūruhu, o vai vipahai atu i sati, namana la pa sasati. ³⁴ Kamim natu mata sasati! Ha pa eři vere te hinau ūruhu sohena sava matan kamim ka sasati, matan sava ka lo verea mo vujangi na sava mo lo toho na mapumim. ³⁵ Tamlohi ūruhu matea mo pa lo vai na hina ūruhu mata nona posposi ūruhu ūruhu, ale tamlohi sasati matea mo pa lo vai na hina sati mata nona posposi sasati. ³⁶ Na verea isamim, na rani tavera mata aria, tamlohi tari la pa ūrami na

nora reti rongorongo vono tari sei la verera moiso, ³⁷ matan sava retireti ka verera, la pa vujangia vara ka tataholo na nahon God, ale matan sava retireti ka verera, la pa vujangia vara ka hehe na nahon God."

Matamata Non Jonah (Mk 8.11-12; Lk 11.29-32)

³⁸ Moiso tatua tamlohi vujangi mata leu peresi na Pharisee, la ūramaria lara, "Tija, kama opoia vara kama hite te matamata marurahi isam!"

³⁹ Pani Iesu mo ūramira mara,
"Tamlohi nake, enira tamlohi sasati, la vaivaileu peresi na tinapua mo lahi moiso, la lo ale na matamata, pani matamata atu a pa silea isara enia sohen matamata atu God mo vaia hin p̄ovet Jonah.

⁴⁰ Sohen Jonah mo lo toho na lolo pangon maji tavera atu rani mo tolu peresi na vutepongi mo tolu, enau sohena, Natun Tamlohi, a pa toho na lolo lepa mata rani i tolu peresi na vutepongi i tolu. ⁴¹ Mara Nineveh la pa sauteterahi na rani aria tavera peresi pina nike, ale la pa verea vara mo hehe, matan enira la posa na maurira mata retivujavujangi non Jonah, pani ka levosahia, matea mo aulu jea hin Jonah mo lo toho nike, pani ka sopo rasua. *Jonah 3.5* ⁴² Vesupe matan Sheba i pa sauteterahi na rani aria tavera peresi pina nike, ale i pa sile na talai isana, matan enia mo mai na jara asau na varama vara i tapurongo na reti lelevosahi non Solomon, ale nake matea mo aulu mo jeu Solomon mo lo toho nike.

1 Ki 10.1-10

Posposi Tanume Sasati (Lk 11.24-26)

⁴³ Hin rani atu vara te tanume lumiha mo malue hin te tamlohi, mo lo vano roto na jara mamasa vara i vilei te jara mapu, pani mara mo sopo vilei tea, ⁴⁴ mo verea mara, 'A pa mele hilu, a vano na ima na tai ea'. Ale mara mo pala mo tapai ima atu mo vuruvuru, mo hitea vara la tivesia, ale la tau tataholoi na hina tari na jarara. ⁴⁵ Ale nake, mo vano vara i lavi na tanume lumiha tupu limaravrua tinapua sei la mele sati la jeua. La mai, ale la unu, la lo toho atu. Na lo verea vara i pa sati jea isan tamlohi atu i jeu tiroma. Ale i pa sohen

haratu isan pina sasati nike, sei la lo ūru hiniau!"

*Tinan Iesu Peresi Na Tasina
(Mk 3:1-35; Lk 8:19-21)*

⁴⁶ Mara mo pa lo retireti isana tamlohi, ale vahatea purongo, tinana peresi na tasina la lo turu na jingo ima, la lo usia vara la eři retireti peresia, ⁴⁷ ale tea mo verea isana mara, "O kilau vano sevano, tinam peresi na tasim la turu na jingo ima, la opoia vara la retireti peresihō."

⁴⁸ Pani Iesu mo ūrami tamlohi atu mara, "Hare natu, enia tinaku? Ale hare natu, enia tasiku?" ⁴⁹ Mo ūrāhi na limana mo vano tataholo isana nona tamlohi usuri mo verea mara, "La haranike, enira tinaku peresi na tasiku! ⁵⁰ Matan hare mo lo vai na masalon Tamaku na tuka enia tasiku, vetasiku, ale tinaku."

13

*Tamlohi Hapořahi Matea
(Mk 4:1-9; Lk 8:4-8)*

¹ Hitahu hin rani atu, Iesu mo malue na ima, ale mo sivo mo sakele na pahisa tasi. ² Ale matan vao tavera la mai la lo turu porotia, Iesu mo vele na boti matea mo sakele hinia, ale vao tari sei la lo turu na oneone. ³ Moiso mo verera na hinau matuvana na titileu mara, "Tamlohi hapořahi matea mo vano vara i hapořahi te piri. ⁴ Mo pa lo hapořahi na piri, tatuara la jovi na malele, ale maji avuavu la mai la hani vevuhira. ⁵ Tatua piri la jovi na vatuvatu, lepa mo tavinvin purongo, ale la tuvu vahatea matan mo tavinvin, ⁶ pani alo mara mo vele mo sulira, ale la mahoa matan la sopo wariha. ⁷ Tatua piri tinapua la jovi na livuha vipahai ngařngāřiha, ale la vipahai ngařngāřiha atu la ulua la punira. ⁸ Tatua piri tinapua la jovi na lepa ūru la namaha, hai la tikeli vaha ngavu sangavulu ⁽¹⁰⁰⁾ hai vaha ngavulu limarave ⁽⁶⁰⁾ hai vaha ngavulu tolu ⁽³⁰⁾ hin haratu mo lo hapořahira tiroma. ⁹ Haratu mo peroha i tapurongo!"

*Retiusia Matan Titileu Atu
(Mk 4:10-12; Lk 8:9-10)*

¹⁰ Nona tamlohi usuri la mai la verea isana lara, "Mata sava ko lo retireti na titileu isara?"

¹¹ Moiso mo ūrami mara, "Isamim God mo majinga vara ha pa levosahi na hina luhu matan mauri atu God mo aulu hinia, pani isara, mo sopo majinga.

¹² Matan isan haratu mo lavi te lelevosahi na mapuna, God i pa sile na lelevosahi i lo masurere isana, pani isan haratu mo sopo te lelevosahi na mapuna, sava hinau mo rongoa, i pa tihai. ¹³ Na lo retireti na titileu isara matan harihi, matan la lo hitea, pani la pa sopo rongovosahia, la lo rongoa, pani la pa peropero, ale la pa sopo levosahia.

¹⁴ Varařuhu, sava Isaiah mo reti mangovia hinia moiso mo masese hinira vara, 'Ha pa rongoa,
pani ha pa sopo eři levosahia,

ale ha pa hitea,

pani ha pa sopo eři rongovosahia.

¹⁵ Matan mapura la mai la praprasha, perora la peroputu,
ale matara la pelati,

matan vara la pa sopo hite na matara,
teni rongo na perora,

ale la rongovosahi na mapura

matan vara la eři posí la mai isaku
matan vara a vai mamahuni
na mapura na nora rojoa.'

Isa 6:9-10

¹⁶ Pani la matamim sei, la avulahi tavera mata sava la eři hitea, ale peromim la eři rongovosahi na sava la lo rongoa.

¹⁷ Varařuhu na verea isamim, tuai přovet matuvana peresi na tamlohi tataholo la opoia vara la eři hite na sava ka lo hitea, pani la sopo hitea, ale vara la rongo na sava ka lo rongoa, pani la sopo rongoa.

*Iesu Mo Vereuli Titileu Atu
(Mk 4:13-20; Lk 8:11-15)*

¹⁸ Ha tapurongo na ūrami titileu matan tamlohi hapořahi atu: ¹⁹ Vara tea mo rongo na reti matan mauri atu God mo aulu hinia, pani mapuna mo sopo levosahia, ale Tiapolo mo mai mo reve nařihi na sava mo lavoa na mapuna. Haranike enia piri sei mo lavoa na malele. ²⁰ Hin haratu mo lavoa na lepa ūlangi, haranike enia haratu sei mo rongo na Retiřuhu, ale vahatea purongo mo lavia na avulahi, ²¹ pani matan mo sopo te nona jara turu, mo turu makomona purongo, ale vara rani ūlangi mo mai teni la tipahia mata Retiřuhu, vahatea purongo i pa rovo na nona rasua.

22 Hin haratu mo lavoa na livuha vipahai ngañgariha, enia haratu mo rongo na Retiruhu, pani masalo mauri peresi na ūromūromi tavtav mo turuhoro na Retiruhu, ale mo sopo namaha. ²³ Pani hin haratu mo hapoñahia na lepa ūruhu, enia haratu mo rongo na Retiruhu, ale mo rongovosahia. Enia mo namaha mo tavera, hin tea i pa tikeli vaha ngavu sangavulu (*100x*) hai mo tikeli vaha ngavulu limarave (*60x*) ale hai mo tikeli vaha ngavulu tolu (*30x*) hin haratu mo lo lavoa.”

Titileu Mata Pongi Hitahu

24 Mo mele verera na titileu tinapua matea mara, “Mauri atu God mo aulu hinia, mo sohena tamlohi matea mo lo hapoñahia na piri ūruhu na lolo isana, ²⁵ pani na rani nona tamlohi voko la juruvi ūromaliho, nona meresahi mo mai mo hapoñahia na piri ūruhu hin isa wit atu moiso mo mele ūrovo.

26 Ale lara la tuvu, ale la namaha ūruvu sohena la pala.

27 Moiso volitusi non tamlohi tavera mata ima la mai isana lara, ‘Tamlohi tavera, avei, kama ūrom vara ko hapoñahia na piri ūruhu purongo na isam, pani sohena sava natu, ūruvu la tuvu hinia?’

28 Ale mo verea isara mara, ‘Noku meresahi matea mo vai hinau sei.’

Ale nona volitusi lara, ‘Ale ko opoia vara kama vano kama saputira?’

29 Pani mo verea mara, ‘Mo vono! Mo sopo ūruhu vara ha saputira matan ha pa eři saputi na wit peresira. ³⁰ Ha tinarihira la ulua jara matea vavano i tikeli na rani asitauni. Na rani asitauni a pa vere na tamlohi asitauni vara la saputi na ūruvu tiroma, ale la otira matan vara la pa sulira, pani la pa takonahi na wit na noku ima wit.’ ”

Pira Paka (Mk 4.30-32; Lk 13.18-21)

31 Mo mele vere na titileu tinapua matea isara mara, “Mauri atu God mo aulu hinia mo sohena piri paka matea sei tamlohi matea mo lavia mo hapoñahia na isana. ³² Piri atu enia mo rihirihi mo jeu na piri tari, pani vara mo ulua, mo mai mo tavera mo jeu na vipahai tari, ale maji avuavu

na masapa la mai la vai na taura na rangarangana.”

33 Mo mele vere na titileu tinapua matea isara mara, “Mauri atu God mo aulu hinia mo sohena isi sei hařai matea mo lavia, ale mo hoia na flaua vavano isi sei mo vaia mo sohi.”

Mo Vujangira Na Titileu (Mk 4.33-34)

34 Hinau tari nike, Iesu mo verea isan vao atu na titileu: varauhu, mo sopo vere te hinau hatea isara vara mo sopo verea na titileu. ³⁵ Harihi mo mařivisi na sava p̄rovet la verea tuai sei vara, ‘A pa vujangi na tamlohi na titileu, a pa vereuli na sava la luhu na tapulo varama mo tikeli nake.’

Psa 78.2

36 Ale mo malue hin vao atu mo unu na ima. Moiso nona tamlohi usuri la mai isana lara, “O to vere mamahuni kamam na titileu mata ūruvu hin isa atu.”

37 Iesu mo ūramira mara, “Haratu mo lo hapoñahia na piri ūruhu enia Natun Tamlohi. ³⁸ Isa sei enia varama, moiso piri ūruhu enia la haratu sei la lavi mauri atu God mo aulu hinia, ale ūruvu atu enia la haratu sei la tamlohi non haratu mo sasati, ³⁹ ale meresahi atu mo lo hapoñahira, enia Tiapolo. Asitauni enia pongi hitahu, ale tamlohi asitauni enira angelo.

40 Sohena la saputi na ūruvu, ale la sulira na hapu, i pa sohena na pongi hitahu.

41 Natun Tamlohi i pa ūrule na nona angelo, ale la pa lavi nařihi na hinau tari sei la lo vai na tamlohi la hehe peresi la haratu tarea la lo tope na leu na lolo jara sei enia mo aulu hinia, ⁴² ale la pa pulahira la sulira hin jara atu mata hapu. Hin jara atu, la pa tangi, ale la pa ngañgařori na huřura na rongohaji tavera. ⁴³ Moiso haratu la tataholo la pa mera sohena alo hin mauri atu na suisan Tamara. Haratu la peroha, ha tapurongo!

Titileu Mata Tavtav Matea

44 Mauri atu God mo aulu hinia mo sohena tavtav tavera matea, tamlohi matea mo jarohia na lepa matea, ale tamlohi tinapua matea mo tapaia, ale mo mele tavuhoroa. Moiso mo avulahi tavera, mo vano mo hařehi vevuhi na nona hinahinau matan vara i eři voli lepa atu.

Hurutavila Ruhuruhi Matea

⁴⁵ Ale mele vahatea, mauri atu God mo aulu hinia mo sohena tamlohi ařeařehi matea mo lo aleale hurutavila ūruhi, ⁴⁶ ale enia mo vilei na hurutavila matea mo ūruhi jea, mo vano mo hařehi vevuhi na nona hinahinau, ale mo volia nona.

Titleu Mata Tara Matea

⁴⁷ Ale mele vahatea, mauri atu God mo aulu hinia mo sohena tara sei la pulahia na tasi, ale maji tinatinapua tari la kali hinia. ⁴⁸ Mara mo mařivi, tamlohi la reve hoso-hia, ale la sakele la viřoni nařihi na hina ūruhi la sohonira na tanga, pani haratu la sati la pulahira. ⁴⁹ I pa sohena na pongi hitahu. Angelo la pa mai la asehi la haratu la sasati hin la haratu la tatahola, ⁵⁰ ale la pa pulahira na jara mata hapu. Hin jara atu, la pa tangi, ale la pa hatihati na huřura.

⁵¹ Ka lo rongovosahi la hinau sei?"

La ūramia lara, "He'e."

⁵² Ale mo verea isara mara, "Ale matana, tamlohi vujangi mata leu tari sei la lavi na lelevosahi mata usuri mauri atu God mo aulu hinia, enira la pa sohena tamlohi tavera mata ima matea sei mo lavi nařihi na nona tavytava vara i vujangira isana tamlohi, hina paro peresi na hina tuai."

Mara Nazareth La Rohu Hinia (Mk 6.1-6; Lk 4.16-30)

⁵³ Iesu mara mo isoiso hin la titleu atu, mo malue hin jara atu, ⁵⁴ mo mai na jarana mo vujangira na nora ima lotu, ale la mařurahi hinia lara, "Tamlohi nike, mo lavi na nona lelevosahi epu, mo pa lavi na suiha vara i vai na hina ūruhi epu? ⁵⁵ Pani enia mo sopo natun tamlohi tapatu atu? Ale tinana la tovia Mary, ale tasina sei, James, Joseph, Simon peresi Judas. ⁵⁶ Ale vetasina tari la lo toho peresirā nike, sava jara natu, tamlohi nike mo pa lavi na suiha vara i vai la hinau sei hinia?"

⁵⁷ Ale la lo ūrohu hinia, pani Iesu mo verea isara mara, "Přovet matea i pa sopo eři lavi na oloolo na jarana teni na lolo imana."

⁵⁸ Ale mo sopo vai te hina ūruhi matuvana ea matan la sopo rasua.

14

John Tamlohi Paptijo Mo Mate (Mk 6.14-29; Lk 9.7-9)

¹ Hin rani atu supe rihirihī Herod, mo rongo na roroan Iesu, ² ale mo verea isana nona volitusi mara, "Haranike enia John tamlohi paptijo sei! Enia mo mele sauteterahi na mateia, ale mo eři vai la hina mařurahi sei matana." ³ Matan Herod natu, mo tauri John, ale mo pesia, ale mo taua na ima ūilangi matan narouna Herodias, naroun tasina Philip, ⁴ matan John mo lo verea isana mara, "Mo sopo tatahola vara o lavia naroum." ⁵ Hina purongo vara mo opoia vara i vilimateia, mo matahuni na tamlohi matan enira la rasua vara John enia přovet matea.

⁶ Pani na rani pongi vora non Herod mo mai, venatun Herodias mo velu na naho vao ea mo vai Herod mo avulahi tavera, ⁷ matana, enia mo vai na retitauhi ūilangi matea vara i pa silea na sava hinau mo usia isana. ⁸ Tinan hařarihi atu mo retireti patuna, ale hařarihi atu mo verea mara, "O sileau na patun John tamlohi paptijo na pusa peleti." ⁹ Supe Herod mo rongo mo sati, pani matan nona retitauhi na naho vao, mo retileu vara la vaia. ¹⁰ Mo ūrule na nona tamlohi la tai roto na ūalon John na ima ūilangi, ¹¹ ale la lavi na patuna na peleti matea la silea isan hařarihi atu, ale mo lavia vano isan tinana. ¹² Tamlohi usuri non John la mai la lavi na tarapena, ale la tavunia, ale la vano la verea isan Iesu.

Mo Vahani Na Vao Tamlohi (Mk 6.30-44; Lk 9.10-17; Jn 6.1-14)

¹³ Iesu mara mo rongoa, mo malue mo vano mo vele na boti matea, mo vano na jara hasetoho matea vara i lo toho hasena. Pani na rani vao tamlohi lara la rongoa la malue na vanuara la hahau alea. ¹⁴ Mara mo sahe na jarauta, mo hite na vao tavera matea, ale mo ūromopoirā, ale mo vai mamahuni na nora tamlohi rojoa.

¹⁵ Ale mo lo ravravi nona tamlohi usuri la mai isana la verea lara, "Jara nike, enia jara hasetoho matea, ale pongi mo lo mai. O ūrule vao sei la vano hin te vanua vara la voli te hara hinau matara hasera."

¹⁶ Pani Iesu mo verea mara, "Mo vono, la lo toho, kamim ha vahanira."

¹⁷ La verea isana lara, "Kama lo lavi na pereti mo lima purongo peresi na maji mo rua."

18 Ale mo verea isara mara, “Ha lavira la mai isaku.” **19** Ale mo retileu isan la vao atu vara la sakele na ūruvuru, ale mo lavi la pereti atu mo lima peresi la maji atu mo rua, mo taña sahe aulu na tuka mo hasohaso God, ale mo vere meje matara, ale mo tope la pereti atu mo silea isana nona tamlohi usuri, ale nona tamlohi usuri la silea isan la vao atu. **20** Tamlohi tari la hanhani la masu. La sohoni na sope hanhani na tanga mo sangavulu ūromana mo rua la mařivi. **21** Ale la haratu la lo hanhani enira mariviti i tikeli tari vaha lima **(5,000)** haratu la sopo evi na hařai peresi na natuvarihi.

*Iesu Mo Hahau Na Pusa Tasi
(Mk 6.45-52; Jn 6.15-21)*

22 Vahatea purongo, mo aji na nona tamlohi usuri vara la vano tiroma hinia na tavul tasi, ale mo ūrule vao atu la vano karahi. **23** Ale Iesu mara mo ūrule vao atu la vano moiso, mo vele sahe na vutivuti matan vara i usiusi enia hasena. Ravravi mo mai enia hasena mo lo toho atu, **24** pani botira nakerihi mo vano asau moiso na jarauta, suhusuhu la lo vilia matan la lo songahi na langi.

25 Ale majou rani mo lo vele, Iesu mo mai isara, mo hahau na pusa tasi. **26** Pani na rani nona tamlohi usuri lara la hitea mo lo hahau na pusa tasi, la have na matara mo tatavera lara, “Eh, tanume matea!” la ulo na tangi matan la matahu.

27 Pani vahatea purongo Iesu mo reti isara mara, “Ha ūromřilangi! Enau sei, ha sopo matahu!”

28 Moiso Peter mo ūramaria mara, “Tija, vara engko sei, o retileu isaku vara a mai isam na pusa tasi.”

29 Iesu mo verea mara, “O mai!” Ale Peter mo malue na boti mo hahau na pusa tasi mo lo vano isan Iesu.

30 Pani mara mo hite na langi mo sere ūlangi, ale mo matahu, mo tapulo marun na tasi, mo ulo mara, “Tija, o juriau!”

31 Vahatea purongo Iesu mo sohai na limana, ale mo tauria, mo verea isana mara, “Engko nom rasu mo rihirihi havava, mata sava ko ūrom rua?” **32** Ale lara la mele vele na boti, langi atu mo moti.

33 Haratu la lo toho na boti la lotua lara, “Varařuhu, engko Natun God!”

*Tamlohi Rojo Gennesaret
(Mk 6.53-56)*

34 Ale lara la vano na tavalu tasi, la hoso na jara Gennesaret. **35** Ale tamlohi hin jara atu lara la hitevosahia, la sohai na reti mo ūralihi jara atu vara la lavi na nora tamlohi rojua tari la mai isana, **36** ale la usia ūlangi vara la pa tikeli purongoi na pingo nona ruru. Ale enira mo isoiso atu sei la tikelia la ūruhu.

15

*Vujangi Nona Vajiahara
(Mk 7.1-13)*

1 Moiso, Pharisee peresi na tamlohi vujangi mata leu la mai isan Iesu la tai Jerusalem lara, **2** “Mata sava nom tamlohi usuri la lo tope na posposi nona vajiahara matan tuai? Matan enira la sopo hoje na limara tiroma moiso la pa hanhani.”

3 Iesu mo ūramira mara, “Ale mata sava ka lo tope na retileu non God matan ka lo usuri na posposi tamlohi? **4** Matan God mo retileu mara, ‘O oloolo hin tamam peresi tinam!’ Ale mara, ‘Hare mo reti sati hin tamana teni tinana, i pa mate matana.’ *Exo 20.12; Exo 21.17* **5** Pani ka verea kara, ‘Mo tataholo vara tea i verea isan tamana enia tinana vara sava tuetueni vara i eři silea isara, mo pete silea isan God moiso.’ **6** Ale enia mo sopo sile na oloolo isan tamana matan haratu. Ale matan ka lo usuri na posposi tamlohi, ka ūruhu na reti non God.

7 Kamim tamlohi tapnetano! Isaiah mo retimangovi varařuhu hin kamim na rani mo verea mara,

8 ‘La tamlohi nike, la lo oloolo hiniau na hurira purongo,
pani mapura la lo toho asau hiniau;

9 la lo vai vono na nora lotu,
la lo vujangi na nora retileu lara
retileu non God.’ *Isa 29.13*

*Tamlohi La Lumiha Mata Hehe
(Mk 7.14-23)*

10 Ale Iesu mo tovi vao atu la mai isana mo verea isara mara, “Ha tapurongo, ale ha levosahia! **11** Sava mo unu na jingom mo sopo vaiho o lumiha, pani sava mo malue na jingom, enia mo vaiho ko lumiha.”

12 Moiso nona tamlohi usuri la mai isana la verea lara, “Avei, ko sopo levosahia vara

Pharisee la rongo mo sati na sava ko lo verea?"

¹³ Mo ūramira mara, "Vipahai tari haratu Tamaku na tuka mo sopo lavora i pa saputi nařihira. ¹⁴ Ha sopo sahara vano isara. Enira la matavuso. La lo tiroma na tamlohi, pani la matavuso. Vara matavuso i tiroma na matavuso, la pa jovi hin te moru."

¹⁵ Pani Peter mo verea isana mara, "O to vere mamahuni titileu sei isamam."

¹⁶ Ale mo ūramia mara, "Kamim sohena, ka sopo lo levosahi? ¹⁷ Ka sopo levosahia vara sava ka hania mo unu na pangemim, ale ka mele hoti hinia? ¹⁸ Pani reti mo lo malue na jingo mo tapulo malue na mapu tamlohi, ale harihi mo vai na tamlohi mo lumiha. ¹⁹ Matan hinau sohen harihi la lo malue na mapu tamlohi: ūromromi sasati, vilimatei, vaivaileu peresi na tinapua mo lahi moiso, posposi lumiha, vavanaho, tuetueni halu, reti sati na hija tamlohi. ²⁰ La hinau sei la vai na tamlohi mo lumiha. Pani vara tea i hanhani peresi na limana mo sopo hojea, mo sopo vaia i lumiha."

Rasua Non Hařai Mara Cana (Mk 7.24-30)

²¹ Ale Iesu mo malue hin jara atu, mo vano na jara tavera matan Tyre enia Sidon. ²² Ale vahatea hin jara atu, hařai mara Cana matea mo pala mo lo tangi mara, "O ūromopoi Moli, mahapin David! Tanume sasati matea mo sohoni venatuku mo vai komokomoa!"

²³ Pani mo sopo ūramia hin te reti hatea. Ale nona tamlohi usuri la mai la usia ūrlangi isana lara, "O ūrulea i malue matan mo lo tangi usuriřa."

²⁴ Mo ūramia mara, "Haratu mo ūruleau, mo ūruleau purongo mata sipsip matan Israel sei la jalio."

²⁵ Pani hařai atu mo mai mo papaohi na nahona mara, "Moli, o tueniau."

²⁶ Ale Iesu mo ūramia mara, "Mo sopo tataholo vara tea i lavi nařihi na pereti hana natuvarihi i silea isana viriu."*

²⁷ Hařai atu mara, "He'e Moli, pani viriu la lo hani na utauta pereti sei la lo jovjovi na tep non nora tamlohi tavera."

²⁸ Moiso Iesu mo ūramia mara, "Na verea, engko hařai matea, nom rasua mo tavera jea. I pa sohena sohen ko opoia." Ale vahatea purongo, venatuna mo ūru.

Rojoa Nona Tamlohi La Tihai

²⁹ Iesu mo mele vano mo hahau na pahisa tasin Galilee. Mo sahe aulu na vutivuti, ale mo lo sakele ea. ³⁰ Moiso vao tavera mo mařivi la mai isana peresi na tamlohi hariju, matavuso, tamlohi papao, la haratu la mengo, ale vao matuvana tinapua, ale la taura na palona, moiso mo vai mamahunira, ³¹ ale vao atu ūromira mo sopo sakele matan mo vai na mengo la retireti, haratu la papao la ūru, haratu la hariju la hahau, ale matavuso la kilau moiso vao atu la mařurahi tavera matana, ale la sile na hasohaso isan God matan Israel.

Mo Vahani Na Vao Tavera (Mk 8.1-10)

³² Moiso Iesu mo tovi na nona tamlohi usuri la mai isana ale mara, "Enau na ūromopoi la vao nike, matan la lo toho persiau mata rani mo tolu moiso, ale mo sopo te hara hinau, ale na sopo opoia vara a ūrlera la mule marohati, vara i vono la pa matemate na malelera."

³³ Ale nona tamlohi usuri la verea isana lara, "Ra pa eři lavi te pereti i tataholo hin vao tavera nike na jara hasetoho sohen harihi epu?"

³⁴ Moiso Iesu mara, "Ka lo lavi na pereti mo visa?"

Lara, "Mo limaravrua peresi na maji vavarahi mo visalete purongo."

³⁵ Moiso mo vere vao atu vara la sak-sakele na lepa, ³⁶ ale mo lavi la pereti atu mo limaravrua peresi na maji moiso, mo vere meje isan God, ale mo topera, ale mo silera isana nona tamlohi usuri, ale tamlohi usuri la silera isan la vao atu.

³⁷ Ale enira mo isoiso la hanhani la masu. Moiso la sohoni na sope hanhani na tanga mo limaravrua la mařivi. ³⁸ Evi tamlohi purongo la hanhani mo tikeli tari vaha vati (4,000)

la sopo evi na hařai peresi na natuvarihi.

³⁹ Moiso hitahun haratu, mo ūrule la vao atu la mlemle, mo vele na boti matea, ale mo vano na jara Magadan.

* **15:26:** Jew la tovi na tamlohi ūrořha 'viriu'.

16

La Opoi Na Matamata (Mk 8.11-13; Lk 12.54-56)

¹ Ale Pharisee peresi na Sadducee la mai isana vara la vahitea. La usia vara i vujangira hin te matamata tavera matan na tuka.

² Iesu mo ūramira mara, “Vara mo ravravi, kara ‘Taro i pa ūru matan telangi mo hahara!’ ³ Ale na ūlavuho, ‘Taro i pa sati nohorihi matan telangi mo hahara, ale mo ūrōha!’ Ka lo levosahia vara taro i pa sohena sava matan ka lo kilau na masapa, pani ka sopo eři hitevosahi na matamata matan rani nika ka lo toho hinia? ⁴ Pina sasati nika, mo tamlohi vaivaileu, mo lo aleale matamata, pani i pa sopo lavi te matamata tinapua, pani matamata sei mo masese isan Jonah tuai.” Moiso mo malue isara mo vano.

Pharisee Peresi Na Sadducee (Mk 8.14-21)

⁵ Nona tamlohi usuri lara la kakau na tavalu tasi, la pa ūrom̄omia vara la sopo lavi te pereti. ⁶ Ale Iesu mo verea isara mara, “Ha sopo ūromaliho vara ha lo kilau mata isi sasati nona Pharisee peresi na Sadducee.”

⁷ Moiso la tapulo sorahia isara hasera lara, “Eh, korong mo pa verea matan enřa ū sopo lavi te pereti teni?”

⁸ Pani Iesu mo levosahi na sava la lo verea, ale mo verea mara, “Kamim akerihi, nomim rasu mo rihirihi hajavua. Mata sava ka lo sorahia isamim hasemim vara mo sopo te pereti? ⁹ Ka sopo lo levosahia? Ka mele ūromaliho hin la pereti atu mo lima matan vao atu mo tari vaha lima **(5,000)** ale ka sohoni na sope hanhani na tanga mo visa hin rani atu? ¹⁰ Teni ka ūromaliho hin pereti atu mo limaravrua matan vao atu mo tari vaha vati **(4,000)** ale tanga mo visa ka lavia isara? ¹¹ Mo sohena sava natu, ka sopo levosahia vara enau na sopo retireti na pereti? Ha lo kilau na isi nona Pharisee peresi na Sadducee.”

¹² Ale la pa levosahia natu, vara mo sopo verea vara la lo kilau mata isi mata pereti, pani mata vujangi nona Pharisee peresi na Sadducee.

Iesu Enia Hare (Mk 8.27-30; Lk 9.18-21)

¹³ Ale na rani Iesu mo mai na jara matan Caesarea Philippi, mo usi na nona tamlohi usuri mara, “Kamim ka lo rongo na tamlohi la lo verea vara Natun Tamlohi enia hare?”

¹⁴ Moiso lara, “Hai la lo verea vara John tamlohi paptijo, tatuara lara Elijah, ale hai lara Jeremiah teni vonan la p̄ovet atu matea.”

¹⁵ Mo verea isara mara, “Pani kamim ka lo verea vara enau hare?”

¹⁶ Simon Peter mo ūramia mara, “Engko natu pa K̄risto atu, Natun God sei mo mauri!”

¹⁷ Ale Iesu mo ūramia mara, “Simon natun Jonah, God mo leřuhu hiniho matan mo sopo tea hin varama nika i vujangia isam, pani Tamaku na tuka hasena mo vujangia isam. ¹⁸ Ale na verea isam, engko Peter sei ūramin hijam enia vatu, ale hin pulo vatu nika, a pa voro noku vao kalesia, hina purongo vara suiha non varama mata mateia mo ūrlangi, pani i pa sopo eři turuhoroa. ¹⁹ A pa sileho na kia matan mauri atu God mo aulu hinia, ale sava hinau ko horoa na varama, God na tuka mo horoa moiso, ale sava hinau ko tinařihia na varama, God na tuka mo tinařihia moiso.” ²⁰ Moiso, mo retileu isana nona tamlohi usuri vara la sopo sorahia isan tea vara enia natu, K̄risto atu.

Iesu Mo Vere Na Nona Mate (Mk 8.31-9.1; Lk 9.22-27)

²¹ Mo tapulo hin rani atu natu, Iesu mo tapulo vujangi na nona tamlohi usuri hinia vara enia i pa vano Jerusalem, ale i pa lavi na rongohaji isana tamlohi aulu peresi na moli nona p̄ris peresi na tamlohi vujangi mata leu, ale la pa vilimateia, ale hitahu na hatolu rani i pa mele turu.

²² Ale Peter mo tauri na lima na mo revea vano hasena, mo reti ūrlangi isana mara, “Moli, mo vono! Hinau atu i pa sopo eři masese isam!”

²³ Pani Iesu mo posa mo verea isan Peter mara, “Setan, na sopo opoia vara a hiteho! Engko ko lo turuhoroau, matan engko ko sopo tau na ūromim na hinahinau non God, pani na hinahinau nona tamlohi.”

²⁴ Moiso Iesu mo verea isana nona tamlohi usuri mara, “Vara tea mo opoia vara i usuriau, i pa horo na masalona hasena,

i lavi na nona talopeilopei, ale i usuriau.*
25 Matan haratu mo opoi na maurina mo tavera jea, i pa vaitihai, pani haratu mo ūru na maurina matak, enia i pa tapai mauri varaūruh atu. **26** Sava hinau mo ūruh isan te tamlohi vara i lavi na hinau tari na varama, pani i vaitihai na maurina? Teni sava hinau natu, tamlohi i eři silea vara i mele lavi na maurina? **27** Matan Natun Tamlohi i pa mai peresi na nona angelo na hasohason Tamana, moiso i pa voli tataholoi na tamlohi hatehateahi mata sava mo vaia na varama. *Psa 62.12; Rom 2.6*

28 Varaūruh na verea isamim, tatuamim la lo turu nike nakerihi, la pa sopo eři mate vavano la hite Natun Tamlohi i mai na nona suiha mata Supe.”

17

Epen Iesu Mo Posi (Mk 9.2-13; Lk 9.28-36)

1 Ale mele rani mo limarave tinapua mo vano moiso, Iesu mo lavi Peter, James peresi tasina John, mo tiromara la vele sahe aulu na vutivuti tavera matea la toho hasera. **2** Ale epen Iesu mo mai mo tinapua na nahora, nahona mo mera sohena alo, ruruna la lulu sohena malarani, **3** ale vahatea purongo, la hite Moses enia Elijah la pala la lo retireti peresi Iesu. **4** Moiso Peter mo verea isan Iesu mara, “Tija, mo ūruh matan ūra lo toho nike, vara ko opoia a pa vai te ima ruru i tolu akerihi, matea nom, matea non Moses, ale matea non Elijah.”

5 Mo pa lo retireti, ale vahatea purongo telangi mera matea mo hovira, moiso leo matea mo malue hin telangi atu mara, “Harihi enia Natuku ūhuūruh, na opoia mo tavera jea, ha tapurongo isana!” **6** Nona tamlohi usuri lara la rongo leo sei, la jovi na nahora na matahu tavera.

7 Pani Iesu mo mai mo tikelira mo verea mara, “Ha turu, ha sopo matahu!” **8** Ale na rani la tařa sahe la sopo mele hite tea, pani la hite Iesu hasena. **9** Ale la pa lo sevuti na vutivuti, Iesu mo retileu isara mara, “Ha sopo vere na sava ka hitea vavano i tikeli na rani Natun Tamlohi i mele turu na mateia.”

* **16:24:** talopeilopei: Iesu mo verea vara tamlohi rasua sei la sopo avulahi vara la turu ūlangi na rani tamlohi la ūruh hinira matan la lo usuri Iesu teni la lavi na rani ūlangi matan la lo ooloolo na nona reti, enira la sopo eři verea vara enira nona tamlohi.

10 Ale tamlohi usuri la usia lara, “Ale mata sava tamlohi vujangi mata leu la lo verea vara Elijah i pa mai tiroma?”

11 Mo ūramira mara, “Elijah i pa mai, ale i pa tau mamahuni na hinau tari. **12** Pani na verea isamim vara Elijah mo pete pala moiso, ale la sopo hitevosahia, pani la vai masalora isana. Ale sohen haratu la pa sile na rani ūlangi isan Natun Tamlohi.”

13 Ale tamlohi usuri la pa rongovosahia natu, vara mo lo verera hin John tamlohi paptijo.

Uluvou Matea (Mk 9.14-29; Lk 9.37-43a)

14 Ale lara la lo sevuti la mai isan vao atu, tamlohi matea mo mai isan Iesu mo papaohi na nahona, **15** mo verea mara, “Moli, o ūromopoi hin natuku matan enia mo lo matemate, ale tarea mo lo lavi na rongohaji tavera matan hin te rani mo lo jovi na hapu teni wai. **16** Na pete lavia mo mai isana nom tamlohi usuri moiso, pani la sopo eři vai mamahunia.”

17 Ale Iesu mo ūramia mara, “Kamim mo sopo te nomim rasu hatea, kamim pina lejileji matea, a pa mele toho peresi kamim rani i visa? Na sopo levosahia vara a pa lavi na puhon nomim hinau i tikeli pangisa? O lavia i mai isaku!” **18** Ale Iesu mo reti ūlangi isan tanume sasati atu, ale mo malue hinia, ale vahatea purongo natuna mo ūruh.

19 Moiso hitahu, tamlohi usuri la mai na tavaluna la usia lara, “Mata sava kama sopo eři levuti nařihia?”

20 Mo verea isara mara, “Matan nomim rasua mo rihirihi! Varaūruh na verea isamim, vara nomim rasua mo ūlangi sohena piri paka matea, ha pa eři verea isan vutivuti nike, vara ‘O juhati o vano sevano!’ Ale i pa juha. Ale sava natu, vara ha pa sopo eři vaia?

21 Usiusi peresi na posposi tapuhoro na hanhani purongo i pa eři levuti nařihia na tanume sasati sohen harihi i malue.”

Retireti Mata Nona Mateia (Mk 9.30-32; Lk 9.43b-45)

²² Ale na rani la pa lo pulutahi Galilee, Iesu mo verea isara mara, "Natun Tamlohi mariviti vara la turuposi hinia natu vara i vano na lima tamlohi, ²³ ale la pa vilimateia, moiso i pa mele turu na hatolu rani." Ale la rongo mo sati tavera matana.

²⁴ Na rani la kakau Capernaum, haratu la lo lavi na makomo mania mata takis mata nora Temple la mai isan Peter lara, "Nom tija i pa voli na takis teni mo vono?"

²⁵ Ale Peter mo ūaramira mara, "He'e." Ale mo lo unu na ima, ale Iesu mo retireti tiroma isana mara, "Romim mo sohena sava Simon? Supe mata varama la lo lavi na takis isan hare? Isana natura teni isana tamlohi tinapua?"*

²⁶ Ale na rani Simon mo verea mara, "Isana tinapua!" Iesu mo verea isana mara, "Ale vara sohen haratu, natura la materi na takis. ²⁷ Pani matan vara ūa sopo komo na ūomira, o sivo na tasi, o pulahi na nom asi revereve, ale sava maji mo kali hinia tiroma, o roi na vavana, ale o pa hite na mania matea mo tatahola mata voli takis nořa enřa rua."

18

Hare Mo Aulu Jea (Mk 9.33-37; Lk 9.46-48)

¹ Hin rani atu tamlohi usuri la mai isan Iesu lara, "Hare natu, enia i pa aulu jea hin mauri atu God mo aulu hinia?"

² Moiso mo tovi na natirihi matea vara i mai isana, ale mo turuhia na livuhara, ³ moiso mara, "Varařuhu na verea isamim, vara ha sopo posi mai sohen natirihi nike, ha pa sopo eři levosahi mauri atu God mo aulu hinia. ⁴ Hare mo hase taua atano sohen natirihi nike, enia mo aulu jea hin mauri atu God mo aulu hinia. ⁵ Hare mo lavi te natirihi sohen harihi na hijaku, enia mo lo laviau, ⁶ pani vara tea mo vaitihai na rasua non te vonan la natuvarihi nike la rasuau, i pa mele ūruhу jea isana vara la pesi te vatu tavera na ūalona la putehia na tasi puaha.

Vaihite La Pa Mai (Mk 9.42-48; Lk 17.1-2)

⁷ Rani sasati i pa jovi na varama matan rasua i pa tihai. Matan tarea hina vaihite

la pa lo mai, pani rani sasati isan haratu mo lo vaitihai na rasua nona tinapua. ⁸ Ale vara limam teni palom mo vaiho ko vano na hehe, o tai nařihia o pulahia. Mo mele ūruhу jea vara o unu hin mauri atu o papao teni o hariju, mo jeu haratu vara la pulahiho peresi na limam mo rua teni palom mo rua hin hapu atu mo sopo te isoisona. ⁹ Ale vara matam mo vaiho ko lo vano na hehe, o julai nařihia o pulahia. Mo mele ūruhу jea vara o unu hin mauri atu peresi na matam matelete, mo jeu haratu vara la pulahiho peresi na matam mo rua o vano hin hapu atu mo sopo te isoisona na moruhapu.

Sipsip Atu Mo Jalio Na Malele (Lk 15.3-7)

¹⁰ Ha lo kilau ha sopo hitelehilehi te vonan la natuvarihi nike, matan na verea isamim vara tarea na tuka, nora angelo, la haratu la lo kilaura, Tamaku na tuka mo tinařihia vara la eři turu na nahona matara.

Tavui Sipsip Matea

¹¹ Matan Natun Tamlohi mo mai vara i juri la haratu la jalio. ¹² Ale nomim kilakilau mo sohena sava? Vara tamlohi matea pulana sipsip mo ngav sangavulu (¹⁰⁰) ale matea mo jalio, i pa sopo tau la haratu mo ngavulu limaravati mo limaravati (⁹⁹) na pahisa vutivuti atu tako ale i ale haratu mo jalio teni i vono? ¹³ Ale vara mo tapaia, vararuhu na verea isamim, mo avulahi tavera matana, mo jeu la haratu mo ngavulu limaravati mo limaravati sei la sopo jalio. ¹⁴ Mo sohena natu, mo sopo masalom Tamaku na tuka vara rasua non te vonan la natuvarihi nike i vano hina purongo.

Vara Tea Mo Hehe (Lk 17.3)

¹⁵ Vara voraim mo vai te hehe isam, o vano o vere na nona hehe isana kamim rua hasemim. Vara mo tapurongo isam, voraim i pa mele tapalam. ¹⁶ Pani vara mo ūruhу vara i tapurongo, o lavi te hatea teni tupra rua tinapua la vano peresiho matan vara o pa eři turu na nora vereulia. ¹⁷ Ale vara mo

* ^{17:25:} Tamlohi hai la ūromřomia vara natura nike, enira natun supe tatahola, ale la haratu la tamlohi tinapua enira la sopo vaon supe atu.

řohu vara i tapurongo hinira, o pa verea isana vao kalesia. Ale vara mo řohu vara i tapurongo isana vao kalesia sohen tiroma, ale i pa sohena tamlohi ſořoha isamim, ale ha řohu hinia sohena tamlohi ſořoha matea teni haratu mo lo lavi na takis.

Tinarihia Teni Horoa

¹⁸ Varařuhu na verea isamim, sava kamim kalesia ka lo horoa na varama, God na tuka mo horoa moiso, ale sava ka tinarihia na varama, God na tuka mo tinarihia moiso.

¹⁹ Na mele verea isamim vara te tupra rua na varama la majinga hin te hinau la usia, Tamaku na tuka i pa vaia sohena isara. ²⁰ Matan, vara te tupra rua teni tupu tolu la lo pulutahi na hijaku, enau na lo toho peresira.”

Romi Na Tinapua

²¹ Moiso Peter mo mai isana mo verea mara, “Tija, vara voraiku mo vai na hehe isaku, a pa ſromi voraiku vaha visa? Vaha limaravrua teni mo vono?” ²² Iesu mo verea isana mara, “O pa sopo ſromia vaha limaravrua ^(7x)

purongo, pani vaha ngavulu limaravrua vaha limaravrua ^(70x7). *Gen 4.24*

²³ Matan harihi, mauri atu God mo aulu hinia mo sohena supe matea mo opoia vara i tau mamahuni na ave non nona slev.

²⁴ Na rani mo tapulo tau mamahuni na ave, la lavi vonara matea mo mai isana, mo ave na mania matea mo tataholo na voli tamlohi mata rani mo tari vaha sangavulu (*10,000*).

²⁵ Ale matan i pa sopo eři voli nařihia, nona tamlohi tavera mo retileu hinia vara la hařehia peresi narouna tolu na natuna peresi na nona hinau tari vara i spai na nona mania hinia. ²⁶ Ale slev atu mo jovi na pauna, mo tangi mara, ‘O ſromperavu isaku, ale a pa voli vevuhi na noku ave tari isam!’ ²⁷ Ale tamlohi tavera non slev atu mo ſromopoi, mo tinarihia vara i vano purongo, ale mo tinarihia na nona ave.

²⁸ Pani na rani pa slev atu mara mo malue, mo vano mo tapai na slev tinapua matea non tamlohi tavera atu, ale slev sei mo ave isana na mania mo tataholo na voli tamlohi matea mata rani mo ngav sangavulu ⁽¹⁰⁰⁾ mo taurilatia, mo tapulo punia mara, ‘O voli na

nom ave isaku!’ ²⁹ Ale slev atu mo jovi na pauna mo tangi isana mara, ‘O ſromperavu isaku, a pa voli nařihia na noku ave isam.’ ³⁰ Pa slev atu, mo ſohu hinia, ale mo vano mo taua na ima ſilangi vara i lo toho atu i tikeli rani atu i voli nařihia vevuhi na nona ave.

³¹ Na rani la tapalan slev atu lara la hite na sava mo vaia, la rongo mo sati tavera, la vano la vereuli na hinau tari isan nora tamlohi tavera atu. ³² Moiso nona tamlohi tavera mo tovi pa slev atu mo mai isana, mo verea isana mara, ‘Engko ko slev sasati matea ko putu tataholo. Na tinařihi vevuhi na nom ave matan ko usia mo ſilangi isaku. ³³ Ale ko sopo eři ſromopoi na tapalam slev sohen enau na ſromopoiho?’ ³⁴ Moiso nona tamlohi tavera atu mo lolokoru patuna, mo silea mo vano isana tamlohi ima ſilangi vara i toho atu yavano i voli nařihia vevuhi na nona ave. ³⁵ Tamaku na tuka i pa vaia sohen harihi isamim isoiso vara ha sopo ſromi varařuhu na voraimim peresi na vevoraimim na mapumim.’

19

Vujangi Mata Lahi (Mk 10.1-12)

¹ Ale Iesu mara mo vere la hinau atu mo isoiso, mo malue Galilee mo unu na jara matan Judea na tavalu vano wai Jordan.

² Ale vao tavera la lo usuria, ale mo vai mamahuni na nora rojoa ea.

³ Pharisee la mai isana vara la vahitea lara, “Mo tataholo usuri na leu vara tea i eři tipahi narouna matan te hinau?”

⁴ Pani Iesu mo ſaramira mara, “Ka sopo lo evia vara haratu mo vaira na pongi tiroma mo vaira lamane peresi na hařai.

Gen 1.27; 5.2

⁵ Ale mo verea mara, ‘Ale matana, tamlohi i pa tinarihia tamana enia tinana, ale i ſorotahi isan narouna, ale la pa epe matea?’ *Gen 2.24*

⁶ Ale matana, la pa sopo mele tamlohi mo rua, pani epe matea purongo. Ale sava God mo ſorotahia jara matea, te tamlohi i pa sopo mele asehia.’

⁷ La verea isana lara, ‘Mata sava natu, Moses mo retileu vara tea i eři sile na pepa

mata ūohu hin narouna matan vara i tipahi narouna?" *Deut 24.1-4; Mt 5.31*

⁸ Mo verea isara mara, "Moses mo tinařihia vara ha pa eři tipahi na naroumim matan mapumim tamlohi hin Israel la ūilangi, pani na pongi tiroma mo sopo sohena. ⁹ Ale na lo verea isamim vara tea mo tipahi narouna, pani mo sopo matan te hinau tinapua, pani mata mo vaivaileu peresi te tinapua, ale vara haratu mo tipahia mo lahi na tinapua, enia mo vaivaileu peresi hařai atu."

¹⁰ Nona tamlohi usuri la verea isana lara, "Vara mo sohena natu, isana tamlohi matea peresi narouna, i pa mele ūahu jea vara tea i sopo lahi."

¹¹ Pani mo verea isara mara, "Mo sopo tamlohi tari sei la pa eři lavi reti sei, pani haratu purongo sei God mo tinařihira vara la lavi reti sei. ¹² Matan, te tamlohi la vora la povota moiso, ale tea tamlohi la votaira, ale tea la sopo lahi matan la hase tapuhira matan mauri atu God mo aulu hinia. Haratu mo eři lavi reti nika, i lavia."

Natuvarihi La Mai Isana (Mk 10.13-16; Lk 18.15-17)

¹³ Ale tamlohi la lavi na natura la mai isana vara i tau na limana isara i usiusi matara, pani tamlohi usuri la reti ūilangi isara, ¹⁴ pani Iesu mara, "Ha tinařihi na natuvarihi la mai isaku, ha sopo horora matan la haratu la sohera la pa lavi mauri atu God mo aulu hinia." ¹⁵ Ale mo leřuhu hinira mo tau na limana hinira moiso mo malue hin jara atu.

Tamlohi Tavtav Matea (Mk 10.17-31; Lk 18.18-30)

¹⁶ Ale hin rani atu, tamlohi matea mo mai isana mara, "Tija, sava hina ūahu natu, vara a vaia a pa lavi na mauri tui matana?"

¹⁷ Ale Iesu mo verea isana mara, "Mata sava ko lo usiau na sava mo ūahu? God purongo enia mo ūahu. Vara ko opoia vara o lavi na mauri, o toho usuri na retileu."

¹⁸ Ale mo usia isana mara, "Sahara nakonako?"

Iesu mo verea mara, "O sopo vilimatei na tamlohi, o sopo vaivaileu peresi na tinapua mo lahi, o sopo vavanaho, o sopo

tuetueni na halu non tea, ¹⁹ o oloolo hin tamam enia tinam moiso", *Deut 5.16* ale 'O opoi na tinapua sohen ko lo opoiho hasem'. *Lev 19.18*

²⁰ Uluvou atu mo verea mara, "La hinau tari sei na lo vaira moiso, pani sava natu, na sopo lo vaia?"

²¹ Iesu mo verea isana mara, "Vara o pa tataholo i ūahu, o vano, o hařehi vevuhi na nom tavytav, ale o sile na volina isana tamlohi tilavono, ale o pa lavi na tavytav na tuka; ale o mai, o usuriau." ²² Pa tamlohi atu mara mo rongo retireti atu, mo malue, ūomina mo sati matan nona tavytav mo tavera jea.

²³ Moiso Iesu mo verea isana nona tamlohi usuri mara, "Vara ūahu na verea isamim, mo ūilangi jea vara tamlohi tavytav matea i eři lavi mauri atu God mo aulu hinia. ²⁴ A mele verea isamim, vara i pa mele malum jea isana camel matea vara i majorole na koko niteli, mo jeu na tamlohi tavytav matea vara i eři lavi mauri atu God mo aulu hinia."

²⁵ Tamlohi usuri lara la rongo reti sei, la mařurahi tavera lara, "Hare natu, i pa eři juri?"*

²⁶ Pani Iesu mo kilau vano isara mara, "Isana tamlohi hinau atu i pa sopo te malelena, pani isan God hinau tari la maleleha."

²⁷ Moiso Peter mo ūaramia mara, "Ko hitea, kamam kama tinařihi vevuhi na nomam hinau tari, ale kama usuriho. Sava natu, i pa nomam?"

²⁸ Ale Iesu mo verea isara mara, "Vara ūahu na verea isamim, hin varama paro atu vara Natun Tamlohi i sakele na nona jara sakele mata suiha merana mo tavera jea, kamim haratu ka lo usuriau ha pa sakele na jara sakele mata suiha mo sangavulu ūomina mo rua, ha pa ari la tavytavuun Israel atu mo sangavulu ūomina mo rua. ²⁹ Ale tamlohi tari sei la malue la tau na imara, teni voraira, teni vevoraira, teni tamara, teni tinara, teni natura, teni nora lepa mata hijaku, God i pa silera la pa mele lavia vaha ngav sangavulu (100x) hin haratu la taua, ale la pa lavi na mauri tui hitahu, ³⁰ pani tamlohi matuvana nake sei la lo aulu, la pa sopo aulu hin pongi atu mo

* ^{19:25:} Tamlohi hin pongi atu la lo ūomina lara God mo leřuhu hin na tamlohi sei la tavytav, matan enira la tavytav. La hutura hin reti sei Iesu mo verea matan enia mo vujangia vara i pa ūilangi jea vara tea i lavi mauri atu God mo aulu hinia.

lo mai, pani la haratu la sopo aulu nake, la pa aulu."

20

Tamlohi Isa Grape

Ale Iesu mo lo verea mara,

¹ "Ale mauri atu God mo aulu hinia mo sohen harihi: tamlohi tavera mata ima matea mo malue na ūralavuho jea matea vara i aleale tamlohi voko mata nona isa grape. ² Ale tamlohi voko la majinga vara la pa voko mata volvoli mata rani matea, moiso mo ūrlera la vano na nona isa grape.

³ Ale na matan alo mo limaravati na ūralavuho mo malue mo vano mo hite te tamlohi la lo toho purongo na jara maket, ⁴ ale mo verea isara mara, 'Eh, kamim sohena, ha sivo na isa grape, ale a pa sile na sava mo tatahola vara ha pa lavia.' ⁵ Moiso la malue la vano hin isa atu. Ale tamlohi atu mo mele aleale tamlohi sohen tiroma; mo mele malue na livuha rani tatahola, ale mo mele malue na matan alo mo tolu na ravravi atu. ⁶ Ale na matan alo mo tikeli mo lima na ravravi hin rani atu, mo malue mo vano mo tapai te tamlohi la lo toho purongo, ale mo verea isara mara, 'Eh, mata sava ka lo turu purongo nika mo tikeli nakerihi?'

⁷ La verea isana lara, 'Mo sopo tea i usi kamam vara kama voko nona.' Mo verea isara mara, 'Kamim sohena, ha vano na isa grape.' Ale la vano. ⁸ Ale na ravravi jea mo verea isan nona patu tamlohi vara i tovi na tamlohi voko vara i silera na volira, ale vara i tapulo hin la haratu la pa voko hitahu, ale i sahe i tikeli la haratu la lo voko tiroma.

Lev 19.13; Deut 24.15

⁹ Ale na rani la haratu mo tovira vara la voko na matan alo mo lima na ravravi la mai, mo silera hatehateahi na volira mo tatahola mata voli rani matea. ¹⁰ Moiso na rani la haratu mo tovira tiroma na ūralavuho mata voko la mai, la lo ūromūromia vara la pa lavi na mania i jeura, pani enira hatehateahi sohena, la lavi na volira mo tatahola mata voli rani matea. ¹¹ Lara la lo lavia, la lo retireti vavarihi hin tamlohi tavera atu mata ima, ¹² lara, 'La haranike la pa mai hitahu la voko mata aoa matelete purongo, ale ko volira sohemam sei, kama slev nom na alo tavera mo tikeli nakerihi.'

¹³ Pani mo ūrami na vonara matea mara, 'Tapala, na sopo vai te hinau i sati

isam. Ko sopo majinga peresiau na volim mata rani matea teni mo vono? ¹⁴ O lavi na sava enia nom, ale o vano. Enau na opoa vara a sile na sava na silea isam i vano isan la haranike la pa voko hitahu. ¹⁵ Ko hitea mo sopo tatahola vara a vai na sava na noku mania sohen na opoa? Teni ko mereimerei matan posiku mo ūruhu?"

¹⁶ Ale Iesu mo mele verea mara, "Vao atu nake sei la lo aulu, la pa sopo aulu hin pongi atu mo lo mai, pani la haratu la sopo aulu, la pa aulu."

Mo Vere Na Nona Mateia (Mk 10.32-34; Lk 18.31-34)

¹⁷ Ale na rani Iesu mo pa lo sahe Jerusalem, mo tovi la nona tamlohi usuri atu mo sangavulu ūromana mo rua mo tovira vano na tavul malele, ale mo verea isara mara, ¹⁸ "Ka hitea, ūra lo sahe Jerusalem. Ale la pa turuposi hin Natun Tamlohi i pa vano na lima moli nona p̄ris peresi na tamlohi vujangi mata leu, ale la pa sile na talai isana vara i mate, ¹⁹ ale la pa silea isana tamlohi ūroha vara la pa kerehia, ale la rupia na asi maja, ale vara la vosaea na talopeilopei, ale na hatolu rani i pa mele turu na mateia."

Retiusia Matea (Mk 10.35-45)

²⁰ Ale tinan la natun Zebedee, James enia John, mo mai isana tolu na natuna, ale mo papaohi na nahona vara i usia hin te hinau. ²¹ Ale Iesu mo verea isana mara, "Ko opoi na sava?" Mo ūramia mara, "Na opoa vara la natuku nika mo rua la sakele na pahisam vara ko tauri na nom suiha, matea na matuam, ale matea na maraum."

²² Iesu mo ūramira mara, "Kamim ka sopo levosahi na sava ka lo usia. Ha eři lavi na rani ūlangi a pa lavia?"

La ūramia lara, "Enjora, kama eři lavia."

²³ Mo verea isara mara, "Ha pa lavi na sava a pa lavi, pani matan vara ha pa sakele na matuaku teni na marauku, enia mo sopo noku vara a pa majinga hinia, pani enia non la haratu sei, Tamaku mo tatamahunia matara moiso."

²⁴ Ale na rani la tupu sangavulu tinapua atu lara la rongoa, la lolokoru hin la vorai atu mo rua. ²⁵ Pani Iesu mo tovira la mai

isana, ale mo verea mara, "Ka levosahia vara tamlohi aulu hin la haratu la tamlohi ūrōha, la opoia tavera vara la pa lo aulu na nora tamlohi, ale ka levosahia sohena sava nora tamlohi tatavera la lo roro na nora suiha hinira." ²⁶ I pa sopo sohena isamim, pani hare mo opoia vara i aulu jea hin kamim mo isoiso, enia i pa nomim volitusi, ²⁷ ale haratu mo opoia vara i pa tiromamim, enia i pa nomim slev, ²⁸ mo sohena natu, Natun Tamlohi mo sopo sinai vara tamlohi la volitusi isana, mo vono, mo sinai vara enia i volitusi, ale vara i sile na maurina vara i volituhu na matuvana."

*Tamlohi Matavuso Mo Rua
(Mk 10.46-52; Lk 18.35-43)*

²⁹ Ale lara la lo malue Jericho, vao tavera matea la usuria. ³⁰ Ale hin rani atu tamlohi matavuso mo rua la lo sakele na pahisa malele, ale lara la rongoa vara Iesu mo lo hahau na malele mariviti atu, la ulo aulu lara, "Moli, o ūromopoi kamam, Natun David!" ³¹ Vao atu la merusahira vara la toho malum, pani la mele ulo aulu mo tavera jea lara, "Moli, o ūromopoi kamam, Natun David!"

³² Iesu mo turu, ale mo tovira la mai isana mara, "Ka opoi vara a vai na sava isamim?"

³³ La verea isana lara, "Moli, kama opoia vara matamam la kilau." ³⁴ Moiso Iesu mo ūromopoiria, mo tikeli na matara, ale vahatea purongo la eři hite, ale la usuria.

21

*Iesu Mo Unu Na Temple
(Mk 11.1-11; Lk 19.28-38; Jn 12.12-19)*

¹ Ale lara la lo mai mariviti hin Jerusalem, la kakau taon sei Bethphage na pahisa Vuti talu Olive, moiso Iesu mo ūrule na tamlohi usuri mo rua, ² mo verea isara mara, "Ha vano hin vanua aturihi, ale vara ka lo unu ha pa hite na donki matea peresi natuna la lasira ea. Ha uli nařihira, ale ha lavira la mai isaku." ³ Ale, vara tea mo vere te hinau isamim matana, ha pa verea vara, 'Nomam tamlohi tavera mo opoira!' ale vahatea i pa ūrlera la mai." ⁴ Harihi sei, mo malue sohena matan vara sava hinau p̄ovet mo verea moiso i pa masese sei mara,

⁵ 'Ha verea isan la haratu la lo toho Zion vara:

Nomim Supe mo lo mai isamim, mo ūrommalum, ale mo lo sakele na donki matea, ale ha kilau vano, donki sei mo lo sakele hinia enia natu donki matea!' *Zec 9.9*

⁶ Ale la tamlohi usuri atu mo rua la vano la vai na sava Iesu mo verea isara moiso.

⁷ La lavi donki atu peresi na natuna, la tatavu na hařin la donki atu na nora ruru hai, ale Iesu mo sakele hinira, ⁸ moiso, la vao tavera atu la vuřangi na nora ruru na malele tavera atu, ale tatuara la tai na pere vipahai la vuřangira hin malele atu. ⁹ Ale vao tavera atu la vano tiroma hinia peresi la haratu la lo usuria, la lo uloulo tavera lara,

"Hasohaso God, matan natun David!"

"'Ale leřuhu hinia sei
mo lo mai na hijan Moli God!'"

Psa 118.26

"Hasohaso i sahe isan God na tuka sei mo aulu jea!"

¹⁰ Ale na rani mo unu Jerusalem tamlohi tari hin taon tavera atu la hutura hinia, la lo verea lara, "Hare nahai?"

¹¹ Ale vao tavera atu lara, "Tamlohi nīke, enia p̄ovet Iesu, mara Nazareth hin Galilee."

Iesu Mo Unu Na Temple

(Mk 11.15-19; Lk 19.45-48; Jn 2.13-22)

¹² Ale Iesu mo unu na Temple, moiso mo levuti la haratu la lo areařehi peresi la haratu la lo volvoli na lolo Temple, moiso mo tipovi na tepel non la haratu la lojenjen mania peresi na jara sakele non la haratu la lo hařehi na vomahe.

¹³ Mo verea isara mara, "Retiulia mo verea vara, 'Imaku la pa tovia ima usiusi.' Pani kamim ka vaia mo mai jara luhu non la haratu sei la tatamahu moiso mata vili na tamlohi mata vavanaho."

Isa 56.7; Jer 7.11

¹⁴ Moiso matavuso peresi na tamlohi papao la mai isana na lolo Temple, ale mo vai mamahunira. ¹⁵ Pani moli mata p̄ris peresi na tamlohi vujangi mata leu lara la hite na hina mařurahi ūruhu mo lo vaira moiso, ale lara la mele rongo na natuvarahi la lo ulo aulu na Temple lara, "Hasohaso isan Natun David!" tamlohi tatavera atu la lolokoru. ¹⁶ Ale la verea isana lara, "Ko rongo na sava la lo verea?" Ale Iesu mo

vereia isara mara, "He'e! Kamim ka sopo lo evia na Retiulia hin te rani vara, 'God engko ko tatamahu na nom hasohaso vara i pa malue na jingo natuvarihi peresi na pipi?'"

Psa 8.2

¹⁷ Hitahun haratu, mo malue isara, mo malue Jerusalem mo vano na taon matan Bethany, ale mo juruvi atu.

*Vipahai Fig Matea
(Mk 11.12-14, 20-24)*

¹⁸ Na ūalavuho, mo lo hilu vano Jerusalem, ale mo rongo mo marohati.

¹⁹ Ale mo hite na pulo fig matea na pahisa malele, mo vano mariviti, pani mo sopo hite te vuana hinia, pani rauna purongo. Ale mo reti isana mara, "O pa sopo eři mele lavi te vuam hin te rani!" Ale vahatea purongo pulo fig atu mo mahoa.

²⁰ Na rani tamlohi usuri lara la hitea, la hutura lara, "Eh, mo sohena sava natu, pulo fig nike mo mahoa vahatelete purongo?"

²¹ Moiso Iesu mo ūaramira mara, "Varařuhu na vereia isamim, vara te nomim rasua, ale ha sopo ūom rua, kamim ha pa eři vaia sohen harihi na vaia isan pulo fig nike, ale ha pa eři vereia isan vutivuti nike, vara, 'O hase sauho aulu, o pulahiho na lolo tasi!' Ale i pa masese. ²² Ale sava ka lo usia na usiusi, ha pa lavia, vara te nomim rasua."

*Retiusia Mata Suiha Non Iesu
(Mk 11.27-33; Lk 20.1-8)*

²³ Iesu mo unu na Temple, ale mara mo lo vujangi na tamlohi, moli mata pŕis peresi na tamlohi aulu matan Jerusalem la mai isana vara la usi te retiusia isana lara, "Ko lo vai la hinai nike na suihan hare? Hare mo sileho hin suiha sei?"

²⁴ Iesu mo ūaramira mara, "Enau sohena a pa usi kamim na retiusia matea, ale vara ha ūaramiau, enau sohena a pa vereulia vara sava suiha nahai na lo vai la hinai sei hinia. ²⁵ Suiha atu John mo lo paptijo hinia mo tai epu? Mo tai na tuka, teni isana tamlohi?"

Ale la lo sorasorahia isara lara, "Vara ūa vereia vara, 'Mo tai na tuka!' i pa vereia isāra vara, 'Mata sava ka sopo rasua?'

²⁶ Pani vara ūa vereia vara, 'Mo tai isana tamlohi purongo!' vao nike la pa paruřa

matan enira la vereia vara John enia pŕovet varařuhu matea non God."

²⁷ Ale matana, la ūarami Iesu lara, "Kama sopo levosahia."

Ale Iesu mo vereia isara mara, "Enau sohena, a pa sopo vereuli kamim hinia vara sava suiha natu, na lo vai la hinai sei hinia.

²⁸ Ha to ūromřomia, tamlohi matea natuna mo rua. Ale mo vereia isan matea tiroma mara, 'Natuku, o pa vano o voko na isa grape nohorih'i.'

²⁹ Ale uluvou atu mo ūaramia mara, 'Na ūohu!' pani hitahu mo posí na ūromina, ale mo vano.

³⁰ Ale mo mele vano isan natuna tinapua atu, mo vereia sohena. Ale mo ūaramia mara, 'A pa vano tata!' pani mo pa sopo vano. ³¹ Sahara hin la haratu mo rua mo vai na masalon tamana?"

Lara, "Haratu tiroma."

Iesu mo vereia isara mara, "Enjora, varařuhu na vereia isamim, haratu la lo lavi na takis peresi na hařai malele, la pa lavi mauri atu God mo aulu hinia tiroma hin kamim. ³² Matan John mo pala isamim mo vujangi na malele posposi tataholo non God, ale ka sopo rasua, pani haratu la lo lavi na takis peresi na hařai malele la rasua. Hina purongo vara ka hitea, ka ūohu vara ha posí na ūromim varu ha rasu.

*Tamlohi Isa Sasati
(Mk 12.1-12; Lk 20.9-19)*

³³ Ha mele tapurongo na titileu tinapua. Tamlohi tavera mata ima matea mo lavo na isa grape matea. Mo tiu na wořa matea ūalihi, ale mo heli na koko varavarasi grape matea, ale mo voro na ima aulu matea mata kilakilau, ale mo opoia vara tea la pakaia, ale tamlohi hai la pakaia, moiso enia mo vano na jara tinapua matea mo vano asau. ³⁴ Ale taro asitauni mo lo mai mariviti, mo ūule na nona slev la vano isan la tamlohi atu la lo pakai isa atu vara la lavi na ūungana. ³⁵ La tamlohi atu la tauri na nona slev, la tamaji matea, la vilimatei matea, ale la parumatei matea.

³⁶ Tamlohi tavera atu mo mele ūule na slev tinapua, evira mo jeu la haratu tiroma. Ale la tamlohi atu la vaia isara sohen la lo vaia tiroma.

³⁷ Na isoisona, mo ūrule natuna mo vano isara mara, ‘Korong la pa oololo hin natuku!’

³⁸ Pani na rani la tamlohi atu lara la hite natuna, la verea isara hasera lara, ‘Nona korohi nakerihi. Ha mai, ūra vilia, ale ūra pa lavi na koruna.’ ³⁹ Ale la tauria la pulahi narihia hin isa atu, ale la vilimateia atu.

⁴⁰ Ale na usi kamim hinia vara na rani tamlohi isa atu i mele pala, i pa vai na sava isan la tamlohi atu la lo pakai na isana?’

⁴¹ La ūrami Iesu lara, “I pa vilimatei la tamlohi sasati atu na malele ūrlangi matea, ale i pa mele tinařihia isana tamlohi tinařpua vara la pa pakai matana, ale la pa silea na vuana na rani asitauni.”

⁴² Iesu mo verea isara mara, “Enjora, ka sopo lo evi hinau nike na Retitapu hin te rani?

‘Vatu atu tamlohi voro ima la lo tipahia, enia mo mai tapulo pulo vatu mata ima,
haranike Moli God mo vaia,
ale mo ūruh jea matan ūra eři hitea.’

Psa 118.22-23

⁴³ Matana, na lo verea isamim, jara oololo atu ka lo turu hinia isan God sei mo supe mo aulu hin kamim Jew hasemim purongo hinia, God i pa lavi narihi oololo sei isamim, i pa silea isana mara jara tinatinapua sei la pa vua na vua ūruh sei God mo opoia. ⁴⁴ Ale haratu mo lo tialahalaha hin vatu atu, vatu atu i pa putputia, ale vara vatu atu mo jovi hin tea i pa lomolomoa.’”

⁴⁵ Na rani moli mata pŕis peresi na Pharisee lara la rongo titileu atu, la rongovosahia vahatea vara mo lo verera.

⁴⁶ Pani hina purongo vara la lo aleale malele vara la taurilatia hinia, la matahuni la vao atu matan vao atu la rasua vara enia pŕovet matea.

22

Hanhani Tavera Nona Supe Matea (Lk 14.15-24)

¹ Ale Iesu mo mele vere na titileu hai isara mara, ² “Ale mauri atu God mo aulu hinia mo sohen harihi: Supe matea mo tatamahu na hanhani tavera matea mata lahi non natuna, ³ ale mo ūrule na nona slev vara la vano la tovi la haratu sei la lo usira moiso vara la pa mai na hanhani tavera mata lahi sei, pani la ūruh vara la mai. ⁴ Ale

mo mele ūrule te slev tinapua, ale mo verea isara mara, ‘Ha vano isan la haratu ūra usira tiroma, ha verea isara vara la mai natu, matan na tatamahuni na noku hanhani moiso, ale ka hitea, la vili na pulaku buluk hai peresi na natu buluk hai sei la ūravisvis ūruh, hinau tari mo tatamahu moiso, ha mai na hanhani tavera mata lahi.’ ⁵ Pani la sopo tapurongo isara, ale la malue, matea mo vano na isana, matea mo vano na nona stoa, ⁶ ale la hina tinapua atu la taurilati na nona slev la vailehilehira, ale la vilimateira.

⁷ Ale supe atu mo lolokoru, mo ūrule na nona tamlohi vuro, ale la vano la vili la tamlohi atu la sopo juri, ale la suli jovjovi na nora taon tavera. ⁸ Ale mo verea isana nona slev mara, ‘Hanhani tavera mata lahi mo tatamahu moiso, pani haratu ūra usira tiroma la sopo ūruh. ⁹ Ale matana, ha vano na malele tavera, ha usi na sava tamlohi ka tapaira ea vara la mai na hanhani tavera mata lahi.’

¹⁰ Moiso la slev atu la vano na malele, ale la tovi matavuhi na tamlohi sasati, peresi na tamlohi ūruh, haratu la tapaira, ale ima lahi atu mo mařivi na tamlohi atu la lo usira. ¹¹ Pani na rani supe mo mai vara i hite la tamlohi atu la lo usira, mo hite na tamlohi matea atu mo sopo te nona ruru tataholo mata lahi. ¹² Ale mo verea isana mara, ‘Tapala, ko pa unu nike sohena sava matan mo sopo te nom ruru mata lahi?’ Ale tamlohi atu nona hapu mo mate.

¹³ Moiso supe atu mo verea isana nona slev mara, ‘Ha pesi pulutahi na palona peresi na limana, ha pulahia hin jara ūrořoha atu mata talai. Hin jara atu la pa tangtangi, ale la pa ngařngāřori na huřura mata rongohaji ea.’ ¹⁴ Matan God mo tovi na tamlohi matuvana, pani mo viřoni na tupu visalete purongo.’

*Voli Na Takis
(Mk 12.13-17; Lk 20.20-26)*

¹⁵ Moiso Pharisee la vano la hatihia vara la pa vahitea vara Iesu i kali hin te nona reti. ¹⁶ Ale la ūrule na nora tamlohi usuri peresi na tamlohi non supe Herod la vano isana lara, “Tija kama levosahia vara engko ko lo vararu, ale ko lo vujangi na malele vararu mo usuri na masalon God mo tataholo, ale ko sopo ūromřomi na ūromi tamlohi purongo matan ko sopo tametame

tea. ¹⁷ O to vere kamam hinia nakerihi vara mo tataholo vara tamlohi la voli na takis isana supe nona mara Rome teni mo vono?”

¹⁸ Pani matan Iesu mo levosahi na nora posposi vaisatihi na tinapua, mo verea mara, “Kamim tapnetano, ka lo vaihiteau mata sava? ¹⁹ Ha to sileau hin te selen mata takis hatea.” Ale la silea na selen mata takis matea. ²⁰ Moiso Iesu mo verea isara mara, “Ale ha to verea, niniun harepu peresi na hijana nahai?”

²¹ Lara, “Supe nona mara Rome.”

Ale mo verea isara mara, “Ale vara mo sohena, ha sile na hinau non supe nona mara Rome isan supe nona mara Rome, ale hinau non God isan God.” ²² Lara la rongoa sohena sava mo ūramira sei mo ūruhu jea, la hutura hinia, ale la malue la rovo hinia.

Mauri Na Pongi Hitahu

(Mk 12.18-27; Lk 20.27-40)

²³ Rani atu mo pa lo vano, ale Sadducee la mai isana. Vao sei la verea vara mo sopo te sauteterahi, ale la usia na retiusia matea, ²⁴ lara, “Tija, Moses mara, ‘Vara te tamlohi mo mate mo sopo te natuna, tasina i pa lavi narouna mata i korohi te natun tavaina.’” ²⁵ Ale vorai mo limaravrua la lo toho nike isamam, ale vora tiroma mo lahi, ale mo mate, pani mo sopo te natuna. Vora usuria mo lavi narouna. ²⁶ Ale mo sohena isan nona vora usuria atu peresi na hatolura, mo sivo mo tikeli na halimaravruara. ²⁷ Hitahura, hařai atu mo mate. ²⁸ Ale, hin pongi atu tamlohi la pa sauteterahi hinia, matan enira mo isoiso la lahi hin hařai atu, i pa naroun sahara hinira?”

²⁹ Ale Iesu mo ūramira mara, “Romimim mo sopo tataholo, matan ka sopo levosahi na Retitapu teni na suihan God. ³⁰ Matan na pongi hitahu na sauteterahi la pa sopo lahi teni la pa tulatulahi, pani la pa sohena angelo na tuka. ³¹ Ale hin vujangi sei mata sauteterahi, ka sopo lo evi na sava God mo verea isamim? ³² ‘Enau God non Abraham, God non Isaac, ale God non Jacob!’ God mo sopo verea vara enia God non la haratu la mate, pani non la haratu la mauri.” ^{Exo 3.6}

³³ Ale vao tavera atu lara la rongo na nona vujangi, la mařurahi tavera hinia.

Retileu Mo Aulu Jea

(Mk 12.28-34; Lk 10.25-28)

³⁴ Pani Pharisee lara la rongoa vara Iesu mo vuni na hapu non la vao Saducee atu, Pharisee la pulutahi, ale la mai isana. ³⁵ Ale vonara matea, enia tamlohi lelevosahi mata leu matea, ale mo usia na retiusia matea vara i vaihitea mara, ³⁶ “Tija, sava retileu natu, mo aulu mo jeu na retileu tari na Leu?”

³⁷ Ale Iesu mo verea isana mara, “‘O pa opoi Moli nom God vevuhi na mapum, na maurim, ale na nom ūrom ūromi tari’.” ^{Deut 6.5} ³⁸ Harihi natu, enia retileu atu mo aulu jea mo tiromara. ³⁹ Haruana mo sohen harihi, ‘O opoi na tahisam sohen ko lo opoiho hasem’. ^{Lev 19.18}

⁴⁰ Hin la retileu atu mo rua, vujangi tari mata Leu non Moses peresi na p̄ovet la lo turu hinira.”

Natun David Enia Hare

(Mk 12.35-37; Lk 20.41-44)

⁴¹ Ale hin rani atu Pharisee la pa lo pulutahi jara matea, Iesu mo usira na retiusia matea, ⁴² mara, “Ha to vereau na ūromim hin Křisto? Enia mahapin hare?”

Ale la verea isana lara, “Enia mahapin David.”

⁴³ Mo verea isara mara, “Mo sohena sava natu, David, na suihan Tanume ūruhu mo tovia Moli mara,

⁴⁴ ‘Moli God mo verea isan noku Moli: O sakele na matuaku na jara ooloole nike, i tikeli pongi atu a tau na nom mere-sahi na ruhuruhu palom.’

^{Psa 110.1}

⁴⁵ Vara David mo tovia Moli, mo sohena sava natu, enia natun David?” ⁴⁶ Ale, te vonara hatea mo sopo eři ūramia hin te reti hatea, ale mo tapulo hin rani atu, mo sopo tea i ūrom ūlangi vara i mele usi te retiusia isana.

23

Aria Mata Pongi Hitahu

(Mk 12.38-40; Lk 11.37-52; 20.45-47)

¹ Ale Iesu mo verea isan la vao atu peresi na nona tamlohi usuri mara,

² “Tamlohi vujangi mata leu peresi na Pharisee, enira natu, la haratu la lo vujangi na malele Retiulia sei Moses mo ulia vara mo lo vere na sava, ³ matana, mo ūruhu vara

ha vai na hinau tari la verea isamim, ale ha turu hinira, pani ha sopo vai na sava la lo vaira, matan la sopo vai na sava la lo retivujavujangi hinira. ⁴ La lo opoia hajavua vara la tau na hinau puhoni na mauri tamlohi, pani la ūahu vara la juhati na pulora vara la tuenira.

⁵ Hinau la lo vaira la vaira matan vara tamlohi la pa eři hitera, sohen la lo vai na nora sope puku mata Retiulia sei la lo lasira na patura la mele tavera, ale la vai na nora revurevu ruru la mele peravu jea. *Deut 6.8* ⁶ Ale la opoia vara la lo sakele na jara sakele nona tamlohi tatavera na hanhani tavera, ale na jara sakele nona tamlohi aulu na lolo ima lotu, ⁷ ale la opoi na rani tamlohi la tovira vara ‘tija’ ale la opoi na rani tamlohi la sile na retiololo isara na jara maket. ⁸ Pani kamim ha pa sopo lavi na hija tija matan nomim Tija enia matelete, ale kamim vorai peresi na vevorai. ⁹ Ale ha sopo tovi te tamlohi na varama, ‘Tama’ matan Tamamim enia matelete purongo na tuka. ¹⁰ Sohen haratu ha sopo lavi na hija ‘tija’ matan nomim Tija enia Křisto. ¹¹ Haratu mo aulu jea hin kamim, enia i pa nomim volitusi. ¹² Haratu mo hase tahea sahe aulu hin kamim, God i pa taua sivo atano, haratu mo hase taua sivo atano, God i pa tahea sahe aulu.

¹³ Rani ūilangi tavera i pa mai isamim tamlohi vujangi mata leu peresi kamim Pharisee, kamim ka tapnetano, matan ka lo pelatihiro na malele vara tamlohi la sopo eři lavi mauri atu God mo aulu hinia. Matan kamim hasemim ka sopo unu, ale ka lo turuhoro la haratu la opoia vara la unu hinia. ¹⁴⁻¹⁵ Rani ūilangi tavera i pa mai isamim, tamlohi vujangi mata leu, peresi kamim Pharisee, kamim ka tapnetano, matan ka lo hoje na pahisa paniken peresi na peleti, pani na lolona mo mařivi na posposi hanmarua peresi posposi ūromřomi hasemim.

¹⁶ Rani ūilangi tavera i pa mai isamim ka tamlohi tatavera matavuso, ka lo vujangia kara, vara tea mo vere na nona retitauhi na hija Temple, ka verea vara enia hina

purongo, pani vara tea mo vere na nona retitauhi na gold mata Temple, haratu i pa mele ūahu vara i taurilati na nona retitauhi. ¹⁷ Ka matavuso rongorongo vono! Sava mo aulu jea? Gold teni Temple atu sei mo lo vai na gold mo tapu? ¹⁸ Ale ka lo verea vara, vara tea mo vere na nona retitauhi na hija jara silesilea isan God, kara enia hina purongo, pani vara tea mo vere na nona retitauhi na nona silesilea, i pa mele ūahu vara i taurilati na nona retitauhi. ¹⁹ Ka tamlohi matavuso! Sava mo aulu jea? Silesilea teni jara silesilea atu sei mo lo vai na silesilea mo tapu? ²⁰ Ale haratu mo vere na nona retitauhi na hija jara silesilea, mo lo retitauhi na hinau tari hinia. ²¹ Moiso haratu mo lo vere na nona retitauhi na hija Temple, mo retitauhi na hijana peresi God atu mo lo toho hinia. ²² Ale haratu mo retitauhi hin tuka, mo lo retitauhi na jara sakele mata suiha non God peresi God sei mo lo sakele ea. *Isa 66.1*

²³ Rani ūilangi tavera i pa mai isamim, tamlohi vujangi mata leu, peresi kamim Pharisee, kamim ka tapnetano. Kamim ka ayulahi vara ha lo sile na nomim tithe na hinau sohena: solat, oke peresi na watakres, pani ka lo kilau purongoi na hinau aulu mata leu sohena: aria tataholo, ūromopoa peresi na vai vevuhi na nomim retitauhi tarea. Ha vai la harihi la sopo aulu jea, pani ha sopo ūromalihin la haratu la mele aulu jea na nahon God. *Lev 27.30*

²⁴ Ka tamlohi tatavera matavuso! Ka lo spuni nařihi na hina varihi la sati, pani ka lo ūolomi jarohi na hina tavera la sasati!

²⁵ Rani ūilangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano, matan ka lo hoje na pahisa paniken peresi na peleti, pani na lolona mo mařivi na posposi hanmarua peresi posposi ūromřomi hasemim. ²⁶ Ka Pharisee matavuso! Ha hoje na lolonaniken peresi na peleti tiroma matan vara pahisara la pa vokevoke.

²⁷ Rani ūilangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano! Matan kamim ka sohena ima taptap laem lulu, pani lolona mo mařivi na sui tamlohi

peresi na lumira. ²⁸ Ale kamim sohena, la hite kamim sohen ka vokevoke, pani ka mařivi na tapnetano peresi na vaivaileu.

²⁹ Rani ūlangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano! Matan ka voro na ima taptap nona p̄ovet, ale ka lakolako na taptap tamlohi tataholo na storera la ulia na tapura, ³⁰ kara, ‘Vara kama pa lo toho na pongi non la nomam tata, kama pa sopo tuenira vara la vili na p̄ovet.’

³¹ Ale matana, ka lo vereulia vara kamim ka natun la tamlohi atu la lo vili na p̄ovet.

³² Ha vai mařivisi na sava tamamim la tapulona, ³³ ka sohena mata! Ka natu mata sasati. Ha pa juri kamim sohena sava na talai mata moruhapu? ³⁴ Matan haratu, a pa rule te p̄ovet peresi te tamlohi lelevosahi tolu na tamlohi vujangi mata leu, tatuara ha pa vilimateira na talopeilopei, ale tatuara ha pa rupira na asi maja na nomim ima lotu, ale ha pa tipahira na taon tavera tari la pa vano ea, ³⁵ matan haratu i pa sohen harihi: kamim ha pa lavi na talai mata ūae tari nona p̄ovet tuai mo tapulo na ūaen Abel, tamlohi tataholo atu, mo tikeli na ūaen Zechariah natun Barachiah, haratu ka vilia na livuha jara tapu na lolo Temple peresi na jara mata silesilea atu. *Gen 4:8; 2 Chron 24:20-21*

³⁶ Varařuhu na vereea isamim, la talai sei la pa pala isan pina nike.”

Iesu Mo Tangisi Jerusalem (Lk 13:34-35)

Iesu mo mele vereea mara,

³⁷ “Jerusalem o Jerusalem, taon tavera sei tamlohi tatavera la lo vilimatei na p̄ovet hinia, ale la lo parumatei la haratu God mo ūlera isana. Ko sopo levosahia vara vaha visa moiso na opoia vara a hohovi na natum, sohena tina toa mo lo hohovi na natuna na ruhuruhi hapana, pani kamim tamlohi tatavera hinia ka ūruh!
³⁸ Ko hitea, imam nike, i pa mai sohena jara hasetoho matea.

Jer 22:5

³⁹ Matan na vereea isamim, ha pa sopo mele hiteau vavano i tikeli rani atu ha pa vereea vara, ‘Leřuhu hin haratu mo lo mai na hijan Moli God.’”

Psa 118:26

24

Temple I Pa Maroe (Mk 13:1-2; Lk 21:5-6)

¹ Hitahu, Iesu mara mo lo malue na Temple non Jerusalem, nona tamlohi usuri la mai isana vara la vereea vara la ima tavera atu la ūruh sohena sava. ² Pani Iesu mo ūramira mara, “Ka hite la ima tari akerihi? Varařuhu na vereea isamim vara i pa sopo te vatu hatea i pa lo toho aulu na vatu tinapua sei vara la pa sopo atu jovjovira!”

Rani Rilangi Tavera (Mk 13:3-13; Lk 21:7-19)

³ Hitahuna, Iesu mo lo sakele na vuti talu Olive, ale nona tamlohi usuri la mai ūro isana, la vereea lara, “O to vere kamam hinia vara sava matamata natu, kama pa lo kilau matana, vara kama pa levosahia vara nom mele mai peresi na pongi hitahu mo pala.”

⁴ Iesu mo ūramira mara, “Ha lo kilau ha sopo tinařihi tea i halu kamim, ⁵ matan tamlohi matuvana la pa mai na hijaku la pa vereea vara enira natu pa Křisto atu, la pa tikau leji na tamlohi matuvana. ⁶ Ale ha pa rongo na vuro peresi na sorasorahi vuro, pani ha sopo matahu matan harihi natu, i pa mai tiroma, pani pongi hitahu mo sopo lo pala. ⁷ Mara jara tavera tinatinapu la pa meresahi hinira, ale supe matea i pa meresahi na supe tinapua. Marua tavera i pa mai, ale mihi i pa hisuhi na jara matuvana. ⁸ La hinau tari sei la sohena tapulo rongohaji na epe hařai vara i lavilavi.

⁹ Ale la pa tauri kamim ha vano na rani ūlangi sati, la pa vilimatei kamim. Tamlohi tari na jara tavera na varama la pa hitesatihi kamim mata hijaku. ¹⁰ Vao tavera la pa tinařihi na nora rasua hin rani atu, ale la pa turuturuposi hinira, la pa hitesasatihira. ¹¹ Ale p̄ovet haluhalu matuvana la pa pala, la pa tikau leji na tamlohi matuvana. ¹² Ale matan vaivaileu i pa tavera jea, opoia nona tamlohi matuvana la pa tihai. ¹³ Pani harepu mo lo turu ūlangi mo tikeli na pongi hitahu, i pa juri. ¹⁴ Ale tamlohi la pa retivujavujiangi na Retřuhu matan mauri atu God mo aulu hinia isana mara jara tinatinapua na

varama matan vara la pa levosahia, moiso pongi hitahu i pa pala.

*Hina Sasati Na Lolo Temple
(Mk 13.14-23; Lk 21.20-24)*

¹⁵ Vara ha hite hina lumiha sei God mo ūruhū hinia, haratu sei p̄rovet Daniel mo lo verea tuai moiso, vara mo turu na jara tapu na lolo Temple, hare mo lo evi reti nīke i levosahi na ūramina, *Dan 9.27* ¹⁶ mo ūruhū vara la harātu la lo toho Judea la rovo la sahe na vutivuti. ¹⁷ Mo ūruhū vara haratu mo lo toho aulu na pusa imana i pa sopo sevuti sivo na lolona vara i lavi nařihi na nona hinahinau hinia, ¹⁸ Ale mo ūruhū vara haratu mo lo voko na isa i pa sopo posi vara i ale na nona jaket. ¹⁹ I pa rani ūlangi isana hařai sei la pangepange peresi la haratu la pa lo vasusui na nora pipi hin rani atu! ²⁰ Ha usiusi isan God vara nomim rovorovo i pa sopo jovi na taro hamariri teni na rani Sabbath. ²¹ Mo sopo lo te rani sohen rani ūlangi tavera atu, mo tapulo na pongi tiroma mo tikeli nake, ale i pa sopo mele tea sohena hin te rani. *Dan 12.1*

²² Ale vara God i sopo lo vai la rani ūlangi atu evira la mele vejuveju, i pa sopo te tamlohi hatea i pa mauri. Pani matan la haratu God mo viřonira, enia i pa vai la rani atu evira la mele vejuveju.

²³ Moiso vara tea mo verea mara, ‘Ha kilau mai nīke! Křisto atu enia nahai, teni enia natu, sevano’ – mo vono, ha sopo rasua. ²⁴ Matan křisto haluhalu peresi na p̄rovet haluhalu la pa pala, ale la pa vai na matamata tatavera peresi na hinau mařurahi, matan vara la vahitea vara la eři tikau leji la haratu Moli mo viřonira. ²⁵ Ka hitea, mo sopo lo ranina tataholo pani na lo vere kamim hinia moiso.

²⁶ Ale vara la verea isamim lara, ‘Ha kilau vano, enia natuvano na jara tano koru!’ – ha sopo vano atu! Teni vara la verea lara, ‘Ha kilau mai nīke, enia nahai mo lo toho na lolo ima nīke!’ – ha sopo rasua! ²⁷ Matan rani mata mele mai non Natun Tamlohi i pa mera sohena vaha sei

mo vilasi, merana mo tai Opae mo sivo Marino. ²⁸ Vara ko hite na karai la lo avu vano hin te jara, o pa levosahia vara te pahai mo mena atu.*

*Rani Atu Natun Tamlohi I Pa Mele Mai Hinia
(Mk 13.24-27; Lk 21.25-28)*

²⁹ La hinau ūlangi atu vara la vano moiso,
‘Vahatea purongo mera alo i pa tihai,
vitu i pa sopo mele sile na memerana,
vitusarasara la pa jovjovi na masapa,
ale God i pa hutehi na suiha tari na tuka’. *Isa 13.10; Joel 2.10*

³⁰ Ale matamata matan Natun Tamlohi i pa pala na masapa aulu, ale tavitavui tari mata varama la pa tangi mata matahu, moiso la pa hite Natun Tamlohi i pa lo mai na telangi matan tuka na nona suiha peresi na merana tavera. *Dan 7.13; Zec 12.10-14* ³¹ I pa ūrule na nona angelo na tiv tavera mata trumpet matea, moiso la pa takonahi la haratu mo viřonira ūlili na varama na jara tari na masapa aulu na varama.

*Vujangi Mata Vipahai Fig
(Mk 13.28-31; Lk 21.29-33)*

³² Ha lo levosahi na titileu mata vipahai fig: na rani rangana la lo sasařira, ha pa levosahia vara taro mamasa mo lo mai. ³³ Ale kamim sohena, vara ha hite la hinau nīke, na lo verea isamim la lo tapulo masese, ha pa levosahia vara Natun Tamlohi mo lo mai mariviti moiso, mo lo turu na matarua. ³⁴ Varařuhu na verea isamim, vara pina nīke sei mo lo mauri hin rani atu, la pa sopo eři tihai, vavano la hinau nīke, la masese vevuhi tiroma. ³⁵ Tuka enia varama la pa tihai, pani noku reti la pa sopo eři tihai hin te rani.

*Tea Mo Sopo Levosahia
(Mk 13.32-37; Lk 17.26-30, 34-36)*

³⁶ Pani rani atu tea i pa sopo eři levosahia vara enia sava rani teni aoa natu. Mo sopo te angelo na tuka, teni Natuna, pani Tama hasena purongo mo levosahia.

* **24:28:** Iesu mo vere na hija maji avuavu sei ‘vulture’. Enia posina mo sohena karai pani enira tamlohi mata ale na hinau mo mate mo ranga moiso. v. 28 Translesen tinapua matea: Vara ko hite na vulture la lo takonahi jara matea, o pa levosahia vara te hinau mo mate atu, ale sohen haratu, vara o hite la matamata sei la malue usuri na noku reti, o pa levosahia vara i pa sopo tuai Natun Tamlohi i pa mele pala.

³⁷ Hin rani atu Natun Tamlohi i pa mele mai, i pa sohena rani non Noah. *Gen 6.5-8*

³⁸ Matan sohen hin pongi atu tuai wai tavera mo sopo lo lolovi na varama, tamlohi la lo vai na hanhani tavera, ale la lo vai na lahi, la lo tulatulahi vavano Noah mo unu na Ark. ³⁹ Ale tamlohi la sopo levosahi na sava i pa mai mo sinai wai tatave tavera atu mo mai mo tivesi vevuhira. I pa sohen haratu hin pongi atu Natun Tamlohi i pa mele mai hinia. *Gen 7.6-24*

⁴⁰ Hin pongi atu, tamlohi mo rua la pa lo voko na isa, la pa lavi nařihi matea, matea i pa lo toho. ⁴¹ Ale hařai mo rua la pa lo visi na flaua, la pa lavi nařihi matea, matea i pa lo toho. ⁴² Ale matan haratu, ha tatamahu! Ka sopo levosahia vara sava rani natu, nomim Moli i pa mele mai hinia.

⁴³ Ale ha lo levosahi hinau akerihi, vara tamlohi tavera mata ima matea i pa lo levosahi na sava aoa na vutepongi sei vara tamlohi vavanaho i pa mai hinia, i pa lo kilau, ale i pa sopo tinařihia vara i unu na imana. ⁴⁴ Ale matan haratu, kamim sohena ha tatamahu, matan ha pa sopo levosahi aoa atu Natun Tamlohi i pa mele mai hinia.

Hare Enia Tamlohi Lelevosahi? (Lk 12.35-48)

⁴⁵ Harepu natu, enia sohen volitusi lelevosahi matea, ale mo lo řomturu řilangi tarea, vara nona tamlohi tavera mo viřonia vara i lo kilau na vao volitusi na imana mařtan vara i sile na hara hinau isara na rani tatahola? ⁴⁶ Avulahi tavera isan volitusi atu mo lo vai na sava nona tamlohi tavera mo verea hin rani atu vara i mele mai. ⁴⁷ Varařuhu, na verea isamim, tamlohi tavera atu i pa taua i aulu na nona hinahinau tari. ⁴⁸ Pani vara volitusi sasati matea mo lo hase řomřomia vara, ‘Noku tamlohi tavera i pa sopo mai vila sei!’ ⁴⁹ Moiso mo tapulo tamaji na tatuana volitusi tinapua, ale mo lo hanhani, ale mo inu peresi la haratu la lo sasařuhu. ⁵⁰ Nona tamlohi tavera atu i pa pala na rani teni aoa sei volitusi atu mo sopo levosahia vara i pa pala hinia, ⁵¹ ale i pa tai rotoa i taua peresi na tapnetano. Hin jara atu la pa tangtangi, ale la pa ngařngārōri na hurura mata rongohaji.’

25

Hařai Maevo Mo Sangavulu

Iesu mo verea mara,

¹ “Hin pongi atu, mauri atu God mo aulu hinia i pa sohen hařai maevo mo sangavulu sei la lavi na nora lamu potele la vano vara la tapai na tamlohi i pa lahi.

² Mo lima hinira la rongorongo vono, ale mo lima la lelevosahi. ³ Matan la haratu la rongorongo vono lara la lavi na nora lamu potele, la sopo lavi te wel matara, ⁴ pani la haratu la lelevosahi la lavi na potele wel peresi na nora lamu potele. ⁵ Ale tamlohi vara i pa lahi mo sopo mai vila, ale la hařai maevo tari atu la tapulo peka, ale la juruvi. ⁶ Pani na livuha vutepongi la rongo na leo matea mo ulo mara, ‘Tamlohi i pa lahi nahai. Ha mai ha tapaia.’

⁷ Ale la hařai maevo atu la kilau, ale la tai nařihi na korukoru pingo ruru na nora lamu potele vara lamu la mele memera i řuhu. ⁸ Pani la haratu la rongorongo vono, la verea isan la haratu la lelevosahi lara, ‘Ha sile te nomim wel makomona isamam matan nomam lamu potele la lo tapulo mate.’

⁹ Pani la haratu la lelevosahi la řaramira lara, ‘Wel mo sopo tatahola hiniřa mo isoiso. Ha vano na stoa ha voli te nomim!’

¹⁰ Ale la pa lo vano vara la voli tea, tamlohi vara i pa lahi mo pala, ale la haratu la lo tatamahu la usuria la vano na hanhani lahi, ale la pelatihoro na matarua. ¹¹ Mo sopo tuai la hařai maevo tinapua atu la pala lara, ‘Tamlohi tavera! Tamlohi tavera, o roi isamam!’

¹² Pani mo řaramira mara, ‘Varařuhu na verea isamim, na sopo levosahi kamim.’”

¹³ Iesu mo mele verea mara, “Matan hinau atu ha tatamahu, matan ka sopo levosahia vara sava rani teni aoa Natun Tamlohi i pa mele mai hinia.”

Slev Mo Tolu (Lk 19.11-27)

¹⁴ Mo mele verea mara, “I pa sohena tamlohi matea mo vano na nona hahau matea. Mo tovi na nona slev, ale mo tau na nona hinahinau na limara. ¹⁵ Isan matea, mo silea na selen mo lima. Selen matea hinira, mo tatahola mata voli tamlohi matea mata voko mata rani i tari vahatea **(1,000)**. Ale isan matea mo sile na selen mo rua,

ale isan matea mo sile na selen matea. Mo silea isara mo tataholo na nora eřia, moiso mo malue mo vano na nona hahau. ¹⁶ Haratu mo lo sile na selen mo lima isana tiroma, mo vano vahatea mo voko persia, ale mo mele tikeli na selen mo lima tinapua. ¹⁷ Haratu mo lo lavi na selen mo rua mo sohena mo mele tikeli na selen mo rua tinapua. ¹⁸ Pani haratu sei mo lo lavi na selen matea, mo vano mo heli na koko matea na lepa mo tavuni jarohi mania atu non nona tamlohi tavera.

¹⁹ Rani matuvana la vano moiso, ale tamlohi tavera non la slev atu mo mele hilu vara i levosahia vara la vai na sava hin la mania atu. ²⁰ Ale haratu mo lo lavi na selen mo lima mo juha mai isana, mo lavi na selen mo lima tinapua hin la haratu mo lo lavira tiroma mo verea mara, ‘Tamlohi tavera, ko sileau na selen mo lima; ale na mele vai na selen mo lima tinapua.’ ²¹ Ale nona tamlohi tavera mo verea isana mara, ‘Ko vai na voko ūruhu. Ko ūromturu ūrlangi na nom makomo hinau, ale nake a pa tauho o aulu na hinau mo mařivi. O unu na avulahi tavera non nom tamlohi tavera.’

²² Ale haratu mo lo lavi na selen mo rua mo juha mai isana, mo lavi na selen mo rua tinapua hin la haratu mo lo lavira tiroma mo verea mara, ‘Tamlohi tavera, ko sileau na selen mo rua; ale na mele vai na selen mo rua tinapua.’

²³ Ale nona tamlohi tavera mo verea isana mara, ‘Ko vai na voko ūruhu. Ko ūromturu ūrlangi na nom makomo hinau, ale nake a pa tauho o aulu na hinau mo mařivi. O unu na avulahi tavera non nom tamlohi tavera.’

²⁴ Ale haratu mo lo lavi na selen matea mo juha mai isana mo verea mara, ‘Tamlohi tavera, na levosahia vara engko tamlohi ūrlangi matea, ko lo lavi na vua pahai engko ko sopo lavoa. Ko lo takonahi na wit na jara engko ko sopo hapořahi tea ea, ²⁵ ale na matahu, na vano na jarohi na nom mania na lepa. Nahai, o mele lavi na sava enia nom.’

²⁶ Pani nona tamlohi tavera mo ūramaria mara, ‘Engko tamlohi sasati, ko slev maloko vari. Ko ūromi vara enau tamlohi ūrlangi matea, ale na lo lavi na vua pahai na sopo lavoa, ale na lo takonahi na wit na jara na sopo hapořahi tea ea? ²⁷ Vara mo

sohena, i pa mele ūruhu jea vara o lo tau na mania isana tamlohi bank matan vara a mele pala a pa eři lavi na noku mania peresi haratu makomona bank i pa mele silea aulu na noku mania.’ ²⁸ Ale mo verea isan te nona slev tinapua mara, ‘Ha lavi nařihi selen atu isana, ha silea isan haratu mo lavi na selen mo sangavulu, ²⁹ matan isan la haratu la lavi te hinau, la pa mele silera hin te hinau, ale i pa masurere isana. Pani isan haratu mo lekoleko, sava enia nona tiroma i pa lavi nařiha. ³⁰ Ale ha pulahi slev atu mo sopo ūruhu hin te hinau hatea i vano na jara ūrořoha. Hin jara atu la pa tangtangi, ale la pa ngařngařori na huřura mata hajhaji ea.’

Aria Tavera Mo Lo Mai

³¹ Na rani vara Natun Tamlohi i mai na nona sasarami peresi na angelo tari, hin rani atu natu i pa sakele na nona jara sakele mata suiha nona Supe. ³² Mara jara tinatinapua na varama la pa turu na nahona moiso i pa asera hatehateahi sohena tavui sipsip matea mo lo ase na pulana sipsip na nani. ³³ Ale i pa tau na sipsip na matuana, ale nani na marauna. ³⁴ Ale i pa verea isan la haratu na matuana vara, ‘Ha mai, kamim sei Tamaku mo leřuhu hin kamim! Ha lavi mauri atu God mo aulu hinia sei mo tau mamahunia matamim tuai tiroma moiso mo pa vai na varama. ³⁵ Matan na marohati ka sileau na hanhani, na mařohu ka sileau na inu, enau na vinano matea ka toviau na imamim, ³⁶ mo sopo te noku ruru ka sileau na ruru, na rojo ka mai ka rohiau, na lo toho na ima ūrlangi, ale ka mai ka hiteau.’

³⁷ Moiso la tamlohi tataholo atu la pa ūramaria vara, ‘Moli, nangisa kama hiteho ko marohati, ale kama vahaniho, teni ko mařohu, ale kama sileho na wai?’ ³⁸ Ale nangisa natu, kama pa hiteho ko vinano, ale kama toviho na imamam, teni ko mala-mala, ale kama ruruho? ³⁹ Ale nangisa natu, kama hiteho ko rojo teni ko lo toho na ima ūrlangi, ale kama rohiko?’

⁴⁰ Ale Supe i pa ūramira, vara ‘Varařuhu na verea isamim, na rani ko vaia te hinau mo ūruhu isan te voraiku teni te vevorai riřirihi hatea, ko lo vaia isaku.’

⁴¹ Ale i pa verea isan la haratu na marauna vara, ‘Ha malue na nahoku, kamim

ka lo toho na ruhuruhi lesati, ha unu na hapu matan tui tui atu na tatamahunia matan Tiapolo peresi na nona angelo sati,
⁴² matan na marohati, pani ka sopo sileau hin te hanhani, na mařohu, pani ka sopo sileau hin te wai,
⁴³ enau na vinano matea, pani ka sopo toviau na imamim, enau na malamala, pani ka sopo ruruau, na rojo, ale ka sopo mai vara ha rohiau, ale na lo toho na ima ūilangi, pani ka sopo mai isaku.'

⁴⁴ Ale enira sohena la pa ūaramia vara, 'Moli, nangisa natu, kama hiteho ko marohati, teni ko mařohu, teni ko vinano matea, teni ko malamala, teni ko rojo teni ko lo toho na ima ūilangi, ale kama sopo tueniho?'

⁴⁵ Ale i pa ūaramira vara, 'Varařuhu na verea isamim, matan ka sopo vai te hinau ūruhi isan te voraiku rihirihi hatea ka sopo vaia isaku.' ⁴⁶ Ale la haratu, la pa vano la unu na talai matan tui tui, pani la haratu la tataholo la pa unu na mauri tui.' " *Dan 12.2*

26

La Opoia Vara Iesu I Mate (Mk 14.1-2; Lk 22.1-2; Jn 11.45-53)

¹ Iesu mara mo verea la hinau sei moiso mo verea isana nona tamlohi usuri mara,
² "Ka levosahia vara rani mo rua mo lo toho moiso rani Passover i pa mai, ale la pa sile Natun Tamlohi vara la vosaea na talopeilopei."

Exo 12.1-27

³ Hin rani atu moli mata přis peresi na tamlohi aulu nona tamlohi la pulutahi na ima tavera non přis aulu sei, hijana Caiaphas,
⁴ ale la hatihia jara matea vara la pa taurilati Iesu na malele halu vara la vilia.

⁵ Pani la verea lara, "I pa sopo na livuha hanhani Passover, matan vara i vono, tamlohi la pa lolokoru tavera, ale ūa sopo eři vaira la toho malum."

Hařai Matea Mo Sile Na Oloolo Tavera Isan Iesu (Mk 14.3-9; Jn 12.1-8)

⁶ Ale hin rani atu Iesu mo lo toho Bethany na iman Simon, tamlohi lepros matea,
⁷ Iesu mo pa lo sakele na tepel ea, ale hařai matea mo mai isana, mo lo tauri na potole hasori matea la tovia alabaster, volina mo

tavera jea, ale mo rengia na patuna.
⁸ Nona tamlohi usuri lara la hitea la lolokoru lara, "Mata sava mo lo surei komokomoa?
⁹ Matan hinau sei o eři hařehia mata mania tavera, ale o silea isana tilavono."

¹⁰ Pani Iesu mo levosahi na sava la lo verea, ale mo verea isara mara, "Mata sava ka lo ari hařai nike? Enia mo vai na hinau ūhuřuhu matea isaku." ¹¹ Matan tilavono la pa lo toho peresi kamim tarea, pani enau a pa sopo toho peresi kamim tarea. *Deut 15.11*

¹² Enia mo surei hasori nike na epeku matan vara i tatamahuni na epeku mata noku tavuni. ¹³ Varařuhu na verea isamim, sava jara Retřuhu la pa sorahia ea na varama, la pa sorahi na sava mo vaia vara tamlohi la pa mele ūromřomia."

Judas Mo Turuposi Hin Iesu (Mk 14.10-11; Lk 22.3-6)

¹⁴ Ale vonan la tupu sangavulu ūromana mo rua atu hijana Judas Iscariot mo vano isana moli mata přis,
¹⁵ mo verea mara, "Ha pa sile na sava isaku vara a taua na limamim?" Ale la vuti la silea na silver selen mo ngavulu tolu. *Zec 11.12*

¹⁶ Moiso, mo tapulo hin rani atu mo tapulo aleale masapa vara i turuposi hinia.

Hanhani Mata Passover (Mk 14.12-21; Lk 22.7-13; Jn 13.21-30)

¹⁷ Na rani tiroma mata hanhani tavera mata pereti mo sopo te isi hinia, tamlohi usuri la mai isan Iesu lara, "Ko opoia vara kama pa tatamahu epu vara o pa hani na Passover ea?"

¹⁸ Mo verea mara, "Ha unu na taon tavera, ale ha hite na tamlohi matea, ale ha verea isana vara, 'Tija mo verea mara, noku rani mo mai mariviti, a pa hani na hanhani mata Passover peresi na noku tamlohi usuri na imam.' " ¹⁹ Ale nona tamlohi usuri la vaia sohena mo verea isara, ale la tatamahuni na hanhani Passover.

²⁰ Ale na ravravi mo sakele na tepel peresi la tamlohi usuri tupu sangavulu ūromana mo rua atu. ²¹ Ale la pa lo hanhani mo verea mara, "Varařuhu na verea isamim, vonamim matea i pa turuposi hiniau."

²² La rongo mo sati, ale la tapulo verea isana enira hatehateahi lara, "Tija, enau teni mo vono?"

²³ Mo ūramaria mara, “Matea mo lo seri na pereti peresiau na pesin matea, i pa turuposi hiniau.” *Psa 41.9*

²⁴ Natun Tamlohi i pa vano na malele mata mateia sohen la ulia na Retiulia matana, pani rani ūlangi tavera isan haratu mo lo turuposi hin Natun Tamlohi. I pa mele ūruhu jea isana vara tamlohi atu i sopo vora.”

²⁵ Judas haratu sei i pa turuposi hinia mo ūramaria mara, “Tija, korong enau teni mo vono?”

Iesu mo verea isana mara, “Engko ko hase vereho moiso.”

Isoison Hanhani Tavera Atu

(Mk 14.22-26; Lk 22.14-23; 1Co 11.23-25)

²⁶ Ale lara la lo hanhani, Iesu mo lavi na pereti mo topea mo vere meje isan God matana, ale mo silea isana nona tamlohi usuri, ale mara, “Ha lavia, ha hania, enia epeku.” ²⁷ Ale mo tauri na paniken matea, mara mo vere meje isan God, mo silea isara mara, “Ha inu hinia, kamim mo isoiso, ²⁸ matan harihi enia ūaku mata retitauhi God mo vaia matan vara ūaku i pa roro matan vara i ūromi na hehe nona tamlohi matuvana.” *Exo 24.8; Jer 31.31-34*

²⁹ Na vere kamim hinia, enau a pa sopo mele inu waen nike i tikeli pongi atu a pa mele inua peresi kamim hin mauri atu Tamaku mo supe hinia.” ³⁰ Lara la lalavete na vete matea moiso la malue la sahe na Vuti talu Olive.

Retitauhi Non Peter

(Mk 14.27-31; Lk 22.31-34; Jn 13.36-38)

³¹ Ale Iesu mo verea isara mara, “Kamim mo isoiso ha pa rovo hiniau nohoirihi na vutepongi. Matan la ulia na Retiulia moiso vara,

‘A pa vilijovi na tavui sipsip

ale sipsip la pa rovorovo.’ *Zec 13.7*

³² Pani hitahu na noku sauteterahi, a pa vano tiroma hin kamim Galilee.” *Mt 28.16*

³³ Peter mo ūramaria mara, “Vara enira mo isoiso la rovo hinihi, enau a pa sopo eři rovo hinihi.”

³⁴ Iesu mo verea mara, “Vara ūruhu na verea isam, hin vutepongi akerihi purongo, engko o pa vunvuniau vaha tolu, tiroma moiso toa vari i pa tarere.”

³⁵ Peter mo verea isana mara, “Vara a pa mate peresih, a pa sopo vunvunihi!”

Nona tamlohi usuri mo isoiso la verea sohena.

Iesu Mo Usiusi

(Mk 14.32-42; Lk 22.39-46)

³⁶ Moiso, Iesu mo vano peresira na jara matea hijana Gethsemane, ale mo verea isana nona tamlohi usuri mara, “Ha sakele nike tako, a pa vano sevano a usiusi.”

³⁷ Moiso mo lavi Peter peresi la natun Zebedee atu mo rua John enia James, ale mo tapulo rongo mo sati, ale ūromina mo sopo sakele. ³⁸ Ale mo verea isara mara, “Mapuku mo rongo mo sati tavera vara i mate. Ha lo toho nike, ha lo kilau peresiau.”

³⁹ Mo mele juha vano makomona, ale mo popovitoho na nahona na lepa, ale mo usiusi mara, “Tamaku, vara mo tataholo, o nařihi rani ūlangi nike isaku, pani o sopo usuri na masaloku, o usuri na masalom purongo.” ⁴⁰ Moiso mo mele mai isana nona tamlohi usuri mo hitera la juruvi ūromalihi. Mo verea isan Peter mara, “Kamim, ka sopo eři kilau peresiau mata aoa matea purongo? ⁴¹ Ha kilau, ha usiusi vara ha pa sopo eři jovi na rani vahite sei la lo mai isamim, ūromim mo ūruhu, pani na suihamim purongo ha sopo eři vaira.”

⁴² Mo mele sahe haruana vara i usiusi mara, “Tamaku, vara o sopo nařihi paniken akerihi vavano a inua, o usuri na masalom.” ⁴³ Ale mo mele mai isara mo hitera la juruvi ūromalihi matan matara la puhoni.

⁴⁴ Ale mo mele malue isara, mo vano mo mele usiusi hatoluna, mo mele verea la retireti atu tiroma mo lo verera. ⁴⁵ Moiso mo mai isana nona tamlohi usuri mo verea isara mara, “Ha pa juruvi, ale ha mapu hin te rani tinapua. Ka hitea, mariviti vara la turuposi hin Natun Tamlohi natu, ale i pa vano na lima tamlohi hehe.” ⁴⁶ Ha turu, ūra lo vano! Ka hitea, tamlohi atu mo lo turuposi hiniau mo lo mai mariviti.”

La Taurilati Iesu

(Mk 14.43-50; Lk 22.47-53; Jn 18.3-12)

⁴⁷ Mo pa lo retireti, Judas mo pala, vongan la tupu sangavulu ūromana mo rua atu matea peresi na vao tavera matea la tai isan moli mata pris peresi na nora tamlohi aulu, ale la lo lavi na sita vuro peresi na

maja. ⁴⁸ Tamlohi turuposi atu mo pete verera na matamata matea moiso mara, “Haratu a pa pungosia, enia natu tamlohi atu; ha pa taurilatia.” ⁴⁹ Ale mo mai isan Iesu vahatea mara, “Tija, mo ūruhu!” Ale mo pungosia.

⁵⁰ Iesu mo verea isana mara, “Tapala, o vai na sava ko mai vara o vaia.” Moiso la mai isana la tauria vara la taurilatia. ⁵¹ Ale vahatea purongo, vonan la haratu matea mo lo toho peresi Iesu mo ūrāhi na limana, mo reve nařihi na nona sita vuro, ale mo langa na tavalu pero slev nona přis aulu.

⁵² Moiso Iesu mo verea isana mara, “O mele tau na nom sita na jarana. Matan haratu la lo lavi na sita vuro la pa mate na sita vuro. ⁵³ Ka sopo levosahia vara a eři tovi isan Tamaku vara i ūrule na angelo i jeu 72,000, ale vahatea purongo la pa tingiřa? ⁵⁴ Pani sohena sava natu, hinau la pa masese sohena Retitapu mo verea vara i sohena?”

⁵⁵ Hin rani atu Iesu mo verea isan vao atu mara, “Ka mai peresi na sita vuro peresi na mama sohena vara ka lo vano mata taurilati na tamlohi sasati matea? Tarea na lo sakele na lolo Temple na lo vujangi, pani ka sopo tauriau! ⁵⁶ Pani la hinau sei la pala sohena matan vara Retitapu nona přovet tuai la pa masese.” Moiso nona tamlohi usuri tari la malue la rovo hinia.

*Mo Turu Na Naho Tamlohi Tatavera
(Mk 14.53-65; Lk 22.54-55, 63-71; Jn 18.13-14, 19-24)*

⁵⁷ Ale la haratu sei la lo taurilati Iesu la tiroma hinia mo vano na iman Caiaphas, enia přis aulu, tamlohi vujangi mata leu peresi na nora tamlohi aulu la lo takonahi hin jara atu. ⁵⁸ Ale Peter mo lo usuria asau makomona, mo vano mo tikeli na rope iman přis aulu atu, ale mo unu na lolona, ale mo lo sakele peresi na tamlohi kilau atu matan vara i pa hite na isoisona.

⁵⁹ Ale moli mata přis peresi na tamlohi tari tinapua mata council la lo aleale tamlohi vara la pa vere te retireti halu na sava Iesu mo lo vaia moiso matan vara la pa eři vilimateia matara, ⁶⁰ pani mo sopo tea, hina purongo vara tamlohi halu mo marivi la turu na nahora. Hitahuna, mo rua la pala mai, ⁶¹ lara, “Tamlohi akerihi mo verea mara, ‘Enau a eři komo na Temple

non God, ale a mele voroa na rani i tolupurongo.’”

⁶² Ale přis aulu atu mo turu sahe mara, “O pa ūramaria teni mo vono? Sava nahai la tamlohi nike, la lo retivuhesia matam?”

⁶³ Pani Iesu mo lo turu tapanono. Ale přis aulu mo verea isana mara, “Na usiho vara o retitauhi hin God mauri vara o vere kamam hinia vara engko natu, Křisto atu Natun God?”

⁶⁴ Iesu mo verea isana mara, “Engko ko pete verea moiso, pani na verea isam vara i pa sopo tuai o pa hite Natun Tamlohi i sakele na matua suiha na tuka, ale mo lo mai na telangi matan tuka.” *Dan 7.13*

⁶⁵ Moiso přis aulu mo ūrari na nona ruru mara, “Mo lo vaia sohena enia God. Ra sopo mele opoi te tamlohi tuetueni tinapua, ka pete rongo na nona reti hehe hin God nakerihi moiso. *Lev 24.16* ⁶⁶ Nomim aria i pa vano sohena sava?”

La ūramaria lara, “Mo tatahola vara i mate.”

⁶⁷ Moiso la litovi na nahona, la tuhia, ale hai la vojahia, *Isa 50.6* ⁶⁸ lara, “O reti mangovi isamam Křisto, hare natu, mo tuhiho?”

*Peter Mo Vunvuni Iesu
(Mk 14.66-72; Lk 22.56-62; Jn 18.15-18,
25-27)*

⁶⁹ Hinau atu mo lo vano, ale Peter mo lo sakele na jingoima na lolon ropaen ima atu, ale slev hařai matea mo sinai isana mara, “Engko sohena, ko lo toho peresi Iesu mara Galilee atu!”

⁷⁰ Pani mo vunvunia na nahon vao atu mara, “Enau na sopo levosahi na sava ko lo verea.”

⁷¹ Ale mara mo malue na matarua atu slev hařai tinapua matea mo hitea mo verea isan la haratu la lo turu mariviti isana mara, “Tamlohi nike, mo lo toho peresi Iesu mara Nazareth.”

⁷² Ale mele vahatea mo vunvunia na retitauhi matea mara, “Na sopo halu, na sopo levosahi tamlohi sei.”

⁷³ Ale mo sopo tuai la haratu la lo turu ea la mai isan Peter lara, “Enjora, engko vonara matea matan leom mo vereuliho.”

⁷⁴ Ale mo tapulo lesati hinia hasena moiso mo retitauhi mara, “Na sopo levosahi tamlohi sei.” Ale vahatea purongo toa vari matea mo tarere.

⁷⁵ Moiso Peter mo mele ūromūromi na retireti non Iesu, “Toa i sopo lo tarere o pa vunvuniau vaha tolu.” Ale mo malue hin jara atu mo tangi ūromina mo sati tavera.

27

La Lavia Mo Vano Isan Pilate (Mk 15.1; Lk 23.1-2; Jn 18.28-32)

¹ Mo mele rani sahe na ūralavuho jea, moli mata p̄ris tari peresi na tamlohi aulu nona tamlohi la pulutahi vara la vai nora ūromūromi tavera vara la pa tau Iesu na mateia. ² Ale la lihoa la tiroma hinia mo malue la taua na liman Pontius Pilate, tamlohi tavera matan Rome sei mo lo aulu hin Israel.

Judas Mo Mate (Acts 1.18-19)

³ Moiso Judas, haratu sei mo lo turuposi hinia mara mo hitea vara la pa sile na talai tavera isan Iesu, mo posa na ūromina, ale mo mele lavi la silver selen atu mo ngavulu tolu mo hilu mo vano isana moli mata p̄ris peresi na tamlohi aulu, ⁴ mara, “Na vai na hehe matan na turuposi na ūrae vokevoke.”

Lara, “Kama sopo opoia vara kama levosahia, enia nom hinau.” ⁵ Ale mo pulahi la silver selen atu la sivo na lolo Temple, mo malue mo vano mo lihoa hasena. ⁶ Pani moli mata p̄ris la lavi la silver selen atu lara, “Vara ūra mele taura na jara mania na Temple i pa tope na leu matan mania akerihi enia mania mata ūrae.” ⁷ Ale la matavuhi la hatihia vara la pa lavi mania atu, la voli na lepa matea la tovia ‘Lepa non Potter’ matan vara la pa lo tavuni na tamlohi la sopo Jew hinia. ⁸ Matana, lepa atu la tovi ‘Lepa mata Rae’ mo tikeli naake. ⁹ Ale sava reti p̄rovet Jeremiah mo verea mo masese mara, ‘Ale la lavi na silver selen mo ngavulu tolu ⁽³⁰⁾, voli mauri sei tatua natun Israel la hatihia vara mo tataholo hinia, ¹⁰ ale la silera mata voli lepa non Potter sohen Moli God mo retileu hiniau’. ^{Zec 11.12-13}

Pilate Mo Tapai Iesu (Mk 15.2-5; Lk 23.3-5; Jn 18.33-38)

¹¹ Moiso Iesu mo turu na nahon tamlohi tavera matan Rome, ale tamlohi tavera atu mo usia isana mara, “Engko natu, Supe nona Jew?”

Iesu mara, “Engko ko pete verea moiso.”

¹² Pani moli mata p̄ris peresi na vajiahara sei la aulu lara la tuvaia hin te hinau, Iesu mo sopo ūramira. ¹³ Moiso Pilate mo verea isana mara, “Ko sopo rongo na hinau matuvana sei la lo retivuhesia matam?” ¹⁴ Pani Iesu mo sopo ūramia, mo sopo ūrami te tuvai hatelete, ale tamlohi tavera atu mo mařurahi tavera matana.

La Taua Vara I Mate (Mk 15.6-15; Lk 23.13-26; Jn 18.39-19.16)

¹⁵ Hin rani atu, tarea na hanhani tavera, tamlohi tavera atu mo lo juri na tamlohi matea na ima ūrilangi mo lo toho isana vao atu vara sava tamlohi vao atu mo opoia vara i pa juria. ¹⁶ Ale hin rani atu tamlohi sasati matea la levosahi mamahunia hijana Barabbas mo lo toho na ima ūrilangi. ¹⁷ Ale la tamlohi tavera atu lara la pulutahi moiso, Pilate mo verea isara mara, “Ka opoia vara a teri hare, Barabbas teni Iesu sei la tovia Křisto?” ¹⁸ Mo vere haratu matan mo levosahia moiso vara la tau Iesu na limana mata nora mereimerei purongo.

¹⁹ Mo sopo haratu purongo, pani na rani mo pa lo sakele na nona jara sakele mata aria, narouna mo sohai na retisohai matea isana mara, “O sopo tikeli tamlohi vokevoke sei, matan ūromiku mo sopo sakele matan noku mamavuho hinia nahapani mo sasati.”

²⁰ Ale moli mata p̄ris peresi na vajiahara sei la aulu la haluhalu vao atu vara la usi Barabbas vara la pa komo Iesu. ²¹ Tamlohi tavera atu mo mele verea isara mara, “Sahara hinira mo rua ka opoia vara a juria nomim?”

Ale lara, “Barabbas!”

²² Pilate mo verea isara mara, “Vara sohena a pa vai na sava isan Iesu haratu la tovia Křisto?”

Enira mo isoiso lara, “Vosaea na talopeilopei!”

²³ Ale mo verea mara, “Mata sava? Mo vai na sava hina sati?”

Pani la mele ngara lara, “Ha vosaea na talopeilopei!”

²⁴ Ale na rani Pilate mo hitea vara i pa sopo eři jeu na ūromira, ale mara mo hitea vara tamlohi la tapulo lolokoru moiso pani mo hitea vara i pa sopo eři vaira la toho malum, mo lavi na wai, ale mo javulahi na

limana na nahon vao atu mo verea mara, "Enau na vokevoke na ūaen tamlohi nīke: enia nomim hinau." *Deut 21.6-9*

²⁵ Tamlohi tari hin vao atu la rāramia lara, "Raena i pa toho hin kamam peresi na natumam!"

²⁶ Moiso mo vai Barabbas mo materi usuri na ūomira, ale nona tamlohi vuro la rupi Iesu na asi maja, moiso la lavia vara la vosaea na talopeilopei.

Tamlohi Vuro La Vaivai Iesu (Mk 15.16-21; Jn 19.2-3)

²⁷ Moiso tamlohi vuro non tamlohi tavera atu la lavi Iesu mo sivo na jara tavera matea na lolo patu ima non tamlohi tavera atu, ale la tovi matavuhi na tamlohi vuro matuvana la mai la turu na nahona, ²⁸ ale la nařihi na nona ruru, la rua na ruru peravu matea majhina mo perpel, ²⁹ ale la viriviri na ūongo ūongo matea la vaia na kaulu la taua na patuna, ale la tau na mavuro matea na matua limana, ale la popovitohu na nahona la lo vaivaia lara, "Ha kilaua! Supe nona Jew." ³⁰ Moiso la litovia la lavi nařihi mavuro atu, ale la lo hamaji na patuna hinia.

La Vosaea Na Talopeilopei (Mk 15.22-32; Lk 23.27-43; Jn 19.17-27)

³¹ Ale lara la vaivaia mo isoiso, la nařihi pa ruru peravu atu la mele rua na nona ruru, ale la tiroma hinia vara la vano la vosaea na talopeilopei. ³² La pa lo malue na malele, ale tamlohi vuro la tapai na tamlohi matea Simon mara Cyrene. La ngurunguru hinia vara i lavi na talopeilopei non Iesu. ³³ Moiso na rani la kakau na jara matea hijana Golgotha, – ūaramin Golgotha enia Jara Sui Patu Tamlohi ³⁴ la sile Iesu na waen la hohoia peresi na hinau matea mo hohona vara i inua, pani mara mo inu mo rongoa mo ūohu vara i inua. *Psa 69.21*

³⁵ Ale lara la vosaea na talopeilopei moiso, la asehi na nona ruru isara na nora roro matea. *Psa 22.18*

³⁶ Moiso la sakele la lo kilaua la lo saovia hin jara atu. ³⁷ La vosae na retiaria matea aulu na patuna mo verea mara,

Haranike nahai enia Iesu Supe nona Jew

³⁸ Hin rani atu la vosae na tamlohi vili na tamlohi mata vavanaho mo rua tinapua

na talopeilopei peresia, matea na matuana ale matea na marauna. ³⁹ Ale la haratu la lo hahau roto jara atu la lo vaivaia, la lo pulapulahi na patura isana *Psa 22.7; 109.25* ⁴⁰ lara, "Engko sei vara o pa komo na Temple, ale a pa mele voroa na rani i tolu purongo, o hasem juriho! Vara engko Natun God, o sevuti hin talopeilopei sei!" *Mt 26.61; Jn 2.19*

⁴¹ Ale moli mata p̄ris peresi na tamlohi vujangi mata leu peresi na tamlohi aulu sohena la vaivaia lara, ⁴² "Mo lo juri na tamlohi tinapua: mo sopo eři juria hasena. Enia Supe non Israel, ūa hitea vara i sevuti nakerihi na talopeilopei, ale ūa pa eři rasua. ⁴³ Enia mo tau na nona rasu hin God, mo ūohu vara God i pa juria nakerihi vara na masalona, matan mo lo verea mara, 'Enau Natun God.' " *Psa 22.8* ⁴⁴ Ale la tamlohi mata vili na tamlohi mata vavanaho atu sohena la vaivaia hin malele atu.

Iesu Mo Mate (Mk 15.33-41; Lk 23.44-49; Jn 19.28-30)

⁴⁵ Ale na livuha rani ūro ūha tavera matea mo tavuni na jara tari mo tikeli na matan alo mo tolu na ravravi. ⁴⁶ mariviti na matan alo mo tolu na ravravi, Iesu mo ulo aulu na leo ūilangi matea mara, "Eli, Eli, lema sabatani?" Raramina, 'Noku God, noku God, mata sava ko rovo hiniau?' *Psa 22.1*

⁴⁷ Ale tamlohi hai la lo turu mariviti atu la rongoa lara, "Tamllohi nīke, mo lo tovi Elijah." ⁴⁸ Ale vahatea purongo, vonara matea mo maro vano mo lavi na tavalu ruru matea la ūurunia na waen hohona, ale mo sohaia na mavuro mo sahe isana vara i inua. *Psa 69.21*

⁴⁹ Pani tatuara lara, "O lo saovi tako, ūa pa hitea vara Elijah i pa sinai i juria teni i vono!"

⁵⁰ Ale Iesu mo mele ulo ūilangi na leo tavera matea, ale maromarona mo isoiso.

⁵¹ Ale vahatea purongo, ruru tavera atu na lolo Temple mo mařari mo rua mo tapulo aulu mo tikeli atano. Ale lepa mo hisu, ale datu la mavua. *Exo 26.31-33*

⁵² Ale taptap la roi moiso, ale tapuhi matuvana non God sei la mate moiso la mele turu, ⁵³ ale la malue na tapura hitahu na sauteterahi non Iesu, ale la unu

Jerusalem la pala isana tamlohi matuvana ea.

⁵⁴ Na rani captain mata tamlohi vuro peresi la haratu la lo kilau saovi Iesu, lara la hite na mihi, ale sava mo masese, la mařurahi tavera jea lara, "Varařuhu, tamlohi nike, enia Natun God!"

⁵⁵ Hin rani atu, hařai matuvana sei la tai Galilee la lo usuri Iesu la lo tuenia la lo turu asau la lo kilaua. ⁵⁶ Mary Magdalene peresi Mary tinan James enia Joseph, ale tinan la natun Zebedee, James enia John, la lo toho hin vao atu.

La Tau Iesu Na Tapuna (Mk 15.42-47; Lk 23.50-56; Jn 19.38-42)

⁵⁷ Mo lo ravravi tamlohi tavytav matea mo tai Arimathea mo mai hijana Joseph, enia sohena tamlohi usuri non Iesu matea. ⁵⁸ Enia mo vano mo hite Pilate mo usia vara i eři lavi na tarapen Iesu. Ale Pilate mo retileu vara la silea isana. ⁵⁹ Moiso Joseph mo lavi tarape atu, mo leputia na ruru lulu matea mo vokevoke, ⁶⁰ ale mo taua na tapuna paro sei mo taia na vatu. Mo kuresi horo na vatu tavera matea na mataruan tapu atu, ale mo mele vano. ⁶¹ Mary tinapua atu peresi Mary Magdalene la lo toho atu la lo sakele na tavalu taptap.

⁶² Mo mele rani sahe, hin rani atu mo usuri na rani mata Tatamahu mata Passover, moli mata přis peresi na Pharisee la pulutahi na nahon Pilate. ⁶³ Ale lara, "Tamlohi tavera, kama řomřomia vara tamlohi halu atu mo verea na rani mo pa lo mauri mara, 'Rani i tolu i vano moiso, a pa mele turu'. ⁶⁴ Matana, o retileu vara la turuhoro na tapuna i tikeli na hatolu rani, vara i vono, nona tamlohi usuri la pa vano la vanaho na tarapena, ale la pa verea isana tamlohi vara, 'Mo mele turu na nona mateia.' Ale halu atu hitahu i pa mele sati jea i jeu haratu tiroma."

⁶⁵ Pilate mo verea isara mara, "Kamim nomim tamlohi kilau hai, ha vano ha kilau mamahunia sohena ha eři vaia." ⁶⁶ Ale la vano la kaluti horo na vatu mataruan taptap atu, ale la tau na tamlohi kilau la lo kilaua.

¹ Sabbath mo isoiso, ale mariviti vara i rani na řalavuho na Sunday, ale Mary Magdalene peresi Mary tinapua atu matea la vano vara la hitea na tapuna. ² Vahatea purongo mihi tavera matea mo vili na jara, ale angelo non Moli God matea mo sevuti na tuka. Mo kuresi nařihi vatu atu, ale mo lo sakele aulu hinia. ³ Angelo atu mo memera sohena vaha, ale nona ruru mo lulu sohena katen. ⁴ Pa la tamlohi kilau atu la savaravara na matahu la jovi na lepa sohen la mate.

⁵ Angelo atu mo verea isan la hařai atu mara, "Ha sopo matahu! Na levosahia vara ka lo ale Iesu, haratu la vosaea na talopeilopei. ⁶ Enia mo sopo toho nike. God mo sauteterahia moiso, mo mele mauri, mo sohen haratu Iesu mo verea vara i pa sohena. Ha mai, ha hite na jara sei la tau na tarapena ea. ⁷ Ha vila, ha vere na nona tamlohi usuri vara mo turu na mateia mo mele mauri, ale ha levosahia vara enia mo lo vano tiroma Galilee hin kamim. Ha vano atu, ha pa hitea ea. Hinau nike natu, na sinai vara a verea isamim."

⁸ Pa la hařai la matahu, pani la avulahi tavera na rani la malue na tapuna, la maro vila vara la vano la verea isana nona tamlohi usuri. ⁹ Vahatea purongo Iesu mo tapaira mo sile na retiololo isara. La vano mariviti isana, la popovitoh la tauri na palona, la lotua. ¹⁰ Moiso Iesu mo verea mara, "Ha sopo matahu! Ha vere na noku tamlohi usuri vara la vano Galilee. La pa hiteau atu."

Retireti Nona Tamlohi Kilau

¹¹ Na rani la hařai atu la pa lo toho na malelera, ka levosahia, tamlohi vuro hai sei la lo kilau na tapuna, la vano la unu Jerusalem. La vere na hinau tari sei la masese isana moli mata přis. ¹² Ale matana, moli mata přis lara la pulutahi peresi na vajiahara sei la aulu, la hatihia vara la pa sile te mania tavera luhu isana tamlohi vuro. ¹³ La verea isana tamlohi vuro lara, "Ha verea isana tamlohi tari vara tamlohi usuri non Iesu la mai na vutepongi la vanaho na tarapena na rani ka lo juruvi. ¹⁴ Vara nomim tamlohi tavera i rongo hinau nike, kamam kama pa retireti isana. Romimim i sopo kaka hinia." ¹⁵ Ale pa la tamlohi vuro atu la lavi pa

mania atu la vaia sohen la verea isara. Ale Jew matuvana la pa lo vujangi na tatuara hin sorasorahina atu mo tikeli nake.

*Nona Tamlohi Usuri La Hitea
(Mk 16.14-18; Lk 24.36-49; Jn 20.19-23;
Acts 1.6-8)*

¹⁶ Ale la tamlohi usuri tupu sangavulu ūromana matea atu non Iesu, la sahe na vutivuti matea Galilee, jara atu natu, Iesu mo verea vara i pa tapaira ea. ¹⁷ Ale lara la hitea, la lotua. Pani tatuara la lo ūrom rua.

¹⁸ Iesu mo mai isara, ale mo verea mara, “God mo sileau na suiha tari vara a aulu na tuka peresi na varama. ¹⁹ Ha vano isana mara jara tinatinapua na varama, ale ha vujangira vara la mai noku tamlohi usuri. Ha paptijo hinira na hijan Tama, Natuna peresi na Tanume Tapu, ²⁰ moiso ha vujangira vara la taurilati na hinau tari sei na verea isamim moiso, ale ha lo levosahia, enau a pa toho peresi kamim tarea i tikeli na isoison pongi nike!”

Retīruhu Hin Iesu Křisto Mark Mo Ulia Puku Nike

Tamlohi hai la lo ūromōmia lara John Mark natu mo ulia, hara sei Paul mo lavia hitahu na nona tiroma hahau (Acts 12.25). Mo ulia na sava vavahinau Iesu mo lo vaira: Tiroma Iesu mo viřoni tamlohi mo vati vara la usuria (1.16–20), moiso mo pa tapulo vai na hina mařurahi, mo titiu nařihi na tanume sasati na tamlohi matea (1.21–28), mo tueni vepalihan Peter (1.30–31), vao tamlohi rojoa (1.32–34), peresi na tamlohi lepros matea (1.40–45), Iesu mo vai na hina tari nike na suispan God.

Haratu la lo tiroma na Jew la ūrohu hin Iesu mata nona retireti (2.2–3.6), ale la aleale malele vara la pa vilimateia hinia (11.18). Tanume sasati la hitevosahi na suispan, la levosahia vara enia Natun God tatahola, pani Iesu mo reti horora vara la sopo mele verea isana tamlohi hin rani atu.

Ra eři hitea vara ūromōmi tavera non Mark enia vara Iesu enia tamlohi matea mo lavi na rani ūilangi matan enia Jujuri atu sei God mo ūrulea mo sinai na varama, enia Natuna tatahola (8.31–33; 9.30–31; 10.33–34), Tamlohi atu Přovet Daniel mo lo verea tuai jea moiso (Dan 7.14).

Hinahinau Hin Puku Akerihi

1. Reti Hin John Tamlohi Paptijo (1.1–8)
2. Paptijo Non Iesu, Tiapolo Mo Vaihitea (1.9–13)
3. Iesu Hin Galilee (1.14–9.50)
4. Iesu Mo Sahe Jerusalem (10.1–52)
5. Isoiso Rani Non Iesu (11.1–15.47)
6. Iesu Mo Mele Mauri (16.1–8)
7. Iesu Mo Pala (16.9–20)

John Tamlohi Paptijo (Mt 3.1–12; Lk 3.1–18; Jn 1.19–28)

¹ Harihi enia tapulo Retīruhu hin Iesu Křisto, Natun God.

² Sohen přovet Isaiah mo ulia mara, ‘Eh! Ko hitea? Na lo ūrule na noku vahařule vara i tiroma hiniho,
i pa vai na malele la tatahola matam.’

Mal 3.1

³ ‘Na jara hasetoho leona mo lo ulo mara:
Ha vasahi na malelen Moli God!
Ha tano na malelena i tatahola.’

Isa 40.3

⁴ Ale John mo pala, mo lo paptijo na tamlohi na jara hasetoho matan Judea, mo lo retivujavujangi isana tamlohi vara la lavi na paptijo mata posa na hehe matan vara Moli i ūromira. ⁵ Ale tamlohi tari na lolon Judea peresi Jerusalem, la lo vano vara la hite John, ale enia mo lo paptijo hin la haratu la lo taviti na nora hehe na wai Jordan. ⁶ John mo ru na ruru la vaia na vulu camel, ale mo otioti na huri buluk; hana hinau enia hatpoha peresi na tau sugabag sei waina mo meji. *2 Ki 1.8*

⁷ Ale mo lo retivujavujangi mara, “Tamlohi matea i pa mai hitahu hiniau mo aulu mo jeuau, enau na sopo tatahola vara a rautoho a lavi nařihi na asi eve palona.

⁸ Enau na lo paptijo hin kamim na wai purongo, pani enia i pa paptijo hin kamim na Tanume Tapu.”

John Mo Paptijo Hin Iesu (Mt 3.13–17; Lk 3.21–22)

⁹ Hin rani atu Iesu mo tai Nazareth na jara Galilee, mo mai atu ale John mo paptijo hinia na wai Jordan. ¹⁰ Iesu mara mo malue na lolo wai, vahatea purongo tuka mo roi, ale John mo hite Tanume Tapu mo sinai atano sohena vomahé matea, ale mo tatau hin Iesu. ¹¹ Leon God na tuka mo reti mara, “Engko Natuku ūhuřuhu, enau na opoiho mo tavera jea, na avulahi tavera hiniho.”

Tiapolo Mo Vaihite Iesu (Mt 4.1–11; Lk 4.1–13)

¹² Vahatea purongo, Tanume Tapu mo tiroma hin Iesu vara i sahe na jara hasetoho. ¹³ Iesu mo lo toho atu mata rani mo ngavulu vati, Setan mo lo vaihitea. Iesu mo lo toho peresi na maji jala hin jara atu, ale angelo non God la lo matahia.

Iesu Mo Tapulo Vavahinau (Mt 4.12–17; Lk 4.14–15)

¹⁴ Mo sopo tuai, Supe Herod mo taurilati John, mo taua na ima ūilangi. Ale hitahuna, Iesu mo sivo Galilee, mo lo retivujavujangi na Retīruhu non God mara, ¹⁵ “Rani tatahola atu God mo lo viřonia mo mai moiso! Mauri atu God mo aulu hinia mo lo mai mariviti. Ha posa na nomim hehe, ale ha rasu Retīruhu nike!”

*Mo Tovi Na Nona Tamlohi Mo Vati
(Mt 4.18-22; Lk 5.1-11)*

¹⁶ Na rani matea, Iesu mo lo hahau usuri na pahisa tasin Galilee, mo hite Simon enia tasina Andrew, la lo pulahi na tara matea na tasi matan enira tamlohi aleale maji. ¹⁷ Ale mo verea isara mara, “Ha mai ha usuriau. Enau a pa vai kamim ha mai tamlohi aleale tamlohi.” ¹⁸ Vahatea purongo, la tinařihi na nora tara la usuria.

¹⁹ Iesu mo mele hahau mo vano makomona, mo hite James natun Zebedee, enia tasina John la lo sakele na lolo botira, la lo tulai na nora tara. ²⁰ Iesu mo tovira ale vahatea purongo la tinařihi tamara Zebedee na lolo botira peresi na nona volitusi ale la usuria.

*Tanume Sasati La Levosahi Iesu
(Lk 4.31-37)*

²¹ Iesu tolu la tupu vati atu la sahe Caper-naum, ale na Sabbath mo unu na ima lotu nona Jew, ale mo lo vujangira. ²² La haratu la lo tapurongo isana, la mařurahi tavera na nona vujangi, matan mo sopo vujangira sohena nora tamlohi vujangi mata leu matea pani sohena tamlohi matea nona vujangi mo sopo te retiusia matana.

²³ Hin rani atu tamlohi matea tanume lumiha sasati matea mo lo toho hinia mo lo toho atu hin ima lotu atu, ale mo ulo isan Iesu mara, ²⁴ “Iesu mara Nazareth, ko opoia vara o vai na sava isamam? Ko mai vara o komo kamam teni! Enau na levosahia vara engko hare, engko haratu mo tapu non God!”

²⁵ Pani Iesu mo savurahia mara, “Ha! O toho malum! O malue isana nakerihi!” ²⁶ Ale tanume lumiha sasati atu mo hisuhi řilangi na epen tamlohi atu moiso mo ulo aulu mo malue hinia.

²⁷ Tamlohi tari hin ima lotu atu la mařurahi, ale la lo usiusira hasera hinia lara, “Avei, sava nahai? Vujangi paro matea peresi na suiha vahatea mo pala! Ka hitea mo retileu isana tanume lumiha sasati, ale vahatea purongo la oloolo hinia.” ²⁸ Ale vahatea purongo retin la nona suiha atu mo řalihi na jara tari Galilee.

*Vepalihan Peter
(Mt 8.14-17; Lk 4.38-41)*

²⁹ Ale Iesu mo malue hin ima lotu atu, mo vano mo unu na iman Simon enia Andrew,

enia tolu James enia John. ³⁰ Ale vepalihan Simon mo lo juruvi na vatana matan mo sereia mo tavera, ale la verea isan Iesu. ³¹ Moiso Iesu mo mai mo tauri na limana mo sauva mo sakele, ale seserei atu mo rovo hinia, ale mo tapulo tatamahuni na hara hinau.

³² Na ravravin rani atu, tamlohi la lavi na tamlohi rojo tari peresi la haratu tanume sasati la lo toho hinira la mai isan Iesu. ³³ Tamlohi tari hin taon tavera atu la takon-ahi na mataruan ima atu. ³⁴ Ale Iesu mo vai tihai na rojoa nona tamlohi matuvana, ale mo titiu nařihi na tanume sasati matuvana. Mo sopo sile te masapa vara te tanume sasati i eři retireti matan enira la levosahia vara enia hare.

Iesu Mo Retivujavujangi Galilee

³⁵ Na řalavuho jea mo pa lo řořoha, Iesu mo turu mo vano hasena na jara hasetoho matea vara i usiusi ea. ³⁶ Ale Simon tolu la haratu la lo toho peresia la kilau alea, ³⁷ ale la tapaia la verea isana lara, “Eh! Tamlohi tari la lo aleho.”

³⁸ Pani Iesu mo řaramira mara, “Ra malue! Ra vano hin te vanua tinapua matan vara a eři retivujavujangi na Re-tiřuhu isara sohena, matan enau na tai na tuka na sinai na varama matan hinau atu natu.”

³⁹ Iesu mo unu role na jara tari Galilee, mo lo retivujavujangi na nora ima lotu, ale mo lo titiu nařihi na tanume sasati.

*Tamlohi Lepros Matea
(Mt 8.1-4; Lk 5.12-16)*

⁴⁰ Tamlohi lepros matea mo mai isan Iesu, mo papao hi isana mo usia řilangi mara, “Vara o opoia, o eři vaiau a mele vokevoke.”

⁴¹ Iesu mo řomopoia mo tavera, ale mo tau na limana hinia mara, “Na opoia. O mele vokevoke!” ⁴² Vahatea purongo, lepros atu mo tihai, ale mo mele vokevoke. ⁴³ Moiso Iesu mo reti řilangi isana, ale mo řulea vano mara, ⁴⁴ “O tapurongo! O sopo vere te hinau isan tea, pani o vano o hase vujangiho isana přis, ale o sile na nom otori sohen Moses mo retileu hinia matan vara la eři hitea vara ko mele vokevoke.”

Lev 14.1-32

⁴⁵ Pani mo turu mo vano mo lo sorahia, ale nona sorasora mo vano řalihi, ale mo vaia Iesu i sopo eři mele unu hin te taon

tamlahi la sopo levosahia, pani mo lo toho na jara hasetoho ale tamlohi la lo mai na jara tari vara la tapaia atu.

2

Iesu Mo Romi Na Hehe (Mt 9.1-8; Lk 5.17-26)

¹ Te rani la vano moiso Iesu mo mele vano Capernaum, ale mo sopo tuai tamlohi lo la verea lara mo mele mai na ima moiso. ² Vila ūahu purongo mo sopo mele te masapa na lolo ima teni na mataruana. Ale Iesu mo lo retivujavujangi na reti non God isara. ³ Ale, tamlohi tupu vati la ali na tamlohi papao matea mo mai. ⁴ Ale matan la sopo eři vano mariviti isana, la sahe aulu na pusa ima, la vai na marole matea mo sivo tatahola hinia, ale la tuhu pa tamlohi papao atu na epana mo sivo na nahon Iesu. ⁵ Iesu mara mo hite na rasua hin hinau atu la lo vaia, mo verea isan tamlohi papao atu mara, “Natuku, na ūomi na nom hehe.”

⁶ Pani tamlohi vujangi mata leu hai la lo sakele atu, la lo vereverea isara hasera lara, ⁷ “Mata sava tamlohi nike mo lo retireti sohen haratu? Mo lo vaia sohena enia God. God hasena i eři ūomi na hehe.”

⁸ Ale Iesu mara mo levensahia vara la lo usiusira hinia isara hasera ale, mo verea isara mara, “Mata sava ka lo ūomūomi na hinau sohena? ⁹ Sava hinau mo mele malum vara a verea isan tamlohi papao nike, ‘Na ūomi na nom hehe!’ teni a verea vara, ‘O turu! O viriviri na epam, o hahau!’ ¹⁰ Pani matan vara ha pa levensahia vara Natun Tamlohi mo lavi na suiha vara i ūomi na hehe nona tamlohi na varama, ha tapurongo na sava a pa verea!” Moiso Iesu mo verea isan tamlohi papao atu mara, ¹¹ “O turu, o lavi na epam, o mule!”

¹² Tamlohi papao atu mo turu vahatea, mo lavi na epana ale mo hahau mo malue na nahora, ale mo vaira enira mo isoiso la mařurahi ale la tahe na hijan God lara, “Hare mo pete hite te hinau sohen harihi moiso?”

Iesu Mo Tovi Matthew (Mt 9.9-13; Lk 5.27-32)

¹³ Iesu mo mele sivo na pahisa tasi, ale tamlohi tari la lo mai isana, ale mo lo vujangira. ¹⁴ Ale mara mo lo hahau atu mo hite Levi natun Alphaeus mo lo sakele na

jara mata lavi na takis, ale mo verea isana mara, “O usuriau!” Levi mo turu vahatea, mo usuria.

¹⁵ Hin vutepongi atu na iman Levi, Iesu mo lo hanhani peresi na tamlohi matuvana mata lavi na takis peresi na tamlohi hehe tolu na nona tamlohi usuri, matan tamlohi matuvana sohera la lo usuri Iesu.

¹⁶ Pani tamlohi vujangi mata leu peresi na Pharisee lara la hite Iesu mo lo hanhani peresi na tamlohi hehe tolu na tamlohi mata lavi na takis, la vere isana nona tamlohi usuri, lara, “Mata sava mo lo hanhani peresi na tamlohi mata lavi na takis tolu na tamlohi hehe?”

¹⁷ Ale Iesu mara mo rongoa mo verea isara mara, “La haratu epera la lo ūahu la sopo opoi na doctor, pani la haratu la rojo purongo. Na sopo mai vara a tovi na tamlohi tatahola pani la haratu la hehe.”

Tapuhoro Na Hanhani (Mt 9.14-17; Lk 5.33-39)

¹⁸ Hin rani atu, tamlohi usuri non John tamlohi paptijo peresi na Pharisee la tapuhoro na hanhani mata usiusi. Tamlohi hai la mai isan Iesu, la usia lara, “Mata sava tamlohi usuri non John peresi la haratu la lo usuri na Pharisee la lo tapuhoro na hanhani mata usiusi, pani nom tamlohi usuri la sopo tapuhoro na hanhani?”

¹⁹ Ale Iesu mo verea isara mara, “Ka ūomūomia vara la tamlohi atu sei la mai na lahi la pa tapuhoro na hanhani vara tamlohi lahi mo lo toho peresira? Vara tamlohi lahi mo lo toho peresira, la sopo eři tapuhoro na hanhani. ²⁰ Pani rani matea mo lo mai vara la pa lavi nārihi na tamlohi lahi isara. Hin rani atu natu, la pa tapuhoro na hanhani.”

Hina Tuai Peresi Na Hina Paro

Iesu mo mele verea mara, ²¹ “Te tamlohi i sopo eři lavi te tavalu ruru paro hatea i silivi na ruru tuai hinia. Vara i vaia sohena, tavalu ruru paro atu i pa vaia i mařari tavera i jeu haratu tiroma. ²² Te tamlohi i sopo eři titisi na waen paro i sivo na jara waen la vaia na huri nani tuai matan waen paro atu i pa sosohi i ūari jara waen atu, ale i pa komoa peresi waen atu matan i pa roro nārihi. Waen paro mo tatahola na jara waen la vaia na huri nani paro purongo.”

Moli Mata Sabbath (Mt 12.1-8; Lk 6.1-5)

²³ Na Sabbath matea, Iesu mo lo hahau role na isa wit matea tolu na nona tamlohi usuri, ale la lo tapulo vesi roto na pere wit.
²⁴ Ale Pharisee la vereea isan Iesu lara, “Eh! Mata sava la lo vai na hinau matea mo sopo tataholo vara la vaia na Sabbath?”

²⁵ Ale Iesu mo vereea isara mara, “Avei, korong ka sopo lo evi na sava supe David tolu na nona tamlohi la vaia hin rani atu la vejuveju ale la marohati, ²⁶ ale sohena sava mo unu na Iman God na rani non Abiathar enia mo lo pris aulu, moiso mo lavi pereti atu sei mo tapu pris hasera la efi hania. David mo hania, ale mo silea isan la haratu la lo toho peresia?” *Lev 24.9*

²⁷ Ale mo vereea isara mara, “God mo tau na Sabbath vara i tueni na tamlohi, mo sopo taua vara tamlohi la lo toho mata Sabbath. ²⁸ Matan haratu, Natun Tamlohi enia mo Moli mata Sabbath.”

3

Tamlohi Lima Kuti Matea (Mt 12.9-14; Lk 6.6-11)

¹ Na Sabbath tinapua matea, Iesu mo mele unu na ima lotu nona Jew matea, ale tamlohi lima kuti matea mo lo toho atu. ² Ale meresahi non Iesu la lo kilau Iesu vara i pa vai mamahuni tamlohi atu na Sabbath teni, matan vara la pa tuvaia matana. ³ Iesu mo vereea isan tamlohi lima kuti atu mara, “O mai nikel!” ⁴ Ale mo vereea isara mara, “Na Sabbath, mo tataholo vara ra tueni na tamlohi teni vara ra komo tea? Mo tataholo vara ra juri te mauri teni ra vilia?” Pani la rho hu vara la raramia. ⁵ Iesu mo kilau ralihira na lolokoru, matan mapura mo rilangi, ale mo vereea isan tamlohi lima kuti atu mara, “O rirahi na limam.” Tamlohi atu mo vaia sohena ale limana atu mo mele ruhu. ⁶ Pa la Pharisee atu la malue vahatea, la vano la tovi takonahi na tamlohi la lo usuri supe Herod, ale la aleale malele matan vara la pa vilimatei Iesu hinia.

Tamlohi Matuvana La Usuria

⁷ Iesu tolu na nona tamlohi usuri la malue, la sivo na tasin Galilee, ale vao tavera matea mo usuria. La tai Galilee, Judea, ⁸ Jerusalem, Idumaea, hai la tai na tavalu wai Jordan, ale na jara ralih Tyre

enia Sidon. Vao tavera atu lara la rongo la hinau atu Iesu mo lo vaira, la mai isana.

⁹ Ale hin jara atu Iesu mo vere na nona tamlohi usuri vara la tau mamahuni te boti hatea matana matan vao tavera atu, vara i vono la pa tohoia, ¹⁰ matan Iesu mo vai tihai na rojoa nona tamlohi matuvana moiso, mo vai la haratu la rojo la lo vartohoi ralihia vara la tikelia. ¹¹ Ale tanume lumihā sasati na tamlohi lara la hitea, la jovi sivo na nahona la ngara lara, “Engko Natun God!” ¹² Pani Iesu mo reti rilangi isara vara la sopo vereulia vara enia hare.

Mo Vīroni Na Nona Tamlohi Usuri (Mt 10.1-4; Lk 6.12-16)

¹³ Moiso, Iesu mo sahe aulu na vutivuti matea, ale mo tovi la haratu mo opoira, ale la mai isana. ¹⁴ Ale mo vīroni na tupu sangavulu ūromana mo rua sei mo tovira vara la vaharule, matan vara i pa ūrulerla vano isana tamlohi mata retivujavujangira, ¹⁵ ale mo silera na suiha mata titiu na ūrihi na tanume sasati. ¹⁶ Mo vīroni la tupu sangavulu ūromana mo rua atu sohen harihi:

Simon sei Iesu mo tau na hijana vara Peter.

¹⁷ James enia John natun Zebedee, Iesu mo silera na hija vara Boanerges' ūramina, ‘Natu Piri’ matan jingora mo lo tupali tarea.

¹⁸ Andrew,
Philip,
Bartholomew,
Matthew,
Thomas,
James natun Alphaeus,
Thaddeus,
Simon mara Cana enia tamlohi matea mata valum mata jarana,
¹⁹ ale Judas Iscariot, haratu mo lo turuposi hinia.

Suiha Non Iesu (Mt 12.22-32; Lk 11.14-23; 12.10)

²⁰ Moiso Iesu mo mele vano hin ima atu mo lo toho hinia. Mo sopo tuai vao tavera la mele mai la takonahi, ale la vaia mo sopo te masapa vara la efi hanhani. ²¹ Tavtavuin Iesu lara la rongoa, la vano vara la taurilatia matan la lo vereea lara, “Hara sei, ūromina mo tihai sei!”

²² Ale tamlohi vujangi mata leu sei la tai Jerusalem la lo verea lara, “Tamlohi sei, supe nona tanume sasati sei Beelzebul mo sohonia, ale mo lo titiu nařihi na tanume sasati na suihana!”

²³ Pani Iesu mo tovira mai isana ale mo verea mara, “Mo sohena sava natu Setan i eři mele levuti nařihi Setan? ²⁴ Jara tari sei supe la lo aseasehira hinira hasera la pa maroi, ale i pa sopo te taon tavera teni te vao ima vara i lo aseasehia hasena i pa eři turu. ²⁵ Vara vao ima matea i lo levuti na vaona, tamlohi hinia la pa eři toho ūruh sohena sava? ²⁶ Ale Setan peresi na vaona vara la lo levlevutira hasera purongo, suihana Setan i pa turu sohena sava matan suihana i pa isoiso. ²⁷ Ka hitea? Vara tamlohi matea mo opoia vara i unu na ima tamlohi suiha matea mata i vanaho te nona hinahinau, i pa lavi te asi hatea i pesi tamlohi suiha atu tako, moiso i pa lavi na nona hinahinau.

²⁸ Varařuhu, na verea isamim vara hehe tari tamlohi la lo vaira teni na nora retisasti hin God, God i pa ūromira. ²⁹ Pani hare mo lo vere lejileji Tanume Tapu, enia, God i pa sopo eři ūromia hin te rani.” ³⁰ Iesu mo lo verera hin la hinau sei matan la lo verea vara tanume sasati lumiha matea mo lo toho hinia.

Vaon Iesu La Alea (Mt 12.46-50; Lk 8.19-21)

³¹ Tinan Iesu peresi na voraina la pala hin ima atu, la lo turu na jingoima ale la sohai na reti sivo isan Iesu vara i mai i hitera. ³² Vao matea mo lo sakele ūralihi Iesu ale la verea isan Iesu lara, “Eh! Tinam peresi na voraim peresi na vevoraim la lo toho na jingoima la lo aleho!”

³³ Pani Iesu mo ūramira mara, “Tinaku enia hare? Voraiku enira hare?” ³⁴ Mo kilau ūralihi la haratu la lo sakele ūralihi mara, “Ka hitea? Tinaku peresi na voraiku enira nahai! ³⁵ Sava tamlohi mo lo vai na masalon God, enia voraiku teni vetasiku teni tinaku.”

4

Tamlohi Isa Matea (Mt 13.1-9; Lk 8.4-8)

¹ Na rani tinapua matea, Iesu mo lo vujangi na tamlohi na pahisa tasin Galilee. Hin rani atu vao tamlohi la lo mai la lo turu

porotia. Ale matana, mo vele na boti matea mo lo sale hin tasi atu, ale mo sakele hinia. Vao tavera atu la lo toho na jarauta na pahisa tasi. ² Iesu mo lo vujangira na titileu matuvana, ale mo lo vujangira mara,

³ “Ha tapurong! Tamlohi hapořahi matea mo malue mo vano vara i hapořahi na pulana piri wit. ⁴ Mo lo hapořahira, pani hai la jovi na malele tavera, maji avuavu la mai la hani veyuhira. ⁵ Hai la jovi na vatuvatu, uluara la vila, matan tano mo sopo tavera. ⁶ Pani alo mara mo vele, la wit atu la nunu la mate mata warira la sopo sivo atano jea. ⁷ Hai la jovi na urata, pani urata atu mo rovira mo punira ale la sopo vua. ⁸ Pani hai la jovi na tano ūruh, hin tano ūruh atu la ulua. La ulua la vai na vuara, hai namara mo ngavulu tolu ⁽³⁰⁾, hai mo ngavulu limarave ⁽⁶⁰⁾, hai mo ngavulu sangavulu ^{(100)!}” ⁹ Iesu mo mele verea mara, “Haratu mo eři rongovosahia, o tapurong!”

Mata Sava Mo Vere Na Titileu (Mt 13.10-17; Lk 8.9-10)

¹⁰ Hitahuna, mara mo lo toho enia hasena, tamlohi hai peresi la nona tamlohi usuri tupu sangavulu ūromana mo rua atu la usia hin la titileu atu.

¹¹ Ale Iesu mo verea isara mara, “God mo majinga hin kamim vara ha levosahi na ūramin mauri atu God mo aulu hinia, pani na lo vere la hinau nike na titileu vara a jarohira isana vinano, ¹² matan vara Retiulia i masese sei mara,
‘La pa hite na sava na lo vaia,
pani la pa sopo eři hitevosahia.

La pa rongo na noku reti,
pani la pa sopo eři rongovosahia.

Matan, vara i vono,
la pa posí mai isaku ale a pa ūromira na nora hehe.’” ¹³ Isa 6.9-10

Raramin Titileu Atu (Mt 13.18-23; Lk 8.11-15)

¹³ Iesu mo verea isara mara, “Ka sopo rongovosahi titileu akerihi? Vara mo vono, sohena sava natu ha pa eři levosahi vevuhi na titileu tinapua? ¹⁴ Tamlohi hapořahi na piri mo hapořahi na reti non God. ¹⁵ Ale la haratu la jovi na malele tavera, hin rani atu tamlohi la rongora, Setan mo mai vahatea purongo ale mo lavi nařihi la reti atu sei la

lo toho na mapura. ¹⁶ La haratu la lo jovi na vatuvatu, enira la haratu sei lara la rongo na reti non God, la lavia vahatea purongo na avulahi. ¹⁷ Pani mo sopo te warira ale reti non God mo lo toho mata makomo rani purongo. Ale vara rani ūilangi la mai teni tamlohi la turuleji hinira mata reti non God, la jovi na ūihii vahatea purongo. ¹⁸ Ale la haratu la lo jovi na urata, enira la haratu sei la lo rongo na reti non God, ¹⁹ pani ūomkaka mata varama peresi na tautav haluhalu ale masalora mata hinau tinatinapu mo unu hinira mo puni pa reti atu la lo lavia, ale mo sopo eři vua. ²⁰ Ale la haratu la lo jovi na tano ūihu, enira la haratu sei la lo rongo na reti non God, ale la lavia na maurira ale la avulahi hinia. Mo vua mo tikeli mo ngavulu tolū (³⁰), hai mo ngavulu limarave (⁶⁰), ale hai la tikeli mo ngavulu sangavulu (100)."

Titileu Mata Hinau Sei La Luhu (Lk 8.16-18)

²¹ Iesu mo mele verea isara mara, "Ka ūrom vara mo tataholo vara tea mo hasahi te lamu ale i taua na ruhuruhun te tanga teni te vata pani mo sopo na jara sakele mata lamu?

²² Hinau tari la lo luhu, la pa pala na jara tavera. Ale mo sopo te hinau luhu hatea vara i pa sopo pala na jara tavera. ²³ Vara tea te perona, i lo rongo na noku reti!"

Ha Tapurongo Mamahu

²⁴ Iesu mo mele verea isara mara, "Ha tapurongo na noku retireti i ūihu matan vara nomim lelevosahi i pa ulua i tavera.

²⁵ Haratu mo lo vaihitea vara i levosahi na noku reti, enia i pa eři mele levosahia i tavera i mařivi jea. Pani haratu mo sopo tapurongo i ūihu, sava mo lo toho isana moiso la pa lavi nařihia isana."

Titileu Mata Piri

²⁶ Iesu mo mele verea mara, "Mauri atu God mo aulu hinia mo sohena piri vipahai tamlohi mo hapořahira na lepa. ²⁷ Vara mo hapořahira moiso, i pa sopo eři mele vai te hinau hinira. Tamlohi atu mo lo juruvi ale mo lo mele kilau na rani hatehateahi, ale piri atu mo tupali ale mo ulua pani tamlohi atu mo sopo levosahia vara mo pa sohena

sohena sava. ²⁸ Lepa atu hasena mo vai la piri atu la ulua. Tiroma la juliha, ale lahora la peravu, ale mo sopo tuai la vira, la vua. ²⁹ Pani vara vuana la mena, tamlohi atu i pa vura na sita matan nora asitauni natu."

Titileu Mata Piri Paka (Mt 13.31-32; Lk 13.18-19)

³⁰ Iesu mo mele verea mara, "A pa tovongi na sava hin mauri atu God mo aulu hinia, teni sava titileu natu i pa tataholo vara a vereulia hinia? ³¹ Mo sohena piri paka matea vara la lavoa na lepa, mo ri-hirihi mo jeu na piri pahai tari. ³² Pani vara mo ulua mo tavera mo jeu na vipahai tinatinapua tari, ale mo sohai na rangarangana tavera matan vara maji avuavu la eři vai na taura na malumaluna."*

Mo Vujangira Na Titileu Mata Sava (Mt 13.34-35)

³³ Iesu mo lo vujangi na nona reti na titileu matuvana sohen harihi, matan vara la pa rongovosahira usuri na nora lelevosahi. ³⁴ Iesu mo lo vujangi na vao tamlohi na titileu purongo, pani hitahu vara mo lo toho hasena peresi na nona tamlohi usuri, mo pa lo vereuli na ūaramira isara.

Iesu Mo Horo Na Langi Tavera (Mt 8.23-27; Lk 8.22-25)

³⁵ Iesu mo lo toho hin boti atu, ale alo mara mo pa lo sivo vara i tihai, mo verea isara mara, "Ra sua roto tasi nike, ūa vano na tavaluna." ³⁶ La tinařihi vao atu ale la vano, pani mo sopo enira hasera purongo, boti tinapua hai sohena la lo usurira. ³⁷ Mo sopo tuai langi tavera matea mo sere, mo vai na suhusuhu la lo kamekame sivo na lolo boti, ale tungu mo lo mařivi.

³⁸ Pani Iesu mo lo juruvi na elunga matea na pulo boti. Ale nona tamlohi la ūohaia lara, "Tija! Ko sopo levosahia vara ūa pa pute!"

³⁹ Iesu mo kilau ale mo reti ūilangi isan langi atu, ale mo verea isan tasi atu mara, "Ha isoiso! Ha toho malum!" Vahatea purongo langi atu mo moti, ale tasi tavera atu mo tamata mo tamata. ⁴⁰ Iesu mo

* ^{4:32:} piri paka: Iesu mo vere na piri mustard, enia piri matea mo varihi jea.

vereia isara mara, "Ka matahu tavera sohena mata sava? Mo sopo lo te nomim rasua teni?"

⁴¹ Ale matahu tavera mo sohonira ale la lo vereia isara hasera lara, "Avei, sava tamlohi nahai? Mo reti purongo ale langi peresi na tasi la ooloolo hinia!"

5

Mara Gerasenes Matea (Mt 8.28-34; Lk 8.26-39)

¹ Iesu peresi na nona tamlohi la hoso na jara Gerasenes. ² Lara la hoso na jarauta hin jara atu, tamlohi matea tanume lumiha sasati matuvana la lo toho hinia mo malue na taptap, mo sinai mo tapaia. ³ Tamlohi nike mo lo toho na taptap, ale tea i sopo eři pesia hin te asi teni te jen. ⁴ Hina purongo vara la pesi na limana peresi na palona na jen teni te aen, mo rotorotora mo kamekamera. Tea i sopo eři vaia i toho malum. ⁵ Na rani peresi na vutepongi hatehateahi, mo lo ulo ūalihi na taptap peresi na vutivuti atu, ale mo lo tangi mo lo hasena tai na epena na vatu.

⁶ Ale mara mo hite Iesu mo pa lo toho assau, mo maro vano isana mo jovi papaohi na nahona. ⁷ Ale mo tangi na leo tavera matea mara, "Iesu Natun God Aulu Jea, engko te nom sava isaku? Na usiho na hijan God vara o sopo vailejilejiau!" ⁸ Mo pa vereia sohena matan Iesu mo lo vereia isana mara, "Tanume lumiha sasati, o malue isan tamlohi nike nakerihi!"

⁹ Iesu mo usia mara, "Eh, engko hijam hare?"

Tanume sasati atu mo ūaramia mara, "Hijaku enia Legion, matan kamam kama vao tavera jea!" ¹⁰ Tanume sasati atu mo usia ūilangi isan Iesu vara i sopo levuti nārihira na jara Gerasenes.

¹¹ Ale vao tavera mata poi matea la lo susua na pahisan vuti atu. ¹² Ale tanume sasati atu la usia ūilangi isan Iesu lara, "O ūule kamam kama vano isana poi, o tinařihi kamam kama unu hinira." ¹³ Ale Iesu mo tinařihi. La tanume lumiha sasati atu la malue isan pa tamlohi atu, la vano la unu isan la poi atu, evira korong mo tikeli tari vaha rua ⁽²⁰⁰⁰⁾. Ale vao poi atu la solesole usuri pesapesa

atu la jovi sivo na tasi ale la pute enira mo isoiso.

¹⁴ Tavuin la poi atu la rovo la sahe la vereia na lolon taon tavera atu peresi na jara ūalihi ea. Ale tamlohi la maro la mai vara la hitea vara sava natu mo maseise atu. ¹⁵ Ale la mai isan Iesu, pani lara la hite pa tamlohi atu sei tanume sasati la lo sohonia mo lo sakele ea ale mo ru na ruru, ale ūomina mo mele ūahu moiso, matahu mo sohonira. ¹⁶ Ale la haratu sei la lo hite na sava mo maseise la sorahi na sava mo maseise isan tamlohi atu sei tanume sasati la lo toho hinia peresi la poi atu. ¹⁷ Ale la tapulo usia ūilangi isan Iesu vara i malue na jarara.

¹⁸ Iesu mo pa lo vele na boti, pa tamlohi atu sei tanume sasati la lo sohonia mo usia ūilangi isan Iesu vara i pa usuria. ¹⁹ Pani Iesu mo sopo tinařihi pani mo vereia isana mara, "O mule, o vano isana tapalam ale o vereia na sava Moli God mo vaia matam, ale sohena sava mo ūomopoiho mo tavera jea." ²⁰ Ale pa tamlohi atu mo mele hilu ale mo tapulo vereuli na sava Iesu mo vaia matana hin la taon atu mo sangavulu sei la tovia Decapolis. Ale tamlohi tari la marurahi tavera hinia.

Venatun Jairus (Mt 9.18-26; Lk 8.40-56)

²¹ Ale Iesu mara mo mele hilu mo hoso na tavalun tasi atu, vao tamlohi tavera jea matea la mai la turu ūalihi na pahisa tasi.

²² Tamlohi tavera matea na ima lotu nona tavitavuin Israel hin jara atu hijana Jairus, mo mai mara mo hite Iesu mo papaohi sivo na palona. ²³ Jairus mo usia ūilangi isana mara, "Venatuku rihihi, i sopo tuai i pa mate. O mai o tau na limam hinia matan vara i mele ūahu ale i mauri."

²⁴ Ale Iesu mo usuria. Ale vao tavera matea la lo usuria la lo tiatia hinira. ²⁵ Ale ūai matea mo lo toho hin vao atu. Ale mo rojo na rojoa nona ūai mata tauni mo sangavulu ūomana mo rua moiso. ²⁶ Mo jalahi na mania tavera isana doctor matuvana moiso, ale la doctor atu la sopo eři tuenia, la sopo vaia i ūahu pani mo mele sati jea. ²⁷ Mo rongo na tamlohi la lo sorahi Iesu ale mo mai na ūarin Iesu hin vao atu mo tikeli na pingopinga nona ruru. ²⁸ Matan ūomina mara, "Vara a eři tikeli

purongoi na nona ruru, noku rojoa i pa tihai!”²⁹ Ale vahatea purongo ūae atu sei mo lo maro mo mamasa, ale mo rongovosahia na epena vara nona rojoa mo tihai.

³⁰ Ale Iesu sohena mo rongovosahia vara suiha mo malue hinia, ale mo posī vahatea isan vao atu ale mara, “Hare mo tikeli na noku ruru?”

³¹ Nona tamlohi usuri la verea lara, “Ko pa usia vara hare mo tikelihi sohena sava, ko sopo hitea vara vao nike la lo tiatia isam?”

³² Ale Iesu mo kilau ūalihira vara i vileia vara hare natu, mo tikelia. ³³ Pani hařai atu sei mo levosahi na sava mo lo masese isana mo mai isan Iesu na matahu, mo popovitoho na palona ale mo verea na hinau tari. ³⁴ Iesu mo verea isana mara, “Venatuku, nom rasua mo vaiho ko mele ūahu. O vano na tamata ale nom rojoa i pa tihai jejeu.”

³⁵ Iesu mo pa lo retireti isana hařai atu, tamlohi hai la tai na iman Jairus la mai la verea isan Jairus lara, “Venatum mo mate moiso, o sopo mele usi tamlohi vujangi vara i mai.”

³⁶ Pani Iesu mara mo rongo na sava la lo verea mo verea isan Jairus mara, “O sopo matahu! O rasuau!” ³⁷ Ale Iesu mo sopo tinařihia vara tea i usuria pani Peter enia James peresi John tasin James. ³⁸ La vano la pala na iman tamlohi tavera mata ima lotu nona Jew atu, ale Iesu mo hite na tamlohi la lo tangtangi, la lo tangi aulu, la lo vai na vavaore tavera. ³⁹ Ale Iesu mara mo unu mo verea isara mara, “Mata sava ka lo vai na vavaore tavera, ale ka lo tangtangi? Hařarihi nike mo sopo mate, mo juruvi ūomalihi purongo.”

⁴⁰ Ale tamlohi la manaluluhi Iesu, pani mo ūlera enira mo isoiso la malue. Ale mo lavi taman hařarihi atu peresi tinana peresi na nona tamlohi usuri la unu sivo na jara hařarihi atu mo lo toho ea. ⁴¹ Iesu mo tauri na liman hařarihi atu mo verea mara, “Talitha kumi!” Ale ūaramin reti nike enia ‘Venatuku, o turu!’ ⁴² Ale vahatea purongo hařarihi atu sei taunina mo sangavulu ūomana mo rua mo mele turu ale mo tapulo hahau. Ale mařurahi tavera mo sohoni tamana peresi tinana peresi na nona tamlohi usuri. ⁴³ Iesu mo verea isara

mo isoiso vara la sopo mele sorahia isan tea, ale mo verea isara vara la silea hin te hinau i hania.

6

Mara Nazareth La Rohu Hin Iesu (Mt 13.53-58; Lk 4.16-30)

¹ Ale Iesu peresi na nona tamlohi usuri la malue hin jara atu la mai na nona taon, Nazareth. ² Na Sabbath matea Iesu mo tapulo vujangi na ima lotu ea, ale vao tamlohi la rongo na nona vujangi la mařurahi tavera lara, “Tamlohi nike mo pa lavi la hinau nike epu? Ale nona lelevosahi mo pa tai epu? La hinau mařurahi nike la pa pala na limana sohena sava? ³ Mo sopo pa tamlohi voro ima nahai teni, natun Mary ale vorain James, Joses, Judas peresi Simon? Mo sopo vetasina nahai la lo toho peresiřa?” La ūongo mo sati matan mo lo vai la hinau sei.

⁴ Pani Iesu mo verea isara mara, “Tamlohi jara tinapua la pa sile na oolo olo isana p̄rovet matea, pani i pa sopo eři lavi te oolo olo na jarana tatahola teni na naho tahisana teni na naho voraina.”

⁵ Iesu mo sopo vai te matamata tavera isana tahisana, pani mo tau na limana na tamlohi rojoa tupu visalete purongo, ale nora rojoa la tihai. ⁶ Iesu mo mařurahi matan la sopo rasua.

Tamlohi Usuri La Malue (Mt 10.5-15; Lk 9.1-6)

Moiso mo vano na jara tinatinapua mo lo vujangi na tamlohi ea. ⁷ Mo tovi la tamlohi atu tupu sangavulu ūomana mo rua la mai isana, ale mo ūlera la vano mo ruarua, ale mo silera na suiha vara la titiu nařihi na tanume lumiha sasati na tamlohi. ⁸ Iesu mo verea isara vara la sopo lavi te hinau na nora hahau sohena hanhani teni te tanga, teni te mania, pani tihonira purongo. ⁹ La pa ru na sabat pani la pa sopo mele lavi te harua rurura tinapua. ¹⁰ Iesu mo verea isara mara, “Sava ima ka lo toho hinia hin te vanua, ha lo toho atu i tikeli rani atu ka mele malue hin vanua atu. ¹¹ Pani vara te vanua la ūohu hin kamim teni la sopo tapurongo isamim, ha sařsarhi nařihi na tangotango palomim hin jara atu vara i vujangia vara God i pa arira.”

¹² Ale la malue la vano la retivujavujangni tamlohi vara la posa na hehe. ¹³ La titiu nañihi na tanume sasati matuvana, ale la tau na wel na patu tamlohi rojoa matuvana ale nora rojoa la tihai.

*John Tamlohi Paptijo Mo Mate
(Mt 14.1-12; Lk 9.7-9)*

¹⁴ Hin rani atu, supe Herod Antipas mo rongo na sorasora hin Iesu, matan tamlohi tari la lo sorahia. Hai la verea lara, "John tamlohi paptijo mo mele turu na mateia. Hinau atu natu mo vaia mo suiha vara i eñi vai la matamata sei." ¹⁵ Pani hai la verea lara Iesu enia Elijah, ale hai la verea lara enia pñovet matea matan tuai. ¹⁶ Pani Herod mara mo rongoa mo verea mara, "John tamlohi paptijo! Pani enau natu na tai nañihi na patuna, vararuhi mo mele turu na mateia!"

¹⁷ Matan Herod natu sei mo řule na tamlohi vuro vara la taurilati John, ale la pesia na ima řilangi vara i vai Herodias, naroun tasina Philip i avulahi matan Herod mo lavia sohena narouna. ¹⁸ Matan John mo lo verea isan Herod mara, "Usuri na leu mo sopo tatahola vara o lavi naroun tasim sohena naroum."

¹⁹ Ale Herodias mo lo vahitea vara i vilimatei John, pani i sopo eñi vaia hasena. ²⁰ Matan Herod mo matahuni John matan mo levosahia vara John enia tamlohi tatahola matea mo tapu ale Herod mo lo matahia. Hina purongo vara John mo lo vaia mo lo řomkaka tavera, enia mo opoa vara i lo tapurongo na retireti non John.

²¹ Pani Herodias mo hite na masapa matea na hanhani tavera mata pongi vora non Herod. Herod mo usi na nona tamlohi aulu peresi na nona tamlohi tatavera mata vuro ale la haratu la lo aulu Galilee la mai hinia. ²² Matan venatuna sei hijana Herodias mo unu mo velu ale mo vai Herod peresi la haratu la lo toho atu la avulahi tavera. Ale Herod mo verea isan venatuna mara, "O usiau hin te hinau ko opoa, ale a pa silea isam." ²³ Ale Herod mo retitauhi mara, "A pa sileho na sava hinau ko usia, hina purongo vara i tikeli na sope jara na lo aulu hinira."

²⁴ Moiso mo malue mo vano isan tinana mo usia mara, "Nana, a pa usi na sava isana?"

Ale tinana mara, "Na opoi na patun John tamlohi paptijo!"

²⁵ Ale vahatea purongo mo mele unu mo verea isan Herod mara, "Na opoia vara o sileau nakerihi na patun John tamlohi paptijo hin te peleti hatea!"

²⁶ Herod mo rongo mo sati tavera matana. Pani mo mahanuhanu vara i tope na nona retitauhi sei mo vaia na nahon la haratu la lo toho atu. ²⁷ Ale vahatea purongo mo řule na nona tamlohi mata vilimatei na tamlohi matea vara i tai roto na patun John. Tamlohi atu mo vano na ima řilangi ale mo tai roto na patuna, ²⁸ moiso, mo lavi na patuna na peleti matea mo silea isan hañai atu. Ale hañai atu mo lavia mo silea isan tinana. ²⁹ Tamlohi usuri non John lara la rongoa, la mai la lavi na tarapena, ale la taua na papa vatu matea.

*Vao Tavera La Lo Usuri Iesu
(Mt 14.13-21; Lk 9.10-17; Jn 6.1-14)*

³⁰ Pa la tamlohi usuri atu Iesu mo lo řulera la mele mai ale la vere vevuhi na sava la lo vaira ale la lo vujangira. ³¹ Ale Iesu mo verea isara mara, "Ra malue hin vao nike řa vano hin te jara hasetoho řa mapu makomona tako." Matan tamlohi mo mañivi la lo mai ale la lo vano ale mo sopo te masapa vara la eñi hanhani.

³² Ale la vele na boti matea la vano na jara hasetoho matea enira hasera. ³³ Pani vao tavera mata taon matuvana la hitera la lo vano, ale la maro usurira na jarauta, ale la kakau tiroma hin jara atu la pa hoso ea. ³⁴ Iesu mara mo hoso mo hite na vao tavera matea, ale mo řomopoiria matan la sohena sipsip mo sopo te tavuira. Ale mo tapulo vujangira na hinau matuvana.

³⁵ Alo mo sivo moiso, ale nona tamlohi usuri la mai isana lara, "Moli jara hasetoho nahai, ale nake mo pongi moiso. ³⁶ O řulera la vano řalihi jara nike ale na vanua vara la voli te hara hinau."

³⁷ Pani Iesu mo řaramira mara, "Kamim purongo ha vahanira!"

Pani lara, "Voli tamlohi mata rani ngavulu sangavulu rua mo sopo lo navu mata i voli te pereti vara i vahani vao tamlohi nike."

³⁸ Iesu mo usira mara, "Ha vano ha hitea vara ka lo lavi na hanhani mo visa."

La mele mai lara, "Pereti mo lima peresi na maji mo rua." ³⁹ Moiso Iesu mo retileu

vara la sakele na vao na talu ūruvu. ⁴⁰ Ale la sakele na vao mo tikeli mo ngavulu lima (50) teni mo ngavulu sangavulu (100).

⁴¹ 'Moiso, Iesu mo lavi pa pereti atu mo lima peresi pa la maji atu mo rua mo tařa sahe na tuka mo vere meje isan God matara moiso mo topera mo silera isana nona tamlohi usuri vara la asera isana vao tamlohi hatehateahi atu. ⁴² Enira mo isoiso la hanhani ale la masu mo ūruvu. ⁴³ La sohoni na tanga mo sangavulu ūromana mo rua na mesin la pereti atu mo lima peresi la maji atu mo rua. ⁴⁴ Evi tamlohi purongo sei la lo hani pereti atu mo tikeli mo tari vaha lima (5000).

*Mo Hahau Na Pusa Tasi
(Mt 14.22-33; Jn 6.15-21)*

⁴⁵ Vahatea purongo atu Iesu mo vere na nona tamlohi usuri vara la vele na boti la vano tiroma na tavalu tasi na vanuan Bethsaida, ale Iesu mo lo ūrule la vao atu vara la mule. ⁴⁶ Moiso, enia mo malue isara mo sahe aulu na vuti vara i usiusi.

⁴⁷ Pongi mo mai ale pa boti mo lo toho na livuha tasi moiso, ale Iesu hasena mo lo toho na jarauta. ⁴⁸ Ale mo hitera la lo vaihitea ūrlangi vara la suahia boti atu matan la lo songahi na langi. Na toa tarere mo hahau na pusa tasi mo mai isara. Mo vano sohena vara i jeura, ⁴⁹ pani lara la hitea mo lo hahau na pusa tasi, la ūromi vara nunua matea, ale la uloulo ⁵⁰ matan enira mo isoiso la hitea ale la matahu tavera. Pani vahatea purongo Iesu mo retireti isara mara, "Ha sopo matahu, enau sei!" ⁵¹ Ale mo vele sivo na lolo boti peresira, ale vahatea purongo langi atu mo moti. Ale la mařurahi tavera. ⁵² Pani la sopo lo hitevosahia vara Iesu enia hare, hina purongo na matamata sei Iesu mo lo vaia na suihana hin la maji atu peresi la pereti atu matan mapura la ūrlangi mata la rasua.

*Tamlohi Rojoa Matuvana Gennesaret
(Mt 14.34-36)*

⁵³ Iesu tolu na nona tamlohi lara la vano roto na tasi la pala Gennesaret la sahe la hoso, ⁵⁴ ale lara la sevuti hin boti atu, vila ūruvu purongo tamlohi hin jara atu la hitevosahi Iesu. ⁵⁵ La maro la vano na jara tari ūralihi jara atu la lavi na tamlohi rojoa na epara la mai isana na sava jara la rongoa vara mo lo toho ea. ⁵⁶ Ale na

sava jara Iesu mo pala hinia, hina purongo vara hin te vanua, teni te taon tavera, teni na ima hasetoho, tamlohi la lavi na nora tamlohi rojoa la taura na jara maket, ale la lo usia ūrlangi isana vara la eři tikeli na pingo nona ruru purongo. Ale tamlohi tari sei la tikelia, nora rojoa la tihai.

7

*Vujangi Mata Mapu Tamlohi
(Mt 15.1-9)*

¹ Na rani matea Pharisee peresi na tamlohi vujangi mata leu, la tai Jerusalem la mai isan Iesu. ² La mai ale la hitea vara tatua nona tamlohi usuri la lo hanhani pani la sopo hoje na limara tiroma sohena Leu non Moses mo verea. ³ Matan Pharisee peresi na Jew tari, la sopo eři hanhani vara la sopo javulahi na limara tiroma, matan la lo usuri na posposi nona vajiahā matan tuai. ⁴ Ale la pa sopo eři hani te hinau la lavia na maket vara la sopo javulahi na limara tiroma. Hinau akerihi enia vonan la leu atu matuvana sei la lo usurira, sohena posposi mata hoje na paniken teni peleti teni jilivi teni pesin. ⁵ Ale Pharisee peresi na tamlohi vujangi mata leu la usia isan Iesu lara, "Mata sava nom tamlohi usuri la sopo usuri na posposi nona vajiahā matan tuai, matan la lo hanhani peresi na lumi limara?"

⁶ Iesu mo ūramira mara, "Kamim tamlohi tapnetano, Isaiah mo retimangovi vararūhu hin kamim sei hin haratu mo verea mara,

⁷ 'La tamlohi nike la lo oloolo hiniau na nora retireti purongo,
pani nora ūromřomi mo pa lo toho asau hiniau.
Nora lotu enia lotulotu vono purongo,
ale la lo verea lara nora retileu enia retileu non God.' *Isa 29.13*

⁸ Ka lo ūromřomi purongo na leu non God, ale ka lo usuri na vujangi nona tamlohi purongo."

⁹ Ale mo verea mara, "Kamim ka ūruvu na retileu non God matan vara ha pa taurilati na nomim posposi matan tuai. ¹⁰ Matan Moses mo ulia na leu mara, 'O oloolo hin tinam enia tamam!' ale 'Vara te tamlohi i retisasati hin tinana teni tamana ha vili-mateia!' *Exo 20.12; Lev 20.9; Deut 5.16*

¹¹ Pani kamim ka lo verea vara mo tataholo purongo vara tamlohi la sopo tuenina tamara teni tinara na nora vejuveju, ale ka lo verea kara, ‘Mo vono, a pa taurilati na mania na retitauhi hinia moiso vara a pa silea isan God.’* ¹² Ale Ka lo horoa vara i sopo eři tueni tamana enia tinana. ¹³ Ka lo vai na leu non God mo lo mai hina purongo na nomim posposi matan tuai sei la silea isamim. Ale mele hinau matuvana sohena ka lo vaira.”

Hinau Mo Vai Na Lumiha (Mt 15.10-20)

¹⁴ Ale Iesu mo mele tovi na tamlohi la mele mai isana, ale mo verea mara, “Kamim mo isoiso ha tapurongo i ūruhu isaku, ale ha lo levosahi na noku reti. ¹⁵ Mo sopo te hinau hatea vara ha hania i sivo na lolomim i eři vai kamim ha lumiha na nahon God. Pani la hinau sasati sei la lo malue na mapumim, enira natu la lo vai kamim ka lumiha na nahon God.”

¹⁶⁻¹⁷ Moiso Iesu mounu na ima matea vara i tinařihi vao tamlohi atu, ale nona tamlohi usuri la usi na ūramin titieu atu isana. ¹⁸ Iesu mo verea isara mara, “Kamim sohena, ka sopo rongovosahia? Ka sopo lo hitevosahia vara sava tamlohila hania i sopo eři vaira la lumiha na nahon God. ¹⁹ Hanhani mo sopo sivo na mapumim. Mo sivo na pangemim purongo moiso mo mele malue.” Hin retireti akerihi Iesu mo lo verea vara hanhani tari la ūruhu purongo.

²⁰ Ale Iesu mo mele verea mara, “Sava mo lo malue na mapu tamlohi, enia natu i eři vai na tamlohi i lumiha na nahon God. ²¹ Matan sava mo lo malue na mapu tamlohi enia: ūromřomi hehe, posposi viriu, vanaho, vilimatei na tamlohi, ²² vaivaileu peresi na tinapua mo lahi moiso, hanmarua, lejileji, haluhalu, posposi maji, mařivi na mereimerei, retiřeřen, ūromařu, peresi na posposi rongorongo vono. ²³ La hinau sasati nike natu, la lo malue na mapu tamlohi, ale la vaia mo lumiha na nahon God.”

Tanume Sasati Matea (Mt 15.21-28)

²⁴ Iesu mo malue Galilee mo vano na jara matan Tyre enia Sidon. Ale mo unu na ima matea mo sopo opoia vara tea i

levosahia, pani mo sopo eři luhu. ²⁵ Pani mo sopo tuai hařai matea sei venatuna tanume lumiha sasati matea mo sohonia, mo rongoa ale mo mai isana mo jovi na palona. ²⁶ Hařai atu enia hařai ūrořoha matea mara Syria Phonecia. Ale mo usia ūlangi vara i titiu nařihi tanume sasati atu isan venatuna. ²⁷ Ale Iesu mo verea isana mara, “Ha tinařihi na natuvarihi la hanhani tiroma, matan mo sopo tataholo vara a lavi na hara pereti a pulahia isana viriu!”

²⁸ Pani pa hařai mo ūrami Iesu mara, “Ko vararuhi Moli, pani viriu sei la lo toho na ruhuruhi tep la lo hani na utauta hanhani hana natuvarihi sei la lo jovi sivo na lepa!”

²⁹ Moiso Iesu mara, “Nom ūrami mo ūruhu jea! O vano, tanume sasati atu mo malue hin venatum moiso!” ³⁰ Hařai atu mo turu mo mule, ale mo hite venatuna mo lo juruvi malum na vatana, ale tanume sasati atu mo malue isana moiso.

Peropero Matea

³¹ Iesu mo malue Tyre ale mo hahau vano na taon matan Sidon ale mo sivo na tasin Galilee, hin jara atu sei la lo tovia Decapolis. ³² Ale tamlohi la lavi na tamlohi matea mo mengo ale mo peropero mo mai isana, ale la usia ūlangi isana vara i tau na limana hinia. ³³ Iesu mo lavi tamlohi atu mo vano hasena hin vao atu, mo tau na varangona na lolo perona, moiso mo lito sivo na varangona, ale mo tikeli na memen tamlohi atu na litona. ³⁴ Iesu mo tařa sahe aulu na tuka, ale mo mapsoro mo verea na leora mara, “Ephphatha!” Ale ūramina enia ‘O roi!’ ³⁵ Vahatea purongo perona mo roi, ale memena mo retireti mo mera.

³⁶ Iesu mo verea ūlangi isara vara la sopo sorahi hinau atu isan te tamlohi, pani mara mo verea mo ūlangi enira sohena la opoia mo tavera jea vara la vereulia.

³⁷ Matan la mařurahi tavera ale la lo verea lara, “Hinau tari mo lo vaira la ūruhu hajavua. Hina purongo vara la peropero mo vaira la rongo, teni vara la mengo mo vaira la retireti.”

* 7:11: hinau la retitauhi: vara i mania teni silesilea.

8*Iesu Mo Vahani Na Tamlohi
(Mt 15.32-39)*

¹ Hin la rani atu, vao tavera matea mo mele toho peresi Iesu, ale mo sopo te hara hinau. Iesu mo tovi na nona tamlohi usuri la mai isana, ale mo verea isara mara, ² “Enau na ūromopoi vao nike matan enira la lo toho peresiau mata rani mo tolu moiso, ale mo sopo te hanhani vara la pa hania. ³ Vara a ūrulera la mule marohati, la pa talekoleko na malele matan tatuara la tai asau ūrove.”

⁴ Nona tamlohi usuri lara, “Pani ūra pa vahani la tamlohi nike sohena sava hin jara hasetoho nike?”

⁵ Iesu mo usia isara mara, “Ka lo lavi na pereti mo visa?” Lara, “Mo limaravrua!”

⁶ Ale Iesu mo vere vao atu vara la sakele, moiso mo lavi la pereti atu mo limaravrua mo vere meje isan God matara, mo topera ale mo silera isana nona tamlohi usuri vara la aseasera isan vao atu, ale la vaia sohena. ⁷ Ale la vilei na maji vavarihi mo visalete purongo, ale Iesu mo vere meje matara ale mo verea isana nona tamlohi usuri vara la aseasera isan vao atu.

⁸ Tamlohi tari la hanhani vavano la masu. Hitahu nona tamlohi usuri la sohoni na sope hanhani na tanga mo limaravrua. ⁹ Evi tamlohi korong mo tikeli tari vaha vati (**4000**). Ale lara la hanhani moiso Iesu mo ūrulera la mule. ¹⁰ Hitahu Iesu mo vele na boti matea peresi na nona tamlohi usuri la vano na jara matan Dalmanutha.

*Pharisee La Usi Na Matamata
(Mt 16.1-4)*

¹¹ Pharisee lara la rongoa vara Iesu mo pala atu, la mai vara la usi arearea hin te hinau, la opioa vara i vai te matamata matan na tuka vara i vujangia vara enia hare.

¹² Pani Iesu mara mo rongoa mo map-soro ale mara, “Kamim ka lo usi na matamata mata sava? Varafuhu na verea isamim vara enau a pa sopo vai te matamata vara kamim pin tamlohi nake ha pa hitea.” ¹³ Iesu mo malue isara ale mo vele hin pa boti atu, mo mele vano roto tasi atu.

*Hehe Nona Pharisee
(Mt 16.5-12)*

¹⁴ Pani nona tamlohi usuri la ūromalihou vara la lavi te pereti, ale la lo toho peresi

na pereti matelete purongo na lolo boti. ¹⁵ Ale la pa lo vano roto tasi atu, Iesu mo retiōraōahaira mara, “Ha lo kilau mata isi nona Pharisee peresi Herod!”

¹⁶ Nona tamlohi usuri lara la rongoa la ūromi vara mo lo verea sohena matan la sopo lavi te pereti. ¹⁷ Pani Iesu mo levosahi na sava mo lo toho na ūromira, ale mo verea isara mara, “Mata sava ka lo sorahia vara ka sopo lavi te pereti? Ka sopo lo levosahia? Korong ūromimim la pelati. ¹⁸ Matamim la vuso? Teni ka peropero? Ka sopo mele ūromūromi na sava na lo vaira tiroma? ¹⁹ Hin rani atu sei na lo ase na pereti mo lima isan la tamlohi atu mo tari vaha lima (**5000**), ale tanga sope hanhani mo visa ka pa mele takonahira?”

La ūramaria lara, “Kama sohoni na tanga mo sangavulu ūromana mo rua.” ²⁰ Ale mo mele verea mara, “Hin rani atu na vahani na tamlohi mo tari vaha vati (**4000**) na pereti mo limaravrua, ale tanga mo visa ka pa mele takonahira?”

Lara, “Mo limaravrua.”

²¹ Iesu mo mele verea isara mara, “Ka lo levosahi na sava na lo verea teni mo vono?”

Tamlohi Vuso Matea

²² Iesu peresi na nona tamlohi usuri lara la pala Bethsaida, tamlohi hai la lavi na tamlohi vuso matea la mai isana, ale la usia ūlangi isana vara i tikelia na limana. ²³ Ale Iesu mo tauri na liman tamlohi atu mo tiroma hinia la malue hin vanua atu. Ale mara mo litovi na matana, ale mo tau na limana hinia moiso mo usia isana mara, “Ko hite te hinau?”

²⁴ Tamlohi atu mo kilakilau ūalihi ale mara, “Na hite na tamlohi, pani la sohena vipaihai la lo hahau ūalihi.”

²⁵ Ale Iesu mo mele tau na limana na matana, moiso tamlohi atu mara mo mele roi na matana mo eři hite na hinau tari la memera. ²⁶ Iesu mo verea isana mara, “O mule, pani o sopo hahau na vanua.”

*Iesu Enia Křisto
(Mt 16.13-20; Lk 9.18-21)*

²⁷ Iesu peresi na nona tamlohi usuri la malue Galilee ale la sahe na vanua sei la lo toho na jara matan Caesarea Philippi. La pa lo hahau Iesu mo usi na nona tamlohi usuri mara, “Ka rongo na tamlohi la lo verea vara enau hare?”

²⁸ La ūramia lara, “Tamlohi hai la verea vara engko John tamlohi paptijo, hai la verea vara engko Elijah. Hai la lo verea vara engko p̄ovet matea.”

²⁹ Moiso Iesu mo pete usia isara mara, “Pani kamim, ka lo verea kara enau hare?”

Peter mo ūramia mara, “Engko natu pa K̄risto atu!” ³⁰ Ale Iesu mo verea ūrlangi isara vara la sopo mele verea isan tea vara enia hare.

*Mo Retireti Na Nona Mateia
(Mt 16.21-28; Lk 9.22-27)*

³¹ Iesu mo tapulo verea isara mara Natun Tamlohi i pa lavi na rani ūrlangi na hinau matuyana. Ale tamlohi aulu matan Israel peresi na p̄ris aulu, peresi na tamlohi vujangi mata leu la pa ūruhunia, ale la pa vilimateia, pani i pa mele turu na hatolu rani. ³² Mara mo lo vere la hinau atu sohena, Peter mo lavi Iesu mo vano hasena, ale mo reti ūrlangi isana vara i sopo retireti sohen haratu.

³³ Pani Iesu mo posī mo kilau vano isana nona tamlohi usuri, mo reti ūrlangi isan Peter mo verea mara, “O rovo isaku Setan. Romromi atu mo tai isana tamlohi, mo sopo tai isan God.”

³⁴ Ale Iesu mo tovi la vao atu peresi na nona tamlohi usuri vara la mai isana, ale mo verea mara, “Vara te vonamim hatea mo opoia vara i usuriau, o vahitea vara o ūromaliho na masalom moiso o soloti na nom talopeilopei ale o usuriau!” ³⁵ Matan sava tamlohi vara mo opoia vara juri na maurina, i pa vaitihai, pani hare vara mo vaitihai na maurina matakū peresi na Retiūhu i pa juri na maurina. ³⁶ Sava hinau mo ūruhunia vara o lavi na hinau tari matan varama nike, pani o pa vaitihai na maurim? ³⁷ Sava hinau natu, o pa eři vaia vara o eři volituhu na maurim hinaia?

³⁸ Matan sava tamlohi vara mo manuhanu hiniau peresi na noku retireti hin pina vaivaileu nike sei mo lejileji, enia sohena Natun Tamlohi i pa sopo avulahi hina hin rani atu i pa mai peresi na nona angelo tapu peresi na mera tavera non Tamana.”

9

¹ Iesu mo mele verea isara mara, “Varaūhu na verea isamim vara tatumim sei la lo turu nakerihi, la pa sopo

lo mate la pa hite mauri atu God mo aulu hinia i mai na suihana tavera.”

*Epen Iesu Mo Posi
(Mt 17.14-21; Lk 9.28-36)*

² Rani mo limarave la vano moiso, ale Iesu mo lavi Peter, James peresi John, la sahe aulu na vutivuti enira hasera. Hin rani atu la hite na epen Iesu mo posī, ³ ale la hite na nona ruru la mera hajavua, la lulu tinapua, la jeu na hinau lulu tari nike na varama. ⁴ Moiso la hite p̄ovet Elijah enia Moses la pala ale la lo sorasora peresi Iesu.

⁵ Peter mo verea isan Iesu mara, “Moli, mo ūruhunia matan kama lo toho akerihi. Mo ūruhunia vai te tent i tolu akerihi, matea nom, matea non Moses ale matea non p̄ovet Elijah.” ⁶ Matan Peter mo sopo levosahia vara i pa vere na sava matan la matahu hajavua.

⁷ Ale telangi matea mo mai mo hohovira, moiso la rongo na leo matea mo malue hinia mara, “Harihi enia Natuku sei na opoia mo tavera jea. Ha tapurongo isana!”

⁸ Vahatea purongo la pa ale Moses enia Elijah pani la tihai, pani la hite Iesu hasena mo pa lo toho atu. ⁹ Ale lara la lo sevuti na vutivuti, Iesu mo reti horora vara la sopo mele verea na sava la hitea isan te tamlohi vavano Natun Tamlohi i mele mauri na mateia. ¹⁰ Ale la sopo mele verea isan tea, pani la lo usia vara ūramin reti sei vara i pa mele turu na mateia enia sava.

Elijah I Pa Mele Mai

¹¹ Ale la usia isana lara, “Mata sava natu, tamlohi vujangi mata leu la verea lara, ‘Elijah i pa mai tiroma?’”

¹² Iesu mo ūramira mara, “Varaūhu, Elijah i pa mai tiroma vara i vai tataholoi na hinau tari. Pani mata sava natu la ulia na Retiulia vara Natun Tamlohi i pa lavi na ūrlangi ale la pa vailejlejia na nora hiteřeřesi? ¹³ Pani na verea isamim vara Elijah mo pete mai moiso, ale tamlohi la vailejlejia usuri na masalora sohena Reti-tapu mo lo verea.”

*Iesu Mo Tueni Na Uluvou Mateia
(Mt 17.14-20; Lk 9.37-43a)*

¹⁴ Iesu peresi la tupu tolu atu, lara la mele sevuti sivo na pulon vuti atu, la hite na tapalara tamlohi usuri peresi na vao tavera matea la lo turu ūrahira, ale la hite

na tamlohi vujangi mata leu hai la lo vasvasi peresira. ¹⁵ Ale la vao tamlohi atu lara la hite Iesu la hutura hinia, ale vahatea la avulahi la maro vano isana.

¹⁶ Iesu mo usi na nona tamlohi mara, “Eh! Kamim ka lo vauriuri na sava?”

¹⁷ Vonara matea mo verea isan Iesu mara, “Tija, na lavi natuku na mai isam matan tanume mata mengo mo lo toho isana. ¹⁸ Vara mo vaia, mo lo pulahia atano na lepa, ale epena la lo ūra mo lo hatihati na huřuna moiso jingona mo lo valval. Ale na usia isana nom tamlohi usuri vara la titiu nařihi tanume sasati nike, pani la sopo eři vaia.”

¹⁹ Iesu mo ūramira mara, “Kamim nomim rasua mo sohena sava! A pa toho peresi kamim i tikeli pangisa? A pa tueni kamim i tikeli pangisa? Ha lavi uluvou atu i mai isaku!”

²⁰ Moiso la lavi uluvou atu mo mai isana, ale tanume sasati atu mara mo hite Iesu, mo tuatuahi pa uluvou atu mo jovi atano na lepa, ale mo lo makurekure, moiso valval jingona mo lo malue.

²¹ Iesu mo usia isan tamana mara, “Tanume sasati nike mo tapulo vaia nangisa?”

Ale tamana mo ūramia mara, “Na rani mo lo natirihi. ²² Hin te rani mo vaia mo jovi na hapu teni na wai vara i vilimateia. Pani vara o eři vai te hinau, o ūromopoi kamam, o tueni kamam.”

²³ Iesu mara, “Ko verea vara a eři vaia! Vara te nom rasua o eři vai na hinau tari!”

²⁴ Vahatea tamana mo ūramia mara, “Na rasua, pani o nařihi na noku ūromkaka!”

²⁵ Ale Iesu mara mo hite na vao matea la lo maro la mai vara la pa turu porotia matana, mo reti ūlangi isan tanume lumiha sasati atu mara, “Tanume mengo, na verea isam vara o malue isan uluvou sei nakerihi! O sopo mele unu hinia hin te rani!” ²⁶ Tanume sasati atu mo ulo sasati, mo mele tuatuahia mo jovi sivo atano moiso mo malue hinia. Tamlohi la hitea sohena vara uluvou atu mo mate moiso, ale lara, “Eh, mo mate!” ²⁷ Pani Iesu mo sauva, ale mo mele turu.

²⁸ Ale hitahu Iesu mara mo mele unu hin ima atu, nona tamlohi usuri la usia lara, “Mata sava natu, kamam kama sopo eři titiu nařihi tanume sasati atu?”

²⁹ Ale Iesu mo verea isara mara, “Tanume sasati sohen haratu, usiusi purongo i eři titiu nařihi.”

Iesu Mara I Pa Mate (Mt 17.22-23; Lk 9.43b-45)

³⁰ Iesu peresi na nona tamlohi la malue hin jara atu, ale la hahau roto na jara Galilee, matan hin rani atu Iesu mo sopo opoia vara tea i levosahia vara mo lo toho atu. ³¹ Matan mo opoia vara i vujangi na nona tamlohi usuri hasera. Mo mele verea isara mara, “Tamlohi la pa turuposi hin Natun Tamlohi, ale la pa taua na lima tamlohi vara la vilimateia. Pani na hatolu rani i pa mele turu na mateia.” ³² Pani la sopo rongovosahi na sava hinau mo lo verea isara, ale la matahu vara la usi na ūrami nona retireti.

Hare Mo Aulu (Mt 18.1-5; Lk 9.46-48)

³³ Lara la kakau Capernaum, ale la unu na ima matea mata la pa toho hinia. Iesu mo usia isara mara, “Sava natu, ka lo sorahia na malele?” ³⁴ Pani la sopo ūramia matan la lo vauriuri vara hare natu mo aulu jea hinira. ³⁵ Ale Iesu mo sakele mo tovi la tupu sangavulu ūromana mo rua atu la mai isana mara, “Vara tea mo opoia vara i aulu i jeu na tinapua, enia i pa hasena taua atano i jeu na volitusi nona tamlohi tari.”

³⁶ Moiso Iesu mo lavi na natirihi matea hin vao atu ale mo taua na livuhara. Moiso mo tulia mara, ³⁷ “Vara tea mo lavi te natirihi sohen haranike na hijaku, enia mo lo laviau. Ale vara tea mo laviau, mo sopo laviau haseku, pani mo lo lavi Tamaku sei mo lo ūruleau sohena.”

Vavahinau Na Hijan Iesu (Lk 9.49-50)

³⁸ John mo verea isan Iesu mara, “Tija, kama hite na tamlohi matea mo lo titiu nařihi na tanume sasati na hijam, pani kama horoa vara i isoiso matan enia mo sopo tatuařa.” ³⁹ Pani Iesu mo verea isara mara, “Ha sopo horoa, matan i pa sopo te tamlohi hatea vara mo lo vai na matamata tavera na hijaku i eři mele verelejlejiau hin te rani.” ⁴⁰ Matan la haratu la sopo turuleji hiniřa, enira nořa. ⁴¹ Varařuhu na verea isamim, vara tea mo sile te paniken wai hamarři isamim matan ka tamlohi non

Kristo, varafuhu enia i pa lavi na otori matana!"

*Ha Lo Kilau Mata Posposi Hehe
(Mt 18.6-9; Lk 17.1-2)*

⁴² "Pani vara tea mo vai na natirihia matea sohen harihi sei mo rasuau i jovi na hehe, i pa mele ūruhu jea vara la lasi te vatu tavera na ūralona, ale la putehia na tasi puaha. ⁴³ Vara limam mo lo vaiho ko lo vai na hehe, o tai nařihia! I pa mele ūruhu jea vara o lavi mauri atu na tuka peresi te limam hatelete purongo, mo jeu haratu vara o pa vano na hapu mata moruhapu sei mo sopo eři mate peresi na limam mo rua! ⁴⁴⁻⁴⁵ Vara palom mo lo vaiho ko lo vai na hehe, o tai nařihia! I pa mele ūruhu jea vara o unu hin mauri atu na tuka peresi te palom hatelete purongo, mo jeu haratu vara la pulahiho peresi na palom mo rua na moruhapu. ⁴⁶⁻⁴⁷ Vara matam mo lo vaiho ko lo vai na hehe, o hoti nařihia! Mo mele ūruhu jea vara o unu hin mauri atu God mo aulu hinia peresi te matam hatelete purongo, mo jeu haratu vara la pulahiho peresi na matam mo rua na moruhapu. ⁴⁸ 'Hin jara atu hulesira la sopo eři mate, ale hapu mo sopo mate hin te rani.'

Isa 66.24

⁴⁹ Matan God i pa tau na hapu mata rani ūrlangi na mauri tamlohi tari, matan vara i hani nařihia na hehe na maurira sohena solo mo lo vai na mit mo sopo ranga. ⁵⁰ Solo mo ūruhu, pani vara mejina mo tihai, ha pa eři vaia i mele meji sohena sava? Ha taurilati na ūromimim mata ūruhu na hehe, ale ha toho na tamata peresi kamim hate-hateah!"

10

*Vujangi Mata Lahi
(Mt 19.1-12; Lk 16.18)*

¹ Ale Iesu mo malue Capernaum, mo sivo na jara matan Judea, ale mo vano na tavulu wai Jordan na jara Opae hinia. Hin jara atu vao tamlohi la mele mai isana sohen tarea, ale mo lo vujangira sohen tarea.

² Pharisee hai la mai isana la vahitea hin retiusia akerihi lara, "Tamlohi i pa tope na leu vara mo ūruhu hin narouna teni mo vono?"

³ Iesu mo ūramira mara, "Leu non Moses mo verea vara sava?"

⁴ La tamlohi atu la verea lara, "Moses mo majinga hinia mara i pa uli na certificate matea matana, moiso i pa eři ūrule nařihia i vano."

Deut 24.1-4; Mt 5.31

⁵ Pani Iesu mo ūramira mara, "Moses mo pa uli leu atu matan patumim mo ūrlangi. ⁶ Pani na pongi tiroma sei God mo vai na varama, 'Mo vai na lamane peresi na hařai.'

Gen 1.27; 5.2

⁷ Mata hinau atu natu, tamlohi matea i pa sořotahi isan narouna, i pa malue isan tamana enia tinana. ⁸ La tupra rua atu la pa mai epe matelete purongo.' Matan la sopo mele mo rua, pani la pa matea, *Gen 2.24* ⁹ i pa sopo te tamlohi hatea i eři mele tauhasehira matan God mo sořotahira la mai matea moiso.' ¹⁰ Ale hitahuna, Iesu mara mo lo toho hasena na ima peresi na nona tamlohi usuri, ale la mele usia hin pa vujangi atu. ¹¹ Ale Iesu mo verea isara mara, "Vara te tamlohi mo ūruhu hin narouna, moiso mo mele lavi na hařai tinapua, enia mo lo vaivaileu peresi hařai atu. ¹² Ale vara te hařai mo ūruhu hin tuana, moiso mo mele lahi isana tamlohi tinapua, enia mo lo vaivaileu peresi tamlohi atu."

*Iesu Mo Leruhu Na Natuvarihi
(Mt 19.13-15; Lk 18.15-17)*

¹³ Na rani tinapua, tamlohi hai la lavi na natura la mai isan Iesu matan vara i tau na limana hinira, ale i leřuhu hinira, pani nona tamlohi usuri la lo horora. ¹⁴ Pani Iesu mara mo hitea mo lolokoru hinira, ale mo verea isara mara, "Ha tinařihia na natuvarihi la mai isaku, ha sopo horora matan mauri atu God mo aulu hinia, enia non la haratu sei la sohera. ¹⁵ Varafuhu na verea isamim vara te tamlohi mo sopo eři lavi mauri atu God mo aulu hinia sohen natirihia nika, enia i pa sopo eři unu hin mauri atu hin te rani." ¹⁶ Moiso Iesu mo tulii na natuvarihi na limana, ale mo tau na limana aulu na patura mo leřuhu hinira.

*Tamlohi Tavtav Matea
(Mt 19.16-30; Lk 18.18-30)*

¹⁷ Na rani matea, Iesu mo pa tapulo vara i mele vano na nona hahau matea na jara tinapua matea, uluvou matea mo maro mo mai ale mo papaohi isan Iesu mo usia mara, "Tija ūruřuhu, a pa vai na sava natu vara a lavi na mauri tui hinia?"

¹⁸ Iesu mo verea mara, “Mata sava ko vereau vara na ūruhu? God hasena mo ūruhu. ¹⁹ Engko ko levosahi na leu, ‘O sopo vilimateia na tamlohi, o sopo vaivaileu peresi na tinapua mo lahi moiso, o sopo vavanaho, o sopo halu, o sopo retihalu hin tahisam, o sopo vai te halu mata vavanaho, moiso o ooloalo hin tamam enia tinam.’”

Exo 20.12-16; Deut 5.16-20

²⁰ Uluvou atu mo verea mara, “Tija, la leu tari atu na lo usurira na pa lo natirihi mo sinai mo kakau nake.”

²¹ Iesu mo kilau tataholo isan tamlohi atu na opoia, ale mo verea isana mara, “Ko pa lo vejuveju na hinau matea. O vano o hařehi vevuhi na nom hinau tari, ale o sile na maniana isana tilavono, ale o pa lavi na tavitav na tuka. Moiso, o pa mai, o usuriau!” ²² Pa tamlohi atu ūromina mo jovi mata sava Iesu mo verea isana, matan enia tamlohi tavitav matea.

Vujangi Mata Suihan God

²³ Iesu mo kilau ūalihi, ale mo verea isana nona tamlohi usuri mara, “I pa ūilangi isan la haratu la tavitav vara la unu hin mauri atu God mo aulu hinia.” ²⁴ Nona tamlohi usuri la mařurahi na nona reti matan la lo ūromřomia lara God mo leřuhu na tamlohi tavitav. Iesu mo mele verea isara mara, “Natuvarihi, mo ūilangi jea vara tea i eři unu hin mauri atu God mo aulu hinia! ²⁵ Mo mele malum jea vara camel i unu na koko niteli matea mo jeu haratu vara tamlohi tavitav matea i eři unu hin mauri atu God mo aulu hinia.”

²⁶ Nona tamlohi la mařurahi tavera hinia, ale la lo usiusira hinia lara, “Hare natu, i pa eři juri?”

²⁷ Iesu mo kilau tataholo isara mara, “Hinau tamlohi la sopo eři vaia, God i eři vaia. Matan God i eři vai na hinau tari.”

²⁸ Moiso Peter mo tapulo verea isan Iesu mara, “Kama tinařihi na hinau tari vara kama usuriho!”

²⁹ Ale Iesu mara, “Varařuhu, na verea isamim, vara tea mo tinařihi na imana, teni tasina teni vetasina, teni tamama teni tinana teni te natuna, teni jarana, ale mo tinařihira matakteni mata Retiřuhu, ³⁰ enia i pa mele lavia nike nake na varama i vaha ngavulu sangavulu (100) na imana, na voraina peresi na vetasina, tinana, peresi na natuna teni jarana, ale

i pa lavi na rani ūilangi na lima tamlohi, pani na pongi hitahu i pa lavi na mauri tui. ³¹ Pani la haratu sei la lo ūromřomia vara enira la aulu na tamlohi nake, la pa atano jea, ale la haratu sei la lo atano nake, la pa aulu hinira.”

Iesu Mo Mele Verea Vara I Pa Mate (Mt 20.17-19; Lk 18.31-34)

³² Ale lara la lo vano na malele vara la sahe Jerusalem, Iesu mo lo vano tiroma, ale la haratu na hařina la mařurahi na nona reti, ale la tupu sangavulu ūromana mo rua atu la matahu matan Iesu mo mele tapulo vere na sava i pa masese isana Jerusalem. ³³ Mo verea isara mara, “Ka hitea, ūa lo sahe Jerusalem nahai, pani i pa sopo tuai la pa tau Natun Tamlohi na lima moli mata přis peresi na tamlohi vujangi mata leu, ale la pa silea na talai vara i mate, moiso la pa taua na lima mara Rome. ³⁴ La pa retikerekerehia, la pa litovia, la pa rupia na asi maja, ale la pa vilimateia. Pani na hatolu rani i pa mele turu na mateia.”

Vujangi Mata Volitusi (Mt 20.20-28)

³⁵ Ale James enia John natun Zebedee, la mai isan Iesu la verea isana lara, “Tija, kama opoi na hinau matea vara o pa vaia matamam.” ³⁶ Iesu mara, “Ka opoia vara a vai na sava matamim?”

³⁷ La verea lara, “Kamam kama opoia vara kama pa sakele na pahisam na nom rani suiha. Matea na matuam, ale matea na maraum.”

³⁸ Ale Iesu verea isara mara, “Ka sopo levosahi na sava hinau ka lo usia. Kamim ha eři inu hin paniken atu mata rani ūilangi sei a pa inu hinia? Kamim ha eři lavi paptijo atu mata rongohaji sei a pa lavia?”

³⁹ La ūaramia lara, “Kama eři vaia.”

Ale Iesu mo verea isara mara, “Ha pa inu hin paniken atu sei a pa inu hinia, ale ha pa lavi paptijo atu sei a pa lavia, ⁴⁰ pani mo sopo noku hinau vara a pa verea vara hare natu i pa sakele na matuaku teni na marauku. God Tama mo tatamahuni la jara atu moiso matan la haratu sei mo vřonira moiso.”

Haratu Mo Aulu Vararuhu

⁴¹ La tupu sangavulu tinapua atu lara la rongo hinau atu la lolokoru hin James

enia John. ⁴² Ale matana, Iesu mo tovi matavuhira mai isana mo verea isara mara, "Ka levosahia vara la haratu la lo aulu na tamlohi ūroha la lo ūromōmira hasera purongo, ale la lo vailehilehi na tamlohi la lo toho na ruhuru hura. ⁴³ Pani i pa sopo sohen haratu isamim. Vara te vonamim mo opoia vara i aulu hin kamim, enia i pa mai sohena nomim volitusi. ⁴⁴ Ale vara tea mo opoia vara i tiroma, enia i pa mai sohena slev nona tamlohi tari. ⁴⁵ Matan hina purongo vara enau na Natun Tamlohi, na sopo mai vara tamlohi la volitusi isaku. Pani na mai vara a volitusi, ale vara a hase sile na mauriku vara i volitu hu na tamlohi matuvana."

*Iesu Mo Tueni Bartimaeus
(Mt 20.29-34; Lk 18.35-43)*

⁴⁶ La kakau Jericho, ale hitahu Iesu mara mo pa lo malue Jericho tolu na nona tamlohi usuri peresi na vao tavera matea, tamlohi matavuso matea hijana Bartimaeus natun Timaeus, mo lo sakele na pahisa malele, ale mo lo usi na mania isana tamlohi. ⁴⁷ Ale mara mo rongoa vara Iesu mara Nazareth mo lo hahau hin jara atu, mo tapulo tangi aulu mara, "Iesu, natun Supe David, o ūromopoiau!"

⁴⁸ Pani tamlohi matuvana la merusahia lara i toho malum, pani mo mele ulo aulu jea mara, "Natun Supe David, o ūromopoiau!"

⁴⁹ Iesu mara mo rongoa mo turu atu, mo verea isara mara, "Ha verea i mai isaku!"

Ale tamlohi la tovi matavuso atu lara, "Eh, ūromim i sopo sati! O turu! Iesu mo toviho." ⁵⁰ Mo pulahi nařihi na nona ruru hamariri, mo vai vilavila mo mai isan Iesu.

⁵¹ Iesu mo usia mara, "Ko opoi na sava vara a vaia isam?"

Matavuso atu mo ūrami Iesu mara, "Tija, na opoia vara a eři kilau."

⁵² Ale Iesu mara, "O vano! Nom rasua mo vaiho ko ūru moiso."

Ale vahatea purongo matana la kilau, moiso mo usuri Iesu na malele.

11

*Iesu Mo Unu Jerusalem
(Mt 21.1-11; Lk 19.28-40; Jn 12.12-19)*

¹ Iesu tolu na nona tamlohi usuri la lo usuri na malele mo sahe Jerusalem, ale

la mai na vanua matan Bethphage peresi Bethany na pahisa vutivuti sei la tovia Vuti talu Olive. Iesu mo ūrule na nona tamlohi usuri mo rua vara la yano tiroma hinira. ² Mo verea mara, "Ha vano hin vanua aturihi ale ha unu hinia, ale ha pa hite na natu donki matea la lihoa. Tea mo sopo lo sakele hinia hin te rani. Ha uli na asina, ale ha lavia i mai isaku. ³ Vara tea mo usi kamim vara, 'Ka lo vai na sava?' ha verea vara, 'Moli mo opoia, ale i pa mele sohaia i mai nohorihii'."

⁴ La vano hin vanua atu, moiso la hite natu donki atu mo lo toho na pahisa malele la lihoa na jingoima ima matea, ale la uli na asina. ⁵ Pani tamlohi hai sei la lo turu atu la usira lara, "Mata sava ka lo uli na asin natu donki sei?" ⁶ La ūramira sohen Iesu mo verea isara moiso, ale la tamlohi atu la tinařihia vara la lavi natu donki atu i vano. ⁷ La lavia mo mai, la vuřangi na nora ruru aulu na hafin natu donki atu, ale Iesu mo sahe mo sakele hinia.

⁸ Tamlohi matuvana la vuřangi na nora ruru na malele, ale hai la lo tai na rau pahai na pahisa malele la vuřangira na malele vara natu donki atu i pa hahau hinia. ⁹ Tamlohi hai la lo hahau tiroma, hai la lo hitahu, ale Iesu mo lo toho na livuhara, ale la lo uloulo tavera lara, "Hasohaso God!"

Psa 118.25
Ale "Leřuhu isan haratu sei mo lo mai na hijan Moli God".

Psa 118.26

¹⁰ "Avulahi tavera mo lo mai mata rani suiha non tamařa Supe David mo pala."

"Hasohaso God aulu na tuka sei mo aulu jea!"

¹¹ Iesu mo unu Jerusalem, ale mo unu na rope Temple. Ale mara mo vano ūralihi mo hite na hinau tari moiso, ale matan pongi mo mai mariviti moiso mo malue mo vano Bethany peresi la nona tamlohi atu mo sangavulu ūromana mo rua.

*Mo Lesati Na Vipahai Fig Matea
(Mt 21.18-19)*

¹² Na harua rani na ūralavuho, la malue Bethany ale la lo vano, Iesu mo marohati.

¹³ Mo hite na vipahai fig matea mo lo turu asau na pahisa malele, ale mo hahau mo vano hinia vara i hitea vara te vuana, pani mo sopo te vuana, mo lo rauha purongo matan mo sopo lo taro mata i vua. ¹⁴ Iesu

mo reti isan vipahai atu mara, "I pa sopo mele tea i eři mele hani te vuam hin te rani." Ale nona tamlohi usuri la rongo reti atu mo lo verea isana.

*Iesu Mo Levutira Na Temple
(Mt 21.12-17; Lk 19.45-48; Jn 2.13-22)*

¹⁵ La vano la mele tikeli Jerusalem moiso Iesu mo unu na rope Temple, mo tapulo levuti la haratu sei la lo hařehi na hinahinau peresi la haratu sei la lo voli na nora hinahinau. Iesu mo tarasahi na tep non la haratu la lo jeni na mania nona tamlohi sei la mai Jerusalem. Mo vano mo tohoi roiroi na palapala non la haratu la lo hařehi na vomuhe. ¹⁶ Mo horo la haratu sei la opoia vara la lavi na nora hinahinau mata hařehira na lolo ropen Temple atu. ¹⁷ Ale Iesu mo vujangira mo verea isara mara, "Ka sopo lo levosahi na sava la ulia na Retiulia sei mo verea vara,
'Imaku enia ima mata usiusi nona tamlohi tari na varama.'

Isa 56.7

Pani nake ka vaia mo mai sohena,
'Papa tamlohi vili tamlohi mata mania matea'."

Jer 7.11

¹⁸ Přis aulu peresi na tamlohi vujangi mata leu lara la rongo na sava Iesu mo vaira na Temple, la tapulo aleale malele vara la vilimateia hinia. Pani la matahuni Iesu matan tamlohi tari la lo mařurahi tavera na nona vujangi. ¹⁹ Na ravravi Iesu enia tolu na nona tamlohi usuri la mele malue Jerusalem.

*Pa Vipahai Fig Atu Mo Koru
(Mt 21.20-22)*

²⁰ Na ūlalavuho tinapua, lara la mele vano mařiviti hin pa vipahai fig atu, la hite na rauna la menumenu, ale lahona peresi na warina la koru moiso. ²¹ Peter mo mele ūlalavuho tinapua, lara la mele vano! Pa fig atu ko lo lesati hinia mo koru moiso."

²² Moiso Iesu mo ūramaria mara, "Ha tau na nomim rasua hin God!" ²³ Varařuhu na verea isamim, vara tea nona rasua mo ūlalavuho tinapua, lara la mele vano! Pa fig atu ko lo lesati hinia mo koru moiso!

²⁴ Ha tapurongo isaku! Na verea vara sava

hinau ka usia na nomim usiusi, vara ka rasua mo ūlalavuho tinapua, lara la mele vano! Pa fig atu ko lo lesati hinia mo koru moiso!

*Tamlohi Tavera La Mai Isan Iesu
(Mt 21.23-27; Lk 20.1-8)*

²⁷ Iesu peresi na nona tamlohi usuri la mele unu Jerusalem, ale lara la lo hahau na lolo rope Temple, přis aulu tolu na tamlohi vujangi mata leu peresi na tamlohi aulu tinapua hai la mai isana, moiso la reti isana lara, ²⁸ "Sava suiha natu ko lo vai la hinau nike hinia teni hare mo sileho na suiha matana?"

²⁹ Iesu mo verea isara mara, "A pa usi kamim na retiusia matea, ale vara ha ūramariau, enau a pa vere kamim hinia vara na lavi na suiha isan hare natu na lo vai la hinau nike hinia. ³⁰ Ha to vereau hinia, paptijo non John mo tai isan God teni isana tamlohi?"

³¹ Ale la lo hasera sorasorahia lara, "Vara ūlalavuho tinapua, lara la mele vano! Pa fig atu ko lo lesati hinia mo koru moiso!" ³² Pani vara ūlalavuho tinapua, lara la mele vano! Pa fig atu ko lo lesati hinia mo koru moiso!

Ale Iesu mo verea isara mara, "Enau sohena, a pa sopo vere kamim hinia vara sava suiha natu, na lo vavahinau hinia."

12

*Vujangi Mata Tamlohi Sasati
(Mt 21.33-46; Lk 20.9-19)*

¹ Ale na lolo rope Temple Iesu mo tapulo vujangi na titileu isara mara, "Tamlohi tavera matea mo lavo na isa mata grape matea. Mo vai na ropena, mo voro na jara mata lavi nařihi na waena hinia. Mo voro na imo aulu matea mata kilau na isana. Ale mo sile isana atu vara tamlohi lalavo tinapua la pakaia, ale la lalavo hinia. Moiso pa tamlohi tavera atu mo vano na jara tinapua mata i tohoa ea."

Isa 5.1-2

² Taro mata vua grape la mena, ale pa tamlohi tavera atu mo ūrule na nona volitusi matea mo vano vara i lavi na ūfungana vuara. ³ Pani pa la tamlohi atu la tauri pa volitusi, la hamajia, moiso la ūrulea mo vano lekoleko.

⁴ Tamlohi tavera atu mo mele ūrule na volitusi tinapua matea. Mo vano, pani la hamajia na patuna, ale la vaimahanuhanu hinia. ⁵ Tamlohi tavera atu mo mele ūrule na volitusi tinapua matea. Pani la vilimateia. Tamlohi tavera atu mo mele ūrule te nona volitusi tinapua matuvana, pani hai la hamajira, ale hai la vilimateira vano, ⁶ tamlohi tavera atu mo hitea vara natuna tataholo purongo mo pa lo toho. Enia mo opoia mo tavera jea, ale mo ūromřomia mara, ‘Na levosahia vara a ūrule natuku i sivo, la pa oolo lo hinia.’

⁷ Pani pa la tamlohi sasati atu la lo vereverera isara hasera lara, ‘Natuna tataholo nakerihi mo lo mai, vara ūra vilimateia, ūra pa lavi na koruna tari!’ ⁸ La tauria, ale la vilimateia moiso la pulahia mo sahe na jingoiman rope atu.”

⁹ Iesu mo usia isara mara, “Ka ūrom vara tamlohi tavera atu i pa vai na sava? A verea tataholo isamim, i pa sinai i vilimateira enira mo isoiso, ale i pa sile isa atu isana tamlohi tinapua vara la mele pakaia. ¹⁰ Varařuhu, ka sopo lo evi hinau nike na Retiulia?

‘Vatu atu tamlohi voro ima la lo tipahia, enia mo mai tapulo pulo vatuvata ima.

¹¹ Hinau atu Moli God hasena mo vaia. Kama hitea vara mo ūruhу jea.’”

Psa 118.22-23

¹² Tamlohi tatavera non Jew la opoia vara la taurilatia matan la hitevosahia vara Iesu mo lo vere titileu atu matan vara i pisuhira, pani la matahu vara la tauria matan la vao atu. Matan haratu, la malue atu, ale la rovo.

Ha Voli Na Takis (Mt 22.15-22; Lk 20.20-26)

¹³ Ale la ūrule na Pharisee hai peresi na tamlohi hai non Herod Antipas la vano isan Iesu matan vara la vahitea vara i ori hin te nona retireti. ¹⁴ Ale la mai isana la verea lara, “Tija, kama levosahia vara engko ko lo vararuhu, ale ko sopo tametame na ūromřomi nona tamlohi, matan ko sopo

usuri na kilakilau nona tamlohi isana tamlohi aulu, pani engko ko lo vujangi na malele tataholo non God usuri na retivarařuhu.

Nomam retiusia isam nahai, mo tataholo vara tavytavuin Israel la voli na takis isana supe nona mara Rome teni mo vono? Ra pa silea teni i toho?” ¹⁵ Pani Iesu mo levosahi na nora tapnetano, ale mo verea isara mara, “Mata sava ka lo vahiteau sohena? Ha lavi te selen hatea i mai isaku a hitea.” ¹⁶ Ale la lavi matea la silea isana moiso mo usia isara mara, “Niniun hare nahai, ale hijan hare nahai la ulia hin selen nike?”

Lara, “Nahon supe nona mara Rome.”

¹⁷ Ale Iesu mo verea isara mara, “Ale ha sile na hinau non supe nona mara Rome isan supe nona mara Rome, ale hinau non God isan God.”

Ale lara la rongo mo ūramira sohena, la marurahi tavera hinia.

Vujangi Mata Sauteterahi Na Mateia (Mt 22.23-33; Lk 20.27-40)

¹⁸ Ale Sadducee hai la mai isan Iesu, enira vao matea na Jew sei la sopo rasua vara God i pa sauteterahi na tamlohi na mateia. La mai isana la usia na retiusia matea lara, ¹⁹ “Tija, Moses mo ulia mara vara tamlohi lahi matea mo mate, pani narouna mo sopo vasusu, tasina i pa lavi na malepuna i mai narouna matan vara hařai atu i eři lavi te natun tavaina. *Deut 25.5*

²⁰ Tuai, vorai mo limaravrua la lo toho. Ale vora tiroma mo lavi na hařai matea, pani mo sopo lo te natuna, ale mo mate.

²¹ Vora usuria mo pete lavi hařai atu, pani enia sohena mo mate, mo sopo te natuna. Hatolura mo pete lavia, ale mo mate mo sopo te natuna. ²² Mo sohena mo tikeli na vora hitahu, ale enira mo isoiso la mate. Hařai atu sohena mo mate, pani mo sopo te natuna. ²³ O to vere kamam hinia vara hařai atu i pa naroun hare na pongi sauteterahi matan enia mo lahi isan la vorai atu enira mo isoiso.”

²⁴ Iesu mo verea isara mara, “Nomim ūromřomi mo sopo tataholo, matan ka sopo levosahi mamahuni na Retitapu teni na suihan God! ²⁵ Matan hin rani atu tamlohi la pa mele turu na mateia, la pa sopo mele lahi, pani la pa sohena angelo na tuka.

²⁶ Pani hin vujangi sei mata sauteterahi na mateia, korong ka sopo lo evia matan vipahai rihirihi atu sei Moses mo hite na hapu mo lo hani hinia? God mo verea isan Moses mara, ‘Enau God non Abraham, God non Isaac, ale God non Jacob.’ *Exo 3.6*

²⁷ God enia mo sopo God nona tamlohi mate, pani nona tamlohi mauri, matan isana, tamlohi tari la lo mauri. Kamim ka jallo mo tavera.”

Retileu Atu Mo Jieu Na Tinapua
(Mt 22.34-40; Lk 10.25-28)

²⁸ Ale hin rani atu tamlohi vujangi mata leu matea mo mai mo lo tapurongo na vauriuri nona Sadducee, ale mo rongo sohena sava Iesu mo ūaramira sei mo ūruhu jea, ale mo usi Iesu hinia mara, “Sava leu natu mo aulu mo jeu na leu tari?”

²⁹ Iesu mo ūramia mara, “Leu atu mo aulu mo jeu na leu tari enia vara, ‘Israel, ha tapurongo! Moli nōa God, enia Moli matelete. ³⁰ O pa opoi Moli nom God vevuhi na mapum, na maurim, na ūromim, peresi na suiham.’ *Deut 6.4-5*

³¹ Ale haruana enia nahai, ‘O opoi na tahisam sohen ko lo opoiho hasem.’ Moiso mo sopo mele te leu tinapua i aulu i jeu la leu sei mo rua.” *Lev 19.18*

³² Tamlohi vujangi mata leu atu mo verea mara, “Tija, ko vararūhu vara God enia matelete purongo, ale mo sopo mele te tinapua. ³³ Ale mo tataholo vara ūra opoi vevuhia na mapūa, na ūromīa, na suihāa, ale vara ūra opoia na tahisāa sohena ūra lo opoirāa haserā. La leu akerihi la aulu la jeu na maji tari mata malamalai ūra lo sulira na nōa silesilea isan God usuri na leu.” *Hos 6.6*

³⁴ Iesu mara mo hitevosahi na lelevosahi non tamlohi akerihi, mo verea isana mara, “Engko ko lo toho mariviti moiso hin mauri atu God mo aulu hinia.”

Ale hitahun haratu, mo sopo te vonara hatea i mele opoia vara i usia hin te retiusia hatea.

Kristo Enia Natun God
(Mt 22.41-46; Lk 20.41-44)

³⁵ Na rani tinapua Iesu mo lo vujangi na tamlohi na lolo rope Temple, mo lo verea isara mara, “Sohena sava natu, tamlohi vujangi mata leu la lo verea vara Kristo enia

natun Supe David? ³⁶ Na lo usia sohena matan tuai David mo retireti na suihan Tanume Tapu mo verea mara, ‘Moli God mo verea isan noku Moli mara: O sakele na matuaku, o lo sasaovi i mai i tikeli a tau na nom meresahi na ruhuruhu palom.’ *Psa 110.1*

³⁷ David sohena mo tovia ‘Moli’. Vara mo sohen haratu, sohena sava natu, Kristo enia natun David?”

Ale vao tavera atu la avulahi tavera vara la lo tapurongo na nona vujangi.

Vujangi Mata Posposi Aulu
(Mt 23.1-36; Lk 20.45-47)

³⁸ Iesu mo lo vujangira mara, “Ha lo kilau na tamlohi vujangi mata leu. Matan la lo opoia vara tamlohi la hitera la lo hahau peresi na nora ruru peravu, ale la opoia vara tamlohi la lo popovitoho isara na jara maket. ³⁹ La opoia vara la lo sakele nahonaho tarea na lolo ima lotu teni na rani matan te hanhani tavera. ⁴⁰ Ale la lo haluhalu na hārai malepu mata voli nārihi na imara na volina makomona purongo, pani la lo tatavu horo na nora posposi sasati na usiusi peravu na naho tamlohi. Matan hinau atu, nora talai i pa mele tavera jea.”

Malepu Tilavono Matea
(Lk 21.1-4)

⁴¹ Iesu mo lo sakele mariviti na jara sile-silea na Temple. Ale mo lo kilau na vao tamlohi la tau na nora mania. Tamlohi tavytav matuvana la tau na mania tavera hinia. ⁴² Mo sopo tuai mo hite na malepu tilavono matea mo mai, ale mo tau na nona mania, selen mo rua purongo. ⁴³ Iesu mo tovi na nona tamlohi usuri la mai isana mara, “Vararūhu na verea isamim, malepu tilavono nike, mo taua mo jeu na tamlohi tinapua tari sei la lo tau na nora silesilea nike. ⁴⁴ Matan la haratu sei la silea mo tavera pani la lelevosahi vara nora tavytav tavera mo pa lo toho. Pani malepu tilavono nike mo sile vevuhi na sava mo lo toho mata maurina.”

¹ Iesu mo pa lo malue na Temple, ale nona tamlohi usuri matea mo verea isana mara, “Tija, o to kilau vano sevano hin la yatu tavera sevano la voro na roro ima hinira, ale o to kilau la ima tatavera sevano!”

² Ale Iesu mo verea isana mara, “Ko lo hite ima tavera nike? I pa sopo te yatu hatea i pa lo toho aulu na yatu tinapua vara la pa sopo atu jovjovira.”

*Rani Rilangi La Pa Mai
(Mt 24.3-14; Lk 21.7-19)*

³ Ale hitahu, Iesu mara mo lo sakele na pahisa Vuti talu Olive mo lo kilau sivo na Temple, Peter, James, John enia Andrew la mai ūrō hasera, ale la usia lara, ⁴“O to vere kamam hinia, la hinau sei la pa masese pangisa? Ale sava matamata atu i pa mai tiroma vara kama pa levosahi mamahunia vara i sopo tuai natu la hinau tari natula pa masese?”

⁵ Iesu mo verea isara mara, “Ha lo kilau i ūru! Mo sopo ūru vara tea i halu kamim.

⁶ Matuvana la pa mai na hijaku. La pa verea vara, ‘Enau natu, tamlohi atu!’ ale la pa halu na tamlohi matuvana. ⁷ Ale vara ka rongo te vuro teni sorasora mata vuro, ūromim i sopo kaka hin la hinau sei la pa mai tiroma, pani mo sopo isoisona. ⁸ Mara jara tavera tinatinapu la pa lo meresahi hinira, ale supe matea i pa meresahi na supe tinapua. Ale mihi i pa hisuhi na tatua jara na varama. Tamlohi la pa marohati na marua. Pani la hinau sei enira tapulona purongo. La hinau tari sei la sohena tapulo rongohaji na epe hařai vara i lavilavi. ⁹ Ha lo kilau! Tamlohi la pa tauri kamim la pa ari kamim. La pa hamaji kamim na ima lotu. Ha pa turu na naho tamlohi aulu nona gavman peresi na naho supe matak. Enia i pa masapamim matea vara ha eři verea isara vara enau hare. ¹⁰ Retiruhu atu la pa retivujavujangia na jara tari na varama tiroma, moiso isoisona i pa mai.

¹¹ Ale vara la lavi kamim la vai kamim ka turu na nahora vara la vahite kamim, ha sopo ūromkaka na sava ha pa verea, pani ha pa vere na sava God i pa silea isamim, matan i pa sopo kamim ka lo retireti pani Tanumen God hin kamim.

¹² Vorai matea i pa turuposi hin voraina vara i mate. Tama i pa turuposi

hin natuna. Natuvarihi la pa turuposi na tamara peresi na tinara la pa vaira tamlohi la vilimateira. ¹³ Tamlohi tari la pa ūru hin kamim matak. Pani haratu mo turu ūlangi mo tikeli na isoisona i pa juri.

*Hina Lumiha Matea Na Lolo Temple
(Mt 24.15-21; Lk 21.20-24)*

¹⁴ Rani matea i pa mai ha pa hite hina lumiha atu God mo lo ūru hinia i pa turu na jara tapu na lolo Temple. *Dan 9.27; 11.31; 12.11*

Hare mo evi harihi, i lo lelevosahi na ūramina! Hin rani atu, i pa ūru vara tamlohi hin Judea la rovo la sahe na yutivutu.

¹⁵ I pa ūru vara haratu mo lo toho na pusa ima, i sopo mele unu na lolo ima vara i lavi te hinau hinia, ¹⁶ ale i pa ūru vara haratu mo lo voko na isana i sopo mele posi i sivo mata i lavi na nona ruru na lepa. *Lk 17.31*

¹⁷ Hin rani atu, i pa ūlangi jea isana hařai mo tau natuna, teni te hařai mo lo vasusui te natuna. ¹⁸ Ha usiusi vara rani atu i pa sopo masese na taro hamariri.

¹⁹ Rani sati tavera atu i pa jeu na rani sati tamlohi la lo hitera mo tapulo hin rani atu God mo vai na varama mo tikeli nake i pa sopo mele te rani sasati i sohena hin te rani. *Dan 12.1; Rev 7.14*

²⁰ Vara Moli God i sopo vai rani ūlangi atu i vejuveju, i pa sopo tea i eři juri, pani mata nona tapuhi, la haratu sei mo viřonira i pa vai rani atu i vejuveju.

²¹ Hin rani atu, vara tea mo verea isamim vara, ‘Ha kilau nike, Křisto nahai! Teni tea i pa verea vara, ‘Ko hitea, enia nahai!’ Pani ha sopo rasura. ²² Matan křisto haluhalu peresi na tamlohi tapu haluhalu la pa mai. La pa vai na matamata tatavera. La pa vahite la tamlohi atu God mo viřonira moiso vara la tinařihi na nora rasua. ²³ Ha lo kilau! Enau na lo vere kamim hinia tiroma moiso.

*Natun Tamlohi I Pa Mai
(Mt 24.29-31; Lk 21.25-28)*

²⁴ Moiso hitahu hin rani sasati atu, ‘Alo i pa ūrōha, ale vitu i pa sopo mele sile na merana.’

Isa 13.10

²⁵ ‘Vitusarasara la pa jovjovi na masapa, ale suiha tari na masapa la pa hisu.’

Isa 34.4; Joel 2.10

²⁶ Hitahuna natu, tamlohi tari la pa hite na Natun Tamlohi mo lo mai na telangi na suiha tavera peresi na merana tavera.

Dan 7.13

²⁷ Natun Tamlohi i pa ūrule na nona angelo la vano ūalihi na varama vara la takonahi na nona tapuhi na jara tari na varama, ale aulu na masapa.

*Tea Mo Sopo Levosahia
(Mt 24.32-35; Lk 21.29-33)*

²⁸ Ha levosahi na posi vipahai fig sei julina la mai la malum, ale mo tivu, ka levosahia vara rani mata hulihuli mo pala.

²⁹ I pa sohena na pongi hitahu vara ka hite na hinau tari sei na lo vere kamim hinira moiso. Ha pa levosahia vara i sopo tuai Natun Tamlohi i pa pala. ³⁰ Varařuhu na verea isamim, pina akerihi nake i pa sopo lo mate vevuhi vavano la hinau tari akerihi la pa masese. ³¹ Tuka enia varama la pa tihai, pani noku reti la pa toho jejeu.

*Ha Tatamahu Tarea
(Mt 24.36-44)*

³² Mo sopo tea i levosahi rani tataholo atu teni matan alo matana, angelo na tuka sohena, la sopo levosahia teni Natun Tamlohi. God Tama hasena mo levosahia. ³³ Ha lo kilau! Ha sopo juruvi! Matan ka sopo levosahia vara pongi atu i pa pala pangisa!

³⁴ I pa sohena tamlohi matea mo vano na nona hahau matea na jara tinapua matea, ale mo tau na imana na lima nona volutusi, ale la lo vai na nora vavahinai hatehateahi hinia. Ale mo vere haratu mo lo kilau na pelati mara, ‘O lo kilau tarea mata noku mele pala!’ ³⁵ Matan haratu, ha lo kilau! Matan ka sopo levosahia vara tamlohin ima sei i pa mele pala pangisa, i eři pala na ravravi teni na livuha pongi, teni na toa tarere teni na ūalavuho, ha lo kilau! ³⁶ Mo sopo ūruhu vara ha hutu kamim na nona pala, ale i vilei kamim ka lo juruvi. ³⁷ Sava na vere kamim hinia, na verea isamim kamim isoiso, ha lo kilau i ūruhu mata nona rani pala!’

14

*Jew La Aleale Malele Mata Taurilatia Hinia
(Mt 26.1-5; Lk 22.1-2; Jn 11.45-53)*

¹ Rani mo rua mo lo toho vara i tikeli na pongi rani Passover peresi rani atu la lo hani na pereti hinia sei mo sopo te isi hinia. Přis aulu peresi na tamlohi vujangi mata leu la lo aleale malele vara la pa tauri luhu Iesu hinia vara la vilimateia. *Exo 12.1-27*

² Matan lara, “Ra sopo eři vaia hin rani tavera sei matan tamlohi la pa levutirā.”

*Harai Matea Mo Rengi Na Hasori Hin Iesu
(Mt 26.6-13; Jn 12.1-8)*

³ Iesu mo pa lo toho Bethany na iman Simon, tuai enia tamlohi lepros matea, ale lara la pa lo hanhani na tep, harai matea mo sinai isana, mo lavi na potele hasori matea la vaia na lepa hijana alabaster, hasori ūruhu mo lo toho na lolona la tovia nard ponana mo ūruhu ale volina mo aulu jea. Harai atu mo lavia mo kosahi na ūralo potelena, ale mo rengia na patun Iesu.

⁴ Tamlohi hai la lo toho atu la rongo mo sati matana, la lo verea isara hasera lara, “Mata sava mo rengi komokomoi hasori sei sohena? ⁵ Volina mo sohena voli voko nona tamlohi matea mata tauni matea! Vara i hařehia i pa eři sile na volina isana tilavono.” La savurahi harai atu.

⁶ Pani Iesu mo verea mara, “Eh, ha tinařihi harai sei. Mo lo vai na hina ūruhu matea isaku. ⁷ Tamlohi tilavono la pa lo toho tarea isamim, ale vara ka opoia ha pa eři tuenira. Pani enau, a pa sopo toho tarea isamim. ⁸ Harai nike mo vai na sava i eři vaia isaku. Mo rengi na hasori na epeku mo vaia mo tatamahu mata noku tavuni mata noku mateia. ⁹ Varařuhu na verea isamim, sava hinau harai nike mo vaia isaku la pa sorahia na jara tari na varama mata ūromřomia vara la vere na Retiřuhu matakū.”

*Judas Mo Turuposi Hin Iesu
(Mt 26.14-16; Lk 22.3-6)*

¹⁰ Judas Iscariot, vonan la tupu sangavulu ūromana mo rua atu matea, mo vano isana přis aulu nona tavytavuin Israel, matan vara i tau Iesu na limara. ¹¹ Přis aulu la avulahi jea matana, ale la retitauhi vara la pa voli Judas matana. Judas mo tapulo aleale masapa vara i pa sile Iesu i vano isara hinia.

Hanhani Passover
(Mt 26.17-25; Lk 22.7-14, 21-23; Jn 13.21-30)

¹² Na rani tiroma mata pereti sei mo sopo te isi hinia sei la lo sile na natu sipsip mata Passover sohen malamalai hinia, tamlohi usuri non Iesu la verea isana lara, “Eh! Ko opoia vara kama pa tatamahu mata hani na Passover epu?”

¹³ Mo ūrule na nona tamlohi usuri tupra rua, mo verea isara mara, “Ha vano ha unu Jerusalem, ale ha pa hite na tamlohi matea mo lo soloti na jara wai tavera matea, ale ha usuria. ¹⁴ Ale sava ima i pa unu hinia, ha vere na tamlohin ima atu vara, ‘Tija mo usia mara, sava jara ko tatamahunia moiso matakua vara a pa hani na Passover hinia peresi na noku tamlohi?’ ¹⁵ I pa vujangi kamim na jara matea mo lo toho aulu hin ima atu. Mo tatamahuni na hinau tari moiso. Ha tatamahuni na hařa hinau ea.” ¹⁶ La tamlohi usuri tupra rua atu la malue la sivo hin taon tavera atu, ale hinau tari mo masese sohena Iesu mo verea, ale la tatamahuni na hanhani mata Passover ea.

Hare I Pa Turuposi

¹⁷ Ale mara mo ravravi, Iesu mo sahe hin ima atu peresi la tupu sangavulu ūromana mo rua atu. ¹⁸ La sakele ūralihi na tep la lo hanhani, ale Iesu mara, “Varařuhu, vonamim matea i pa turuposi hiniau, enia vonamim matea sei mo lo hanhani peresiau nakerihi.” ^{Psa 41.9}

¹⁹ Nona tamlohi la tapulo rongo mo sati, ale enira hatehateahi la lo usia isana lara, “Hare, enau teni mo vono?”

²⁰ Iesu mo verea mara, “Vonamim matea la tupu sangavulu ūromana mo rua, ale enia mo lo seseri peresiau nakerihi. ²¹ Matan Natun Tamlohi i pa vano sohena Retiulia mo verea moiso matana. Pani rani sasati tavera isan tamlohi atu sei mo turuposi hiniau. I pa mele ūruhu jea vara i sopo vora.”

Retitauhi Paro
(Mt 26.26-30; Lk 22.14-23; 1Co 11.23-25)

²² La pa lo hanhani, Iesu mo lavi na pereti, mo vere meje matana, mo topea mo silea isana nona tamlohi ale mara, “Ha lavia. Harihi enia epeku!”

²³ Mo mele lavi na paniken waen, mo vere meje isan God matana, moiso mo silea isara, ale enira isoiso la inua hinia. ²⁴ Moiso, mo verea isara mara, “Harihi enia ūraeku sei i pa roro mata tamlohi matuvana matan vara i vai na retitauhi paro non God peresi na nona tamlohi i turu. *Jer 31.31-34*

²⁵ Varařuhu na verea isamim, a pa sopo eri mele inu te waen i tikeli rani atu a pa mele inua peresi kamim hin mauri atu God mo aulu hinia.” ²⁶ La lalavete na vete matea moiso, la malue la sahe na Vuti talu Olive.

Peter I Pa Vunvuni Iesu
(Mt 26.31-35; Lk 22.31-34; Jn 13.36-38)

²⁷ Na malele Iesu mo verea isara mara, “Kamim mo isoiso ha pa rovo hiniau, matan Retiulia non God mo verea mara, ‘A pa vili na tavui sipsip.’

Sipsip la pa rovo. ^{Zec 13.7}

²⁸ Pani hitahu vara na mele turu na mateia, a pa vano tiroma hin kamim Galilee.”

²⁹ Peter mo verea isana mara, “Hina purongo vara enira mo isoiso la rovo hinihi, enau i vono!”

³⁰ Iesu mo verea isan Peter mara, “Varařuhu na verea isam, o pa vunvuniau vaha tolu nohorihi na vutepongi, moiso toa i pa tarere vaha rua.”

³¹ Pani Peter mo reti ūrlangi mara, “Vara a pa mate peresihi, i pa sohena! A pa sopo eri vunvunihi!” Enira mo isoiso la verea sohena.

Mo Usiusi Gethsemane
(Mt 26.36-46; Lk 22.39-46)

³² La sahe na jara la tovia Gethsemane, Iesu mo verea isana nona tamlohi usuri mara, “Ha lo sakele nike tako. Enau a sahe a usiusi.” ³³ Mo lavi Peter, James, John la vano peresia, ale mo tapulo rongo mo sati tavera jea, ale ūromina mo sopo sakele.

³⁴ Ale mo verea isara mara, “Romiku mo jovi tavera vara a mate matana. Ha lo toho peresiau, ha sopo juruvi!”

³⁵ Mo mele vano makomona, mo jovi sivo na lepa mo usiusi isan God mara vara te malele tinapua, i pa sopo vano hin nona rani ūrlangi nike. ³⁶ Ale Iesu mara, “Tata! Tamaku! Ko eri vai na hinau tari. O lavi nařihi na noku rani ūrlangi nike, pani o

sopo vaia sohena masaloku, pani sohena masalom.”

³⁷ Mo mele sinai mo hite Peter la juruvi ūromalihi. Mo verea isan Peter mara, “Simon, varauhu ko lo juruvi? O sopo eři kilau peresiau matan te matan alo hatelete purongo? ³⁸ Ha lo kilau! Ha lo usiusi, matan vara ha pa sopo jovi na vahite. Tanumemim mo opoia vara i oloolo, pani masalomim mo ūrilangi jea.”

³⁹ Moiso, mo mele sahe vara i usiusi, mo mele vere la nona reti atu tiroma. ⁴⁰ Mo mele sinai, mo mele vileia vara la mele ju-ruvi moiso, ale matan matara mo puhoni, la sopo eři ūramaria.

⁴¹ Iesu mara mo mele mai hatoluna, mo verea isara mara, “Varauhu ka pa lo ju-ruvi, ka pa lo mapu? Mo isoiso natu, la tau Natun Tamlohi na lima tamlohi hehe natu. ⁴² Ha turu! Ra vano! Ka hitea, noku meresahi mo lo mai moiso.”

*La Taurilati Iesu
(Mt 26.47-56; Lk 22.47-53; Jn 18.1-11)*

⁴³ Iesu mo pa lo retireti Judas vonan la tupu sangavulu ūromana mo rua atu matea mo pala isara peresi na vao tavera matea, la mai la lo lavi na sita mata valum peresi na nahnal. Přis aulu peresi na tamlohi vujangi mata leu peresi na vajiahara natu la ūrulera la mai isan Iesu. ⁴⁴ Ale tamlohi atu mo lo turuposi hinia mo verera na mata-mata matea isara moiso mara, “Tamlohi atu a pa pungosia, enia tamlohi atu natu. Ha tauria, ha lavia i vano.”

⁴⁵ Judas mo kakau jara atu, mo vano isan Iesu mo verea mara, “Tija.” Ale mo pungosia. ⁴⁶ Ale la tamlohi atu la mai la tauri Iesu. ⁴⁷ Pani vonara matea sei mo lo turu atu mo lavi na nona sita vuro mo langai nařihi na pero volitusi non přis aulu.

⁴⁸ Iesu mo verea isara mara, “Ka mai peresi na sita peresi na nahnal sohena vara enau tamlohi vili tamlohi mata vayanaho matea? ⁴⁹ Tarea na lo toho peresi kamim na lolo Temple na lo vujangi, pani ka sopo tauriau. Pani i pa sohen harihi matan vara Retiulia i pa masese matak.”

⁵⁰ Nona tamlohi la malue isana, ale la rovo. ⁵¹ Uluvou matea mo lo usuri Iesu, enia mo lavolavo purongo, ale la tau-ria, ⁵² pani la lo taurilati na nona ruru

purongo, ale mo tinar̄ihira mo rovo mala-mala.

Iman Přis Aulu

(Mt 26.57-68; Lk 22.54-55, 63-71; Jn 18.13-14, 19-24)

⁵³ La lavi Iesu mo vano na iman přis aulu. Ale moli nona přis tari peresi na vajiahara peresi na tamlohi vujangi mata leu la matavuhi jara matea. ⁵⁴ Ale Peter mo lo usuri Iesu asau makomona mo sivo vahatea na lolo ropen iman přis aulu atu. Mo lo sakele peresi la tamlohi kilau matan ima atu, la lo marijo na hapu.

⁵⁵ Moli nona přis peresi la tamlohi tari mata council Aulu, la lo aleale tamlohi vara i vereuli te hinau hin Iesu matan vara la pa vilimateia matana, pani la sopo vilei tea. ⁵⁶ Tamlohi matuvana la vai na retihalu hinia, pani nora retihalu la sopo matea.

⁵⁷ Hai la turu sahe la retihalu hinia lara,

⁵⁸ “Kama rongoa mo verea mara, ‘Enau a pa viliroiroi Temple nike sei tamlohi la vaia na limara, moiso na rani i tolu purongo a pa mele voroa na hina tina-pua sei tamlohi la sopo voroa na limara.’” ⁵⁹ Pani mo sohen tiroma, nora ūromřomi mo sopo matea.

⁶⁰ Moiso nora přis aulu mo turu na livuhara, mo verea isan Iesu mara, “Mo sopo te nom retireti vara o verea matan la retireti nike? Sava nahai, la tamlohi nike la lo vereulia matam?” ⁶¹ Pani Iesu mo sopo langati na jingona, ale mo sopo ūramaria. Přis aulu atu mo mele usia vahatea mara, “Engko natu Křisto atu, Natun God teni mo vono?”

⁶² Iesu mo ūramaria mara, “Enau natu, ale ha pa hite Natun Tamlohi i pa sakele na tavalu liman God na jara mata suiha, ale ha pa hite Natun Tamlohi i mele mai na telangi matan tuka.”

Dan 7.13

⁶³ Ale přis aulu mara mo rongoa sohena, mo hasena ūrari na nona ruru, ale mo verea mara, “Mata sava ūra pa lo mele aleale retireti vara ūra pa tuvaia hinia? Enia hasena mo verea! ⁶⁴ Ka pete rongo sohena sava mo verea moiso vara enia God. Ha pa vai na sava?” Enira mo isoiso la verea lara i mate.

⁶⁵ Hai la tapulo litovia, hai la tatavuhoro na nahona la tutuhia, ale la usia isana lara, “Vara engko přovet matea, o to verea vara

hare natu mo tutuhiho?" Ale tamlohi kilau sohena lara la lavia mo vano la tutuhia.

*Peter Mo Vunvuni Iesu
(Mt 26.69-75; Lk 22.56-62; Jn 18.15-18, 25-27)*

⁶⁶ Hinau atu mo lo masese, Peter mo lo toho atano na lolo rope matan ima atu na jingoima. Ale volitusi hařai matea non přis aulu mo mai, ⁶⁷ mara mo hite Peter mo lo marijo, mo lo kilau mamahunia, ale mara, "Engko vonara matea ko lo usuri Iesu mara Nazareth!"

⁶⁸ Pani Peter mo vunvunia, ale mara, "Na sopo levosahia teni a levosahi na sava ko lo verea." Mo malue atu mo vano mo turu na mataruan rope atu, ale toa mo tarere.

⁶⁹ Pa hařai atu mo mele hite Peter mo lo turu atu ale mo verea isana tamlohi mara, "Tamlohi aturihi enia vonara matea!"

⁷⁰ Peter mo mele vunvunia.

Ale tamlohi hai la lo turu atu la verea isan Peter lara, "Varařuhu engko vonara matea matan engko mara Galilee!"

⁷¹ Pani Peter mo tapulo lesati hinia hasena, mo varakali ale mo verea mara, "Na sopo levosahi tamlohi nike ka lo verea." ⁷² Ale vahatea purongo, toa mo tarere haruana. Peter mo mele řomřomi na reti non Iesu sei mara, "Engko o pa vunvuniau vaha tolu, moiso toa i pa tarere vaha rua." Moiso řomin Peter mo jovi tavera, ale mo tangi tavera.

15

*Iesu Enia Pilate
(Mt 27.1-2, 11-14; Lk 23.1-5; Jn 18.28-38)*

¹ Na řalavuho jea, moli mata přis peresi na vajiahara tolu na tamlohi vujangi mata leu peresi na tamlohi mata council tari la matavyhi vara la vai te řomřomi. La lasi Iesu la lavia mo vano la taua na liman Pilate, tamlohi aulu nona gavman matan Rome.

² Ale Pilate mo usia mara, "Engko Supe nona Jew?"

Iesu mo verea mara, "He'e, mo sohen ko verea."

³ Moli nona přis la tuvaia na retireti matuvana. ⁴ Pilate mo mele usi Iesu vahatea mara, "Mata sava ko sopo talaira? Ko hitea, la lo tuvaiho na hina sati matuvana!"

⁵ Pani Iesu mo sopo mele řaramia, ale Pilate mo mařurahi jea.

*Pilate Mo Ari Iesu
(Mt 27.15-26; Lk 23.13-25; Jn 18.39--19.16)*

⁶ Tarea na hanhani tavera mata Passover, Pilate mo lo teri na tamlohi matea na ima řilangi sei enira la opoia. ⁷ Vonara matea hin la haratu la lo toho na ima řilangi hin rani atu, hijana Barabbas. Enia mo lo toho atu matan mo vilimateia na tamlohi matea na rani la turu mata valum mata jarara. ⁸ Vao atu la mai isan Pilate ale la usia vara i mele vaia sohen tarea mo lo vaia isara. ⁹ Ale Pilate mo usia isara mara, "Ka opoia vara a tinařihi Supe nona Jew nike teni mo vono?" ¹⁰ Matan Pilate mo levosahia vara la pa lavi Iesu mo mai isana mata nora mereimerei purongo. ¹¹ Pani moli nona přis la haluhalu na tamlohi mata usi Pilate vara i teri Barabbas na jaran Iesu. ¹² Ale Pilate mo mele usia isara vahatea mara, "V ра i sohena, a pa vai na sava hin tamlohi nike sei ka lo tovia vara enia Supe nona Jew?"

¹³ La mele ngara lara, "O vosaea na talopeilopei!"

¹⁴ Pilate mo mele usira hinia mara, "Sava hinau natu mo vaia mo sati?"

Pani la mele ngara mo řilangi jea lara, "O vosaea na talopeilopei!"

¹⁵ Ale matan Pilate mo opoia vara i vai vao atu i avulahi, mo teri Barabbas sohen la usia. Ale mo retileu vara la rupi Iesu, moiso mo taua na lima tamlohi vuro nona mara Rome vara la vosaea na talopeilopei.

*La Vailejeji Iesu
(Mt 27.27-30; Jn 19.2-3)*

¹⁶ La tamlohi vuro atu la tiroma hin Iesu la unu na lolo nora patu ima mata vuro non Pilate. La tovi vevuhi na vao tamlohi vuro la mai na jara matea. ¹⁷ La mai la rua na ruru perpel matea, ale la viriviri na asingařngāřiha matea sohena rongorongo nona supe, ale la taua na patuna. ¹⁸ La tapulo salute isana la lo verea lara, "Tamlohi tavera, engko Supe nona Jew!" ¹⁹ La lo tamaji na patuna na apo matea. La lo litovia, ale la lo popovitoho isana sohena vara la lo lotua. ²⁰ Lara la kerehia moiso la mele lavi nařihi pa ruru perpel atu isana, ale la mele rurua na nona ruru. Ale la tiroma hinia la vano vara la vosaea na talopeilopei.

*Simon Mara Cyrene Matea Mo Tueni
Iesu*

²¹ Ale mara Cyrene matea, hijana Simon, enia tamana Alexander enia Rufus, mo pa lo tai purongo asau ūrove na jara vutivuti mo lo sinai na malele, ale la ngurunguru hinia vara i soloti na talopeilopei non Iesu.

La Vosae Iesu Na Talopeilopei

(Mt 27.31-44; Lk 23.27-43; Jn 19.17-27)

²² La lavi Iesu mo sahe hin jara atu sei la tovia 'Golgotha', ūramin hija sei enia 'Jara Sui Patu Tamlohi'. ²³ La vaihitea vara la sile na waen la hoihoia peresi na myrrh, pani mo ūrohu hinia. ²⁴ La vosae Iesu na talopeilopei, moiso la tamlohi vuro atu la roro mata nona ruru na taes matan vara la vileia vara hare natu i pa lavi na sava nona ruru.

Psa 22.18

²⁵ Matan alo mo limaravati na ūralavuho natu la vosaea na talopeilopei hinia. ²⁶ La uli na reti matea mata nona aria na tavalu tapea matea la vosaea aulu na patuna mo vereea vara,

Supē Nona Jew

²⁷ La vosae na tamlohi vili na tamlohi mata vavanaho tupra rua na tavalun Iesu. Matea na matuana, ale matea na marauna. *Isa 53.12*

²⁸⁻²⁹ Tamlohi sei la lo hahau hin malele atu la lo tařa sahe la lo kerehia, ale la lo pulapulahi na patura, la lo vereea lara, "Ko vara, vara o pa vilijovjovi na Temple, ale o eři mele voroa rani i tolu? *Psa 22.7; 109.25*

³⁰ Vara mo sohena, o hasem juriho o sevuti hin talopeilopei sei!"

³¹ Moli nona přis peresi na tamlohi vu-jangi mata leu sohena la lo vaivaia isara hasera lara, "Mo lo juri na tamlohi tinapua, pani enia i sopo eři hase juria! ³² Vara engko Křisto, Supē non Israel, o sevuti na talopeilopei nakerihi matan vara kama pa hitea ale kama rasuho!" La tamlohi atu sei la vosaera na pahisan Iesu sohena, la lo kerehia.

Iesu Mo Mate

(Mt 27.45-56; Lk 23.44-49; Jn 19.28-30)

³³ Na livuha rani, ūrořha tavera mo jovi mo tavuni na jara tari, mo lo toho mo tikeli na matan alo mo tolu na ravravi.

³⁴ Na matan alo mo tolu, Iesu mo tangi na ulo tavera matea mara, "Eloe, eloe, lema sabatani?" Raramina reti sei enia 'Noku

God, noku God, mata sava ko posí na nahom isaku?"

Psa 22.1

³⁵ Tamlohi hai la lo turu atu lara lo rongoa, lara, "Ka hitea! Mo lo tovi Elijah!"

³⁶ Tamlohi matea mo maro mo vano mo lavi na tavalu ruru matea la ūrūnua na waen hohona mo pesia na apo matea, ale mo sohaia sahe isan Iesu vara i inua. Vonara matea mara, "Tako, ūra pa hitea vara Elijah i pa mai i lavi nařihia na talopeilopei i sivo atano teni i vono." *Psa 69.21*

³⁷ Iesu mo mele ulo tavera vahatea, ale maromarona mo isoiso. ³⁸ Ruru tavera atu mo lo toho horo na Jara Tapu atu na lolo Temple mo mařari hasena tavaluna mo rua, mo mařari mo tapulo aulu mo sivo atano. ³⁹ Moiso captain mata tamlohi vuro atu sei mo lo turu tatahola na nahon Iesu, mara mo hitea sohena sava mo mate mo vereea mara, "Varařuhu, tamlohi nike enia Natun God tatahola!"

⁴⁰ Hařai hai la lo turu asau makomona la lo kilau vano na talopeilopei. La hařai sei la tupu tolu, Mary Magdalene, Salome, Mary tinan uluvou sei James peresi Joses.

⁴¹ La hařai sei la lo usuri Iesu na rani mo lo toho Galilee, ale la lo kilaua. Vao hařai matuvana sohena, enira tolu natu la lo usuria la sinai Jerusalem.

Joseph Mo Tavunia

(Mt 27.57-61; Lk 23.50-56; Jn 19.38-42)

⁴² La hinau sei la masese na Friday ravravi, enia rani mata tatamahu mata nora Sabbath. ⁴³ Joseph mara Arimathea, enia tamlohi aulu matea mata nora council tavera, ale enia matea sei mo lo kilau toho matan mauri atu God mo aulu hinia vara i pala. Ale ūromina mo ūlangi mo mai mo turu na nahon Pilate mo usia vara i lavi na tarapen Iesu. ⁴⁴ Pilate mo rongoa vara Iesu mo mate vila, moiso mo mařurahi tavera matana. Pilate mo tovi na nona captain mata tamlohi vuro matea, mo usia mara, "Varařuhu, Iesu mo pete mate moiso?" ⁴⁵ Captain atu mo vere Pilate hinia mara varařuhu mo mate moiso. Pilate mo vereea isan Joseph mara i eři lavi na tarapen Iesu. ⁴⁶ Joseph mo vano mo voli na ruru lulu matea. Mo juri na tarapen Iesu aulu na talopeilopei mo sivo atano. Mo leputia na ruru. Mo lavi na tarapen Iesu

mo taua na papa vatu matea enia mo taia. Mo tai na pelatina vatu tavera matea vara mataruana.⁴⁷ Mary Magdalene enia Mary tinan Joses la hite jara atu la tau na tarapen Iesu ea.

16

Iesu Mo Mele Turu Na Mateia (Mt 28.1-8; Lk 24.1-12; Jn 20.1-10)

¹ Saturday na ravravi jea na isoison rani mapu atu, Mary Magdalene, Mary tinan James enia Salome, la vano la voli te hasori ūahu vara la pa vano la taua na tarapen Iesu vara i mele rani sahe. ² Sunday ūalavuho jea alo mo pa lo tapulo vele purongo, la vano hin papa vatu atu. ³ La pa lo vano la lo vereverea isara lara, “Hare i pa tueniā vara i kuresi nařihi vatu atu na mataruan papa atu?” ⁴ Ale lara la tāra sahe aulu, la hite vatu tavera atu la pete kuresi nařihia moiso. ⁵ La sahe la unu hin papa atu ale la hite na uluvou matea, mo ru na ruru lulu mo lo sakele na matuana, ale la hutura hinia. ⁶ Ale mo verea isara mara, “Ha sopo matahu! Ka lo ale Iesu mara Nazareth haratu sei la vosaea na talopeilopei? Mo turu na mateia moiso, enia mo sopo toho nike. Ha to hite na jara sei la taua hinia. ⁷ Pani ha vano ha verea isana nona tamlohi usuri peresi Peter, ha verera vara Iesu mo vano Galilee tiroma hin kamim moiso. Ha vano ha pa hitea ea sohen mo lo verea isamim tiroma moiso.”

⁸ La hařai atu lara la malue la rovo hin papa atu matan matahu mo sohonira ale la savaravara. La sopo vere te hinau isan tea matan la matahu.

e Tiroma Isoison Mark - (Mt 28.9-10; Jn 20.11-18)

Ale la vere vevuhi na hinau tari isan Peter peresi na tapalana. Hitahuna Iesu mo ūulerla la vano na varama, la vano Opae mo sivo mo tikeli Marino, la lavi nona Retiřuhu tapu mata juri sei mo lo sile na mauri tui sei i sopo eři tihai hin te rani. Amen.

e Harua Isoison Mark -

Mary Magdalene

⁹ Iesu mo mele turu na Sunday na ūalavuho jea, ale Mary Magdalene natu enia hařai tiroma mo hitea, enia natu Iesu

mo titiu nařihi na tanume sasati mo limaravrua isana.¹⁰ Hitahu Mary mo vano mo verea isana nona tamlohi usuri sei la lo rongo mo sati ale la lo tangisia.¹¹ Pani lara la rongoa vara Mary mo hite Iesu mo mele mauri, la sopo rasua.

Nona Tamlohi Mo Rua La Hite Iesu (Lk 24.13-35)

¹² Hitahun la hinau atu Iesu mo mele pala isana tupra rua sei la lo hahau mata jara tinapua matea, pani la sopo hitevosahia matan mo posi na nahona.¹³ Hitahuna lara la hitevosahia la mele hilu vilavila la sahe vara la verea isana tatuara, pani tea i sopo rasura.

Iesu Mo Turu Na Livuhara (Mt 28.16-20; Lk 24.36-49; Jn 20.19-23; Acts 1.6-8)

¹⁴ Hitahuna Iesu mo pala isan la tupu sangavulu ūromana matea atu lara la lo hanhani. Ale mo reti ūilangi isara matan mo sopo te nora rasua, ale mata ūromira mo ūilangi jea. Mo reti ūilangi sohena matan la sopo rasu la haratu sei la hitea vara mo mele mauri.

¹⁵ Ale mo verea isara mara, “Ha vano na jara tari na varama, ale ha vereuli na noku Retiřuhu isana tamlohi tari.¹⁶ Sava tamlohi mo rasua ale mo paptijo, God i pa juria, pani haratu mo sopo rasua, God i pa aria.¹⁷ God i pa sile la matamata tavera akerihi natu i usuri la haratu la rasuau: na hijaku la pa eři titiu nařihi na tanume sasati, ale la pa eři retireti na leo paro tinapua,¹⁸ ale la pa tauri na mata sasati jea na limara, ale vara la inu te wai mata vilimatei na tamlohi la pa sopo eři mate matana. La pa tau na limara na tamlohi rojua moiso ale nora rojua i tihai.”

Iesu Mo Sahe Aulu Na Tuka (Lk 24.50-53; Acts 1.9-11)

¹⁹ Iesu mara mo vere la hinau atu isara mo isoiso, God mo lavi nařihia mo sahe aulu na tuka, ale mo sakele na jara mata suiha na matuan God.²⁰ Ale nona tamlohi usuri la vano la retivujavujangi na jara hatehateahi. Moli Iesu mo lo tuenira na nora vavahinau, ale mo vujangia vara nora reti mo tai isana na matamata matuvana.

Retiruhu Hin Iesu Křisto Luke Mo Ulia Puku Nike

Opoia non God enia mata tamlohi tari! Iesu mo mai na varama matan enia Jujuri nona tamlohi tari. Vujangi hai o eři hitera hin puku nike purongo, te hinau sohen harihi Luke mo ulia: Mara Samaria matea (10.25–37), Sipsip mo jilio (15.1–7), Uluvou atu mo jilio (15.11–32). Luke mo vereulia vara Iesu mo lo toho na iman Zacchaeus (19.1–10), ale mo uli retitauhi atu sei Iesu mo lo silea isan tamlohi sasati atu na talopeilopei (23.39–43).

Luke mo vere na vavahinau non Tanume Tapu mo jeu na tinapua. Mo ulia mara Tanume Tapu mo lo toho peresi John Tamlohi Paptijo na rani mo vora (1.15), isan Mary (1.35), ale sohena sava Iesu mo usuria (4.1, 14, 18; 10.21), Iesu mo vujangia vara Tanumen God enia otori atu mo jeu na tinapua God i pa silea isana tamlohi (11.13).

Luke mo ulia vara Iesu mo lo řomřomi na tilavono, mo sile na Retiruhu non God isara (4.18; 7.22), la pa lavi na hina řuhuřuhu isana (6.20), God mo usi na tilavono na nona hanhani tavera (14.13, 21), tilavono atu Lazarus mo sahe na tuka peresi na angelo (16.20, 22), ale Iesu mo retileu vara nona tamlohi usuri la lo sile na mania isana tilavono (12.33).

Luke mo vereulia mata sava mo uli puku nike ale mara, “enau sohena na usuri mamahuni la hinau sei mo tapulo na tapulona, matan vara o pa eři levosahi mamahunia vara la hinau sei la vujangihio hinira moiso la vararuhu.” (1.3–4) Luke mo vujangia vara Iesu mo usiusi na rani mo opoi na tueni non God: hin rani atu mo paptijo (3.21), hin rani atu mo viřoni na nona tamlohi usuri (6.12), mo usiusi matan retiusia atu lara enia hare (9.18), hin rani atu mariviti i mate (23.34, 46), ale nona vujangi mata usiusi (11.5–9; 18.1–8, 9–14), ale vara nona tamlohi la pa sile na mania isana tilavono (12.33). Luke mo opoia vara tamlohi la levosahi mamahunia vara Iesu mo mele turu na mateia, mo ulia vara Iesu mo hani te maji hin rani atu matan enia

tamlohi matea mo sopo nunua tamlohi purongo (24.42–43).

Hin puku nike

1. Mata sava Luke mo uli puku nike (1.1–4)
2. Rani vora non Iesu, John tamlohi paptijo mo pala (1.5–2.52)
3. Retisohai non John tamlohi paptijo (3.1–20)
4. Paptijo peresi na vaihite non Iesu (3.21–4.13)
5. Vavahinau non Iesu Galilee (4.14–9.50)
6. Iesu mo malue Galilee mo sahe Jerusalem (9.51–19.27)
7. Isoiso wik non Iesu: Nona mateia (19.28–23.56)
8. Iesu mo mele mauri (24.1–12)
9. Iesu mo pala, mo sahe na tuka (24.13–53)

Reti Tiroma Non Luke

¹ Enau Luke, na uli reti nike isam tamlohi tavera Theophilus. Tamlohi matuvana la vaihitea vara la uli na sorasora mata sava mo masese isařa mo tikeli nake, ² sohen la sorasora atu řa lavia isan la haratu enira la hitea na matara, ale enira la volitusi mata reti non God mo tapulo na tapulona. ³ Ale matana, enau sohena, mo tataholo vara a uli na hinau tari sei la masese na tapulona mo sinai nake isam tamlohi tavera řuhuřuhu Theophilus, matan enau sohena na usuri mamahuni la hinau sei mo tapulo na tapulona, ⁴ matan vara o pa eři levosahi mamahunia vara la hinau sei la lo vujangihio hinira moiso la vararuhu.

Angelo Gabriel Mo Pala

⁵ Na rani non Herod supe non Judea, přis matea hijana Zechariah enia mo tai na vao přis non Abijah, ale narouna sohena, enia mahapin Aaron, hijana Elizabeth. ⁶ Ale la tupra rua sei maurira la tataholo mo řuhu na nahon God. La lo oloolo mamahu na nona retileu peresi na leu tari, ale tea i sopo eři tuvaira hin te hinau. ⁷ Pani mo sopo te natura matan Elizabeth mo aroaro, ale la vajiahmoiso.

⁸ Na rani matea, hinau matea mo masese isana hin rani atu mo lo voko peresi na nona vao přis na Temple non God. ⁹ Vao přis atu la viřonia usuri na nora posposi

mata vīoni sohen la lo vaia tarea vara i unu na Temple non Moli vara i suli na hasori ea. ¹⁰ Ale rani tataholo mata suli na hasori mo mai, vao tavera mata lotu la lo pulutahi mata usiusi na jingoima.

¹¹ Zechariah mo lo toho atu, ale angelo non Moli matea mo pala isana, mo turu na matua votavota mata suli na hasori. ¹² Zechariah mara mo hite angelo atu mo hutua, ale matahu tavera mo sohonia. ¹³ Pani angelo atu mo verea isana mara, "Zechariah, o sopo matahu! Nom usiusi God mo rongoa moiso, ale naroum Elizabeth i pa vasusui na natum lamane matea, ale o pa tau na hijana vara John. ¹⁴ Ale i pa vaiho o avulahi, o avulahi tavera jea, ale tamlohi matuvana sohena, la pa avulahi na nona rani vora, ¹⁵ matan God i pa silea na vavahinau matea mo aulu jea. I pa sopo inu na waen teni te wai ūilangi tinapua hin te rani, ale Tanume Tapu i pa mařivisia i tapulo na lolo pangen tinana. ¹⁶ Ale enia i pa posa na natun Israel matuvana la mele mai isan Moli nora God. ¹⁷ Ale enia i pa vano tiroma hin Moli hin suiha atu Tanumen God mo silea isan přovet Elijah, matan vara i posa na ūromřomi nona tama vara la ūromřomi na natura, ale la haratu la sopo oloolo hin God la usuri na posposi nona tamlohi tataholo, matan vara i vai na vao tamlohi matea la tatamahu matan Moli."

Mal 4.5

¹⁸ Ale Zechariah mo verea isan angelo atu mara, "Avei, sohena sava natu a pa eři levosahia vara i pa sohen ko lo verea? Matan enau na vajiahmoiso, ale taunin narouku mo jeu na rani mata nona tatape moiso."

¹⁹ Ale angelo atu mo ūramaria mara, "Enau Gabriel, haratu sei mo lo turu na nahon God, ale God mo ūruleau vara a sinai isam vara a vereho hin retiřuhu niike. ²⁰ Ale nakerihi, o pa mengo, o sopo eři vere te reti vavano i tikeli rani atu i masese matan ko sopo rasu na noku reti, sei la pa masese na ranira tataholo."

²¹ Ale vao tamlohi la lo saovi Zechariah na jingoima, ale la lo ūromřomia vara mo pa lo toma na lolo Temple. ²² Ale mara mo malue, mo sopo eři retireti isara, ale la hitevosahia vara God mo vujangia na hinau matea na lolo Temple, ale mo lo vai

na matamata nakonako isara, ale mo sopo eři retireti.

²³ Ale nona rani mata vavahinau mo isoiso, ale mo mele mule. ²⁴ Hitahun la rani atu, narouna Elizabeth mo tau natuna, ale mo luhu mata vitu mo lima mara, ²⁵ "Moli mo ūromřuhu isaku, mo lavi nařihi na noku mahanuhanu mata aroaro na tamlohi."

Retisohai Matan Iesu

²⁶ Elizabeth mo epe puhoni mata vitu mo limarave moiso, ale God mo ūrule pa angelo atu, Gabriel vara i sivo Nazareth, vanua matea hin Galilee, ²⁷ mo sivo isana hařai maevo matea hijana Mary. La tauhoroa moiso vara i pa lahi vano isana tamlohi matea hijana Joseph, enia mahapin Supe David matea. ²⁸ Gabriel mo pala isana mara, "Raniřuhu isam, engko hařai matea God mo ūromřuhu isam mo tavera jea! Moli mo lo toho peresiho." ²⁹ Pani Mary, ūromina mo tuturahi hajavua hin retireti atu, ale mo vahitea vara i levosahi na ūramin retiololo atu. ³⁰ Ale angelo atu mo verea isana mara, "O sopo matahu! Mary, matan na masalon God mo opoia vara i ūruh isam. ³¹ Ale mo tapulo nake, o pa tau natum, ale o pa tape na lamane matea, ale o pa tau na hijana vara Iesu. ³² Enia i pa tamlohi aulu jea, ale la pa tovia Natun God, sei mo aulu jea. Ale Moli God i pa silea na suiha nona supe non tamana Supe David. ³³ Enia i pa tauri na suiha vara i aulu na vaon Israel tui tui, ale i pa sopo te isoiso rani mata nona tauri na suiha."

³⁴ Mary mo usia isan angelo atu mara, "Hinau atu i pa mai sohena sava, matan enau hařai maevo matea?"

³⁵ Angelo atu mo ūramaria mara, "Tanume Tapu i pa mai hiniho, ale suihon God Aulu jea i pa hohoviho; ale matana, natirih sei i pa vora i pa tapu, la pa tovia – Natun God. ³⁶ Ale ko levosahia vara tahisam Elizabeth na nona vajiahmoiso, ale sohena, mo tau natuna lamane matea, ale vitu akerihi enia nona halimarave vitu isana hařai matea la verea vara enia hařai aroaro matea! ³⁷ Matan mo sopo te hinau hatea i ūilangi jea vara God i sopo eři vaia."

³⁸ Ale Mary mara, "Varařuhu enau hařai slev non God purongo. Na opoia vara hinau atu i mai isaku sohena ko verea." Ale angelo atu mo mele malue mo vano.

Mary Mo Rohi Elizabeth

³⁹ Hitahun rani atu, Mary mo vele sahe na jara vutivuti, mo sivo vila na taon matea na lolon jara matan Judea. ⁴⁰ Mo unu na iman Zechariah, ale mo vere na retiololo isan Elizabeth. ⁴¹ Ale Elizabeth mara mo rongo na retiololo non Mary, pipi atu na lolona mo hisu, ale Tanume Tapu mo mařivisi Elizabeth, ⁴² mo verea aulu mara, "Avulahi tavera jea isam mo jeu na hařai tinapua. God mo lefuhu hin natirih sei mo lo toho na lolom. ⁴³ Ale enau hare vara tinan noku Moli i eři mai vara i rohiau? ⁴⁴ Matan, vahatea purongo atu sei nara na rongo na nom retiololo, pipi nuke, na loloku mo hisu na avulahi. ⁴⁵ Avulahi tavera isam matan ko rasu Moli vara i pa vai na sava mo verea isam!"

Vete Hasohaso Non Mary

⁴⁶ Ale Mary mo verea mara,
"Na ţomiku na hasohaso
God mo tavera jea,
⁴⁷ ale mauriku mo avulahi tavera hin God
noku Jujuri,
⁴⁸ matan mo kilau mai isaku
nona hařai volitusi atano,
ale mo tapulo nake,
mahapi tari la pa verea vara avulahi
tavera mo mai isaku,
⁴⁹ matan haratu sei mo ţilangi jea mo vai
na hinau tavera isaku,
ale hijana mo tapu.
⁵⁰ Ale nona ţomopoia
mo vano isana mahapi tari, isan la
haratu sei la lo sile na oloolo tavera
isana.
⁵¹ Enia mo vujangi na nona suiha,
mo leputi jalajalai la haratu la mangisi
na mapura.
⁵² Mo lavi nařihi la haratu
la lo tauri na suiha nona supe, ale mo
tahe la haratu ţomira la atano la
sahe aulu.
⁵³ Mo sohoni la haratu
la marohati na hina ţuhu,
pani mo ţule nařihi la haratu la tavytav
la vano lekoleko.
⁵⁴ Mo tueni nona volitusi Israel, usuri na
nona retitauhi mata nona ţomopoia
hinira,
⁵⁵ matan mo retitauhi
vara i pa ţomopoi isan Abraham
peresi na taniana na rani tui tui."

⁵⁶ Mary mo lo toho atu isan Elizabeth mata vitu mo tolu, moiso mo pa mele mule vano na jarana.

John Tamlohi Paptijo Mo Vora

⁵⁷ Ale vitu non Elizabeth mo asi vara i lavlavi, ale mo vasusui na nona pipi lamane matea. ⁵⁸ Ale tavytavina peresi na tahisana la rongoa vara Moli mo ţomruhu tavera jea isana, ale la avulahi peresia. ⁵⁹ Ale na halimaravtolu rani la mai vara la vai na nona tairalihi. Tatuara la lo opoia vara la tau na hijana vara Zechariah vara i lavi na hijan tamana, ⁶⁰ pani tinana mo verea mara, "Mo vono, enia hijana John."

⁶¹ Ale la verea isan Elizabeth lara, "Mo sopo te tavytavim hijana i sohen haratu!"

⁶² Ale la vai na matamata hai isan tamana na limara vara sava hija natu, enia mo opoia vara i silea isana. ⁶³ Ale Zechariah mo usia vara la lavi te hinau mata uliuli hinia i mai isana, ale la mařurahi tavera matan mo ulia mara, "Hijana enia John." ⁶⁴ Ale vahatea purongo memena mo mele materi, ale mo retireti mo hasohaso God.

⁶⁵ Tahisara tari la hutura, ale la matahu, ale sorasora atu mo ţalihi vevuhi na jara tari na jara vutivuti Judea. ⁶⁶ Ale tamlohi tari sei la rongora la sopo levosahia vara natirih atu i pa sava tamlohi pavuho natu matan liman Moli mo lo toho hinia.

Tanumen God Mo Mařivisi Zechariah

⁶⁷ Ale tamana, Zechariah, Tanume Tapu mo mařivisia, ale mo retimangovi mara,

⁶⁸ "Hasohaso tavera isan Moli God matan Israel,
matan nake mo rohi na nona tamlohi
vara i jurira,

⁶⁹ God mo sileřa na Tamlohi Jujuri matea
mo suiha tavera mo tai na iman
nona volitusi supe David,

⁷⁰ sohena nona přovet tapu tuai la verea

⁷¹ lara vara i pa juriřa isana nořa meresahi,
ale na liman la haratu sei la ţuhu
hiniřa.

⁷² Mo mařivisi na nona retitauhi tapu sei
vara i pa ţomi na nomam pua,

⁷³ retitauhi atu mo silea
isan tamara Abraham vara i pa vaia,

⁷⁴ ale vara i juriřa isana nořa meresahi, ale
i pa tueniřa vara ţa volitusi isana i
sopo te matahu isařa,

75 na mauri tapu mo tataholo na nahona mata nořa rani tari.
 76 Ale engko natuku, la pa toviho p̄ovet non haratu mo aulu jea; matan engko o pa vano tiroma hin Moli, mata vai mamahuni na malelena,
 77 o pa vere na tamlohi sohena sava God i pa jurira matan i pa ūromi na nora hehe.
 78 matan nořa God enia God mata ūromi na tamlohi na nona ūromruhu, matan mai non nona Jujuri mo sohena alo mo vele aulu mo sinai isařa na tuka,
 79 vara i mera isan la haratu la lo toho na ūrořoha, ale na liman mateia, matan vara i tiromařa na malele mata tamata.”

John Tamlohi Paptijo Mo Ulua

80 Ale pa natirihi atu mo ulua, ale Tanume Tapu na maurina mo suiha, ale mo lo toho na tano koru mo tikeli na rani mata nona pala na naho tamlohin Israel.

2

Iesu Mo Vora (Mt 1.18-25)

1 Hin pongi atu, supe nona mara Rome, enia Augustus, ale mo verea mara la evi vevuhi na tamlohi ūralihi na jara tari sei enia mo lo tauri na suiha hinira na varama. 2 Harihi enia tiroma evi na tamlohi hin pongi atu Quirinius, tamlohi aulu matea mara Rome mo lo aulu hin Syria. 3 Ale, tamlohi tari la vano na jarara tataholo vara la pa sile na hijara ea. 4 Ale Joseph mo malue Galilee na taon matan Nazareth mo sahe na taon non pin supe David sei Bethlehem na jara matan Judea, matan enia tahisan supe David, 5 vara i tau na hijana peresi Mary, hařai atu sei mo tauhoroa moiso mata lahi, ale mo tau natuna.

6 Ale hin pongi atu la pa lo toho atu, nona rani mo mai vara i lavilavi. 7 Ale mo vasui natuna vora tiroma lamane matea. Mo leputi mamahunia na ruru, ale mo taua sivo na puhoro ūrvu hana maji palovati, matan mo sopo te mele masapa na lolon ima malele atu nona tamlohi la lo hahau.

Tavui Sipsip La Hite Na Angelo

8 Hin vutepongi atu, hin jara atu, na pahisan taon atu, tavui sipsip hai la lo toho saovi na pulara sipsip na jara ūrvu ūrvu tavera. 9 Ale la pa hutura purongo, angelo non God matea mo pala isara, ale meran God mo merasahira, ale matahu mo sohoni vevuhi na epera. 10 Angelo atu mo verea isara mara, “Ha sopo matahu, matan enau na lavi na retiřuhu mata avulahi tavera matea vara a silea isamim sei i pa nona tamlohi tari. 11 Matan, nakerihi, natirihi matea mo vora isamim na taon non supe David, enia Kristo sei i pa juri na tamlohi, nořa Moli. 12 Ha pa eri hitevosahia sohen harihi: ha pa hite na pipi matea, la leputia na ruru la taua mo lo juruvi na puhoro ūrvu hana maji palovati.”

13 Ale, la pa hutura, vao angelo vuro na tuka la pala vahatea na hařin pa angelo atu, ale la lo hasohaso God lara,

14 “Hasohaso i sahe isan God na jarana aulu jea na tuka!

Ale na varama, tamata i pa toho isan la haratu God mo avulahi hinira.”

15 Na rani la angelo atu la malue isara la sahe na tuka, la tavui sipsip atu la lo verevereia isara lara, “Ale ūra vano, ūra vano Bethlehem vara ūra hite hinau sei Moli God mo lo vereră hinia.”

16 La tamlohi atu la vano vilavila la tapai Mary enia Joseph, ale pa natirihi atu mo lo juruvi na ūrvu na puhoro matea. 17 Lara la hitea, la vereuli na sava pa angelo atu mo lo verea isara matan natirihi atu. 18 Ale tamlohi tari sei la rongo la retireti atu, la marurahi tavera na sava la tavui sipsip atu la verea isara. 19 Pani Mary mo tau mamahuni la hinau nike na ūromina, ale mo lo ūromřomira. 20 Ale pa la tavui sipsip atu la mele hilu vano isana pulara sipsip, la lo tahe na hijan God, ale la sile na hasohaso isana mata sava la rongoa, ale sava la hitea sohen la verea isara.

La Tau Na Hijan Iesu

21 Mo kakau na halimaravtolu rani, vara i lavi na nona taiřalihi, ale la tau na hijana vara Iesu, hija atu sei angelo atu mo lo silea tiroma moiso Mary mo pa tau natuna.

La Lavi Iesu Vano Na Temple

²² Ale mo kakau na rani mata malamalai matan vara i vai Joseph enia Mary la voke-voke usuri na Leu non Moses, la lavia mo sahe Jerusalem mata silea isan Moli God
²³ sohen la ulia na leu non Moli God lara, ‘Lamane vora tiroma tari sei la malue na pangen tinara tiroma, enira la tapuhi non Moli God.’ *Exo 13.2-12*

²⁴ Ale la sile na malamalai usuri na sava leu non Moli God mo verea vara la vaia, ‘vomahe i rua teni te wepe i rua.’

Lev 12.2-8

Simon Mo Hite Iesu

²⁵ Ale hin pongi atu, mara Jerusalem matea, hijana Simon, enia tamlohi tata-holo matea, ale ūromina mo ūrilangi mata lotu tarea. Mo lo kilau matan Jujuri non Israel, ale Tanume Tapu mo mařivisia.

²⁶ Tanume Tapu mo vujangia hinia moiso vara i pa sopo mate vavano i tikeli pongi atu i hite Křisto non Moli God. ²⁷ Ale Tanume Tapu mo vai na ūromina vara i vano na lolo Temple, ale na rani taman Iesu enia tinana la lavia mo sinai matan vara la vai na posposi sei leu mo opoia,

²⁸ mo tulia, ale mo sile na hasohaso isan God mara,

²⁹ “Moli God, nake natu, na levosahia moiso vara o eři majinga hiniau nom volitusi,

vara a mate na tamata matan nom retitauhi isaku mo masese,

³⁰ matan matakmo hite na nom Jujuri moiso,

³¹ ko tatamahunia mata tamlohi tari,

³² enia malarani matea mata yuhesi God isana tamlohi ūrořoha tari, ale mata hasohaso nona nom tamlohin Israel.”

³³ Taman Iesu enia tinana la mařurahi tavera na sava mo verea matana. ³⁴ Ale Simon mo leřuhu hinira, ale mo verea isan tinana Mary mara, “God mo viřoni natirihi níke, vara i pa vai na tamlohi matuvana Israel la jovi, ale i pa tahe na tamlohi matuvana hinia, enia i pa matamata matea tamlohi la pa verelejlejia, ³⁵ matan vara ūromřomi nona tamlohi matuvana la pa mavuhesi, ale ko hitea, sita vuro i pa hoti na maurim tataholo.”

Provet Hařai Sei Anna

³⁶ Provet hařai matea mo lo toho atu hijana Anna, venatun Phanuel tavytavu in Asher. Enia mo vajiahā sasati moiso, mo lo toho peresi tuana mata tauni mo limaravrua purongo hin la rani atu mo pa lo hařai maevō, ³⁷ moiso mo lo toho sohena hařai malepu matea mo tikeli na taunina mo ngavulu limaravtolu mo vati *(84)*.

Enia mo sopo lo malue hin Temple atu, mo lo lotu God na nona tapuhoro na hanhani peresi na nona usiusi tarea na rani peresi na vutepongi. ³⁸ Ale mo sinai tataholo hinira atu, ale mo tapulo vere meje isan God. Mo retireti matan natirihi atu isan la haratu sei la lo kilau toho matan rani atu vara God i pa volituhu Jerusalem hinia.

Joseph Enia Mary La Mele Mule

³⁹ Ale na rani Joseph enia Mary la vai vevuhi na sava leu non God mo opoia, la mele vano na jarara Galilee, na nora taon matan Nazareth. ⁴⁰ Natirihi atu mo ulua, mo mai mo ūrilangi, ale ūromina mo mařivi na lelevosahi. Ale ūromřuhu non God mo lo toho isana.

Iesu Mo Uluvou Mo Sahe Na Temple

⁴¹ Na tauni hatehateahi tamana enia tinana la lo sahe Jerusalem mata Hanhani mata Passover. ⁴² Ale hin rani atu Iesu taunina mo tikeli mo sangavulu ūromina mo rua, la mele sahe usuri na posposi sohen la lo vaia tarea matan Hanhani atu.

⁴³ Ale na rani Hanhani atu mara mo isoiso, na malele la lo mele mule, uluvou atu Iesu mo pa lo toho Jerusalem. Tamana enia tinana la sopo levosahia, ⁴⁴ pani mata rani matea la ūromřomia vara mo lo hahau peresi na vaora, pani mo sopo tuai la tapulo alea isana tahisara peresi na tapalara na malele, ⁴⁵ ale lara la sopo hitea, la mele hilu la vano vara la alea Jerusalem.

⁴⁶ La alea, ale na hatolu rani la pa tapaia na lolo Temple, mo lo sakele na livuha tamlohi vujangi ea, mo lo tapurongo isara, ale mo lo usi na retiusis. ⁴⁷ Ale tamlohi tari sei la rongoa la mařurahi tavera na nona lelevosahi peresi na nona ūrami reti isara.

⁴⁸ Ale tamana enia tinana lara la tapaia, la hutura tavera hinia. Ale tinana mo verea isana mara, “Natuku, mata sava ko vailehilehi kamam sohena? Enau tamam kama aleho vavano ūromimam mo jovi tavera!”

⁴⁹ Ale mo verea isara mara, “Ka lo aleau mata sava? Ka sopo levosahia vara enau a pa lo toho na iman tamaku?” ⁵⁰ Pani la sopo levosahi na ūaramin reti atu sei mo verea isara.

⁵¹ Ale mo usurira la sivo Nazareth, ale mo hase taua na ruhuruhu limara. Ale tinana mo tau mamahuni la hinau nike na ūromina, ale mo lo ūromromira. ⁵² Ale Iesu mo ulua mo mai tamlohi, nona lelevosahi mo ulua, ale mo ulua na ūromruhu non God peresi na ūromromi nona tamlohi tari isana.

3

Vujangi Non John Tamlohi Paptijo (Mt 3.1-12; Mk 1.1-8; Jn 1.19-28)

¹ Na sangavulu ūromana mo lima tauni, Tiberias Caesar, Supe nona mara Rome mo lo tauri na suiha, ale Pontius Pilate mo lo aulu hin Judea. Herod Antipas mo lo aulu hin Galilee, ale tasina Philip, mo lo kilau Ituraea peresi Trachonitis, ale Lisanias mo lo aulu hin Abilene, ² ale tataholo hin rani atu Annas peresi Caiaphas la lo p̄ris aulu, God mo sile na retisohai matea isan John natun Zechariah hin rani atu mo lo toho na jara tano koru. ³ Ale John mo hahau ūralihi na jara tari Jordan, ale mo vano mo lo retivujavujangi isana tamlohi vara la lavi na paptijo mata posí na hehe matan vara Moli i ūromira. ⁴ Sohen p̄ovet Isaiah mo ulia mara,

‘Na jara hasetoho leon matea mo lo ulo mara:

Ha vasahi na malelen Moli God!

Ha tano na malelena i tataholo.

⁵ God i pa tavuni na vakoa tari,

ale i pa mavalolohi na vutivuti tari la mai la tataholo i ūruhu,

ale kolekole la pa tataholo,

ale malele morumoruha la pa tataholo,

⁶ ale tamlohi tari la pa hite malele sei God i pa juri na tamlohi hinia.’

Isa 40.3-5

⁷ Vao tamlohi la lo mai mata paptijo isan John, ale mo lo verea isara mara, “Kamim mata sasati! Hare mo retiōraōahai kamim vara ha rovo na talai lolokoru non God mata hehe sei mo lo mai? ⁸ Ha namaha usuri na nomim posí na hehe. Ha sopo ūromaulu vara, ‘Kamam kama juri matan

tamamam Abraham!', matan na verea tataholoi kamim hinia vara, God i eři vai la datu nikey la mai natun Abraham! ⁹ Matan nakerihi, God mo lo ava na nona rita moiso mata wari. Matan, vipahai tari sei la sopo lavi na vuara ūruhu, i pa tai jovjovira, ale i pa pulahira la vano na hapu.”

¹⁰ Ale vao atu la usia isana lara, “Vara mo sohena, kama pa vai na sava?”

¹¹ John mo ūramira mara, “Vara nom ruru mo rua, o sile te hatea isan haratu mo sopo te nona ruru, ale haratu hana hinau mo matuvana, i vaia sohena.”

¹² Tamlohi mata lavi na takis sohena, la mai isana mata paptijo, la verea isana lara, “Tija, kamam kama pa vai na sava?”

¹³ Ale mo verea isara mara, “Ha sopo lavi na mania i jeu na sava mo tataholo vara ha lavia.”

¹⁴ Moiso, tamlohi vuro hai la usia lara, “Ale kamam, kama pa vai na sava?” Ale John mo verea isara mara, “Ha sopo vai na tamlohi la matahu mata lavi te mania isara, ha sopo tuvai na tamlohi na halu mata mania, ha avulahi na volimim.”

¹⁵ Ale matan tamlohi la lo kilau moiso mata rani pala non nora Křisto, enira mo isoiso la lo ūromromia na mapura lara ko-rong, John enia pa Křisto atu.

¹⁶ Pani John mo ūramira mara, “Enau na lo paptijo hin kamim na wai purongo, pani tamlohi matea mo aulu jea hiniaw mo lo mai, enau na sopo tataholo vara a uli nařihi na asi eve palona. Enia i pa paptijo hin kamim na Tanume Tapu peresi na hapu. ¹⁷ Mo lo tauri na nona foko tavera na limana vara i vasahi na nona jara ase na piri wit, ale matan vara i takonahi piri wit atu na nona pea, pani i pa suli na pahahaha piri wit na hapu sei tea i sopo eři vunia hin te rani.” ¹⁸ Ale hin na reti tinatinapua matuvana John mo retiōraōahai na tamlohi, ale mo retivujavujangi na Retiřuhu isara hinira.

¹⁹ Ale hin pongi atu John mo retihoro Herod tamlohi aulu non Judea, mata nona vaivaileu peresi Herodias, naroun tasina, ale mata hina sasati tinatinapua tari sei Herod mo lo vaira, ²⁰ ale aulu hin la hina sati atu mo lo vaira, Herod mo tau John na ima ūilangi.

*John Mo Paptijo Hin Iesu
(Mt 3.13-17; Mk 1.9-11)*

²¹ Pani hin pungi atu John mo sopo lo toho na ima ūilangi, tamlohi tari la lavi na paptijo, ale John mo paptijo hin Iesu. Ale Iesu mo pa lo usiusi, tūka mo maroi, ²² ale Tanume Tapu mo sinai atano sohena vomaha matea, ale mo tau hinia; ale leon matea mo tai na tuka mara, "Engko Natuku ūuhuahu jea, enau na avulahi tavera jea hiniho."

*Pina Iesu Tuai
(Mt 1.1-17)*

²³ Taunin Iesu mařiviti i ngavulu tolu ⁽³⁰⁾ moiso mo pa tapulo na nona vavahinau.

Iesu la verea vara enia natun Joseph, Joseph, enia natun Heli,

²⁴ Heli, enia natun Matthat, Matthat, enia natun Levi, Levi, enia natun Melchi, Melchi, enia natun Jannai, Jannai, enia natun Joseph,

²⁵ Joseph, enia natun Mattathias, Mattathias, enia natun Amos, Amos, enia natun Nahum, Nahum, enia natun Esli, Esli, enia natun Naggai,

²⁶ Naggai, enia natun Maath, Maath, enia natun Mattathias, Mattathias, enia natun Semein, Semein, enia natun Josech,

Josech, enia natun Joda,

²⁷ Joda, enia natun Joanan, Joanan, enia natun Rhesa, Rhesa, enia natun Zerabbabel, Zerabbabel, enia natun Shealtiel, Shealtiel, enia natun Neri,

²⁸ Neri, enia natun Melchi,

Melchi, enia natun Addi,

Addi, enia natun Cosam,

Cosam, enia natun Elmadam,

Elmadam, enia natun Er,

²⁹ Er, enia natun Joshua,

Joshua, enia natun Eliezer,

Eliezer, enia natun Jorim,

Jorim, enia natun Matthat,

Matthat, enia natun Levi,

³⁰ Levi, enia natun Simeon,

Simeon, enia natun Judah,

Judah, enia natun Joseph,

Joseph, enia natun Jonam,

Jonam, enia natun Eliakim,
³¹ Eliakim, enia natun Melea, Melea, enia natun Menna, Menna, enia natun Mattatha, Mattatha, enia natun Nathan, Nathan, enia natun David,
³² David, enia natun Jesse, Jesse, enia natun Obed, Obed, enia natun Boaz, Boaz, enia natun Sala, Sala, enia natun Nahshon,
³³ Nahshon, enia natun Amminadab, Amminadab, enia natun Admin, Admin, enia natun Arni, Arni, enia natun Hezron, Hezron, enia natun Perez, Perez, enia natun Judah,
³⁴ Judah, enia natun Jacob, Jacob, enia natun Isaac, Isaac, enia natun Abraham, Abraham, enia natun Terah, Terah, enia natun Nahor,
³⁵ Nahor, enia natun Serug, Serug, enia natun Reu, Reu, enia natun Peleg, Peleg, enia natun Eber, Eber, enia natun Shelah,
³⁶ Shelah, enia natun Cainan, Cainan, enia natun Arphaxad, Arphaxad, enia natun Shem, Shem, enia natun Noah, Noah, enia natun Lamech,
³⁷ Lamech, enia natun Methuselah, Methuselah, enia natun Enoch, Enoch, enia natun Jared, Jared, enia natun Mahalaleel, Mahalaleel, enia natun Cainan,
³⁸ Cainan, enia natun Enos, Enos, enia natun Seth, Seth, enia natun Adam, Adam, enia natun God.

4

Tiapolo Mo Vaihite Iesu

(Mt 4.1-11; Mk 1.12-13)

¹ Ale Tanume Tapu mo mařivisi Iesu, ale Iesu mo malue na wai Jordan, ale Tanume Tapu mo tiroma hinia mo vano na jara tano koru. ² Tiapolo mo vaihite Iesu atu mata rani mo ngavulu vati. Hin la rani atu, Iesu mo sopo hani te hinau hatea, ale rani atu la isoiso Iesu mo marohati jea.

³ Tiapolo mo verea isana mara, "Vara engko Natun God, o vere vatu sei i mai pereti!"

⁴ Iesu mo ūramia mara, "Retiulia mo verea vara, 'Tamlohi i pa sopo mauri na pereti purongo!'" *Deut 8.3*

⁵ Ale Tiapolo mo lavi Iesu mo sahe aulu na masapa, ale vahatea purongo, mo vu-jangia na jara tari na varama sei supe la lo tauri na suiha hinira, ⁶ ale mo verea isana mara, "A pa sileho na nora suiha peresi na nora hasohaso, matan hinau tari sei la lo toho na limaku, ale a eři silera isan hare na opoia. ⁷ Vara o lotuai purongo, hinau tari sei la pa nom!"

⁸ Ale Iesu mo ūramia mara, "Retiulia mo verea vara,
'O pa lotu Moli nom God,
ale o pa volitusi isana hasena!'" *Deut 6.13*

⁹ Ale Tiapolo mo lavi Iesu mo taua aulu na pusa Temple, ale mo verea isana mara, "Vara engko Natun God, o kue! ¹⁰ matan Retiulia mo verea vara,
'God i pa retileu isana nona angelo vara la pa lo kilau mamahuniho,

¹¹ ale la pa tauriho na limara matan vara o sopo vujahi na palom hin te vatu.'" *Psa 91.11-12*

¹² Iesu mo ūramia mara, "Retiulia mo verea vara, 'O pa sopo vahite Moli nom God!'" *Deut 6.16*

¹³ Ale na rani Tiapolo mo isoiso na nona vahite isan Iesu, mo malue mo vano, pani mo lo kilau matan te masapa ūruh tinapua.

Iesu Mo Tapulo Vujangi Na Tamlohi Galilee

(Mt 4.12-17; Mk 1.14-15)

¹⁴ Iesu mo mele vano Galilee na suihan Tanume Tapu, ale sorasorahina mo ūalihi jara atu. ¹⁵ Mo vujangi na tamlohi na nora ima lotu, ale tamlohi tari la hasohasoa.

La Turuleji Hin Iesu

(Mt 13.53-58; Mk 6.1-6)

¹⁶ Ale Iesu mo pala Nazareth, jara atu sei mo ulua ea. Ale sohena mo lo vaia tarea mo vano na nora ima lotu na Sabbath, ale mo turu na naho tamlohi mata i evi na Retiulia, ¹⁷ ale la silea hin viriviri pepa atu sei Isaiah mo lo ulia, mo vuhesia ale mo vano hin jara atu sei mo opoia vara i evia, ale mo verea mara,

¹⁸ "Tanumen Moli mo lo toho hiniau matan enia mo viřoniau vara a vereuli na Retiřuhu isana tilavono.

Mo ūruleau vara a vere na materi isan la haratu la lo taurilatira, ale vara a vai na tamlohi matavuso la kilau, ale vara a teri la haratu la lo toho na ruhuruhu tamlohi sasati,

¹⁹ ale vara a vereulia vara nake enia pongi ūromřuhu non Moli." *Isa 61.1-2a*

²⁰ Ale Iesu mo mele viriviri pepa atu, mo silea isan tamlohi atu mo lo silea isana, ale mo sakele. Tamlohi tari na lolon ima lotu atu matara la lo toho hinia, ²¹ ale mo tapulo verea isara mara, "Nahapani natu Retitapu nike mo pa masese na peromim."

²² Ale tamlohi tari la hasohasoa, la mařurahi na retiřuhu mo lo verera, ale la verea lara, "Avei, tamlohi nike enia natun Joseph teni!"

²³ Ale Iesu mo verea isara mara, "Na levosahi mamahunia vara ha pa vereau hin titileu sei mo verea vara, 'Doctor, o hase vai mamahuniho!' Ha pa verea vara, 'Sava hina mařurahi kama rongoa vara ko lo vaia Capernaum, o vaia nike na jaram sohena!'" ²⁴ Ale mo verea isara mara, "Varařuhu na verea isamim, vara mo sopo te přovet hatea i eři lavi na ūromřuhu nona tamlohi na vanuana.

²⁵ Pani, na vararuhu hin haratu na verea vara, 'Malepu matuvana Israel la lo toho na rani non Elijah, hin rani atu usa mo sopo jovi mata tauni mo tolu vitu mo li-marave, ale marua tavera mo voroi Israel, ²⁶ ale God mo sopo ūrule Elijah i vano isan te vonara, pani isana hařai malepu matea mo lo toho Zarephath na jara Sidon. ²⁷ Ale tamlohi lepros matuvana hin Israel la lo toho na rani non Elisha, God mo sopo vai mamahuni te vonara hatea pani Naaman purongo mara Syria matea."

²⁸ Ale lara la rongo la hinau atu Iesu mo lo verera, tamlohi tari na lolon ima lotu la lolokoru patura. ²⁹ La turu la titiua vara i malue hin taon atu, ale la lavia mo vano na tavalu taon matan vara la pa pulahia na pesapesan vutivuti atu sei la voro na nora taon hinia. ³⁰ Pani Iesu mo hahau roto na livuhara mo vano.

Iesu Mo Titiu Narīhi Na Tanume Sati
(Mk 1.21-28)

³¹ Ale Iesu mo sahe Capernaum, taon tavera matea Galilee. Mo lo vujangira na Sabbath, ³² ale la haratu la rongoa la mařurahi tavera na nona vujangi, matan nona reti mo suiha.

³³ Na lolon ima lotu atu tamlohi matea, tanume lumiha sasati matea mo lo toho hinia, mo ulo aulu ūlangi mara, ³⁴ “Aaah! Ko mai isamam mata sava, Iesu mara Nazareth? Ko mai vara o komo kamam? Na levosahia vara engko hare – haratu mo tapu non God!”

³⁵ Pani Iesu mo merusahia mara, “O sopo retireti! O malue isan tamlohi sei!” Ale tanume sasati atu mo sařihi tamlohi atu sivo atano na livuhan vao atu, ale mo malue hinia, pani mo sopo komo te epena.

³⁶ Tamlohi tari la mařurahi matana, ale la lo hase vereverea isara lara, “Eh! Sava reti nahai? Matan na suiha nona retileu purongo, mo titiu nařihi na tanume lumiha sasati la malue!” ³⁷ Ale sorasorahina mo vano ūlihi na jara tari ea.

Iesu Mo Tueni Na Tamlohi Matuvana (Mt 8.14-17; Mk 1.29-34)

³⁸ Ale hitahun haratu, Iesu mo turu mo malue na ima lotu, mo vano na iman Simon Peter mo unu hinia. Hin rani atu vepalihan Peter mo rojo na seserei ūlangi matea, ale la usi Iesu matana vara i tuenia. ³⁹ Iesu mo turu na pahisa vatana, mo kilau sivo isana, ale mo ūrule nařihi seserei atu, ale seserei atu mo malue isana, ale vahatea purongo mo turu mo tapulo tatamahuni na hara hinau.

⁴⁰ Alo mo lo tapulo majo, ale la haratu te tahisara la rojo na rojua tinatinapua la lavira la mai isan Iesu, ale mo tau na limana hinira hatehateahi mo isoiso, ale nora rojua la tihai. ⁴¹ Ale tanume sasati sohena la malue isana tamlohi matuvana la ulo lara, “Engko Natun God!” Pani Iesu mo merusahira, ale mo sopo tinařihira vara la vere te hinau, matan la levosahia vara enia natu pa Křisto atu.

Iesu Mo Retivujavujangi

⁴² Ale na rani tinapua na ūlavuho, Iesu mo malue mo vano na jara hasetoho matea. Ale tamlohi la alea la mai isana, la opoia vara i lo toho peresira tako, ⁴³ pani Iesu mo verea isara mara, “A pa vano na taon tinatinapua vara a retivujavujangi

hin mauri atu God mo aulu hinia isara sohena na vaia isamim, matan God mo ūruleau matana.” ⁴⁴ Ale mo malue mo vano ūlihi na jara Judea mo lo retivujavujangi na nora ima lotu.

5

Mo Tovi Na Nona Tamlohi Usuri (Mt 4.18-22; Mk 1.16-20)

¹ Na rani matea, Iesu mo lo turu na pahisa tasin Galilee, vao tamlohi matuvana la lo turu porotia mata tapurongo na reti non God, ² ale mo hite na boti mo rua la seretahira na oneone, mo hite na tamlohin la boti atu la lo turu na jarauta, la lo hoje na nora tara. ³ Iesu mo vele na vonan la boti atu matea sei enia botin Simon Peter, mo usia vara i sohaila nařihi makomona na jarauta. Ale Iesu mo sakele na boti mo vujangi pa vao tamlohi atu.

⁴ Mara mo isoiso na nona retireti isara, mo verea isan Simon mara, “Eh, o sohaila nařihi i sivo na jara puaha, ale ha tuhu na nomim tara mata tarai te maji.”

⁵ Moiso, Simon mo ūramia mara, “Tamlohi tavera, kama kalvono vutepongi jarohi, ale kama sopo tikeli tea, pani matan ko verea, a pa tuhu na tara.” ⁶ Ale lara la vaia sohena, la ūlihi na takonahi maji, ale nora tara la tapulo mařari. ⁷ La aloví na tapalara hin boti tinapua atu vara la mai la tuenira, ale la mai la sohoni la boti atu mo rua, mariviti vara la pute.

⁸ Pani Simon Peter mara mo hite hinau atu mo jovi sivo mo papaohi na paun Iesu mara, “O malue isaku Moli! Matan enau na tamlohi hehe matea!” ⁹ Matan Simon Peter enira tolu la haratu la lo toho perešia la mařurahi tavera na maji la tikelira, ¹⁰ ale James enia John sohena, enira natun Zebedee sei la tapalan Simon Peter na bissnis mata aleale maji.

Ale Iesu mo verea isan Simon mara, “O sopo matahu! Mo tapulo nake, engko o pa tamlohi tara tamlohi!” ¹¹ Ale lara la tahe na botira sahe na jarauta, la tinařihi na hinau tari nora mata botira, ale la usuri Iesu.

Tamlohi Lepros Matea (Mt 8.1-4; Mk 1.40-45)

¹² Ale na rani matea Iesu mo lo toho na taon tavera matea atu, tamlohi matea mo mai isana lepros mo hati vevuhi na epena,

ale mara mo hite Iesu, mo jovi na nahona, mo tangi isan Iesu mara, "Moli, vara o majinga, o eři vaiau a vokevoke."

¹³ Moiso Iesu mo ūrāhi na limana mo tikelia mara, "Ale a vaia! O vokevoke!" Vahatea purongo lepros atu mo tinařihia. ¹⁴ Iesu mo verea isana vara i sopo mele verea isan tea, pani mo verea mara, "O vano o hase vujangiho isan te přis hatea, ale o sile te silesilea hatea mata nom vokevoke usuri na sava Moses mo retileu hinia, matan vara i eři verea vara engko ko mele ūruh." ¹⁵ Pani nake natu sorasorahina mo mele tavera jea mo vano asau, ale vao tavera la lo mai vara la tapurongo na nona retireti, ale mo vai na nora rojoa la tihai. ¹⁶ Pani tarea Iesu mo lo vano hasena na jara hasetoho mata usiusi.

Tamlohi Hariju Matea (Mt 9.1-8; Mk 2.1-12)

¹⁷ Ale na rani matea hin la rani atu, Iesu mo lo vujangi, Pharisee peresi na tamlohi vujangi mata leu, la lo sakele mariviti atu, enira la tai na vanua tari matan Galilee, Judea peresi Jerusalem. Ale suiha tavera non God mata titiu nařihi na rojoa mo lo toho hinia. ¹⁸ Tamlohi la hutura matan tamlohi hai la lo lavi na tamlohi rojoa matea na epa matea, epena tari la mate, ale la lo aleale malele vara la lavia i unu sivo na nahon Iesu. ¹⁹ Pani la sopo hite te malele vara la pa unu hinia, la vele sahe aulu na pusa ima la ūrole na masapa matea, ale la tuhua na epa atano na livuha vao tataholo na nahon Iesu. ²⁰ Ale Iesu mara mo hite na nora rasua, mo verea isan tamlohi rojoa atu mara, "Tapala, na ūromiho mata nom hehe."

²¹ Ale tamlohi vujangi mata leu peresi na Pharisee la tapulo usiusira lara, "Sava tamlohi nahai mo lo vaia sohena enia God? God hasena i eři ūromi na hehe!"

²² Iesu mo levosahi na ūromira ale mo ūramira mara, "Mata sava ūromimim mo lo sati na sava na verea?" ²³ Sava natu, mo mele malum jea? Vara a verea isan tamlohi hariju nike vara, 'Na ūromi na nom hehe!' teni 'O turu! O hahau!' ²⁴ Pani matan vara ha eři levosahia vara Natun Tamlohi mo lavi na suiha mata ūromi na hehe na varama, ha tapurongo na sava a pa verea!" Moiso Iesu mo verea isan tamlohi hariju

atu mara, "Na verea isam, o turu, o lavi na epam, ale o mule!"

²⁵ Vahatea purongo, mo turu na nahora, mo lavi na epa mo mule, ale mo lo hasohaso God. ²⁶ Mařurahi tavera mo taurilatira, ale enira mo isoiso la hasohaso God, matahu mo sohonira lara, "Na verea! Mele hina mařurahi tinatinapua nahai ūlo hitera nakerihi!"

Iesu Mo Viřoni Matthew (Mt 9.9-13; Mk 2.13-17)

²⁷ Hitahuni haratu, Iesu mo malue mo vano, ale mo hite na tamlohi mata lavi na takis matea, hijana Levi, mo lo sakele na jarana, ale mo verea isana mara, "O usuriau!" ²⁸ Ale mo turu, mo tinařihi ve-vuhi na nona voko tari mo usuri Iesu.

²⁹ Moiso, Levi mo vai na hanhani tavera matea non Iesu na imana, ale takonahi tamlohi mata lavi na takis peresi na tamlohi tinapua hai la lo hanhani peresira na tep atu. ³⁰ Ale Pharisee peresi na nora tamlohi vujangi mata leu hai la lo ngutungutu isana nona tamlohi usuri lara, "Mata sava ka lo hanhani ale ka lo inu peresi na tamlohi mata lavi na takis peresi na tamlohi hehe?"

³¹ Ale Iesu mo ūramira mara, "Haratu la sopo rojo la sopo opoi na doctor, pani haratu purongo sei la rojo. ³² Na sopo sinai matan vara a tovi la haratu la tataholo la posí, pani mata tamlohi hehe."

Tapuhoro Na Hanhani (Mt 9.14-17; Mk 2.18-22)

³³ Pharisee la verea isana lara, "Tamlohi usuri non John tamlohi paptijo la lo tapuhoro na hanhani hin te rani mata usiusi, ale tamlohi usuri nona Pharisee la lo vaia sohena, pani nom la lo hanhani la lo inu!"

³⁴ Iesu mo ūramira mara, "Ha eři vai na tamlohi ka tovira mata Mai na hanhani lahi la tapuhoro na hanhani vara tamlohi lahi mo lo toho peresira?" ³⁵ Pani rani mo lo mai vara la pa lavi nařihi na tamlohi lahi isara, ale la pa tapuhoro na hanhani hin la rani atu natu."

Ruru Tuai Peresi Na Ruru Paro

³⁶ Iesu mo mele verera na titieu matea mara, "Mo sopo tea i ūrari te nona ruru paro vara i lavi tavalu ruru atu i silivi horo na mařari ruru tuai matea hinia. Vara i vaia

sohena, i pa ūfari ruru paro atu, ale tavalu ruru paro atu i pa sopo eři sořo i ūahu hin ruru tuai atu.

Waen Tuai – Waen Paro

³⁷ Ale mo sopo tea i tisi na waen paro i sivo na huri waen tuai. Vara i vaia sohena, waen paro atu i pa vali i sohi i kosahi huri waen tuai atu sei mo masa moiso, ale waen atu i pa roro nařihi, ale huri atu i pa sopo mele ūahu matan te hinau. ³⁸ Pani ha pa tisi na waen paro na lolo huri waen paro purongo matan mo malum. ³⁹ Ale mo sopo tea vara i lo inu na waen tuai i opoi na waen paro, matan i pa vereea vara, ‘Waen tuai mo meji.’”

6

Iesu Enia Supe Mata Sabbath (Mt 12.1-8; Mk 2.23-28)

¹ Na Sabbath matea, Iesu mo pa lo hahau roto na isa wit matea, ale nona tamlohi usuri la vesi roto na perera hai, ale la savasavahira na limara, moiso la hanira. ² Pani tatua Pharisee lara, “Eh! Mata sava ka lo vai na hinau matea mo sopo tataholo vara ha vaia na Sabbath?”

³ Iesu mo ūramira mara, “Ka sopo lo evi na sava David mo vaia hin rani atu mo marohati, enia peresi la haratu la lo toho peresia? ⁴ Ka evia ka hitea sohena sava mo unu na Tabernacle non God mo lavi na pereti tapu, pereti atu pŕis hasera la eři hania, ale David mo hania mo silea isana tatuana la hania sohena.” ⁵ Ale Iesu mo vere isara mara, “Natun Tamlohi, enia Moli mata Sabbath.”

Tamlohi Matea Tavalu Limana Mo Rihirihi

(Mt 12.9-14; Mk 3.1-6)

⁶ Na Sabbath tinapua matea, Iesu mo unu na lolo ima lotu, ale mo lo vujangi. Tamlohi matea mo lo toho atu matua limana mo rihirihi. ⁷ Ale tamlohi vujangi mata leu peresi na Pharisee la lo kilau Iesu vara i pa titiu nařihi na rojo na Sabbath teni mo vono, matan vara la eři vilei te hinau mata pisuhia hinia. ⁸ Pani hina purongo vara Iesu mo levosahi na ūromira, mo vereea isan tamlohi lima rihirihi atu mara, “O mai o turu akerihi!” Ale tamlohi atu mo turu mo vano isana. ⁹ Ale Iesu mo vereea isara mara, “Na lo usi kamim vara

mo tataholo vara o vai na hina ūahu na Sabbath, teni vara o sile na rongohaji isan tea na Sabbath, teni vara o juri na mauri, teni vara o komoa?” ¹⁰ Mo kilau ūrahira mo isoiso, moiso mo vereea isan tamlohi atu mara, “O ūrahira na limam!” Ale pa tamlohi atu mo vaia sohena, ale limana mo mele ūahu vevuhi. ¹¹ Pani la Pharisee atu la lolokoru patura, la lo usiusira hinia lara, sava natu la pa eři vaia isan Iesu.

Iesu Mo Viřoni Na Nona Vahařule (Mt 10.1-4; Mk 3.13-19)

¹² Hin la rani atu Iesu mo malue isara, mo sahe aulu na vutiyuti mata usiusi, mo usiusi rani isan God. ¹³ Ale na ūlavuho mo tovi na nona tamlohi usuri, ale mo viřoni na tupu sangavulu ūromana mo rua hinira, enira mo tovira vahařule;

¹⁴ Simon sei Iesu mo tau na hijana vara Peter, tasina Andrew, ale James enia John, Philip, Bartholomew,
¹⁵ Matthew, Thomas, James natun Alphaeus, Simon sei, enia tamlohi matea mata valum mata jarana,
¹⁶ ale Judas natun James, ale Judas Iscariot sei mo lo turuposi hin Iesu.

Iesu Mo Vujangi Na Tamlohi (Mt 4.23-25)

¹⁷ Ale Iesu mo sevuti mo sinai atano peresira, ale la turu na mavalolo matea. Ale vao nona tamlohi usuri tolu na vao tamlohi tinapua tavera jea matea la takonahi moiso, la tai na jara tari Judea, Jerusalem ale na pahisa tasi Tyre peresi Sidon, ¹⁸ sei la mai vara la rongo na nona retireti, ale matan vara i titiu nařihi na nora rojua. Ale la haratu sei tanume lumiha sasati mo lo vaira, Iesu mo vaira la mele ūahu. ¹⁹ Ale enira mo isoiso la lo vahitea vara la tikeli Iesu matan suiha tavera mo lo malue isana mo lo titiu nařihi na nora rojua tari.

Avulahi Atu God I Pa Silea (Mt 5.1-12)

²⁰ Iesu mo tařa sahe isana nona tamlohi usuri mo vereea mara,

- “Avulahi isamim sei ka tilavono,
matan mauri atu God mo aulu
hinia enia nomim.
- ²¹ Avulahi isamim sei ka lo marohati
nake, matan ha pa masu.
Avulahi isamim sei ka lo tangi
nake, matan ha pa mana.
- ²² Avulahi isamim na rani sei
tamlohi la ūahu hin kamim,
teni la lo horo kamim,
teni la lo veresatihi kamim,
teni la lo vereleji kamim,
matan ka tamlohi non
Natun Tamlohi.
- ²³ Hin la pongi atu ha pa avulahi tavera,
ale ha kuekue na avulahi, matan ka levosahia
vara nomim otori na tuka mo
tavera jea; matan tuai tamara la vaia sohena
moiso isana p̄ovet.

Rani Sasati God I Pa Silea

- ²⁴ Pani rani sasati isamim sei ka tavytav,
matan ka lavi na volimim moiso.
- ²⁵ Rani sasati isamim sei ka lo mana nake,
matan ha pa tangtangi ale ha tangi.
- ²⁶ Rani sasati isamim na rani tamlohi
la vere na retireti ūahu matamim,
matan tuai tamara la vaia sohena
moiso isana p̄ovet haluhalu.

O Opoi Na Nom Meresahi (Mt 5.38-48; 7.12a)

- ²⁷ Pani na verea isamim nakerihi ka lo
tapurongo vara ha opoi na nomim mere-
sahi, ha vai na hina ūahu isan haratu
mo ūahu hin kamim. ²⁸ Ha leūahu hin
la haratu la lesati hin kamim, ha usiusi
matan la haratu la lo vailehilehi kamim.
²⁹ Isan haratu mo vojahi na esem, o
tinařihia i mele vojahi na tavalu esem.
Ale haratu mo reve nařihi na nom ruru
hamariri, o sopo horoa vara mo opoia vara
i reve nařihi na nom ruru. ³⁰ O silea isana
tamlohi tarī sei la usia ūilangi isam, ale isan
haratu mo reve nařihi na nom hinau, o
sopo ngurunguru hinia vara i mele sileho
hinia. ³¹ Ale sava ka opoia vara tamlohi la
vaia isamim, ha vaia sohena isara.

- ³² Vara ha opoi la haratu la lo opoi
kamim purongo, ka ūom vara God i pa
avulahi hin kamim? Matan tamlohi hehe
sohena, la lo opoi la haratu la opoira. ³³ Ale
vara ha lo vai na hina ūahu isan la haratu
la lo vai na hina ūahu isamim purongo,
ka ūom vara God i pa avulahi hin kamim?

Matan tamlohi hehe sohena la lo vaia sohena. ³⁴ Ale vara ha lo sile na mania isan
la haratu sei ko levosahia vara la pa mele
spaia, ka ūom vara God i pa avulahi hin
kamim? Matan tamlohi hehe sohena, la
lo sile na mania isana tamlohi hehe matan
vara la pa mele lavi na spaina tataholo.

³⁵ Pani ha opoi na nomim meresahi, ale
ha vai na hina ūahu, ha sile na mania vara
tea mo usia, ha sopo ūom ūomia vara ha pa
mele lavi na spaina. Matan nomim otori
i pa tavera jea, ale kamim ha pa natun
haratu mo aulu jea, matan enia mo ūahu
isan la haratu mo sopo te vere meje isara,
peresi la haratu la sasati. ³⁶ Ha ūom ūomia
sohena Tamamim mo lo ūom ūomia.

Ha Sopo Ari Na Tinapua (Mt 7.1-5)

³⁷ Ha isoiso na nomim ari na tamlohi
tinapua, ale God i pa sopo ari kamim, ale
ha isoiso na nomim sile na talai isana tam-
lohi tinapua, ale God i pa sopo sile na talai
isamim, ha ūomi na tinapua, ale God i pa
Ūomi kamim, ³⁸ ha silesile, ale God i pa sile
purongoia isamim, i pa silea i tavera jea i
jeu na ūom ūomim, i pa sařihia, i hutehute-
hia, ale i lo masurere. Vara ka silea sohena
sava, i pa mele silea sohena isamim.”

O Hase Kilau Na Maurim

³⁹ Iesu mo mele verera na titileu matea
mara, “Matavuso matea i eři tiroma na
matavuso tinapua? Ra levosahia vara la pa
jovi hin te koko. ⁴⁰ Tamlohi usuri matea
mo sopo aulu na nona tamlohi vujangi,
pani vara i levosahi vevuhi na sava mo lo
vujangia, i pa sohen nona tamlohi vujangi
atu.

⁴¹ Mata sava ko eři hitevosahi na utauta
tapea rihirihi na matan voraim matea,
pani ko sopo eři hitevosahi na laho pahai
na matam? ⁴² Mo sohena sava natu ko eři
verea isan voraim vara, ‘A eři nařihi utauta
tapea rihirihi sei na matam!’ pani ko
sopo hitevosahi na laho pahai na matam
hasem? Ko tapnetano! O nařihi na laho
pahai na matam hasem tiroma, ale o pa eři
kilau i memera matan vara o eři lanařihi
na utauta tapea rihirihi na matan voraim.

Vua Vipahai (Mt 7.21-27; 12.34b, 35)

⁴³ Mo sopo te pulo vipahai ūahu hatea i
eři sile na vua sasati, teni te pulo vipahai

sasati i eři sile na vua ūruhu,⁴⁴ matan, pulovipahai hatehateahi o eři hitevosahira na vuara. Matan la sopo vu na fig na pahai ngāřngāřiha, teni la sopo vu na grape na asikauli.⁴⁵ Tamlohi ūruhu, hina ūruhu ūruhu na mapuna i pa sile na hina ūruhu, tamlohi sasati, hina sasati na mapuna i pa sile na hina sasati. Matan sava mo tavera na mapu tamlohi, haratu natu i pa malue na jingona.

Tamlohi Voro Ima Mo Rua (Mt 7.24-27)

⁴⁶ Mata sava ka lo toviau vara, ‘Moli! Moli!’ pani ka sopo vai na sava na verea isamim?⁴⁷ Sava tamlohi mo mai isaku, mo rongo na noku reti ale mo vaira, a pa vujangia isamim vara enia mo sohena sava:⁴⁸ Enia mo sohena tamlohi matea mo lo voro na ima matea, mo heli na moru mo sivo atano na vatu matan vara i tau na pulo ima hinia. Ale na rani wai tavei mara mo vele, mo sari ima atu, pani mo sopo eři hisuhia matan mo voro mamahunia.⁴⁹ Pani haratu mo rongoa pani mo sopo vaia, mo sohena tamlohi matea mo voro na ima na lepa purongo, ale mo sopo te pulona ūruhu. Ale wai tavei mara mo vele mo saria, vahatea purongo ima atu mo jovi, ale nona jovi atu mo tavera jea.”

7

Volitusi Matea Mo Mele Ruhu (Mt 8.5-13; Jn 4.43-54)

¹ Hitahun la nona titileu atu mo verea isana tamlohi, mo mele unu Capernaum.² Ale slev matea nona captain mata tamlohi vuro nona mara Rome matea mo rojo, mariviti vara i mate. Tamlohi tavera atu mo opoi volitusi atu mo tavera jea.³ Ale pa captain atu mara mo rongo te hinau matan Iesu, mo ūrule na vajiahia Jew hai la vano isana vara la usia vara i eři mai vara i titiu nařihi na rojoa non nona volitusi atu.⁴ Ale la mai isan Iesu, la lo usia ūrlangi isana lara, “Tamlohi tavera sei enia tamlohi ūruhu matea, mo tataholo vara o tuenia,⁵ matan enia mo opoi na nořa tamlohi, ale enia natu mo voro na nomam ima lotu.”

⁶ Ale Iesu mo usurira. Mo pa lo mai mariviti na ima, ale pa captain atu mo ūrule na tapalana hai la mai isana, la lo lavi na nona reti ale lara, “Moli, o sopo kalvono

purongo, matan enau mo sopo tataholo vara o eři unu na imaku.⁷ Matan haratu, na sopo hitea vara i tataholo vara enau haseku a mai a usia isam. Pani vara o sile te reti hatea purongo, na levosahia vara noku volitusi i pa mele ūruhu.⁸ Matan enau sohena, enau tamlohi matea na lo toho na ruhuru hu suiha tamlohi tinapua matea, ale tamlohi vuro hai la lo toho na ruhuru hu suiha:⁹ vara a verea isan matea vara, ‘O vano!’ i pa vano, ale isana tinapua vara, ‘O mai!’ i pa mai, ale vara a verea isan noku volitusi vara, ‘O vai haratu!’ i pa vaia.”

⁹ Iesu mara mo rongo la reti atu, mo mařurahi tavera hin tamlohi atu, ale mo posí vano isan vao atu sei la lo usuria, mo verea isara mara, “Vara ūruhu, na verea vara na sopo lo tapai te tamlohi nike Israel i lavi na rasua sohen tamlohi nike!”¹⁰ Ale na rani la haratu sei tamlohi tavera atu mo lo ūruleta isan Iesu la mele hilu vano na imana, la hitea vara pa volitusi atu mo pete ūruhu moiso.

Uluvou Matea Mo Turu Na Mateia

¹¹ Mo sopo tuai usuri haratu, Iesu mo vano na taon matea hijana Nain, ale nona tamlohi usuri peresi na vao tavera matea la lo usuria.¹² Mara mo lo mai mariviti na mataruuan taon atu, ale la hutura na tamlohi la lo ali na tamlohi mate matea, mo lo malue na taon, enia vorahese non tinana, ale hařai atu enia malepu matea. Vao tamlohi mataan taon atu la lo usuria.¹³ Ale mara mo hite hařai atu, Iesu mo ūromopoia, ale mo verea isana mara, “O sopo tangi!”¹⁴ Ale mo vano na vatan tamlohi mate atu, mara mo tau na limana hinia, la haratu la lo alia la turu vahatea. Ale mo verea mara, “Uluvou, o turu.”¹⁵ Moiso, tamlohi mate atu mo sakele, ale mo tapulo retireti, moiso Iesu mo silea isan tinana.

¹⁶ Matahu mo sohoni na tamlohi tari, ale la hasohaso God lara, “Přovet aulu matea mo lo turu na livuhařa!” ale lara, “God mo rohi na nona tamlohi!”¹⁷ Ale sorasorahina sei, mo vano asau mo ūralihi na jara Judea peresi na jara tari ūralihi.

John Tamlohi Paptijo (Mt 11.1-19)

¹⁸ Tamlohi usuri non John tamlohi paptijo, la sorahi la hinau tari sei isana. Moiso John¹⁹ mo tovi na vonara mo rua la mai

isana matan vara i ūlula la vano isan Moli vara la usia isana vara, "Engko natu haratu sei i pa mai, teni kama pa lo mele kilau matan te tinapua?"

²⁰ Ale lara la kau isan Iesu lara, "John tamlohi paptijo mo ūrule kamam kama mai isam mara, 'Engko natu haratu sei i pa mai, teni kama pa lo mele kilau matan te tinapua?'"

²¹ Hin aoa atu, Iesu mo titiu nařihi na rojoa na tamlohi matuvana, ale mo titiu nařihi na tanume sasati matuvana, ale isan la haratu la matavuso mo vaira vara la eři kilau. ²² Ale Iesu mo ūramira mara, "Ha vano ha vere John na sava ka hitea, ale ka rongoa: matavuso la mele kilau, tamlohi papao la hahau, tamlohi lepros la vokevoke, peropero la rongo, haratu la mate la mauri, ale la haratu la tilavono la rongo na Retiřuhu. ²³ Ale avulahi isan la haratu la pa sopo ūruhunia hin te rani."

²⁴ Na rani vahařule non John la mele hilu vano, Iesu mo tapulo retireti isan vao atu matan John mara, "Ka vano na jara tano koru vara ha hite na sava ea? Apo matea langi mo lo serea ea? ²⁵ Pani sava natu ka vano vara ha eři hitea ea? Tamlohi matea mo ru na ruru ūruhu matea ea? Ka levosahia vara la haratu la lo ru na ruru ūruhu jea, la lo toho na jara Supe tavera purongo. ²⁶ Sava natu ka opoia vara ha hitea ea? Přovet matea? Varařuhu, pani na verea isamim vara enia mo jeu na přovet. ²⁷ Sava la ulia tuai matana mo verea vara, 'Ha kilau nike! Na lo ūrule na noku vahařule na nahom,

vara i vai na malelem i roi.' *Mal 3.1*

²⁸ Varařuhu na vere isamim vara la haratu la vora isana hařai, mo sopo tea i eři lavi na oloolo i jeu John, pani haratu mo hitahu hin mauri atu God mo aulu hinia, enia mo aulu jea mo jeu John."

²⁹ Na rani tamlohi tari peresi na tamlohi mata lavi na takis la rongo reti nike, la majinga vara sava God mo vaia mo tatahola, matan enira la lavi na paptijo non John moiso, ³⁰ pani Pharissee peresi na tamlohi vujangi mata leu, la ūruhunia masalon God matara, matan la sopo lavi na nona paptijo.

³¹ Iesu mo mele verea mara, "Na sopo levosahia vara a pa verea vara tamlohi

matan nake la sohena sava? ³² La sohena natuvarihi la lo sakele na jara maket la lo uloulo isara hasera lara, 'Kama roro na vete mata lahi, pani ka ūruhunia ha velu; ale kama lalavete na vete mata ūromsati matea, pani ka sopo tangi.' ³³ Matan John tamlohi paptijo mo mai, mo tapuhoro na pereti peresi na waen, ale kara, 'Tanume sasati mo lo toho hinia!' ³⁴ Ale Natun Tamlohi mo mai, mo hanhani ale mo inu, ale kara, 'Ha to kilaua! Hanhani jea matea, tamlohi drong matea, enia mo tapala peresi na tamlohi la lo lavi na takis peresi na tamlohi hehe!' ³⁵ Pani o pa eři hitevosahia vara malele lelevosahi non God mo tatahola mata vuana ūruhu."

Opoia Tavera

³⁶ Ale Pharissee matea mo usi Iesu vara i hanhani peresia, ale mo vano mo unu na iman Pharissee atu mo sakele na tep.

³⁷ Ale atu, hařai malele matea hin taon atu mo levosahia vara Iesu mo lo hanhani na iman Pharissee atu, ale mo lavi na potele matea la vaia na alabaster, hasori ūruhu mo lo toho hinia, ³⁸ mo turu na hařina ale mo papaohi mo lo tangi na palona, ale mo tapulo kamoti na wai matana sei la jovi na palona na vuluna, ale mo lo pungosi na palona, mo rengi na hasori hinira.

³⁹ Pa Pharissee atu sei mo lo usia vara i vano na imana mara mo hite hinia atu, mo verea isana hasena mara, "Vara tamlohi nika enia přovet matea, i pa levosahia vara sava hařai nahai mo lo tikelia, matan enia hařai hehe matea."

⁴⁰ Ale Iesu mo ūrami tamlohi atu mara, "Simon, na opoia vara a vereho na hinia matea."

Ale mo ūramia mara, "Tija, o verea."

⁴¹ Iesu mara, "Tamlohi matea, tamlohi la lo usi na mania isana moiso la pa mele spaia, tupra rua la ave na mania isana. Matea mo ave na denarii mo ngavulu sangavulu lima, matea mo ave na ngavulu lima. ⁴² Na rani la sopo eři mele spaia, tamlohi atu mo ūromsati mo ūromaliho hinia. Ale, sahara hinira i pa opoi tamlohi atu i tavera jea?"

⁴³ Simon mo ūramia mara, "Korong haratu sei nona ave isana mo tavera jea." Ale Iesu mo verea isana mara, "Nom kilakilau mo tatahola." ⁴⁴ Moiso mo posa vano isan hařai atu, ale mo verea isan Simon

mara, "Ko hite hařai nike? Na unu na imam, ko sopo sileau hin te wai vara a hoje na paloku hinia, pani enia mo hoje na paloku na wai matana, ale mo kamotira na vuluna." ⁴⁵ Ko sopo pungosiau, pani mo tapulo hin haratu mo unu, mo sopo lo mapu mata pungosi na paloku. ⁴⁶ Ko sopo rengi na wel na patuku, pani enia mo rengi na hasori ūruhu jea na paloku. ⁴⁷ Matan harihi, na verea isam, vararūhu nona hehe mo matuvana, pani na ūromira moiso matan nona opoia mo tavera jea. Pani haratu nona hehe mo sopo mařivi jea, nona opoia mo sopo tavera." ⁴⁸ Ale mo verea isan hařai atu mara, "Na ūromiho mata nom hehe."

⁴⁹ Ale la haratu la lo sakele peresia na tep, la tapulo vereverea isara hasera lara, "Sava tamlohi nahai, matan mo hitea vara i eři ūromi na hehe?"

⁵⁰ Mo verea isan hařai atu mara, "Nom rasua mo juriho; o vano o toho na tamata."

8

Hařai La Usuri Iesu

¹ Hitahun haratu Iesu mo lo vano toho na taon tavera peresi na vanua. Mo lo retivu-javujangi ale mo lo sile na Retiřuhu matan mauri atu God mo aulu hinia. Ale la nona tamlohi atu mo sangavulu ūromana mo rua la lo toho peresia, ² ale peresi na hařai hai sei Iesu mo lo titiu nařihi na tanume sasati isara peresi na nora rojoa: Mary la tovia Magdalene, enia natu, tanume sasati mo limaravrua la malue isana, ³ peresi Joanna, naroun Chuza, patu tamlohi mata kilau na iman supe Herod, peresi Susanna, enira peresi na vao matuvana tinapua la lo tueni Iesu peresi na nona tamlohi na nora tvtav purongo.

Tamlohi Lavo Na Piri (Mt 13.1-9; Mk 4.1-9)

⁴ Ale na rani vao tavera la lo tapulo takonahi, ale tamlohi mata taon tari la lo mai isana, moiso Iesu mo vere na titieu matea mara, ⁵ "Tamlohi hapořahi piri matea mo vano vara i hapořahi na piri. Mo lo hapořahi na piri mo lo vano, tatuara la jovi na malele, ale tamlohi la varasi kosakosahira, ale maji avuavu la hanira." ⁶ Tatua piri la jovi na vatuvatu, ale na rani la ulua la mele mahoa matan

mo sopo te heu i tikelira. ⁷ Ale tatua piri la jovi na livuha vipahai ngařngařiha, ale vipahai ngařngařiha la punira. ⁸ Ale tatua piri la jovi na lepa ūruhu, ale la ulua la vua la namaha mo vaha ngavu sangavulu hin la haratu mo lo hapořahira tiroma. Haratu mo eři rongovosahia, o tapurongo!"

Mo Sile Na Titieu Mata Sava (Mt 13.10-17; Mk 4.10-12)

⁹ Ale na rani nona tamlohi usuri lara la usia na ūramin titieu atu, ¹⁰ mo verea mara, "Isamim God mo tinařihi vara ha pa levosahi na hina luhu matan mauri atu God mo aulu hinia, pani isana tamlohi tinapua enia mo lo toho na titieu matan vara Retitapu i pa masese:

'La hite na sava na lo vaia
pani la pa sopo hitevosahia,
la pa rongo na sava na lo verea,
pani la pa sopo rongovosahia.' *Isa 6.9*

Titieu Atu (Mt 13.18-23; Mk 4.13-20)

¹¹ Ale ūramin titieu atu enia nahai: Piri atu enia reti non God. ¹² La haratu na malele enira la haratu la rongoa moiso, ale Tiapolo mo mai, mo lanařihi reti atu na mapura matan vara la pa sopo eři rasua, ale vara la eři juri hinia. ¹³ La haratu na vatuvatu enira la haratu la rongo reti atu, la lavia na avulahi. Pani mo sopo te warira, la rasua mata makomo rani purongo, ale na rani vahite, la jovi. ¹⁴ La haratu la jovi na livuha vipahai ngařngařiha enira la haratu la rongo reti atu pani lara la vano, ūromkaka peresi na ūrom tvtav peresi na masalo tamlohi mo punira, ale vuara la sopo jea. ¹⁵ Pani la haratu la jovi na lepa ūruhu, enira la haratu la rongo reti atu, ale la tauria mo ūrilangi na mapura ūruhu na posposi vararūhu, ale la vua peresi na ūromperavu.

I Pa Sopo Te Hinau I Eři Luhu (Mk 4.21-25)

¹⁶ Mo sopo te tamlohi vara i hasahi na nona lamu matea ale i povia hin te baket teni i taua na ruhuruhi vata matea, mo vono. Pani i pa kehoia aulu na jarana matan vara tea la unu na imana la pa hite na merana. ¹⁷ Matan i pa sopo te hinau hatea i eři luhu vara i pa sopo pala, teni te hina luhu vara i pa sopo pala na jara

tavera. ¹⁸ Ha lo levosahi na sava ka lo rongoa, matan isan haratu mo lavia, i pa mele lavia i tavera jea, ale isan haratu mo sopo te nona, hina purongo vara sava mo ūromūromia vara mo lavi moiso, la pa lanañihia isana.”

*Tasin Peresi Na Vetasin Iesu
(Mt 12.46-50; Mk 3.31-35)*

¹⁹ Ale tinana peresi na tasina la mai isana, pani la sopo eři mai mariviti isana matan vao tavera atu. ²⁰ Hai la verea isana lara, “Tinam tolu na tasim la lo turu na jingoima, la opoia vara la hiteho.”

²¹ Pani Iesu mo ūramira mara, “Tinaku peresi na tasiku enira la haratu sei la rongo na reti non God ale la vaia.”

*Iesu Mo Savurahi Na Langi
(Mt 8.23-27; Mk 4.35-41)*

²² Na rani matea mo vele na boti matea tolu na nona tamlohi usuri, ale mo verea isara mara, “Ra vano tavalu vano na tavalu tasin Galilee.” Ale la malue, ²³ ale la pa lo vano, ale Iesu mo juruvi ūromalihi. Ale langi tavera matea mo jovi hin tasi atu, botira mo lo utua, mariviti la pute.

²⁴ Ale nona tamlohi la vano la ūrohaia lara, “Moli, Moli, ūra lo tapulo tihai!” Ale mo turu mo reti savurahi langi atu peresi la leputi tavera atu ale la isoiso mo tamata.

²⁵ Mo verea isara mara, “Nomim rasua mo lo toho epu?” Ale la matahu la mařurahi tavera hinia, la lo vereverea isara lara, “Sava tamlohi nahai? Enia mo reti purongo isana langi peresi na tasi, ale la ooloolo hinia!”

*Tanume Sasati Na Mara Gerasenes
Matea
(Mt 8.28-34; Mk 5.1-20)*

²⁶ Hitahun haratu la hapahapan la vano na jara mara Gerasenes, jara atu enia mo lo toho na tavalun Galilee. ²⁷ Iesu mara mo sevuti na jarauta, tamlohi matea tanume sasati la lo toho hinia mo pala isana. Tuai moiso tamlohi atu mo lo malamala purongo, ale mo sopo toho na lolon te ima pani tarea mo lo toho na jara taptap. ²⁸ Ale pa tamlohi atu mara mo hite Iesu, mo ulo aulu, ale mo mai mo jovi na nahon Iesu mo verea na leo tavera matea mara, “Engko te nom sava isaku, Iesu Natun God Aulu Jea? Na tangi isam, aah! O sopo vallejilejiau!” ²⁹ Matan mo retileu isan tanume lumiha

sasati atu vara i malue hin tamlohi atu. Matan rani mo visa moiso tanume sasati atu mo lo sohoni tamlohi atu. Tamlohi la taurilatia ale la tau na jen na limana peresi na palona, pani mo lo roto la jen atu, ale tanume sasati atu mo tiroma hinia mo lo vano na jara hasetoho.

³⁰ Iesu mo usia isana mara, “Hijam hare?” Ale mo verea mara, “Legion!” Hija atu mo verea matan tanume sasati matuvana jea la lo toho hin tamlohi atu. ³¹ Ale tanume sasati la tangi isana vara i pa sopo retileu isara vara la sivo hin koko tavera jea atu sei mo sivo atano jea na lolo varama mata mateia. ³² Hin jara atu vao poi matea la lo hanhani na pahisa vutivuti atu, ale la tanume sasati atu la tangi isana vara i tinañihira la unu hinira, ale mo tinañihira. ³³ Ale la tanume sasati atu la malue hin tamlohi atu la unu hin pa vao poi atu, moiso vao poi atu la maro sevuti hin pesapesa atu la jovi sivo na tasi la pute.

³⁴ Ale tamlohi kilau la poi atu lara la hite hinau atu mo masese, la rovo ale la sorahia na taon tavera peresi na jara ūralihi atu.

³⁵ Ale moiso tamlohi la vano vara la hite na sava mo masese, ale la kau isan Iesu la tapai pa tamlohi atu sei tanume sasati la lo malue hinia moiso mo lo sakele na palon Iesu, mo ruru ale ūromina mo ūruhmoiso, ale la matahu. ³⁶ Ale la haratu sei la lo hite hinau atu la verea isara sohena sava tanume sasati la malue hin tamlohi atu. ³⁷ Ale tamlohi tari ūralihi hin jara atu Gerasenes la usia vara i malue isara, matan matahu tavera mo sohonira. Ale mo mele vele hin pa boti atu ale mo mele hilu. ³⁸ Pa tamlohi atu sei tanume sasati la lo malue isana, mo usia ūrlangi vara i usuria, pani Iesu mo ūrulea mara, ³⁹ “O mule, ale o vereuli na sava God mo vaia matam.” Ale mo vano, mo retivujavujangni na jara tari hin taon tavera atu na sava Iesu mo vaia matana.

*God Mo Lo Kilau Mata Rasua
(Mt 9.18-26; Mk 5.21-43)*

⁴⁰ Ale na rani Iesu mo mele hilu, pa vao tamlohi atu la avulahi matan la lo saovia.

⁴¹ Ale hin jara atu, tamlohi matea hijana Jairus mo mai isana, enia tamlohi aulu hin ima lotu atu. Ale mo jovi na palon Iesu mo tangi isana vara i mai na imana, ⁴² matan

venatuna vorahese matea, taunina mo sangavulu ūromana mo rua, mariviti i mate.

Ale Iesu mo lo vano, tamlohi la lo tia-tia hinia.⁴³ Ale hařai matea, rojo nona hařai mo lo toho mo tuai isana mata tauni mo sangavulu ūromana mo rua moiso, hina purongo vara mo jalahi vevuhi na nona mania isana Doctor, mo sopo tea i eři vai mamahunia.⁴⁴ Mo mai na hařin Iesu, ale mo tikeli na revrevu nona ruru, ale vahatea purongo nona rojo mo isoiso.

⁴⁵ Ale Iesu mara, "Hare natu mo tikeliau?"

Tamlohi tari lara enira mo vono, ale Peter mara, "Moli, vao nike la porotiho, la lo tiatia isam!"

⁴⁶ Pani Iesu mara, "Tamlohi matea mo tikeliau, matan na rongovosahia vara suiha mo malue isaku."⁴⁷ Ale na rani hařai atu mo hitea vara i sopo eři mele luhu, mo mai isana mo savaravara, mo jovi na nahona, ale mo vereulia na naho tamlohi vara mata sava natu mo tikelia, ale sohena sava Iesu mo vai na nona rojoa mo tihai vahatea purongo.⁴⁸ Ale Iesu mo verea isana mara, "Venatuku, nom rasua mo vaiho ko ūruhu; o vano peresi na tamata."

⁴⁹ Na rani mo pa lo retireti, volitusi matea na iman tamlohi aulu atu mo mai isan tamlohi aulu atu mara, "Venatum mo tihai moiso; o sopo mele verea isan Tija sei."

⁵⁰ Pani Iesu mara mo rongo hinau atu mo verea isana mara, "O sopo matahu; o rasuau purongo ale venatum i pa ūruhu."

⁵¹ Ale na rani mo mai mo kau na iman pa tamlohi aulu atu, mo sopo tinařihia vara tea iunu peresia, pani Peter purongo enia John, James, peresi taman hařarihi atu enia tinana.⁵² Ale tamlohi la lo tangi, ale la lo tangtangi matana, pani Iesu mo verea mara, "Ha sopo tangi matan enia mo sopo mate, pani mo lo juruvi purongo."

⁵³ Ale la manaluluhia matan la levosahia vara enia mo mate moiso.⁵⁴ Pani mo tauri na limana mo tovia mara, "Natirihi, o turu!"⁵⁵ Ale maurina mo mele unu hinia, ale mo turu vahatea. Iesu mo verea isara vara la silea hin te hinau vara i hania.⁵⁶ Ale tamana enia tinana la mařurahi tavera, pani mo verea isara vara la sopo mele vere te tamlohi hatea na sava mo masese.

9

Iesu Mo Rule Na Nona Vahařule (Mt 10.5-15; Mk 6.7-13)

¹ Ale mo tovi la tupu sangavulu ūromana mo rua atu la mai jara matea, ale mo silera na suiha vara la aulu na tanume sasati tari, ale vara la eři vai na rojoa la tihai,² ale mo ūrulerla la vano vara la retivujavujangi hin mauri atu God mo aulu hinia, ale vara la vai mamahuni na tamlohi na nora rojoa.

³ Ale Iesu mo verea isara mara, "Ha vano lekoleko na malelemim, ha sopo lavi te tihonimim teni te tanga, teni te pereti, teni te mania, ale ha sopo lavi te ruru i rua.⁴ Ale sava ima ka unu hinia, ha lo toho atu i tikeli na rani ka opoia vara ha mele malue hin taon atu.⁵ Ale sava jara la ūrohu vara la lavi kamim, vara ka malue hin taon atu, ha sařsářhi nařihi na tangotango palomim sohena matamata matea matan God mo tipahira."

⁶ Nona tamlohi la malue la vano na vanua tari, la retivujavujangi na Retiřuhu, la vai na rojoa la tihai na jara tari la vano ea.

Supe Herod Antipas Mo Romikaka (Mt 14.1-12; Mk 6.14-29)

⁷ Hin rani atu, Herod Antipas natun supe Herod mo lo tamlohi aulu hin Judea, ale mo rongo la hinau atu la lo masese, ūromina mo sopo sakele matan hai la lo verea lara John tamlohi Paptijo mo mele turu na mateia,⁸ ale hai lara Elijah mo mele pala, hai tinapua isara lara přovet matan tuai matea mo mele turu.

⁹ Herod mara, "Enau na tairoto na patun John moiso, pani sava tamlohi nahai sei na lo rongo na sorasorahina?" Ale Herod mo opoia vara i hitea.

Mo Vahani Na Vao Tavera Matea (Mt 14.13-21; Mk 6.30-44; Jn 6.1-14)

¹⁰ Na rani vahařule non Iesu la mele pala, la vere na hinau tari la vaira isana. Ale mo lavira la malue la vano hasera na taon matea la tovia Bethsaida.¹¹ La vao atu lara la levosahia, la usuria ale mo avulahi hinira mo vujangira hin mauri atu God mo aulu hinia, ale mo vai na rojoa non la haratu la rojo la tihai.¹² Ravravi mo lo sivo, ale la tupu sangavulu ūromana mo rua atu la mai la verea isana lara, "O ūrule vao nike

la vano la aleale hara hinau peresi na nora jara juruvi na vanua tari hin jara tavera nike, matan ū lo toho na jara hasetoho nahai.”

¹³ Pani mo verea isara mara, “Kamim natu ha silera hin te hinau vara la hania.”

Lara, “Kama lo lavi na pereti mo lima peresi na maji mo rua purongo, avei ko lo verea vara kama pa vano mata voli te hinau han la tamlohi tari nike?” ¹⁴ Matan evi tamlohi purongo korong mo tikeli tari

vaha lima ⁽⁵⁰⁰⁰⁾ Iesu mo verea isana nona tamlohi usuri mara, “Ha vaira la sakele tamlohi mariviti i ngavulu lima na vao matea.” ¹⁵ Ale la vaia sohena, la vaira enira mo isoiso la sakele. ¹⁶ Ale Iesu mo lavi la pereti atu mo lima peresi la maji atu mo rua, mo tařa sahe aulu na tuka mo leřuhu hinira, moiso mo tope la pereti atu mo silea isana nona tamlohi usuri vara la taua na nahon la vao atu. ¹⁷ Ale tamlohi tari la hanhani la masu. Ale la takonahi na sope hanhani, la sohonia na tanga mo sangavulu ūromana mo rua.

Iesu Enia Křisto (Mt 16.13-19; Mk 8.27-29)

¹⁸ Na rani tinapua matea, Iesu mo lo usiusi enia hasena, ale nona tamlohi usuri la lo toho atu, ale mo usia isara mara, “La vao nike la lo verea lara enau hare?”

¹⁹ Ale la ūramia lara, “John tamlohi pap-tijo. Pani hai lara Elijah, ale tatuara lara přovet matea matan tuai mo mele turu.”

²⁰ Moiso mo verea isara mara, “Pani kamim kara enau hare?” Ale Peter mo ūramia mara, “Engko Křisto non God!”

²¹ Ale mo horora vara la sopo mele vere hinau atu isan te tinapua hatea, ²² mara, “Natun tamlohi i pa lavi na rongohaji na hinau matuvana, ale tamlohi aulu hin Israel peresi na Moli mata pris tolu na tamlohi vujangi mata leu, la pa ūrohu hinia, la pa vilimateia, ale na hatolu rani i pa mele turu na mateia.”

²³ Ale mo verea isara mo isoiso mara, “Vara tea mo opoia vara i usuriau, i ūrohu na masalona, ale i soloti na nona talopeilopei tarea ale i usuriau. ²⁴ Matan sava tamlohi mo opoia vara i hase juri na maurina, maurina i pa tihai; pani sava tamlohi mo vaitihai na masalona matakū, i pa juri na maurina. ²⁵ Matan sava mo

řuhu isana tamlohi matea vara i lavi ve-vuhi na hinau tari na varama, pani hitahu maurina i pa tihai? ²⁶ Matan hare mo mahanuhanu hiniau peresi na noku reti, Natun Tamlohi i pa mahanuhanu hinia hin rani atu vara i mai na hasohasona tolu na hasohason Tama peresi na angelo tapu. ²⁷ Pani varuřuhu na verea isamim, vara tatuamim la lo turu nakerihi akerihi la pa sopo hite na mate vavano la hite mauri atu God mo aulu hinia i pala.”

La Hite Na Hasohason Iesu (Mt 17.1-8; Mk 9.2-8)

²⁸ Ale korong rani mo limaravtolu mo vano moiso hin la nona retireti atu, Iesu mo lavi Peter, John peresi James la sahe aulu na vutivuti mata usiusi. ²⁹ Ale mo lo usiusi, nahona mo posi, ale nona ruru merara la ūlangi jea mata kilaura. ³⁰ Eh! Tamlohi mo rua la lo retireti peresia, Moses enia Elijah, ³¹ la pala na hasohaso tavera la lo sorahia na nona malue sei i pa masese Jerusalem i pa sopo tuai.

³² Ale Peter tolu na tapalana sei la lo toho peresia la malokoloko sati na juruvi, pani mara la hite na hasohasona peresi na tamlohi mo rua la lo turu peresia matara mo ūlangi. ³³ Ale la tamlohi atu lara la lo malue isana, Peter mo verea isan Iesu mara, “Tamlohi tavera, mo ūrohu jea matan kama lo turu akerihi nakerihi. Mo ūrohu vara kama turuhi te tent i tolu akerihi, nom matea, matea non Moses, ale matea non Elijah!” Pani Peter mo sopo levosahi na sava mo lo verea. ³⁴ Mo pa lo vere la hinau sei, telangi matea mo jovi tataholo isara, ale matahu tavera mo sohonira matan telangi atu mo hovira.

³⁵ Ale leo matea mo malue hin telangi atu mara, “Haranike enia Natuku, haratu na viřonia; ha tapurongo isana!” ³⁶ Leo atu mara mo reti mo isoiso, Iesu hasena mo pa lo toho atu. Ale la nona tamlohi usuri atu la sopo mele verevere, ale la sopo vere na sava la hitea isan tea hin la rani atu.

Natun Tamlohi Matea (Mt 17.14-21; Mk 9.14-29)

³⁷ Mo mele rani sahe, lara la sevuti hin vutivuti atu moiso, vao tavera matea mo tapaira. ³⁸ Ale moiso, tamlohi matea hin vao atu mo ulo mara, “Tija, na usia ūlangi isam vara o mai o hite natuku matan enia

vorahese. ³⁹ Tanume sasati matea mo sohonia, ale vahatea purongo mo ngara. Mo lo tuatuahia vavano valval jingona mo lo malue; mo lohilohi na epena tari, mo ūru vara i malue hinia. ⁴⁰ Na usia ūlangi isana nom tamlohi usuri vara la pa titiu nařihia, pani la sopo eři vaia!"

⁴¹ Iesu mo ūramia mara, "Kamim mo sopo te nomim rasua, ka pina lejileji, na sopo levosahia vara a pa toho i tikeli pangisa isamim natu ha pa rongovosahi. O lavi natum i mai!" ⁴² Mo pa lo mai, tanume lumiha sasati atu mo mele vujahia sivo na lepa, ale mo tuatuahia. Pani Iesu mo savurahi tanume sasati atu, ale mo vai na epena tari la mele ūru, moiso mo silea isan tamana. ⁴³ Ale tamlohi tari la mařurahi tavera na suiha tavera non God.

Iesu Mo Mele Retireti Vara I Pa Mate (Mt 17.22-23; Mk 9.30-32)

Pani la pa lo mařurahi na hinau tari sei mo lo vaira, Iesu mo vereea isana nona tamlohi usuri mara, ⁴⁴ "Ha lo levosahi na sava a pa vereea isamim: i pa sopo tuai la pa tau Natun Tamlohi na lima tamlohi." ⁴⁵ Pani la sopo levosahi nona reti sei, God mo jorohia isara matan vara la pa sopo eři rongovosahia, pani la matahu vara la usia na ūramin reti atu.

Hare Mo Aulu Mo Jea Na Tinapua (Mt 18.1-5; Mk 9.33-37)

⁴⁶ Mo sopo tuai vauriuri matea mo malue isara vara hare isara enia mo aulu jea. ⁴⁷ Pani Iesu mo levosahi na ūromira, mo turu mo lavi na natirihi matea mo taua na pahisana, ⁴⁸ ale mo vereea isara mara, "Vara tea mo lavi te natirihi sohen harihi na hijaku, enia mo laviau. Ale sava tamlohi mo laviau mo lavi haratu mo lo ūruleau. Matan haratu mo atano jea hin kamim, enia natu mo aulu jea."

Hare Enia Tapalan Iesu? (Mk 9.38-40)

⁴⁹ John mo ūramia mara, "Moli, kama hite na tamlohi matea mo lo titiu nařihia na tanume sasati na hijam, ale kama vahitea vara kama horoa matan enia mo sopo vonamam matea."

⁵⁰ Pani Iesu mo vereea isana mara, "Ha sopo horoa, matan haratu mo sopo mere-sahi isamim enia tatuamim."

Mara Samaria La Tipahi Iesu

⁵¹ Rani mo lo mai mariviti vara i sahe na tuka, Iesu mo tau na ūromina vara i sahe Jerusalem. ⁵² Ale mo ūrule na tamlohi hai la vano tiroma hinia, ale la vano la unu na vanua matea nona mara Samaria matan vara la pa tatamahu matana. ⁵³ Pani la tamlohi atu la ūru hinia matan mo tau na ūromina vara i sahe Jerusalem. ⁵⁴ Ale nona tamlohi usuri sei James enia John lara la rongoa lara, "Moli, ko opoia vara kama usi na hapu na tuka i jovi sivo i sulira?" ⁵⁵ Pani Iesu mo posí mo reti isara. ⁵⁶ Ale la malue la vano na vanua tinapua.

Hare I Pa Usuri Iesu (Mt 8.19-22)

⁵⁷ La pa lo vano na malele, ale tamlohi matea mo vereea isana mara, "A pa usuriho vano na sava jara ko vano ea."

⁵⁸ Ale Iesu mo vereea isana mara, "Viriu jala enira nora jara juruvi mo lo toho, maji avuavu enira taura, pani Natun Tamlohi mo sopo te nona jara juruvi."

⁵⁹ Isana tinapua mo vereea mara, "O usuriau!"

Pani tamlohi atu mara, "Moli, o tinařihiau a vano a tavuni tamaku tako."

⁶⁰ Ale Iesu mo vereea isana mara, "O tinařihia la haratu la mate la tavuni na nora mate. Pani engko, o vano, o retivujavu-jangi mauri atu God mo aulu hinia."

⁶¹ Ale mele tamlohi tinapua matea mo vereea mara, "A pa usuriho Moli, pani o tinařihia vara a vano a tulahi na tahisaku tako."

⁶² Iesu mo vereea isana mara, "Haratu mo sopo tau na ūromina i ūlangi vara i tikeli na isoisona, mo sopo tatahola vara i unu hin mauri atu God mo aulu hinia."

1 Ki 19.19-21

10

Vayahinau Nona Tamlohi Usuri

¹ Hitahun haratu, Moli mo viřoni na tupu ngavulu limaravrua mo rua tinapua *(72)*, ale mo ūlera la vano tiroma hinia, la vano mo rua rua na taon tari peresi na jara sei i pa vano ea i pa sopo tuai. ² Ale Iesu mo vereea isara mara, "Vua asitauni mo mařivi hajavua pani tamlohi voko enira tupu visalete purongo. Matana, ha usiusi isan Moli mata asitauni vara i ūrule na tamlohi voko la vano mata vu na nona

asitauni. ³ Ha vano na malelemim; ha lo levosahia vara na lo ūrule kamim ka lo vano sohena natu sipsip na livuha viriu jala. ⁴ Ha sopo lavi te tanga korohi, teni te tanga, teni te sabat, ale ha sopo sile na retiololo isan tea na malele.

⁵ Sava ima ka unu hinia, tiroma ha verea vara, ‘Tamata i pa toho hin ima akerihi!'

⁶ Ale vara tea hin ima atu mo avulahi hin kamim, nomim lēruhu i pa lo toho isana, pani vara mo vono, i pa mele hilu mai isamim. ⁷ Ale ha lo toho hin ima atu purongo, ale ha lavi na sava la silea mata inua peresi na hanhani, matan mo tataholo vara tamlohi voko i lavi na volina. Ha lo juruvi na ima matea purongo.

⁸ Vara ka unu na taon matea, ale la lavi kamim, ha hani na sava la taua na nahomim. ⁹ Ha vai na nora rojoa la tihai, ale ha verea isara vara, ‘Mauri atu God mo aulu hinia mo mai mariviti isamim moiso.’ ¹⁰ Pani vara ka unu na taon matea, ale la ūrohu hin kamim, ha sivo na nora malele tavera, ale ha verea vara, ¹¹ ‘Kama sārsāhi nārihi na tangotango nomim taon na palomam sohena matamata matea na nahomim matan ka ūrohu hin kamam, ale matana, God i pa ūrohu hin kamim. Ha lo levosahia vara mauri atu God mo aulu hinia mo lo mai mariviti.’ ¹² Varařuhu na verea isamim, vara talai non Sodom i pa sopo ūilangi i tikeli na talai nona taon sohen harihi na rani mata aria.

Tamlohi Matuvana Israel La Sopo Rasua (Mt 11.20-24)

¹³ Rani sasati isam Chorazin! Rani sasati isam Bethsaida! Matan vara la hina mařurahi nike sei la vaira isamim la pa lo vaira hin Tyre enia Sidon, enira la pete posi moiso tuai, la ru na paraparati paki, ale la vuluvului na patmakovi moiso mata nora hehe. ¹⁴ Pani talai non Tyre enia Sidon i pa sopo ūilangi i tikeli na nomim talai na rani mata aria. ¹⁵ Ale engko Capernaum, ko ūrom vara God i pa taheho o sahe na tuka? I pa tauho sivo atano na varama mata mateia!

¹⁶ Haratu sei mo tapurongo isamim mo tapurongo isaku, ale haratu mo ūrohu hin kamim mo ūrohu hiniau; ale haratu mo ūrohu hiniau mo ūrohu hin haratu sei mo lo ūruleau.”

¹⁷ Hitahu la tupu ngavulu limaravrua mo rua atu la mele hilu mai isan Iesu na avulahi lara, “Moli, tanume sasati sohena, la oolo lo hin kamam mata hijam!” ¹⁸ Ale Iesu mo verea isara mara, “Na hite Setan mo jovi sivo atano sohena vaha na masapa mo sari na varama. ¹⁹ Ha lo levosahia vara na sile kamim na suiha vara ha varasi na mata peresi na novu lepa peresi na suiha tari tinatinapua non Setan matan ha pa aulu hinira mo isoiso, ale i pa sopo te hinau hatelete hinira i eri komo kamim. ²⁰ Varařuhu, pani ha sopo avulahi matan tanume sasati la oolo lo hin kamim; pani ha avulahi matan God mo uli na hijamim moiso na tuka!”

Iesu Mo Vere Meje Isan God Tama (Mt 11.25-27; 13.16-17)

²¹ Na ranin hinau atu, Iesu mo avulahi na suihan Tanume Tapu ale mara, “Na vere meje isam Tama, Moli matan tuka peresi na varama, matan ko jarohi la hinau nike isana tamlohi lelevosahi peresi na tamlohi rongovosahi, ale ko vujangira isana natuvarihi purongo. Varařuhu Tama, ko avulahi hinia matan mo usuri na masalom ūruřuhu!

²² Tamaku mo sileau na hinau tari, ale mo sopo tea i levosahia vara Natuna enia hare pani Tama purongo, ale mo sopo tea i levosahia Tama pani Natuna purongo peresi na sava tamlohi Natuna mo viřonia vara i vujangia isana.”

²³ Moiso mo posi vano isana nona tamlohi usuri mo varavaramasa isara mara, “Avulahi isamim matan ka hite na sava ka lo hitea. ²⁴ Varařuhu na verea isamim, p̄ovet peresi na supe matuvana la lo kilau vara la hite na sava ka lo hitea, ale vara la rongo na sava ka lo rongoa, pani la sopo rongoa.”

Retileu Atu Mo Aulu Jea

²⁵ Ale na rani matea tamlohi lelevosahi mata leu matea mo turu vara i vahite Iesu na retiusia matea sohen harihi, “Tija, a pa vai na sava natu, vara a lavi na mauri tui hinia?”

²⁶ Iesu mo verea isana mara, “La uli na sava na Leu? Na nom kilakilau mo verea sohena sava?”

²⁷ Ale mo ūramaria mara, “ ‘O opoi Moli nom God vevuhi na mapum, na maurim, na suiham peresi na ūromim’;

Deut 6.5

ale, 'O opoi na tahisam sohen ko lo opoiho hasem'.”

Lev 19.18

²⁸ Moiso, Iesu mo verea isana mara, “Ko verea mo tataholo. O vaia sohena, ale o pa mauri matana.”

Hare Enia Tahisaku?

²⁹ Tamlohi atu mo opoia vara i hasena vaia i tataholo na nahon Iesu, ale mo verea isan Iesu mara, “Ale, hare enia tahisaku?”

³⁰ Iesu mo ūramia mara, “Ale na rani matea tamlohi matea mo tai Jerusalem mo lo sivo Jericho, ale tamlohi vili na tamlohi mata vavanaho hai la tauria la ūrari nařihi na nona ruru, la lavi nařihi na nona mania, moiso la vilia la pulahia na malele mariviti i mate, ale la malue.

³¹ Ale mo sopo tuai p̄ris matea mo lo sevuti hin malele atu mo hitea, pani mara mo hite tamlohi atu mo hahau pahipahi hinia. ³² Ale sohen haratu purongo, tamlohi voko na Temple matea na vaon Levi mara mo mai hin jara atu mo hitea, ale mo hahau pahipahi hinia. ³³ Pani hitahu, mara Samaria matea na nona hahau mo mai hin jara atu, ale mara mo hitea mo ūromopoia. ³⁴ Mo rautoho na pahisana, mo rengi na wel peresi na waen na matara maja, ale mo pesira, moiso mo taua aulu na haři pulana donki, ale mo lingia mo mai na ima mapu matea, mo lo kilaua atu. ³⁵ Mele rani sahe tamlohi atu mo sile na tamlohin ima mapu atu na mania mo tataholo mata voko mata rani mo rua mara, ‘O lo kilaua, ale sava hinau ko jalahia matana, a pa mele spaia na rani na mele pala nike.’”

³⁶ Ale Iesu mo usia isana mara, “Na ūromim, sava tamlohi natu hin la haratu mo tolu enia tahisan tamlohi atu sei tamlohi vili na tamlohi mata vavanaho la tauria?”

³⁷ Moiso pa tamlohi atu mo ūramia mara, “Haratu mo ūromopoia.”

Ale Iesu mo verea isana mara, “O vano o vaia sohena.”

Martha Enia Mary

³⁸ Ale na malelera la lo vano Jerusalem, Iesu mo unu na vanua matea, ale hařai matea hijana Martha mo avulahi vara i unu na imana. ³⁹ Ale vetasina matea hijana Mary, mo sakele na palon Moli mo lo tapurongo na nona vujangi. ⁴⁰ Pani Martha mo tiatia na nona tatamahu, ale mo mai isan Iesu mara, “Moli, ko sopo

romiau matan vetasiku mo rovo hiniau, ale enau haseku purongo na lo tatamahu? O verea isana vara i mai i tueniau!”

⁴¹ Pani Moli mo ūramia mara, “Martha, Martha engko ko ūmkaka na hinau matuvana, ⁴² pani hinau matea mo aulu jea. Mary mo viřoni na sava mo mele ūruhu jea sei tea i pa sopo eři lavi nařihia isana.”

11

Vujangi Mata Usiusi (Mt 6.9-15; 7.7-11)

¹ Ale Iesu mo lo usiusi na jara matea, ale mara mo isoiso, nona tamlohi usuri matea mo verea isana mara, “Moli, o vujangi kamam mata usiusi sohen John tamlohi papitijo mo lo vujangi na nona tamlohi usuri hinia.”

² Ale Iesu mo verea isara mara, “Vara ka usiusi, ha verea vara:
God Tama, kama opoia vara tamlohi
tari la sile na oloolo tavera isam
matan engko ko tapu.
Kama opoia vara nom suiha aulu mata
supe i pala.”

³ O sile kamam na hanhani matan nohorihī,

⁴ O ūromi kamam matan nomam hehe
sohena kama lo ūromi na hehe nona
tinapua isamam.

O lavi nařihi kamam na hina vahite.”

⁵ Ale mo verea isara mara, “Ra levosahia vara, vara te tapalam mo mai isam na livuha vutepongi ale mo verea isam vara, ‘Tapala, o eři sileau hin te pereti i tolu, ale a pa mele spaia, ⁶ matan tapalaku matea mo pa pala purongo na nona hahau, ale mo sopo te sope hanhani vara a silea isana.’

⁷ Ale na lolo ima o pa ulo isan tapalam na jingoima vara, ‘O sopo vaore, matarua mo pelati ale natuku la lo juruvi peresiau na vata. A sopo eři turu vara a sileho hin te hinau.’ ⁸ Varařuhu na verea isamim, hina purongo vara enia tapalam matea, o pa sopo eři turu vara o silea hin te hinau hatea, pani o pa turu vara o sile na sava mo opoia matan mo lo ajiho matana.

⁹ Varařuhu na verea isamim, ha usia, ale i pa mai isamim; ha alea, ale ha pa lavutia; ha ūrerengi, ale i pa roi isamim. ¹⁰ Matan tamlohi tari sei la usia la lavia, ale haratu

mo alea, mo lavutia, ale isan haratu mo lo ūrerengi, pelati i pa roi.

¹¹ Ale sava tama isamim, vara natuna mo usia na maji matea, i pa turu i sile na mata sasati matea isana, pani mo sopo maji sei mo usia? ¹² Teni vara mo usia hin te esile toa, i pa turu i silea na novu lepa? ¹³ Vara kamim sei ka sasati jea, pani ka levosahia sohena sava vara ha sile na otori ūruhu isana natumim, ha lo levosahia vara God Tama na tuka i pa sile na hinau mo ūruhu jea sohena Tanume Tapu, isan la haratu la usia!"

*Beelzebul Enia Setan
(Mt 12.22-30; Mk 3.20-27)*

¹⁴ Na rani matea Iesu mo titiu nařihi na tanume sasati matea sei mo vai na tamlohi matea mo mengo. Pa tanume sasati mara mo malue, pa mengo atu mo retireti, ale tamlohi la mařurahi tavera. ¹⁵ Pani tatuara lara, "Enia mo lo titiu nařihi na tanume sasati na hijan Beelzebul, tamlohi tavera nona tanume sasati!" ¹⁶ Ale tatuara, matan la opoia vara la vahitea, la ajia vara i vai te matamata mařurahi hatea i tai na tuka.

¹⁷ Pani matan Iesu mo levosahi na ūromira mo verea isara mara, "Jara supe tari sei la patumasa na lolora la pa puru, ale patumasa na lolo ima matea i pa aseasera la jovi. ¹⁸ Ale, vara Setan sohena mo lo hase valum isana hasena matan enia mo vaiau na eři titiu nařihi na nona tanume sasati, nona suiha mata supe i pa turu sohena sava? ¹⁹ Ale, vara na lo titiu nařihi na tanume sasati na hijan Beelzebul, hare natu mo lo tueni na natumim na rani la lo titiu nařihi na tanume sasati? Matan haratu, enira natu la pa nomim tamlohi aria. ²⁰ Pani vara na lo titiu nařihi na tanume sasati na suihan God, ka levosahia vara mauri atu God mo aulu hinia mo pala isamim. ²¹ Vara tamlohi suiha matea sei mo tatamahu mata valum, enia mo lo matahi na imana tavera, nona tavitav la pa lo toho i ūruhu. ²² Pani vara tea mo mele suiha mo jeua mo mai mo valum peresia, ale mo jeua, enia i pa lavi nařihi na nona hinahinau mata vuro sei mo lo tau na nona rasua hinira, ale i pa ase na nona tavitav.

²³ Haratu mo sopo turu peresiau enia mo lo turuleji hiniau, ale haratu mo sopo vilevilei peresiau mo lo levuti jalajalai.

*Vujangi Mata Tanume Sasati
(Mt 12.43-45)*

²⁴ Vara te tanume lumiha sasati mo malue na tamlohi matea, mo vano ūralihi na jara hasetoho mo lo aleale nona jara mapu, ale mara mo sopo hite tea mo verea mara, 'A pa mele vano na imaku sei na tai ea!' ²⁵ Ale, mara mo mele mai mo hite imana atu la tivesia, ale la vai mamahunia. ²⁶ Moiso, mo mele vano mo lavi na tanume lumiha sasati mo limaravrua tinapua sei la sati la jeua, ale la unu hin ima atu ale la lo toho hinia. Ale hitahu, maurin tamlohi atu i pa sati i jeu tiroma."

²⁷ Iesu mo pa lo vere la hinau nike, hařai matea hin vao atu mo ulo isana mara, "Avulahi isan hařai atu mo tapeho ale mo kilauho!"

²⁸ Iesu mo ūramaria mara, "Avulahi i pa mele ūruhu jea isan la haratu la rongo na reti non God ale la hahau hinira."

*Matamata Non Jonah
(Mt 12.38-42; Mk 8.12)*

²⁹ Ale vao atu mara mo lo tavera jea Iesu mo tapulo verea isara mara, "Pina nike enia pina sasati matea. Mo lo ale na matamata, pani i pa sopo eři hite te matamata pani matamata non Jonah purongo. ³⁰ Matan sohen Jonah enia matamata matea isana mara Nineveh, Natun Tamlohi sohena isan pina nike. ³¹ Ale Vesupe non Sheba i pa turu na rani aria peresi na tamlohin pina nike nake, ale i pa verea vara talai non pina akerihi mo tataholo, matan enia mo tai na jara asau rove mo sinai vara i tapurongo na lelevosahi non Solomon; pani hinau matea mo mele aulu jea hin Solomon mo lo toho nike. ³² La tamlohi atu matan Nineveh la pa turu na rani aria peresi pina nike nake, ale la pa verea vara talai non pina nike mo tataholo, matan enira la posi mata retivujavujangi non Jonah; pani tamlohi matea mo aulu jea hin Jonah mo lo toho nike nake.

*Malarani Na Maurim
(Mt 5.15; 6.22-23)*

³³ Mo sopo te tamlohi i hasahi na lamu, vara i taua na jara jarohi matea na lolo ima, teni i taua na ruhuruhun te tanga; pani i pa kehoia na jarana matan vara la haratu la unu na ima la pa hite na merana.

³⁴ Matam enia lamu mata epem. Vara matam mo lo ūahu, epem tari la lo mařivi na mera; pani vara matam mo sati, epem tari la pa mařivi na ūroha. ³⁵ Matan haratu, o lo kilau mamahu vara sava ko lo ūrom vara enia mera na lolom mo sopo mera vararuhu pani ūroha. ³⁶ Pani vara epem tari mo mařivi na mera, ale mo sopo te ūroha hinia, i pa mera vevuhi sohena sasarami lamu matea sei mo lo sileho na merana.”

*Iesu Mo Retiōoařohairā
(Mt 23.1-36; Mk 12.38-40; Lk 20.45-47)*

³⁷ Iesu mo pa lo retireti, ale Pharisee matea mo usia vara i vano na imana i hanhani peresi, ale mo vano mo sakele na jara hanhani. ³⁸ Pharisee atu mo hutua matan Iesu mo sopo javula tiroma vara i pa hanhani. ³⁹ Ale Moli mo verea isana mara, “Kamim Pharisee ka lo hoje na paniken peresi na peleti na hařira, pani na lolomim ka mařivi na hanmarua peresi na posposi sasati jea. ⁴⁰ Kamim ka rongorongo vono! Haratu sei mo lo vai na hařina enia mo vai na lolona. ⁴¹ Pani ha sile na silesilea na avulahi isan la haratu la vejuveju, ale ha pa vokeyoke vevuhi na maurimim tari.

⁴² Pani rani sasati isamim Pharisee! Matan ka lo sile na sangavulu solat, oke peresi na pere pahai tari, ale ka lo ūromřomi purongo na hinau mo aulu na nahon God sohena nomim ariari, ale ka sopo opoi God. Pani i pa mele ūahu jea vara ha vaira enira mo isoiso.

⁴³ Rani sasati isamim Pharisee! Matan ka opoi na jara sakele nona tamlohi aulu na lolo ima lotu, ale ka opoi vara tamlohi la lo sile na retioloolo isamim na jara maket. ⁴⁴ Rani sasati isamim Pharisee! Matan kamim, ka sohena taptap sei tamlohi la sopo levosahia vara enira taptap, ale tamlohi la hahau aulu hinira pani la sopo levosahia, ale mo vaira la lumiha matana.”

⁴⁵ Tamlohi lelevosahi mata leu matea hin la haratu la lo turu atu mo ūramia mara, “Tija, sava ko lo verea ko vai mahuanhanu hin kamam sohera!”

⁴⁶ Ale Iesu mara, “Rani sasati sohena isamim tamlohi lelevosahi mata leu! Matan ka tau na tetehi puhoni isana tamlohi la sopo eři lavira, ale te vonamim hatea mo sopo vai te hinau hatelete vara i tuenira. ⁴⁷ Rani sasati isamim! Matan

ka voro na matamata mata ūromřomi na p̄ovet sei tamamim la vilira. ⁴⁸ Matan haratu, kamim ka nora tuetueni ale ka majinga na sava tamamim la vaira, matan enira la vilira ale kamim ka vai na matamata mata ūromřomira na tapura. ⁴⁹ Matan haratu, God na nona lelevosahi mo verea mara, ‘A pa ūrule te p̄ovet peresi na vahařule isara, la pa vilimatei te tatuara ale la tipahi te tatuara.’

⁵⁰ Matana, ūae p̄ovet tari sei mo roro mo tapulo na rani vavahinau hin varama nike, God i pa taua na liman pina nike nake, ⁵¹ mo tapulo na ūren Abel mo tikeli na ūren Zechariah, hara sei mo mate na livuha votavota peresi na jara tapu na Temple. Vararuhu na verea isamim, God i pa sile na talai tavera isan pina nike nake.

⁵² Rani sasati isamim tamlohi lelevosahi mata leu! Matan ka lo turuhoro na malele tamlohi vara la eři levosahi God, ale kamim sohena ka sopo levosahi God, ale ka lo turuhoro na tamlohi sei la opoia vara la levosahi God.”

⁵³ Ale Iesu mara mo malue hin jara atu, Pharisee peresi na tamlohi vujangi mata leu, la tapulo area ūilangi, la jinea vara i mele vere te hinau matuvana, ⁵⁴ la lo sasaovi ūrō matana vara la eři tuvaia hin te hinau i pa verea.

12

Posposi Tapnetano

¹ Iesu mo pa lo vano makomona, ale vao tamlohi matuvana la lo takonahi la tiatia hajavua la lo tapulo turu aulu hinira hasera, ale Iesu mo tapulo verea isana nona tamlohi usuri mara, “Ha lo kilau mata isi nona Pharisee, isi sei enia posposi tapnetano. ² Mo sopo te hinau vara la jarohia i pa sopo pala, teni te hina luhu vara la pa sopo levosahia. ³ Matan haratu, sava ka verea na ūroha, la pa rongoa na malarani, ale sava ka varavaramasa hinia na jara luhu, la pa vereulia na jara tavera.

*Retiōoařhai Matea
(Mt 10.28-31)*

⁴ La tapalaku, vararuhu na verea isamim vara ha sopo matahuni la haratu la lo vilimatei na epemim, pani hitahu la sopo eři mele vai te hinau tinapua. ⁵ Pani a pa retiōoařhai kamim hin haratu vara

ha pa matahunia: ha matahuni God sei matan enia mo lo tauri na suiha vara i vilimatei kamim, ale i eři pulahi kamim na moruhapu. Enia natu ha pa matahunia!

⁶ Tamlohi tari nike isařa la levosahia vara ha eři voli te vakarakara i lima na selen mo rua purongo, pani God mo sopo ūromaliho hin te hatelete. ⁷ Vulumim hatehateahi na patumim sohena, God mo sopo ūromaliho hin te hatelete. Ha sopo matahu matan kamim ka mele aulu jea na vakarakara matuvana na nahon God.

Ha Sorahi Iesu Isana Tinapua (Mt 10.32-33; 12.32)

⁸ Ale na verea isamim vara te vonamim hatea i verea vara enia noku na naho tamlohi, Natun Tamlohi sohena i pa verea vara enia nona na naho angelo non God, ⁹ pani haratu mo vunvunia vara enia noku na naho tamlohi, enau a pa vunvunia vara enia noku na naho angelo non God. ¹⁰ Ale tamlohi tari sei la lo veresatihi Natun Tamlohi, God i pa ūromira, pani haratu mo veresatihi Tanume Tapu, God i pa sopo ūromia.

¹¹ Ale na rani vara tamlohi la lavi kamim na lolo nora ima lotu, teni na naho tamlohi aulu peresi la haratu la lo tauri na suiha, ha sopo ūromkaka vara ha pa ūramira sohena sava teni vara ha pa vere na sava, ¹² matan Tanume Tapu i pa vujangi na sava ha pa verea hin rani atu.”

Haratu La Sopo Romromi God

¹³ Tamlohi matea hin vao atu mo verea isana mara, “Tija, o verea isan voraiku vara i ase na korun tamamam peresiau.”

¹⁴ Pani Iesu mo verea isana mara, “Tapala, na sopo sinai matan vara a ari teni a ase na nomim hinahinau.” ¹⁵ Ale Iesu mo verea isara mara, “Ha lo kilau, ha toho assau na posposi tari mata marohati na hinau mo sopo te nomim, matan mauri vararuhu enia mo sopo na sava nakonako ka lo lavira.”

¹⁶ Ale mo vere na titileu matea isara mara, “Tamlohi tavytav matea, isana la jea la matuvana hajavua i sopo eři vaira, ¹⁷ ale mo lo hase ūromromia mara, ‘A pa vai na sava natu, matan mo sopo te jara vara a pa tau mamahuni la vua isaku nike hinia?’ ¹⁸ Ale mara, ‘Ale! Na levosahi na hinau matea a pa vaia, a pa kauti narihi la noku pea nike, ale a mele vorora la mele tavera

jea, ale a pa takonahi na vua isaku peresi na noku hinahinau hinira. ¹⁹ Ale a pa verea isaku haseku vara, ‘Engko nom hinau ūruhu mo mařivi, ko takonahira la eři toho mata tauni matuvana: o mapu, o hanhani, o inu ale o avulahi.’

²⁰ Pani God mo verea isana mara, ‘Tamlohi rongorongo vono! Hin vutepongi akerihi purongo, a pa nařihi na maurim, ale la hinau sei ko lo tatamahunira la pa sopo ūruhu matan te hinau isam.’

²¹ I pa sohena isan haratu sei mo lo takonahi na nona tavytav mata masalona, pani mo sopo ūromromia vara i tapala ūruhu peresi God.”

Ha Sopo Romkaka (Mt 6.25-34)

²² Ale Iesu mo verea isana nona tamlohi usuri mara, “Matan haratu, na verea isamim, ha sopo ūromkaka mata maurimim vara sava ha pa hania, teni na epemim vara sava ha pa rua. ²³ Matan mauri mo aulu jea, mo jeu na hanhani, ale epemim mo aulu jea, mo jeu na ruru. ²⁴ Ha to ūromromi na maji avuavu, enira la sopo lavo teni la sopo vu, ale mo sopo te nora jara tatamahu teni te pea, pani God mo lo vahanira. Ka levosahia vara na nahon God kamim ka mele aulu jea na maji avuavu! ²⁵ Ale sava tamlohi isamim na nona ūromkaka i eři vai na maurina i mele peravu matan te aoa hatea? ²⁶ Ale vara ha sopo eři vai te hina rihirihi hatea sohen haratu, mata sava natu ka lo ūromkaka na hinau tari?

²⁷ Ha to ūromromi na lili wai sohena sava la lo ulua, la sopo voko, la sopo tulai na nora ruru, pani na verea isamim vara ruru ūruhu non Solomon na nona tavytav tavera, la sopo ūruhu sohena ruru non te lili wai hatea. ²⁸ Pani vara God mo ru na ūruhu matan nahapani purongo, pani pavuho mo mahoa, ale la pulahia na hapu, mo sohena sava, ka ūrom vara God i pa sopo ruru kamim? Kamim akerihi, nomim rasua mo rihirihi hajavua! ²⁹ Ale ha sopo ale na sava ha pa hania teni na sava ha pa inua, teni ha lo ūromkaka. ³⁰ Matan la haratu la sopo levosahi God la lo ale la hinau atu, pani Tamamim mo levosahia vara ka opoira. ³¹ Pani ha ale mauri atu sei God mo lo silea sei enia mo supe hinia, ale

enia i pa sile na hinau tinapua sei ka opoira peresia isamim.

Hinau Atu Na Tuka (Mt 6.19-21)

³² Natuvarihi, ha sopo matahu, matan Tamamim enia mo avulahi tavera vara i sile kamim hin mauri atu enia mo supe hinia. ³³ Ha hařehi na nomim hinahinau, ale ha silesile isan la haratu la vejuveju hin te hinau. Ha vai na nomim tanga korohi sei la pa sopo eři ūrovo hin te rani la mařivi na tavtav matan tuka sei la pa lo toho tui tui ea. Mo sopo te tamlohi vavanaho ea teni te majmaj vara i eři komora atu. ³⁴ Matan sava jara nomim tavtav la lo toho ea, mapumim sohena la pa lo toho atu.

Ha Tatamahu Tarea (Mt 24.45-51)

³⁵ Ha tatamahu matan Moli, ale ha vai na nomim lamu la lo hani, ³⁶ ale ha sohena tamlohi sei la lo saovi nora moli vara i pa mele mule na hanhani lahi matea matan vara la eři roi na matarua isana vhatea na rani mo pala ale mo ūrerengi. ³⁷ Avulahi tavera isana volitusi tari vara nora moli mo tapaira la pa lo kilau na rani mo pala. Varafuhu na verea isamim vara na nona avulahi tavera, moli atu i pa ru na ruru nona volitusi, ale i verera vara la sakele na jara hanhani, moiso i pa lavi na hara hinau i silea isara. ³⁸ Vara mo pala na livuha vutepongi teni na toa tarere ale mo tapaira la pa lo kilau, la volitusi atu la pa avulahi tavera.

³⁹ Pani ha lo levosahi harihi: vara moli mata ima i pa lo levosahia vara sava rani tatahola tamlohi vavanaho i pa pala hinia, i pa sopo malue na imana vara tamlohi vavanaho i eři unu na imana. ⁴⁰ Kamim sohena, ha lo tatamahu, matan Natun Tamlohi i pa mai na rani ka ūrom vara i pa sopo mai hinia.”

⁴¹ Ale Peter mara, “Moli, ko lo vere titileu nika nomam purongo teni nona tamlohi tari?”

⁴² Ale Moli mo verea mara, “Hare natu enia patu tamlohi lelevosahi matea sei mo lo turu ūrlangi tarea mata kilau na iman nona moli? Ale nona moli mo taua mo aulu na imana matan vara i vahani na nona volitusi mata imana na rani hanhani tatahola. ⁴³ Avulahi tavera isan volitusi atu vara nona moli mo tapaia mo lo vaia

sohena na rani mo pala. ⁴⁴ Varafuhu na verea isamim vara moli atu i pa tau volitusi atu i aulu na nona hinahinau tari. ⁴⁵ Pani vara volitusi atu mo hase verea isana vara, ‘Noku moli mo sopo mai vila!’ Ale mo tapulo tamaji na volitusi harai peresi na lamane, ale mo hanhani ale mo inu mo drong, ⁴⁶ moli non volitusi atu i pa pala na rani mo sopo ūrom vara i pa pala hinia na aoa matea mo sopo levosahia, moiso i pa sile na talai tavera jea isana, ale i pa taua peresi la haratu la sopo ūru. ⁴⁷ Ale sava volitusi sei mo levosahia na masalon nona moli pani mo sopo tatamahu teni mo sopo vavahinau usuri na masalon nona moli, enia i pa lavi na talai ūrlangi.

⁴⁸ Pani isan volitusi sei mo sopo levosahia vara mo vai na hinau mo sopo tatahola, nona talai i pa sopo ūrlangi. Isana tamlohi tari sei God mo tau na hinau matuvana na limara, God mo lo kilau mata hinau matuvana jea la pa tai isara.

Patumasa Matan Rasua Hin Iesu (Mt 10.34-36)

⁴⁹ Na sinai vara a pulahi na hapu na varama mata ase na tamlohi vara hare i pa toho jejeu, ale na opoia jea vara mo lo tapulo hani moiso. ⁵⁰ A pa lavi na paptijo sasati matea mo lo toho na nahoku, ale enia tetehi puhoni matea moiso isaku, ale i pa sohena i tikeli rani atu na lavi vevuhia.

⁵¹ Ka ūrom vara na sinai matan vara a sile na tamata na varama? Mo vono, pani vara a sile na patumasa. ⁵² Matan mo tapulo nakerihi mo lo vano, vao ima matea tamlohi mo lima la pa patumasa, mo tolu la pa meresahi hin mo rua, ale mo rua la pa meresahi hin mo tolu. ⁵³ La pa patumasa, tamana i pa meresahi isan natuna, natuna isan tamana, ale tinana i pa meresahi isan venatuna, ale venatuna isan tinana, harai i pa meresahi isan tinan tuana, ale tinan tuana isan naroun natuna.”

Ha Hitevosahi Na Hinau Non God (Mt 16.2-3; 5.25-26)

⁵⁴ Ale Iesu mo verea isan vao atu mara, “Vara ka hite na telangi matea mo lo vele Marino, ka verea vhatea vara, ‘Usa matea mo lo mai.’ Ale mo pala sohena. ⁵⁵ Ale vara ka hite na langin tahuna mo lo sere kara, ‘Alo i pa tutuni sati!’ Ale mo pala sohena. ⁵⁶ Ka tapnetano! Ka levosahia vara ha eři

verea vara i pa sohena sava na sava ka lo hitera na varama peresi na masapa, pani mata sava natu, ka sopo eři verea vara sava rani nahai ūa lo toho hinia nake?

⁵⁷ Ale mata sava natu ka sopo eři hase hitevosahi na sava mo tataholo? ⁵⁸ Vara ko lo vano na court, ale i pa mele ūruhu vara o tapai haratu mo lo tau kamim na court na malele tako, ale o vaihitea vara o vai tataholoi hinau atu peresia tiroma; vara i vono, o pa turu na nahon tamlohi aria, ale i pa ariho o vano na lima tamlohi ima ūilangi, ale i pa tauho na ima ūilangi. ⁵⁹ Varaūruhu na verea isam, o pa sopo eři malue vavano o voli vevuhi na nom ave tari.”

13

¹ Hin pongi atu, tamlohi hai la lo toho atu, la verea isan Iesu lara Pilate mo vilimatei na mara Galilee hai hin rani atu la lo sile na nora malamalai na Temple, ale ūera mo hoi peresi na ūae nora malamalai. ² Ale mo ūaramira mara, “Ka ūrom vara la mara Galilee atu la hehe mo jeu na mara Galilee tinapua matan la lavi na mateia sohena teni mo vono? ³ Mo vono, pani na verea isamim vara ha sopo posí, kamim mo isoiso ha pa tihai sohera. ⁴ Teni la tupu sangavulu ūromana mo limaravtolu atu sei taoa matan Siloam mo jovi mo vilimateira, ka ūrom vara enira la hehe mo jeu na tamlohi tari tinatinapua sei la lo toho Jerusalem? ⁵ Mo vono, pani na verea isamim, vara ha sopo posí, kamim sohena ha pa tihai sohera.”

Vipahai Pulo Fig Matea

⁶ Ale Iesu mo vere titileu akerihi mara, “Tamlohi matea mo lavo na pulo fig matea na isana, ale mo mai mo aleale vuana pani mo sopo hite tea. ⁷ Ale mo verea isan nona tamlohi voko mata isa mara, ‘Ko hitea, na mai tauni mo tolu moiso vara a hite te naman pulo fig akerihi ale na sopo hite tea. O tai jovia. Mo lo turuhoro na jara purongo.’

⁸ Ale mo ūaramia mara, ‘Tamlohi tavera, o mele tinařihia hin tauni akerihi, a pa heli ūalihi, ale a pa tau na te buluk i ūalihi.

⁹ Ale tavalu tauni korong i pa vua, vara i sohena mo ūruhu, pani vara mo vono, o eři tai jovia.’”

Iesu Mo Vavahinau Na Sabbath

¹⁰ Na rani matea Iesu mo lo vujangi na ima lotu matea atu na Sabbath. ¹¹ Ale hařai matea tanume sasati matea mo vai na hařina mo hoho mata tauni mo sangavulu ūromana limaravtolu. Hařina mo hoho ale i sopo eři turu tataholo. ¹² Na rani Iesu mo hitea, mo usia mo mai isana, mo verea isana mara, “Hařai, engko ko materi na nom rojoa.” ¹³ Ale mo tau na limana hinia; ale vahatea purongo hařina mo tataholo, ale hařai atu mo hasohaso God.

¹⁴ Pani patu tamlohi mata ima lotu atu mo lolokoru matan Iesu mo vai na rojoa mo tihai na Sabbath, ale mo verea isana tamlohi mara, “Rani mo limarave la lo toho mata vavahinau hinira. Ha sinai hin la rani atu matan vara i vai na nomim rojoa la tihai, mo sopo na rani Sabbath.”

¹⁵ Moiso Moli mo ūaramia mara, “Kamim ka tapnetano! Na levosahia vara kamim hatehateahi ka lo uli nařihi na pulamim buluk teni donki na nora jara juruvi hin te Sabbath, ale ka lavia vano vara i inu te wai. ¹⁶ Ale ka ūromi vara mo tataholo teni mo vono vara hařai akerihi venatun Abraham matea sei Setan mo lihoa mata tauni mo sangavulu ūromana limaravtolu moiso, vara i eři materi na nona rani ūilangi na Sabbath?” ¹⁷ Ale mara mo lo vere la hinau atu, nona meresahi tari la mahanuhanu, ale tamlohi mo isoiso la avulahi na hina ūruhuřuhi tari sei mo lo vaira.

Vujangi Mata Piri Paka (Mt 13.31-33; Mk 4.30-32)

¹⁸ Moiso Iesu mo verea mara, “Mauri atu God mo aulu hinia mo sohena sava? A pa verea vara mo sohena sava hiniau? ¹⁹ Mo sohena piri paka matea tamlohi matea mo lavia mo pulahia purongo, ale mo ulua mo mai vipahai tavera matea; ale maji avuavu la lo vai na taura na rangarangana.”

Vujangi Mata Isi

²⁰ Ale mo mele verea mara, “A pa mele verea vara mauri atu God mo aulu hinia mo sohena sava hiniau? ²¹ Enia mo sohena makomo isi sei hařai matea mo lavia mo hoia na paki flaua matea vavano isi mo vaia mo sosohi vevuhi.”

Hare I Pa Juri? (Mt 7.13-14, 21-23)

²² Iesu na nona hahau mo unu ūrole na taon peresi na vanua mo lo vujangi, ale mo hahau mo lo vano Jerusalem. ²³ Ale tamlohi matea mo verea isana mara, “Moli, la haratu sei la pa juri, enira i pa tupu visalete purongo?” Ale mo verea isara mara, ²⁴ “Ha vaihitea vara ha eři unu hin matarua rihihi atu. Matan na verea, vao tavera la pa opoia vara la unu pani la pa sopo eři vaia. ²⁵ Na rani tamlohi tavera mata ima mo turu mo pelati na matarua, ale kamim na jingoima ka tapulo ūrerengi na pelati kara, ‘Moli, o roi isamam!’ Ale i pa ūrami kamim vara, ‘Na sopo levosahia vara ka tai epu!’ ²⁶ Moiso ha pa tapulo verea isana vara, ‘Pani kamam kama lo hanhani, ale kama lo inu peresiho, ale engko ko lo vujangi na malele tavera na nomam taon.’ ²⁷ Pani i pa verea vara, ‘Na verea isamim, na sopo levosahia vara ka tai epu! Ha malue na nahoku, kamim tamlohi lejileji!’

²⁸ Na jara talai, la pa tangtangi ale la pa nařnařori na huřura na rani la hite Abraham, Isaac, Jacob peresi na p̄rovet tari hin mauri atu God mo aulu hinia, pani kamim ka hase horo kamim hinia. ²⁹ Ale tamlohi la pa tai Opae, Marino, Tahuna peresi Auta, ale la pa sakele na jara hanhani hin mauri atu God mo aulu hinia, ale la pulahi kamim. ³⁰ Ale ha lo levosahia vara, tatuara sei la lo hitahu nake, la pa tiroma, ale tatuara la lo tiroma nake, la pa hitahu.”

Iesu Mo Tangi Matan Jerusalem

³¹ Tataholo hin rani atu, Pharisee hai la mai la verea isana lara, “O rovo nike, matan Herod mo opoia vara i vilimateiho.”

³² Ale Iesu mo verea isara mara, “Ha vano ha verea isan pusi atu vara, ‘O levosahia vara nohorihi peresi pavuho enau a pa titiu nařhi na tanume sasati, ale a pa vai na rojoa la tihai, ale na hatolu rani a pa isoiso na maleleku. ³³ Hina purongo, a pa vano na maleleku nohorihi, pavuho peresi pongi tolu, matan i pa sopo tataholo vara p̄rovet matea i mate na jingoiman Jerusalem!”

Iesu Mo Tangisi Jerusalem

(Mt 23.37-39)

³⁴ Jerusalem, o Jerusalem, taon tavera sei mo vilimatei na p̄rovet, ale mo paru

la haratu God mo ūlula isana. Vaha visa moiso na opoia vara a takonahi na natum jara matea sohena toa hařai matea mo hovi na natuna na ruhuruhi hapana, pani ko ūruhi! ³⁵ O lo levosahia vara imam mo puru! Ale na verea isam vara engko o pa sopo mele hiteau i tikeli rani atu o pa verea vara, ‘Avulahi isan haratu mo lo mai na hijan Moli!’”

Psa 118.26

14

Iesu Mo Vai Na Rojoa La Tihai

¹ Na Sabbath matea, Iesu mo vano na ima tamlohi aulu matea na vao Pharisee, ale la tamlohi atu la lo kilau ūrōia. ² Ale tamlohi purapura matea mo lo toho atu na nahon Iesu. ³ Iesu mo usi na Pharisee peresi na tamlohi lelevosahi mata leu mara, “Mo tataholo vara tea i vai na rojoa i tihai na Sabbath teni mo vono?” ⁴ Pani la sakele tapnono. Moiso Iesu mo tauri tamlohi atu mo vai na nona rojoa mo tihai, ale mo ūrulea mo vano. ⁵ Moiso mo usia isara mara, “Vara te vonamim hatea te natuna teni pulana buluk hatea mo jovi sivo atano hin te moru wel matea na rani Sabbath matea; hare natu i pa sopo reve nařhihi vila?” ⁶ Ale enira la sopo eři ūrami la hinau nike.

Vujangi Mata Posposi Romatano

⁷ Ale Iesu mo vere na titieu matea isan la haratu sei la usira la mai atu, matan mo hitea sohena sava la lo hase viřoni na jara sakele ūruhi atu na tep, ale mo verea isara mara, ⁸ “Na rani tamlohi matea mo usiho vara o mai na hanhani lahi, o sopo sakele na jara ūruhi tako, matan ko sopo levosahia vara tamlohi lahi atu mo usi te tamlohi aulu tinapua mo aulu hiniho teni mo vono, ⁹ ale haratu mo lo usi kamim tupra rua sei i pa mai isam i verea vara, ‘O sile na masapam isan tamlohi akerihi!’ Ale o pa mahanuhanu o sivo na jara sakele atano.

¹⁰ Pani vara la usiho, o vano o sakele na jara sakele nona tamlohi purongo tiroma, matan vara tamlohi lahi atu vara i mai isam i verea vara, ‘Tapala, o juha o sahe na jara matea mo mele ūruhi!’ Moiso, matan haratu o pa lavi na oloolo na naho tamlohi tari sei la lo sakele hin jara hanhani atu peresiho. ¹¹ Matan tamlohi tari sei la hase

taura aulu, God i pa taura atano, haratu mo hase taua atano, God i pa taua aulu.”

¹² Iesu mo mele verea isan tamlohin ima atu mara, “Vara o vai na hanhani teni te hanhani tavera hatea, o sopo usi te tapalam teni te voraim, teni te tahisam teni la haratu la tavitav sei la lo toho mariviti isam, matan enira la pa mele usiho na imara matan vara la mele vaia sohena isam. ¹³ Pani vara o vai na hanhani tavera, o usi na tamlohi tilavono, haratu la kuti, haratu la papao peresi na matavuso, ¹⁴ ale God i pa leruhu hiniho matan enira la sopo eři mele spaia. God i pa voliho na rani mata sauteterahi na tamlohi tataholo.”

Hanhani Tavera Nona Supe Matea (Mt 22.1-10)

¹⁵ Moiso, tamlohi matea mo lo sakele peresi Iesu hin tep atu, mara mo rongo la hinau nike, mo verea isan Iesu mara, “Avulahi isana tamlohi tari sei la pa hani pereti atu hin mauri atu God mo aulu hinia!”

¹⁶ Pani Iesu mo verea isana mara, “Na rani matea tamlohi tavera matea mo vai na hanhani tavera matea, ale mo usi na tamlohi matuvana la mai hinia. ¹⁷ Ale hin rani mata hanhani tavera atu mo ūrule na nona volitusi išan la haratu mo usira moiso vara i verea isara vara, ‘Ha mai matan hinau tari la tatamahu moiso!’ ¹⁸ Pani enira mo isoiso la tapulo posa na ūromira. Tiromara mo verea isana mara, ‘Na voli na lepa matea, ale a pa vano vara a hitea. O verea vara a pa sopo mai.’ ¹⁹ Ale mele tinapua mo verea mara, ‘Na voli na buluk mo sangavulu, ale a pa vano vara a lo kilau usurira. O verea vara a pa sopo mai.’ ²⁰ Ale mele tinapua mo verea mara, ‘Na pa lahi na narouku matea, ale matan haratu a sopo eři mai.’

²¹ Ale volitusi atu mo mai mo vere la hinau sei isan nona tamlohi tavera. Moiso tamlohi tavera atu mata ima mo lolokoru, ale mo verea isan nona volitusi mara, ‘O vano vila na malele tavera peresi na malele vavarihi hin taon tavera nike, ale o lavi la haratu la tilavono, haratu la kuti, haratu la matavuso peresi la haratu la papao.’ ²² Ale volitusi atu mo verea mara, ‘Tamlohi tavera, sava ko retileu hinia na vaia moiso, ale masapa mo pa lo toho na lolo ima.’ ²³ Ale tamlohi tavera atu mo verea isan nona volitusi atu mara, ‘O vano

asau na malele tavera peresi na pahisa malele, ale o haluhalu na tamlohi tari vara la mai la unu, matan na opoia vara imaku i mařivi. ²⁴ Matan na verea isamim, i pa sopo te vonan te tamlohi atu na lo usira tiroma moiso vara la pa eři hatiřoro hin te hinau hatea hin noku hanhani tavera nike.’ ”

Ha Opoi God Ale Ha Usuri Iesu (Mt 10.37-38)

²⁵ Tataholo hin rani atu, vao tavera la lo toho peresia, ale Iesu mo posi mai isara mo verea isara mara, ²⁶ “Vara tea mo mai isaku, pani mo sopo ūrohu hin tamana peresi tinana peresi na natuna, peresi na voraina peresi na vevoraina, teni mo sopo ūrohu na maurina hasena, enia i pa sopo eři mai noku tamlohi usuri. ²⁷ Sava tamlohi mo sopo soloti na nona talopeilopei ale i usuriau, enia i pa sopo eři mai noku tamlohi usuri.

²⁸ Matan sava tamlohi isamim natu, vara mo opoia vara i voro na ima aulu matea mata kilau vano asau, mo sopo sakele tiroma matan vara i evia vara nona mania mo tataholo mata i eři voro vevuhia ima aulu atu mata kilau vano asau teni mo vono? ²⁹ Vara i vono, vara mo tau na pulona, pani mo sopo eři voro vevuhia, tamlohi tari sei la hitea la pa lo kerehia matana, ³⁰ lara, ‘Tamlohi akerihi mo tapulo voro, pani mo sopo eři vaia vevuhia!’

³¹ Teni, sava supe natu, mo vano vara i vai na vuro peresi na supe tinapua matea, mo sopo sakele tiroma matan vara i hitea vara la nona tamlohi vuro atu tupu tari vaha sangavulu (10,000) vara la ūlangi mata la turuhoro supe atu sei mo lo mai peresi na nona tamlohi vuro tupu tari vaha sangavulu rua (20,000).

³² Vara mo vono, i pa ūrule te tamlohi la vano isan nona meresahi atu vara mo pa lo toho asau vara la usia hin te malele mata i sari tamata. ³³ Matan haratu, te vonamim i sopo eři mai noku tamlohi usuri vara mo sopo tinařihi na nona hinahinau tari.

Solo Peresi Na Malarani (Mt 5.13; Mk 9.50)

³⁴ Niu la saoroia enia mo ūruhu, pani vara mo sopo mele te ngarpuhi hinia, ngarpuhi i pa mele sivo hinia sohena

sava? ³⁵ Jamana mo sopo mele ūruhu mata ūravoa peresi te hinau. La pa pulahia purongo. Haratu mo eři rongovosahia, o tapurongo!"

15

Sipsip Atu Mo Jilio (Mt 18.12-14)

¹ Moiso tamlohi lavi na mania mata takis peresi na tamlohi hehe, la lo mai isana vara la rongoa. ² Pani Pharisee peresi na tamlohi vujangi mata Leu la lo reti vavarahi lara, "Tamlohi akerihi mo lo pulutahi peresi na tamlohi hehe, ale mo lo hanhani peresira."

³ Ale Iesu mo verera hin titileu akerihi mara, ⁴ "Hare isamim, vara pulana sipsip mo tikeli mo ngavulu sangavulu (**100**) vara matea mo jilio, mo sopo mele vano vara i alea? I pa tinařihi la haratu mo ngavulu limaravati mo limaravati ⁽⁹⁹⁾ la lo hanhani na jara tavera vavano i mele lavuti pa haratu mo lo tihai. ⁵ Ale mara mo hitea, i pa solotia na pilina na avulahi. ⁶ Vara mo pala na imana, i pa tovi na tapalana peresi na tahisana la pulutahi peresia, ale i verea vara, 'Ha avulahi peresiau matan na mele lavuti pa pulaku sipsip atu mo lo tihai.' ⁷ Ale i pa sohen haratu natu, tuka i pa avulahi jea hin haratu matea sei mo mele posí, mo jeu la haratu mo ngavulu limaravati mo limaravati ⁽⁹⁹⁾ sei la tatahola la sopo jilio na malelera.

Hařai Matea Mo Ale Na Selen

⁸ Teni sava hařai vara nona selen mo sangavulu, pani mo vaitihai matea, mo sopo hasahi na lamu vara i tivesi na imana i alea vavano i lavutia?* ⁹ Ale vara mo lavutia, i pa tovi na tapalana peresi na tahisana la pulutahi peresia, ale mo verea mara, 'Ha avulahi peresiau matan na mele lavuti pa selen atu sei na lo vaitihai!' ¹⁰ Ale na verea isamim, vara i pa sohen haratu natu, avulahi tavera mo lo toho na naho angelo non God matan tamlohi hehe atu sei mo mele posí na nona hehe."

Natun Tamlohi Tavera Mo Jilio

¹¹ Ale Iesu mo mele verea isara mara, "Tamlohi matea natuna mo rua. ¹² Ale vora

hitahu mo verea isan tamana mara, 'Tata, o sileau hin korum atu sei enia ūngaku.' Ale tamana mo ase na koruna isara tupra rua.

¹³ Mo sopo tuai, vora hitahu atu mo takonahi na nona hinahinau tari, ale mo vano vara i hitehite jara, ale mo jalahi vevuhi na nona tavytav na posposi rongorongo vono. ¹⁴ Ale mara mo jalahi vevuhi na nona mania, marua tavera matea mo pala hin jara tavera atu, ale mo vejuveju. ¹⁵ Ale mo vano mo voko isana tamlohi matea hin jara atu, ale tamlohi tavera atu mo ūrulea vara i vano na isana i vahani na pulana poi.

¹⁶ Ale mo marohati mo tikeli na makina vahatea, ale mo opoia vara i hani te hanhani sei mo lo silea isana poi, pani tea mo sopo silea hin te hanhani. ¹⁷ Pani ūromina mara mo mele mai, mo hase verea isana mara, 'Tamlohi voko tari non tamaku, hara hinau mo mařivi savulevule, pani enau na lo marohati mate nike. ¹⁸ A pa vano isan tamaku ale a verea isana vara, 'Tata, na hehe isan tuka peresaho. ¹⁹ Na sopo mele tatahola vara o toviau natum. O vaiau sohena nom volitusi matea.'

²⁰ Ale mo turu mo mele vano isan tamana. Pani mo pa lo toho asau, ale tamana mo hitea ale mo ūromia, ale mo maro vano isana mo raho, ale mo pungosia. ²¹ Moiso, natirihia atu mo verea isan tamana mara, 'Tata, na hehe isan tuka peresaho. Na sopo mele tatahola vara o toviau natum.'

²² Pani tamana mo verea isana nona volitusi mara, 'Ha lavi na noku ruru peravu ūruhu ūruhu jea i mai ha rua hinia, ale ha tau te ring hatea na varangona, ale sabat na palona. ²³ Ale ha lavi na natu buluk ūravisvisi atu sei ūra lo kilau mamahunia ha vilia, ale ūra hania ūra avulahi. ²⁴ Matan natuku nike mo mate moiso, ale mo mele mauri, mo jilio, ale na mele lavutia!' Ale la tapulo vai na hanhani tavera na avulahi.

²⁵ Ale natuna vora tiroma mo lo toho na isa, ale mara mo lo mai mariviti na ima mo rongo na vete, ale la lo velu, ²⁶ moiso mo tovi na volitusi matea ale mo usia mara, 'Ka lo vai na sava sei?' ²⁷ Ale mo verea isana mara, 'Tasim mo mele pala, ale

* **15:8:** selen: selen matea mo tatahola na volvoli mata rani matea, la selen akerihi enira oso puhoro mata nona lahi.

tamam mo vili pa natu buluk ūavisvisi atu sei ūa lo kilau mamahunia matan mo mele pala mo lo ūahu.'

²⁸ Pani mo lolokoru, ale mo ūahu vara i unu na ima. Tamana mo malue mo sinai mo usia vara i unu, ²⁹ pani mo ūarami tamana mara, 'Ko hitea, la takonahi tauni nike enau na lo voko mate nom sohena slev matea, ale na sopo lo tope na nom retileu hin te rani, pani ko sopo sileau hin te natu nani hatelete matan vara a eři avulahi hinia peresi na tapalaku. ³⁰ Pani natum akerihi mara mo pala, haratu sei mo lo jalahi vevuhi na korum na hařai malele, ale ko vili pa natu buluk ūavisvisi atu sei ko lo kilau mamahunia, matana.'

³¹ Ale tamana mo verea isan natuna atu mara, 'Natuku, engko ko lo toho peresiau tarea, ale hinau tari noku enira nom. ³² Mo tataholo vara ūa vai na hanhani ūa avulahi matana, matan tasim nike mo mate pani mo mele mauri; mo jilio ale na mele lavutia.' "

16

Patu Tamlohi Lelevosahi Matea

¹ Iesu mo mele verea isana nona tamlohi usuri mara, "Na rani matea tamlohi tavytav matea, mo rongoa vara nona patu tamlohi sei mo lo kilau na nona hinahinau, mo lo roro purongo na nona hinahinau. ² Ale mo tovi pa nona patu tamlohi atu, ale mo verea isana mara, 'Sava nahai na lo rongoa matam? O sileau na nom puku mata kilau na mania matan engko ko isoiso sohena patu tamlohi.'

³ Ale patu tamlohi atu mo hase verea isana mara, 'A pa vai na sava, matan noku tamlohi tavera mo tau nařihiau sohena patu tamlohi matea? Enau na sopo ūilařilangi vara a eři heli na lepa, ale na mahanuhanu vara a usi na tuetueni. ⁴ Ale, na levosahi na sava a pa vaia nake, matan vara i tau nařihiau ale tamlohi la pa avulahi mata laviau na imara.'

⁵ Ale, mo tovi vevuhi la haratu la lo ave isan nona tamlohi tavera la mai matea matea. Ale mo verea isan haratu tiroma mara, 'Nom ave isan noku tamlohi tavera mo visa?' ⁶ Mara, 'Na ave na litre wel, mo tari vaha tolu' ^(3,000). Ale mo verea isana mara, 'Ale o jarai nařihiau na nom ave, ale o ulia vara ko ave na piri wit, kilo mo tari vaha ngavulu rua mo vati

vaha hatea mo ngavulu sangavulu lima (1, 500).'

⁷ Ale mo verea isana tinapua mara, 'Nom ave mo visa?' Ale mo verea mara, 'Na ave na piri wit, kilo mo tari vaha ngavulu tolu (30,000).' Ale mo verea isana mara, 'Ale o jarai nařihiau na nom ave, ale o ulia vara ko ave na piri wit, kilo mo tari vaha ngavulu rua mo vati' ^(24,000).

⁸ Ale tamlohi tavera atu mo hitea vara nona patu tamlohi atu mo patuha na sava mo vaia, hina purongo vara mo lejileji. Matan tamlohi hin varama nike, enira la patuha na nora bisnis la lo vaira peresi na tamlohi tinapua na varama, mo jeu la haratu la natun malarani. ⁹ Ale na lo verea isamim, vara ha vai na nomim hinahinau nike na varama la tueni na tinapua ale ha tapala peresira. Hin malele nike, vara nomim hansohai hin varama nike mo isoiso, pa la tapalamim atu natuka la pa avulahi hin kamim.

¹⁰ Haratu mo eři turu ūilangi na hinau rihirihi purongo, i pa turu ūilangi na hinau matuvana, ale haratu mo lejileji na hinau rihirihi matea purongo, i pa lejileji na hinau matuvana. ¹¹ Ale vara ka sopo eři turu ūilangi na tavytav matan varama nike, hare i pa eři tau na tavytav varařuhu na limamim? ¹² Ale vara ka sopo eři turu ūilangi na hinau nona tinapua, hare i pa eři tau te hinau na limamim vara nomim?

¹³ Tea i sopo eři volitusi isana tamlohi tavera i rua, matan i pa opoi matea, ale i ūahu hin matea, teni i pa volitusi isan matea, ale i hitelehilehi matea. Ha sopo eři volitusi isan God peresi na mania."

Te Vujangi Non Iesu

(Mt 11.12-13; 5.31-32; Mk 10.11-12)

¹⁴ Pharisee la opoi na mania, ale la haratu la lo toho atu, lara la rongo la hinau sei, la kerehia. ¹⁵ Ale Iesu mo verea isara mara, "Kamim ka la tamlohi atu sei la lo vai tataholoira hasera na naho tamlohi, pani God mo levosahi na mapumim. Matan sava tamlohi la lo ūromřomia vara la aulu, enira hina niketa na nahon God.

¹⁶ Leu non Moses peresi na sava přovet la verea la lo turu mo kakau na rani non John tamlohi paptijo, ale mo tapulo atu mo mai nake. Retřuhu matan mauri atu God mo aulu hinia, la lo retivujavujangi

hinia, ale la lo ngurunguru na tamlohi vara la unu hinia. ¹⁷ Pani i pa mele malum vara tuka peresi na varama la tihai, mo jeu haratu vara tea i jarai narihi te sope leta hatea na lolo leu, ale suihana i mai hina purongo.

¹⁸ Tamlohi tari sei la ūahu hin naroura, ale la lahi na tinapua la vaivaileu, ale haratu sei mo lahi na hañai lahi matea mo rovo hin tuana, mo vaivaileu.”

Tamlohi Tavtav Enia Lazarus

¹⁹ Iesu mara, “Na rani matea tamlohi tavtav matea tarea mo lo ru na perpel peresi na ruru lulu malum, ale mo lo hani na hanhani ūahu tarea. ²⁰ Ale na nona matarua, tamlohi la tau na tamlohi tilavono matea mo solasola vevuhi na epena hijana Lazarus, ²¹ mara mo lo toho atu tarea mo opoia vara i eñi hani te sope hanhani na jara hanhani non tamlohi tavtav atu, pani mo vono. Aulu hin haratu, viriu la lo mai la lo ūamesi na solana. ²² Hitahu pa tamlohi tilavono atu mo mate, ale angelo la lavi nañihia vara i toho peresi Abraham. Pa tamlohi tavtav atu sohena mo mate, ale la tavunia, ²³ ale enia mo sivo na jara talai na varama mata mateia, ale na nona rongohaji tavera, ale mo kilau vano mo hite Abraham enia Lazarus la lo turu asau hinia.

²⁴ Ale mo ulo mara, ‘Pua Abraham, o ūromopoiau, ale o ūrule Lazarus vara i vano i weti na pisuna na wai, ale i mai i taua na memeku vara i hamañiria, matan na lo rongohaji hajavua na pepe hapu nike.’

²⁵ Pani Abraham mara, ‘Natuku, o to ūromūromia, na maurim, ko lo lavi na hinau ūhuřuhu, pani Lazarus, mo lo lavi na hinau mo sati, pani nake enia mo lo nanau nike, ale engko ko lo lavi na rongohaji. ²⁶ Ale mo sopo haratu purongo, pani masapa tavera matea mo lo toho na livuhařa, ale mo sopo te malele vara tea nike i eñi vano sei isam, teni tea sei i eñi mai nike isamam.’

²⁷ Ale mara, ‘Vara sohena, na lo tangi isam vara o ūrulea i sivo na iman tamaku ²⁸ matan enau tasiku mo lima, ale vara i retiroařohaira. Vara i vono, enira sohena la pa sinai hin jara nike mata vailejileji na tamlohi.

²⁹ Pani Abraham mara, ‘Retiulia non Moses peresi na p̄ovet la lo toho isara

moiso; mo tataholo vara la tapurongo isara.’ ³⁰ Ale mara, ‘Mo vono, pua Abraham, vara tea i tai nike na varama mata mateia i sivo isara, la pa posí.’ ³¹ Abraham mo verea isana mara, ‘Vara la sopo tapurongo isan Moses peresi na p̄ovet, la pa sopo eñi rasu tea vara i mele turu na varama mata mateia.’ ”

17

Vujangi Mata Romi Na Tinapua

(Mt 18.6-7, 21-22; Mk 9.42)

¹ Ale Iesu mo verea isana nona tamlohi usuri mara, ‘Hinau vahite mata hehe la pa lo mai tarea, pani rani sasati isan haratu mo lo lavira la mai. ² I pa mele ūahu jea isana, vara la liho te vanu tavera na ūalona, ale la pulahia na lolo tasi puaha. Matan i pa mele sati jea isana, vara i vai te vonan la natuvarihi nike la hehe. ³ Ha hase kilau mamahuni kamim! Vara voraim mo hehe, o reti isana, ale vara mo posí o ūromia, ⁴ ale vara mo hehe isam vaha limaravrua na rani matea, ale mo mele mai isam vaha limaravrua mo verea isam mara, ‘Na posí!’ o pa ūromia.’

⁵ Nona vahařule la verea isan Moli Iesu lara, ‘O vai na nomam rasu i tavera!’

⁶ Ale Moli Iesu mara, ‘Hina purongo vara nomim rasu mo sohena piri paka matea purongo, ha eñi verea isan pulo hatapola nike vara, ‘O hase saputih, o sivo o lavoho na tasi!’ Ale i pa oloolo hin kamim.

⁷ Sava nomim slev matea vara mo isoiso na nona voko na isa teni mo lo kilau na sipsip, i pa mai vara i sakele vahatea mata hanhani? ⁸ Ka levosahia vara i pa tatamahuni na hinau hani nona tamlohi tavera, ale i volitusi isana tako, moiso natu i pa hani na hana hinau. ⁹ Ale mo sopo te hinau vara nona tamlohi tavera mo sopo vere meje isana, matan enia mo lo vai na sava mo tataholo vara i pa vaia. ¹⁰ Mo sohena purongo, vara ka lo oloolo hiniau, mo tataholo vara ha verea vara, ‘Mo sopo tataholo vara kama lavi na hasohaso isam. Kamam volitusi sei kama lo vai na sava mo tataholo purongo vara kama vaira.’ ”

Tamlohi Lepros Mo Sangavulu

¹¹ Na malelena mo lo vano Jerusalem, mo hahau na livuhan Samaria enia Galilee. ¹² Mara mo lo unu na vanua

matea, tamlohi lepros mo sangavulu la lo turu asau, ¹³ la ulo lara, “Iesu, tamlohi tavera, o ūromi kamam!”

¹⁴ Mara mo hitera, mo verea isara mara, “Ha vano, ha vujangi kamim isana p̄ris.” Na rani la pa lo vano, lepros atu mo tihai na epera.

¹⁵ Moiso vonara matea mara mo hitea vara mo vokevoke, mo mele hilu isan Iesu mo lo ulo aulu mo lo hasohaso God. ¹⁶ Mo jovi na nahona sivo na palon Iesu mo vere meje isan Iesu mata sava mo vaia isana, tamlohi akerihi enia mara Samaria matea.

¹⁷ Iesu mo usia isana mara, “Avei, na ūrom vara kamim tupu sangavulu? Tupu limaravati la haipu? ¹⁸ Tavasau akerihi hasena purongo mo mele hilu vara i sile na hasohaso isan God?” ¹⁹ Ale Iesu mo verea isan tamlohi atu mara, “O turu, o vano. Nom rasua mo vaiho ko ūruhu.”

Mauri Atu God Mo Supe Hinia (Mt 24.23-28, 37-41)

²⁰ Na rani matea Pharisee la usi Iesu lara mauri atu God mo aulu hinia i pa mai pangisa. Ale Iesu mo ūramira mara, “Mauri atu God mo aulu hinia i pa sopo mai na matamata tavera vara ha eři hitera, ²¹ teni ha pa eři verea vara, ‘Ha kilau mai, enia nahai!’ teni ‘Enia sevano!’ matan mauri atu God mo aulu hinia mo lo toho na livuhamim.”

²² Ale mo verea isana nona tamlohi usuri mara, “Pongi matea mo lo mai ha pa marohati vara ha hite te rani hatea non Natun Tamlohi, pani ha pa sopo eři hitea. ²³ Ale tamlohi la pa verea isamim vara, ‘Ha kilau vano, enia sevano!’ teni ‘Ha kilau mai, enia nahai!’ Pani ha sopo malue teni ha usurira. ²⁴ Matan sohena vaha mo vilasi na tavalu masapa mo vano na tavaluna, i pa sohena natu isan Natun Tamlohi na nona rani. ²⁵ Pani tiromana enia i pa lavi na rani ūrlangi matuvana, ale pina nike nake la pa tipahia.

²⁶ Sava mo masese na pongi non Noah i pa sohena na rani non Natun Tamlohi. ²⁷ Tuai tamlohi la lo hanhani, la lo inu, la lo lahi, ale la lo silesilera mata lahi mo tikeli rani atu Noah mo unu na aka. Ale wai tatave mo maro ale mauri tamlohi tari la sopo juri.

* **17:36-37:** karai: ūrami reti hin sope jara ūririhi akerihi enia vara pongi hitahu mo mai mariviti, vara tamlohi la hite la hinau sei la pala, la pa eři hitevosahia i ūruhu vara i pa sopo tuai, Natun Tamlohi (Iesu) i pa mele pala hin varama nike.

²⁸ I pa sohena natu, sohen na pongi non Lot, tamlohi la lo hanhani, la lo inu, la lo volvoli, la lo ařeařehi, la lo lalavo ale la lo voro na ima — ²⁹ pani hin rani atu Lot mara mo malue Sodom, hapu peresi na vatu tutuni mata volkeno mo jovi na tuka sivo isara, ale enira mo isoiso la mate. ³⁰ Ale i pa sohen haratu natu na rani Natun Tamlohi i pala. ³¹ Hin rani atu, vara tea mo lo toho na jingoima, ale vara te nona hinahinau la lo toho na lolo ima, i pa sopo sivo vara i tau mamahunira, ale i pa sohena isan haratu mo lo toho na isa, i pa sopo posi vara i sivo na ima. ³² Ha to ūromřomi naroun Lot! ³³ Sava tamlohi mo opoia vara i hase juri na maurina, i pa vaitihai, pani sava tamlohi mo vaitihai na maurina, i pa taurilatia. ³⁴ Na verea isamim vara, hin vutepongi atu tamlohi mo rua la pa lo juruvi na vata matea, ale la pa lavi nařihi matea, matea purongo i pa lo toho atu. ³⁵ Hařai i rua la pa lo pete kosakosahi na piri wit jara matea, ale la pa lavi nařihi matea, ale matea purongo i pa lo toho atu.”

³⁶⁻³⁷ Moiso nona tamlohi usuri la usia lara, “Moli la hinau sei la pa masese epu?” Mo ūramira mara, “Vara ko hite na karai la lo avu vano hin te jara, o pa levosahia vara pahai matea mo mena atu.”*

18

Hařai Malepu Matea

¹ Ale Iesu mo vere na titileu matea isara vara i vujangira vara la pa lo usiusi tarea, ale vara ūromira la sopo jovi na sava la usia.

² Mo verea mara, “Na taon tavera matea, tamlohi aria matea mo lo toho ea, mo sopo matahuni God teni vara i sile na oloolo isan te tamlohi tinapua hatea. ³ Ale hařai malepu matea sohena mo lo toho atu, mo lo mai tarea mo lo usia isana mara ‘O sile na talai mo tataholo vara noku meresahi i lavia.’ ⁴ Tiroma mo lo ūruhu hinia, pani hitahu mo hase verea isana mara, ‘Hina purongo vara na sopo matahuni God teni a sile na oloolo isan tea, ⁵ pani matan hařai malepu akerihi tarea mo lo areau mo sopo

te isoisona, a pa silea na sava mo lo usia matan vara i sopo mele hotiau hinia.’”

⁶ Ale Moli mo mele verea mara, “Ha tapurongo na sava tamlohi ari hehe atu mo lo verea. ⁷ Ale ka ūrom vara God i pa sopo eři sile na sava sei nona tapuhi la lo usia isana tarea? ⁸ Na verea isamim, enia i pa sile na talai mo tataholo vara nora meresahi la lavia i vila purongo. Hina purongo hin haratu, vara Natun Tamlohi i mele mai, i pa vilei te rasua na varama teni i vono?”

Pharisee Peresi Na Tamlohi Hehe Matea

⁹ Ale mo mele vere titieu akerihi isan la haratu sei la lo hase ūrom ūromia vara enira la tataholo na nahon God, ale la lo hitele-hilehi na tinapua: ¹⁰ “Tamlohi mo rua la lo toho na lolo Temple, ale la lo usiusi, matea enia Pharisee matea, ale haratu matea enia tamlohi mata lavi na mania mata takis matea. ¹¹ Pharisee atu mo turu atu mo lo hase usiusi matana hasena mara, ‘God, na vere meje isam matan enau na sopo sohena tamlohi tinapua, haratu la lo ngurunguru mata mania, haratu la hehe, haratu la lo vaivaileu peresi na tinapua mo lahi moiso, teni sohen tamlohi mata lavi na mania mata takis akerihi. ¹² Enau na tapuhoro na hanhani vaha rua na wika matea; tarea na lo sile na sangavulu hinau tari na lo lavira.’

¹³ Pani tamlohi mata lavi na mania mata takis atu mo turu asau, mo sopo eři tahe na matana i kilau sahe na tuka, pani mo vilivili na ūrumana mo verea mara, ‘God, o ūromopoiā, enau tamlohi hehe matea!’ ¹⁴ Varařuhu na verea isamim vara tamlohi akerihi mo mele mule mo tataholo na nahon God, pani mo sopo haratu matea. Matan tamlohi tari sei la lo hase tahera, God i pa taura la sivo atano, pani haratu mo hase tau atano God i pa tahea sahe aulu.”

Iesu Mo Leřuhu Na Natuvarihi (Mt 19.13-15; Mk 10.13-16)

¹⁵ Na rani matea, tama natuvarihi hai peresi na tinara la lavi na natura la mai isan Iesu vara i tau na limana hinira, ale i leřuhu hinira. Pani nona tamlohi usuri la tapulo horora. ¹⁶ Pani Iesu mo tovira vara la mai isana, ale mo verea isana nona tamlohi usuri mara, “Ha tinařihi na natuvarihi la mai isaku, ha sopo horora! Matan mauri atu God mo aulu hinia enia nona

tamlohi sohen la harihi. ¹⁷ Varařuhu na verea isamim, vara sava tamlohi mo sopo lavi mauri atu God mo aulu hinia sohena natirihi matea, i pa sopo eři unu hinia hin te rani.”

Tamlohi Tavtav Matea (Mt 19.16-30; Mk 10.17-31)

¹⁸ Ale na rani matea tamlohi aulu matea mo usia isana mara, “Tija ūruhu, a pa vai na sava natu vara a eři lavi na mauri tui hinia?”

¹⁹ Ale Iesu mo verea isana mara, “Mata sava ko toviau ūruhu? God hasena mo ūruhu, mo sopo mele te tamlohi tinapua i ūruhu.

²⁰ Ko levosahi na retileu, ‘O sopo vaivaileu peresi na tinapua mo lahi moiso, o sopo vilimatei, o sopo vavanaho, o sopo tuetueni na halu, o oloolo hin tamam enia tinam’.”

Exo 20.12; Deut 5.16

²¹ Ale tamlohi aulu atu mo verea mara, “La hinau tari sei na tapulo vaira na pa lo uluvou purongo.”

²² Iesu mara mo rongoa, mo verea isana mara, “Hinau matea ko vejuveju hinia. O ařehi vevuhi na nom hinahinau, ale o asea isana tilavono, ale hitahu tavtav na tuka i pa nom; ale o mai o usuriau!” ²³ Pani tamlohi atu mara mo rongo la hinau sei mo rongo mo sati tavera, matan enia tamlohi tavtav tavera matea.

²⁴ Iesu mara mo hitea vara mo rongo mo sati, mo verea mara, “Mo ūrlangi hajavua vara tamlohi tavtav la unu hin mauri atu God mo aulu hinia! ²⁵ A pa verea vara mo mele malum jea vara camel matea i unu na koko niteli matea, mo jeu haratu vara tamlohi tavtav matea i unu hin mauri atu God supe hinia.”

²⁶ Ale la haratu la lo rongo la reti atu lara, “Avei, vara mo sohena, sava tamlohi natu i pa eři juri?”

²⁷ Pani mo verea isara mara, “Sava tamlohi la sopo eři vaira, God i eři vaira.”

²⁸ Ale Peter mara, “Ko hitea, kama tinařihi vevuhi na imamam ale kama usuriho.”

²⁹ Ale Iesu mo verea isana mara, “Varařuhu na verea isamim, mo sopo te tamlohi hatea vara i tinařihi na imana, teni narouna, teni te voraina, teni tamana enia tinana, teni natuna matan mauri atu God mo aulu hinia, ³⁰ vara God i pa sopo volia nake na varama, i jeu na sava mo

tinañihira moiso, ale hitahu i pa lavi na mauri tui hin pongi atu mo lo mai.”

*Iesu Mo Sorahi Na Nona Mateia
(Mt 20.17-19; Mk 10.32-34)*

³¹ Ale Iesu mo tovi matavuhi la nona tupu sangavulu ūromana mo rua atu, ale mo verea isara mara, “Ka levosahia vara rā lo sahe Jerusalem. Ale hinau tari sei p̄rovet la ulia matan Natun Tamlohi la pa masese atu. ³² Matan la pa silea i vano na liman la haratu la tamlohi ūrōha, ale la pa kerehia, la pa vai na hina mahanuhanu isana, ale la litovia. ³³ Ale la pa rupia na asi majā, moiso la pa vilimateia, ale na hatolu rani i pa mele turu.”

³⁴ Pani la sopo levosahi te hinau hatea sei mo lo verea isara. La reti atu God mo jarohira isara, ale la sopo rongovosahi na sava mo lo verea.

*Matavuso Matea Mo Tovi Iesu
(Mt 20.29-34; Mk 10.46-52)*

³⁵ Mara mo lo mai mariviti Jericho, tamlohi matavuso matea mo lo sakele na pahisa malele, mo lo usi na tuetueni. ³⁶ Ale mara mo rongo na roroa vao tamlohi la lo hahau na pahisana, mo usia mara sava natu. ³⁷ La verea isana lara, “Iesu mara Nazareth mo lo hahau roto jara nike.”

³⁸ Ale mo ulo aulu mara, “Iesu, natun supe David, o ūromopoiā!” ³⁹ Ale la haratu la lo toho na nahona, la reti isana lara i toho malum. Pani mo mele ulo aulu mo ūrlangi jea mara, “Natun David, o ūromopoiā!”

⁴⁰ Ale Iesu mo turu mo retileu mara la lavia i mai isana. Ale mara mo mai mariviti isana, mo usia isana mara, ⁴¹ “Ko opoi vara a vai na sava isam?”

Mo verea mara, “Moli, o tinañihia vara a mele kilau.”

⁴² Ale Iesu mo verea isana mara, “O mele kilau, nom rasua mo vaiho ko ūruhū.”

⁴³ Ale vahatea purongo, mo mele kilau, ale mo usuria mo lo tahe na hijan God. Ale tamlohi tari lara la hitea, enira sohena la hasohaso God.

19

Iesu Enia Zacchaeus

¹ Iesu mo unu Jericho, ale mo lo vano vara i hahau roto jara atu. ² Hin jara atu tamlohi matea hijana Zacchaeus, enia patu tamlohi matea mata lavi na mania

mata takis, ale enia mo tavytav. ³ Enia mo lo vahitea vara i hite Iesu, matan enia pejulana matea purongo, ale vao atu la lo tu-ruhoroa. ⁴ Ale matana, mo maro mo vano tiroma mo vele aulu na pulo sycamore matea vara i eři hitea, matan i pa sopo tuai Iesu i pa hahau hin malele atu.

⁵ Ale Iesu mara mo tikeli jara atu, mo tařa sahe, ale mo verea isana mara, “Zacchaeus, o vila. O sevuti matan a pa toho na imam nohorihī.”

⁶ Ale mo jurete vilavila sivo atano, ale mo avulahi tavera vara i lavia. ⁷ Ale tamlohi lara la hitea, la reti vavarihi lara, “Eh, mo lo vano vara i toho na ima tamlohi hehe matea.”

⁸ Ale Zacchaeus mo turu na naho tamlohi atu mo verea isan Moli mara, “Ko hitea Moli, nakerihi a pa sile na sope noku hinahinau isana tilavono. Ale vara na halu tea hin te hinau, a pa mele silea isana i aulu vaha vati!”

⁹ Ale Iesu mo verea isana mara, “Nahapani, juri mo mai hin ima nike, matan enia sohena enia natun Abraham matea. ¹⁰ Matan Natun Tamlohi mo sinai vara i ale la haratu la jalio ale i jurira.”

*Volutusi Mo Sangavulu
(Mt 25.14-30)*

¹¹ Tamlohi lara la lo tapurongo hin la hinau nike, ale matan Iesu mo lo mai mariviti Jerusalem, mo tapulo vere na titileu matea isara, matan la lo ūromōrōnia lara mariviti vara God i turu na suisana natu, ¹² matan haratu mo verea isara mara, “Tamlohi aulu matea mo vano na jara asau tinapua matea, vara i tauri na suisana mata supe ea, ale mara i pa mele mai.

¹³ Pani tiromana, mo tovi na nona volutusi tupu sangavulu vara la mai isana, ale mo silera na selen mo tataholo na volvoli mata rani voko mo ngavulu sangavulu ⁽¹⁰⁰⁾ isara hatehateahi, ale mo verea isara mara, ‘Ha lavi mania akerihi; ha vavahinau persia i tikeli rani atu vara a mele pala.’ ¹⁴ Pani nona tamlohi la ūruhū hinia, moiso la ūrule na tamlohi hai la lo usuria vara la vere vara, ‘Kama sopo opoia vara tamlohi nike i supe hin kamam.’

¹⁵ Pani pa tamlohi aulu atu, mo vano na tauri na suisana hin jara tinapua atu, moiso mo mele hilu mai na jarana. Ale mo tovi la nona volutusi atu, sei mo lo silera na mania

matan mo opoia vara i levosahia vara la vai na sava hin mania atu mo lo silea isara. Mo opoia vara i levosahia vara la mele lavi na mania mo visa aulu hin haratu mo lo silea isara. ¹⁶Tiromara mo mai, mo turu na nahona mo verea mara, ‘Moli na nom mania na mele vai mo vaha sangavulu tinapua hinia.’ ¹⁷Ale mo verea isana mara, ‘Ko vaia mo ūhu jea, ko volitusi ūhu matea. Matan ko kilau mamahuni hinau rihirihi sei na taua na limam; ale a pa tauho vara o pa aulu na taon tavera i sangavulu.’

¹⁸ Harua tamlohi mo mai, mo verea mara, ‘Tamlohi tavera, na nom mania na mele vai mo vaha lima tinapua hinia.’

¹⁹ Ale supe atu mo verea isana mara, ‘Ale engko o pa aulu na taon tavera i lima.’

²⁰ Moiso mele volitusi tinapua matea mo mai mo verea mara, ‘Tamlohi tavera, nom mania nahai. Na jarohi mamahunia na tavalu ruru matea vara i lo toho ūhu hinia. ²¹ Matan na matahuniho matan engko tamlohi ūlangi matea. Matan ko lo lavi na hinau tamlohi tinapua mo lo taua, ale ko lo vu na isa engko ko sopo lavoa.’

²² Supe atu mo verea isana mara, ‘Engko volitusi lejileji sati matea! A pa ariho usuri na nom retireti. Ko levosahia moiso vara enau tamlohi ūlangi matea, ale vara na lo lavi na hinau tamlohi tinapua mo lo taua, ale na lo vu na isa na sopo lavoa. ²³ Mata sava ko sopo tau na noku mania na bank matan vara a mele mai a eři lavi noku mania sei peresi haratu bank mo lo vaia noku?’ ²⁴ Ale mo verea isan la nona volitusi atu sei la lo turu mariviti atu mara, ‘Ha lavi nařihi na mania isana, ha silea isan haratu mo lavi mo sangavulu!’

²⁵ Pani la verea isana lara, ‘Pani enia mo lavi mo sangavulu moiso!’

²⁶ Supe atu mo verea mara, ‘Na verea isamim vara tamlohi tari sei la lo tauri te hinau moiso, la pa mele silea isara i aulu hin haratu la lo tauria tiroma. Pani isan la haratu la sopo tauri te hinau, la pa lavi nařihi na sava la lo taurira moiso. ²⁷ Pani isan la noku meresahi nike, sei la ūhu vara a nora supe; ha lavira la mai nike, ale ha vilimateira na nahoku.’”

Iesu Mo Unu Jerusalem

(Mt 21.1-11; Mk 11.1-11; Jn 12.12-19)

²⁸ Ale Iesu mara mo vere la hinau atu mo isoiso, mo mele vano na malelena, mo vele

mo sahe Jerusalem. ²⁹ Iesu mara mo pa lo mai mariviti na taon matan Bethphage enia Bethany hin vutivuti atu sei la tovia Vuti talu Olive, mo ūrule na nona tamlohi usuri mo rua la vano la tiroma hinira, ³⁰ mara, “Ha vano, ha unu hin vanua sei na nahomim, ale vara ka lo unu, ha pa hite na natu donki matea la pesia mo lo turu atu; tea mo sopo lo vele i sakele hinia hin te rani. Ha uli nařihi ale ha lavia i mai. ³¹ Vara tea mo usia vara, ‘Mata sava ka lo uli nařihi?’ Ha pa verea sohen harihi vara, ‘Moli mo opoia.’ ” ³² Ale la vano la tapai natu donki atu sohen Iesu mo lo verea isara. ³³ Ale la pa lo uli nařihi, tavyina mo usia isara mara, “Mata sava ka lo uli nařihi natu donki sei?” ³⁴ Ale lara, “Moli mo opoia.” ³⁵ Ale la lavia mo mai isan Iesu, ale la vuřangi na nora ruru tavera na hařina, ale la vai Iesu mo sakele hinia. ³⁶ Ale mara mo lo hahau hinia mo lo vano, la pulahi na nora ruru na malele. ³⁷ Ale Iesu mara mo lo mai mariviti hin jara atu na malele mo lo tapulo sevuti na Vuti talu Olive, vao nona tamlohi usuri la tapulo lalavete, ale la lo hasohaso God na leo tavera matea, mata sava vavahinau mata suiha la hitera moiso lara, ³⁸“Avulahi isan supe atu mo lo mai na hijan Moli. Tamata i toho na tuka ale oololaveta i vano isan God Aulu Jea!” ³⁹ Pani tatua Pharisee hin vao atu la verea isan Iesu lara, “Tija, o reti isana nom tamlohi usuri mata sava la lo verea.” ⁴⁰ Iesu mo ūramira mara, “Varařuhu na verea isamim, vara la toho malum, la vatu nike, la pa ulo aulu!”

⁴¹ Iesu mara mo pa lo mai mariviti ale mo hite taon tavera atu Jerusalem, mo tangisia, ⁴² mara, “Tahisaku, vara o pa lo levosahi na nom rohi hin rani akerihi, o pa hite na tamata, pani nakerihi, God mo vusohi na matam moiso. ⁴³ Matan i pa sopo tuai nomim meresahi la pa voro na vořa ūralihiho, matan vara la pa pirohu na jara tari.

⁴⁴ La pa viliroiroiho, engko peresi na natum vahatea na lolo ropem, la pa ase vevuhi na vatu vořam tari matan ko sopo hitevosahi na rani God mo rohiho.”

⁴⁵ Moiso, Iesu mo unu na rope Temple, ale mo lo tapulo levuti nařihi la haratu la lo ařearihi hinia, ⁴⁶ ale mo verea isara mara, “La ulia vara, ‘Imaku enia ima mata usiusi’,

Isa 56.7 pani kamim ka vaia mo mai ‘jara luhu nona tamlohi vili na tamlohi mata vavanaho matea.’” *Jer 7.11*

⁴⁷ Hitahun haratu, na rani hatehateahi Iesu mo lo vujangi na lolo Temple. Tamlohi aulu nona p̄is, tamlohi vujangi mata leu peresi na patu tamlohi tinapua hai, la aleale malele vara la vilimateia hinia, ⁴⁸ pani la sopo hite te malele matan tamlohi tari la pa lo marohati hajavua mata nona retireti.

20

Suihan Iesu Mo Tai Epu

(Mt 21.12-17; Mk 11.15-19; Jn 2.13-22)

¹ Na rani matea, Iesu mo pa lo vujangi na tamlohi na lolo Temple na retivuvujangia mata Retiruhu, ale tamlohi aulu nona p̄is peresi na tamlohi vujangi mata leu, peresi na vajahan Israel la mai isana, ² ale la verea isana lara, “O to vere kamam hinia, vara sava suiha nahai, ko lo vai la hinau nike hinia, teni ko lo vai la hinau nike na suihan hare?” ³ Mo ūramira mara, “Enau sohena, a pa usi kamim na retiusia matea, ale ha to verea isaku vara ⁴ paptijo non John mo tai na tuka teni isana tamlohi?”

⁵ Moiso la sorasorahia isara lara, “Vara ūra verea vara, ‘Mo tai na tuka!’ enia i pa verea vara ‘Mata sava ka sopo rasua?’ ⁶ Pani vara ūra verea vara, ‘Isana tamlohi!’ tamlohi tari la pa parumatei ūra matan la ūrom vara John enia p̄ovet matea.” ⁷ Ale matana la ūramia lara, “Kama sopo levosahia vara mo tai epu.”

⁸ Ale Iesu mo verea isara mara, “Vara sohena, enau sohena a pa sopo eři vere kamim hinia vara na lo vai la hinau nike na suihan hare.”

Titileu Mata Tamlohi Isa Sasati

(Mt 21.33-46; Mk 12.1-12)

⁹ Ale, Iesu mo tapulo vere na tamlohi hin titileu akerihi mara, “Tamlohi tavera matea mo lavo na isa grape matea, ale tamlohi la lo pakaia isana. Ale enia mo vano na jara tinapua mo toho mo peravu ea. ¹⁰ Na rani asitauni mo mai, mo ūrule na nona volitusi matea mo vano vara i lavi te vua asitauni isara. Pani la tamlohi atu la tamajia, ale la ūrulea mo vano lekoleko. ¹¹ Ale tamlohi tavera atu mo mele ūrule na volitusi tinapua matea, pani la mele

tamajia la vailejlejia, ale la mele ūrulea mo vano lekoleko. ¹² Ale tamlohi tavera atu, mo mele ūrule na hatolura. Enia sohena la vili kitkitia, ale la tipahia. ¹³ Pa tamlohi tavera matan isa grape atu mara, ‘A pa vai na sava natu? Na levosahia, a pa ūrule natuku ūruhu ūruhu nikey; korong la pa oolo olo hinia.’ ¹⁴ Pani la tamlohi atu lara la hitea la hase verea isara lara, ‘Avei korong natuna nahai, ūra vilimateia matan koruna i pa nořa.’ ¹⁵ Ale la pulahi nařihia hin isa atu ale la vilimateia.” Ale Iesu mo usira mara, “Ka levosahia vara tamlohi tavera matan isa grape atu i pa vai na sava isan la tamlohi atu? ¹⁶ I pa mai i vaikomokomora, ale i mele sile isa grape sei isan te tamlohi tinapua.” La tamlohi tavera atu lara la rongo la reti atu lara, “I pa sopo sohen haratu!”

¹⁷ Pani Iesu mo kilau vano tataholo isara mo verea mara, “Vara mo vono, ūramin reti sei la ulia tuai enia sava lara, ‘Vatu atu, tamlohi voro na ima la tipahia mo mai pulo datu atu mata ima?’

Psa 118.22

¹⁸ Tamlohi tari vara la tialahahaha hin datu atu, datu atu i pa putputira, ale vara i jovi hin tea i pa lomolomoa.”

¹⁹ Tamlohi vujangi mata leu peresi na tamlohi aulu nona p̄is la aleale malele vara la taurilatia hin rani atu purongo, matan la rongovosahia vara Iesu mo lo verea titileu atu matara, pani la matahuni na tamlohi.

Iesu Mo Voli Na Takis

(Mt 22.15-22; Mk 12.13-17)

²⁰ Moiso la lo kilau ūrořohia, ale la ūrule hai vara la usuri ūrořohia la lo tiasia vara i vere te hinau la eři taurilatia matana, ale la eři taua na lima tamlohi aulu matan Rome matana. ²¹ Matan haratu, la usia lara, “Tija, kama levosahia vara nom reti peresi na nom vujangi la tataholo, ale ko sopo tametame tea, pani tarea ko lo vujangi na malele varau ūruhu non God. ²² Kama opoia vara kama usiho na retiusia matea. Mo tataholo vara kama sile na takis isan Supe nona mara Rome teni mo vono?” ²³ Pani Iesu mo levosahie na nora halu, ale mo verea isara mara, ²⁴ “Ha vujangiau hin te selen hatea mata takis. Niniun hare nakerihi, ale sava uliuli nahai hinia?” Lara, “Non Supe nona mara Rome.” ²⁵ Iesu mo

vereia isara, "Vara sohena, ha sile Supe nona mara Rome na sava enia nona, ale isan God na sava enia non God." ²⁶ Ale la tamlohi atu la sopo eři pisuhia hin te hinau mo lo vereia na naho tamlohi, pani la mařurahi tavera na nona ūarami reti, ale la lo turu tapanono.

*Sauteterahi Na Mateia
(Mt 22.23-33; Mk 12.18-27)*

²⁷ Sadducee hai la mai isana, enira vao matea la sopo rasua vara God i pa sauteterahi na tamlohi, ²⁸ ale la usi na retiusia matea isana lara, "Tija, Moses mo ulia mara vara vorai tamlohi matea mo mate, enia narouna matea pani mo sopo te natuna, tamlohi atu i pa lavi na malepun voraina ale i pa tape te natun voraina. ²⁹ Ale na rani matea, vorai mo limaravrua la lo toho. Vora tiroma mo lavi na narouna matea, ale mo mate mo sopo te natuna. ³⁰ Ale vora usuria mo pete lavia, ³¹ moiso hatolura mo mele lavia, ale la tupu limaravrua atu la mate enira mo isoiso, pani la sopo tape te natuvarihi. ³² Hitahuna hařai atu mo mate. ³³ Hin rani atu vara God i sauteterahi na tamlohi, hařai atu i pa naroun hare? O to vereia isamam, matan enira tupu limaravrua la lahi hinia!"

³⁴ Ale Iesu mo vereia isara mara, "Nake na varama, tamlohi la lo lahi, ale la lo sile na hařai mata lahi, ³⁵ pani la haratu God mo hitea vara la tataholo mata turu na sauteterahi na mateia mata unu hin pongi atu mo lo mai, enira la pa sopo lahi teni tea i pa sopo silera mata lahi, ³⁶ matan la pa sopo eři mele mate hin te rani matan enira la pa sohena angelo, la natun God matan enira la natun sauteterahi atu. ³⁷ Pani usuri ūromřomi atu sei vara tamlohi la pa mele turu na mateia teni mo vono, Moses sohena mo ulia na Retiulia, sei mo vereia hin rani atu God mo retireti isana hin vipahai atu mo lo pepe, Moses mo tovi Moli God mara, 'God non Abraham, God non Isaac ale God non Jacob'. *Exo 3.6*

³⁸ God enia mo sopo God nona tamlohi mate, pani nona tamlohi mauri, matan isana, tamlohi tari la lo mauri."

³⁹ Moiso tatua tamlohi vujangi mata leu la ūramia lara, "Tija, ko vereia ko vararuhi." ⁴⁰ Mo sopo te vonara hatea i mele opoia vara i usia hin te retiusia hatea.

*Kristo Enia Natun Hare
(Mt 22.41-46; Mk 12.35-37)*

⁴¹ Pani Iesu mo mele vereia isara mara, "Mo sohena sava natu la pa vereia vara Kristo enia natun supe David? ⁴² Matan David hasena mo vereia na puku non psalms mara,

'Moli God mo vereia isan noku Moli mara:
O sakele na matuaku, ⁴³ vavano a vai
na nom meresahi la mai la toho na
ruhuruhu palom.' *Psa 110.1*

⁴⁴ David mo tovia Moli, sohena sava natu enia mo pa natuna?"

⁴⁵ Ale na peron vao atu la lo tapurongo mo vereia isana nona tamlohi usuri mara,
⁴⁶ "Ha lo kilau mata tamlohi vujangi mata leu, sei la lo opoia vara la lo hahau ūalihi peresi na ruru peravu mata hapahapa, ale la opoia vara la lo lavi na retiololo na naho tamlohi na jara maket, ale la opoi na jara sakele la taura mata tamlohi aulu na ima lotu, ale la opoia vara la lo sakele na jara sakele nona tamlohi sei la tovira mata mai na hanhani tavera, ⁴⁷ ale ha lo kilau mata nora halu sei la lo lavi na ūalihi na hinahinau tari nona hařai malepu hinia, ale la lo tavuhoro na nora vavahinau na usiusi peravu. La pa lavi na talai tavera i jeu na tinapua."

21

*Silesilea Nona Malepu Matea
(Mk 12.41-44)*

¹ Iesu mo kilau vano mo hite na tamlohi tavytav, la lo tau na nora silesilea na jara silesilea na lolo Temple. ² Ale mo hite na hařai malepu tilavono matea, mo tau na selen mo rua. ³ Ale mo vereia mara, "Varařuhu na vereia isamim, hařai malepu tilavono nike mo taua mo jeu na tamlohi tavytav mo isoiso. ⁴ Matan sava la silea mo malue na nora tavytav tavera, pani sava enia mo silea, mo malue na nona tilavono, mo tau vevuhi na sava sei vara i pa eři tueni na maurina."

*Temple I Pa Maroe
(Mt 24.1-2; Mk 13.1-2)*

⁵ Ale, la pa lo verevereia vara Temple atu mo ūruhuhu sohena sava, ale sohena sava la tau mamahuni na vatu ūruhuhu hinia, ale sohena sava tamlohi hai la sile na silesilea ūruhuhu mata lakolakoa hinira, ale

Iesu mo verea isara mara, ⁶ “La hinau sei ka lo hitera, pongi matea mo lo mai vara i pa sopo mele te vatu hatea, i lo sakele aulu na vatu tinapua sei matan la pa atu jovjovira.”

*Rani Rilangi La Pa Mai
(Mt 24.3-14; Mk 13.3-13)*

⁷ Ale la usia isana lara, “Tija, pangisa natu la hinau sei la pa masese, ale sava matamata natu i pa vujangia vara mariviti natu vara la hinau atu la pa masese?” ⁸ Ale mo verea mara, “Ha sopo tinarohia vara tea i tikauleji kamim! Matan tamlohi matuvana la pa mai na hijaku lara, ‘Enau natu, Křisto!’ ale ‘Nake natu nona rani pala mo lo mai mariviti!’ Pani ha sopo usurira! ⁹ Ale vara ka rongo vara jara tavera la lo vai na vuro, ale vara la lo vuro na lolo jarara hasera, ha sopo matahu matan la hinau atu, la pa masese tiroma, ale pongi hitahu, i pa sopo mai vahatea.”

¹⁰ Iesu mo mele verea isara mara, “Mara jara tavera tinatinapu la pa meresahi hinira, ale supe matea i pa meresahi na supe tinapua. ¹¹ Mihi tavera la pa hisu na jara tinatinapua, ale marua peresi na rojoa tavera la pa vili na jara tinatinapua. Ale ha pa hite na hinau matahu tavera peresi na matamata tavera aulu na masapa. ¹² Pani tiroma, hin la hinau nike, tamlohi la pa taurilati kamim, ale la pa tipahi kamim, la pa sile kamim isan la haratu la lo kilau na ima lotu peresi na ima řilangi, ale la pa lavi kamim la turuhi kamim na naho supe peresi na patu tamlohi, matan ka lo lavi na hijaku. ¹³ Enia masapa matea vara ha pa eři vereuliau na naho tamlohi. ¹⁴ Ha lo levosahia nake vara, ha sopo matahu vara ha pa řaramira sohena sava, ¹⁵ matan enau a pa sile kamim na reti tataholo, vara ha pa verera isana nomim meresahi, ale la pa sopo eři řaramira teni la eři verea vara ka lo halu. ¹⁶ Tamamim peresi na tinamim, voraimim, tahisamim peresi na tapalamim, enira sohena, la pa tau te vonamim vara la pa vilimateira. ¹⁷ Tamlohi tari la pa řohu hin kamim mata hijaku. ¹⁸ Pani te vulumim hatea na patumim i pa sopo eři tihai purongo. ¹⁹ Mauri tui i pa nomim mata nomim turu řilangi.

*Jerusalem I Pa Jovi Na Lima Tamlohi Rořoha
(Mt 24.15-21; Mk 13.14-19)*

²⁰ Pani vara ka hite na tamlohi vuro la řalihi Jerusalem, ka levosahia vara nona pongi maroi mo pala natu. ²¹ Ale la haratu la lo toho Judea, la pa rovo la sahe na vutivuti, ale la haratu la lo toho na lolon taon tavera atu la malue, ale ha pa horo la haratu la lo toho řalihi taon tavera atu vara la sopo unu hinia, ²² matan harihi, enira rani mata talai tavera matan vara sava la ulira moiso la pa masese. ²³ I pa mele sati jea isana hařai sei la epe puhoni, teni la haratu la pa lo susui na natura. Matan rani sasati tavera na varama peresi na lolokoru tavera non God mata hehe, i pa jovi isan la tamlohi nike.

Natun Tamlohi Mo Mele Mai

²⁴ La pa vilimateira na sita vuro, ale la pa tiroma hinira sohena slev la vano na jara tinatinapua na varama. Ale la haratu la tamlohi řořoha, la pa varasi Jerusalem i tikeli isoiso rani atu sei God mo taua na limara moiso.

*Hin Rani Atu Iesu I Pa Mele Pala
(Mt 24.29-31; Mk 13.24-27)*

²⁵ Ale matamata la pa pala na alo, na vitu peresi na vitusarasara. Ale na varama, tamlohi na jara tinatinapua la pa řomkaka tavera mata roroa tasi peresi na loloputuna. ²⁶ Tamlohi la pa matemate mata nora matahu peresi na sava la levosahia vara la pa masese usuri na hinau la pa mai na varama, matan suiha la lo tauri na tuka peresi na masapa la pa malue na jarara. ²⁷ Moiso natu tamlohi tari la pa hite Natun Tamlohi i pala na telangi na suihana peresi na merana tavera. ²⁸ Ale vara la hinau atu la lo lavi na jara, ha turu tataholo ha tařa sahe aulu matan nomim jujuri mo lo mai mariviti.”

*Titieu Matea Mata Vipahai Fig
(Mt 24.32-35; Mk 13.28-31)*

²⁹ Moiso, Iesu mo verera na titieu matea mara, “Ha kilau usuri na pulo fig peresi na pulo pahai tari tinatinapua, ³⁰ vara la tapulo sohai na perera ka hitevosahia vara taro alo mo lo mai mariviti moiso. ³¹ Ale mo sohena purongo, vara ka hite la hinau sei la lo mai, ka levosahia vara mauri atu God mo aulu hinia, mo lo mai mariviti.

³² Varañuhu na verea isamim vara pina nike i pa sopo lo tihai vevuhi vavano hinau tari la masese. ³³ Tuka peresi varama la pa tihai, pani noku retireti la pa sopo eři tihai.

³⁴ Pani ha lo kilau! Mo sopo ūhu vara a tapai kamim ka lo toho purongo, teni ka lo drong, teni nomim ūmkaka la lo taurilati kamim. Ha sopo tinařihia vara pongi atu i pala isamim i sařumahi kamim. ³⁵ Matan i pa sařumahi na tamlohi tari la lo toho na varama. ³⁶ Pani tarea ha lo kilau, ha lo usiusi vara ha pa eři jelu hin la hinau tari sei la pa masese, ale ha pa eři turu na nahon Natun Tamlohi.”

³⁷ Rani tarea, Iesu mo lo vano mo lo vujangi na lolo Temple; moiso na ravravi mo lo hilu mo lo sahe na Vuti talu Olive, ale mo lo toho ea na vutepongi. ³⁸ Ale na ūlavuho jea, tamlohi tari la lo mai isana na Temple vara la tapurongo isana.

22

Judas Mo Turuposi Hin Iesu

(Mt 26.1-5, 14, 16; Mk 14.1-2, 10-11; Jn 11.45-53)

¹ Hanhani tavera mata pereti atu mo sopo te isi hinia mo lo mai, haratu la tovia Passover. ² Ale tamlohi aulu nona přis peresi na tamlohi vujangi mata leu, la lo aleale malele vara la pa vilimatei Iesu hinia, matan la matahu vara la vaia na naho tamlohi.

³ Ale Setan mo sohoni Judas Iscariot, vonara matea hin la tupu sangavulu ūromana mo rua atu. ⁴ Mo malue mo vano mo sorasora peresi na tamlohi aulu nona přis peresi na patu police mata Temple. Matan la pa verea vara i pa turuposi hinia sohena sava matan vara i pa taua na limara. ⁵ Ale la avulahi, la hatihia vara la pa sile te mania isana. ⁶ Ale matana mo majinga hinia, moiso mo aleale masapa vara i pa turuposi hinia, vara i eři taua na limara hin te jara, mo sopo te vao tamlohi hinia.

Isoiso Hanhani Non Iesu

(Mt 26.17-25; Mk 14.12-21; Jn 13.21-30)

⁷ Moiso rani mata pereti sei mo sopo te isi hinia mo pala, enia rani atu la lo sile

na natu sipsip mata Passover sohena mala-malai isan God. ⁸ Matana, Iesu mo ūrule Peter enia John mara, “Ha vano ha tatamahu mata nořa hanhani mata Passover vara ū eři hania.”

⁹ La usia isana lara, “Ko opoia vara kama pa tatamahunia epu?”

¹⁰ Mo verea isara mara, “Ha tapurongo, vara ka lo unu na taon tavera, ha pa tapai na tamlohi matea mo lo utu na jara wai tavera matea. Ha usuria ha unu hin ima atu enia mo unu hinia, ¹¹ ale ha verea isan tamlohi tavera mata ima atu vara, ‘Tija mo verea isam mara, ‘Nene jara mata matavuhi na imam sei vara a eři hani na hanhani mata Passover peresi na noku tamlohi usuri ea?’” ¹² Ale i pa vujangi kamim na jara tavera matea aulu na imana sei mo tatamahunia moiso, ha tatamahu atu.” ¹³ Ale la malue la vano la hitea mo tatahola sohen mo verea isara, ale la tatamahu mata Passover atu.

Hanhani Mata Passover Atu

(Mt 26.26-30; Mk 14.22-26; 1Co 11.23-25)

¹⁴ Ale aoa matan hanhani atu mo tatahola, Iesu mo sakele na jara hanhani na tep moiso, ale nona vahařule la lo toho plesia. ¹⁵ Ale mo verea isara mara, “Na opoia mo tavera jea vara a hani Passover nike peresi kamim, moiso a pa lavi na rongohaji tavera. ¹⁶ Matan na verea isamim, vara a pa sopo mele hania vavano i tikeli rani atu hinau tari la masese hin mauri atu God mo aulu hinia.” ¹⁷ Ale mo lavi na paniken matea ale mara mo vere meje moiso mo verea mara, “Ha lavia, ha asea isamim ha inua. ¹⁸ Matan na verea isamim, vara a pa sopo mele inu waen akerihi vavano i tikeli rani atu, mauri atu God mo aulu hinia i mai.”

¹⁹ Moiso, mo lavi na pereti, ale mara mo vere meje moiso, mo topetopea mo silea isara mara, “Harihi enia epeku sei na silea matamim. Ha lo vaia sohena mata ūromiau hinia.” ²⁰ Ale lara la hanhani moiso, mo mele vaia sohena hin paniken waen atu mara, “Paniken nike, na lo sureia matamim, enia retitauhi paro sei na lo vaia na ūaeaku.”

²¹ Pani ha tapurongo, haratu sei i pa turuposi hiniau, mo lo sahara na hanhani na tep peresiau nakerihi. ²² Matan Natun

Tamlohi i pa vano i usuri na masalon God, pani rani sasati isan haratu sei mo turu posi hinia.”

²³ Moiso, enira mo isoiso la tapulo usiusia isara hatehateahi vara sava tamlohi isara natu i pa vai hinau atu.

²⁴ Pani mo sopo tuai, vauriuri matea mo malue isara vara hare natu enia i pa aulu hin mauri atu God mo aulu hinia. ²⁵ Ale Iesu mo verea isara mara, “Hin varama nike supe nona tamlohi ūroha la aulu na nora tamlohi peresi la haratu suiha mo lo toho na limara, ale la lo retileu isara tarea vara la vai na masalora, pani hina purongo vara la lo toho na ruhuru hura, la lo tovira lara ‘Tuetueni nona tamlohi’. ²⁶ Pani i pa sopo sohena isamim: haratu enia mo opoia vara i aulu i jeu na tinapua, i pa hase taua atano sohena vora hitahu matea, ale haratu mo opoia vara i tiroma na tamlohi, i pa mai i lo volitusi. ²⁷ Hare natu enia tamlohi tavera? Haratu mo sakele na tep teni haratu mo volitusi isana? Enia haratu mo sakele na tep. Pani enau na lo mai isamim sohena volitusi matea.

²⁸ Kamim natu, ka lo toho peresiau na noku rani ūlangi. ²⁹ Matan haratu, na lo silea isamim sohen Tamaku mo silea isaku vara, ha pa aulu sohena supe, ³⁰ matan vara ha pa hanhani ale ha inu na noku tep na rani vara na lo tauri na suiha, ale ha pa sakele na jara sakele nona supe mata ari la tautavui tupu sangavulu ūromana mo rua atu non Israel.

*Rani Vaihite La Pa Mai
(Mt 26.31-35; Mk 14.27-31; Jn 13.36-38)*

³¹ Simon, Simon, o lo levosahia vara Se tan mo usia ūlangi vara i pa laviho matan vara i hutehutehiho sohena tamlohi mo lo asehi na piri wit, ³² pani na usiusi moiso matam matan vara nom rasua i pa sopo jovi, ale hin rani atu sei ko mele pos, o pa tueni na voraim vara la turu ūlangi.”

³³ Peter mo verea isana mara, “Moli, enau na tatamahu vara a vano peresiho na ima ūlangi, teni a mate matam.”

³⁴ Iesu mo verea mara, “Vara ūruhu na verea isam Peter, toa i sopo lo tarere no horihi vavano, i tikeli rani atu ko vunvunia vaha tolu vara ko sopo levosahiau.”

³⁵ Ale Iesu mo verea isara mara, “Hin rani atu sei na ūrule kamim ka vano ka sopo

lavi te tanga korohi teni te tanga, teni te sabat – ka vejuveju hin te hinau teni mo vono?”

Lara, “Mo vono.”

³⁶ Mo verea isara mara, “Pani nake natu, haratu vara te nona tanga korohi teni te tanga i pa lavia. Ale haratu mo sopo lo te nona sita vuro, i pa ařehi na nona ruru hamariri, ale i voli te hatea. ³⁷ Matan na verea isamim vara Retitapu nike i pa masese hiniau sei mo vara, ‘La evia peresi la haratu la lo tope na leu’. Matan sava la ulia matakū i pa masese.”

³⁸ Ale la verea lara, “Eh Moli, sita vuro mo rua nahai moiso!”

Ale mo verea mara, “Mo isoiso natu.”

*Iesu Mo Usiusi
(Mt 26.36-46; Mk 14.32-42)*

³⁹ Ale mo malue hin ima atu mo mele vano na Vuti talu Olive sohen mo lo vaia tarea, ale nona tamlohi usuri la usuria.

⁴⁰ Ale mara mo kakau jara atu mo verea isara mara, “Ha usiusi matan vara ha pa sopo jovi na vahite.” ⁴¹ Ale mo hahau vano makomona, mo papaohi atano, ale mo usiusi ⁴² mara, “Tata, vara ko opoia, o eři lavi nařihi na noku rani ūlangi nakerihi, pani o sopo vai na masaloku, pani o vai na masalom purongo.” ⁴³ Ale angelo matea mo pala isana mo tuenia vara i mele ūlangi. ⁴⁴ Ale na nona ūrom sati tavera mo usiusi mo mele ūlangi jea; ale masmasuna mo hoi peresi na ūrae mo tuturu sivo na lepa. ⁴⁵ Ale mo mele turu na nona usiusi mo mai isana nona tamlohi usuri, mo hitera la juruvi ūromaliho, matan la malokoloko tavera, matan ūromira mo sati na sava i pa masese,

⁴⁶ ale mo verea isara mara, “Ka lo juruvi mata sava? Ha turu, ha usiusi matan vara ha pa sopo jovi na vahite.”

*La Taurilati Iesu
(Mt 26.47-56; Mk 14.43-50; Jn 18.3-11)*

⁴⁷ Ale Iesu mo pa lo retireti, vao tavera matea mo pala, ale pa tamlohi atu sei la tovia Judas, enia vonara matea hin la tupu sangavulu ūromana mo rua atu, mo lo tiroma hin vao atu, mo mai mariviti isan Iesu vara i pungosia, ⁴⁸ pani Iesu mo verea isana mara, “Judas, o pa turuposi hin Natun Tamlohi na pungosi matea?”

⁴⁹ Ale la haratu la lo toho ūalihia, lara la hitevosahi na sava i pa masese lara, “Avei Moli, ūa taira na sita vuro teni mo vono?”

⁵⁰ Ale vonara matea mo langa nařihi na peron volitusi non přis aulu. ⁵¹ Pani Iesu mara, “Ha isoiso!” ale mo tikeli na persona, ale mo mele sořoa vano na patuna.

⁵² Moiso, Iesu mo verea isana tamlohi aulu nona přis peresi na police mata Temple, peresi na vajahara sei la mai matana mara, “Ka mai peresi na sita vuro peresi na maja sohen ka lo vano mata taurilati na tamlohi vili na tamlohi mata vavanaho matea? ⁵³ Tarea na lo toho peresi kamim na lolo Temple pani ka sopo taurilatiau. Pani nakerihi enia nomim rani peresi na rani non suihan ūrořoha.”

Peter Mo Vunvuni Iesu

(Mt 26.57-58, 67-75; Mk 14.53-54, 66-72; Jn 18.12-18, 25-27)

⁵⁴ Moiso la taurilatia, la tiroma hinia la malue la vano na iman přis aulu, ale Peter mo lo usurira asau makomona. ⁵⁵ Ale lara la vai na hapu matea na livuha jara na lolon rope ima atu moiso, la sakele ūalihia ale Peter mo vano mo sakele peresira.

⁵⁶ Moiso, volitusi hařarihi matea mara mo hite Peter mo lo sakele atu, mo mele kilau mamahunia mara, “Tamlohi nike sohena, mo lo toho peresi Iesu.” ⁵⁷ Pani Peter mo vunvunia mara, “Hařai, na sopo levosahia.” ⁵⁸ Ale moiso, tamlohi tinapua matea mo hitea mo mele verea mara, “Engko vonara matea.” Pani Peter mo verea mara, “Tapala, enau mo vono.” ⁵⁹ Ale korong mele aoa matea mo vano moiso, tamlohi tinapua matea mo mele verea mara, “Varařuhu sei, tamlohi nike enia mo lo toho peresia, matan enia mara Galilee matea.” ⁶⁰ Pani Peter mara, “Tapala, na sopo levosahi na sava ko lo verea.” Ale mo pa lo verea toa mo tarere. ⁶¹ Ale Moli mo posí mo kilau vano isan Peter, ale Peter mo mele ūromřomi na sava Moli mo verea isana mara, “Toa i sopo lo tarere, o pa vunvuniau vaha tolu.” ⁶² Ale mo malue mo sahe na jingoima mo tangi huruhuru.

⁶³ Ale la haratu la lo taurilati Iesu la tamajia, ale la lo kerehia. ⁶⁴ La pesihoro na matana ale la lo usia hinia lara, “O to retimangovi! Hare natu mo tutuiho?”

⁶⁵ Ale la mele vere na hinau sati tinapua matuvana isana, ale la lo kalia.

Iesu Mo Turu Na Naho Pulutahi Tavera

(Mt 26.59-66; Mk 14.55-64; Jn 18.19-24)

⁶⁶ Mara mo rani sahe, matavuhi nona vajahara la pulutahi peresi na tamlohi aulu nona přis peresi na tamlohi vujangi mata leu. Ale la haratu la lo taurilatia la tiroma hinia mo vano isan nora matavuhi atu, ale la verea isana lara, ⁶⁷ “Vara engko natu, Křisto atu, o verea isamam!” Pani mo verea isara mara, “Vara a verea isamim, ha pa sopo rasua, ⁶⁸ ale vara a usi kamim hin te retiusia, ha pa sopo ūaramiau. ⁶⁹ Pani mo tapulo nake natu, Natun Tamlohi i pa sakele na tavalu suihan God.” *Psa 110.1*

⁷⁰ Ale matana, enira mo isoiso lara, “Engko natun God teni mo vono?” Moiso mo verea isara mara, “Ka pete verea moiso, enau natu.” ⁷¹ Moiso, la verea lara, “Ra pa mele opoi na sava vereulia tinapua! Ra rongoa mo pete hase verea moiso vara enia Natun God.”

23

Iesu Mo Turu Na Nahon Pilate

(Mt 27.1-2, 11-14; Mk 15.1-5; Jn 18.28-38)

¹ Moiso enira mo isoiso la turu, ale la lavi Iesu mo vano isan Pilate. ² La tapulo tuvaia lara, “Kama hite tamlohi nike mo lo tikauleji na nomam tamlohi, ale mo lo horo kamam vara kama sopo sile te takis isan supe matan Rome, ale enia mo lo verea vara enia natu, Křisto, supe atu sei i pa mai.” ³ Ale Pilate mo usia isana mara, “Engko Supe nona Jew?” Ale mo ūaramia mara, “Engko ko verea moiso.” ⁴ Moiso Pilate mo verea isana tamlohi aulu nona přis peresi vao tavera atu mara, “Na sopo vilei te hehe hin tamlohi nike.” ⁵ Pani la verea toho hinia mo ūilangi lara, “Enia mo vai na tamlohi la lo usuri na ūomina, mo vujangira na jara tari Judea mo tapulo Galilee mo sinai mo kau nike.”

⁶ Pilate mara mo rongoa sohena, mo usia mara enia mara Galilee matea teni. ⁷ Ale Pilate mara mo levosahia vara Iesu mo tai na jara Galilee mo lo toho na ruhuruhun Herod, mo ūrulea mo vano isana matan mo lo toho Jerusalem hin rani atu. ⁸ Na

rani Herod mara mo hite Iesu, mo avulahi tavera matan tuai moiso, mo opoia vara i hitea matan mo lo rongo na sora-sorahina, ale mo lo ūromtau vara i pa hite Iesu i vai te matamata. ⁹ Ale mo usia na retiusia mo usia mo tuai, pani Iesu mo sopo ūramira. ¹⁰ Tamlohi aulu nona p̄ris peresi na tamlohi vujangi mata leu la lo turu na pahisana, la lo tuvaia mo ūilangi. ¹¹ Ale Herod peresi na nona tamlohi vuro, la vaisathia na nora retireti, ale la kerehia. Moiso la rua na ruru ūruhu, la ūrulea mo mele vano isan Pilate. ¹² Hin rani atu purongo, Herod mo tapala peresi Pilate. Pani tiroma enira tupra rua la meresahi.

*La Taua Vara I Pa Mate
(Mt 27.15-26; Mk 15.6-15; Jn 18.39–
19.16)*

¹³ Moiso Pilate mo tovi matavuhi na tamlohi aulu nona p̄ris peresi na tamlohi aulu non Israel peresi na tamlohi, ¹⁴ ale mo verea isara mara, “Ka lavi tamlohi nike mo mai isaku, ale ka verea vara enia mo lo tikauleji na tamlohi. Ale nara na kilau usuri na sava ka lo verea matana moiso, ale ha levosahia vara na sopo vileia vara tamlohi nike mo ori hin te hinau hatea sei ka lo tuvaia hinia. ¹⁵ Herod sohena, mo sopo vilei te hinau, matan enia mo mele ūrulea mai isaña. Ka hitea, mo sopo vai te hinau vara i pa mate matana. ¹⁶ Matana, a pa sile na talai matea isana, moiso a pa tinařihia vara i vano.”

¹⁷⁻¹⁸ Pani la ulo enira mo isoiso vahatea lara, “O vilimatei tamlohi sei! Ale o sile Barabbas isamam!”

¹⁹ Barabbas enia tamlohi matea la pulahia na ima ūilangi matan mo lo tiroma na tamlohi mata valum hin taon tavera atu, ale matan mo lo vilimatei na tamlohi. ²⁰ Pilate mo mele sile na retireti isara matan mo opoia vara i tinařihia Iesu, ²¹ pani la lo ulo toho lara, “Ha vosaea na talopeilopei! Ha vosaea na talopeilopei!” ²² Ale Pilate mo mele sile na nona hatolu reti isara mara, “Mata sava? Mo vai na sava mo sati? Enau na sopo vilei te hinau vara i pa mate matana. Ale matana, a pa sile na talai matea isana moiso a tinařihia vara i vano.” ²³ Pani la lo ulo toho isana la lo usia lara la vosaea na talopeilopei. Ale nora reti mo vili na reti non Pilate. ²⁴ Matana, Pilate mo tinařihia vara sava

la usia i pa sohena. ²⁵ Matan la usia, mo tinařihia pa tamlohi atu sei mo lo taua na ima ūilangi matan mo lo tiroma na tamlohi mata valum, ale matan enia mo lo vilimatei na tamlohi, pani mo sile Iesu vara i vano na masalora.

La Vosae Iesu Na Talopeilopei

(Mt 27.31-44; Mk 15.21-32; Jn 19.17-27)

²⁶ Ale la pa lo tiroma hinia mo lo malue, la taurilati na tamlohi matea hijana Simon mara Cyrene, enia mo tai asau ūrove na jara vutivuti, ale la tau na talopeilopei isana matan vara i solotia, ale mo usuri Iesu. ²⁷ Ale vao tavera jea nona tamlohi peresi na hařai la lo tangisia, la lo tangtangi, ale la lo usuria. ²⁸ Pani Iesu mo verea isara mara, “La venatun Jerusalem, ha sopo tangisiau, pani ha tangisi kamim hasemim peresi na natumim. ²⁹ Matan ha lo levosahia vara rani matea mo lo mai sei la pa verea vara, ‘Avulahi isana hařai aroaro, ale isan haratu la sopo tatape, ale isan la haratu la sopo lo vasusu hin te rani.’ ³⁰ Hin rani atu, ‘Tamlohi la pa tangi isana vutivuti lara – ha jovjovi isamam!

Ale isana pesapesa la pa verea lara – ha tavuni kamam!”

Hos 10.8

³¹ Matan vara, vara la vai la hinau nike na rani ūruhu sei vipahai la lo ulua mo ūruhu, i pa sohena sava hin rani atu mo koru?”

³² Tamlohi tinapua mo rua sei la tamlohi sasati, la tiromara la vano matan vara la pa vilimateira peresi Iesu. ³³ Ale lara la kakau jara atu sei la tovia ‘Sui Patu Tamlohi’ la vosaea hin jara atu na talopeilopei peresi la tamlohi sasati atu, matea na matuana, ale matea na marauna.

³⁴ Ale Iesu mara, “Tata, o ūromira matan la sopo levosahi na sava la lo vaia!” Ale tamlohi vuro atu la vai na roro matea mata hitea vara hare natu i pa lavi te nona ruru.

Psa 22.18

³⁵ Tamlohi la lo turu atu, la lo kilaua, pani tamlohi aulu natu la lo kerehia lara, “Enia mo juri na tinapua! I to hase juria vara enia natu, Křisto non God, hara sei God mo vironia!” ³⁶ Tamlohi vuro atu sohena la lo kerehia, la mai isana la sile na waen hohona isana vara i inua, ³⁷ ale lara, “Vara engko Supe nona Jew, o hase juriho!” ³⁸ La

uli na uliuli matea la taua aulu hinia, mo verea vara,

Harihi Enia Supe Nona Jew

³⁹ Vonara matea hin la tamlohi sasati mo rua atu, la lo sevu na pahisana, mo kerehi Iesu mara, "Engko Křisto atu teni mo vono? O hase juriho, ale o juri kamam!" ⁴⁰ Pani tamlohi sasati tinapua atu matea mo merusahia mara, "Eh, ko sopo matahuni God? Ko sopo levosahia vara enřa řa lo toho na ruhuruhi talai nike peresia?" ⁴¹ Enřa mo tataholo vara řa lavia, matan enřa řa lavi na volvoli tataholo mata nořa vavahinau, pani tamlohi nike mo sopo vai te hina sati." ⁴² Ale mo verea isan Iesu mara, "Iesu, o lo řomřomiau hin rani atu vara ko tauri na nom suiha mata supe." ⁴³ Ale Iesu mo verea isana mara, "Varařuhu, na verea isam, engko o pa toho peresiau hin jara avulahi atu Paradise no-horihi."

Iesu Mo Mate

(Mt 27.45-56; Mk 15.33-41; Jn 19.28-30)

⁴⁴ Matan alo mo sangavulu řomana mo rua na rani tavera, ale ſorořha tavera mo tahavuni jara tavera atu mo tikeli na matan alo mo tolu na ravravi ⁴⁵ matan mera alo mo tihai. Ale ruru tavera atu mo lo horo na jara tapu mo tapu jea na lolo Temple, mo mařari mo rua. ⁴⁶ Moiso Iesu mo ulo aulu mara, "Tata, na tau na mauriku na limam!" Mara mo verea moiso maromarona mo isoiso. ⁴⁷ Ale captain mata tamlohi vuro mara mo hite la hinau sei la lo masese, mo hasohaso God mo verea mara, "Varařuhu. Tamlohi nike mo sopo vai te hina sati hatea." ⁴⁸ Ale vao tamlohi tari atu sei la lo pulutahi mata hite hinau akerihi, lara la hite la hinau sei la masese, la mule peresi na tangtangi tavera. ⁴⁹ Ale tapalana tari, peresi la hařai atu sei la tapulo usuria Galilee, la lo turu asau makomona, la lo kilau la hinau akerihi.

La Tavuni Na Tarapen Iesu

(Mt 27.45-56; Mk 15.33-41; Jn 19.28-30)

⁵⁰ Ale tamlohi matea hijana Joseph mo lo toho atu, mo tai na taon nona Jew la tovia Arimathea. Enia vonara matea na lolo council tavera non Israel, pani enia tamlohi řuhu matea posina mo tataholo, ⁵¹ ale enia mo sopo avulahi na sava la hatihia teni na sava la vaira, enia mo tai

Arimathea na jaran Judea, ale enia mo lo kilau matan rani atu God i pa tauri na suiha hinia. ⁵² Tamlohi atu mo vano vara i hite Pilate matan vara i usi na tarapen Iesu. ⁵³ Mo juria sivo atano, ale mo viriviria na ruru lulu řuhu matea mata mate, ale mo taua na taptap matea la taia na pesapesa, ale mo sopo lo te tarape i jruvi hinia hin te rani. ⁵⁴ Rani atu enia Rani mata Tatamahu nona Jew, ale mariviti Sabbath i tapulo. ⁵⁵ La hařai sei la lo usuria la tai Galilee la usuria vara la hitea vara la pa taua na sava taptap, ale la pa hitea vara la pa tau na tarapena sohena sava. ⁵⁶ Moiso, la mele mule, ale la tatamahuni na lai ponaha řuhu peresi na hasori mata taua na tarapena.

Na Sabbath la mapu usuri na retileu non Moses.

24

Sauteterahi Non Iesu

(Mt 28.1-10; Mk 16.1-8; Jn 20.1-10)

¹ Pani na Sunday na řalavuho jea, pa la hařai atu la vano na taptap, la lavi na lai ponaha řuhu sei la tatamahunira moiso. ² Ale lara la kau na taptap la hite datu tavera atu mata matarua la kuresi nařihia moiso, ³ pani lara la unu la sopo hite na tarapen Moli Iesu, ⁴ řomira mo pa lo ti-hai, ale la pa hutura purongo, tamlohi mo rua la lo turu na pahisara, nora ruru la memera tavera. ⁵ Ale la matahu tavera, la popovi na nahora atano na lepa, ale la tamlohi atu la verea isara lara, "Mata sava ka lo ale na tamlohi mauri na jara mate?" ⁶ Enia mo sopo toho nike, pani mo mele turu moiso. Ka lo řomřomi na sava mo verea isamim hin rani atu mo pa lo toho Galilee, ⁷ mara Natun Tamlohi i pa vano na lima tamlohi sasati matan vara la pa vosaea na talopeilopei, ale i pa mele turu na hatolu rani." ⁸ Ale la pa mele řomřomi na nona retireti, ⁹ ale la malue na taptap la vano la vere na hinau tari isan la tupu sangavulu řomana matea atu, peresi la haratu la lo toho peresira. ¹⁰ Ale Mary Magdalene, Joanna, Mary tinan James peresi na hařai tinapua hai sei la lo toho peresira, enira natu la vere la hinau sei isan la vahařule atu. ¹¹ Pani la rongoa sohena sorasora rongorongo vono matea, ale la sopo rasura.

Jesu Na Malele Emmaus

¹² Pani Peter mo turu mo maro mo vano na taptap, mo riorio sivo mo hite na tavalu ruru lulu purongo la pa lo toho atu, ale mo mele mule mo mařurahi tavera na sava mo masese.

Jesu Mo Pala Isana Tamlohi Mo Rua (Mk 16.12-13)

¹³ Tataholo hin rani atu, tamlohi mo rua isara, la lo vano na vanuan Emmaus, mariviti kilometre i sangavulu ūromana matea hin Jerusalem. ¹⁴ Ale la lo sorahi na hinau tari sei la masese Jerusalem. ¹⁵ La pa lo retireti la lo sorahia, Iesu mo mai mo hahau peresira. ¹⁶ Pani la sopo hitevosahia matan God mo horora. ¹⁷ Ale mo verea isara mara, “Avei, sava sei ka lo sorahia na nomim hahau?”

La turu vahatea ale nahora mo vujangia vara ūromira mo sati.

¹⁸ Ale vonara matea, hijana Cleopas mo ūramaria mara, “Avei, korong engko hasem purongo sei ko rohi Jerusalem, ale ko sopo levosahi na sava mo masese hin la rani akerihi sei la vano moiso?”

¹⁹ Ale Iesu mo verea isara mara, “Sava hinau natu?”

Ale la verea isana lara, “Hinau la vaia isan Iesu mara Nazareth, enia p̄ovet sei nona retireti peresi na suihana la ūruhu ūruhu jea na nahon God, peresi na tamlohi tari. ²⁰ Ale sohena sava nomam tamlohi aulu nona p̄ris peresi na tamlohi aulu la taua na liman Pilate, vara i sile na talai isana mata mate, ale la vosaea na talopeilopei. ²¹ Pani kama lo ūromtoho vara enia natu, haratu sei i pa juri Israel. Pani mo sopo haratu purongo, nahapani enia hatolu rani usuri la hinau sei la masese. ²² Ale aulu hin haratu, nomam hařai hai, la vai kamam kama mařurahi jea. Enira la lo toho na tapuna na ūralavuho jea. ²³ Ale lara la sopo hite na tarapena, ale la mele hilu mai, la verea isamam vara la hite na angelo hai, ale la verea isara vara mo mele mauri. ²⁴ Tatuamam la rongoa la vano na tapuna vara la hitea, ale la hitea mo tataholo sohen haratu la hařai atu la lo verea, ale la hitea varauhu tarapen Iesu mo tihai.”

²⁵ Ale Iesu mo verea isara mara, “Ka tamlohi rongorongo vono! Mapumim la ūrlangi mata rasu na hinau tari p̄ovet la verea moiso! ²⁶ Mo mera purongo na sava

la ulia lara Křisto i pa lavi na rongohaji tiroma, moiso i pa lavi na hasohasona tavera.” ²⁷ Ale Iesu mo tapulo vereuli na hinau tari sei Moses peresi na p̄ovet la ulira na jara tari na Retitapu sei la vereulia vara maurina i pa sohena sava.

²⁸ Ale lara la lo mai mariviti hin vanua atu sei la lo hahau matana, Iesu mo lo hahau o hitea sohena vara i pa jeu vanua atu, ²⁹ pani la verea ūrlangi isana lara, “O lo toho peresi kamam matan mo ravravi moiso, ale alo mo sakele na vuti moiso.” Ale mo usurira, mo lo toho peresira. ³⁰ La sakele na tep, ale mo lavi na pereti mo leřuhu hinia, mo topea, moiso mo silea isara. ³¹ Ale vahatea purongo, matara la roi la hitevosahia, ale mo tihai isara. ³² La verea isara hasera lara, “Varauhu sei matan mapuřa la avulahi jea na rani Iesu mo lo retireti peresira na malele sei mo vai na Retiulia la roi isara?” ³³ Ale la turu vahatea la hilu, la mele vano Jerusalem, la tapai la tupu sangavulu ūromana matea atu peresi la haratu la lo toho peresira la lo pulutahi na jara matea. ³⁴ Ale la verea isan la tupra rua atu lara, “Varauhu, Moli mo mele turu, mo pala isan Simon Peter moiso!” ³⁵ Moiso la tupra rua atu la pete vere na sava mo masese na malele, ale sohena sava la pa hitevosahia na rani mo tope na pereti.

Vavahinau Non Nona Tamlohi Usuri (Mt 28.16-20; Mk 16.14-18; Jn 20.19-23; Acts 1.6-8)

³⁶ La pa lo sorahi la hinau sei, Iesu mo turu na livuhara, mo verea isara mara, “Tamata i toho isamim!” ³⁷ Pani la hutura hinia, la matahu tavera matan la ūrom vara la hite na tanume matea. ³⁸ Moiso mo verea isara mara, “Ka matahu mata sava? Ale ūromkaka mo malue na mapumim mata sava? ³⁹ Ha hite na limaku peresi na paloku vara enau varauhu nahai. Ha tikeliau, ale ha levosahia, matan tanume mo sopo te epena soheku sohen ka lo hitea.” ⁴⁰ Ale mara mo verea moiso, mo vujangi na limana peresi na palona isara. ⁴¹ Ale la sopo lo rasu na sava la hitera matan la marurahi tavera hinia, ale mo verea isara mara, “Avei, te hanhani nike?” ⁴² Ale la

silea na tavalu maji matea mo noha na wai tutuni,⁴³ ale mo lavia mo hania na nahora.

Iesu Mo Retileu Isara

⁴⁴ Ale Iesu mo verea isara mara, “Reti nika enira noku reti sei na pete verea moiso isamim hin rani atu na pa lo toho peresi kamim, vara hinau tari sei la ulia na Leu non Moses peresi na Retiulia nona p̄ovet peresi na puku non psalms la pa masese.” ⁴⁵ Moiso mo vai na ūomira la roi matan vara la ēri rongovosahi na Retitapu, ⁴⁶ ale mo verea isara mara, “La ulia sohen harihi lara, K̄risto i pa lavi na rongohaji moiso i mate, ale na hatolu rani i pa mele turu na mateia, ⁴⁷ ale la pa retivujavujangi na posi mata hehe, ale God i pa ūomi na nora hehe na hijan K̄risto, la pa retivujavujangia i vano isana tamlohi mara jara tinatinapua tari i tapulo Jerusalem i vano. ⁴⁸ Kamim ka hite la hinau sei na matamim. ⁴⁹ Ale ha levosahia vara na lo ūrule na Tanume Tapu usuri na retitaui non Tamaku isamim. Pani ha lo toho Jerusalem i tikeli rani atu suiha aulu matan na tuka i jovi hin kamim.”

Iesu Mo Sahe Na Tuka

(Mk 16.19, 20; Acts 1.9-11)

⁵⁰ Moiso mo tiromara la malue la vano la tikeli Bethany, ale mo tahe na limana mo lēruhu hinira. ⁵¹ Mo pa lo lēruhu hinira, God mo lavi nañihia mo sahe aulu na tuka. ⁵² Ale la lotua, la mele hilu la vano Jerusalem peresi na avulahi tавera, ⁵³ ale la vano la lo toho tarea na Temple mata hasohaso God ea.

Retīruhu Hin Iesu Křisto John Mo Ulia Puku Nike

John mo vujangia vara Iesu Křisto enia 'Reti non God' sei mo vai na hinau tari la lo toho (1.3–4). Mo vujangia vara John Tamlohi Paptijo mo levosahia vara enia 'Natu Sipsip non God tataholo, enia natu, i pa lavi nařihi na hehe nona tamlohi na varama'. (1.29) Philip mo verea mara Iesu enia haratu Moses mo lo verea mara i pa mai (1.45).

John mo vujangia vara Iesu enia sava tamlohi, ale nona vavahinau sohena, la vujangia vara enia God mo mai tamlohi.

Matamata Mo Limaravrua Non Iesu:

1. Mo posi na wai mo mai waen (2.1–12)
2. Natun tamlohi tavera Capernaum mo mele ūru (4.43–54)
3. Tamlohi rojoa matea Bethzatha mo mele ūru (5.1–47)
4. Iesu mo vahani na tamlohi (6.1–15)
5. Iesu mo hahau na pusa tasi (6.16–21)
6. Tamlohi matavuso matea (9.1–41)
7. Lazarus mo mele mauri (11.1–57)

'Enau na' Reti non Iesu mo limaravrua

1. Enau na pereti mata mauri (6.35, 51)
2. Enau na malarani mata varama (8.12)
3. Enau na matarua (10.7, 9)
4. Enau na tavui sipsip ūru (10.11, 14)
5. Enau na sauteterahi peresi na mauri (11.25)
6. Enau na malele, retivarařuhu peresi na mauri (14.6)
7. Enau na asi grape vararuhu (15.1)

John mo uli puku nike matan vara ha pa eři tau na nomim rasua hin Iesu vara enia Křisto atu, Natun God. Vara ha tau nomim rasua hinia ha pa lavi na mauri vararuhu. (20.31)

'Matan God mo opoi na tamlohi na varama sohen harihi: mo sile Natuna sei enia vorahese, vara sava tamlohi mo rasua i pa sopo vano na komo, pani i pa lavi na mauri tui.' (3.16)

Hin Puku Nike

1. Iesu enia Reti non God (1.1–18)
2. Vujangi non John Tamlohi Paptijo (1.19–34)

3. Iesu mo vifoni na nona tamlohi usuri (1.35–51)
4. Tatua matamata tavera Iesu mo lo vaira (2.1–12.50)
5. Isoiso wilk non Iesu; nona mateia (13.1–19.42)
6. Iesu mo turu na mateia (20.1–10)
7. Iesu mo pala isana nona tamlohi usuri (20.11–21.25)

Iesu Enia Reti Non God

¹ Tuai tiroma, Reti atu mo pete toho moiso. Mo lo toho peresi God, ale Reti sei enia God tataholo. ² Tuai tiroma, enia mo lo toho peresi God, ³ ale hinia, God mo vai na hinau tari, mo sopo te hinau hatea vara mo sopo vaia hinia. ⁴ Pulo mauri mo lo toho isana. Mauri atu enia mo lavi na malarani mo mai isana tamlohi. ⁵ Malarani atu mo sasarami na ūrořoha. Rōřoha atu mo sopo eři turuhoroa.*

God Mo Rule John

⁶ God mo ūrule na tamlohi matea mo mai, hijana John. ⁷ Enia mo mai mo sohena tuetueni matea vara i vereuli na tamlohi hin malarani atu. Mo verea matan vara tamlohi tari la pa rasu malarani atu. ⁸ Tuetueni atu enia mo sopo malarani atu, pani enia mo mai vara i vereuli malarani atu.

Malarani Mata Varama

⁹ Malarani atu mo mai na varama, enia mo malarani vararuhu. Malarani vararuhu atu mo sile na malarani vara tamlohi tari la pa levosahia.

¹⁰ Hina purongo vara God mo vai na varama hinia, pani varama mo sopo hitevosahia. ¹¹ Mo mai na nona varama, isan la tavytavuina tataholo, pani la ūru hinia. ¹² Pani isan la haratu la lavia, la rasu na hijana, ale enia mo tinařihira vara enira la pa eři mai natun God. ¹³ La mai natun God mata masalon God hasena. La sopo mai natun God na posposi tamlohi mo vora teni na masalo tamlohi.

Reti Atu Mo Mai Tamlohi

¹⁴ Reti sei mo mai tamlohi, mo lo toho peresirā. Kama hite na hina ūruřuhu matuvana na maurina moiso, hina ūruřuhu matuvana non haratu hasena enia mo tai isan Tama, enia pulo ūromřuhu, ale enia pulo retivarařuhu.

* **1:5:** turuhoroa: teni 'hitevosahia'.

¹⁵ John mo ulo aulu mara, "Hara sei natu, na lo verea vara i pa mai hitahu hiniau, enia mo aulu hiniau, matan enia mo lo toho tiroma tuai hiniau."

¹⁶ Matan nona tavtav mo tavera, ale enra mo isoiso ūa lo lavi na nona otori ūuhu matuvana, ale matana, nona ūomūhu mo lo mařivisihiřa la lo masurere hiniřa, ¹⁷ matan Moses mo sileřa na Leu, pani ūomūhu peresi na retivarařuhu la tai isan Iesu Křisto. ¹⁸ Te tamlohi mo sopo lo hite God hin te pongi, pani haratu enia God sei mo lo toho na tavalun Tama, enia mo vujangia isara vara God enia mo sohena sava.

John Tamlohi Paptijo

(Mt 3.1-12; Mk 1.1-8; Lk 3.15-17)

¹⁹ Hin rani atu tamlohi tatavera nona Jew la ūule na přis peresi na tatua vao Levi enira tuetueni nona přis la lo toho Jerusalem vara la mai la usia isan John vara, "Engko natu Křisto atu teni mo vono?" Ale John mo ūaramira, ²⁰ mo sopo vunvunia, mo taviti isara mara, "Enau mo sopo Křisto atu!" ²¹ Ale la usia isana lara, "Ale o to verea vara, engko hare? Engko Elijah teni mo vono?"[†] Pani mo ūaramira mara, "Mo vono, mo sopo enau." La mele usia lara, "Engko natu, p̄ovet atu teni mo vono?" Mo mele verea isara mara, "Mo vono." *Deut 18.15, 18; Isa 40.3*

²² Ale la verea isana lara, "Engko hare? O vere kamam hinia matan kama pa eři ūarami la haratu la lo ūule kamam. O to vere kamam hiniho vara engko hare."

²³ John mo verea sohen p̄ovet Isaiah mo vereamara, 'Enau leo atu mo lo ulo na jara hasetoho, ha vasahi na malele matan vara Moli God i pa hahau hinia!' *Isa 40.3*

²⁴ Ale tatuara la mai isana enira la tai na vao Pharishee. ²⁵ La mele usi John hinia lara, "Kama rongoho moiso vara engko mo sopo Křisto atu, teni Elijah teni p̄ovet atu Moses mo verea vara i pa mai, ale vara mo sohena, mata sava ko lo paptijo na tamlohi?" *Deut 15.15-18*

²⁶ John mo ūaramira mara, "Paptijo nike, enau na lo vaia na wai purongo, pani matea mo lo turu na livuhamim moiso kamim ka sopo lo hitevosahia, ²⁷ haratu sei

i pa mai usuriau enia mo aulu hiniau, ale enau na sopo tataholo vara a uli nařihi na asi eve palona." ²⁸ La hinau sei la masese na taon Bethany, tavalu vano na wai Jordan. Hin jara atu John mo lo paptijo na tamlohi ea.

Iesu Enia Natu Sipsip Non God

²⁹ Mo mele rani sahe, John mo hite Iesu mo lo hahau mo lo mai isana, mo verea isan vao atu mara, "Eh! Ha kilau vano sevano isan tamlohi sei mo lo mai. Enia natu, Natu Sipsip non God tataholo, enia natu, i pa lavi nařihi na hehe nona tamlohi na varama. ³⁰ Enau na pete vere kamim hinia moiso vara, 'Tamlohi matea i pa mai hitahu hiniau mo aulu jea hiniau!' matan mo lo mauri mo lo toho moiso tiroma na noku pongi vora." ³¹ Enau na sopo hitevosahia vara enia hare, pani enau na mai na lo paptijo na wai matan vara enia i pa pala isan Israel."

³² Moiso, John mo lo vereulia mara, "Na hite Tanumen God mo tai aulu na tuka sohena vomahé matea, mo tau hinia. ³³ Tiroma na sopo hitevosahia vara enia hare, pani haratu sei mo ūuleau vara a paptijo na wai mo vereau hinia mara, 'Vara o hite na Tanume Tapu i sevuti i tau na tamlohi matea, tamlohi atu natu, ko lo kilau matana. Enia haratu i pa ūrūni na tamlohi na suihan Tanume Tapu.' ³⁴ Matan na hitea moiso enau a eři verea kamim hinia vara vararuhu haranike natu, enia Natun God."

Andrew Enia Peter La Hite Iesu

³⁵ Mo mele rani sahe, John mo lo turu atu mo lo sorasora peresi na nona tamlohi usuri mo rua hin jara atu. ³⁶ Moiso, John mo hite Iesu mo lo hahau na tavalura, moiso John mo verea isara mara, "Ka hite tamlohi sevano, enia natu, enia Natu Sipsip non God tataholo." ³⁷ Tamlohi usuri non John lara la rongoa, la vano vahatea vara la pa usuri Iesu.

³⁸ Moiso Iesu mo posí vano isara mo hite vara la lo usuria mara, "Ka opoi na sava?"

La ūaramia lara, "Rabbi, imam mo lo toho epu?" Ale ūaramin hija nike 'rabbi' enia 'tija'. ³⁹ Moiso mo verea isara mara,

^{† 1:21:} Elijah: tavitauvin Israel la levosahia vara Moses mo verea tiroma vara tamlohi matea God mo vironia vara i pa pala isara hin te rani.

“Ha mai, ha pa hitea.” La vano enira tolu Iesu la hite jara atu Iesu mo lo toho ea. Matan alo mo vati na ravravi moiso, ale la lo toho peresia mo sinai mo ravravi jea.

⁴⁰ Vonara matea atu sei mo rongo John mo lo verera hin Iesu, ale mo usuria enia Andrew, vorain Simon Peter. ⁴¹ Hinau tiroma Andrew mo vaia mo vano vara i ale tavaina Simon vara i verea isana vara, “Kama hite tamlohi atu, enia natu pa Tamlohi Jujuri atu!” Tamlohi Jujuri na leon tavitavuin Israel ūramina enia ‘Křisto’ na leo mara Greek.

⁴² Andrew mo verea isana moiso mo lavia mo mai isan Iesu. Moiso Iesu mo verea isana mara, “Engko Simon natun John, pani nake a pa tau na hijam vara Cephas.” Raramin hija sei ‘Cephas’ enia ‘Peter’.

Iesu Mo Tovi Philip Peresi Nathanael

⁴³ Mo mele rani sahe Iesu mo vano Galilee. Mo tapai Philip ea, ale mo verea isana mara, “O pa mai noku tamlohi o usuriau!” ⁴⁴ Philip mo tai hin taon sei Bethsaida, jaran Andrew enia Peter. ⁴⁵ Philip mo malue vara i ale Nathanael, moiso mo verea isana mara, “Kama tapai pa tamlohi tatahola atu sei Moses mo lo ulia na Leu, ale p̄ovet sohena la uliuli matana vara i pa mai.[‡] Kama hitea enia mara Nazareth, natun Joseph, hijana Iesu.”

⁴⁶ Pani Nathanael mara mo rongoa mo verea mara, “Nazareth! I vono! Sava hinau i ūru i eři malue hin jara atu?”

Philip mo ūramia mara, “O mai, o pa hitea engko hasem.”

⁴⁷ La pa lo mai, Iesu mo hitera, mo verea isan Nathanael mara, “Varařuhu, na lo hite na tamlohi matea enia mahapin Israel tatahola matea, mo sopo te halu hinia.”

⁴⁸ Ale Nathanael mo usia mara, “Pani engko ko levosahiau sohena sava?”

Iesu mo ūramia mara, “Hin rani atu Philip mo sopo lo vano matam, enau na pete hiteho moiso, ko lo sakele na malumalu pulo fig vipahai atu.”

^{‡ 1:45:} la ulia: Reti sei ūramina enia Retiulia tuai la ulia matařa. mo sopo hitea na matana, matan Nathanael mo sopo toho hin te jara mariviti isan Iesu. ^{*} ^{1:51:} la pa lo mai, la pa lo sahe aulu: Na rani Jacob mo rovo isan Esau, mo mavuho mo hite na angelo la lo mai, la lo sahe aulu na tuka na lada matea. ^{* 2:4:} noku rani: rani sei vara tamlohi la pa hitevosahia vara Iesu enia Natun God tatahola. Hite: Jn 12.23.

⁴⁹ Nathanael mo ūramia mara, “Tija, engko Natun God tatahola! Engko Supe non Israel!”[§]

⁵⁰ Iesu mo ūramia mara, “Enau na verea purongo vara na hiteho ko lo sakele na pulo fig matea, moiso vahatea purongo ko rasuau, pani o pa mele hite na hina mařurahi matuvana, la pa jeu haratu sei ko lo hitera! ⁵¹ Varařuhu na verea isamim mo isoiso, ha pa hite tuka i roi, moiso ha pa hite na angelo non God la pa lo mai, la pa lo sahe aulu, moiso la pa lo sevuti isan Natun Tamlohi.”*

2

Lahi Matea Cana

¹ Rani mo tolu mo vano moiso, ale tinan Iesu mo lo toho na lahi matea na taon matan Cana na jara Galilee. ² La usi Iesu tolu na nona tamlohi usuri vara la pa mai hin lahi atu.

³ Pani hin rani atu waen mo isoiso, mo sopo mele tea. Tinan Iesu mo vere Iesu hinia mara, “Mara waen mo isoiso, mo sopo mele tea.” ⁴ Iesu mo ūramia mara, “Eh, nana, mo sopo te nořa hinau hinia, matan noku rani mo sopo lo mai.”*

⁵ Tinana mo verea isan la tamlohi tuetueni hin jara atu mara, “Ha vai na sava hinau i pa verea isamim.”

⁶ Moiso mo kilau vano mo hite na jara wai tatavera mo limarave la vaira na lepa; Jew la lo utu na wai loso mata nora lotu hinira. La eři tau na wai i tikeli 50 lita hinira hatehateahi. ⁷ Iesu mo verea isan la tamlohi tuetueni atu mara, “Ha mařivisira na wai!” Ale la vaia sohena, ⁸ ale mo verea isara mara, “Ha rengi tea, ha silea isana tamlohi tavera mata hanhani vara i inu rongorongo.”

Ale la vaia sohena mo verea. ⁹ Pa tamlohi sei mo lo kilau na hanhani mo rongoa vara waen, pani enia mo sopo levosahi te hinau hinia, pani tamlohi tuetueni purongo enira la levosahia, ale mo vano mo tovi pa tamlohi atu vara i pa lahi mo mai isana, ¹⁰ mo verea isana mara, “Tarea na lahi, tamlohi lahi mo lo sile na waen

^{§ 1:49:} Nathanael mo hutua matan Iesu mo

^{*} ^{1:51:} la pa lo mai, la pa

lo sahe aulu na tuka na lada matea. ^{* 2:4:} noku rani: rani sei vara tamlohi la pa hitevosahia vara Iesu enia Natun God tatahola. Hite: Jn 12.23.

ŕuhu mo memeje tiroma vara tamlohi la pa putu makomona hinia, moiso i pa sile na waen mo sopo ūahu jea, pani engko ko tau na waen ūahu sei vara ūa pa inua hitahu!” ¹¹ Matamata tavera atu enia tiroma matamata tavera Iesu mo vaia, ale mo vaia na taon Cana na jara Galilee.[†] Iesu mo vuhesi na nona suiha ūahu ūahu isana nona tamlohi usuri ea, ale la tau na nora rasua hinia. ¹² Hitahun haratu Iesu mo sahe Capernaum peresi tinana, la tasina tolu na nona tamlohi usuri, vara la pa toho atu te makomo rani.

Iesu Mo Rohi Na Temple

(Mt 21.12-13; Mk 11.15-17; Lk 19.45-46)

¹³ Nake mo lo mai mariviti mata hanhani tavera nona Jew la tovia Passover, ale Iesu mo sahe Jerusalem matana. ¹⁴ Iesu mo unu na Temple mo hite na vao tamlohi matuvana la lo hařehi na buluk, sipsip peresi na vomahé mata malamalai ea. Ale mo hite na tamlohi mata jenjen mania la lo jeni na mania na mania mata silesilea na lolo Temple, la lo sakele na nora tep. ¹⁵ Moiso mo vai na maja na oti asihai, mo levuti nařihira peresi na pulara maji mo isoiso na lolon Temple atu. Mo jarai jovi na nora mania, ale mo tipovi na nora tep.

¹⁶ Isan la haratu la lo hařehi na vomahé mo verea isara mara, “Ha lavi nařihira la hinau nike! Ha sopo vai na Iman Tamaku ima areařehi matea!”

¹⁷ Nona tamlohi usuri la hitea, la mele ūromřomi na sava Retiulia mo verea mara, ‘Noku opoia mata imam mo tavera jea, ale mo joleau vara a kilaua’.

¹⁸ Ale tamlohi tavera nona Jew lara, “O pa eři vai te matamata hatea nakerihi vara kama pa levosahia vara engko natu, tamlohi tataholo sei vara o pa eři vai hinau sei?”

¹⁹ Iesu mo ūramira mara, “Ha kauti Temple nike, moiso na rani i tolu purongo, a pa mele turuhia.”

²⁰ Moiso tamlohi tatavera nona Jew atu la ūramia lara, “La voro Temple nike mata tauni mo ngavulu vati mo limarave ⁽⁴⁶⁾, pani o pa mele turuhia na rani i tolu purongo sohena sava?”

[†] 2:11: matamata tavera: matamata atu mo vujangia vara la pa rasu na suihan God mo lo toho hin Iesu. * 3:3: voro paro: voro atu mo tai aulu.

²¹ Pani Iesu mo lo retireti na epena sohena Temple matea. ²² Hin rani atu mo mele turu na mateia, nona tamlohi usuri la mele ūromřomi nona retireti atu, ale la rasu na Retitapu peresi na retireti non Iesu.

Iesu Mo Levosahi Na Tamlohi

²³ Hin rani atu Iesu mo lo toho Jerusalem na hanhani Passover, vao tavera la rasua vara enia tamlohi atu la lo kilau matana, matan la hite na matamata mo lo vaira.

²⁴ Pani Iesu mo sopo rasura matan mo levosahi na sava mo lo toho na mapura.

²⁵ Tea i sopo eři vereulia isana vara tamlohi la sohena sava. Enia mo levosahira moiso.

3

Nicodemus Mo Mai Isan Iesu

¹ Ale tamlohi tavera matea na vao Pharisee hijana Nicodemus, enia tamlohi aulu matea nona Jew, ² mo mai isan Iesu na vutepongi matea mo verea isana mara, “Tija, kama levosahia vara God mo ūruleho vara o vujangi kamam, matan mo sopo te tamlohi hatea vara i eři vai na matamata vara God mo sopo toho isana.”

³ Iesu mo ūramia mara, “Varařuhu na vereho hinia, vara tamlohi la sopo lavi na vora paro tiroma,* la pa sopo eři hitevosahi mauri atu God mo aulu hinia.”

⁴ Nicodemus mo usia mara, “Pani tamlohi mo vajiahmoiso i pa mele vora sohena sava? I pa eři mele unu na pangentinana vara i pa mele vora teni i vono?”

⁵ Iesu mo ūramia mara,

“Varařuhu, varařuhu na verea isam vara te tamlohi i sopo vora na wai peresi na Tanumen God, i pa sopo eři unu hin mauri atu God mo aulu hinia. ⁶ Tamlohi la sile na mauri tamlohi isan natura, pani Tanumen God mo lo sile mauri atu mo tai isana. ⁷ Ha sopo mařurahi hin noku reti sei, na lo verea isam vara ha pa lavi vora paro atu mo tai na tuka. ⁸ Tanumen God hasena mo lo sile na mauri paro. Tanumen God mo sohena langi sei mo lo sere mo vano na jara mo opoia, ko rongoa, pani ko sopo levosahia vara mo tai epu teni na sava jara mo lo vano ea.”

⁹ Nicodemus mo usia mara, “La hinau sei la pa sohen haratu sohena sava?”

* 3:3:

¹⁰ Iesu mo ūaramia mara,

“Engko natu, tija nona tautauvin Israel, pani ko sopo lo levosahi la hinau sei mata sava? ¹¹ Varařuhu na verea isam, kama lo vereuli na sava kama levosahira, matan kama hasemam hitera, pani ka sopo rasu nomam vereulia sei. ¹² Vara a vere kamim na hinau mata varama, pani ha sopo rasuau, ha pa rasuau sohena sava vara a vere kamim na hinau matan na tuka? ¹³ Tea mo sopo lo sahe na tuka, ale i mele sinai, pani Natun Tamlohi hasena, enia mo tai atu mo sinai nika. ¹⁴ Sohen tuai Moses mo tahe na mata mo vaia na bronze na tano koru, ale sohen haratu natu la pa tahe Natun Tamlohi aulu, ^{† 15} vara sava tamlohi mo tau na nona rasua isana, enia i pa lavi na mauri tui.

¹⁶ Matan God mo opoi na tamlohi na varama sohen harihi: mo sile Natuna sei enia vorahese, vara sava tamlohi mo rasua i pa sopo vano na komo, pani i pa lavi na mauri tui. ¹⁷ Matan God mo sopo ūrule Natuna na varama vara i ari na tamlohi, mo vono. Mo ūrulea vara i jurira hinia. ¹⁸ Haratu mo rasu na Natun God enia i pa sopo lavi na talai, pani isan la haratu la sopo rasua, God mo pete tau na nora talai moiso matan la sopo rasu na hijan Natun God vorahese.

¹⁹ Pulo nora talai mo sohen harihi: matan malarani mo mai na varama, pani tamlohi la opoi na ūroha mo tavera mo jeu na malarani matan nora vavahinau la hehe. ²⁰ Pani la haratu la lo vai na hehe la pa sopo eři mai na malarani, la ūruhvara la mai na malarani matan vara i vono, malarani i pa vuhesi na nora hehe. ²¹ Pani la haratu la lo oloolo na retivarařuhu na maurira, enira la pa mai na malarani, matan vara i vujangia vara nora vavahinau la tai isan God.”

John Mo Vereuli Iesu

²² Hitahun harihi, Iesu tolu na nona tamlohi usuri, la mai na jara Judea. Enia mo lo toho peresira makomona, ale mo lo paptijo na tamlohi.

^{† 3:14:} mata mo vaia na bronze: hin pongi atu tuai God mo sile na talai isana tautauvin Israel. Mo sohai na mata vara la hatimateira. Moses mo vai na mata na bronze aen mo tahea aulu matan God mo verea mara, vara tea i kilau sahe isana i pa mele ūruh, ale la haratu la rasua la mauri. ^{‡ 3:25:} hoje vara la vokevoke: tautauvin Israel tuai la tau na posposi matuvana mata hoje na nora jilivi teni te hinau sohena matan la ūromromia vara God i pa avulahi hinira matana.

²³⁻²⁴ Hin rani atu la sopo lo tau John na ima ūilangi, enia mo lo paptijo na tamlohi la lo mai isana na jara Aenon mariviti Salim mata wai mo mařivi ea.

²⁵ Hin rani atu tamlohi usuri non John la lo vasvas peresi na Jew matea mata nora posposi mata hoje vara la vokevoke. ^{‡ 26} Ale la mai isan John la verea isana lara, “Tija, pa tamlohi atu ko lo verea hin rani atu, na tavalu wai Opae Jordan, nakerihi mo lo paptijo na tamlohi, moiso tamlohi tari la lo marongia.”

²⁷ John mo ūaramira mara, “Tea i sopo eři vai te hinau hatea, pani vara God mo tinarihia, enia i pa eři vaia. ²⁸ Kamim ka levosahi na sava na pete verea isamim moiso vara enau, mo sopo Křisto atu, pani God mo ūruleau vara a mai tiroma hinia. ²⁹ Ka sopo levosahia vara tamlohi i pa lahi natu, mo lahi na hařai, pani tapalan tamlohi atu mo avulahi vara mo rongo na leona, ale vara i turu mariviti isana. Enia natu, noku avulahi tavera mo vano sohena natu. ³⁰ Enia hijana i pa mai i mele aulu jea, pani hijaku i pa lo sivo atano jea.

Haratu Mo Tai Na Tuka

³¹ Haratu mo tai na tuka, enia mo aulu na tamlohi tari. Haratu mo tai na varama, enia non varama, ale enia mo eři vere na hinau na varama purongo. Pani haratu mo tai na tuka mo aulu na tamlohi tari. ³² Mo lo vere na sava mo hitera, mo rongora, pani tamlohi la sopo rasua. ³³ La haratu la rasua enira la verea vara God enia vararuhu. ³⁴ Matan God mo ūrule Natuna vara i vere na nona reti, matana, mo sile vevuhi na suiha Tanumena isana.

³⁵ Tama sei, mo opoi Natuna, ale mo tau na hinau tari na limana vara i aulu hinira. ³⁶ Haratu mo rasu Natuna mo pete lavi na mauri tui moiso. Pani haratu mo sopo oloolo hin Natuna, i pa sopo eři lavi mauri tui atu, matan talai lolokoru non God mata hehe mo lo toho isana.”

4

Hařai Mara Samaria Matea

¹ Na rani Iesu mo levosahia vara Pharissee la rongoa moiso vara tamlohi la lo usuria, la jeu la haratu la lo usuri John, ² mo ūruhu vara ha levosahia vara Iesu hasena mo sopo paptijo na tamlohi, pani nona tamlohi usuri hasera la lo paptijo na tamlohi, ³ ale matana, Iesu mo malue Judea mo mele vano Galilee.

⁴ Hin rani atu mo lo hahau roto Samaria, ⁵ mo hahau mo mai Samaria na taon matan Sychar mariviti hin lepa atu sei tuai Jacob mo silea isan natuna Joseph. ⁶⁻⁸ Wel atu Jacob mo helia tuai mo pa lo toho ea, ale Iesu mo sakele na tavaluna matan mo hahau jara peravu mo malokoloko.

Ale na livuha rani, tamlohi usuri non Iesu la vano vara la voli te hanhani na taon. Hařai mara Samaria matea mo mai vara i utu te wai na wel. Iesu mo usia isana mara, “O eři utu te maku wai?” ⁹ Hařai atu mo ūramia mara, “Engko Jew matea, ale enau hařai mara Samaria! Vara sava engko ko usiau vara a utu te mam wai?” Mo usia sohena matan mara Judea peresi na mara Samaria la lo hitelehilehira.

¹⁰ Moiso Iesu mo ūramia mara, “Engko ko sopo levosahi na sava God mo opoia vara i silea isam. Ale engko ko sopo levosahia vara harepu nahai mo lo usiho na wai mata i inua. Vara o pa lo levosahia, o pa usiau na wai sei mo sile na mauri.”

¹¹ Ale hařai atu mo usia isana mara, “Tapala, mo sopo te nom baket, ale wel sei mo sivo atano. O pa eři utu wai atu mo sile na mauri epu? ¹² Pimam Jacob mo heli wel sei matamam, moiso enia peresi na vaona peresi na pulana maji palovati tari la inu hinia. Engko o pa eři jeu na sava Jacob mo vaia?”

¹³ Iesu mo ūramia mo verea mara, “Tamlahi tari la lo inu wai sei la pa mele mařohu. ¹⁴ Pani la haratu vara la inu na wai a pa silea, la pa sopo eři mele mařohu na rani sei la pa mai. Wai atu a pa silea enia patu wai sei mo sile na mauri tui.”

¹⁵ Ale hařai atu mo ūramia mara, “Tapala, o sileau a inu wai atu matan vara a sopo mele mařohu vara a pa mele mai hin wel nike.”

¹⁶ Ale Iesu mo verea isana mara, “O vano o lavi tuam i mai.”

¹⁷ Hařai atu mo ūramia mara, “Enau mo sopo te tuaku.” Iesu mo verea isana mara, “Ko verea ko vararuhi, mo sopo te tuam. ¹⁸ Engko ko lahi, ale tuam mo lima moiso, ale nake tamlohi atu ko lo toho peresia enia mo sopo tuam tataholo. Haratu ko verea mo vararuhi.”

¹⁹ Ale hařai atu mo verea isana mara, “Moli, na hitevosahia vara engko p̄ovet matea. ²⁰ Pimam la lo lotu na vutivuti nike,* pani kamim Jew ka vara Jerusalem purongo enia jara tataholo vara tamlohi la lo lotu ea.”

²¹ Ale Iesu mo verea isana mara, “O rasauu, pongi matea mo lo mai vara ha pa sopo mele lotu Tama hin vutivuti nike teni Jerusalem. ²² Kamim mara Samaria, ka sopo levosahia vararuhi vara ka lo lotu hare. Pani kamam Jew, kama levosahi God atu kama lo lotua. Hin na mahapi Jew God i pa juri na varama. ²³ Pani pongi matea mo lo mai, ale mo tapulo moiso vara la haratu la lotu vararuhi, la pa lotu Tama sohena Tanumena mo vujangira na malele retivarařuhu. Tama mo lo ale na tamlohi sohen harihi vara la lotua. ²⁴ God enia Tanume, la haratu sei la lotu God la pa lotua sohena Tanumena i pa tiromara vara la pa usuri na malele retivarařuhu.”

²⁵ Hařai atu mara, “Enau na levosahia vara Tamlohi Jujuri i pa mai, enia natu kama tovia Křisto. Ale hin pongi atu vara i mai, i pa vere mamahuni na hinau tari isamam.”

²⁶ Iesu mo verea mara, “Enau natu, tamlohi atu mo lo toho jejeu. Na lo retireti isam nakerihi.”

²⁷ Vahatea atu, tamlohi usuri non Iesu la mele hilu, moiso la mařurahi tavera matan Iesu mo lo retireti peresi na hařai matea. Pani te vonara mo sopo usia vara, ‘Ko opoi na sava?’ teni ‘Mata sava ko lo retireti isan hařai nike?’[†]

²⁸ Moiso hařai atu mo tau nona jara wai, ale mo mele maro hilu mo vano na taon. Mo verea isana tamlohi mara, ²⁹ “Ha mai! Ha hite na tamlohi matea sei mo vereau

* ^{4:20:} Vutivuti nike: Vutivuti Gerizim, mariviti na taon Shechem. † ^{4:27:} mo lo retireti peresi na hařai matea: la ūromia vara nona tamlohi usuri la hutura hin Iesu matan posposi tavytavuin Israel tuai mo sopo tataholo vara te tamlohi vujangi hatea i sorasora peresi te hařai hasena teni vara Iesu mo lo sorasora peresi na hařai Samaria enira nora meresahi.

na hinau tari na vaira moiso. Korong enia natu, Křisto atu teni?” ³⁰ Ale tamlohi tari hin taon atula vano la hite Iesu. ³¹ La hinau atu la lo vano, moiso tamlohi usuri non Iesu la lo verea isana lara, “Tija, o hani te hinau.”

³² Pani Iesu mo verera hinia mara, “Haku hinau kamim ka sopo levosahia te hinau hinia.”

³³ Nona tamlohi usuri la lo usiusira hinia lara, “Tea mo sile te hanhani isana teni mo vono?”

³⁴ Pani Iesu mo verea isara mara, “Haku hinau, enia mata a vai na masalon God. Enia natu, mo ūruleau, ale enau a pa vai vevuhi na nona vavahinau sei mo taua isaku vara a vaira. ³⁵ Ha sopo verea vara vitu mo vati mo lo toho vara i tikeli na asitauni. Pani enau na lo vere kamim hinia vara ha to kilau vano, ha pa hite vara isa la jea la lo mena mata lavi na asitauni moiso. ³⁶ Tamlohi asitauni la lo lavi na volira, mata la lo vu na vua mata mauri tui. La haratu la lo hapořahi na piri peresi la haratu la lavi na vua asitauni la pa avulahi jea na jara matea.

³⁷ Hin haratu reti nike mo vararuhi, ‘Hai la hapořahi na piri, hai la lavi na vua asitauni.’ ³⁸ Enau na lo ūrule kamim vara ha pa lavi na vua asitauni na isa sei tamlohi tinapua la vai na voko ūrlangi ea moiso.”

Mara Samaria La Rasu Iesu

³⁹ Vao tavera mara Samaria hin taon atu la tau na nora rasua hin Iesu matan hařai atu mo vere mara, “Tamlohi nike, mo vereau na hinau tari na vaira moiso.”

⁴⁰ La mai la usia isana vara i lo toho na taon nona mara Samaria. Ale mo lo toho ea mata rani mo rua.

⁴¹ Ale vao tavera mara Samaria la tau na nora rasua hin Iesu, mata sava la rongoa mo lo verea. ⁴² La verea isan hařai atu lara, “Kama sopo rasu Iesu matan la hinau atu ko lo verea isamam purongo, pani matan kama hasemam rongoa, ale kama levosahia mo ūruhvara enia natu, Jujuri mata Varama!”

Tamlohi Tavera Matea Mo Rasu Iesu (Mt 8.5-13; Lk 7.1-10)

⁴³ Mo mele rani mo rua tinapua moiso, mo malue mo vano Galilee, ⁴⁴ matan Iesu mo verea moiso vara tamlohi la pa oolo

na přovet na jara tari, pani mo sopo na jarara tataholo, ⁴⁵ ale mo sinai Galilee, ale mara Galilee atu la avulahi na nona mai matan la hite la hinau tari atu mo lo vaia Jerusalem na hanhani Passover ea matan enira sohena la sahe Jerusalem mata hanhani ea.

⁴⁶ Ale hin rani atu mo lo toho Galilee, mo mele hilu mo vano Cana taon sei mo posi na wai mo mai waen ea tiroma. Ale tamlohi tavera matea atu Capernaum natuna mo rojo. ⁴⁷ Pa tamlohi tavera mo rongo vara Iesu mo tai Judea mo mai Galilee moiso, mo vano vara i usia ūrlangi vara i eri vai mamahuni natuna.

⁴⁸ Iesu mo verea isan tamlohi tavera atu mara, “Kamim tamlohi, i pa sopo te nomim rasua vara ha sopo hite na mata-mata tavera peresi na hina mařurahi!”

⁴⁹ Pani tamlohi atu, mo ūramia mara, “Moli! O eri mai vila? Vara i vono, natuku i pa mate!”

⁵⁰ Iesu mo ūramia mara, “Natum i pa mauri. O mule, o vano isana!” Tamlohi atu mo rasu na sava Iesu mo verea isana, ale mo tapulo mule.

⁵¹ Te slev non tamlohi tavera atu la tapaia na malele, ale la verea isana lara, “Natum mo mele ūruhmoiso!” ⁵² Mo usira mara, mo mele ūruh nangisa, ale la ūramia lara, “Seserei atu mo malue isana nanovi na matan alo matea.”

⁵³ Vahatea taman uluvou atu mo ūromřomia vara matan alo matea nanovi Iesu mo verea isana mara, “Natur i pa mauri!” Ale tamlohi atu peresi na vao imana la tau na nora rasua hin Iesu.

⁵⁴ Matamata tavera sei enia harua mata-mata Iesu mo vaia hin rani atu, hitahun haratu mo malue Judea mo vano Galilee.‡

5

Tamlohi Rojoa Matea

¹ Hitahun la hinau sei, Iesu mo sahe Jerusalem mata hanhani tavera matea nona Jew. ² Na lolon Jerusalem paltungu tavera matea la vaia mata loloso mo lo toho ea na leon tavytavuin Israel la tovia Bethsaida. Mo lo toho mariviti na matarua matea mata sipsip sei la tauhasehira mata malamalai vara la lo unu na rope Temple

‡ 4:54: matamata: o hite reti sei hin jara rihi sei 2.11.

atu. Paltungu atu la voro na palapala mo lima mo ūalihi.*

³⁻⁴ Tamlohi matuvana la rojo, la haratu la matavuso, la haratu tavalu epera la mate, la haratu epera la mate, sohen la papao, la lo juruvi ūalihi paltungu sei.

⁵ Na pahisan paltungu tavera atu, tamlohi matea tavalu epena mo mate mata tauni mo ngavulu tolu mo limaravtolu (³⁸). ⁶ Ale Iesu mo hite tamlohi sei mo hitevosahia vara enia tavalu epena mo mate mata tauni matuvana moiso, ale mo usia isana mara, “Eh, ko opoia vara o ūruhu teni mo vono?”

⁷ Ale tamlohi atu mo ūaramia mara, “Tapala, mo sopo te tapalaku vara i pa eři tauau na lolo paltungu hin rani atu wai mo lo vali. Na vahitea vara a pa sivo tiroma, pani tamlohi tinapua la lo sivo tiroma hiniau.”

⁸ Iesu mo verea isana mara, “O lavi na epam o hahau!” ⁹ Vahatea tamlohi atu mo mele ūruhu. Mo lavi na epana mo tapulo hahau ūalihi. Rani atu hinau atu mo masese hinia, enia Sabbath matea.

¹⁰ Moiso tamlohi tavera nona Jew la hite tamlohi atu mo lo ūalihi mo lo lavi na epana, la verea isana lara, “Haranike Sabbath nahai! Tea i sopo eři lavi na epa i lo hahau na Sabbath!”

¹¹ Pani mo ūaramira mara, “Tamlohi atu mo vaiau na ūruhu mo verea isaku vara a lavi na epaku a hahau.”

¹² La usia isana lara, “Sava tamlohi natu, mo vereho vara o pa lavi na epam o hahau?” ¹³ Pani enia mo sopo levosahia vara Iesu enia hare, ale Iesu mo malue moiso mata vao hin jara atu.

¹⁴ Hitahun haratu, Iesu mo tapai tamlohi atu na lolo Temple, ale mo verea isana mara, “Engko ko ūruhu moiso, pani o sopo mele vai te hehe, vara i vono te hinau i mele sati jea i pa tikeliho.” ¹⁵ Ale tamlohi atu mo malue mo vano mo verea isana tamlohi tavera nona Jew mara Iesu natu, mo vaia mo ūruhu. ¹⁶ Ale matana, tamlohi tavera nona Jew la tapulo tipahi Iesu matan mo vai na hinau sohena na Sabbath.

¹⁷ Pani Iesu mo verea mara, “Tamaku mo lo vavahinau mo tikeli nakerihi, ale enau sohena na lo vavahinau.”

¹⁸ Ale matan haratu, tamlohi tavera nona Jew la vahitea ūilangi vara la vilimateia. Mo sopo matan haratu vara mo lo tope na Sabbath purongo, pani matan mo lo verea vara God enia Tamana, retireti atu mo vaia enia mo tataholo hin God.

Suiha Non Natun God

¹⁹ Iesu mo ūaramira mara, “Varařuhu na verea, Natun Tama hasena i sopo eři vai te hinau hatea, pani haratu purongo sei mo hite Tamana mo lo vaia tiroma, ale enia i pa vaia. Matan sava hinau Tamana mo lo vaia, Natuna sohena i pa vaia. ²⁰ Matan Tama mo opoi Natuna, ale mo vujangia na hinau tari enia mo lo vaia. Tama i pa mele vujangi na hinau matuvana la jeu haranike isana matan vara ha pa mařurahi tavera. ²¹ Mo sohen Tama mo sauteterahi na mate mo silera na mauri, ale Natuna sohena i pa sile na mauri isan hare enia mo opoia.

²² Tama mo sopo ari te tamlohi, pani mo tau na aria mata tamlohi tari isan Natuna, ²³ matan Tama mo opoia vara tamlohi tari la oloolo hin Natuna sohen la lo oloolo hinia. Vara tea mo sopo oloolo hin Natuna, mo sohena mo sopo oloolo hin Tama sei mo lo ūrulea.

²⁴ Varařuhu na verea isamim, vara harepu mo rongo na noku reti, ale mo rasu haratu mo ūruleau, enia mo pete lavi na mauri tui moiso, enia i pa sopo lavi na talai hin pongi atu, pani mo malue moiso na mateia, ale mo lavi na mauri.

²⁵ Varařuhu na verea isamim, pongi matea mo lo mai, mo pete mai moiso, vara mate la pa rongo na leon Natun God, moiso la haratu purongo sei la tapurongo isana, la pa mauri.

²⁶ Ale matan Tama enia pulo mauri enia mo sile Natuna vara enia sohena, i pa lavi pulo mauri atu. ²⁷ Moiso, mo silea vara Natuna i lavi na suiha vara i ari na tamlohi, matan enia Natun Tamlohi.

²⁸ Ale ha sopo marurahi matan hinau sei! Matan pongi matea mo lo mai vara la

* ^{5:2:} paltungu: peravun paltungu atu 95 metre, ale hin la pongi atu tamlohi la rasua vara wai i vali hin paltungu atu matan la verea vara angelo matea mo tai na tuka vara i ariaria. Ale haratu mo sevuti tiroma hin paltungu atu i pa mele ūruhu.

haratu la lo toho na taptap la pa rongoa na leon Natun Tamlohi,²⁹ ale la pa malue, la haratu la vai na hina ūruhu la pa sauteterahi la vano na mauri, la haratu la lo vai na hina hehe la pa sauteterahi la lavi na talai.

Retivuhesi Non Iesu

³⁰ Enau haseku a sopo eři vai te hinau. Haratu mo lo ūruleau, enia mo vereau vara a pa ari sohena sava. Enau na ari tataholo matan na lo oloolo hinia, ale na sopo vai na masaloku matan na lo vai na masalona.

³¹ Vara a lo vereau enau haseku, tamlohi la pa sopo rasua vara na lo varaūruhu. ³² Tamlohi tinapua matea mo lo vere na hinau varaūruhu matakua. Ale na levosahia vara la hinau atu mo lo verera matakua enira la varaūruhu. ³³ Kamim ka ūrule na tamlohi la vano isan John moiso, ale enia mo vereuli na retivaraūruhu matakua isara, ³⁴ pani na sopo turu na vereulia nona tamlohi matakua, pani na lo vere la hinau sei matan vara ha pa eři juri hinira.

³⁵ Ale John enia lamu matea mo lo hani mo memera, ale kamim ka lo avulahi jea mata makomo rani na memerana.

³⁶ Pani hinau matea mo mele ūruhu jea, mo jeu vereulia atu John mo lo verea matakua. La hinau atu Tama mo silea isaku vara a vaira, enira natu, la vujangia vara Tama hasena mo lo ūruleau.

³⁷ Ale Tama sei mo lo ūruleau, enia mo lo vereau, pani kamim ka sopo lo rongo na leona teni hitea hin te rani. ³⁸ Ale ka sopo lavi na nona reti na mapumim matan ka sopo rasu haratu mo lo ūruleau na mai.

³⁹ Kamim ka lo ale na Retiulia matan ka ūromia vara hinira ha pa lavi na mauri tui. Retitapu sei la lo vereuliau, ⁴⁰ pani ka ūrohu vara ha mai isaku mata mauri tui.

⁴¹ Na sopo lavi na oloolo nona tamlohi matakua, ⁴² pani na levosahi kamim vara mo sopo te vonamim hatea i opoi God.

⁴³ Na lo mai na suiha hijan Tamaku, pani ka lo tipahiau. Vara te tamlohi i mai na hijana hasena, kamim ha pa avulahi vara ha lavia. ⁴⁴ Ha pa rasu sohena sava matan kamim, ka lo opoia vara tea i sile na oloolo isan te vonamim, ale ka sopo opoia vara God hasena i pa sile na oloolo isamim.

⁴⁵ Ha lo levosahia vara enau a pa sopo retitalai hin kamim isan Tama! Pani Moses sei, ka lo tau na nomim ūromtoho hinia, enia i pa retitalai hin kamim. ⁴⁶ Varaūruhu, vara ha rasu Moses varaūruhu, ha pa rasau, matan enia mo uliuli matakua. ⁴⁷ Pani vara ka sopo eři rasu na sava Moses mo ulia, ha pa eři rasu na noku reti sohena sava?"

6

Iesu Mo Vahani Na Tamlohi

(Mt 14.13-21; Mk 6.30-44; Lk 9.10-17)

¹ Hitahun la hinau sei, Iesu mo vano na tavalu tasin Galilee la tovia Tiberias. ² Vao tavera la lo usuria matan la hite na matamata tavera mo lo vaia isana tamlohi rojoa la mele ūruhu. ³ Ale matan vao atu Iesu tolu na nona tamlohi usuri la sahe aulu na vutivuti, ale la sakele ea. ⁴ Pongi Passover hanhani tavera nona Jew mo lo mai.

⁵ Hin rani atu, Iesu mo hite na vao tavera la lo mai isana, mo usia isan Philip mara, "Ra pa lavi te hanhani epu vara ūra pa vahani vevuhi la tamlohi nike hinia?" ⁶ Iesu mo verea sohena isan Philip vara i vahitea matan enia mo levosahia moiso vara i pa vao na sava.

⁷ Philip mo ūramaria mara, "Voli tamlohi matea mata rani mo ngavulu sangavulu rua i sopo eři navu vara i vahanira hate-hateahi na makomo pereti!" ⁸ Vonara, tamlohi usuri non Iesu matea, hijan Andrew, enia tasin Simon Peter, mo verea isana mara, ⁹ "Natirihi matea nahai, mo lavi na pereti vavarihi mo lima la vaia na piri barley* peresi na maji mo rua, pani haratu mo ūruhu na sava isan la tamlohi nike?"

¹⁰ Iesu mo vere mara, "Ha vere na tamlohi tari la saksakele nike!" Mo verea sohena matan ūvuvuvu ūruhu hin jara atu mo mařivi. Evi tamlohi purongo la lo sakele atu mo tikeli tari vaha lima (5000). †

¹¹ Ale Iesu mo lavi pa la pereti atu mo vere meje isan God matara, moiso mo asease na pereti isan la haratu la lo sakele. Mo lavi la maji atu mo vaia sohena. Mo vahani na tamlohi, la hanhani sohen la opoia, la masu. ¹² Hitahun haratu enira mo isoiso la masu, Iesu mo vere na nona tamlohi usuri

* **6:9:** barley: piri matea mo sohena piri wit mata flaua, pani tamlohi tilavono la hania. † **6:10:** Evi tamlohi purongo: mo sopo evievi te hařai teni natuvarihi la lo toho ea.

vara la takonahi na sopesope hanhani vara tea i pa sopo sati purongo. ¹³ Tamlohi non Iesu, la sohoni na tanga tavera mo sangavulu ūromana mo rua na sopesopen la pereti atu mo lima. ¹⁴ Hitahun matamata tavera atu Iesu mo vaia, tamlohi la tapulo verea vara, “Tamlohi nike, enia p̄ovet atu Moses mo lo verea vara i pa sinai na varama!”

Deut 18.15-18

¹⁵ Moiso Iesu mo hitevosahia vara la pa ngurunguru isana vara la pa tahea nora supe. Ale matana, mo rovo mo sahe aulu na vutivuti vara i toho enia hasena.

Iesu Mo Hahau Na Pusa Tasi (Mt 14.22-27; Mk 6.45-52)

¹⁶ Hin ravravi atu tamlohi usuri non Iesu la sevuti sivo na tasin Galilee, ¹⁷ moiso la vele na boti matea, la tapulo sua roto na tasi matan Capernaum, ale mo ūrōra moiso, Iesu mo sopo lo sinai isara, ¹⁸ ale langi matea mo tapulo sere mo ūrlangi, mo vaia mo tasiha.

¹⁹ Nona tamlohi la sua, la jeu na kilometre mo limarave moiso, ale la hite Iesu mo lo hahau na pusa tasi mo lo mai isara, la matahu tavera matana. ²⁰ Pani Iesu mo verea isara mara, “Enau sei! Iesu! Ha sopo matahu!” ²¹ Nona tamlohi la opoia vara i vele na boti, ale vahatea purongo boti atu mo lo hoso hin jara atu la lo vano matana.

Iesu Enia Pereti Mata Mauri

²² Mo mele rani sahe, la vao atu la lo toho na tavalu tasi boti mo tai isara, la levosahia vara mo sopo mele te boti tinapua i lo toho atu, la levosahia vara Iesu mo sopo vele hin boti rihibirihi atu peresi na nona tamlohi usuri, pani enira hasera purongo la malue. ²³ Hin rani atu, boti hai nona mara Tiberias la hoso mariviti hin jara atu Iesu mo lo vere meje mata hanhani ea. ²⁴ Ale vahatea purongo, la levosahia vara Iesu peresi na nona tamlohi usuri la sopo toho atu. Ale la vele hin la boti atu la sivo Capernaum vara la ale Iesu. ²⁵ Ale la vano la tapaia na tavalu tasi, la usia isana lara, “Tija, ko pa mai nangisa?”

²⁶ Iesu mo ūramira mara, “Varaūruhu na verea isamim, ka sopo aleau mata matamata tavera ka lo hitera, pani matan ka lo hani vevuhi na hanhani ka opoia vara ha

hanira. ²⁷ Ha sopo kalvono mata hanhani sei i pa tihai purongo, pani ha vavahinau matan hanhani sei i pa sopo eři tihai ale i pa sile na mauri tui. Natun Tamlohi i pa sile kamim hin hanhani atu matan, Tama mo tinařihia vara enia i vaia.”

²⁸ Vao atu la usia lara, “Sava hinau tatholo natu, God mo opoia vara kama pa vaia?”

²⁹ Iesu mo ūramira mara, “Vavahinau sei God mo opoia mo sohen harihi: vara ha tau na nomim rasua hin haratu mo lo ūrulea.”

³⁰ La ūramia lara, “Sava matamata o pa vaia, matan vara kama pa tau na nomam rasua hiniho? Engko o pa vai na sava?

³¹ Pimam tuai la hani na mana na tano koru. Sohen la ulia na Retiulia vara, ‘Mo silera na pereti mo tai na tuka vara la hania.’”

Exo 16.4

³² Iesu mo verera hinia mara, “Varaūruhu na verea isamim, Moses mo sopo sile na pereti mo tai na tuka isamim, pani Tamaku natu mo lo sile kamim na pereti varaūruhu sei mo tai na tuka. ³³ Pereti atu God mo silea enia haratu mo tai na tuka, matan vara i sile na mauri na varama.”

³⁴ Ale la tamlohi atu la verea lara, “Moli, tarea o pa sile kamam hin pereti atu!”

³⁵ Iesu mo ūramira mara, “Enau pereti atu mo lo sile na mauri! Vara tea i mai isaku i pa sopo eři mele marohati. Mo sopo tea vara i tau na nona rasua hiniau i pa mele mařohu. ³⁶ Na verea isamim moiso vara kamim ka hiteau, pani ka sopo lo rasuau! ³⁷ La haratu enira mo isoiso Tama mo lo sileau hinira la pa mai isaku. Ale haratu mo mai isaku a pa sopo tipahia.

³⁸ Matan enau na sevuti na tuka vara a pa vai na masalon God. Na sopo mai vara a pa vai na masaloku haseku. ³⁹ Hara nike masalon haratu mo lo ūruleau, vara a sopo vaitihai te vonan la haratu mo lo sileau hinira, pani enau a pa sauteterahira na pongi hitahu.[‡] ⁴⁰ Masalon Tamaku mo sohen harihi, mo opoia vara la haratu la hite Natuna, la pa tau na nora rasua isana, ale vara la lavi na mauri tui. Ale na pongi hitahu, enau a pa sauteterahira.”

⁴¹ Ale tamlohi tavera nona Jew atu la tapulo ngutungutu matan mo verea vara,

^{‡ 6:39:} pongi hitahu: pongi atu God i pa ari na tamlohi tari hinia.

'Enau natu, pereti atu mo tai na tuka!' ⁴² Ale la verea lara, "Avei, tamlohi akerihi, enia Iesu natun Joseph sei teni mo vono? Enřa řa levosahi tamana enia tinana, pani mo pa vere vara enia mo tai na tuka sohena sava?"

⁴³ Iesu mo verea isara mara, "Ha sopo mele ngutungutu! ⁴⁴ Tama mo řuleau, ale masalon Tama hasena sei mo vai na tamlohi i eři mai isaku, vara i vono, i pa sopo tea i eři mai isaku. Pani vara tea i mai isaku, a pa sauteterahia na pongi hitahu. ⁴⁵ Sava sei la uli na reti nona přovet tuai lara, 'God i pa vujangira enira mo isoiso'. *Isa 54.13* Ale la haratu la lo tapurongo hin Tama, la pa lavi na levosahi isana, enira la pa mai isaku.

⁴⁶ Haratu hasena sei mo tai isan God mo hite Tama atu. Mo sopo mele te tinapua vara i hite Tama hin te pongi. ⁴⁷ Varařuhu na verea vara la haratu la lo tau na nora rasua hiniau, la pete lavi na mauri tui moiso. ⁴⁸ Enau pereti atu mo lo sile na mauri! ⁴⁹ Pimim tuai la hani na mana na tano koru, ale la mate. ⁵⁰ Pani pereti atu mo lo tai na tuka mo sevuti matan vara tea vara i hania i pa sopo eři mate hin te pongi. ⁵¹ Enau pereti mauri atu mo tai na tuka! Vara tea i hani pereti atu enia i pa mauri jejeu. Pereti mauri atu a pa silea isana tamlohi na varama, enia epeku."

⁵² Ale, tamlohi tavera nona Jew atu la řohu hin Iesu la tapulo vauriuri isara hasera lara, "Sohena sava natu, tamlohi nike i eři sileřa na epena vara řa hania?"

⁵³ Iesu mo verea isara mara, "Varařuhu na verea isamim, vara ha sopo hani na epen Natun Tamlohi, ale vara ha sopo inu na řaena, i pa sopo te mauri varařuhu hin kamim. ⁵⁴ Pani haratu mo hani na epeku, mo inu na řaeku, enia mo pete lavi na mauri tui moiso, ale enau a pa sauteterahia na pongi hitahu. ⁵⁵ Epeku, enia hanhani varařuhu, ale řaeku, enia wai inu varařuhu. ⁵⁶ Vara tea i hani na epeku, ale i inu na řaeku, enia i pa toho hiniau, enau a pa toho hinia.

⁵⁷ Tama sei mo řuleau, enia mo lo mauri, ale enau na lo mauri matana. Nake, tamlohi tari sei la haniau la pa mauri matak. ⁵⁸ Pereti nike, mo tai na tuka mo sinai, mo sopo sohen haratu pimim la hania tuai

matan enira la mate, pani hare mo hani pereti nike, i pa mauri jejeu." ⁵⁹ Iesu mo lo retivujavujangi na ima lotu nona Jew Capernaum na rani mo lo vere la hinau sei.

La Vahari Hinia

⁶⁰ Nona tamlohi usuri matuvana la rongo nona reti atu lara, "Avei, hara sei mo lo vere na sava sei?"

⁶¹ Iesu mo levosahia vara nona tamlohi usuri la lo ngutungutu, ale mo usira mara, "Ka rongo hinau sei mo sati?" ⁶² I pa sohena sava vara ha hite Natun Tamlohi i mele sahe na tuka sei mo tai ea mo sinai? ⁶³ Tanumena enia natu, mo lo sile na mauri! Suiha tamlohi i sopo eři vai te hinau. Noku reti na lo verea isamim, la tai isan Tanume atu sei mo lo sile na mauri. ⁶⁴ Pani te vonamim la sopo rasuau." Iesu mo verea sohena matan na pongi tiroma mo levosahia moiso vara harepu i pa rasuau, ale harepu i pa turuposi hinia.

⁶⁵ Ale Iesu mo mele verea mara, "Matan haratu na verea isamim moiso vara, 'I pa sopo tea i eři mai isaku vara Tama enia i sopo tinařihia vara i mai tiroma'."

⁶⁶ Matan la hinau sei Iesu mo verera, nona tamlohi usuri matuvana la vahari hinia, la sopo mele usuria. ⁶⁷ Iesu mo usi la nona tamlohi usuri atu tupu sangavulu řomana mo rua ⁽¹²⁾ mara, "Kamim sohena ha pa rovo hiniau?" ⁶⁸ Simon Peter mo řaramia mara, "Moli, mo sopo mele te tamlohi vara kama pa eři vano isana. Nom reti la sile na mauri tui. ⁶⁹ Kama rasuho, kama levosahia mo řuhu nake vara engko natu, tamlohi atu mo tapu non God!"

⁷⁰ Iesu mo verea isana nona tamlohi mara, "Na vřoni kamim tupu sangavulu řomana mo rua ⁽¹²⁾ pani vonamim matea enia tanume sasati matea!" ⁷¹ Iesu mo lo vere hinau sei matan Judas natun Simon Iscariot matan hitahu i pa halu na hijan Iesu, hina purongo hin haratu vara enia mo vonan la tupu sangavulu mo rua ⁽¹²⁾ atu, tamlohi non Iesu.

Tasin Iesu La Sopo Rasua

¹ Iesu mo hahau řalihi Galilee, pani mo sopo vano mariviti Judea matan tamlohi tavera nona Jew la opoia vara la vilimateia.

² Hanhani tavera nona Jew la tovia Tabernacle, pongina mo lo mai mariviti. ³ Ale tasin Iesu la lo verea isana lara, “O vano Judea matan vara nom tamlohi usuri la pa eři hite na nom matamata tavera sei ko lo vaira. ⁴ Vara tamlohi matea mo opoia vara tamlohi la levosahia, i pa turu na naho tamlohi, i pa sopo jarohi na nona vavahinau. Vara ko lo vai la hinau atu varařuhu, mo ūruhу vara o vai na nom vavahinau na naho tamlohi.” ⁵ Tasina sohena la sopo lo rasua.

⁶ Pani Iesu mo ūramira mara, “Noku pongi mo sopo lo mai, pani kamim ka tatamahu na rani tari. ⁷ Tamlohi varama la pa sopo tipahi kamim, pani la pa tipahiau matan na lo vereuli na nora sasati la lo vaira. ⁸ Kamim hasemim, ha sahe hin hanhani tavera atu. A pa sopo sahe nakerihi matan noku pongi mo sopo lo pala vevuhi.” ⁹ Iesu mo vere hinau atu, ale mo lo toho atu Galilee.

Iesu Mo Vujangi Na Temple

¹⁰ Ale tasin Iesu la sahe hin hanhani tavera atu, Iesu mo pa lo sahe hitahu, tea mo sopo levosahia. ¹¹ Hin hanhani tavera atu tamlohi tatavera nona Jew la lo ale Iesu lara, “Enia nene?”

¹² Vao tamlohi atu sohena la lo vasvas matana. Hai lara, “Iesu enia tamlohi ūruhу matea.”

Ale hai lara, “Enia mo lo halu na tamlohi.”

¹³ Pani tamlohi la matahuni na tamlohi tatavera nona Jew ea, ale la sopo sorahi Iesu na naho vao.

¹⁴ Na sope rani matan hanhani tavera atu, Iesu mo unu na Temple, ale mo tapulo vujangi. ¹⁵ Tamlohi tavera nona Jew la mařurahi hinia, ale lara, “Tamlohi nike, mo pa patuha sohena sava? Tea mo sopo vujangial!”

¹⁶ Iesu mo ūramira mara, “Enau na sopo vujangi na sava vara a haseku ūromřomia. Sava na lo vujangia mo tai isan haratu mo lo ūruleau. ¹⁷ Vara ha pa lo opoia varařuhu vara ha ooloohin God, ha pa levosahia vara enau na lo vujangi na sava mo tai isan God, pani mo sopo isaku haseku. ¹⁸ Haratu mo opoia vara tamlohi la sile na ooloohin isana matan mo lo ūromřomia vara nona retireti mo tai isana hasena enia hapa-hapa, pani haratu sei mo opoia vara i sile

na ooloohin isan haratu mo lo ūruleau, enia tamlohi matea mo lo vere na varařuhu, ale mo sopo te hehe isana. ¹⁹ Moses mo sile kamim na Leu teni mo vono? Pani mo sopo te vonamim hatea i ooloohin! Ka opoia vara ha vilimateiau mata sava?”

²⁰ Vao atu la ūramira lara, “Ko putu! Sava tanume mo unu hinihi mo vaiho ko ūromia vara tea mo opoia vara i vilimateiho?”

²¹ Iesu mo ūramira mara, “Enau na vai na matamata tavera matea purongo, ale kamim mo isoiso ka mařurahi tavera hinia. ²² Moses mo retileu vara ha pa taiřalihi na natumim, pani retileu atu mo sopo tai isan Moses, mo tai isan pimim tuai atu Abraham, pani nake kamim ka lo taiřalihi na natumim na Sabbath, ²³ Ale vara ha taiřalihi te tamlohi hatea na Sabbath matan vara ha pa sopo tope na Leu non Moses, mata sava ka lo lolokoru hiniau matan enau na lo vai na tamlohi rojoa epena tari la mele ūruhу na Sabbath? ²⁴ Ha sopo ari na tamlohi na nomim kilakilau purongo! Ha ari na malele tataholo.”

Iesu Enia Křisto

²⁵ Mara Jerusalem hai, la lo verea lara, “Avei, mo sopo tamlohi nike natu, sei la lo vahitea vara la pa vilimateia? ²⁶ Pani enia nahai! Mo lo retireti isana naho vao, pani la sopo vere te hinau hatea isana, la tamlohi tavera nike la toma? Korong la pa hitevosahia vara enia natu, Křisto atu? ²⁷ Pani tamlohi nike, enřa ūra levosahi na jarana, pani hare i pa levosahi na sava jara Křisto i pa tai hinia?”

²⁸ Iesu mo lo vujangi na lolo Temple atu, ale mo ulo mara, “Kamim ka ūromi vara ka levosahiau, ale sava jara na tai ea. Enau na sopo mai na masaloku. Haratu mo ūruleau enia mo varařuhu, pani kamim ka sopo levosahia. ²⁹ Pani enau na levosahi haratu mo lo ūruleau, matan enau na tai isana.”

³⁰ Tatua tamlohi la vahitea vara la tauřilatia atu natu, pani pongina mo sopo lo masese. ³¹ Pani tamlohi matuvana hin vao atu la tau na nora rasua hinia lara, “Avei, vara Křisto atu i pala, ka ūromi vara enia i pa eři vai te matamata tavera i jeu tamlohi nike?”

La Vahitea Vara La Taurilati Iesu

³² Pharisee lara la rongo na vao atu la lo ngutungutu hin Iesu moiso la pulutahi

peresi na moli pris, ale la rule na police mata Temple atu vara la taurilatia. ³³ Pani Iesu mo verea isara mara, “Enau a pa mele toho isamim i peravu makomona purongo, moiso enau a pa sahe isan haratu mo lo ruleau. ³⁴ Ha pa aleau, pani ha pa sopo eři hiteau. Ha pa sopo eři vano na jara enau a pa vano ea.”

³⁵ Ale tamlohi tavera nona Jew la lo usiusira hinia lara, “Enia i pa vano epu vara ūa pa sopo eři tapaia? Korong i pa vano hin te jara tinapua sei nořa tamlohi la lo toho ea vara i vujangira peresi na mara Greek teni mo lo verea sohena sava sei?” ³⁶ Raramin nona retireti atu, enia sava sei mo verea mara, “Ha pa aleau, pani ha pa sopo hiteau. Ha pa sopo eři vano na jara enau a pa vano ea.”

Retitauhi Mata Wai Mauri

³⁷ Isoiso rani matan hanhani tavera atu, enia rani tavera matara, ale Iesu mo turu mo ulo aulu mara, “Vara tea mo mařohu, i mai isaku i inu! ^{Isa 55.1}

³⁸ Vara ha rasauau, i pa sohena Retitapu mo verea mara, ‘Wai mauri i pa roro malue na mapumim sohena wai roro matea’. ^{Isa 58.11}

³⁹ Iesu mo lo retireti hin Tanume Tapu atu God i pa silea i pa sopo tuai isan la haratu la rasua. God mo sopo lo sile na Tanumena isan tea matan Iesu mo sopo lo turu na nona mateia.

Tamlohi La Patumasa

⁴⁰ Tatuan vao atu la rongo Iesu mo vere hinau sei, ale lara, “Avei, enia natu, p̄rovet atu Moses mo lo verea!” ^{Deut 18.15}

⁴¹ Tatuara lara, “Enia natu, Křisto atu!”

Pani tatuara la lo verea vara, “Křisto atu i pa sopo eři tai Galilee! ⁴² Retitapu mo sopo verea vara Křisto atu i pa vora na vaon Supe David na vanua Bethlehem?” ^{Psa 7.12; Mic 5.2} ⁴³ Vao tamlohi atu la tapulo hase asera matan Iesu. ⁴⁴ Tatuara la opoia vara la taurilatia, pani tea mo sopo tau na limana hinia.

Tamlohi Tavera La Rohu Hinia

⁴⁵ Police mata Temple la mele hilu lekoleko, la vano isana pris tatavera peresi na Pharisee, ale Pharisee la usi na police lara, “Mata sava ka sopo lavi Iesu i mai nika?”

⁴⁶ La ūaramira lara, “Tea mo sopo lo vu-jangi i sohen tamlohi atu.”

⁴⁷ Pharisee la kilau ūalihi isara, ale lara, “Mo halu kamim sohera? ⁴⁸ Avei, tea hin la haratu la lo tauri na suiha teni te Pharisee la rasua? ⁴⁹ Ka levosahia vara la jarařoha nika la sopo levosahi te hinau hatea na Leu. La lo toho na ruhuruhi lesati non God moiso.”

⁵⁰ Hin rani atu, Nicodemus mo lo toho peresira matan enia mo lo sakele na nora pulutahi, nona tamlohi tatavera atu, enia natu, tamlohi tiroma mo mai isan Iesu. Mo verea mara, ⁵¹ “Avei, nořa Leu mo vara ūa sopo eři sile na talai isan te tamlohi vavano ūa sakele ūa rongo na nona retireti tiroma matan vara ūa pa levosahi na sava mo vaia.”

⁵² Ale la verea isana lara, “Nicodemus, engko ko tai Galilee teni mo vono? O vano o evi na Retiulia! O sopo eři hitea vara te p̄rovet hatea i pa tai Galilee!”

⁵³ Ale tamlohi tari atu, la mele mule.

8

Iesu Mo Romi Na Hařai Matea

¹ Pani Iesu mo hahau mo vano na vutivuti la tovia Vuti talu Olive. ² Ale na ūalavuho jea mo mele vano na Temple. Vao tamlohi la lo mai isana, mo sakele mo pa lo tapulo vujangira. ³ Ale Pharisee peresi na tamlohi vujangi mata leu la mai isana la taurilati na hařai matea la vileia mo lo juruvi peresi na tamlohi matea mo sopo tuana. La vaia mo turu na livuha vao, ⁴ ale la verea isan Iesu lara, “Rabai, hařai nika la taurilatia mo lo vaivaileu peresi na tamlohi matea mo sopo tuana. ⁵ Leu non Moses mo vujangia vara hařai sohen haranike la pa parumateia! Pani, engko ko verea sohena sava?”

Lev 20.10; Deut 22.22-24

⁶ La usi retiusia sei matan vara la vahite Iesu vara sava reti i pa verea, ale la pa tau na talai hinia. Pani Iesu mo rautoho sivo atano, mo tapulo uliuli na varangona na lepa.

⁷ La lo area hin retiusia sei matan hařai atu, moiso mo turu mo verea mara, “Vara te vonamim mo sopo lo vai te hehe hin te rani, enia i parua tiroma!” ⁸ Ale mo mele rautoho mo mele uliuli na lepa. ⁹ La

tamlohi atu la rovo hinia hatehateahi, vajahara la tiroma. Hitahu Iesu enia hařai atu purongo la pa lo toho atu. ¹⁰ Iesu mo turu mo usi hařai atu mara, "Tamlodi tari la haipu? Mo sopo tea vara i sile na talai isam?" ¹¹ Hařai atu mo řaramia mara, "Mo vono, tija." Ale Iesu mo verea isana mara, "Enau sohena, a pa sopo sile na talai isam. O vano natu, ale nake o sopo mele vai na hehe!"

Iesu Enia Malarani Varama

¹² Moiso Iesu mo mele retireti isana tamlohi, mo vere mara, "Enau malarani mata varama! Vara ha usuriau, ha pa sopo hahau na ſrořoha, ha pa lavi na malarani sei mo sile na mauri."

¹³ Pharisee la reti isana lara, "Engko, ko lo vereulihos, ale sava ko lo verea mo sopo vararuhi!"

¹⁴ Iesu mo řaramira mara, "Hina purongo vara na lo hase vereuliau, sava na lo verea mo vararuhi matan enau na levosahi na jara na tai ea, ale enau na levosahia vara na lo vano epu. Pani kamim ka sopo levosahia vara enau na tai epu teni sava jara na lo vano hinia. ¹⁵ Kamim ka lo ari na tamlohi na kilakilau nona tamlohi purongo, pani enau na sopo ari tea. ¹⁶ Pani vara a sile na aria, aria atu i pa tatahola matan mo sopo enau haseku a pa vaia. Pani enau Tama sei mo lo ſruleau kama pa turu na jara matelete purongo. ¹⁷ Na nomim Leu la ulia lara, vara tamlohi tupra rua la vere na hinau matelete moiso mo vararuhi, o pa eři rasua. *Deut 19:15*

¹⁸ Enau na lo hase retivuhesiau, ale Tama sei mo lo ſruleau, enia mo lo retivuhesiau."

¹⁹ La usia lara, "Tamam mo lo toho epu?"

Iesu mo řaramira mara, "Ka sopo levosahiau teni Tamaku! Vara ha pa lo levosahiau ha pa levosahi Tamaku."

²⁰ Iesu mo lo vere la reti atu hin rani atu mo lo vujangi hin jara atu tamlohi la lo tau mamahuni na nora silesilea hinia na Temple. Pani mo sopo tea i taurilatia matan pongina mo sopo lo mai.

²¹ Mele vahatea Iesu mo verea isara mara, "Enau a pa malue, ale kamim ha pa aleau, pani kamim ha sopo eři vano na jara enau na lo vano ea, moiso kamim ha pa

mate na nomim hehe matan God i pa sopo ſromira."

²² Tamlohi tavera nona Jew la usiusira lara, "Avei, mo lo vai na ſromina vara i pa vilimateia hasena matan enia mara, 'Ha pa sopo eři usuriau ha vano hin jara atu enau na lo vano ea!' teni sava?"

²³ Iesu mo řaramira mara, "Kamim matan atano, pani enau na tai aulu. Kamim mata varama, pani enau mo vono.

²⁴ Na pete verea isamim moiso vara ha pa mate na nomim hehe vara ha sopo rasua vara enau haratu sei mo lo toho jejeu, ha pa mate na nomim hehe."

²⁵ La usia lara, "Engko hare?"

Iesu mo řaramira mara, "Sava na lo verea isamim na pete verea isamim moiso na pongi tiroma.* ²⁶ Hinau matuvana a eři verea isamim matan vara a ari kamim matana, pani haratu mo lo ſruleau, enia mo vararuhi, ale sava hinau mo lo verea isaku enia natu, na lo verea isana tamlohi na varama."

²⁷ Tea mo sopo lo levosahia vara Iesu mo lo vere na hinau matan Tama. ²⁸ Iesu mo mele verea mara, "Hin pongi atu vara ha tahe Natun Tamlohi, ha pa levosahia vara enau natu, haratu mo lo toho jejeu. Ha pa levosahia vara enau haseku a pa sopo eři vai te hinau haseku, na lo vere na sava purongo, Tama mo vujangiau hinia. ²⁹ Haratu mo ſruleau, enia mo lo toho pere siau. Tarea na lo usuri na masalona, ale enia i pa sopo tinařihiau."

³⁰ Hin pongi atu Iesu mo lo vere la hinau sei, tamlohi matuvana la tau na nora rasua hinia.

Retivarařuhu I Pa Teriho

³¹ Ale Iesu mo verea isana tamlohi tavera nona Jew atu la rasua ea mara, "Vara ha lo oloolo hin na noku vujangi, ha pa noku tamlohi usuri vararuhi, ³² ale ha pa levosahi na retivarařuhu, moiso reti vararuhi atu i pa teri kamim."

³³ La řaramia lara, "Kamam mahapin Abraham tatahola! Kama sopo lo slev isan te tamlohi hatea, ko pa verea sohena sava vara kama pa materi?"

³⁴ Ale Iesu mo řaramira mara, "Vararuhi na vere kamim hinia, haratu mo lo hehe

* ^{8:25:} hai la posisope jara akerihi sohen harihi, 'Kamim ka tinapua, a pa mele retireti peresi kamim mata sava?'

enia slev non hehe! ³⁵ Slev mo sopo toho na lolo vao ima matea jejeu, pani Natuna i pa toho jejeu. ³⁶ Ale vara Natuna i vai kamim ha materi, ha pa materi varařuhu. ³⁷ Na levosahia vara kamim mahapin Abraham, pani ka lo opoia vara ha vilimateiau matan noku reti mo sopo toho na maurimim varařuhu. ³⁸ Enau na lo vere kamim na sava Tamaku mo vujangiau hinia, mo sohen kamim ka lo vai na sava tamamim mo lo vujangi kamim hinia.”

³⁹ La tamlohi atu la ūramira lara, “Abraham enia tamamam.”

Iesu mo ūramira mara, “Vara kamim natun Abraham, ha pa vai na sava Abraham mo lo vaia. ⁴⁰ Pani kamim ka opoia vara ha vilimateiau matan na lo vere kamim na retivarařuhu God mo sileau hinia. Abraham mo sopo vai te hinau sohena. ⁴¹ Pani kamim ka lo vai na hinau tataholo sohen tamamim mo lo vaia.”

Ale la ūramira lara, “Pani kamam kama sopo natu malele! Kamam tamamam matea purongo, kama natun God!”

⁴² Iesu mo ūramira mara,

“Vara God enia tamamim, kamim ha pa opoiau matan enau na tai isan God. Enia mo ūruleau, ale enau na sopo mai na masaloku haseku. ⁴³ Mata sava ka sopo eři levosahi na sava na lo verea isamim? Ka opoia vara ha peropero na sava na lo verea isamim? ⁴⁴ Tamamim enia Tiapolo, kamim ka lo vai na masalona. Pongi tiroma enia tamlohi vilimatei na tamlohi, ale enia tamlohi halu. Mo sopo te hinau varařuhu hinia. Enia mo lo vere na masalona purongo, ale hinau tari mo verea enira halu. Mo sopo vara enia tamlohi halu purongo, pani enia tina halu.

⁴⁵ Pani hinau tari na lo vere kamim hinia la varařuhu, pani kamim ka pa lo ūruvara ha rasuau. ⁴⁶ Te vonamim i eři verea vara na vai te hehe? Vara na vere na varařuhu, ka sopo rasuau mata sava? ⁴⁷ Haratu enia non God i pa tapurongo na nona reti, pani kamim ka ūruvara ha tapurongo matan ka sopo non God.”

⁴⁸ Ale tamlohi tavera nona Jew la verea isan Iesu lara, “Kamam kama varařuhu hin haratu kama verea vara, engko mara Samaria matea, ale tanume sasati matea mo lo toho hiniho!”

⁴⁹ Iesu mo ūramira mara, “Mo sopo te tanume sasati hiniau! Enau na lo oloolo hin Tamaku, pani kamim ka ūruvara ha oloolo hiniau. ⁵⁰ Enau na sopo opoia vara a lavi na oloolo matakus haseku, mo vono, pani matea enia mo opoia vara a lavi na noku oloolo, ale enia natu, haratu i pa sile na aria. ⁵¹ Varařuhu na vere kamim hinia, vara ha oloolo na noku reti, ha pa sopo eři mate!”

⁵² Tamlohi tavera nona Jew sei la lo toho atu la lo tapurongo hinia lara, “Nake natu, kama levosahia vara tanume sasati matea mo lo toho isam. Abraham mo mate moiso, ale la přovet atu tuai sohena. Mo sohena sava natu, ko pa verea vara, la haratu la lo oloolo na nom reti, la pa sopo eři mate? ⁵³ Engko ko aulu ko jeu tamamam Abraham? Enia mo mate, ale la přovet atu tuai sohena la mate. Engko ko ūromi vara engko hare?” ⁵⁴ Iesu mo ūramira mara, “Vara enau a lo hase tahe hijaku aulu, hijaku i pa sopo aulu varařuhu. Tamaku natu, enia mo lo tahe na hijaku aulu, enia haratu kamim ka lo tovia nomim God, ⁵⁵ ka lo verea, pani ka sopo levosahia varařuhu. Vara enau a verea vara na sopo levosahia, enau a pa tamlohi halu matea sohemim kamim mo isoiso, pani enau na levosahia, ale na lo vai na sava mo lo verea. ⁵⁶ Tamamim Abraham mo ayulahi tavera matan mo hite na noku pongi pala, ale mo avulahi matana.”

⁵⁷ Ale la tamlohi tavera nona Jew atu la verea isana lara, “Pani engko taunim mo sopo lo tikeli ngavulu lima ⁽⁵⁰⁾! Ko pa hite Abraham sohena sava?” ⁵⁸ Iesu mo ūramira mara, “Varařuhu na verea isamim, Abraham mo sopo lo vora, enau na lo toho moiso, enau haratu mo lo toho jejeu.” ⁵⁹ La rongo nona reti atu, la vilevilei vatuvu la pa paru Iesu, pani mo luhu hinira, ale mo malue hin Temple atu.

9

Tamlohi Vuso Mo Kilau

¹ Iesu mo pa lo hahau, ale hin rani atu mo hite na tamlohi matea mo vora mo matavuso moiso. ² Tamlohi usuri non Iesu la usia isana lara, “Avei, Tija, mata sava tamlohi nike mo vora matana mo vuso?

Mata nona hehe teni hehe non tamana enia tinana?"

³ Iesu mo ūaramira mara, "Mo vono, mo sopo mata nona hehe teni hehe non tamana teni tinana. Pani matan mo matavuso, ha pa eři hite God i vai na matamata tavera hinia. ⁴ Nake mo lo rani, ūa pa vai na masalon haratu mo lo ūruleau. Pongi mo lo mai, ale i pa sopo tea i eři vai te vavahinau hinia. ⁵ Ale nakerihi na pa lo toho na varama, enau na malarani mata varama."

⁶ Iesu mo vere reti atu moiso, mo litovi na lepa, mo hoi na lepa peresi na litona, ale mo jarai makamaka atu na matan tamlohi atu. ⁷ Ale mo verea isana mara, "O vano, o hoje nařihi na lepa na paltungu Siloam!" Tamlohi atu mo vano na paltungu Siloam, ūaramin hija atu enia 'Haratu la ūrulea'. Hin rani atu mo hoje nařihi na lepa moiso mo eři kilau, ale mo mule.

⁸ Hin rani atu tahisana peresi la haratu la hitea la lo usiusira lara, "Avei, tamlohi sei natu, enia tamlohi sei tarea mo lo sakele mo lo usiusi teni mo vono?"

⁹ Tatuara lara, "Enia natu, tamlohi atu!"

Ale tatuara lara, "Mo vono, pani mo sohen tamlohi atu."

Pani tamlohi atu hasena mo verea mara, "Enau sei, tamlohi atu!"

¹⁰ La usia lara, "Pani nake, ko pa kilau sohena sava?"

¹¹ Mo ūaramira mara, "Tamlohi matea hijana Iesu, mo vai na makamaka mo jaraia na matak, mo ūruleau vara a vano a hoje nařihia na paltungu Siloam. Vahatea atu na vaia na eři kilau."

¹² La usia lara, "Mo lo toho epu nakerihi?"
Mo ūaramira mara, "Na sopo levosahia."

Sorasorahin Iesu

¹³⁻¹⁴ Hin rani atu Iesu mo vai tamlohi atu mo ūahu na lepa peresi na litona, enia Sabbath matea. Tahisana la lavia mo vano isana Pharisee. ¹⁵ Pharisee la mele usia vara mo pa kilau sohena sava. Tamlohi atu mo ūaramira mara, "Enia mo jarai na lepa na matak moiso na hoje nařihia, ale nake na eři kilau."

¹⁶ Tatua Pharisee la verea isana lara, "Tamlahi nike, mo sopo tai isan God matan mo lo tope na Sabbath!"

Pani tatuara la verea lara, "Sohena sava natu, tamlohi hehe matea i pa eři vai te matamata tavera sohen harihi?" Ale matana, Pharisee la patumasa, ¹⁷ la mele usi tamlohi atu lara, "Pani engko ko ūromia vara tamlohi atu mo vaiho ko kilau, enia hare?"

Mo ūaramira mara, "Enia p̄ovet matea!"

¹⁸ Pani la tamlohi tatavera atu nona Jew la ūahu vara la rasua vara tamlohi sei natu, matana mo matavuso tiroma. Ale, la vahařule matan tamana enia tinana. ¹⁹ Ale, la mai moiso la usira lara, "Haranike natu, enia natumim sei ka verea vara mo vora mo vuso? Sohena sava mo pa kilau nake?"

²⁰ Tamana enia tinana la ūaramira lara, "Kama levosahia vara enia natumam, ale kama levosahia vara mo vora mo vuso, ²¹ pani kama sopo levosahia vara mo pa kilau sohena sava, teni hare mo vaia vara i eři kilau. Ha usia isana! Enia mo tamlohi moiso, ale enia hasena i pa verea."

²²⁻²³ Tamana enia tinana la verea sohena matan la matahuni na nora tamlohi tatavera nona Jew. Matan nora tamlohi tatavera la hatihia moiso vara la pa tipahi te tamlohi na nora ima lotu vara la lo verea vara, Iesu enia Kristo.

²⁴ Tamlohi tatavera la mele tovi pa tamlohi sei mo vuso tiroma mo mele sinai, la verea isana lara, "O reti tataholo na nahon God vara o pa vere na hinau vararuhu! Kama levosahia vara Iesu enia tamlohi hehe matea."

²⁵ Tamlohi atu mo ūaramira mara, "Na sopo levosahia vara enia tamlohi hehe teni mo vono. Na levosahia vara tiroma na vuso, pani nake na kilau."

²⁶ La usia isana lara, "Mo vai na sava isam? Mo vai mamahuni na matam sohena sava?"

²⁷ Tamlohi atu mo ūaramira mara, "Na pete verea isamim vahatea moiso, pani ka ūahu vara ha tapurongo. Ka opoia vara a mele verea mata sava? Kamim sohena ka opoia vara ha mai na nona tamlohi usuri?"

²⁸ La kalia moiso, ale lara, "Engko nona tamlohi usuri! Kamam tamlohi usuri non Moses! ²⁹ Kama levosahia vara God mo reti isan Moses, pani kama sopo levosahia vara harakerihi mo tai epu."

³⁰ Tamlohi atu mo ūaramira mara, "Kamim ka tinapua! Tamlohi atu mo vai mamahuni na matak, pani kamim ka

sopo levosahia vara mo tai epu! ³¹ Ra levosahia vara God mo lo tueni la haratu la opoia, ale la oloolo hinia. God mo sopo tueni na tamlohi hehe. ³² Tuai jea na tapulo varama mo tikeli nake hare mo rongoa vara te tamlohi mo mele vai mamahuni te tamlohi mo vora mo vuso vara i kilau. ³³ Vara tamlohi atu i sopo tai isan God, i pa sopo eři vai te hinau hatea sohen harihi.”

³⁴ La ūramia lara, “Tarea engko ko tamlohi hehe na rani ko vora mo tikeli nake. Engko ko ūromōmia vara o pa eři vujangi kamam hin te hinau hatea?” Ale la pulahi nařihia la tipahia.

³⁵ Iesu mo rongo hinau atu mo masese moiso mo vano vara i ale tamlohi atu, ale mo tapaia mo usia mara, “Engko ko rasu na Natun Tamlohi?”

³⁶ Mo ūramia mara, “Moli, vara o vereau hinia vara enia hare, a pa tau na noku rasua hinia.”

³⁷ Iesu mo vereea isana mara, “Engko ko hitea moiso, ale nakerihi enia mo lo retireti peresiho.”

³⁸ Tamlohi atu mara, “Moli, na rasua.” Ale mo papaohi mo lotua.

³⁹ Moiso Iesu mo vereea mara, “Na mai vara aria i mai na tamlohi na varama. Na mai nike, vara a roi na matavuso la kilau, ale vara a vai la haratu la eři kilau, matara la vuso.”

⁴⁰ Pharisee la rongo Iesu mo vere hinau atu moiso, la usia lara, “Kamam kama matavuso?”

⁴¹ Iesu mo ūramira mara, “Vara ka vuso i pa sopo te nomim hehe, pani nake matan ka lo vereea vara kamim ka lo kilau, kamim ha pa lo toho na nomim hehe.”

10

Iesu Enia Tavui Sipsip ūruhu

¹ “Vara ūruhu na vereea isamim, tamlohi vavanaho peresi la haratu la lo vili na tamlohi mata vavanaho, la lo vele palausi na vořa vara la unu na jara sipsip, la sopo unu na matarua vořa.

² Pani haratu mo unu na matarua jara sipsip enia tavui sipsip tataholo. ³ Tamlohi kilau na matarua atu i pa roi na matarua matan vara tavui sipsip hasena i pa unu,

ale sipsip la pa levosahi na leon tavuira moiso enia i tovi na pulana sipsip na hijara hatehateahi moiso i tiromara la malue.

⁴ Hin rani atu vara tavui sipsip mo tiroma na pulana sipsip tari vara la malue hin rope sipsip atu, enia mo tiromara, ale la usuria matan la rongovosahi na leona.

⁵ La pa sopo eři usuri te vinano hatea matan la pa sopo rongovosahi na leon vinano atu, pani la pa rovo hinia.”

⁶ Iesu mo vere titileu atu isara, pani la sopo levosahi na sava mo lo vereea isara.

⁷ Ale Iesu mo mele vereea mara, “Vara ūruhu na vereea isamim, enau matarua mata sipsip. ⁸ Tamlohi tari la mai tiroma hiniau, enira tamlohi vavanaho peresi la haratu la lo vili na tamlohi mata vavanaho, pani sipsip la pa sopo tapurongo isara. ⁹ Enau matarua. Vara tea i unu hiniau, enia i pa juri, i pa eři unu, ale i pa mele malue vara i vilei na ūvuvu ūruhu mata hanhani.

¹⁰ Tamlohi vavanaho mo mai matan vara i pa vanaho i vilimatei, ale i komokomo purongo. Enau na mai vara haratu la unu hiniau, la pa lavi na mauri ūruhu ūruhu jea. ¹¹ Enau tavui ūruhu mata sipsip. Tavui ūruhu mata kilau na sipsip mo tau na maurina mata pulana sipsip.

¹² Tamlohi voko mata mania,* enira la sopo sohena tavui sipsip matan mo sopo pulara sipsip ale hin rani atu vara la hite na wolf i mai,† la pa rovo na sipsip, ale la pa sopo turuhoro na wolf sei enia viriu jala matea mo sati. Wolf i pa komora la rovorovo. ¹³ Tamlohi voko la rovo matan la sopo ūromōmia vara la pa kilau na sipsip.

¹⁴ Enau tavui ūruhu mata sipsip. Enau na levosahi na pulaku sipsip, enira la levosahiau ¹⁵ sohena Tama mo levosahiau, ale enau na levosahi Tama, ale enau na sile na mauriku mata pulaku sipsip. ¹⁶ Tatua pulaku sipsip la sopo lo toho na lolon vořa nike. A pa lavira la mai sohera, ale la pa tapurongo na leoku. La pa mai matea, ale tavui sipsip i pa matelete.

¹⁷ Ale Tama mo opoiau matan enau na sile na mauriku matara, ale a pa mele eři lavia. ¹⁸ Mo sopo tea i eři lavi nařihia

* **10:12:** tamlohi voko: haratu la kilau na sipsip mata mania purongo. † **10:12:** wolf: enia viriu jala tavera matea i eři vilimatei na tamlohi peresi na sipsip.

isaku, pani enau na silea na masaloku purongo. Enau na lavi na suiha matan vara a silea, ale na lavi na suiha matan vara a mele lavia sohen Tamaku mo retileu vara a vaia.”

¹⁹ Tamlohi tatavera nona Jew atu la mele patumasa mata sava Iesu mo lo verea isara. ²⁰ Matuvana lara, “Tanume sati matea mo lo toho hinia! Mo putu! Mata sava ka lo tapurongo isana?”

²¹ Pani tatuara lara, “Vara tamlohi matea tanume sasati mo lo toho hinia i pa eři vere na hinau sohen harihi sohena sava? I pa sopo te tanume sasati i eři vai na matavuso vara i kilau!”

La Tipahi Iesu

²² Hin rani atu na taro hamariri, hanhani tavera mata Dedication mo tapulo mata rani turuhi na Temple Jerusalem.

²³ Na rani matea Iesu mo lo hahau na lolo Temple hin jara atu la lo tovia Palapalan Solomon na roro ropic Temple atu, ²⁴ ale tamlohi tatavera nona Jew la ūrahia la verea isana lara, “O pa vereuli kamam hiniho pangisa? Vara engko Křisto atu, o vere tataholo kamam hinia!”

²⁵ Iesu mo ūramira mara, “Na vere isamim moiso, pani ka ūruhvara ha rasuau. Hinau na vaira na hijan Tamaku, enira la vujangia vara enau hare. ²⁶ Pani matan kamim mo sopo pulaku sipsip, ka sopo rasuau. ²⁷ Pulaku sipsip la rongovosahi na leoku, enau na levosahira, ale la pa usuriau. ²⁸ Na silera na mauri tui, ale i pa sopo te hatea i eři tihai hin te rani, ale mo sopo tea i eři tuahi nařihira na limaku. ²⁹ Tamaku natu, mo silera isaku, ale enia mo aulu jea mo sopo tea i sohena, ale mo sopo tea i eři tuahi nařihira na liman Tama, ³⁰ ale enau na matea peresi Tama.”

³¹ Mele vahatea tamlohi tatavera nona Jew atu la lavi na vatu vara la pa paru-matei Iesu hinira. ³² Pani mo verea isara mara, “Enau na vujangi kamim na hina ūruhvara matuvana Tama mo ūruleau vara a vaira. Sahara hinira natu, ka opoia vara ha paruau matana?”

³³ La tamlohi tatavera nona Jew atu la ūramia lara, “Kama sopo paruho matan te hinau ūruhvara ko vaia, pani matan engko tamlohi purongo ko lo hase vaiho ko sohen

God matan ko lo retihehe vara engko God!”
Lev 24.16

³⁴ Iesu mo ūramia mara, “Na nomim leu la ulia vara, ‘Na verea vara kamim god’. *Psa 82.6* ³⁵ Ale, kamim ha sopo eři tope na Retitapu sei mo verea vara God mo retireti isana tamlohi, ale mo tovira vara enira god. ³⁶ Ale, mata sava ka lo vere lejilejiau vara na lo retihehe matan na lo verea vara enau Natun God? Pulon hinau sei Tama enia mo tauhasehiau mata masalona vara a pa vai la hinau sei. Enia natu, haratu mo lo ūruleau na varama. ³⁷ Vara a sopo vai la hinau sei Tamaku mo lo vaira, ha sopo rasuau, ³⁸ pani vara a vai na hinau Tama mo lo vaia, hina purongo vara ha sopo rasuau, pani mo ūruhvara ha rasu God matan la hina mařurahi sei na lo vaira. Matan hinau atu ha pa levosahia varauhu vara Tama enia mo matea peresiau, ale enau na matea peresi Tama.”

³⁹ Mele vahatea la opoia vara la taurilati Iesu, pani mo majuri na limara, ⁴⁰ ale mo vano roto na wai Jordan hin jara atu John mo lo paptijo ea tiroma. Hin rani atu Iesu mo lo toho atu, ⁴¹ tamlohi matuvana la mai isana. La lo verea lara, “John mo sopo vai te matamata tavera hatea, pani hinau tari mo verea matan Iesu, enira la varauhu.” ⁴² Tamlohi matuvana la tau na nora rasua hin Iesu hin jara atu.

11

Lazarus Mo Mate

¹⁻² Tamlohi matea hijana Lazarus, mo rojo na vanuan Bethany. Vetasina mo rua, Mary enia Martha la lo toho peresia. Mary enia hařai atu sei mo lo surei na hasori na palon Moli peresi na patuna, ale mo kamoti na palona na vuluna. ³ Vetasin Lazarus la sohai na reti isana lara, “Tija, tapalam ūruhvara sei Lazarus mo rojo tavera.”

⁴ Hin rani atu Iesu mo rongoa, mo verea mara, “Rojo atu, i pa sopo isoiso na mate, pani i pa sile na oloolo isan God, ale Natuna i pa lavi na oloolo matan haratu i pa vaia.”

⁵ Iesu mo opoi Martha enia vetasina peresi Lazarus. ⁶ Ale matan mo rongo vara mo rojo Iesu mo mele toho atu rani mo rua. ⁷ Hitahun haratu, mo verea isana nona tamlohi usuri mara, “Nake ūra mele sahe Judea.”

⁸ Nona tamlohi usuri la ūrāramia lara, “Tija, mo ūruhu, pani mo sopo tuai sei tamlohi tatavera atu nona Jew la opoia vara la pa parumateiho! Avei, ko opoia vara o pa mele vano atu?”

⁹ Iesu mo ūrāramia mara, “Matan alo mo visa na rani matea? Ka levosahia vara mo sangavulu ūromana mo rua (¹²). Vara o hahau na rani o pa hite na mera alo, ale o pa sopo tialalahaha. ¹⁰ Pani vara o hahau na vutepongi o pa tialalahaha matan mo sopo te mera hinia.” ¹¹ Ale mo verea isara mara, “Tapalařa Lazarus mo lo juruvi, pani enau a pa vano vara a pa ūrohaia.”

¹² Nona tamlohi usuri la ūrāramia lara, “Tija, vara enia mo lo juruvi, enia i pa mele rongo i ūruhu.” ¹³ Iesu mo levosahia vara Lazarus mo mate, pani enira la lo ūromūromia vara enia mo lo verea vara mo lo juruvi ūromaliho purongo.

¹⁴ Moiso Iesu mo vere tataholoia isara mara, “Lazarus mo mate, ¹⁵ na avulahi matamim matan na sopo toho atu matan nake masapa matea vara ha pa tau na nomim rasua hiniau, ūra vano isana!”

¹⁶ Ale Thomas sei la lo tovia Havo, mo verea isan tamlohi usuri tinapua non Iesu atu mara, “Eh! Ha turu, ūra vano! Enra ūra vano vara ūra pa tolu mate peresi Moli.”

Lazarus Mo Mele Mauri

¹⁷ Na rani Iesu mo kakau Bethany, mo rongoa vara Lazarus la taua na papavatu rani mo vati moiso. ¹⁸ Taon sei Bethany mo lo toho mariviti kilometre mo tolu, ale mele sopena asau hin Jerusalem, ¹⁹ ale tamlohi tatavera nona Jew matuvana la mai isan Martha enia Mary, vara la tangtangi peresira matan tavaira mo tihai.

²⁰ Vahatea atu Martha mo rongoa vara Iesu mo pala, mo malue vano vara i tapaia, pani Mary mo lo toho na ima. ²¹ Martha mo verea isan Iesu mara, “Tija, vara o pa lo toho nike tavaiku i pa sopo mate, ²² pani hina purongo hin haratu matan na levosahia vara God i pa vai na sava hinau vara o usia.”

²³ Iesu mo verea isana mara, “Tavaim i pa mele mauri!”

²⁴ Martha mo ūrāramia mara, “Na levosahia vara i pa mele mauri na pongi hitahu hin rani atu vara tamlohi mate la mele turu.”

²⁵ Iesu mo verea mara, “Enau pulo mauri, ale enau na sauteterahi na mateia, matan la haratu la rasuau la pa mauri, hina purongo vara la pa mate. ²⁶ Moiso la haratu la rasuau, la pa lo mauri, la pa sopo eři mate varařuhu. Martha, ko rasu hinau sei?”

²⁷ Martha mo ūrāramia mara, “He'e Moli! Na lo rasua vara engko natu, Křisto, Natun God. Engko haratu kama lo kilau toho matana vara i pa mai na varama!”

²⁸ Martha mo retireti isan Iesu, moiso mo mele hilu vara i vere malumia isan Mary mara, “Tija mo mai, mo opoia vara i hiteho.” ²⁹ Mary mo rongoa, vahatea mo turu mo malue, mo vano isana. ³⁰ Iesu mo sopo lo unu na vanua, mo pa lo toho hin jara atu Martha mo tapaia ea. ³¹ Na rani tamlohi tatavera nona Jew matuvana la lo nanau Mary na lolo ima, la hitea mo malue vilavila, ale la lo ūromūromia vara mo vano vara i tangtangi na papa, ale la usuria.

³² Mary mo vano hin jara atu Iesu mo lo toho ea. Mo hitea, ale vahatea mo papaohi na palona, mo verea mara, “Moli, vara o pa lo toho nike, tavaiku i pa sopo mate.”

³³ Na rani Iesu mo hite Mary tolu na tamlohi tavera nona Jew la lo tangtangi, enia mo rongo mo sati hajavua. ³⁴ Iesu mo usia mara, “Ka tau na tarapena epu?” La ūrāramia lara, “Moli, o mai vara o pa hitea.”

³⁵ Iesu mo tangi. ³⁶ Ale tamlohi tavera nona Jew lara, “Ka hitea, mo ūromia mo tavera.”

³⁷ Pani tatuara la verea lara, “Enia mo vai na vuso mo mele kilau, pani mo sopo eři vai Lazarus vara i sopo mate mata sava?”

³⁸ Iesu mo mele ūromia hajavua, ale mo vano na papa, enia papa matea la kuresi na yatu matea mo lo turuhoro na mataruana. ³⁹ Iesu mo verera mara, “Ha kuresi nařihi vatu sei!” Pani Martha mo verea mara, “Tija, engko ko levosahia vara nahapani enia havati pongin Lazarus, ale i pa ponaha.”

⁴⁰ Iesu mo ūrāramia mara, “Na verea isamim moiso, vara ha rasuau, ha pa hite na hina ūruřuhu matea na suihan God.”

⁴¹ Ale la kuresi nařihi vatu atu, ale Iesu mo tařa sahe na tuka mo usiusi mara, “Tamaku, na vere meje isam matan ko lo tapurongo isaku. ⁴² Na levosahia vara

tarea ko lo ūrārami na noku usiusi, pani na vere hinau nike, vara la tamlohi nike la pa rasua vara engko ko ūruleau.”

⁴³ Iesu mo usiusi moiso, mo ulo mara, “Lazarus, o malue!” ⁴⁴ Tamlohi atu mo mate moiso, mo malue hin papa atu. Li-mana peresi na palona la pesira na tavalu ruru lulu, la tavu na nahona na tavalu ruru matea.

Iesu mo vere isana tamlohi mara, “Ha uli nařihia vara i malue.”

*La Hatihī Vara La Vilimatei Iesu
(Mt 26.1-5; Mk 14.1-2; Lk 22.1-2)*

⁴⁵ Ale Jew matuvana la lo toho peresi Mary atu, la rasu Iesu matan la hite hinau atu mo vaia ea. ⁴⁶ Pani tatuara la vano la hite na Pharisēe, la vereuli na sava Iesu mo vaia isara. ⁴⁷ Moiso moli mata p̄ris tolu na Pharisēe la tovi na matavuhi matea, la verea lara, “Ra pa vai na sava? Tamlohi nike, mo vai na matamata tavera matuvana. ⁴⁸ Vara ūra sopo horoa nakerihi, tamlohi tari la pa tau na nora rasua hinia. Vara i sohena mara Rome la pa mai la komo na nořa Temple tapu peresi na nořa tamlohi jara mo isoiso.”

⁴⁹ Vonara matea, Caiaphas enia p̄ris aulu hin tauni atu mo verea mara, “Ka sopo levosahi te hinau hatea, ⁵⁰ ka sopo hitevosahia vara i pa mele ūruhū vara tamlohi matelete purongo i mate matan la tamlohi tari nike, mo jeu haratu vara tamlohi jara mo isoiso hin Israel la mate!”

⁵¹ Caiaphas mo sopo vere hinau sei hasena, pani matan hintauni atu enia p̄ris aulu, ale mo lo retimangovia sohen God mo opoia vara Iesu i pa mate mata tamlohi jara tari hin Israel, ⁵² pani i pa sopo mate mata tamlohi jara tari hin Israel hasena, i pa mate mata tamlohi tari sei la natun God na sava jara la lo toho ea la pa mai matea. ⁵³ Mo tapulo hin pongi atu vao atu la hatihia vara la pa vilimatei Iesu.

⁵⁴ Matan hinau atu Iesu mo sopo mele hahau na jara tavera isana tamlohi tatavera nona Jew, pani mo vano asau na taon Ephraim enia mariviti na jara hasetoho tavera atu, ale mo lo toho atu peresi na nona tamlohi usuri.

⁵⁵ Rani Passover nona Jew mo lo mai mariviti. Tamlohi matuvana la lo toho ūralihi hin jara atu la vano Jerusalem matan

vara la vai na nora posposi mata onehi na hinahinau mata Passover. ⁵⁶ La lo ale Iesu ūralihi ea. Ale hin rani atu la lo toho na Temple la lo usiusira lara, “Avei, ka levosahia vara i pa mai mata hanhani tavera mata Passover teni i vono?”

⁵⁷ Haratu la moli mata p̄ris tolu na Pharisēe la verea isana tamlohi lara vara la hite Iesu, la pa vereulia isara vara la pa taurilatia.

12

*Mary Mo Rengi Na Hasori Isan Iesu
(Mt 26.6-13; Mk 14.3-9)*

¹ Rani mo limarave mo lo toho vara i tikeli na rani Passover. Iesu mo mele sivo Bethany, taon atu sei Iesu mo lo vai Lazarus mo lo turu na mateia ea. ² La tatamahu na hanhani matan Iesu. Martha natu, mo lo julai na hanhani, ale Lazarus enia vonara matea hin la haratu la lo sakele peresia atu. ³ Ale Mary mo lavi na potele hasori ūruhū matea sohena sope lita matea, ale volina mo tavera jea, ale mo rengia na palon Iesu, ale mo kamotira na vuluna, ale ponana ūruhū mo marivisi na lolo ima. ⁴ Tamlohi usuri non Iesu matea, hijana Judas Iscariot mo lo toho atu. Enia natu, i pa turuposi hin Iesu hitahu, ale mo usia mara, ⁵ “Mata sava mo sopo hařehi hasori sei matan volina mo tataholo na voli tamlohi voko mata tauni matea, ale mania atu i pa eři vano isana tamlohi la tilavono?” ⁶ Pani Judas mo sopo ūromi na tamlohi tilavono matan enia mo lo lavi na nora tanga mania, ale enia tamlohi vananaho matea, ale hin te rani i pa vananaho hinia.

⁷ Iesu mo verea mara, “Ha sopo hitesatia! Enia mo tauhasehia mata noku tavun.

⁸ Tamlohi tilavono la lo toho peresi kamim tarea, pani enau a pa sopo toho peresi kamim tarea.”

Deut 15.11

Pharisee La Opoia Vara La Vilimatei Lazarus

⁹ Na rani vao tamlohi tavera nona Jew atu la levosahia vara Iesu mo lo toho atu. La sopo opoia vara la hite Iesu hasena, pani vara la hite Lazarus sohena matan Iesu mo vaia mo mele turu na mateia.

¹⁰ Ale moli mata p̄ris la tau na ūromira vara la pa vilimatei Lazarus, ¹¹ matan la hite na

Jew matuvana la lo rovo hinira, ale la lo tau na nora rasua hin Iesu.

Iesu Mo Unu Jerusalem

(Mt 21.1-11; Mk 11.1-11; Lk 19.28-40)

¹² Rani tinapua mo mele sahe, vao tavera la lo mai Jerusalem mata hanhani tavera mata Passover. Pa vao atu la rongoa vara Iesu i pa mai matan hanhani tavera atu moiso, ¹³ la lavi na rau viniu, ale la vano vara la tapaia. La lo ulo lara, ‘Moli, o juri nakerihi!’

‘God o leruhu hin haratu mo lo mai na hijan Moli God!’ ^{Psa 118.26}

‘God o leruhu na Supe non Israel!’

Zep 3.15

¹⁴ Iesu mo vilei na natu donki matea, ale mo vele hinia sohena Retiulia mo verea,

¹⁵ ‘Ha sopo matahu

kamim tamlohi hin Zion,*
Nomim supe mo lo mai
na harī natu donki.’

Zec 9.9

¹⁶ Tiroma, tamlohi usuri non Iesu la sopo levosahia, pani la pa mele ūromūmia hin pongi atu mo turu na nona mateia mo sahe na tuka. Hinau tari la masese la tataholo hin haratu la ulia na Retiulia vara la pa sohena.

¹⁷ Ale vao atu la pa lo toho peresi Iesu hin rani atu mo tovi Lazarus mo malue na papa, ale la lo sorahia. ¹⁸ Ale vao atu la tapaia matan la rongo matamata tavera atu mo lo vaia. ¹⁹ Pani Pharisee la lo vereverera hinia lara, “Ra sopo eři vai te hinau hatea! Tamlohi tari na varama la lo usuri Iesu.”

Mara Greek Hai La Mai Isan Iesu

²⁰ Mara Greek hai tolu na tamlohi la sahe Jerusalem vara la lotu na rani mata Passover. ²¹ Philip sohena, mara Bethsaida na jara Galilee mo lo toho ea. Mara Greek la vano isana la usia lara, “Tapala, kama opoia vara kama tapai Iesu.” ²² Philip mo verea isan Andrew, ale enira tupra rua la vano isan Iesu la verea isana.

²³ Iesu mo ūramaria mara, “Pongi tataholo mo pala vara Natun Tamlohi i lavi na nona oolo lo tavera. ²⁴ Vara ūruhu na verea isamim, vara piri wit matea i sopo jovi na lepa i mate atu, i pa sopo ulua, i pa lo toho atu purongo, pani vara i jovi i mate na

lepa i pa eři ulua, ale i pa sile na vuana i marivi. ²⁵ Vara tea mo opoi na maurina, i pa vaitihai. Vara i ūruhu na maurina nake na varama enia i pa taurilatia pongi tui tui. ²⁶ Vara tea mo volitusi noku enia i pa usuriau. Noku volitusi i pa toho peresiau na sava jara enau na lo toho ea. Vara tea mo volitusi Tama i pa sile na oolo lo isana.

²⁷ Nake ūromiku mo puhoni hajavua. A pa vere na sava? A pa vere vara, ‘Tamaku o juriau hin rani ūlangi sei?’ Pani mo vono, matan na lo mai na varama matan rani ūlangi sei. ²⁸ Tamaku, o tahe na hijam aulu.” Ale leo matea mo tai na tuka mo verea mara, “Enau na pete tahe na hijaku aulu moiso, ale a pa mele tahea aulu.” ²⁹ Vao tamlohi la lo turu atu la rongo leo atu, pani hai la lo ūromūmia vara mo piri, hai la lo ūromūmia vara angelo matea mo lo retireti isan Iesu.

³⁰ Moiso, Iesu mo verera mara, “Leo atu mo sopo mai matakua, pani matamim.

³¹ Nake aria varama mo lo tapulo. Nake God mo tapulo vara i tipahi tamlohi tavera sasati atu matan varama nika.[†] ³² Hin pongi atu vara la taheau aulu na lepa, a pa vai na tamlohi tari vara la mai isaku.”

³³ Iesu mo lo vereulia vara i pa mate sohena sava.

³⁴ Vao tamlohi atu la verea isana lara, “Retiulia mo vujangia vara Křisto atu enia i pa toho jejeu. Mo sohena sava natu, engko ko lo verea vara la pa tahe Natun Tamlohi aulu? Hare natu, enia Natun Tamlohi atu ko lo verea?” ³⁵ Iesu mo ūramaria mara, “Malarani i pa toho isamim mata makomo rani purongo. Ha hahau na merana matan nake mo lo rani, pani haratu mo lo hahau na ūroha i pa sopo levosahia na sava jara mo lo vano ea. ³⁶ Ha rasu na malarani nake mo lo toho peresi kamim, ale kamim ha pa natu malarani!” Hitahun la hinau atu Iesu mo lo verera, mo malue mo vano mo sopo mele hahau na naho vao.

Tamlohi La Rohu Hin Iesu

³⁷ Hina purongo vara Iesu mo vai na matamata tavera matuvana na nahora, pani tamlohi la sopo tau na nora rasua hinia, ³⁸ hinau sei mo masese sohena retireti non p̄ovet Isaiah mo verea mara,

* **12:15:** Zion: Zion enia Jerusalem. † **12:31:** moli mata varama: Iesu mo lo vere Tiapolo.

'Moli God, hare mo rasu na nomam reti?
 Hare mo levosahi na suiha tavera non
 Moli God?' ***Isa 53.1***
39-40 Matan retireti sei, tamlohi la sopo
 eři rasua, matan Isaiah mo mele verea
 mara,
 'Enia mo vaira la matavuso,
 ale mo vai na mapura la ūilangi
 matan vara la pa sopo eři kilau na matara,
 ale vara la sopo eři levosahi na ūomira,
 vara la pa posí mai isaku
 – matan vara enau a pa vaira la ūahu.' ***Isa 6.10***

41 Isaiah mo vere la hinau sei matan mo
 hitea vara Tamlohi Jujuri mo ūuhu ūuhu
 jea sohena sava, ale mo vereulia. **42** Hina
 purongo hin haratu, tamlohitauri na suiha
 nona Jew matuvana la rasua, pani matan
 la matahuni na Pharisee enira la sopo
 taviti na nora rasua hinia matan vara la
 verea, ale Pharisee la pa tipahira na nora
 ima lotu. **43** Matan enira la ūomromi na
 hasohaso nona tamlohi mo jeu hasohaso
 atu God mo lo silea.

Iesu Mo Retireti Isara

44 Pani Iesu mo ulo aulu mara, "Vara
 te tamlohi mo rasuau, mo sopo rasuau
 haseku, pani mo rasu haratu mo lo ūuleau,
45 haratu mo hiteau, enia mo hite haratu
 mo lo ūuleau. **46** Enau na mai na varama so-
 hena malarani vara tamlohi tari la rasuau,
 la pa sopo mele toho na ūrořha.

47 Enau mo sopo haratu sei i pa ari la
 haratu la sopo oloolo na noku vujangi.
 Enau na mai vara a juri na tamlohi hin
 varama nike, na sopo mai vara a sile na
 talai. **48** Pani na verea vara la haratu
 la lo ūru hiniā peresi na noku vujangi
 vara nora hina aria mo lo toho moiso, na
 sava na verera moiso enira natu, la pa
 arira na pongi hitahu. **49** Na sopo retireti
 haseku, pani na lo vere na sava Tama
 sei mo lo ūuleau mo retileu isaku vara a
 verea. **50** Matan na levensahia vara vua
 nona retileu sei la pa sile na mauri tui,
 ale na lo vere tataholoi na sava Tama mo
 vereau hinia."

13

Mo Vujangi Na Nona Tamlohi

1 Ale rani mo tiroma na rani Passover mo
 lo mai, Iesu mo levensahia vara nona rani
 mo mai vara i malue na varama, ale vara i

mele hilu sahe isan Tamana. Tarea mo lo
 opoi na nona tamlohi na rani mo lo toho
 hin varama nike, mo opoira mo tikeli na
 isoisona.

2 La pa lo hanhani na ravravi, Tiapolo
 mo posí na ūomin Judas natun Simon Iscar-
 iot, vara i turuposi hin Iesu.

3 Iesu mo levensahia vara Tama mo tau
 na hinau tari na limana, Iesu mo levensahia
 vara enia mo tai isan God, ale vara i pa
 mele sahe isan God, ale matan haratu,

4 Iesu mo turu hin hanhani atu, mo lavi
 nařhi na ruruna matea, ale mo lavi na
 ruru kamoti mo talihia na otiotina, **5** ale mo
 tau na wai na pesin tavera matea moiso mo
 tapulo hoje na palo nona tamlohi usuri, ale
 mo kamotira peresi ruru kamoti atu mo lo
 talihia hinia.

6 Pani hin masapa atu Iesu mara i hoje
 na palon Simon Peter, Peter mo usia mara,
 "Tija, mata sava ko opoia vara o hoje na
 paloku?"

7 Iesu mo ūaramia mara, "Nake engko ko
 sopo hitevosahi na sava na lo vaia, pani
 hitahu, o pa levensahia."

8 Peter mo verea mara, "Mo vono! Engko
 o pa sopo eři hoje na paloku hin te rani!"
 Iesu mo verea isana mara, "Vara a sopo
 hojeho, engko o pa sopo noku!"

9 Ale Simon Peter mo verea mara, "Tija, o
 sopo hoje na paloku purongo, pani limaku
 peresi na patuku sohena!"

10 Iesu mo ūaramia mara, "Isan la haratu
 la loloso moiso, epéra la vokevoke vevuhi
 moiso, la pa hoje na palora purongo. Ale
 kamim ka vokevoke moiso, pani vonamim
 matea mo vono."

11 Iesu mo levensahia vara hare natu i pa
 turuposi hinia hin haratu mo verea mara,
 'vonamim matea.'

12 Hitahun haratu Iesu mo hoje na palo
 nona tamlohi moiso, mo mele ru na nona
 ruru, ale mo mele sakele. Mo verea is-
 ara mara, "Ka levensahi na sava hinau
 na lo vaia matamim?" **13** Ka lo toviau
 nomim tija, ale nomim tamlohi tavera.
 Haratu ka verea mo tataholo, matan ka
 lo retivarařhu. **14** Vara enau na hoje
 na palomim, pani enau nomim tamlohi
 tavera, ale nomim tija, mo ūahu vara ha
 hojehoje na palomim isamim hasemim.
15 Enau na lo vai na tovongi matea isamim,

mo ūruhu vara ha vaia isamim sohen enau na vaia isamim. ¹⁶ Varaūruhu na verea isamim vara slev la sopo aulu na nora tamlohi tavera moiso vahařule la sopo aulu hin la haratu la lo ūrule. ¹⁷ Vara ka levosahi la hinau sei moiso, God i pa leřuhu hin kamim vara ha vaira.

¹⁸ Na sopo retireti hin kamim mo isoiso. Na levosahi la haratu na viřonira moiso, pani matan vara sava hinau sei Retitapu mo lo verea i masese, mo verea mara, ‘Tamlohi atu mo lo hanhani peresiau, mo pete turuposi hiniau moiso!’ *Psa 41.9* ¹⁹ Na lo vere kamim hinia tiroma moiso i pa masese matan hin pongi atu vara i masese ha pa rasua vara enau natu, haratu mo lo toho jejeu. ²⁰ Varaūruhu na verea isamim, vara tea mo lavi na noku vahařule, enia mo lo laviau, vara tea mo laviau, enia mo lavi haratu mo lo ūruleau.’

Iesu Mo Vereuli Na Sava I Pa Masese (Mt 26.20-25; Mk 14.17-21; Lk 22.21-23)

²¹ Iesu mo vere la haratu moiso, mo rongo ūromina mo puhoni hajavua, mo verea isana nona tamlohi mara, ‘Varaūruhu na verea isamim, vonamim matea i pa turuposi hiniau!’ ²² Nona tamlohi usuri la lo hase kilakilaura matan la sopo levosahia vara mo lo vere hare.

²³ Tamlohi usuri non Iesu matea mo olo vano na ūruman Iesu hin hanhani atu, ale tamlohi atu natu Iesu mo opoia, ²⁴ moiso Simon Peter mo tianaho na patuna isana vara i usia isan Iesu vara mo lo vere hare. ²⁵ Ale nona tamlohi usuri atu mo olo vano na ūruman Iesu, ale mo usia mara, ‘Tija, hare natu?’

²⁶ Iesu mo ūramaria mara, ‘A pa seri na tavalu pereti na wai pihī, ale a pa silea isana.’

Moiso Iesu mo seri tavalu pereti atu mo silea isan Judas, natun Simon Iscariot. ²⁷ Vahatea purongo, Setan mo unu hin Judas. Iesu mo verea mara, ‘Judas, o vano o vai na sava ko opoi vara o pa vaia vila!’ ²⁸ Te vonara mo sopo levosahi na ūramin reti atu Iesu mo lo verea isana. ²⁹ Pani matan Judas mo lo tauri na tanga mania, hai la lo ūromřomia vara Iesu mo lo ūrulea vara i voli te hinau mata hanhani, hai la lo ūromřomia vara Iesu mo ūrulea vara i sile te mania isan la haratu la tilavono. ³⁰ Judas

mo lavi tavalu pereti atu, ale mo malue vahatea. Mo ūrořoha moiso.

Retileu Paro

³¹ Judas mo vano moiso, ale Iesu mo verea mara, ‘Nake God mo lo tahe na hijan Natun Tamlohi, ale enia i pa tahe na hijan God matana. ³² Vara maurin Natun Tamlohi mo tahe na hijan God, God i pa hase tahe na hijana aulu vahatea. ³³ Na natuku, enau a pa mele toho peresi kamim mata makomo rani. Ha pa aleau, pani ha pa sopo eři hiteau. Na lo vere isamim sohen haratu na pete verea isana tamlohi tavera nona Jew moiso nara, ‘Ha pa sopo eři vano hin jara atu enau na lo vano ea’. ³⁴ Pani nake, na lo sile na retileu paro matea isamim. Ha pa opoipoi kamim hatehateahi sohen enau na lo opoi kamim. ³⁵ Vara ha opoipoi kamim, tamlohi tari la pa hitea la pa levosahia vara kamim ka noku tamlohi usuri varaūruhu.’

Peter Mo Retitauhi Isan Iesu (Mt 26.31-35; Mk 14.27-31; Lk 22.31-34)

³⁶ Simon Peter mo usia mara, ‘Tija, engko ko lo vano epu?’

Iesu mo ūramaria mara, ‘Nake o pa sopo eři usuriāu na jara na lo vano ea, pani hitahu o pa usuriāu.’

³⁷ Peter mo usia mara, ‘Tija, mata sava a sopo eři usuriho nakerihi? A eři mate matam!’

³⁸ Iesu mo usia mara, ‘O eři mate matakū? Varaūruhu na verea isam, engko o pa vunvuniau vaha tolu, moiso toa vari i pa tarere.’

14

Ra Pa Toho Peresi Iesu

¹ Iesu mo verea isana nona tamlohi usuri mara, ‘Ha sopo matahu! Ha rasu God, ale ha rasuau sohena, ² matan na iman Tamaku jara matuvana la lo toho ea. A pa sopo vereuli kamim hinia vara mo sopo varaūruhu. A pa sahe vara a tatamahuni na jara matamim. ³ Vara a tatamahunia i isoiso, a pa mele mai, a pa lavi kamim vara na sava jara na lo toho ea, kamim sohena ha pa toho ea. ⁴ Kamim ka levosahi na malelen jara atu enau na lo vano ea.’

⁵ Thomas mo verea mara, "Tija, kama sopo levosahi na jara ko lo vano ea. Kama pa levosahi na malele sohena sava?"

⁶ Iesu mo verea mara, "Enau malele vararuahu, enau pulo hina vararuahu, enau pulo mauri! Vara i sopo matak, te vonamim i pa sopo eři sahe isan Tama. ⁷ Vara ha pa lo levosahiau, ha pa levosahi Tama, ale mo tapulo nake ka levosahia, ale ka hitea moiso."

⁸ Philip mo verea isana mara, "Tija, o vujangi kamam hin Tama! Haratu purongo kama opoia."

⁹ Iesu mo ūramia mara, "Philip, na lo toho peresi kamim mo tuai moiso. Kamim ka sopo lo levosahia vara enau hare? Vara ka hiteau, ka hite Tama. Mo sohena sava natu, ka lo usia vara a vujangi kamim hin Tama? ¹⁰ Ka sopo rasua vara enau na matea peresi Tama, ale Tama enia mo matea peresiau? Sava na lo verea na sopo verea haseku. Tama sei mo lo toho hiniau, mo lo vai la nona matamata ūruhuahu atu.

¹¹ Ha rasuau hin haratu na verea vara Tama enia mo matea peresiau, ale enau na matea peresi Tama. Pani vara i vono, ha rasu mata vavahinau hasera purongo. ¹² Vararuahu na verea isamim, vara ha rasuau, ha pa eři vai na sava hinau na lo vaira. Ha pa vai na hinau la pa jeuau, matan nake na lo mele hilu sahe isan Tama. ¹³ Ha usiau, ale enau a pa vai na sava ka usia na hijaku matan vara Natuna i pa sile na oloolo i sahe isan Tama. ¹⁴ Vara ha usi te hinau na hijaku, a pa vaia."

Tanume Tapu I Pa Mai

¹⁵ Iesu mo verea isana nona tamlohi usuri mara, "Vara ha opoiau, ha pa vai na sava na lo retileu hinira. ¹⁶ Ale, a pa usi Tama vara i mele ūrule na meramim matea isamim, i pa toho peresi kamim tui tui, ¹⁷ meramim atu enia Tanumena, ale i pa vujangi na hina vararuahu hin God. Tamlohi na varama la pa sopo eři lavi na Tanumena matan la pa sopo eři hitea teni la levosahia. Pani kamim ka levosahi na Tanumena matan enia mo lo toho peresi kamim, i pa lo toho hin kamim.

¹⁸ A pa sopo rovo hin kamim sohena natu mařua, pani a pa mai isamim. ¹⁹ I pa sopo tuai, tamlohi varama la pa sopo

eři mele hiteau, pani kamim ha pa hiteau, ale matan enau a pa mauri, kamim ha pa mauri. ²⁰ Hin pongi atu ha pa levosahia vara enau na matea peresi Tama. Ha pa levosahia vara kamim ka matea peresiau, ale enau na matea peresi kamim. ²¹ Haratu mo lavi na noku retileu, ale mo oloolo hinira enia haratu mo opoiau, ale Tamaku i pa opoia, ale enau sohena a pa opoia, ale a pa hase vujangiau isana."

²² Moiso Judas, mo sopo Judas Iscariot, mo reti mo usia mara, "Tija, ūramin nom reti sei vara o pa vujangihio isamam, pani i pa sopo isana tamlohi varama, enia sava?"

²³ Iesu mo ūramia mara, "Vara tea mo opoiau, i pa oloolo hina noku reti, moiso Tamaku i pa opoia, kama pa mai isana, kama pa toho hinia. ²⁴ Pani haratu mo sopo opoiau, mo sopo oloolo hina noku reti. Sava reti ka rongo na verea, la sopo noku, pani non Tamaku sei mo lo ūruleau.

²⁵ Na lo vere kamim hin la hinau sei nake matan na pa lo toho peresi kamim. ²⁶ Pani Tuetueni ūruhu atu i pa mai, enia Tanume Tapu, Tama i pa ūrulea i lavi na jaraku, enia i pa vujangi kamim na hinau tari, ale i pa vai kamim ha mele ūromromi na hinau tari na lo verea isamim moiso.

²⁷ Na lo sile kamim na tamata, noku tamata atu, enau haseku a eři silea, mo sopo sohena tamata varama nike i eři silea. Ale ha sopo ūromkaka, ha sopo matahu.

²⁸ Ka pete rongoa, na verea isamim moiso vara a pa vano, ale a pa mele mai isamim. Vara ka opoiau vararuahu, ha pa avulahi matan enau na lo sahe isan Tama, matan Tama enia mo aulu jea hiniau.

²⁹ Na lo vere la hinau nike tiroma isamim matan vara pongi atu vara i masese ha pa rasuau. ³⁰ A sopo eři retireti peravu isamim matan tamlohi tavera sasati matan varama nike mo lo mai, pani enia mo sopo lavi te suiha vara i aulu hiniau. ³¹ Pani vara tamlohi tari na varama la pa levosahia vara enau na opoi Tamaku, na lo vai na sava enia mo retileu vara a vaira.

Ale ha turu, ūra malue!"

15

Iesu Enia Asi Grape Vararuahu

¹ Iesu mo verea isana nona tamlohi mara, "Enau asi grape vararuahu, ale

Tamaku enia tamlohi isa. ² Mo tai nařihi vevuhi na rangaku sei la sopo vua hiniau. Pani hin haratu la lo vua, mo jalo na rangana vara i pa namaha i mařivi. ³ Kamim ka vokevoke moiso mata sava na lo verea isamim moiso.

⁴ Ha toho hiniau, ale enau a pa lo toho hin kamim. Sohena ranga matea i sopo eři vua matan mo sopo sořotahi peresi na lahona, kamim ha pa sopo eři vua vara ha sopo toho hiniau. ⁵ Enau pulo asi grape, ale kamim rangarangana, pani vara kamim ha sořotahi isaku, ale enau a lo sořotahi isamim, kamim ha pa vua i mařivi, pani vara enau a sopo toho isamim, ha pa sopo eři vai te hinau hatea. ⁶ Vara ha sopo toho hiniau, la pa pulahi kamim sohena ranga mahoa sei la takonahira, ale la pa sulira na hapu.

⁷ Vara ha lo toho hiniau, ale vara noku reti i lo toho hin kamim, sava ka usia Tamaku i pa vaia nomim. ⁸ Tamaku mo lo lavi na ooloolo tavera hin malele sei, vara ha vua tavera ka lo vujangia vara ka noku tamlohi usuri vararuhi. ⁹ Na lo opoi kamim sohen Tama mo opoiau. Ha toho na noku opoia. ¹⁰ Vara ha ooloolo na noku retileu, ha pa lo toho na noku opoia sohen enau na lo ooloolo na retileu non Tamaku, ale na lo toho na nona opoia.

¹¹ Na lo vere la hinau sei isamim vara ha pa avulahi tavera sohek. ¹² Noku retileu na lo verea isamim nakerihi, vara ha opoiopoi kamim sohen enau na lo opoi kamim tiroma mo mai nake. ¹³ Mo sopo tea nona opoia i jeu haranike: vara tea i tau na maurina mata tapalana. ¹⁴ Ale kamim ha pa tapalaku vara ha lo ooloolo na sava na retileu hinau isamim. ¹⁵ Slev la sopo levosahia vara nora tamlohi tavera mo lo vai na sava, ale enau na sopo mele retireti isamim sohena noku slev. Na tovi kamim tapalaku matan enau na vere vevuhi na sava Tamaku mo vereau hina.

¹⁶ Kamim ka sopo viřoniau, pani enau na viřoni kamim matan vara ha pa vano ha vua na vua sei i pa lo toho jejeu. Ale sava hinau ka usia na hijaku, Tamaku i pa silea isamim. ¹⁷ Ale na retileu isamim vara ha opoiopoi kamim.”

Tamlohi Varama La Pa Rohu Hiniho
Iesu mo verea mara:

¹⁸ “Vara tamlohi varama la řohu hin kamim, ha řomřomia vara la řohu hiniau tiroma. ¹⁹ Vara kamim tamlohi non varama, tamlohi hina la pa opoi kamim. Pani kamim ka sopo tamlohi non varama, mo vono. Enau na viřoni nařihi kamim vara ha pa tau na varama na hařimim, ale matan haratu, tamlohi non varama la pa řohu hin kamim. ²⁰ Ha řomřomi na sava na lo vere kamim hina moiso, ‘Slev mo sopo aulu i jeu na nona tamlohi tavera’.

Jn 13.16 Vara tamlohi la vailejilejiau, la pa vailejileji kamim. Vara la ooloolo na sava na verea, la pa ooloolo na sava ka lo verera.

²¹ Tamlohi la pa vailejileji kamim matan ka lo lavi na hijaku, ale matan la sopo levosahi haratu sei mo lo ruleau. ²² Vara a sopo lo sinai a verea isara, enira la pa sopo ori na hehe, pani nake, la sopo eři verea vara mo sopo te nora hehe.

²³ Haratu sei mo řohu hiniau, enia i pa řohu hin Tamaku. ²⁴ Vavahinau sei na vaira, mo sopo lo te tamlohi i vaira hin te rani, vara la sopo lo hiteau a vai la hinau atu, la pa sopo ori na hehe, pani la hiteau na vai la hinau atu, ale la řohu tavera hiniau peresi Tamaku. ²⁵ Pani matan sava la pete ulia na nora leu moiso i pa masese, ale mo verea mara, ‘Tamlohi la řohu tavera hiniau, pani mo sopo matan te hinau’. *Psa 35.19; 69.4*

²⁶ Pani a pa řule na Tuetueni řuhu matea i pa tai isan Tama i sinai isamim, enia Tanumena, i pa vujangi na hina vararuhi mo malue isan Tama, ale Tanumena i pa vereuliau. ²⁷ Ale kamim sohena, ha pa vereuliau matan kamim ka lo toho pere-siau na tapulo noku rani nike.”

16

Iesu Mo Vereulia Vara I Pa Mate

Iesu mo mele verea mara:

¹ “Na lo vere kamim hin la hinau nike, matan vara ha sopo kali hin te hinau.

² La pa tipahi kamim na ima lotu nona Jew. Ale pongi matea i pa mai, tamlohi la pa vilimatei kamim, ale matana, la pa řomřomia vara la lo vai na masalon God.

³ La pa vai hinau atu matan la sopo levosahi Tama teni enau. ⁴ Pani na lo vere hinau sei isamim nake, matan vara pongina i masese, ha pa řomřomi na sava na

lo vere kamim hinia moiso. Tiroma na sopo vere la hinau nike, matan enau na lo toho peresi kamim, ⁵ pani nake na lo sahe isan haratu mo lo ūruleau, ale mo sopo te vonamim i usiau hinia vara, ‘Ko lo haipu?’ ⁶ Mata sava na verea isamim, ale ka rongo mo sati tavera. ⁷ Pani na verea isamim, i pa mele ūruhu isamim vara a malue. Vara a sopo malue, Tuetueni ūruhu atu i pa sopo eři mai vara i tueni kamim. Vara a vano a pa ūrule na Tanume Tapu i mai isamim.

⁸ Tanume Tapu i pa mai i tuvai na tamlohi na varama na sava mo hehe, ale na sava mo vokevoke, mata aria non God. ⁹ Ale i pa mai i tuvai na tamlohi na varama na sava mo hehe matan la sopo rasuau. ¹⁰ Ale i pa mai i tuvai na tamlohi na varama na sava mo vokevoke matan mauriku mo vokevoke, ale enau na lo sahe isan Tama ale kamim ha pa sopo eři mele hiteau nike, ¹¹ ale i pa mai i tuvai na tamlohi na varama mata aria non God matan mo pete ari haratu mo lo tauri na suiha non varama nike moiso.

¹² Na opoia vara a vere kamim na hinau matuvana, pani nakerihi i pa ūlangi vara ha pa levosahira. ¹³ Pani hin pongi atu vara Tanume Tapu i mai, enia i pa vu-jangi na hina vararuhu, ale i pa tiroma hin kamim na malele vararuhu tari vara ha pa levosahira. Tanume Tapu mo sopo vere na hinau enia hasena, pani enia i pa vere kamim purongo na sava mo rongoa isaku. Moiso enia i pa vai kamim ha levosahi na sava i pa masese hitahu. ¹⁴ Tanume Tapu i pa vuhesia isamim vara enau na ūruhu ūruhu jea sohena sava, i pa vaia sohen harihi: i pa lavi na noku reti vara i vuhesia isamim. ¹⁵ Hinau tari non Tama enia noku. Matan hinau atu na lo vere vara Tanume Tapu i pa lavi na noku reti, ale i vuhesia isamim.

Avulahi I Pa Mai

¹⁶ I pa sopo tuai ha pa sopo mele hiteau, pani hitahun haratu, ha pa mele hiteau.”

¹⁷ Nona tamlohi usuri la lo vereverera hinia lara, “Raramin nona reti sei isařa enia sava sei enia mara, ‘I pa sopo tuai ha pa sopo hiteau, pani hitahun haratu ha pa mele hiteau mata makomo rani!’ teni ‘matan a pa mele sahe isan Tama?’” ¹⁸ Nona tamlohi usuri la lo mele usiusira hinia lara, “Raramin nona reti sei, ‘I pa

sopo tuai!’ enia sava ūa sopo levosahi na sava mo lo verea.”

¹⁹ Iesu mo levosahia vara la opoia vara la usia hin la hinau sei, ale mo verea isara mara, “Avei, ka lo usiusi kamim na ūramin noku reti sei, ‘I pa sopo tuai ha pa sopo hiteau, pani hitahun haratu, ha pa mele hiteau?’” ²⁰ Vararuhu na verea isamim vara ha pa tangi, moiso ha pa rongo i sati, pani tamlohi na varama la pa avulahi. Ha pa rongo i sati, pani hitahu ha pa avulahi. ²¹ Vara hařai mariviti vara i lavilavi, enia i pa rongohaji tavera, pani vara mo isoiso, mo ūromaliho na rongohaji, ale mo avulahi matan mo vasusui na natirihī matea mo pala na varama. ²² Ale sohen haratu nake ūromimim la lo sati, pani hitahu hin pongi atu vara a mele hite kamim, ha pa avulahi tavera, ale tea i pa sopo eři posa na nomim avulahi. ²³ Vara pongi atu i masese, ha pa sopo eři mele usiau hin te hinau. Vararuhu na verea isamim vara Tama i pa sile kamim na sava hinau ka usia na hijaku. ²⁴ Mo tikeli nake ka sopo lo usi te hinau na hijaku, pani nake, ha pa usia na hijaku moiso i pa mai isamim matan vara ha pa avulahi jea.

²⁵ Na lo retireti na titieu isamim matan vara i vuhesi na sava na lo verea. Pani pongi matea mo lo mai, a pa vere tataholoi kamim hin Tama, ale a pa sopo mele titieu sohen haranike. ²⁶ Hin pongi atu enau a pa sopo mele usia nomim matan kamim hasemim ha pa usi na hinau isan Tama na hijaku. ²⁷ Matan Tama mo opoi kamim matan ka opoi, ale ka rasua vara enau na tai isana. ²⁸ Na tai isan Tama na mai na varama, pani nake na lo malue na varama vara a mele hilu a sahe isan Tama.”

²⁹ Nona tamlohi usuri lara, “Nakerihi ko reti tataholo isamam, ko sopo titieu.

³⁰ Nake natu, kama levosahia vara engko ko levosahi na hinau tari, ale te i sopo eři usi te retiusia isam. Nake kama rasua vara engko ko tai isan God.”

³¹ Iesu mo ūramira mara, “Kamim ka rasaua vararuhu? ³² Rani matea mo lo mai, ale nake mo masese moiso vara kamim mo isoiso ha pa rovorovo, enau haseku a pa lo toho, pani Tamaku i pa lo toho pere-siau, ale a pa sopo toho haseku. ³³ Na lo vere hinau sei isamim matan vara tamata

i pa toho na mapumim matakua. Nake ka lo toho na varama kamim ha pa lavi na rani ūilangi, pani ha lo ūomūilangi matan enau na jeu na noku meresahi na varama moiso."

17

Usiusi Non Iesu Isan Tamana

¹ Iesu mo vere la hinau sei moiso, mo tařa sahe aulu na tuka, mo verea mara, "Tamaku, pongi atu mo mai vara o tahe na hijan Natum aulu matan vara Natum i eři tahe na hijam aulu. ² Ale matan ko sile na suihā isaku moiso vara a aulu na tamlohi tari matan vara a pa sile na mauri tui isan la haratu ko lo sileau hinira. ³ Mauri tui enia vara la levosahihō vara engko hasem God vararuhu, ale vara la levosahihō Iesu Kristo, haratu ko lo ūrulea. ⁴ Enau na vu-jangi la tamlohi nike na varama vara nom ūruhuřuhu mo sohena sava matan na vai vevuhi na hinau tari ko lo taura isaku vara a vaira. ⁵ Nake Tamaku, o mele taheau na noku suiha aulu peresiho na tuka i sohen haratu mo lo toho isaku tiroma varama mo sopo lo tapulo.

⁶ Enau na vereulihō isan la tamlohi atu, engko ko lo sileau hinira na varama vara la pa levosahihō. Enira nom, moiso ko sileau hinira, ale la lo oloolo na nom reti. ⁷ Nake, la levosahihō vara hinau tari ko sileau enira la tai isam. ⁸ Na vere na noku tamlohi moiso na sava ko lo vereau hinira vara a verea, ale la lavia. La levosahihō mo ūruhu vara enau na tai isam, moiso la rasua vara engko ko ūruleau na mai. ⁹ Na lo usiusi matara, pani mo sopo matan la haratu non varama. Noku tamlohi enira nom, ale na lo usiusi matara matana. ¹⁰ Hinau tari noku, enira nom moiso, ale na lavi na oloolo tavera matan la lo vereuliau.

¹¹ I pa sopo tuai enau a sopo mele toho na varama, pani enira la lo pa toho na varama, ale enau na lo mai isam. Tama Tapu o pa tingira hin suiham atu ko lo silea isaku. Moiso la pa matea peresira hasera sohen engko peresiau ūa matea. ¹² Hin rani atu na lo toho peresira, na lo tingira hin suiha atu ko lo sileau hinia. Na lo kilaura, ale mo sopo te vonara hatea i tihai, pani tamlohi atu matea purongo sei mo lo vano na komo matan vara Retitapu i pa masese.

Psa 41.9

¹³ Na lo mai isam, pani na lo vere la hinau nike nake na lo toho na varama vara noku tamlohi, la pa eři avulahi tavera soheku matana. ¹⁴ Na silera na nom reti moiso, ale tamlohi non varama la ūahu hinira, matan enira la sopo tamlohi non varama, mo soheku, la ūahu hiniau matan enau na sopo non varama.

¹⁵ Tata, na sopo usiho vara o lavi nařihi na noku tamlohi na varama, pani vara o tingira matan Tiapolo. ¹⁶ Enira la sopo non varama, sohen enau na sopo non varama. ¹⁷ O tapuhira na retivarařuhu, nom reti enia vararuhu. ¹⁸ Enau na lo ūulerā vara la vano isana tamlohi ūalihi na varama sohen engko ko ūruleau. ¹⁹ Enau na tapuhiau haseku vara a vai na masalom purongo, matan vara la pa eři hitevosahia, ale la mai tamlohi non retivarařuhu.

²⁰ Enau na sopo usiusi matan la noku tamlohi nike hasera, pani na lo usiusi mata tamlohi tari sei la pa tau na nora rasua hiniau na sava la pa lo verea matakua. ²¹ Na opoia vara enira mo isoiso la pa matea peresihira hatehateahi, sohen enau na lo matea peresiho, ale engko ko matea peresiau. Na opoia vara la pa matea peresirā, matan vara tamlohi hin varama nike, la pa rasua vara engko ko ūruleau.

²² Suiha ūruhuřuhu atu ko lo sileau hinia, na pete silea isara moiso, matan vara la pa matea sohen enřa ūa matea, ²³ enau hinira, ale engko hiniau, matan vara la pa matea na hinau tari, matan vara tamlohi na varama la eři levosahihō vara engko ko ūruleau, ale ko lo opoira sohen ko opoiau.

²⁴ Tata, na opoia vara la haratu ko lo sileau hinira, la pa toho peresiau na jara na lo toho ea, matan vara la pa eři hite noku oloolo tavera atu sei ko lo sileau hinia, matan ko opoiau hin pongi atu varama mo sopo lo toho. ²⁵ Tata ko vokevoke, hina purongo vara tamlohi na varama la sopo levosahihō, enau na levosahihō, ale la tamlohi nike la levosahihō vara engko ko ūruleau. ²⁶ Ale enau na verea isara vara engko ko sohena sava, ale a pa mele verea isara vara opoia atu ko opoiau hinia, i pa toho isara, ale enau a pa toho hinira."

18

La Turuposi Hin Iesu

(Mt 26.47-56; Mk 14.43-50; Lk 22.47-53)

¹ Iesu mo usiusi mo isoiso, enia tolu na nona tamlohi usuri, la vano roto na Vakoan Kidron na talu olive matea atu. ² Tarea Iesu tolu na nona tamlohi usuri la lo pulutahi ea, ale Judas haratu mo lo turuposi hin Iesu mo levosahi jara atu.

³ Ale Judas mo vano hin talu olive atu peresi na tamlohi vuro hai nona mara Rome peresi na police mata Temple. Nora moli mata p̄ris peresi na Pharisee la ūlulerā. La lavi na hapu jilangi, lamu peresi na hinau mata valum, ale la mai isan Iesu. ⁴ Iesu mo pete levosahi na sava i pa masese moiso, pani mo usi isara mara, “Ka lo ale hare?” ⁵ Ale Judas haratu mo lo turuposi hinia mo lo turu peresira atu. La ūramaria lara, “Kama lo ale Iesu mara Nazareth!”

Iesu mo verea isara mara, “Enau natu, haratu na lo toho jejeu!” ⁶ Vahatea purongo enira mo isoiso la turu juha hinia, ale la jovi na lepa.

⁷ Iesu mo mele usia mara, “Ka lo ale hare?”

La ūramaria lara, “Kama lo ale Iesu mara Nazareth!”

⁸ Iesu mo ūramira mara, “Na pete verea moiso vara enau natu. Vara ka lo aleau, ha tinařihi la tamlohi nike la vano!” ⁹ Mo verea sohena matan vara nona reti atu mo lo verea tiroma i pa masese mara, ‘Enau na sopo vaitihai te vonara hatea hin la haratu ko lo sileau hinira’. *Jn 6.39*

¹⁰ Ale Simon Peter enia nona sita vuro matea, ale mo reve nařihi sita vuro atu mo langa na matua pero slev non p̄ris aulu atu, hijan slev atu enia Malchus. ¹¹ Pani Iesu mo reti isan Peter mara, “O tau nařihi na nom sita vuro! Vara sava, ko ūrom vara enau a pa sopo eři lavi rani ūlangi sei Tama mo lo sileau hinia?”

La Lavia Mo Vano Isan Annas

(Mt 26.57-58; Mk 14.53-54; Lk 22.54)

¹² Ale vao tamlohi vuro matea nona mara Rome peresi nora commander peresi na police mata Temple nona Jew, la tauri-lati Iesu, ale la pesia. ¹³ La lavia mo vano tiroma isan Annas, enia palihan Caiaphas, p̄ris aulu hin tauni atu. ¹⁴ Caiaphas sei natu, mo lo verea isana tamlohi tatavera

nona Jew mara, “I pa mele ūruhu vara tamlohi matea purongo i mate mata tamlohi tari.”

Peter Mo Vunvuni Iesu

(Mt 26.69-70; Mk 14.66-68; Lk 22.55-57)

¹⁵ Simon Peter peresi na tamlohi usuri tinapua non Iesu matea, la usurira la lavi Iesu mo vano isan Annas. Tamlohi non Iesu atu enia mo levosahi mamahuni p̄ris aulu atu, ale mo usuri Iesu mo sivo na lolo rope iman p̄ris aulu atu. ¹⁶ Pani Peter mo lo toho na jingoima mariviti na mataruan rope atu. Pani pa tamlohi usuri non Iesu atu mo mele malue, ale mo vano mo retireti peresi hařarihi atu mo lo kilau na matarua rope. Mo tinařihi varā Peter i unu hin rope atu, ¹⁷ pani mo usia isana mara, “Avei, engko ko sopo vonara matea sei la lo usuri tamlohi atu?”

Peter mo ūramaria mara, “Enau mo vono!”

¹⁸ Slev peresi na police mata Temple la lo turu ūralihi na hapu matea la vaia na valaji hapu mata hamariri. Peter sohena mo lo turu peresihira mo lo marijo.

Pris Aulu Peresi Iesu

(Mt 26.59-66; Mk 14.55-64; Lk 22.66-71)

¹⁹ Na lolo ima, p̄ris aulu atu mo lo usi Iesu mata nona tamlohi usuri peresi na nona vujangi. ²⁰ Pani Iesu mo ūramaria mara, “Enau na lo retireti na jara tavera isana tamlohi na varama. Ale tarea, enau na lo vujangi na lolo ima lotu peresi na Temple sei Jew la lo pulutahi ea. Na sopo vere te hinau hatea vara tamlohi la sopo rongoa. ²¹ Mata sava ka lo usiau hinia? Ha usi la haratu la lo rongoau, la levosahi na hinau na lo verea!”

²² Iesu mo vere reti atu moiso police mata Temple matea mo vojaia, ale mo verea mara, “Ko ūrom vara o eři ūrami na p̄ris aulu matea sohen haratu?”

²³ Iesu mo ūramaria mara, “Vara na vere te hinau mo sopo tatahola o verea! Pani vara mo vono, mata sava ko vojaiau?”

²⁴ Ale Annas mo ūrule Iesu mo vano isan Caiaphas, p̄ris aulu, pani la sopo lo uli nařihi na asihai hinia.

Peter Mo Mele Vunvunia

(Mt 26.71-75; Mk 14.69-72; Lk 22.58-62)

²⁵ Haratu mo lo vano, pani Simon Peter mo pa lo turu mo lo marijo, ale la usia isana

lara, "Avei, engko ko sopo nona tamlohi usuri matea?"

Peter mo mele vunvunia mara, "Enau mo vono!"

²⁶ Slev matea non přis aulu tahisan haratu sei Peter mo lo langa na perona, mo usia mara, "Mo sopo engko sei na hiteho na talu olive peresi tamlohi nike?"

²⁷ Peter mo mele vunvunia, ale vahatea purongo, toa vari matea mo tarere.

Iesu Mo Turu Na Nahon Pilate (Mt 27.1-2, 11-14; Mk 15.1-5; Lk 23.1-5)

²⁸ Na ūalavuho jea natu, la lavi Iesu la malue na iman Caiaphas, la vano na imatavera matea nona tamlohi tavera nona mara Rome. Pani la lo sasaovi na jingoima, matan la rasua vara tea i unu, enia i pa lumiha na nahon God, ale enia i pa sopo eři hani na Passover.*

²⁹ Pilate mo malue mo usia mara, "Tamlahi nike, mo vai na sava hina sati?"

³⁰ La ūaramia lara, "Ko ūrom vara kama pa lavi tamlohi akerihi i mai isam vara enia mo sopo vai te hina hehe?"

³¹ Pilate mo verea isara mara, "Ha lavia, ale ha pa aria i usuri na nomim leu."

Vao tamlohi nona Jew atu la ūaramia lara, "Pani nomim leu mo tapuhoro kamam vara kama eři tau te tamlohi na mateia." ³² Ale sohen Iesu mo verea moiso vara nona mateia i pa sohena sava, mo lo mai vara i masese. *Jn 3.14; 12.32*

³³ Pilate mo mele unu na lolon patu imatavera atu, ale mo tovi Iesu mo vano isana, ale mo usia isana mara, "Avei, engko natu, Supe nona Jew?"

³⁴ Iesu mo ūaramia mara, "Retiusia sei mo tai isam hasem teni tea la verea isam matak?"

³⁵ Pilate mo ūaramia mara, "Sava? Vara sava, enau Jew matea? Tahisam tataholo peresi na přis aulu, enira natu, la laviho ko mai isaku. Ko vai na sava mo sati?"

³⁶ Iesu mo ūaramia mara, "Jara atu na lo tauri na suiha hinia mo sopo non varama nike, vara i sohena, noku tamlohi la pa valum moiso matan vara la turuhoroau vara a pa sopo eři vano na lima tamlohi tatavera nona Jew, pani mo vono, jara atu

na lo tauri na suiha hinia mo sopo non varama nike."

³⁷ Pilate mo verea mara, "Varařuhu, engko Supe matea?"

Iesu mo verea isana mara, "Engko ko lo verea vara enau Supe matea. Enau na vora hin varama nike matan vara a vere na retivarařuhu. Ale la haratu non varařuhu la levosahi na leoku."

³⁸ Pilate mo usia isan Iesu mara, "Retivarařuhu enia sava?"

Iesu Mo Vano Na Mateia (Mt 27.15-31; Mk 15.6-20; Lk 23.13-25)

Hitahun haratu Pilate mo mele malue mo verea isan la Jew atu mara, "Tamlahi nike, na sopo hite te hinau i ori hinia vara a sile na talai isana. ³⁹ Ale tarea na lo teri na tamlohi matea na nomim pongi Passover. Ale kamim ka opoia vara a teri na Supe nona Jew teni mo vono?"

⁴⁰ Ale la ūaramia la ulo lara, "Mo vono! Mo sopo enia. Kama opoi Barabbas." Barabbas enia tamlohi valvalum matea ale enia mo ūrohu na gavman non Rome.

19

Pilate Mo Sile Iesu Isara

¹ Ale Pilate mo lavi Iesu mo retileu vara, la tamlohi vuro atu, la pa rupia na asi maja.

² Tamlohi vuro la peri na rongorongo na asihai ngārangařiha la taua na patuna, ale la liho na ruru peravu majhina mo perpel nona tamlohi aulu na pilina. ³ La mai isana la kerehia lara, "Engko Supe nona Jew, avei?" Ale la tutuhi na nahona.

⁴ Pilate mo mele malue, mo verea isana tamlohi tatavera nona Jew mara, "Ka hitea, na lavia mo mai isamim, matan ha pa levosahia vara enau na sopo eři vilei te hinau i ori hinia vara i lavi na talai matana."

⁵ Ale Iesu mo malue peresi na ūongořongo la vaia na asihai ngārangařiha na patuna peresi na ruru peravu, majhina mo perpel. Ale Pilate mo verea isara mara, "Ka hitea, tamlohi atu nahai!"

⁶ Moiso na rani moli nona přis peresi na police mata Temple la hitea, la ulo lara, "Ha vosaea na talopeilopei! Ha vosaea na talopeilopei!"

* **18:28:** lumiha: hite: Num 9.9 Leu non Moses mo verea vara haratu mo tope na leu sei i pa saovi te vitu hatea tiroma moiso i pa mele eři hani na Passover.

Pilate mo verea mara, "Kamim ha lavia, ha vosaea na talopeilopei kamim hasemim! Enau na sopo vilei te hinau hatea vara mo ori hinia."

⁷ Tamlohi tatavera nona Jew atu la ūramia lara, "Kamam nomam leu matea mo verea vara i pa mate matan mo lo verea vara enia Natun God!"

⁸ Ale Pilate mara mo rongo reti atu mo mele matahu mo tavera, ⁹ moiso mo posi vara i mele unu hin nona patu ima tavera atu, ale mo hite Iesu, mo verea isana mara, "Engko ko tai epu?" Pani Iesu mo sopo ūramia.

¹⁰ Moiso Pilate mo verea mara, "Ko sopo ūramiau mata sava? Ko sopo levosahia vara ko lo toho na suiha limaku vara o pa materi teni la vosae ho na talopeilopei vara a oopia?" ¹¹ Iesu mo ūramia mara, "Vara God i sopo lo sileho na suiha, engko o sopo eři vai te hinau isaku, ale matan harihi, la haratu la sileau isam, nora hehe mo jeu na nom."

¹² Hitahun haratu Pilate mo tapulo vai hite vara i teri Iesu, pani vao atu mo mele ulo aulu lara, "Vara o teri tamlohi nike, engko ko sopo tapalan supe hin Rome! Vara tea i verea vara enia supe enia mo meresahi non supe hin Rome!"

¹³ Ale Pilate mara mo rongoa, mo tiroma hin Iesu la vano na jingoima, ale mo sakele na jara tamlohi ari la lo tovia, 'Jara Pūluthi la tiua na vatū' na leon tavytavuin Israel lara, 'Gabbatha'. ¹⁴ Nake mo livuha rani moiso na rani mo tiroma na rani Passover. Pilate mo verea isana vao Jew atu mara, "Ka hitea! Nomim Supe nahai!"

¹⁵ Vao atu la ulo aulu lara, "O vilimateia! O vilimateia! O vosaea na talopeilopei!"

Pilate mo usia isara mara, "Avei, ka oopia vara a vosae nomim Supe na talopeilopei?"

Moli p̄ris la ūramia lara, "Mo sopo te nomam Supe, pani Supe nona mara Rome enia nomam Supe!" ¹⁶ Ale Pilate mo tau Iesu na limara vara la pa vosaea na talopeilopei.

La Vosae Iesu Na Talopeilopei (Mt 27.32-44; Mk 15.21-32; Lk 23.26-43)

La tauri Iesu la tiroma hinia, ¹⁷ ale la lavi Iesu mo vano, ale enia mo hasena lavi na talopeilopei, mo malue la vano

hin jara atu la tovia vara, 'Jara Patusui Tamlohi' na leon tavytavuin Israel la tovia Golgotha. ¹⁸ Hin jara atu natu la vosaea na talopeilopei peresi na tamlohi tinapua mo rua na tavaluna, Iesu na livuhara.

¹⁹ Pilate sohena mo uli na reti matea mo vosaea aulu hin talopeilopei atu mo verea mara,

Iesu Mara Nazareth Supe Nona Jew

²⁰ Jew matuvana la evia matan jara atu la vosae Iesu hinia, mo lo toho na pahisan taon tavera atu, ale mo ulia na leo tavytavuin Israel peresi na leo mara Rome peresi na leo mara Greek. ²¹ Ale moli nona p̄ris la vano isan Pilate lara, "Mata sava ko ulia vara, enia Supe nona Jew? I pa mele ūruhvara o ulia vara, enia mo lo verea vara enia Supe nona Jew!"

²² Pani Pilate mo ūramira mara, "Sava na ulia moiso i lo toho sohena!"

²³ Tamlohi vuro la vosae Iesu na talopeilopei moiso, ale la asease na nona ruru isara tupu vati na sope ruru matea isara hatehateahi. Nona ruru tavera enia tavalu ruru matea purongo, mo sopo te sořosoro hinia, ²⁴ ale matana, la tamlohi vuro atu la vereverea isara lara, "Ra sopo ūrīaria. Ra pa roro matana, vara ūra pa hitea vara hare i pa lavia nona!" Haratu mo masese matan vara sava Retitapu mo verea i pa masese mara, 'La aseasehi na noku ruru, la roro mata noku ruru'. *Psa 22.18* Ale tamlohi vuro la vai na sava la hatihia moiso.

²⁵ Tinan Iesu mo lo turu na tavalu nona talopeilopei peresi vetavain tinana, peresi Mary atu naroun Clopas, ale Mary Magdalene. ²⁶ Moiso Iesu mo hite tinana peresi tamlohi usuri atu mo oopia mo tavera, mo verea isan tinana mara, "Tamlohi nike, nake enia natum." ²⁷ Ale mo verea isan tamlohi usuri atu mara, "Enia nake tinam." Mo tapulo hin rani atu, tamlohi atu mo lavia mo vano na imana.

Iesu Mo Mate (Mt 27.45-56; Mk 15.33-41; Lk 23.44-49)

²⁸ Hitahun haratu, Iesu mo levosahia vara mo vai vevuhi na nona vavahinau, ale vara na sava hinau Retitapu mo verea moiso vara i pa masese mo verea mara, "Na mařohu!" *Psa 22.15*

²⁹ Potele waen hohona matea mo lo toho atu, ale la ūrūni na susupaheu hin waen

hohona atu na ranga hyssop matea, ale la tahea mo sahe na jingona. *Psa*

69.21 ³⁰ Hitahun haratu Iesu mo inu waen atu mo verea mara, “Hinau tari mo isoiso!” Mo rautoho moiso mo mate.

La Sari Na Roron Iesu

³¹ Ale matan vara i mele rani sahe i pa Sabbath matea peresi na Passover, enia rani aulu matea nona Jew. Jew la sopo opoia vara la tarape atu la lo sevu na talopeilopei hin rani atu, ale la vano la usia isan Pilate vara la kame na palora vara la mate vila, ale la pa eři suira. ³² Ale tamlohi vuro la kame na palon la tamlohi mo rua atu sei la lo vosaera na talopeilopei na tavalun Iesu tiroma. ³³ Pani lara la mai isan Iesu, la hitea vara enia mo pete mate moiso, ale la pa sopo kame na palona.

³⁴ Pani tamlohi vuro matea mo urai Iesu na rorona, ale ūae peresi na wai mo malue. ³⁵ Kama levosahia vara hinau atu mo varauhu matan haratu mo lo hitea mo vereulia vara mo varauhu, ale naake kamim sohena, ha pa eři rasua. ³⁶ La hinau sei la masese matan vara Retitapu i pa masese sei mo verea mara,
‘Te sui epena hatea i pa sopo moti.’

Exo 12.46; Num 9.12; Psa 34.20

³⁷ Ale na jara tinapua na Retitapu mara, ‘La pa hitea hin haratu sei la urai na rorona na sari.’ *Zec 12.10; Rev 1.7*

La Tavuni Iesu

(Mt 27.57-61; Mk 15.42-47; Lk 23.50-56)

³⁸ Tamlohi usuri non Iesu matea, Joseph mara Arimathea, mo jarohi na nona rasua hin Iesu matan mo matahu vara tamlohi tatavera nona Jew la pa sile na talai isana, ale mo vano isan Pilate mo usia vara i tinařihi na tarapen Iesu vara i tavunia. Pilate mo tinařiha, ale Joseph mo sui nařiha na talopeilopei.

³⁹ Pa Nicodemus sei mo lo mai isan Iesu na vutepongi, mo usuri Joseph. Mo lavi na tanga hasori ūahu matea la tovia myrrh peresi na aloes la hoihoira jara matea, puhonina mo jeu 25 kilo. ⁴⁰ La tupra rua atu la tali ūalihi na tarapen Iesu na ruru lulu peresi na hasori sei Jew la lo tavuni na nora mate peresia. ⁴¹ Mariviti hin jara atu sei la vosae Iesu na talopeilopei ea, lovuhai matea la lavo na vipahai mata lakolako mo ūalihi mo lo toho atu. Ale papa vanu matea

la sopo lo tau te tarape tamlohi hinia mo lo toho ea. ⁴² La tau na tarapen Iesu hin papa vanu atu matan mo lo toho mariviti atu, ale la vaia vilavila matan enia rani atu nona Jew mata tatamahu mata Passover.

20

Iesu Mo Mele Turu

(Mt 28.1-10; Mk 16.1-8; Lk 24.1-12)

¹ Na nahonaho rani na ūalavuho na rani tiroma mata wik, mo pa lo ūrořoha, ale Mary Magdalene mo vano hin papa atu. Ale mo hitea vara la kuresi nařihi vatu tavera atu na matarua moiso, ale papa atu mo roi. ² Mara mo hitea sohena, mo maro mo mai isan Simon Peter peresi tamlohi usuri atu Iesu mo opoia, ale mo verea isara mara, “La lavi nařihi Tija na papa moiso! Kama sopo levosahia vara la taua epu!”

³ Peter peresi tamlohi usuri non Iesu tinapua atu la maro mata papa. ⁴ La maro pulupulu, pani tamlohi usuri non Iesu tinapua atu mo maro mo jeu Peter mo kakau na papa tiroma. ⁵ Mo rautoho mo riorio, ale mo hite te tavalu ruru la lo toho na lolo papa, pani mo sopo unu na lolo papa.

⁶ Hin rani atu Simon Peter mara mo kakau mo unu na papa, ale mo hite te tavalu ruru atu. ⁷ Ale enia mo hite tavalu ruru atu sei la lo tavu na nahon Iesu hinia, la pirura la lo toho hasera. ⁸ Tamlohi usuri non Iesu atu haratu mo lo kakau tiroma, mo unu na papa, ale mo hitea moiso mo rasua. ⁹ Hin rani atu, Peter peresi nona tamlohi tinapua atu, la sopo levosahia vara Retitapu mo verea vara Iesu i pa mele turu na mateia. ¹⁰ Ale la tamlohi usuri tupra rua atu la mele hilu la mule.

Mary Magdalene Mo Hite Iesu

(Mk 16.9-11)

¹¹ Mary Magdalene mo lo turu na jingoiman papa atu mo lo tangi, mo lo tangi ale mo rautoho mara mo riorio sivo hin papa atu, ¹² mo hite na angelo mo rua, la ru na ruru lulu la lo sakele na jara la tau na tarapen Iesu ea. Matea mo sakele na jara patuna, ale haruana mo sakele na jara palona. ¹³ La angelo atu la usi Mary lara, “Hařai, ko lo tangi mata sava?”

Mo ūaramira mara, "La lavi nařihi na tarapen noku Tija! Na sopo levosahia vara la taua epu."

¹⁴ Mary mo verea sohena mo isoiso mo posī mo hite Iesu mo lo turu atu, pani enia mo sopo hitevosahia vara enia Iesu. ¹⁵ Iesu mo usia mara, "Hārāi, mata sava ko lo tangi? Ko lo ale hare?"

Mary mo ūromi vara enia tamlohi lovuhai, ale mo verea mara, "Tapala, vara engko ko nařihi na tarapena, na opoia vara o vereau hinia, matan vara a eři vano a lavia."

¹⁶ Ale Iesu mo verea isana mara, "Mary!"

Mary mo posī mo verea isana mara, "Rabbi!" Ale ūramin 'rabbi' enia 'tija' na leon tavitavuin Israel.

¹⁷ Iesu mo verea isana mara, "O sopo tikeliau! Na sopo lo sahe isan Tata, pani o pa verea isana noku tamlohi vara enau na lo sahe isan Tamaku enia noku God, ale enia nomim God, ale Tamamim."

¹⁸ Mary Magdalene mo mele hilu vano mo verea isana nona tamlohi usuri vara mo hite Moli. Mo verera na sava Iesu mo verea isana.

Iesu Mo Pala Isara

(Mt 28.16-20; Mk 16.14-18; Lk 24.36-49)

¹⁹ Nona tamlohi usuri la matahuni na tamlohi tatavera nona Jew, ale na ravravin rani atu la pelatihoro na lolo ima matea. Vahatea purongo Iesu mo pala na livuhara, mo verea isara mara, "Tamata i toho isamim!" ²⁰ Ale mo vujangira na limana peresi na rorona, ale nona tamlohi usuri la avulahi tavera matan la hite Moli.

²¹ Iesu mo mele verea isara mara, "Tamata i toho isamim, enau na lo ūrule kamim sohen Tama mo ūruleau." ²² Hitahun haratu Iesu mo soro na maromarona isara mo verea mara, "Ha lavi na Tanume Tapu!" ²³ Vara ha ūromi tea na nona hehe, God i pa ūromia, pani vara ha sopo ūromi tea na nona hehe, God i pa sopo ūromia."

Thomas Mo Hite Iesu

²⁴ Hin rani atu Iesu mo pala isana nona tamlohi usuri, matea mo sopo toho peresi, enia Thomas la tovia 'Havo'.

²⁵ Ale tatua tamlohi usuri tinapua la verea isana lara, "Kama hite Moli!" Pani Thomas mara, "A pa rasua vara a hite na

matara nila na limana, ale a majohoi na limaku na mataran sari atu mo lo unu na rorona."

²⁶ Ale wik matea mo vano moiso, nona tamlohi usuri la lo mele pulutahi, pani nake Thomas mo lo toho peresira. La pelatihoro, pani Iesu mo pala mo turu na livuhara mo verea mara, "Tamata i toho isamim!" ²⁷ Ale mo verea isan Thomas mara, "O tau na pisum nike, ale o kilau usuri na limaku. O majohoi na limam na roroku. O isoiso na nom ūrom rua o rasu!"

²⁸ Thomas mo ūramia mara, "Engko noku Moli, engko noku God!"

²⁹ Iesu mara, "Thomas, engko ko rasua matan ko hiteau purongo teni mo vono? La haratu la sopo hiteau na matara, pani la tau na nora rasua hiniau, enira natu, la pa avulahi tavera."

Puku Nike

³⁰ Iesu mo vai na matamata tavera matuvana tinapua na naho nona tamlohi usuri, pani enira mo isoiso la sopo ulira hin puku nike. ³¹ Pani na uli la haranike matan vara ha pa eři tau na nomim rasua hin Iesu vara enia Křisto atu, Natun God. Vara ha tau nomim rasua hinia ha pa lavi na mauri varauhu.

21

Iesu Mo Pala Isara Galilee

¹ Hitahun haratu, sorasora matan Iesu mo vano sohen harihi: Iesu mo mele pala isana nona tamlohi usuri na pahisa tasi sei la tovia Tiberias teni Galilee. ² Simon Peter, Thomas la tovia 'Havo' enia Nathanael mara Cana atu Galilee la natun Zebedee, ale la vorai atu James enia John la lo toho atu peresi na nona tamlohi usuri mo rua tinapua. ³ Simon Peter mara, "Enau a sivo a tara maji!"

Tatuara lara, "Kama pa usuriho!" La vele na botira la sivo, pani hin vutepongi atu, la sopo tikeli te maji hatea.

⁴ Mo mele rani sahe na ūralavuho jea, Iesu mo lo turu na pahisa tasi, pani nona tamlohi usuri la sopo hitevosahia vara enia hare. ⁵ Iesu mo ulo mara, "La tapala, ka tikeli te maji teni mo vono?"

La ūramia lara, "Mo vono!"

⁶ Ale mo verea isara mara, “Ha tuhu na nomim tara na matua botimim, ale ha pa tikeli te maji!”

La vaia sohena, ale tara mo mařivi na maji la sopo eři mele revea i unu na boti.

⁷ Tamlohi usuri atu Iesu mo opoia, mo verea isan Peter mara, “Eh, Moli sei!” Ale Simon Peter mara mo rongo vara Moli natu, mo mele ru na nona ruru sei mo lo talihia na pangena vara mo lo revereve, moiso mo kue na tasi. ⁸ La tamlohi usuri tinapua non Iesu atu na lolo boti la pa lo sua reve na tara mo mařivi na maji mo lo usuri na boti na hřina. Ale jara atu la lo toho hinia mo mariviti 100 metre asau na jarauta.

⁹ Ale la hoso na jarauta, la hite te pereti ea, ale la hite te maji la lo toho na valaje hapu. ¹⁰ Iesu mo verea isana nona tamlohi usuri mara, “Ha lavi te maji sei ka pa taraira nakerihi i sinai.” ¹¹ Simon Peter mo mele vele na boti, ale mo reve hosohi na tara. Evi maji mo tikeli 153, ale maji tatavera nakonako, pani tara atu mo sopo mařari.

¹² Iesu mo verea mara, “Ha mai, ha hanhani!” Pani la matahu mo sopo te tamlohi usuri vonara hatea i usia vara enia hare matan la levosahia vara enia Moli. ¹³ Iesu mo lavi na pereti, ale mo asea isana nona tamlohi usuri, ale mo vaia sohena na maji. ¹⁴ Haranike enia hatolun nona pala isana nona tamlohi usuri hitahun rani atu, mo mele turu na nona mateia.

Iesu Enia Peter

¹⁵ Ale Iesu tolu na nona tamlohi lara la hanhani moiso, mo usia mara, “Simon natun John, engko ko opoiau mo jeu la tamlohi nike?”

Simon Peter mo ţaramia mara, “He'e Moli, engko ko levosahia vara na opoipo.”

Iesu mara, “O vahani na pulaku natu sipsip!”

¹⁶ Iesu mo mele usia vaha rua isan Peter mara, “Simon natun John, ko opoiau?”

Peter mo ţaramia mara, “He'e Moli, ko levosahia vara na opoipo.”

Iesu mo ţaramia mara, “O lo kilau na pulaku sipsip!”

¹⁷ Iesu mo mele usia vaha tolu isan Peter mara, “Simon natun John, ko opoiau?”

Nake, Peter mo rongo mo sati matan Iesu mo usia vaha tolu isana vara mo opoia.

Ale mo ţaramia mara, “Moli, engko ko levosahia na hinau tari. Ko levosahia vara na opoipo.”

Iesu mo ţaramia mara, “O vahani na pulaku sipsip.”

¹⁸ Varařuhu na vereho hinia, na pongi ko lo uluvou ko lo ruru hasem, ale ko lo vano na jara ko opoia, pani hin pongi atu vara o vajiah, o pa sohai na limam, ale tamlohi tinapua la pa lihoho, ale la pa tiroma hiniho o vano na jara engko ko sopo opoia.”

¹⁹ Iesu mo verea matan vara i vereulia vara Peter i pa mate sohena sava, ale sohena sava nona mate i pa tahe na hijan God aulu. Hitahun haratu Iesu mo mele verea isan Peter mara, “O usuriau!”

Iesu Mo Vujangi Peter

²⁰ Peter mo posí mo kilau sivo mo hite tamlohi usuri atu Iesu mo opoia mo lo usurira. Enia pa nona tamlohi usuri atu sei mo lo sakele na tavalun Iesu na hanhani Passover, ale mo lo usia vara, “Tija, hare natu, i pa turuposi hiniho?” ²¹ Ale Peter mo hite nona tamlohi atu mo lo usurira, mo usi Iesu hinia mara, “Moli, enia i pa sohena sava?”

²² Iesu mo ţaramia mara, “Vara enau a opoia vara enia i mauri i tikeli pongi atu a mele mai, mo sopo te nom hinau hinia, pani engko o usuriau!” ²³ Ale sorasora atu la sorahia vara nona tamlohi usuri atu i pa sopo eři mate, pani Iesu mo sopo verea vara i pa sopo mate, mo vono. Enia mo verea purongo isan Peter mara, “Mo sopo te nom hinau hinia vara enau a opoia vara enia i mauri i tikeli pongi atu a mele mai.”

²⁴ Enau sei nona tamlohi usuri atu, ale enau natu na lo vereuli la hinau sei. Na lo ulira vara ha pa eři levosahia vara enau na lo vereulia ale la varařuhu.

²⁵ Iesu mo vai na hinau tinapua matuvana, pani vara la uli vevuhira na puku, i pa sopo te masapa na varama matara.

Acts Vavahinau Non Tanume Tapu **Puku Nike**

Harihi enia tapala puku peresina Retiřuhu sei Luke mo ulia. Hinira Luke mo uli mamahuni na hinau tari Iesu mo lo vaira mo tikeli rani atu mo sahe na tuka (1.1-2). Na tapulo puku nike mariviti Iesu i pa sahe na tuka, ale mo retileu isana nona tamlohi mara la pa lo sasaovi Jerusalem mata Tanume Tapu (1.8).

Iesu mo sahe na tuka, ale vao kalesia la unu hin mauri atu God mo supe hinia na jara tari na varama hin pongi atu (2.1-35). Jew la lo ţomřomia lara enira hasera purongo la tamlohi non God, pani puku akerihi mo vujangia vara Tanumen God mo mai mata tamlohi ţořoha sohera.

Iesu mo pala isan Paul mata vironia vara i mai nona volitusi (9.1-22). Paul mo hahau mata lavi na Retiřuhu i vano isana jara tamlohi ţořoha ale tamlohi matuvana la mai la kalesia matana. Jew la opoia vara la pa vilimateia, pani na isoisona Paul mo lavi na Retiřuhu mo kakau Rome (28.16-31).

Hin Puku Akerihi

1. Retiřuhu Mo Ulua Jerusalem (1.1-8.3)
2. Tanumen Tapu Mo Jovi Hinira Judea Peresi Samaria (8.4-12.25)
3. Tiroma Hahau Non Paul (13.1-14.28)
4. Council Tavera Nona Kalesia Jerusalem (15.1-35)
5. Harua Hahau Non Paul (15.36-18.22)
6. Hatolu Hahau Non Paul (18.23-21.16)
7. La Taurilati Paul Jerusalem (21.17-23.22)
8. La Lavi Paul Mo Sivo Caesarea (23.23-26.32)
9. Paul Mo Sahe Rome (27.1-28.31)

Retitauhi Mata Tanume Tapu

¹ Theophilus, na noku puku tiroma na uli na hinau tari Iesu mo tapulo vaira, ale mo lo vujangira ² mo kakau hin rani atu God mo lavi nařihia, mo sahe aulu na tuka, sei tiromana mo sile na nona retileu hin Tanume Tapu isana nona vaharule sei mo viřonira.

³ Hitahun na nona rongohaji, mo mele hase vujangia isara vara mo mele mauri na malele tinatinapua matuvana hin la rani atu, mo ngavulu vati atu sei mo lo sorahi mauri atu God mo aulu hinia isara. ⁴ Tiroma sei mo pa lo toho peresira mo vereea mara, “Ha sopo malue Jerusalem pani ha lo saovi tako mata sava na pete vereea isamim moiso sei vara Tama i pa ţrule na Tanume Tapu, i mai isamim. ⁵ Matan John tamlohi paptijo mo paptijo na wai, pani i pa sopo tuai ha pa paptijo na Tanume Tapu.”

Iesu Mo Mele Sahe Na Tuka

⁶ Hin rani atu vaharule la lo toho peresi Iesu, tarea la lo usia isana lara, “Moli, engko o pa turu na nom suiha mata supe aulu hin Israel pangisa?”

⁷ Iesu mo vereea isara mara, “Mo sopo tinařihia vara ha levosahi na ranin hinau sei Tama hasena mo taua usuri na masalona. ⁸ Pani kamim ha pa lavi na suiha hin rani atu vara Tanume Tapu i mai hin kamim, ale kamim ha pa noku tuetueni hin Jerusalem, na jara tari Judea, Samaria, i tikeli na isoiso jara tari na varama.”

⁹ Hitahun la hinau atu mo lo verera, ale lara la pa lo kilaua, palona mo tinařihi na lepa mo lo sahe aulu, ale telangi matea mo lavi nařihia mo tihai na nahora, ¹⁰ ale la pa lo tařla la lo tařengia mo lo sahe na tuka, ale vahatea purongo, tamlohi mo rua la ru la ruru lulu jea la lo turu na pahisara, ¹¹ ale la vereea lara, “Mara Galilee, mata sava ka lo turu nike, ka lo kilau sahe na tuka? Iesu akerihi sei God mo lavi nařihia isamim, mo sahe na tuka, i pa mele sinai sohen harihi ka lo hitea mo lo sahe na tuka.”

Matthias Mo Lavi Na Jaran Judas

¹² Hin rani atu hinau atu mo masese vaharule la lo toho na Vuti talu Olive mariviti kilometre matea hin Jerusalem, ale la mele hilu la vano Jerusalem. ¹³ Ale lara la unu Jerusalem, la vele sahe aulu na jara tinařpua matea hin ima atu sei la lo toho ea hin rani atu:

Peter
John
James
Andrew
Philip
Thomas

Bartholomew
Matthew
James natun Alphaeus
Simon sei, enia tamlohi matea mata valum mata jarana,
peresi Judas natun James.

¹⁴ Enira mo isoiso la tau na ūromira mata usiusi jara matea tolu na hārāi tinatinapua hai peresi Mary tinan Iesu tolu na tasin Iesu.

La Viñoni Matthias

¹⁵ Hin rani atu, Peter mo lo turu na livuhan la tamlohi rasua atu, ale vao atu mariviti i ngav sangavulu ngavulu rua (**120**) la lo pulutahi hin jara atu, ale mo vereea isara mara, ¹⁶ “La vorai, sava Retitapu mo vereea vara i pa masese isan Judas, Tanume Tapu mo vereea tiroma moiso na jingon supe David mara, enia i pa tiroma hin la haratu la pa taurilati Iesu. ¹⁷ Matan enia mo viñonia peresiña, ale enia vonaña matea na noña vavahinau.

¹⁸ Ale tamlohi akerihi mo voli na lepa matea na voli nona hehe. Mo vele mo sahe na pesapesa, ale mo jovi patuna mo tiroma mo vujahi ūrāhi na pangena, ale tinena tari la mařava. ¹⁹ Mara Jerusalem tari la rongoa, ale la tau na hijan jara atu vara Akeldama: na leora mo vara, ‘Lepa Mata Rae’.

²⁰ Matan David mo ulia na nona puku na psalm mara, ‘Ha tinařihia vara jara nona toho i puru, ale i sopo tea i toho hinia’. **Psa 69.25** Ale mo mele vereea mara, ‘Ha viñoni te tamlohi tinapua i lavi na jarana’. **Psa 109.8**

²¹ Ale nakerihi, ūra pa mele viñoni te tamlohi tinapua hatea vara i lavi na jarana Judas, enia i pa tamlohi matea mo lo toho peresiña tarea hin rani atu Moli Iesu mo lo toho peresiña, ²² mo tapulo hin rani atu sei John tamlohi paptijo mo tapulo paptijo mo mai mo tikeli rani atu Iesu mo mele sahe na tuka – enia i pa vonaña matea sei mo hite na nona sauteterahi.”

²³ La vere na tupra rua, matea enia Joseph la tovia Barsabbas teni Justus, ale haruana enia Matthias. ²⁴ Ale la usiusi lara, “Moli, engko ko levosahi na mapu tamlohi tari. O vujangi kamam hin haratu sei ko viñonia ²⁵ vara enia i pa lavi na jarana Judas peresi na nona vavahinau, matan

enia mo vano na nona talai.” ²⁶ Ale la reye na hijara, ale mo jovi isan Matthias, ale Matthias mo mai vahařule matea peresi la haratu mo sangavulu ūromira matea.

2

Tanume Tapu Mo Mai

¹ Ranin Pentecost mo pala, la lo toho na jara matea enira mo isoiso. ² Ale vahatea purongo, la rongo na hinau matea sohena langi tavera matea mo lo sere, ale mo mařivisi ima atu la lo sakele hinia. ³ Ale hinau hai sohena pepe hapu, la pala isara la sakele aulu na patura hatehateahi. ⁴ Ale enira mo isoiso, Tanume Tapu mo sohonira, ale la tapulo retireti na leo tinatinapua sohen Tanumen God mo tinařihira hinia.

⁵ Hin rani atu, Jew matuvana na jara tari na varama sei ūromira mo ūrlangi mata nora rasua la lo toho atu Jerusalem. ⁶ Ale vaore tavera atu, mo vai na vao tamlohi la mai jara matea, ale la hutura matan enira hatehateahi la rongora la lo retireti na leora.

⁷ Ale la hutura, la mařurahi tavera lara, “Avei, la tamlohi nike, la sopo mara Galilee nakonako? ⁸ Ale mata sava natu ūra lo rongora la lo retireti na leo jarařa hatehateahi sei ūra vora hinira? ⁹ Enřa mara Pathian, Medes, Elamite ale mara Mesopotamia, Judea, Cappadocia, Pontus, Asia, ¹⁰ Phrygia, Pamphylia, Egypt ale jara hai Libya na lolon Cyrene, ale hai la tai Rome. ¹¹ Tatuřař Jew, tatuřa enira la tamlohi ūrōha sei la lo usuri Moses, ale mara Crete peresi na mara Arabia – ūra rongora la lo retireti na leora. La lo vere na vavahinau ūruhū mata suiha non God.” ¹² Ale enira mo isoiso, la mařurahi la hutura, la lo vereverera hinia lara, “Mata-mata mata sava nahai?” ¹³ Pani tatuara la kerehira lara, “Hara sei, la drong na waen mej!”

Peter Mo Retivujavujangi

¹⁴ Ale Peter peresi la tupu sangavulu ūromira matea atu, la turu mai na na-hora, ale mo ulo mo vereea isara mara, “Mara Judea, ale mara Jerusalem tari, ha tapurongo! Ha levosahi mamahuni hinau nike! ¹⁵ Matan la tamlohi nike la sopo drong sohen ka lo ūromřomia, matan mo pa

lo ūlalavuho purongo nahai. ¹⁶ Pani hinau
nike p̄ovet Joel mo verea moiso mara,
¹⁷ ‘God mo verea mara:
Na pongi hitahu, a pa surei na Tanumeku
na tamlohi tari,
ale natumim peresi na venatumim la pa
retimangovi,
ale uluvouumim lamane la pa hite na hinau
sohena mavuho a pa vujangia isara,
ale vajiahamic a pa silera na mavuho;
¹⁸ hin pongi atu sohena,
a pa surei na Tanumeku isana noku slev
lamane peresi na slev hařai,
ale la pa retimangovi.
¹⁹ Ale a pa vujangi na matamata mařurahi
tavera aulu na masapa,
ale matamata mata ūae,
hapu peresi na asu hapu atano na
varama,
²⁰ ale alo i pa pos i mai i ūrořoha,
majhi vitu i pa hahara sohena ūae,
la pa pala tiroma hin rani atu Moli i pa
mele mai,
rani tavera atu i pa ūruřuhu jea.
²¹ Ale rani matea i pa mai vara sava tam-
lohilta tau na nora rasu na hijan Moli
la pa juri.’” *Joel 2.28-32*

²² Ale Peter mo mele verea mara,
“Tavtavuin Israel, ha tapurongo! Iesu
mara Nazareth, tamlohi matea God mo
tau na nahomim, mo lo vai na vavahinau
mata suiha, matamata ūruřuhu tavera,
peresi na matamata mařurahi sei God
mo vaira na nahomim hin Iesu, sohen
kamim mo isoiso ka levosahi mamahunia
— ²³ tamlohi atu, ka taua na lima tam-
lohi sasati, matan vara la pa vosaea na
talopeilopei vara i mate, pani haratu mo
pa lo usuri na ūromřomi tavera non God,
ale enia mo levosahia tiroma moiso vara
i pa sohena. ²⁴ Pani God mo sauteterahia,
mo teria na liman mateia, matan mateia
i pa sopo eři tauria na suihana. ²⁵ Matan
supe David mo retireti matana mara,
‘Tarea na lo hite Moli na nahoku,
matan enia mo lo toho na matuaku,
enau a pa sopo hisu.
²⁶ Matan haratu mapuku mo avulahi,
ale leoku mo uloulo na hasohasona!
Epuku i pa toho na liman ūromtoho,

²⁷ matan engko God o pa sopo tinařihia
vara a toho na varama mata mateia,
teni vara o tinařihia vara nom tamlohi
tapu i ūrovo na taptap.
²⁸ Engko ko vujangiau moiso na malele
mata mauri;
engko o pa vaiau a avulahi tavera na
nahom.’ *Psa 16.8-11*

²⁹ La vorai, na levosahi mamahunia vara
a eři verea isamim, vara pua David mo
mate ale la tavunia. Ale tapuna mo lo toho
peresira mo kakau nake. ³⁰ Matan David
enia p̄ovet matea, mo levosahia vara God
mo vai na retitauhi matea peresia, vara
mahapina matea, i pa sakele na nona jara
sakele mata supe, ³¹ David mo hiteulia
tiroma moiso, ale mo verea mara Křisto i
pa sauteterahi, ale vara i pa sopo taua vara
i lo toho na varama mata mateia teni vara
epena i ūrovo.

³² Iesu sei, God mo sauteterahia na
mateia, ale kamam mo isoiso kama hitea.
³³ Nake, God mo tahea mo sahe na matu-
uana, vara i tauri na suiha tavera sei mo
aulu jea mo jeu na tinapua na tuka, ale
usuri na retitauhi non God Tama, mo lavi
na Tanume Tapu, ale mo sureia hin ka-
mam, sei ka lo rongoa ale ka lo hitea naker-
ihi. ³⁴ Matan David mo sopo lo sahe aulu na
tuka, pani enia mo verea mara,
‘Moli, mo verea isan noku Moli:
O sakele na matuaku,
³⁵ i tikeli rani atu a vai na nom meresahi, la
toho na ruhuruhu palom.’ *Psa 110.1**

³⁶ Matan haratu, mo ūruhvara tamlohi
tari Israel la levosahi mamahunia vara
God mo vaia mo mai Moli! Ale mo vaia mo
mai Křisto, pa Iesu atu sei ka lo vosaea na
talopeilopei!”

³⁷ Lara la rongo na nona reti, ūromira la
jovi vahatea. Ale la verea isan Peter tolu
na vahařule tari atu lara, “La vorai, kama
pa vai na sava?”

³⁸ Ale Peter mo verea isara mara, “Ha
posi! Ale ha paptijo kamim mo isoiso na
hijan Iesu Křisto, matan vara God i ūromi na
nomim hehe! Ale i pa sile purongoi kamim
na Tanume Tapu. ³⁹ Matan retitauhi nike,
enia nomim peresi na natumim, ale nona

* ^{2:35:} ruhuruhu palom: Iesu mo lavi na suiha tavera mo aulu jea hinira.

tamlohi tari sei la lo toho asau ūrove, tamlohi mo isoiso sei Moli nōra God i pa tovira vara la mai isana.” ⁴⁰ Ale Peter mo mele vujangira vavano, mo verea ūilangi isara mara, “Ha juri kamim hasemim hin pina lejileji nike!”

⁴¹ Ale evin la haratu sei la rasu na nona reti moiso la paptijo hin rani atu, la mai kalesia korong mariviti tari vaha tolu (**3000**). ⁴² Ale la hase taura na vujangi nona vahaūule, ale la matavuhi mata hanhani tapu peresi na usiusi.

Kalesia La Tapulo Matavuhi Jara Matea

⁴³ Ale matahu tavera mo sohoni na tamlohi tari matan vahaūule la vai na hina mařurahi tavera matuvana peresi na matamata tavera. ⁴⁴ Ale tarea, tamlohi rasua tari la lo pulutahi jara matea, ale hinau tari enia nora enira mo isoiso. ⁴⁵ Ale la lo ařehi na jarara peresi na nora hinahinau, ale la lo asera issan la haratu la vejuveju hin te hinau. ⁴⁶ Ale na rani hatehateahi, la lo matavuhi na Temple, ale la lo lavi na hanhani tapu na lolo imara, ale na nora hanhani la vaia na avulahi peresi na hansohai. ⁴⁷ La hasohaso God, ale tamlohi tari la avulahi hinira. Ale na rani hatehateahi tamlohi tinatinapu sei Moli mo jurira, la lo pulutahi peresira.

3

Tamlohi Hariju Matea

¹ Peter enia John la lo sahe na Temple na rani mata usiusi na matan alo mo tolu na ravravi. ² Ale tamlohi hai, la lavi na tamlohi matea mo vora mo hariju moiso. La lavia matan vara la pa mele taua i juruvi sohen tarea na pahisa matarua matea na ropen Temple atu sei la tovia ‘Matarua Ruhuřuhu’ vara i mele usi na mania isan la haratu la lo unu na Temple ea. ³ Mara mo hite Peter peresi John la lo unu na Temple, mo usi na mania isara.

⁴ Ale Peter mo kilau tataholo sivo isana, ale John sohena mo vaia ale Peter mara, “O kilau kamam.” ⁵ Ale tamlohi hariju atu mo tařengira matan mo lo ūromřomia mara la pa sile te hinau isana. ⁶ Pani Peter mo verea mara, “Mo sopo te noku silver teni gold, pani sava enia noku, a pa silea isam na hijan Iesu Křisto mara Nazareth. O turu o hahau!”

⁷ Ale Peter mo sohai na matua limana mo tauria mo sau, ale vahatea purongo, varango palona peresi na jue palona la ūilangi. ⁸ Ale mo kue mo sahe aulu mo turu, ale mo tapulo hahau ūalihi na palona, ale mo usurira la unu na lolo rope Temple. Mo lo hahau, mo lo kuekue ale mo lo hasohaso God.

⁹ Ale tamlohi mo isoiso la hitea mo lo hahau mo lo hasohaso God, ¹⁰ ale la hitevosahia vara enia natu pa tamlohi atu sei mo lo sakele na ‘Matarua Ruhuřuhu’ mata Temple tarea mo lo usi na mania. Ale la mařurahi tavera na sava mo masese isana. ¹¹ Mara mo pa lo keho hin Peter enia John, tamlohi tari la maro la mai isara hin jara atu sei la tovia Palapalan Solomon, ale la hutura tavera hinia.

Peter Mo Retivujavujangi Na Temple

¹² Ale Peter mara mo hitera la lo mai mo verea isara mara, “Tavtavuin Israel, mata sava ka hutu kamim hin hinau nike, teni mata sava ka lo varoi kamam sohena, vara kama vai tamlohi akerihi mo mele hahau na nomam suiha teni matan nomam posposi tataholo? ¹³ God non Abraham, God non Isaac, God non Jacob, God non nōra pua, mo tahe nona volitusi sei Iesu, hara sei ka taua na liman nōra tamlohi aulu, ale ka ūohu hinia na nahon Pilate hin rani atu mo opoia vara i teria. ¹⁴ Pani kamim, ka tipahi haratu sei mo tapu mo tataholo jea, ale ka usi Pilate vara i sile kamim na tamlohi vilimatei na tamlohi matea. ¹⁵ Ale ka vilimatei haratu enia pulo mauri, hara sei God mo sauteterahia na mateia. Hinau sei kamam kama hitea na matamam.

¹⁶ Ale tamlohi akerihi ka hitea ale ka levosahia, kama lo verea vara nona rasua na hijan Iesu natu mo vaia mo ūilangi. Rasua atu hin Iesu mo vai mamahuni na epena na nahomim mo isoiso.

¹⁷ Ale la vorai, na levosahia vara ka sopo levosahi na sava ka vaira, sohen nomim tamlohi aulu la vaira. ¹⁸ Pani sava God mo verea tiroma moiso na jingo přovet tari, sei vara nona Křisto i pa lavi na rongohaji sohena sava ale mo marivisia. ¹⁹ Matan haratu, ha posí, ale ha posí mai isan God matan vara i jarai nāřihi na nomim hehe, ²⁰ matan vara rani ūuhuřuhu mata suiha paro la mai isamim la tai na nahon Moli, ale i pa mele ūrule Iesu vara i mele mai

isamim sei God mo vironia vara i nomim Křisto, ²¹ enia i pa toho na tuka i tikeli rani atu God i mele vai tataholoi na hinau tari sohen mo verea na reti nona přovet tuai moiso. ²² Moses mara, ‘Moli God i pa tahe na nomim přovet matea na voraimim soheku. Ha pa tapurongo na hinau tari i pa verea isamim.’

Deut 18.15

²³ Ale mo mele verea mara, ‘Tamlohi tari sei la řohu vara la oolo hin přovet atu God i pa langahi nařihira na nona tamlohi ale i pa vilimateira.’

Deut 18.18-19

²⁴ Ale přovet tari sei la sile na nora retireti, mo tapulo isan Samuel peresi la haratu la pa mai hitahuna, enira sohena la pete retivujavujangi hin la rani nike moiso. ²⁵ Kamim, ka natun la přovet atu tuai, ale ka natun retitauhi atu God mo vaia peresi na nomim pua, sei mo verea isan Abraham mara, ‘Ale na mahapim, vao tamlohi tari na varama la pa avulahi tavera hinia’.

Gen 22.18; 26.4

²⁶ Hin rani atu God mo sauteterahi nona volitusi mo řulea mo mai isamim tiroma tavytavuin Israel, matan vara i leřuhu hin kamim i vai kamim ha posí na nomim posposi hehe.”

4

Peter Enia John Na Naho Council Jerusalem

¹ Ale Peter enia John la pa lo retireti isana tamlohi, přis peresi na patu tamlohi nona police mata Temple peresi na Sadducee hai la mai isara. ² La lolokoru tavera hinira matan la lo vujangi na tamlohi, ale matan la lo retivujavujangia vara God mo sauteterahi Iesu na mateia. ³ Ale la tauri latira, la taura na ima řilangi mo tikeli na rani tinapua matan mo pete ravravi moiso.

⁴ Pani tamlohi matuvana hin la haratu la lo tapurongo isara, la rasua. Ale evin la tamlohi atu mariviti i tari vaha lima (*5000*).

⁵ Ale mo mele rani sahe, nora tamlohi aulu peresi na vajiahara peresi na tamlohi vujangi mata leu, la matavuhi jara matea Jerusalem, ⁶ peresi Annas sei přis aulu, ale Caiaphas, John, Alexander ale tamlohi tari sei la tai na vaon přis aulu. ⁷ Ale la vaira la turu na livuhara, ale la tapulo usira lara, “Ka vai hinau atu na sava suiha teni na hijan hare?”

⁸ Ale Tanume Tapu mo sohoni Peter mo verea isara mara, “Tamlohi aulu peresi na vajiahaha; ⁹ vara ka lo usi kamam vara kama vai na hina řuhu isan tamlohi hariju nike sohena sava, ¹⁰ ale a pa verea i mera i řuhu isamim tari, ale isana tamlohi tari Israel, vara tamlohi nike mo řuhu na hija peresi na suihan Iesu Křisto mara Nazareth sei ka lo vosaea na talopeilopei, pani God mo sauteterahia na mateia.

¹¹ Iesu akerihi natu enia, ‘Vatu atu kamim tamlohi voro ima ka tipahia, enia mo mai pulo vatu mata ima.’

Psa 118.22

¹² Ale mo sopo mele te malele tinapua vara tea i eři juri hinia matan mo sopo mele te hija tinapua na varama vara God mo silea vara tamlohi la pa juri hinia.”

¹³ Ale lara la hite na turu řilangi non Peter enia John, la mařurahi tavera matan la levosahia vara la tamlohi nike la sopo lavi te lelevosahi isara, ale la vara enira la tamlohi purongo purongo, ale la pa hitevosahia vara enira la lo toho peresi Iesu tiromja. ¹⁴ Pani lara la hite tamlohi atu sei mo mele řuhu mo lo turu na pahisara, la sopo eři mele vere te hinau sati vano isara.

¹⁵ Ale lara la retileu vara la malue na nora matavuhi, ale la tapulo sorasorahia isara –

¹⁶ lara, “Ra pa vai na sava isan la tamlohi nike? Matan la vai na matamata tavera matea na naho tamlohi tari Jerusalem, ale řa sopo eři vunvunia. ¹⁷ Pani matan vara řa opioa vara řa horora vara la sopo mele retivujavujangia isana tamlohi, řa pa retilořořahira vara la sopo mele vujangi hin Iesu isan tea.” ¹⁸ Ale la toyira la mele mai la turu na nahora, ale la silera na reti řilangi matea vara la sopo mele retireti teni la vujangi na hijan Iesu.

¹⁹ Pani Peter peresi John la řaramira lara, “Vara ka hitea mo tataholo vara kama oolo hin kamim, pani mo sopo hin God, ha to kilausuria; ²⁰ matan kama sopo eři isoiso na nomam retireti na sava hina řuhu kama hitea, ale na sava kama rongoa moiso.”

²¹ Matavuhi atu la mele sile na reti řilangi tinapua hai isara, pani la tinarihira la malue matan la sopo levosahia vara la pa sile na talai isara sohena sava matan vara la vaia vao tamlohi atu la pa lolokoru

matan la lo hasohaso God matan mata-mata tavera atu. ²² Matan matamata tavera atu mo masese hin tamlohi atu mo hariju mata tauni mo jeu mo ngavulu vati moiso.

Kalesia La Usiusi Isan Moli God

²³ Peter enia John lara la malue isara, la mele vano na vaora mata tamlohi rasua, ale la verera na hinau tari sei la pris aulu atu peresi na vajiahara la verea isara.

²⁴ Lara la rongo la hinau atu, enira mo isoiso la tahe na leora, la usiusi isan God na ūromūomi matea purongo ale lara, "Moli aulu na hinau tari, engko ko vai na tuka peresi na varama, na tasi ale hinau tari sei la lo toho na lolora. ²⁵ ko verea tuai na Tanume Tapu na retireti non nom volitusi supe David nomam pua vara,

'Mata sava tamlohi ūroha la lo lolokoru patura,

ale mata sava tamlohi la lo hatihia vara la pa vai na hinau rongorongo vono?

²⁶ Matan supe mata varama la turu jara matea,

ale tamlohi aulu la matavuhi jara matea,

matan vara la turuleji hin Moli God peresi na nona Křisto.' *Psa 2.1-2*

²⁷ Matan Herod enia Pontius Pilate, peresi na tamlohi ūroha, peresi na tavytavuin Israel la matavuhi jara matea hin taon tavera nike, la turuleji hin nom volitusi tapu Iesu, haratu ko viřonia mata juri na tamlohi. ²⁸ Vararuhi hinau tari la masese usuri na masalom, peresi na nom ūromūomi tavera sei ko taua vara i pa sohena tiroma moiso. ²⁹ Ale nake Moli, o tapurongo na nora retireti leji, ale o vai na nom volitusi la vere na nom retisohai i sopo te matahu hinira, ³⁰ ale o sohai na suiha mata vai na rojoa i tihai, ale vara matamata tavera peresi na hinau mařurahi la pala na hijan nom volitusi tapu Iesu."

³¹ La usiusi mo isoiso, ale jara atu sei la lo matavuhi ea mo hutehi, ale enira mo isoiso Tanume Tapu mo sohonira, ale mo tapulo hin rani atu mo vano, la retivujavujangi na retisohai non God, ale mo sopo te matahu hinira.

Kalesia La Tuetuenira Hasera

³² Vao tamlohi rasua atu ūromira mo matea purongo, ale mo sopo tea isara i eři verea vara nona hinau enia nona hasena, pani nora hinau tari enira nora mo isoiso. ³³ Retivujavujangi non la vahařule atu mata sauteterahi non Moli Iesu mo suiha. Ale God mo leřuhu hinira mo isoiso mo tavera jea ³⁴ matan mo sopo tea isara i vejuveju hin te hinau, matan la haratu sei nora lepa teni imara, la ařehira ale la lavi na volira, ³⁵ moiso la taura na lima vahařule, moiso la asera isan la haratu la vejuveju hin te hinau.

³⁶ Ale vonara matea enia Joseph, tapala hijana vahařule la silea isana enia Barnabas, ūramin hija sei enia 'Tamlohi mata Retituetueni', enia mara Cyprus matea mo tai na vao Levi na tavytavuin Israel. ³⁷ Ale mo ařehi na nona lepa matea, ale mo lavi na volina mo mai mo silea isana vahařule.

5

Ananias Enia Sapphira

¹ Tamlohi tinapua matea sohena hijana Ananias peresi narouna Sapphira, la ařehi na nora hinahinau. ² Ananias mo taurilati na sope volin la nora hinau atu sei la lo ařehira, ale narouna mo levosahia. Enia mo lavi na sopena mo silea isana vahařule, ale mo verea mara volina enira mo isoiso natu.

³ Pani Peter mo verea mara, "Ananias, mata sava ko tinarřihi Setan mo sohoni na mapum mo vaiho ko halu Tanume Tapu moiso ko taurilati na sope voli lepa vara nom hasem? ⁴ Ko sopo lo ařehia enia nom teni mo vono? Ale kora ko ařehia moiso volina mo lo toho na limam vara o pa silea teni mo vono? Mata sava ko ūromūomia vara o vai na hinau matea sohen harihi? Ko sopo halu kamam, pani ko lo halu God!"

⁵ Ananias mara mo rongo la reti atu, mo jovi sivo na lepa mo mate. Ale matahu mo sohoni enira mo isoiso sei la rongo hinau atu. ⁶ Ale uluvou hai la mai, la tatavua ale la alialia la vano la tavunia.

⁷ Ale aoa mo tolu mo vano moiso, narouna mo pete pala mo unu pani mo sopo levosahie te hinau na sava mo masese moiso. ⁸ Peter mo verea isana mara, "O to vereau hinia, vara volin lepa atu enira mo isoiso nakerihi natu teni mo vono?"

Sapphira mara, "He'e, volina natu."

⁹ Ale Peter mo verea isana mara, "Mata sava kamim tupra rua ka hatihia vara ha pa vaihite na Tanumen Moli? O to kilau sahe, la tamlohi atu sei la lo tavuni tuam la lo mele mai, ale nakerihi sohena la pa pete alialiho!"

¹⁰ Vahatea purongo, mo jovi na palon Peter mo mate. Ale la uluvou atu lara la unu na lolo ima la hitea, la alialia la vano la tavunia na pahisan tuana. ¹¹ Matahu tavera mo sohoni na vao kalesia tari peresi na tamlohi tari sei la lo rongo hinau atu sei mo masese.

Vahařule La Vai Na Rojoa La Tihai

¹² Matamata tavera matuvana peresi na hinau mařurahi la pala na liman la vahařule atu na naho tamlohi. Ale enira mo isoiso la lo matavuhi jara matea na Palapalan Solomon. ¹³ Ale la haratu la sopo lo toho na lolo vaora, la matahu tavera vara la pulutahi peresira, pani tamlohi la sile na oololavera isara. ¹⁴ Ale rani hatehateahi, tamlohi la lo tau na nora rasua hin Moli, vao hařai peresi na vao tamlohi la lo mai. ¹⁵ Ale tamlohi la lo tau na nora tamlohi rojoa na pahisa malele, la taura na vata teni na epa matan vara řořon Peter purongo i eři tikeli na epen te tatuara ale nora rojoa la tihai, vara i hahau i lo vano. ¹⁶ Vao tamlohi la lo tai na vanua varihi řalihi Jerusalem la lo lavi na nora tamlohi rojoa peresi la haratu tanume sasati mo sohonira la mai isara, ale enira mo isoiso nora rojoa la tihai.

La Taurilati Na Vahařule

¹⁷ Ale přis aulu peresi la haratu la lo toho peresia enira Sadducee, ale enira la mařivi na mereimerei, ale mo vaira la lolokoru. ¹⁸ La taurilati la vahařule atu, la taura na ima řilangi. ¹⁹ Pani hin vutepongi atu, angelo non Moli matea mo sinai mo roi na pelatin ima řilangi atu mo tiromara la malue, ale mo verea isara mara, ²⁰ "Ha vano, ale ha turu na lolo rope Temple, ale ha retivujavujangi na tamlohi na retisohai hin mauri nike!" ²¹ Ale lara la rongoa sohena, la vano la unu na rope Temple mo pa lo řari na rani ale la tapulo vujangi.

Ale přis aulu peresi la haratu la lo toho peresia la pala na Temple, la tovi na council tavera nona tavytavuin Israel sei la tovia Sanhedrin matan vara la pa sakele. Ale la

řule na tamlohi hai la vano na ima řilangi vara la lavi la vahařule atu la mai isara. ²² Pani police mata Temple lara la pala na ima řilangi, la sopo hitera, ale la mele hilu la vano la vereulia isara lara, ²³ "Kama hite na ima řilangi mo pa lo loko mo řuhu, ale tamlohi kilau na ima řilangi la lo turu na nora pelati, pani kamara kama roira, kama sopo hite tea na lolora."

²⁴ Tamlohi tavera nona police mata Temple peresi na moli nona přis lara la rongoa sohena, la hutura tavera hinia matan la sopo levosahia vara i pa isoiso epu. ²⁵ Pani tamlohi matea mo mai mo vereulia isara mara, "Eh! La tamlohi atu ka lo taura na ima řilangi enira nahai la lo turu na lolo rope Temple, la lo vujangi na tamlohi!"

²⁶ Ale tamlohi tavera nona police mata Temple peresi na nona police, la vano la lavi malumira la mai matan la matahu vara tamlohi la pa parura vara la vai na hinau řilangi isara.

²⁷ La lavira la mai la vaira la turu na nahon nora council tavera, ale přis aulu mo usi na retiusia isara ²⁸ mara, "Kama retihoro kamim moiso vara ha sopo mele retivujavujangi na hijan tamlohi atu. Ka hitea, nake Jerusalem mo mařivi na nomim vujangi, ale ka opoia vara ha tau na řaen tamlohi nike isamam!"

²⁹ Pani Peter peresi na vahařule la řaramia lara, "Kama pa oololavina God hasena, mo sopo na tamlohi. ³⁰ God non nořa pua tuai mo sauteterahi Iesu na mateia, mo vaia hitahu hin la rani atu sei ka vilimateia ka vosaea na talopeilopei. ³¹ God mo tahea aulu na matuana mo vaia mo pulon mauri nike ale Jujuri matan vara i sile na masapa isan Israel vara la pos, ale i řomi na nora hehe. ³² Kamam kama hite vevuhila hinau nike, ale Tanume Tapu sei God mo silea isan la haratu la lo oololavina enia sohen mo hitea."

³³ Lara la rongoa sohena la lolokoru patura, ale la opoia vara la vilimateira.

³⁴ Pani Pharisee matea hijana Gamaliel, enia tamlohi vujangi mata leu matea. Tamlohi la lo sile na oololavina isana matan la opoia, mo turu na naho council ale mo verea vara la tau nařihira na jingoima tako. ³⁵ Moiso mo verea isan council atu mara, "La tavytavuin Israel, mo řuhu vara

ra lo kilau i ūahu na sava ūa opoia vara ūa vaia isan la tamlohi nike. ³⁶ Matan tauni mo visa mo vano moiso nahai, Theudas mo turu mo verea mara enia tamlohi tavera matea, ale korong tamlohi mo ngavulu sangavulu vati ⁽⁴⁰⁰⁾ la

usuria. Pani hitahuna hai la vilimateia ale nona tamlohi la taskara, ale nona ūomromi atu mo mai hina purongo. ³⁷ Ale hitahun haratu mara Galilee matea hijana Judas, mo turu hin rani atu la lo evi na tamlohi, ale mo vai na tamlohi la lo usuria mata valum. Enia sohena mo mate, ale nona tamlohi usuri tari la taskara.

³⁸ Ale matan haratu, noku retituetueni isamim enia mo sohen harihi: vara ha toho asau hinira ha tinařihira, matan vara ūomromi sei la lo vujangia teni hinau sei la lo vaia mo tai isana tamlohi purongo i pa mele mai hina purongo, ³⁹ pani vara mo tai isan God, ha sopo eři horora, vara i vono ha pa hiteulia vara ka lo valum peresi God.” Ale la tatauri na nona ūomromi, ⁴⁰ ale la mele tovi na vahařule la mele unu, ale la tamajira, moiso la verea isara vara la pa sopo mele retireti na hijan Iesu, ale la tinařihira. ⁴¹ La vahařule atu, la malue hin matavuhi tavera atu. La avulahi matan God mo hitea vara mo tataholo vara la lavi na rani ūilangi mata hijan Iesu. ⁴² Ale na rani hatehateahi na lolo Temple peresi na imara, la lo vujangi ale la retivujavujangi na Retiřuhu vara Iesu enia Kristo atu tamlohi la lo kilau matana.

6

Deacon Mo Limaravrua

¹ Hin rani atu evi tamlohi usuri non Iesu mo lo ulua, ale retireti matea mo malue isana Jew sei la retireti na leo mara Greek. Ale la sopo avulahi na Jew sei la lo retireti na leon tautauin Israel, matan tarea vara la ase na hanhani nora malepu la sopo lavi tea. ² Ale la tupu sangavulu ūomana mo rua atu la tovi matavuhi na tamlohi usuri la mai, ale lara, “Mo sopo tataholo vara kama tinařihi na vujangi mata reti non God mata kilau na hamim hinau. ³ Pani ha viřoni mamahuni te vorai kalesia i limaravrua isamim tamlohi tari sei ka levosahia vara Tanume Tapu peresi na lelevosahia mo mařivi hinira, ale ūa pa taura la aulu hin la hinau sei. ⁴ Pani kamam kama pa

tau na ūomimam tari mata usiusi, ale na vayahinau mata Retiřuhu.”

⁵ Tamlohi tari la avulahi hin ūomromi atu, ale la viřoni Stephen, tamlohi matea sei mo jea na nona rasua ale Tanume Tapu mo mařivisia, la viřoni Philip, Prochorus, Nicanor, Timon, Parmenas peresi Nicolaus mara Antioch matea enia tamlohi ūořoha matea pani mo usuri na nora rasua, moiso mo posí mo mai tamlohi kalesia matea. ⁶ La vao atu la vaira la turu na naho vahařule, ale la vahařule atu la tau na limara hinira, ale la usiusi matara.

⁷ Reti non God mo lo vano, ale evi tamlohi usuri Jerusalem mo lo sahe aulu jea. Ale vao tavera matea mata přis la lavi pa rasua atu ale la oolo olo hinia.

⁸ Stephen, tamlohi matea sei mo mařivi na hina ūuhuřuhu peresi na suiha God mo silea isana, mo vai na matamata tavera na naho tamlohi. ⁹ Pani tamlohi hai Jew na vao matea la tovia ‘Ima Lotu Nona Tamlohi Materi’. Hai la mara Cyrene, mara Alexandria, tatuara la tai Cilicia peresi Asia, la turu la vasi peresi Stephen. ¹⁰ Pani la sopo eři retihoro na lelevosahia sei Tanume Tapu mo silea isana vara mo retireti.

¹¹ Ale la haluhalu na tamlohi hai vara la vere te hinau halu hin Stephen lara, “Kama rongoa mo retisati hin Moses enia God.”

¹² La halu na tamlohi, peresi na vajiahara tolu na tamlohi vujangi mata leu, moiso la mai isan Stephen, la tauria ale la vaia mo turu na naho council. ¹³ Pa la tuetueni halu atu lara, “Tarea tamlohi nike mo lo retisati hin jara tapu nike peresi na leu.

¹⁴ Matan kama rongoa mo verea mara Iesu mara Nazareth i pa komo jara nike, ale mo posí na posposi sei Moses mo lo silea mo sinai mo kakauřa naked.” ¹⁵ Tamlohi tari hin matavuhi atu sei la lo sakele atu, la hite na nahon Stephen mo posí sohena naho angelo matea.

7

Stephen Mo Sile Na Nona Reti

¹ Ale přis aulu mo verea isan Stephen mara, “La hinau atu la varářuhu?”

² Ale Stephen mara, “La vorai peresi na vajiahia, ha tapurongo na noku reti. God mata mera tavera mo pala isan norā pua Abraham hin rani atu mo lo toho

Mesopotamia, moiso mo pa vano mo toho Haran,³ ale mo verea isana mara, ‘O malue na jaram peresi na tahisam, ale o vano na jara matea enau a pa vujangia isam.’ *Gen 12.1*

⁴Ale mo malue na jara mara Chaldea, mo vano mo lo toho Haran. Hitahu, tamana mo mate, ale God mo tinařihia atu mo taua hin jara nike nake ū lo toho hinia.

⁵Pani mo sopo sile te tavalauna hatelete isana sohena koruna, pani mo retitauhi isana vara i pa silea isana sohena nona peresi na taniana sei la pa usuria, hina purongo vara mo sopo te natuna. ⁶Pani God mo mele retireti isana sohen harihi mara, ‘Mahapim la pa vinano na jara tamlohi tinapua, ale tamlohi hin jara atu la pa vaira la slev, la pa vailejlejira mata tauni i ngavulu sangavulu vati. ⁷Pani a pa sile na talai isan la haratu la lo slev nora, *Gen 15.13-14* moiso hitahu la pa malue hin jara atu la mai la lotuau nike.’ *Exo 3.12*

⁸Ale mo sile Abraham na retitauhi mata taiřalihi, ale Abraham mo mai taman Isaac, ale mo taiřalihi na halimaravtolu rani nona vora, ale Isaac mo mai taman Jacob, ale Jacob enia taman la pua atu tupu sangavulu ūromana mo rua.

⁹Ale la pua atu, la mereimerei hin Joseph, la ařehia mo sivo Egypt; pani God mo lo toho peresia ¹⁰matan vara i pa juria na nona rani ūlangi tari, ale i tuenia na lelevosahi na nahon Pharaoh, supe non Egypt matan vara Pharaoh i avulahi hinia ale mo tahea vara i aulu Egypt peresi na hinau tari nona.

¹¹Hin rani atu marua tavera matea mo vili na jara tari Egypt peresi Canaan na rani ūlangi. Ale nořa pua la sopo eri hite te hanhani. ¹²Pani na rani Jacob mo rongoa vara hanhani mo lo toho Egypt, mo ūrule na nořa pua la sivo, harihi enia nora tiroma hahau hin jara atu. ¹³Ale na nora harua hahau la sivo atu, Joseph mo hase vuhesia isana voraina, ale Pharaoh mo pa levosahi na vaon Joseph natu. ¹⁴Moiso Joseph mo ūrlera la mele sahe, ale la usi Jacob tamana peresi na tamlohi tari na ruhuruhuna sei enira mo isoiso mo ngavulu limaravrua mo lima vara la sinai. ¹⁵Ale Jacob mo sivo Egypt mo pa mate atu, enia peresi na nořa pua, ¹⁶ale la lavi na suira la sahe la taura

Shechem na papa sei Abraham mo volia isan natun Hamor atu Shechem.

¹⁷Pani rani mata retitauhi non God sei mo silea isan Abraham mo mai mariviti, tanian Abraham la mařivi jea Egypt, ¹⁸mo tikeli rani atu supe tinapua matea mo tauri na suiha Egypt, ale enia mo sopo opoia vara i levosahi na mahapin Joseph. ¹⁹Mo haluhalu na tahisařa, ale mo vere na nořa pua vara la tau na natura la toho hasera na jara tavera matea matan vara la pa mate ea.

²⁰Hin rani atu Moses mo vora, God mo avulahi hinia. Ale tamana la jarohia na ima mata vitu mo tolu, ²¹ale hin rani atu la lavia mo pala na jara tavera venatun Pharaoh mo tapaia mo korohia sohena natuna. ²²Ale la vujangia na lelevosahi tari nona mara Egypt, ale enia mo mai tamlohi ūruhu matea mata retireti peresi na nona vavahinau.

²³Na rani taunina mo ngavulu vati, ūromina mo mai vara i vano i hite na tasina, mahapin Israel. ²⁴Moses mara mo hite na mara Egypt matea mo lo vailejleji na tahisana matea, mo tueni tahisana atu mo vilimatei pa mara Egypt atu. ²⁵Moses mo lo ūrom ūromia vara tahisana la pa hitevosahia vara God mo ūrulea mo mai isara vara i jurira, pani la sopo hitevosahi na sava mo lo vaia.

²⁶Ale mo mele rani sahe mo mele pala, ale mo hite na tamlohi tavytavuin Israel mo rua la lo vasvasi, ale mo vahitea vara i tau na tamata isara mara, ‘La tapala, kamim vorai matea purongo, mata sava ka lo vailejleji kamim?’

²⁷Pani tamlohi atu sei mo lo vailejleji na tahisana purongo, mo sohai nařihi Moses, ale mo verea mara, ‘Hare mo vaiho ko aulu vara o eri ari kamam?’ ²⁸Ko opoia vara o mele viliau sohen ko vili mara Egypt atu nanovi teni?’ *Exo 2.14* ²⁹Tamlohi atu mara mo verea sohena, Moses mo rovo mo vano mo vinano na jara mara Midia, ale hin jara atu mo mai tama matea natuna lamane mo rua.

³⁰Ale mele tauni mo ngavulu vati tina-pua angelo matea mo pala isana na jara hasetoho na vutin Sinai na pepe hapu na pulo pahai matea mo lo hani. ³¹Moses mara mo hitea mo mařurahi hinia, ale

mara mo mai mariviti vara i hite mamahuna, leon Moli God mo malue hinia mara,
32 ‘Enau God non nom pua, God non Abraham, God non Isaac peresi Jacob’. *Exo 3.6*
 Ale Moses mo savaravara mo matahu vara i mele kilau vano.

33 Ale Moli God mo verea isana mara, ‘O lavi nařihi na nom sabat matan jara sei ko lo turu hinia enia mo tapu.’ *Exo*

3.5 34 Enau na hite na rani ūilangi nona noku tamlohi sei la lo toho Egypt, ale na rongo na nora tangi, ale na sinai vara a lavi nařihira. Ale o mai, a pa ūruleho o sivo Egypt.’ *Exo 3.7-10* **35** Moses akerihi natu sei la lo ūrohu hinia lara, ‘Hare mo vaiho ko aulu vara o eři ari kamam? Tamlohi akerihi natu God mo ūrulea sohena tamlohi aulu matea, ale tamlohi juri na tamlohi matea na liman angelo atu sei mo lo pala isana hin pulo pahai atu mo lo hani.

36 Tamlohi akerihi natu mo ūtiromara la malue, mo vai na hinau mařurahi peresi na matamata tavera na lolon Egypt, na Tasi Hahara, ale jara tano koru mata tauni mo ngavulu vati.

37 Moses akerihi natu sei mo verea isana tautauuin Israel mara, ‘God i pa turuhi na nomim přovet matea isana voraimim soheku’. *Deut 18.15* **38** Tamlohi akerihi natu, mo lo toho na lolon vao atu na jara hasetoho peresi angelo atu sei mo lo retireti isana, peresi na nořa pua na vutin Sinai. Ale enia mo lavi na reti sei mo sile na mauri vara i silea isařa.

39 Pani nořa pua la ūrohu vara la oloolo hinia, la tau nařihia, ale na mapura la opoia jea vara la mele sivo Egypt, **40** la verea isan Aaron lara, ‘O vai te nořa god matan la pa ūtiroma hinira. Pa Moses atu sei mo lo ūtiroma hinira ūra malue Egypt, ūra sopo levosahia vara mo sopo mele pala mata sava.’ *Exo 32.1*

41 Ale hin rani atu la vai na hinau matea mo tovongi na natu buluk matea, ale la sile na malamalai isana, ale la lo avulahi na nora vavahinai sei. **42** Pani matana, God mo vahaři isara ale mo tinařihira vara la lotu na hinahinau tinatinapu na masapa, mo sohen la ulia moiso na puku nona přovet lara,

‘Varařuhu, kamim Israel

ka lo sile na malamalai isaku na jara tano koru hin la tauni atu mo

ngavulu vati?

43 Mo vono, ūromim tavera mo lo toho na nomim god na tent non Moloch, peresi Rephan god nona vitusarasara, peresi na tamasin te hinau ka vaira mata ha pa lotura.

Ale matana, a pa ūrule kamim ha vano ha toho asau na tavalun Babylon na ruhuru hura.’

Amos 5.25-27

44 Ale nořa pua la lo toho peresi na Tabernacle na jara hasetoho, la vaia mo tataholo na sava God mo verea isan Moses mo usuri na sava mo hitea. **45** Hitahuna nořa pua, la pete lavia hin la rani atu la lo usuri Joshua sei mo lo ūtiromara na vuro isana tamlohi la sopo levosahi God. Ale God mo tipahira na nahon nořa pua mo kakau na rani non supe David, **46** enia God mo avulahi hinia, ale David mo usi God vara i voro te iman God non Jacob hatea. **47** Pani Solomon natu, mo pa voro ima atu. **48** Pani God Aulu Jea mo sopo toho na ima tamlohi la vaira, sohena přovet mo ulia vara Moli mo verea mara,

49 ‘Moli mo verea:
 Tuka enia noku jara sakele mata suiha, ale varama enia jara paloku.

Sava ima natu o pa eři voroa vara i pa imaku, teni sava jara enia noku jara mapu?

50 Ka ūromi vara limaku mo sopo vai vevuhi la hinau nike?’

Isa 66.1-2

51 Ka tamlohi patu ūilangi, mapumim la ūrořeha, ale ka peropero na vararuhu. Ka lo ūrohu na Tanume Tapu tarea sohen nomim pua la lo vaia ūtiroma. **52** Sava přovet natu nomim pua la sopo tipahia? Ale la vilimatei la haratu sei la lo vereuli na mai non haratu mo tataholo jea sei nake ka turulejí hinia moiso, ale ka vilimateia. **53** Kamim akerihi natu, ka sopo oloolo na leu non God sei mo silea isamim na lima angelo.’

54 La tamlohi atu sei la lo tapurongo isan Stephen lara la rongo la hinau atu, la lolokoru patura, la hatihati na huřura matana. **55** Pani Tanume Tapu mo sohoni Stephen, ale mo tařa sahe aulu na tuka, ale mo hite na hasohason God, ale mo hite Iesu mo lo turu na matuan God. **56** Ale mo verea mara, ‘Ka hitea, na hite tuka mo roi, ale na

hite Natun Tamlohi mo lo turu na matuan God.”

⁵⁷ Pani la ulo na leo tavera matea ale la jongi na perora ale vahatea la kue la tauria. ⁵⁸ Moiso, la lavi nařihia la vano na jingoiman taon tavera atu, la pulahia atano vara la pa parumateia. Ale la tamlohi atu sei la lo rongo na nona reti, la lanařihi na nora ruru tavera matan vara la eři paruparu, ale la taura na palo uluvou matea hijana Saul.

⁵⁹ Ale na rani la lo parua, Stephen enia mo lo usiusi mara, “Moli Iesu, o lavi na tanumeku.” ⁶⁰ Ale mo jovi sivo na pauna mo ulo mara, “Moli, o sopo taurilatira matan hehe akerihi.” Mo vere hinau atu moiso, natu mo mate.

8

¹ Ale Saul mo majinga na mateia non Stephen.

La Tipahi Na Kalesia

Ale mo tapulo hin rani atu tamlohi la tipahi na vao kalesia Jerusalem la levuti jalajalaira la vano na jara tari Judea peresi Samaria, pani vahařule purongo la pa lo toho atu. ² Tamlohi hai sei řomira mo řilangi mata lotu God tarea la tavuni Stephen, ale la vai na tangi tavera matana. ³ Pani Saul, mo opoia vara i vaikomokomo na kalesia tari, mo lo unu jongi na tamlohi rasua na ima hatehateahi, mo reve tahitahi na tamlohi peresi na hařai ale mo taura na ima řilangi.

Philip Mo Retivujavujangi Samaria

⁴ Ale la kalesia atu sei la lo levuti jalajalaira, la vano la lo retivujavujangi na Retiřuhu. ⁵ Philip mo sivo na taon tavera matan Samaria ale mo lo retivujavujangira hin Křisto. ⁶ Ale vao tamlohi tari atu la lo tapurongo mamahu na sava mo lo verera, ale matan la hite na matamata tavera mo lo vaira. ⁷ Matan tanume lumiha sasati la lo malue na tamlohi matuvana sei la lo toho hinira, ale lara la malue la lo ulo řilangi, ale la haratu la řira teni la papao la řuhu. ⁸ Ale avulahi tavera mo lo toho hin taon tavera atu Samaria.

⁹ Tamlohi matea hijana Simon enia mo lo mahumahu na suihan tiapolo ale mo lo vai na hinau mařurahi tavera hin jara atu mo tuai moiso, mo lo verea vara

enia tamlohi tavera matea. ¹⁰ Tamlohi tari la lo tapurongo hinia, mo tapulo na tamlohi purongo mo tikeli la haratu la aulu lara, “Tamlohi akerihi enia mo lavi suiha atu non God sei la lo verea vara mo tavera jea.” ¹¹ Ale tamlohi la lo tapurongo mamahu isana matan la lo mařurahi na nona mahumahu tuai moiso mo mai. ¹² Pani lara la rasu Philip matan mo lo retivujavujangi na Retiřuhu matan mauri atu God mo aulu hinia, tamlohi peresi na hařai la tapulo lavi na paptijo na hijan Iesu Křisto. ¹³ Simon sohena mo rasua, ale hitahu na nona paptijo mo usuri Philip. Ale mara mo hite na matamata peresi na hinau mařurahi tavera mo lo vaira, mo hutua.

¹⁴ Ale la vahařule atu Jerusalem lara la rongoa vara mara Samaria la lo lavi na reti non God, la řule Peter enia John ¹⁵ la sivo isara la usiusi nora matan vara la pa eři lavi na Tanume Tapu, ¹⁶ matan enia mo sopo lo jovi isan te vonara hatea, pani enira la lavi na paptijo na hijan Moli Iesu purongo. ¹⁷ Ale Peter enia John la tau na limara hinira, ale la lavi na Tanume Tapu.

¹⁸ Simon mara mo hitea vara Tanumen God mo lo mai na tamlohi vara la vahařule atu la tau na limara hinira purongo, mo usia vara i eři silera hin te mania ¹⁹ mara, “Ha sileau hin suiha sei matan vara sava tamlohi na tau na limaku hinia enia sohena i pa lavi na Tanume Tapu.”

²⁰ Pani Peter mo verea isana mara, “Mo řuhu vara nom mania i tihai peresiho matan ko řomi vara o eři voli na otori non God na mania. ²¹ Engko o sopo eři lavi te tavalun hinau nike matan mapum mo sopo tatahola na nahon God. ²² Matan haratu, o posí na nom řomřomi hehe, ale o usiusi isan God matana, matan vara i avulahi, i pa řomihlo matan nom řomřomi sei. ²³ Matan na hitea ko mařivi na mereimerei ale hehe mo taurilatiho.”

²⁴ Ale Simon mo řaramia mara, “O usiusi matakú isan Moli matan vara sava sei ko verea moiso tea i sopo masese isaku.”

²⁵ Ale hitahun la vereuli mamahuni la reti atu non Moli, Peter enia John la mele hilu sahe Jerusalem, ale la retivujavujangi na Retiřuhu isana vanua mara Samaria matuvana na malelera la lo sahe.

²⁶ Ale angelo matea mo verea isan Philip mara, “O turu o vano o sivo na malele sei mo tai Jerusalem mo lo vano Gaza.” Jara atu enia jara hasetoho matea. ²⁷ Ale mo turu mo vano. Hin jara atu mo hite na mara Ethiopia matea mo povota, enia tamlohi aulu matea matan Candace, vesupe nona mara Ethiopia. Enia natu mo lo kilau na nona tavyt tari. Mo mai Jerusalem mata lotu, ²⁸ ale mo lo mele mule, mo lo sakele na nona kati, hos la lo revea mo lo evi na reti non p̄rovet Isaiah.

²⁹ Ale Tanumen God mo verea isan Philip mara, “O vano o hahau na pahisa nona kati.”

³⁰ Ale Philip mo maro mo vano isana, ale mo rongoa mo lo evi na reti non p̄rovet Isaiah, ale mo usia isana mara, “Ko levosahi na sava ko lo evia?”

³¹ Ale mo ūaramia mara, “A pa levosahia sohena sava vara tea i sopo vujangiau hinia?” Ale mo usi Philip vara i vele i sahe i sakele peresia. ³² Jara rihirihi atu mo lo evia na Retitapu enia harihi, ‘La tiroma hinia sohena sipsip matea mo vano matan vara la vilimateia, ale sohena natu sipsip matea sei mo lo tapanono purongo vara tamlohi tai na vulu mo lo tai na vuluna, ale mo sopo vere te hinau hatea.

³³ Na rani la vailejlejia
mo sopo tea i turu vara i tuenia.
Mo sopo te taniana vara i eři lavi na koruna.
Matan la lavi nařihi na maurina na varama.’ *Isa 53.7-8*

³⁴ Ale pa tamlohi atu sei la votaia mo usi Philip mara, “Isaiah enia mo lo retireti hin enia hasena teni mo lo vere te tamlohi tina-pua?” ³⁵ Ale Philip mo vereuli na Retiruhu hin Iesu isana mo tapulo hin jara rihirihi atu na Retitapu.

³⁶ Ale lara la lo vano la mai na pahisa wai matea, ale pa tamlohi atu sei la votaia mara, “O to kilau vano, wai sevano! Mo sopo lo tataholo vara a lavi na paptijo?”

³⁷⁻³⁸ Ale mo verea mara nona kati i turu, ale enira rua la sevuti la sivo na wai, ale Philip mo paptijo hinia.

³⁹ Ale mara mo malue na wai, Tanumen Moli mo lavi nařihi Philip na nahona. Pa tamlohi atu mo sopo mele hitea pani na

malelena mo lo vano mo avulahi tavera. ⁴⁰ Ale Philip mo pa hutua purongo mo lo turu hin taon atu Azotus, ale mo retivuvajvangi na Retiruhu atu peresi na taon tari sei na malelena vavano mo kakau Cae-sarea.

9

*Iesu Mo Horo Saul, Mo Viřonia Nona
(Acts 22.6-16; 26.12-18)*

¹ Hin rani atu Jerusalem, Saul mo lo verea ūilangi vara i pa vilimatei na tamlohi usuri non Moli, ale matana mo vano isan pris aulu. ² Ale mo usia vara i uli te leta vara i lavira la sahe isana ima lotu nona Jew Damascus, mata usia vara la turu pere-sia vara la taurilati la haratu la lo usuri na malelen Kristo, hina purongo vara tamlohi teni hařai. Ale vara i lihora i lavira la mele sahe Jerusalem.

³ Saul mo lo sahe Damascus, mo pa lo mai mariviti, mera tavera matea mo tai na tuka mo eři tuntunia. ⁴ Mo jovi sivo na lepa, ale mo rongo na leo matea mo verea mara, “Saul! Saul! Mata sava ko lo tipahiau?”

⁵ Ale Saul mo usia mara, “Tamlohi tavera, engko hare?”

Ale leo atu mo ūaramia mara, “Enau sei Iesu! Haratu sei ko lo tipahia. ⁶ Pani nakerihi o turu, o vano o unu na lolon taon tavera atu ko lo mai matana, ale tamlohi matea i pa vereho na sava o pa vaia.”

⁷ La tamlohi atu sei la lo hahau peresi Saul la turu tapanono vahatea matan la rongo leo atu, pani la sopo hite na tamlo-hina. ⁸ Ale Saul mo mele turu, matana mo lo roi pani mo sopo eři hite te hinau. Nona tamlohi la tauri na limana la tiroma hinia la sahe Damascus. ⁹ Ale Saul mo matavuso mata rani mo tolu. Mo ūohu na hanhani peresi na wai hin la rani atu.

¹⁰ Tamlohi usuri matea hijana Ananias mo lo toho atu Damascus. Moli mo pala isana na hinau matea sohena mavuho mara, “Ananias!”

Ananias mo ūaramia mara, “Enau sei Moli!”

¹¹ Moli mo verea isana mara, “O turu o vano hin malele atu la tovia ‘Tataholo’ ale atu na iman Judas o usi na mara Tar-sus matea hijana Saul, ale nakerihi mo lo usiusi, ¹² ale hinau matea sohena mavuho

enia mo hite na tamlohi matea hijana Ananias mo mai mo tau na limana hinia matan vara i eři mele kilau."

¹³ Pani Ananias mo ūaramia mara, "Moli, tamlohi matuvana la vereau na sava hinau sasati tamlohi atu mo lo vaia isana nom tapuhi Jerusalem. ¹⁴ Ale nahai nike mo lo lavi na suiha isana pŕis aulu Jerusalem vara i taurilati la haratu la lo rasuho vara engko Moli!"

¹⁵ Pani Moli mo verea isana mara, "O vano matan enau na viřonia mata vavahinau matea vara enia i pa lavi na hijaku i vano isana tamlohi ūrořha, ale isana supe, ale isana Jew. ¹⁶ Matan enau a pa vujangia vara i pa lavi na rongohaji mata hijaku."

¹⁷ Ale Ananias mo malue mo vano mo unu hin ima atu. Mo tau na limana hinia, ale mara, "Voraiku Saul, Moli Iesu sei mo lo pala isam hin malele sei ko lo mai hinia, mo ūruleau na mai isam matan vara o eři mele kilau, ale Tanume Tapu i mařivisiho."

¹⁸ Vahatea purongo hinau hai sohena langalanga maji la jovi na matan Saul, ale mo mele kilau, moiso mo turu ale la paptijo hinia; ¹⁹ ale mara mo hanhani, mo mele suiha. Saul mo lo toho peresi na tamlohi usuri non Moli makomona atu Damascus.

Saul Mo Mele Sahe Jerusalem

²⁰ Ale vila ūruhu purongo, Saul mo tapulo retivujavujangi Iesu na ima lotu nona Jew mara, "Varařuhu Iesu enia Natun God."

²¹ Ale tamlohi tari sei la rongoa la mařurahi tavera hinia lara, "Avei, mo sopo tamlohi nike natu sei mo lo vailejeli la haratu Jerusalem sei la lo verea vara Iesu enia Moli? Ale nona mai nike nake mo sopo matan vara i mele vaia sohena, matan vara i liho kamam ale i lavi kamam kama vano isana moli nona pŕis Jerusalem?"

²² Pani suihan Saul mata retivujavujangi mo mai mo mele ūlangi jea, ale mo ari posposi na Jew sei la lo toho Damascus matan mo lo vujangi mamahuniha vara Iesu enia Křisto atu la lo kilau matana. ²³ Mo sopo tuai, tamlohi tavera nona Jew atu Damascus la hatihia vara la pa vilimateia, ²⁴ pani Saul mo levosahi nora ūromřomi luhu atu. La lo kilau na mataruan taon tavera atu na rani na vutepongi matan vara la pa eři vilimateia.

²⁵ Pani na vutepongi matea, nona tamlohi usuri la tuhua na tanga matea na mařole matea na roro ropicen taon atu.

²⁶ Ale hin rani atu, Saul mo pala Jerusalem mo vaihitea vara i pulutahi peresi na tamlohi usuri non Moli ea. Ale enira mo isoiso la matahunia matan la sopo rasuha vara enia tamlohi usuri matea. ²⁷ Pani Barnabas mo vano mo lavia mo mai isana vahařule, ale mo vereulia isara sohena sava Saul mo hite Moli na malele, ale mo vereuli na sava Moli mo verea isana, ale sohena sava mo lo retivujavujangi ūlangi na hijan Iesu Damascus. ²⁸ Ale tamlohi usuri la pa avulahi hinia natu vara i lo toho peresira, ale nona retivujavujangi Jerusalem na hijan Moli mo ūlangi jea. ²⁹ Ale mo sorasora peresi na mara Jew atu sei la retireti na leo mara Greek, ale mo vasi peresira, panila lo tiasia vara la vilimateia. ³⁰ Ale vorai kalesia atu lara la levosahia, la lavia mo sivo Caesarea, ale la ūrule nařihia mo sahe Tarsus.

³¹ Matan haratu, kalesia na jara tari Judea, Galilee peresi Samaria la toho na tamata, la ulua la ūlangi ale evira mo tavera. Ale na maurira la sile na oloolo isan Moli ale la lo toho na nanauhi non Tanume Tapu, ale la ulua mo tavera jea.

Peter Enia Dorcas

³² Ale, Peter mo lo hahau ūalihi ale na malelena mo sivo isana tapuhi non Moli Lydda. ³³ Hin jara atu mo tapai na tamlohi papao matea hijana Aeneas sei mo lo juřuvi na vatana mata tauni mo limaravtolu moiso. ³⁴ Ale Peter mo verea isana mara, "Aeneas, Iesu Křisto mo vai mamahuniho; o turu o vai na vatam." Ale vahatea purongo mo turu. ³⁵ Ale tamlohi tari Lydda peresi Sharon la hitea, ale la posi mai isan Moli.

³⁶ Hin rani atu tamlohi usuri hařai matea mo lo toho Joppa, hijana na leo Jew enia Tabitha, ale na leo mara Greek enia Dorcas. Tarea mo lo vai na vavahinau ūruhu ale mo lo tueni na tilavono. ³⁷ Hin la rani atu mo rojo ale mo mate. Ale lara la hoje na tarapena moiso la taua mo juruvi na jara tinapua matea aulu hin ima atu. ³⁸ Pani matan Lydda mo lo toho mariviti Joppa, tamlohi usuri atu lara la rongoa vara Peter mo lo toho atu, la ūrule na tamlohi mo rua la

vano isana vara la usia ūilangi vara, "Kama opoia mo tavera jea vara o mai nakerihi purongo."

³⁹ Ale Peter mo turu mo usurira la vano. Ale mara mo pala, la lavia mo sahe aulu isan Dorcas. Malepu tari la lo turu na pahisana la lo tangi, ale la lo vujangi na ruru peravu peresi te ruru tinatinapua Dorcas mo vaira na rani mo pa lo mauri. ⁴⁰ Pani Peter mo ūlera enira mo isoiso vara la malue, ale mo papaohi mo usiusi, ale mo posi vano isan tarape atu mara, "Tabitha, o turu." Ale mo roi na matana, ale mara mo hite Peter, mo sakele tataholo. ⁴¹ Ale mo sohai na limana vano isana ale mo saua. Moiso mo tovi na tapuhi peresi la hañai malepu atu vara la mai ale mo vujangia isara vara mo mele mauri.

⁴² Ale sorasorahina mo ūalihi na jara tari Joppa, ale tamlohi matuvana la tau na nora rasua hin Moli. ⁴³ Ale Peter mo lo toho atu Joppa mata rani matuvana peresi na tamlohi matea hijana Simon mo lo vavahinau na huri maji.

10

Cornelius Mo Vaharule Matan Peter

¹ Atu Caesarea tamlohi matea, hijana Cornelius, enia captain mata tamlohi vuro mo lo kilau na vao tamlohi vuro mara Rome matea evira mo ngavulu sangavulu mo limarave (⁶⁰⁰), ² enia tamlohi matea ūromina mo ūilangi mata lotu God, ale mo lo sile na oloolo isana tolu na vao imana, ale nona silesilea mo ūruhu jea isana tamlohi, ale mo lo usiusi tarea isan God. ³ Matan alo mariviti i tolu na ravravi matea, mo hite na hinau matea sohena mavuho matea, ale mo hite na angelo non God matea mo mai mo verea isana mara, "Cornelius!"

⁴ Ale mo kilaua na matahu tavera ale mara, "Eh, sava tamlohi tavera?"

Ale mo verea isana mara, "Nom usiusi peresi na nom silesilea la sopo sahe aulu purongo na nahon God. ⁵ Ale nakerihi, o ūrule te tamlohi la sivo Joppa la lavi Simon tapala hijana Peter. ⁶ Enia mo lo toho peresi na tamlohi matea hijana Simon sei mo lo vavahinau na huri maji, ale imana mo lo toho na pahisa tasi."

⁷ Angelo atu mara mo lo retireti isana moiso mo malue, ale Cornelius mo tovi

na nona volitusi mo rua peresi na tamlohi vuro matea sei mo rasua mo tavera jea ale mo ūlera isan la haratu la lo volitusi isana, ⁸ mo vere na sava mo masese isana isara, ale mo ūlera la sivo Joppa.

Sava God Mo Vujangia Isan Peter

⁹ Mo mele rani sahe la pa lo mai mariviti hin taon tavera atu, Peter mo sahe aulu na pusa ima na livuha rani mata usiusi. ¹⁰ Ale mo marohati, mo opoia vara i hani te hinau, pani la pa lo tatamahunia, hinau matea sohena mavuho mo taurilati na ūromina, ¹¹ ale mo hite tuka la roi ale hinau matea sohena tavalu ruru tavera jea matea mo lo sinai atano, la tuhua mo lo sinai atano na varama hin la pingona atu mo vati. ¹² Mo hite na maji tinatinapua matuvana, maji haraho peresi na maji avuavu la lo toho na lolona. ¹³ Ale leo matea mo malue mo verea isana mara, "O turu Peter; o vilimatei tea o hania!"

¹⁴ Pani Peter mara, "A sopo eři vaia sohena Moli; matan na sopo lo hani te hinau lumiha hatea sei leu mo horoa!"

¹⁵ Ale leo atu mo mele mai isana haruana mara, "Sava God mo vaia mo vokevoke, o sopo verea vara mo lumiha!" ¹⁶ Ale hinau sei mo masese sohena vaha tolu moiso, ale vahatea purongo mo mele sahe aulu na tuka.

¹⁷ Ale ūromin Peter mara mo pa lo toho na ūramin hinau atu mo hitea, vahatea purongo, pa la tamlohi atu sei Cornelius mo lo ūlera la kakau na iman Simon la turu na get.

¹⁸ Ale la ulo la usia lara Simon matea tapala hijana Peter mo lo toho atu teni mo vono. ¹⁹ Peter mo pa lo ūromūomi hinau atu mo lo hitea, ale Tanume Tapu mo verea isana mara, "Nakerihi, tamlohi tupu tolu la lo aleho. ²⁰ O turu, o sivo atano, ūromim i sopo kaka hinira, ale o usurira matan enau sei na ūlera."

²¹ Ale Peter mo sevuti sivo isara ale mo verea mara, "Enau natu haratu ko lo alea. Ka mai mata sava?"

²² Ale la verea lara, "Cornelius, enia captain mata tamlohi vuro matea, mo lo kilau na vao tamlohi vuro mara Rome matea, ale enia tamlohi tataholo matea sei mo lo sile na oloolo tavera isan God. Ale Jew la lo verea vara enia tamlohi ūruhu matea; angelo tapu matea mo verea isana mara

i vahařule matam matan vara o mai na imana ale i pa rongo na sava o pa verea isana.” ²³ Ale Peter mo usira vara la pa toho atu peresia hin rani atu.

Mo mele rani sahe mo turu mo usurira, ale tatua vorai sei mara Joppa la vano plesia.

²⁴ Mo mele rani sahe la unu Caesarea. Cornelius mo lo kilau matana moiso, ale mo tovi matavuhi na tahisana peresi na tavytavuina peresi na tapalana ūhuřuhu la lo saovia. ²⁵ Peter mara mo unu, Cornelius mo tapaia, mo jovi sivo na palona ale mo lotua. ²⁶ Pani Peter mo sauva sahe aulu mara, “O turu, enau tamlohi matea sohem purongo!” ²⁷ Mara mo lo retireti peresia mo unu mo hite na vao tavera la lo takonahi saovia.

²⁸ Ale mo verea isara mara, “Kamim hasemim ka levosahia vara mo sopo tatahola vara Jew matea i pulutahi teni i rohi te tamlohi mara jara tinapua, pani God mo vujangia isaku vara a sopo tovi na tamlohi tinapua sohena tamlohi lumiha matea na nahon God. ²⁹ Ale kara ka vahařule matak, na mai tatahola vahatea. Ale nake, na opoia vara a usia vara mata sava ka vahařule matak?”

³⁰ Ale Cornelius mara, “Rani mo vati mo vano moiso, korong matan alo mo tolu natu na ravravi, na lo usiusi na imaku, ale vahatea purongo, tamlohi matea mo turu na nahoku mo ru na ruru la memera ³¹ ale mo verea mara, ‘Cornelius, God mo sopo ūromaliho na nom usiusi peresi na nom silesilea. ³² Ale matan haratu o ūrule tea la sivo Joppa la usi na tamlohi matea hijana Simon tapala hijana Peter. Enia mo lo toho na iman Simon, tamlohi vayahinau na huri maji matea na pahisa tasi.’ ³³ Ale na vahařule matam vahatea, ale engko ko ūromřuhu ko mai. Ale matana nakerihi, kamam mo isoiso kama lo toho na nahon God vara kama rongo vevuhi na sava mo retileu hinia isam vara o verea isamam.”

Iman Cornelius La Rongo Na Retřuhu

³⁴ Ale Peter mo tapulo retireti mara, “Varařuhu, nake natu na pa levosahia vara God mo sopo tametame tea, ³⁵ pani sava tamlohi na sava jara sei mo lo sile na oloolo isana, ale mo vai na hinau tatahola, enia

mo avulahi hinia. ³⁶ Ale ka levosahi retisohai atu sei mo lo silea isana tavytavuin Israel, mo retivujavujangi na Retřuhu mata tamata hin Iesu Křisto enia Moli nona tamlohi tari. ³⁷ Kamim ka levosahi vevuhi na sava mo masese Judea, mo tapulo Galilee hitahun paptijo atu John mo lo retivujavujangia ³⁸ hin Iesu mara Nazareth sei God mo viřonia na Tanume Tapu ale peresi na suiha. Enia mo hahau ūalihi mo lo vai na hina ūruh, mo vai na rojoa la tihai hin la haratu tiapolo mo lo vailejlejira matan God mo lo toho peresia.

³⁹ Kamam kama hite vevuhi la hinau sei na matamam mo vaira Judea peresi Jerusalem. La vilimateia na talopeilopei matea, ⁴⁰ pani God mo sauteterahia na hatolu rani, ale mo tinařihia vara i pala, ⁴¹ mo sopo isana tamlohi tari, pani isamam sei God mo pete viřoni kamam moiso vara kama pa hitea. Hitahun haratu mo lo turu na mateia, kamam natu, kama hanhani ale kama inu peresia. ⁴² Mo retileu isamam vara kama retivujavujangia na tamlohi ale vara kama ūtirořohahira vara enia natu haratu God mo viřonia vara i pa ari la haratu la mate peresi la haratu la lo mauri. ⁴³ Přovet tari la vereulia vara sava tamlohi sei mo tau na nona rasua hinia, God i pa ūromi na nona hehe na hijana.

Tanume Tapu Mo Jovi Isara

⁴⁴ Peter mo pa lo vere la hinau atu, Tanume Tapu mo jovi isan la haratu enira mo isoiso sei la lo tapurongo na nona reti. ⁴⁵ Tamlohi ūrořoha sei la lo usuri Peter, la mařurahi tavera matan God mo surei na Tanume Tapu isana tamlohi ūrořoha sohera. ⁴⁶ Matan la rongora la lo retireti na leo tinatinapua la lo tahe na hijan God, moiso Peter mo verea mara, ⁴⁷ “Hare natu i eři horo na wai vara la tamlohi nika la sopo paptijo hinia? Matan enira sohena la lavi na Tanume Tapu sohera moiso.” ⁴⁸ Ale mo retileu isara vara la pa paptijo na hijan Iesu Křisto. Hitahun haratu, la usia vara i lo toho peresira makomona tako.

11

Kalesia Jerusalem La Rongo Na Sorasorahin Cornelius

¹ Ale, vahařule peresi la vorai atu la lo toho ūalihi Judea la rongoa vara tamlohi

řořoha la lavi na reti non God. ² Ale Peter mara mo sahe Jerusalem, Jew kalesia hai la verelejlejia lara, ³ “Avei, ko vano isana tamlohi řořoha, ale ko hanhani peresira.”

⁴ Pani Peter mo tapulo vereuli na sava mo masese mo tapulo na tapulona mara, ⁵ “Na lo toho na taon tavera matan Joppa na lo usiusi, ale hinau matea sohena mavuho matea mo pala isaku, ale na hite na hinau matea sohena tavalu ruru tavera jea matea mo lo sinai atano mo tai na tuka ale la tuhua hin la pingona atu mo vati mo sinai tataholo isaku. ⁶ Nara na kilau mamahunia, na hite na maji palo vati hai, maji jala hai, maji haraho hai peresi na maji avuavu tinatinapua hai sei la tapu mata hanira. ⁷ Ale na rongo na leo matea mo malue mo verea isaku mara, ‘O turu Peter; o vilimatei tea, ale o hanira!’

⁸ Pani na verea nara, ‘A sopo eři vaia sohena Moli; matan na sopo lo hani te hinau lumihā hatea sei leu mo horoa.’

⁹ Pani pa leo atu na tuka mo mele řaramiau haruana mara, ‘Sava na vaia mo vokevoke, o sopo eři verea vara mo lumihā.’

¹⁰ Hinau atu mo masese sohena vaha tolu moiso, la hinau tari atu la pa mele sahe na tuka. ¹¹ Vahatea atu, tamlohi mo tolu la pala hin ima atu na lo toho ea, la řulera Caesarea matak. ¹² Ale Tanumen God mo verea isaku mara a usurira, ale na sopo mele řomřomia vara enira la tamlohi tinapua. La tamlohi tupu limarave nike natu, la usuriau kama sahe, ale kama unu na iman tamlohi matea Caesarea. ¹³ Ale mo vereulia sohena sava mo hite angelo atu mo turu na lolo imana, ale mo verea isana mara, ‘O řule tea la sivo Joppa, ale la lavi Simon sei tapala hijana Peter; ¹⁴ ale i pa vereuli na retisohai matea sei o pa juri hinia, engko peresi na vao imam.’

¹⁵ Nara na tapulo retireti, Tanume Tapu mo jovi hinira sohen mo vaia isařa tiroma.

¹⁶ Ale na mele řomřomi na reti non Moli sei mara, ‘John mo paptijo peresi na wai, pani God i pa paptijo hin kamim na Tanume Tapu.’ ¹⁷ Vara God mo silera na otori sohen mo silea isařa hin rani atu řa rasu Moli Iesu Křisto, enau sava tamlohi vara a eři horoa?’

¹⁸ Lara la rongo la hinau atu la sopo mele retireti, pani la hasohaso God lara,

“Varařuhu, God mo tinařihia vara tamlohi řořoha la eři posí, ale la lavi na mauri sohera.”

Vao Kalesia Matan Antioch Matan Syria

¹⁹ Ale hin rani atu, la haratu sei la lo tipahira Jerusalem usuri na mate non Stephen, la sahe asau la kakau na jara sohen Phoenicia, Cyprus peresi Antioch. La sopo vere retisohai sei isan te tinapua pani isana Jew sei la lo retireti na leon Israel purongo. ²⁰ Pani tatuara enira mara Cyprus enia Cyrene sohena, ale lara la pala Antioch la verea isana tamlohi řořoha sei leora enia mara Greek, la lo retivujavu-jangi Moli Iesu. ²¹ Suihan Moli mo lo toho hinira, ale vao tavera sei la tamlohi řořoha la rasua, ale la posí mai isan Moli.

²² Sorasora atu mara mo pala na vao kalesia Jerusalem, ale la řule Barnabas mo sahe Antioch. ²³ Mara mo pala mo hiteuli na vavahinai řuhuřuhu non God isara, ale mo avulahi mo retituetuenira vara la lo toho řilangi varařuhu isan Moli, ²⁴ matan Barnabas enia tamlohi řuhu matea, Tanume Tapu mo mařivi hinia, ale nona rasua mo řilangi, ale matana, tamlohi matuvana la mele mai isan Moli.

²⁵ Matana, Barnabas mo vano Tarsus vara i ale Saul, ²⁶ ale mara mo tapaia, mo lavia mo sinai Antioch. Barnabas peresi Saul la lo pulutahi peresi vao kalesia atu, ale la vujangi na tamlohi matuvana ea mata tauni matea. Antioch natu, enia tiroma jara sei tamlohi rasua la lavi hija sei – kalesia ea.

²⁷ Ale hin la rani atu přovet hai la tai Jerusalem la sahe Antioch. ²⁸ Vonara matea hijana Agabus mo turu, ale mo re-timangovi na suihan Tanumen God mara marua tavera matea i pa jovi na varama, ale hinau atu mo masese hin rani atu Claudius mo lo supe nona mara Rome.

²⁹ Ale matana, tamlohi usuri Antioch la hatihia vara la pa sile te tuetueni isana voraira peresi na vevoraira sei la lo toho Judea, la pa silea sohena vara la eři silea. ³⁰ Ale la vaia sohena, la sile na nora tuetueni isan Barnabas enia Saul vara la pa silea isan la haratu la lo kilau na kalesia Jerusalem.

12

La Vilimatei James

¹ Hin la rani atu, supe Herod Agrippa mo taurilati na kalesia hai vara i pa vaikomokomora. ² Mo retileu vara la vilimatei James, tasin John na sita vuro. ³ Ale mara mo hitea vara Jew la avulahi hinia mo mele taurilati Peter sohena, harihi mo masese na rani Passover. ⁴ Mara mo tauria mo taua na ima ūilangi, mo taua na lima vao tamlohi vuro mo vati sei tupu vati na vao matea. Herod mo lo ūromōmia vara i pa lavi Peter i malue vara i aria na naho tamlohi hitahu na Passover. ⁵ Ale Peter mo lo toho atu na ima ūilangi, pani vao kalesia Jerusalem la lo usiusi ūilangi isan God matana.

Angelo Matea Mo Tiroma Hin Peter

⁶ Ale hin vutepongi atu sei vara i rani sahe supe Herod i pa vaia i turu na aria, Peter mo lo juruvi na livuha tamlohi vuro mo rua, la liho na limana na jen, ale hai la lo turu na pelatin ima ūilangi atu. ⁷ Vahatea purongo, angelo matea non Moli mo pala na pahisan Peter na lolon jara atu mo lo toho hinia na ima ūilangi, ale mera matea mo merasahi jara atu. Mo hoti Peter na rorona, ale mo ūrohaia mara, "O turu vila." Ale jen la jovi nařihi na limana. ⁸ Ale angelo atu mo verea isana mara, "O ruru ale o ru na nom sabat!" Ale mo vaia sohena. Ale mo mele verea isana mara, "O tavuhoroho na nom ruru tavera, ale o usuriau."

⁹ Ale Peter mo malue mo usuria. Mo sopo levosahia vara hinau atu angelo atu mo lo vaia enia hina varařuhu, pani mo lo ūromōmia vara mo lo hite na hinau matea sohena mavuho matea. ¹⁰ Ale lara la jeu na tiroma vao tamlohi vuro peresi na harua vao tamlohi vuro sei la lo kilau na ima ūilangi, la sahe tataholo na pelati aen sei mata unu hin taon tavera atu. Pelati atu mo hasena roi matara, ale la malue la lo usuri na malele tavera matea, ale vahatea purongo, angelo atu mo tinarihi.

¹¹ Ale ūomin Peter mara mo mele mai mo hasena verea mara, "Nakerihi na levosahi mamahunia vara Moli mo ūrule na nona angelo vara i juriau na liman Herod peresi na hinau tari sei Jew la opoia vara i pa masese isaku."

¹² Mara mo levosahia, mo vano na iman Mary tinan John sei tapala hijana Mark. Ale tamlohi matuvana la lo pulutahi ea la lo usiusi. ¹³ Ale mara mo ūringi na pelatin rope ima atu, hařarihi volitusi matea hijana Rhoda mo mai vara i roi. ¹⁴ Mara mo rongovosahi na leon Peter, na nona avulahi mo sopo roi na pelati pani mo maro mo mele unu na ima mo vereulia isara vara Peter mo lo turu na pelati.

¹⁵ La verea isana lara, "Ko to, ko putu teni?" Pani mo verea mo ūilangi mara mo varařuhu, ale enira la lo verea vara, "Enia nona angelo!"

¹⁶ Pani Peter mo lo ūringi ale enira lara la roi, la hitea ale la mařurahi tavera. ¹⁷ Pani mo vai na matamata na limana vara la toho malum, ale mo vereulia sohena sava Moli God mo narihia hin ima ūilangi atu. Ale mo verea mara, "Ha vere la hinau nike isan James peresi na vorairā." Moiso mo malue mo vano na jara tinapua matea.

¹⁸ Na nahonaho rani tamlohi vuro tari na ima ūilangi atu la matahu tavera na sava mo masese isan Peter. ¹⁹ Supe Herod mo pala isara atu, ale mo alea pani mo sopo hitea, ale mo usi na retiusia hai isan la tamlohi vuro atu sei la lo kilaua moiso mo retileu vara nona tamlohi vuro tinapua la lavira la vano la vilimateira. Moiso Herod mo sivo mo hahau roto Judea mo vano Caesarea vara i lo toho atu.

Herod Agrippa Mo Mate

²⁰ Supe Herod Agrippa mo lolokoru tavera na mara Tyre peresi Sidon, ale la mai isana na ūromōmi matea, ale na rani Blastus patu volitusi non Herod mara mo majinga na ūromira moiso, la usia vara la eři sari tamata peresi Herod matan hara hinau mo lo tai na jaran Supe. ²¹ Ale hin rani atu sei Herod mo taua moiso, mo ru na nona ruru peravu mata supe, mo sakele na jara sakele mata supe, ale mo sile na nona retireti isara. ²² Tamlohi la lo ulo lara, "Aaah! Leo god matea nahai, mo sopo leo tamlohi!"

²³ Vahatea purongo, angelo matea non Moli mo vilijovia matan mo sopo sile na hasohaso isan God, ale hulesi la hania mo mate.

²⁴ Pani reti non God mo ulua mo vano mo vai na tamlohi matuvana tinapua la rasua.

²⁵ Barnabas enia Saul lara la vai vevuhi na sava la lo vano matana Jerusalem, la mele hilu matan Antioch la lavi John sei, tapala hijana Mark.

13

Tanume Tapu Mo Rule Barnabas Enia Saul

¹ Harihi enia hija p̄ovet hai peresi na tamlohi vujangi Antioch: Barnabas, Simon la tovia ‘tamlohi viriha’, ale Lucius mara Cyrene, Manaen enia vorain Herod Antipas matea, vaona la korohia, ale Saul. ² Na rani matea la tapuhoro na hanhani ale la pa lo lotu Moli, Tanume Tapu mo verea mara, “Ha tauhasehi Barnabas enia Saul mata noku voko atu na tovira matana.” ³ Hitahu na nora tapuhoro na hanhani peresi na usiusi, la tau na limara hinira ale la ūlula la vano na malelera.

Tiroma Hahau Non Saul

⁴ Ale Barnabas enia Saul, Tanume Tapu mo ūlula la sivo Seleucia na pahisa tasi, ale la vele na boti hin jara atu, la sivo na Ureuren Cyprus. ⁵ Lara la hoso Salamis, la retivuvajanggi na reti non God na ima lotu nona Jew. Ale John Mark mo lo usurira sohena nora tuetueni.

⁶ Lara la hahau roto ureure atu la kakau Paphos, la tataholo na tamlohi matea mo lo mahumahu na suihan tiapolo, enia Jew p̄ovet haluhalu matea hijana Bar-Jesus, ⁷ enia mo lo toho peresi na tamlohi aulu matan Cyprus sei supe non Rome mo taua atu, hijana Sergius Paulus, enia tamlohi lelevosahi matea. Tamlohi aulu atu mo vahaūule matan Barnabas enia Saul matan mo opoia vara i rongo na reti non God. ⁸ Pani Elymas tamlohi mahumahu atu mo retihorora matan mo sopo opoia vara tamlohi aulu atu i rongo te reti na rasua non Saul enia Barnabas hin Iesu.

⁹ Pani Saul sei tapala hijana Paul, Tanume Tapu mo mařivisia ale Paul mo kilau tataholo isana, ¹⁰ ale mara, “Engko natun Tiapolo, ko mařivi na halu peresi posposi tope na leu, meresahi nona hinau tari sei la ūhu, o pa isoiso na nom vailejleji na malele varaūhu non Moli pangisa? ¹¹ Ale nakerihi natu, liman Moli mo meresahi isam, ale o pa vuso, o pa sopo eři hite na mera alo matan te rani

makomona.” Vahatea purongo, matana mo nini ale ūroha mo sohonia, ale mo aleale tamlohi vara tea i tauri na limana i tiroma hinia. ¹² Tamlohi aulu atu mara mo hite hinau atu mo masese mo rasua, matan mo mařurahi tavera na vujangi matan Moli.

Paul Enia Barnabas La Sape Antioch

¹³ Moiso, Paul peresi na tapalana la mele malue Paphos na boti matea la sahe matan Pamphylia. La hoso na taon matan Perga. John Mark mo tinařihira atu natu, ale mo mele hilu mo sivo Jerusalem. ¹⁴ La mele malue Perga la sahe la pala Antioch matan Pisidia, ale na rani Sabbath la vano la unu na ima lotu nona Jew la sakele. ¹⁵ Hitahun na evievi mata Leu non Moses peresi na reti nona p̄ovet, patu tamlohi mata ima lotu mo sohai na retisohai isara mara, “La vorai, vara te nomim retisohai mata tueni na tamlohi, ha sinai ha silea.”

¹⁶ Ale Paul mo turu mo tahe na limana vara la tapurongo ale mara, “La tavitavuin Israel peresi kamim ka tamlohi ūroha sei ka lo sile na oloolo isan God, ha tapurongo:

¹⁷ God nona tavitavuin Israel, mo viřoni na nořa pua, ale mo vaira la ulua ūlangi hin rani atu la lo toho Egypt. Ale mo jurira na suihana la malue na mauri slev. ¹⁸ God mo lavi na rani ūlangi isara na jara haseto ho mata tauni ngavulu vati (40). ¹⁹ Ale hitahun haratu, mo vaikomokomo na mara jara tinatinapua mo limaravrua Canaan, ale mo sile na nona tamlohi hin jara atu sohena koruna. ²⁰ La hinau atu mariviti vara i lavi na tauni mo ngavulu sangavulu vati mo ngavulu lima (450). Hitahuna, mo silera na tamlohi ari mo tikeli na rani non p̄ovet Samuel. ²¹ Moiso, tamlohi la tangi matan vara te nora supe, ale God mo silera hin Saul natun Kish, tavitavuin Benjamin matea, ale enia mo aulu mata tauni mo ngavulu vati. ²² Pani God mo nařihia sohena supe, ale mo tau David na jarana. God mo retireti matan David mara, ‘Na hite David natun Jesse vara ūromina mo usuri na ūromiku matan enia i pa vai na hinau tari na masaloku.’

1 Sam 13.14

²³ Ale mahapin David, Iesu natu, enia haratu sei God mo sohaia usuri na nona retitauhi hinia sohena Jujuri non Israel!

²⁴ Hin la rani atu la tiroma na nona pala, John tamlohi paptijo mo lo retivujavujangi na tautauvin Israel vara la vahāri na nora hehe, ale la posa mai isan God la paptijo.

²⁵ Ale vavahinau non John mariviti vara i lo isoiso, mo verea vaha visa mara, ‘Ka ūromi vara enau hare? Enau mo sopo tamlohi atu, pani ha lo levosahia vara haratu mo lo mai hitahu hiniau, enau na sopo tatahola vara a uli na asi eve palona.’

²⁶ La vorai, kamim sei natun Abraham peresi kamim tari sei ka tamlohi ūrōra sei ka lo sile na oloolo isan God non Israel, retisohai matan juri akerihi, mo mai isařa mo isoiso. ²⁷ Tamlohin Jerusalem peresi na nora tamlohi aulu la mařivisi na retimangovi hin haratu la sile na talai isan Iesu vara i mate. La sopo hitevosahia vara enia haratu sei p̄rovet la lo uliuli matana, hina purongo vara la lo rongo na retireti nona p̄rovet tarea na Sabbath. ²⁸ La sopo eři tapai te malele vara i ori hinia, ale hina purongo hin haratu, la usi Pilate vara i vilimateia.

²⁹ Ale lara la mařivisi vevuhi na retimangovi mata nona mateia, la juria na talopeilopei, la taua na papa matea. ³⁰ Pani God mo sauteterahia na mateia! ³¹ Ale mo pala vaha visa isan la haratu sei enira tolu la tai Galilee la sahe Jerusalem, enira natu la vere la hinau sei la hitera isana tautauvin Israel.

³² Ale kama lo retivujavujangi kamim hin Retiřuhu atu matan retitauhi sei God mo vai isana nōra pua, ³³ vara retitauhi atu God mo mařivisia isara — natura hin haratu mo tahe Iesu sohen David mo ulia na harua psalm mara,

‘Engko Natuku,

nahapani na vujangia
vara enau Tamam.’

Psa 2.7

³⁴ Enia hina vararuhu matea sei God mo tahe Iesu na mateia matan vara i pa sopo ūrovo, hinau atu mo verea na Retitapu sei mara,

‘A pa sileho na leřuhu tapu peresi na reti-tauhi sei na vaia isan David.’

Isa 55.3

³⁵ Matana, mo mele verea na psalm tina-pua matea mara,

‘O pa sopo tinařihia vara nom Tamlohi
Tapu i hite na ūrovo.’

Psa 16.10

³⁶ Matan David, hitahun haratu mo vai na masalon God na nona rani, mo mate ale la tavunia peresi na tahisana, epena mo ūrovo. ³⁷ Pani haratu sei God mo lo tahea na mateia, epena i pa sopo hite na ūrovo.

³⁸ Matan haratu, la vorai ha levosahia vara hinia, kama lo retivujavujangia vara God i pa ūromi na hehe, ³⁹ ale vara sava tamlohi la tau na nora rasua hinia, la pa tatahola na nahon God, hinau sei Leu non Moses i sopo eři vaia hin te rani. ⁴⁰ Ha lo kilau! Ha sopo tinařihia vara retireti nona p̄rovet la lo vere kamim, matan la verea lara,

⁴¹ ‘Ha hitea la tamlohi kerekerehi,
ha mařurahi tavera hinia ale ha tihai!
Matan na lo vai na vavahinau matea
na nomim rani,
vavahinau atu ha sopo eři rasua,
hina purongo vara tea la vereulia
isamim.’’

Hab 1.5

⁴² Paul enia Barnabas lara la lo malue na nora ima lotu, tamlohi la usia mo ūrilangi isara vara la mele vere la hinau atu na tavalu wik na Sabbath. ⁴³ Jew matuvana peresi la haratu sei la posa la lavi na rasua nona Jew la lo lotu na ima lotu la usuri Paul enia Barnabas, ale la tupra rua atu la verea isara vara la turu ūrilangi usuri na ūromřuhu non God.

Paul Mo Vano Isana Tamlohi Rořoha

⁴⁴ Sabbath atu mo usuria, mariviti tamlohi tari hin taon tavera atu la sinai vara la rongora la retivujavujangi na reti non Moli. ⁴⁵ Pani Jew lara la hite vao atu, mereimerei mo mařivisia, ale la tapulo vereleji na sava Paul mo lo verea isara, la lo retisatihia.

⁴⁶ Paul enia Barnabas la ūromřilangi la ūramira lara, “God mo taua vara kama pa sile na Retiřuhu isana tautauvin Israel tiroma, pani matan ka ūruh hinia, ale matan ka hitea vara ka sopo tatahola vara ha lavi na mauri tui, kama pa silea isana tamlohi ūrōra. ⁴⁷ Matan Moli mo retileu hina isamam hin haratu mo verea mara, ‘Enau na vai kamim sohena malarani
isana tamlohi ūrōra,
vara ha lavi na reti mata juri i vano na
isoiso varama.’’

Isa 49.6

⁴⁸ La haratu sei la tamlohi ūrōra lara la rongora, la avulahi hinia ale la hasohaso na reti non Moli, ale la haratu sei God mo

viñonira mata mauri tui la rasua. ⁴⁹ Ale reti non Moli mo lo unu na jara tari hin jara tavera atu.

⁵⁰ Pani tamlohi tavera nona Jew la reve takonahi na hañai aulu sei la lo sile na ooloolo isan God peresi na tamlohi aulu matan taon tavera atu, ale la vai na vao matea la meresahi hin Paul enia Barnabas ale la tipahi nañihira hin jara tavera atu. ⁵¹ Pani la sañsañhi nañihira na tangotango palora matara ale la vano na taon tavera matan Iconium. ⁵² Ale tamlohi rasua atu la mañivi na avulahi peresi na Tanume Tapu.

14

Paul Enia Barnabas La Rohi Iconium

¹ Na rani Paul enia Barnabas la lo toho Iconium, la unu na ima lotu nona Jew, ale la retivujavujangi peresi na suiha mo vaia vao tavera jea matea isana Jew peresi la haratu la tamlohi ūroha la rasua. ² Pani Jew sei la sopo rasua, la ari posposi la haratu la tamlohi ūroha, ale la komo na ūromira la meresahi isan Paul enia Barnabas.

³ Mo vaia la toho mo peravu atu, ale la retivujavujangi mo sopo te matahu hinira, ale la vereuli na ūromruhu non Moli. Ale Moli mo vujangia vara nona retisohai sei mo vararuhu matan mo sile na suiha isana nona vahañule vara la eñi vai na matamata tavera peresi na hinau mañurahi. ⁴ Pani tamlohi hin taon tavera atu la patumasa, hai la turu peresi la Jew atu, ale hai la turu peresi la vahañule atu.

⁵ Vao matea mata Jew peresi la haratu la tamlohi ūroha peresi na nora tamlohi tatavera la hatihia vara la pa vailejlejira, ale la pa parura, ⁶ pani Paul enia Barnabas lara la levosahia, la rovo la vano na jara tavera Lycaonia, ale isan la taon tavera atu Lystra enia Derbe peresi na jara ūalihi ea, ⁷ ale la retivujavujangi na Retiruhu ea.

Paul Enia Barnabas La Rohi Lystra Enia Derbe

⁸ La pa lo toho atu Lystra la mai tataholo na tamlohi papao matea, mo vora palona la sati ale mo sopo lo hahau na maurina.

⁹ Tamlohi atu mo lo tapurongo mo ūruhu na retivujavujangi non Paul, ale Paul mo hitea ale mo hitevosahia vara enia mo rasua vara enia i eñi ūruhu. ¹⁰ Ale Paul mo verea isana na leo tavera matea mara, "O

turu!" ale tamlohi atu mo turu tataholo mo tapulo hahau.

¹¹ Ale vao atu lara la hite hinau atu Paul mo vaia, la ulo na leon Lycaonia lara, "La tamlohi nike enira god sei la tai na tuka la pala na epe tamlohi!" ¹² La tapulo tovi Barnabas vara Zeus sei god nona mara Greek, ale Paul enia god sei Hermes matan enia mo lo sile na retireti. ¹³ Temple non Zeus mo lo toho na jingoima ropaen taon tavera atu. Ale nona pñis peresi na vao la lavi na buluk peresi na ūrongo ūrongo la vaira na vira pahai, ale la lavira la vano na mataruan taon tavera atu, ale la tatamahu vara la pa vai na malamalai isan la vahañule atu.

¹⁴ Pani Barnabas enia Paul lara la rongovosahi na sava la lo verea, la ūrari na nora ruru ale la maro la vano na livuhan vao atu la lo ulo lara, ¹⁵ "La tapala, ka lo vai la hinau sei mata sava? Kamam tamlohi sohemim purongo. Kama mai matan vara kama sile na Retiruhu isamim matan vara ha pa vaharí na hinau la sopo ūruhu, ale ha posi mai isan God sei mo mauri mo vai na tuka, varama, tasi peresi na hinau tari sei la lo toho hinira. ¹⁶ Tuai mo tinañihia vara la haratu la sopo levosahi God na jara tari la eñi usuri na masalora, ¹⁷ pani mo vujangia vara enia mo lo mauri na hina ūruhu mo lo vaira sohena usa mo jovi na masapa ale hanhani la ūruhu, ale ka masu na hanhani ka avulahi matana."

¹⁸ Pani hina purongo hin haratu, Paul enia Barnabas mariviti la sopo eñi horo la vao atu vara la sopo vai na malamalai isara.

¹⁹ Pani Jew hai la tai Antioch peresi Iconium, la mai la posi na ūromin la vao atu la meresahi hinira, ale la paru Paul ale la reve tahitahia mo malue hin taon tavera atu matan la ūromi vara mo mate. ²⁰ Pani tamlohi rasua lara la lo turu ūalihi, Paul mo mele turu ale mo mele unu hin taon tavera atu. Ale na rani tinapua matana, Paul enia Barnabas la malue la vano matan Derbe.

Paul Enia Barnabas La Sivo Antioch Matan Syria

²¹ Paul enia Barnabas lara la retivujavujangi na taon tavera matan Derbe la vai na tamlohi usuri matuvana. La mele hilu la sivo Lystra, Iconium ale la mele sahe

Antioch matan Pisidia, ²² ale hin la jara atu la tueni na rasua nona tamlohi usuri. La retituetuenira vara la turu ūilangi na nora rasua, ale la vere mamahunia isara lara, “Ra pa unu hin mauri atu God mo aulu hinia na malele rani ūilangi matuvana.” ²³ Paul enia Barnabas la vīroni na patu tamlohi mata kilau na vao kalesia tari, ale na usiusi peresi na tapuhoro hanhani la taura na liman Moli sei la lo tau na nora rasua hinia. ²⁴ Moiso la mele sivo roto Pisidia vavano la tikeli Pamphylia. ²⁵ Hin jara atu la mele retivujavujangi Perga moiso la sivo Attalia.

²⁶ La malue hin jara atu la vele na boti la vano Antioch matan Syria, jara atu sei la lo tapulo na nora hahau ea, jara sei la taura na liman ūomruhu non God ea matan voko sei la isoiso hinia natu. ²⁷ Lara la pala, la tovi matavuhi na vao kalesia na jara matea, ale la vereuli vevuhi na sava God mo vaia isara ale sohena sava mo roi na malele mata rasua isan la haratu la tamlohi ūoroha. ²⁸ Ale la lo toho peresi na tamlohi usuri Antioch mo peravu makomona.

15

Council Tavera Nona Kalesia Jerusalem

¹ Pani tamlohi hai la tai Judea la sinai la tapulo vujangi na kalesia vara, “Vara ha sopo taiālihi sohen leu non Moses mo verea, ha pa sopo eři juri!” ² Paul enia Barnabas lara la rongoa la sopo avulahi, la vauriuri tavera peresira matana. Ale vao kalesia atu la vīroni Paul enia Barnabas peresi na nora tamlohi hai, vara la sivo Judea matan la sahe Jerusalem vara la sorahia peresi na vahařule tolu na tamlohi tatavera nona vao kalesia Jerusalem. ³ Vao kalesia Antioch la ūulerla la sivo, ale lara la lo sivo la rohi Phoenicia peresi Samaria, ale la sorahia sohena sava la haratu la tamlohi ūoroha la pos, ale vorai kalesia hin la jara atu la avulahi tavera matana.

⁴ Ale hin rani atu la kakau Jerusalem, kalesia tari, vahařule peresi na vajiahara, la lavi Paul enia Barnabas na avulahi. Ale la vere vevuhi na sava God mo vaia na nora vavahinau. ⁵ Pani tamlohi rasua hai sei la tai na vao Pharisee, la turu lara, “Ha vujangi la haratu la tamlohi ūoroha vara la pa taiālihi, ale la pa usuri na leu non Moses.”

⁶ Vahařule peresi na vajiahara la pulutahi vara la sorahi hinau sei. ⁷ Retireti matuvana la vano moiso, Peter mo turu ale mara, “La vorai, ka levosahia vara tiroma God mo vīroniau vara a vano a retivujavujangi isan la haratu la tamlohi ūoroha, matan vara la eři rongo na retisohai mata Retiruhu, ale la rasua.” ⁸ God sei mo levosahi na mapu tamlohi, mo vujangia vara enia mo avulahi hinira, matan enia mo sile na Tanume Tapu isara sohen mo lo silea isařa nike. ⁹ Na nahon God, enřa ūa sopo tinapua hinira, matan mo vai na mapura la vokevoke na rasua sohena. ¹⁰ Ale vara mo sohena, mata sava ka lo vahite God, matan ka opoia vara ha tau na tetehi puhoni isana tamlohi usuri sei la tamlohi ūoroha? Hinau sei, enřa teni nořa pua la sopo eři solotia! ¹¹ Pani ūa rasua vara God i pa juriřa na ūomruhu non Moli Iesu sohera.”

¹² Ale ūomřomi atu mo moti, ale tamlohi tari la tapurongo isan Barnabas enia Paul, la sorahi na matamata tavera peresi na hinau mařurahi sei God mo lo vaira na naho tamlohi la tamlohi ūoroha.

¹³ La retireti mo isoiso, James mo turu mo verea mara, “La vorai, ha tapurongo isaku. ¹⁴ Ka rongoa Simon Peter mo verea moiso sohena sava God mo ūrulea isana tamlohi ūoroha vara i lavi nařihi na nona tamlohi isara. ¹⁵ Ale reti nona přovet la majinga hin hinau sei sohen la ulia na Retiulia lara,

¹⁶ ‘Hitahun hinau sei a pa mele pala,
ale a pa mele voro na jaran supe David
sei mo jovi.

A pa mele voroa hin la sopesopena sei
la lo toho,
ale a pa mele turuhia,

¹⁷ matan vara tamlohi tinatinapua na
varama la pa hite Moli ea,
la haratu sei la tamlohi ūoroha sei,
na tovira moiso vara la pa noku.
Harihi enia sava Moli mo verea.’

Amos 9.11-12

¹⁸ Haratu sei mo lo vereuli la hinau nike
tuai moiso.

¹⁹ Matan haratu, noku kilakilau ūa sopo
mele sile te rani ūilangi tinapua isana tamlohi ūoroha sei la lo pos la mai isan God,

²⁰ pani mo ūruhvara ūa uli te leta hatea
mata i verea isara vara i horora vara la
sopo hani na mit sei la silea isana tamasi

moiso, ale vara la toho asau na mauri maji, ale vara la sopo hani te maji sei la punia, ale la sopo inu na ūae.* ²¹ Matan la leu nike non Moses la retivujavujangira na ima lotu nona Jew na taon tavera tari na Sabbath mata tauni mo visa moiso.”

Leta La Ulia Isana Tamlohi Rořoha

²² Ale vahařule peresi na vajiahara peresi na vao kalesia Jerusalem, la vironi na tamlohi hai, ale la ūulera la sahe Antioch matan Syria peresi Paul enia Barnabas, vara la vereuli na ūaramin ūromřomi atu la lo hahau matana. La tamlohi atu la vironi na patu tamlohi nona vao kalesia mo rua, Judas sei tapala hijana Barsabbas peresi Silas. ²³ Harihi enia leta atu la lo lavia peresira:

“Retiololo isamim la vorai kalesia Antioch, Syria peresi Cilicia sei ka tamlohi ūrořoha, mo tai isana vorai kalesia nike Jerusalem, peresi na vahařule peresi na vajiah sei la aulu na vao kalesia nike.

²⁴ Kama levosahia vara tamlohi hai la tai nike la vano isamim ale la vai na ūomim la kaka na nora vujangi, pani kama sopo ūulera hin te hinau sohena. ²⁵ Ale matana, kama hitea vara mo tatahola vara kama ūrule la vahařule sei Judas enia Silas peresi la vorai ūruhu sei Paul enia Barnabas isamim usuri na ūromřomi kamam tari nike kama hatihia. ²⁶ Paul enia Barnabas sei mariviti la mate matan Moli Iesu Kr̄isto. ²⁷ Ale matana, kama lo ūrule Judas enia Silas vara la pa vereuli na sava kama ulia hin leta nike na nahomim.

²⁸ Matan kama majinga peresi na Tanume Tapu vara i pa mele ūahu vara kama sopo mele tau te retileu ūilangi isamim, pani la retileu nike mo visalete purongo:

²⁹ Vara ha sopo hanhani na mit sei la silea isana tamasi moiso, ale vara ha sopo hani te maji sei la punia, ale ha sopo inu na ūae, ale vara ha toho asau na mauri maji. Vara ha sopo vai la hinau atu, i pa ūahu jea isamim. Enia natu, enřa vuho.”

³⁰ Ale la vahařule tupu vati atu la malue, vahatea la sahe Antioch. La tovi matavuhi na kalesia tari la mai jara matea atu, ale la evi leta atu isara. ³¹ Ale avulahi tavera mo

jovi isana kalesia tari hin rani atu, lara la rongo retisohai ūahu atu.

³² Ale Judas enia Silas enira tupra rua la p̄ovet, ale la retireti mo peravu isana kalesia vara la tueni na nora rasua vara i ulua i mele ūilangi. ³³ La lo toho atu mata makomo rani moiso, la ūulera la mele sivo Jerusalem peresi na leřuhu nona kalesia isan la haratu sei la lo ūulera. ³⁴⁻³⁵ Pani Paul enia Barnabas la lo toho Antioch, la lo vujangi, ale la retivujavujangi na reti non Moli peresi na tamlohi tinapua hai.

Paul Enia Barnabas

³⁶ Rani hai la vano moiso, ale Paul mo vereea isan Barnabas mara, “Ra mele sahe ūa rohi na vorai hin la taon tavera tari sei ūa lo retivujavujangi na reti non Moli ea, ale ūa hitea vara la lo sohena sava.”

³⁷ Barnabas mo avulahi ale mo opoia vara i lavi John Mark. ³⁸ Pani Paul mo ūahu ūilangi, matan John Mark mo rovo hinira tiroma Pamphylia ale mo sopo tuenira na nora vavahinau. ³⁹ La sopo eři mai na ūromřomi matelete mo vaia Barnabas mo lavi John Mark peresia ale la vele na boti la sahe Cyprus, ⁴⁰ pani Paul mo vironi Silas ale la malue peresi na leřuhu nona vorai kalesia lamane peresi na hařai. ⁴¹ Mo sahe roto Syria peresi Cilicia mo tueni na vao kalesia tari ea vara la turu ūilangi na nora rasua.

16

Timothy Mo Usuri Paul

¹ Paul mo mele sahe mo mai Derbe, ale mo sahe Lystra. Hin jara atu mo tapai na uluvou matea enia tamlohi usuri matea, hijana Timothy, enia natun hařai Jew matea enia kalesia, pani tamana enia mara Greek matea. ² Vorai kalesia Lystra peresi Iconium la vereea vara enia tamlohi ūahu matea. ³ Paul mo opoia vara Timothy i usuria na nora hahau, ale mo lavia mo taiřalihi matan la Jew atu la lo toho hin jara atu la levosahia vara tamana enia mara Greek matea. ⁴ Lara la lo vano na taon tavera hatehateahi, la lo vereuli na sava sei vahařule peresi na vajiah sei lo aulu na kalesia Jerusalem, la hatihia vara tamlohi ūrořoha la pa oloolo hinira.

* **15:20:** maji sei la punia: mo sopo tatahola vara ūa hani na maji la punia matan ūaena mo pa lo mařivi na visihona.

⁵ Matana, vao kalesia tari la mele ulua ūlangi na nora rasua, ale evira mo lo sahe aulu na rani hatehateahi.

Tamlohin Macedonia Matea Mo Tovi Paul

⁶ Ale la sahe la hahau roto na jara tavera matan Phrygia peresi Galatia, matan Tanume Tapu mo horora vara la sopo sivo Asia mata la vere na retisohai non Moli ea.

⁷ Lara la mai Mysia, la vaihitea vara la sahe na jara matan Bithynia, pani Tanumen Iesu mo horora, ⁸ ale la mele hahau sivo roto Mysia moiso la sivo Troas.

⁹ Hin vutepongi atu hinau matea sohena mavuho matea mo pala isan Paul. Mo hite na mara Macedonia matea mo lo turu atu mo lo usia ūlangi mara, "O mai Macedonia, o tueni kamam!" ¹⁰ Paul mara mo hite mavuho atu moiso, kama turu vahatea, ale kama aleale malelemam vara kama vano Macedonia, kama levosahia vara God mo tovi kamam vara kama vano kama retivuvajvangi na Retiruhu isara.

Lydia Mo Rasu Na Retiruhu

¹¹ Ale kama vele na boti Troas kama sahe tataholo Samothrace, ale mo mele rani sahe kama hoso Neapolis, ¹² moiso kama malue atu kama lo sahe Philippi, enia taon tavera matan Macedonia, jara mara Rome matea. Kama toho atu mata makomo rani.

¹³ Ale na Sabbath kama malue na mataruan taon tavera atu, kama vano makomona na pahisa wai matea. Kama ūromi vara enia jara matea tamlohi la lo pulutahi mata usiusi ea, ale kama sakele hin jara atu ale kama lo sorasora peresi la hařai atu sei la lo pulutahi atu. ¹⁴ Vonara matea, hijana Lydia enia mara Thyatira sei, enia taon tavera matea, enia mo lo vai na mania na ruru ūru sei perpel, ale matan enia mo lo lotu God, mo lo tapurongo isamam. Ale God mo roi na mapuna vara i rasu na sava Paul mo lo verea. ¹⁵ Ale mo lavi na baptijo peresi na vao imana, ale hitahuna, mo usia ūlangi isamam mara, "Vara na nomim kilakilau ka hitea vara enau na lo turu ūlangi hin Moli, ha mai na imaku ale ha lo toho ea." Ale mo verea mo ūlangi vavano kama majinga isana.

Paul Enia Silas Na Ima Rilangi

¹⁶ Kamara kama lo vano na jara mata usiusi, kama tapai na hařarihi slev matea sei tanume sasati mata vere na hinau i pa masese mo lo toho hinia. Ale nona tamlohi tavera la lo lavi na mania tavera matana.

¹⁷ Mo lo usuri kamam peresi Paul, mo lo ulo aulu mara, "La tamlohi nike enira la volitusi non God sei mo Aulu Jea, enira la lo retivuvajvangi kamim na malele mata juri."

¹⁸ Ale mo lo vai hinau atu sohena mata rani matuvana moiso, ale Paul mo malokona, ale mo posi vano isana mo verea isan tanume sasati atu mara, "Na retileu isam na hijan Iesu Kristo vara o malue hinia." Ale vahatea purongo mo tinarihia.

¹⁹ Pani nona tamlohi tavera lara la hitea vara malele mata nora mania mo pelati, la taurilati Paul enia Silas la reve tahitahira la sivo na jara maket, la vaira la turu na naho tamlohi aulu hin taon atu. ²⁰ Lara la lavira la mai la turu na naho tamlohi aria atu, la verea lara, "La mara Jew nike, la lo vai na ūrom tamlohi hin taon tavera nike la sopo sakele, ²¹ ale la lo vujangi na tamlohi na posposi hai mo sopo tataholo vara enřa mara Rome ūra lavira teni vara ūra vaira!"

²² Vao atu la tapulo turuleji hinira, ale la tamlohi aria atu la ūrari nařihi na ruru non Paul enia Silas, ale la retileu vara la hamajira na maja. ²³ Hitahun haratu la hamaji komokomora, la pulahira na lolo ima ūlangi, ale la retileu vara tamlohi ima ūlangi i lo kilaura vara la sopo mele malue. ²⁴ Mara mo lavi retileu atu sohena, mo pulahira sivo na jara matea na lolona vahatea. Ale mo sohoni na palora na koko tapea mo pilatira.

²⁵ Na livuha vutepongi, Paul enia Silas la pa lo usiusi ale la lo lalavete isan God, ale tamlohi tinapua na lolo ima ūlangi, la lo tapurongo hinira. ²⁶ Vahatea purongo, mihi tavera matea mo hisu, mo hisuhi ima ūlangi atu mo tikeli pulona vahatea, ale vahatea purongo pelati tari la roi, ale jen tari la jovi nařihi hinira enira mo isoiso.

²⁷ Tamlohi kilau na ima ūlangi mara mo turu mo hitea vara pelati tari la roi, mo reve nařihi na nona sita mo tatamahu vara i pa vilia enia hasena, matan mo ūromi vara la haratu la lo toho na lolo ima ūlangi la rovo moiso. ²⁸ Pani Paul mo ulo aulu isana

mara, "O sopo vaia! Matan kamam mo isoiso nahai kama lo toho!"

²⁹ Tamlohi atu mo ulo mata lamu ale mo maro matan lolon ima ūilangi atu vahatea, ale mo jovi na palon Paul enia Silas na nona matahu. ³⁰ Moiso mo lavira la malue ale mo usia isara mara, "La tamlohi tavera, a pa vai na sava vara a efi juri hinia?"

³¹ La ūaramia lara, "O tau na nom rasua hin Moli Iesu, ale o pa juri, engko peresi na vao imam." ³² Ale la vere na reti non Moli isana peresi la haratu sei la lo toho peresira na lolo ima. ³³ Ale hin vutepongi atu purongo mo lavira la vano mo hoje na matara maja isara, ale enia peresi na vao tari na imana la paptijo vahatea. ³⁴ Ale pa tamlohi atu mo lo kilau na ima ūilangi mo lavira la sahe na imana, ale mo tau na hanhani na nahora ale mo avulahi tavera peresi na vao imana, matan enira la tau na nora rasua hin God.

³⁵ Pani na nahonaho rani, la tamlohi aria atu la ūrule na nora police vara la verea isan tamlohi atu mata kilau na ima ūilangi lara, "O tinārihira!"

³⁶ Pa tamlohi atu mata kilau na ima ūilangi, mo vere retireti atu isan Paul mara, "Tamlohi aria, la vahaūule vara a tinārihi kamim. Ale matana, ha malue ha vano na tamata."

³⁷ Pani Paul mo verea isana police atu mara, "La tamlohi atu la hamaji kamam na naho tamlohi, la sopo usuri na posposi tataholo mata ari na tamlohi, hina purongo vara kama mara Rome, ale la pulahi kamam na ima ūilangi. Ale nake, la opoia vara la tinārihi kamam tamlohi la sopo levosahia? Mo sopo te malele sohena. Ha vano ha verera hinia vara enira la pa mai nike, ale la nařihiria kamam."

³⁸ La police atu la vere la retireti atu isan la tamlohi aria atu. Ale la tamlohi aria atu lara la rongoa vara Paul enia Silas enira mara Rome, la matahu tavera matana. ³⁹ Ale la mai la ūromtuhutuhu isara. Ale la lavi nařihira la usira ūilangi vara la malue hin taon tavera atu. ⁴⁰ Lara la malue na ima ūilangi, la vano la unu na iman Lydia, ale lara la hite na vorai kalesia atu la retituetuenira moiso la malue.

¹ Lara la hahau roto Amphipolis enia Apollonia moiso, la mai Thessalonica sei ima lotu nona Jew matea mo lo toho ea.

² Ale usuri na posin Paul, mo lo matavuhi peresira mata Sabbath mo tolu, ale mo lo vereuli na Retitapu isana tamlohi ea. ³ Mo lo vereuli mamahuni na Retitapu na nona vujangi sohena sava Křisto i pa lavi na rongohaji, ale i pa mele turu na mateia, ale mo verea mara, "Iesu akerihi natu sei na lo retivujavujangia isamim, enia Křisto atu." ⁴ Tatua Jew atu la rasua peresi na vao tavera mara Greek la lo lotu God peresi na hařai aulu matuvana, la avulahi vara la tapala peresi Paul enia Silas.

⁵ Pani tamlohi aulu nona Jew la mereimerei hinira, ale la lavi na tamlohi sasati hai hin vao tavera atu na jara maket, ale la vaira la mai vao meresahi matea, ale taon tavera atu mo tapulo roroa na leora.

⁶ Ale lara la sopo eři hite Paul enia Silas, la reve tahitahi Jason peresi na vorai kalesia hai, la vaira la turu na naho tamlohi aulu matan taon tavera atu, la ulo lara, "La tamlohi nike sei la lo posileji na varama, enira nahai la pala nike sohen la pete vaia na jara tinapua moiso, ⁷ ale Jason mo avulahi hinira mo taura na imana! Enira mo isoiso la lo turuleji na retileu non supe nona mara Rome matan la lo vere na supe tinapua matea hijana Iesu!"

⁸ Ale tamlohi peresi na tamlohi aulu matan taon tavera atu lara la rongo la hinau sei, ūromira la sopo sakele. ⁹ La tamlohi aulu atu matan taon tavera atu lara la lavi na mania mata volituhu non Jason peresi la vorai kalesia tinapua atu moiso, la tinārihira.

Paul Enia Silas La Kakau Berea

¹⁰ Hin vutepongi atu purongo, kalesia la ūrule Paul enia Silas la malue la vano Berea, ale lara la pala atu, la vano la unu na ima lotu nona Jew. ¹¹ Ale Jew matan Berea enira tamlohi ale lelevosahi, la jeu la haratu Thessalonica, matan la lo opoia jea vara la tapurongo hin retisohai atu na rani hatehateahi, ale la lo kilau usuri mamahuni na Retitapu matan vara la hitea vara mo sohena teni mo vono. ¹² Ale matana, vao tavera isara la rasua peresi na mara Greek aulu hai lamane

peresi na harai. ¹³ Pani Jew matan Thes-salonica lara la rongoa vara Paul mo lo retivujavujangi na retisohai mata reti non God Berea, la mai ea sohena, ale la vai na vao matea matan vara la vai na ūromi tamlohi la sati. ¹⁴ Ale vahatea purongo la vorai kalesia atu la ūrule Paul mo sivo na tasi, pani Silas enia Timothy la lo toho atu Berea. ¹⁵ La haratu la lo tiroma hin Paul la lavia mo sivo la tikeli Athens, ale Paul mo verea isara mara la vere Silas enia Timothy la sinai isana vila, ale la vorai kalesia atu la malue la sahe matara.

Paul Mo Retivujavujangi Athens

¹⁶ Ale na rani Paul mo lo saovira Athens, ūromina mo jovi tavera matan mo hite taon tavera atu mo mārivi na tamasi. ¹⁷ Ale mo lo vano na ima lotu nona Jew vara i retivujavujangi isara peresi na tamlohi ūrōra sei la lo lotu God ea, ale na rani hatehateahi mo lo vujangi na vao tamlohi sei la lo toho na jara maket.

¹⁸ Ale Paul mo mele sorasora peresi na tamlohi hai la lo usuri na vujangi non Epicurus peresi hai non Zeno sei la tovira Stoic,* ale hai la lo usia lara, “Tamlohi rongorongo vono nike mo lo vere na sava nahai?” Tatuara lara, “Vara o tapurongo usuria, o pa hitea sohena vara mo lo vujangi na rasua paro matea.” La pa verea sohena matan Paul mo lo retivujavujangi na Retiūhu matan Iesu peresi na nona sauteterahi. ¹⁹ Ale la lavi Paul la vano na council nora sei hijana Areopagus,[†] lara, “O eři vereuli kamam hin vujangi paro akerihi sei ko lo retivujavujangia? ²⁰ Matan ko lo vere na hinau paro hai nahai na peromam, ale kama opoia vara kama levosahi na ūramira.” ²¹ Mara Athens peresi na tamlohi mara jara tinatinapua sei la lo toho atu, tarea la lo opoia vara la lo sorahi na ūromi paro sei la pa pala purongo.

²² Ale Paul mo turu na naho vao matan Areopagus atu ale mara:

“Mara Athens, na hitea vara kamim ka ūrilangi na sava ka lo rasua, ²³ matan nara na lo hahau ūalihi, ale na hite na nomim

hinahinau mata lotu, ale na mele hite na uliuli matea mo lo toho na votavota vara,

Isana god matea kama sopo levosahia

Matan haratu a pa retivujavujangi kamim hin God atu sei ka lo lotua pani ka sopo levosahia.

²⁴ God atu sei mo vai na varama peresi na hinau tari hinia enia Moli matan na tuka peresi na varama, ale mo sopo toho na ima lotu sei tamlohi la lo vaira na limara, ²⁵ teni tamlohi la sopo volitusi isana na limara sohena vara enia mo opoitē hinaiusara, pani enia natu mo sile na mauri peresi na maromaro peresi na hinau tari isana tamlohi tari. ²⁶ Ale na tamlohi matea mo vai na tamlohi mara jara tinatinapu tarvara la toho na jara tari na varama, mo tau na nora rani ale mo tau na jara sei vara la pa toho ea, ²⁷ matan vara la pa ale God, ale la pa tarongo ale vara la tapaia, pani enia mo sopo toho asau hiniřa hatehateahi. ²⁸ Matan hinia, enřa ūra lo mauri, ūra lo vavahinau ale ūra lo toho, sohena nomim tamlohi lelevosahi hai la verea moiso lara, ‘Matan enřa sohena enřa taniana.’

²⁹ Ale matan enřa sei ūra natun God, ūra pa sopo ūromřomia vara God enia hinau matea la vaia na gold teni silver teni vatu, teni te niniu tamlohi la vai mamahunia usuri na ūromira. ³⁰ Matan haratu, hina purongo vara God mo lo kilau purongoi la haratu la lo toho na mauri ūrōra, pani nake, mo lo retileu vara tamlohi tari na jara tari vara la pa vahaři na nora hehe, ³¹ matan enia mo tau na rani matea moiso vara i pa ari na varama usuri na nona posposi tataholo jea na lima tamlohi matea enia mo vřronia, ale mo vujangia mo memera isana tamlohi tari hin haratu mo sauteterahia na mateia.”

³² Ale lara la rongo na retireti matan sauteterahi atu, hai la tapulo vaivaia. Pani hai lara, “Kama pa mele tapurongo isam matan la hinau akerihi hin te rani.” ³³ Ale Paul mo malue na naho tamlohin Areopagus atu. ³⁴ Pani tamlohi hai la usuria ale la

* ^{17:18:} Epicurus / Zeno: Epicurus enia Zeno la vujangi na nora kilakilau mata mauri isana tamlohi. Ale hai la usuria, la haratu la lo usuria la lo verea vara enira la tamlohi lelevosahi. Hija tamlohi usuri non Epicurus enia Epicurean, ale hija tamlohi usuri non Zeno enia Stoic. † ^{17:19:} Areopagus: Council akerihi enia mo lo kilau usuri na vujangi tari la lo unu Athens peresi na tamlohra.

rasu na sava mo lo verera. Vonara matea hijana Dionysius, enia tamlohi matea hin council tavera atu Areopagus, ale hařai matea hijan Damaris, ale mele tamlohi tinapua hai peresira.

18

Paul Mo Tapai Priscilla Enia Aquila

¹ Hitahun haratu, Paul mo malue Athens mo sivo Corinth. ² Ale mo tapala peresi na Jew matea hijana Aquila mara Pontus matea sei mo pa tai Italy purongo peresi narouna Priscilla, matan Claudius, supe matan Rome, mo retileu vara Jew tari la malue Rome, ³ ale matan Paul, enia nona voko mo sohera la lo vai na tent, ale mo lo toho peresira mo lo voko peresira.

⁴ Ale na Sabbath hatehateahi, Paul mo lo retivujavujangi isana Jew peresi na mara Greek na nora ima lotu ale mo lo vahitea vara la levosahia vara Iesu enia hare.

⁵ Silas enia Timothy lara la tai Macedonia la pala, Paul mo tau vevuhi na nona rani mata retivujavujangi na reti non God, ale mo lo vereulia isana Jew tarea vara Iesu enia Kristo atu la lo kilau matana.

⁶ Pani Jew lara la ūohu hinia, ale la verelejlia. Paul mo vai na tovongi matea mo vujangi na nona ūohu hinira hin haratu mo sařsařhi nařihi na tangotango na nona ruru ale mara, "Raemim i pa toho na patumim, mo sopo te noku hinau hinia! Mo tapulo nake, a pa vano isana tamlohi ūroha!"

⁷ Moiso, Paul mo malue hin nora ima lotu atu mo vano mo unu na ima matea mo lo toho na pahisan ima lotu atu, enia iman Titius Justus, tamlohi ūroha matea pani enia mo lo lotu God. ⁸ Pani Crispus, tamlohi aulu mata ima lotu atu, enia peresi na vao imana sohena la rasu Moli. Mara Corinth tinapua hai sei la rongo hinau atu, la rasua, ale la lavi na paptijo sohera.

⁹ Ale Moli mo vujangi Paul na hinau matea sohena mavuho matea hin vutepongi atu, mo verea isana mara, "O sopo matahu, o retireti, o sopo puni na jingom, ¹⁰ matan enau na lo toho peresihio, ale tea i sopo eři tikeli na epem vara i komoho, matan noku tamlohi hin taon tavera nike la mařivi." ¹¹ Matan haratu, Paul mo lo toho atu mata tauni matea vitu

mo limarave, mo lo vujangi na reti non God isara.

Paul Mo Turu Na Nahon Gallio

¹² Ale hin rani atu Gallio mo lo aulu hin Achaia, Jew la pulutahi jara matea la vai na vao tavera matea, ale la turuleji hin Paul, la taurilatia la vaia mo turu na naho jara aria vara la aria ¹³ lara, "Tamlohi akerihi mo lo verea isana tamlohi vara la lotu God na malele matea mo sopo usuri na posposi sei leu non Moses mo lo verea."

¹⁴ Paul mo tatamahu vara i pa retireti pani Gallio mo verea isan la Jew atu mara, "Vara hinau akerihi enia mata tope na leu matea, teni matan te vařen sasati, i pa tataholo vara a tapurongo isamim Jew matana, ¹⁵ pani matan enia mata nomim retireti peresi na hija tamlohi peresi na nomim leu, kamim purongo ha vai tataholoia. A pa sopo ari na hinau sohena."

¹⁶ Ale mo vai na nona tamlohi la sohai nařihira na nona jara aria. ¹⁷ Ale vao atu la taurilati Sosthenes, tamlohi aulu mata ima lotu nona Jew, ale la tapulo tamajia na naho jara aria atu purongo, pani Gallio mo sopo kilaura hinia.

Paul Mo Mele Vano Antioch Matan Syria

¹⁸ Paul mo mele toho Corinth mata rani matuvana moiso natu mo vere enřa vuho isana vorai peresi na vevorai kalesia atu. Ale mo vele na boti matea peresi Priscilla enia Aquila matan vara la vano Syria. Paul mo hiri nařihi na vuluna hin rani atu la pa

lo toho Cenchreae mata vujangia vara mo vai vevuhi na nona retitauhi. ¹⁹ Na rani la pala Ephesus, Paul mo tinařihi Priscilla enia Aquila la pa lo toho atu. Ale enia mo sahe mo unu na ima lotu nona Jew, ale mo retivujavujangi isara. ²⁰ Mara Ephesus lara la usia vara i toho peravu isara, mo verea isara mara mo vono, ²¹ pani mo vere enřa vuho isara ale mara, "Vara na masalon God, a pa mele mai isamim." Moiso la mele vele hin boti atu, la malue Ephesus. ²² Ale lara la hoso Caesarea, Paul mo sahe Jerusalem vara i sile na retioloolo isana vao kalesia ea tiroma, moiso mo pa sahe Antioch matan Syria.

²³ Mo lo toho atu mata makomo rani, moiso mo mele malue mo sahe mo ūalihi na jara matan Galatia enia Phrygia vara i

vai na tamlohi usuri hin la jara atu la mele ūlangi.

Apollos Mo Tapulo Na Nona Vavahinau

²⁴ Hin pungi atu Jew matea hijana Apollos mara Alexandria mo pala Ephesus. Ale enia tamlohi sorasora ūhu matea mo levosahi mamahuni na Retitapu. ²⁵ Mo lavi na nona levosahi matan Moli moiso, ale maurina mo lo vujangi na nona avulahi na nona retireti peresi na vujangi tataholo ūhu na hinahina vara ūhu hin Moli, pani nona levosahi mo tikeli na paptijo non John purongo. ²⁶ Mo tapulo na nona retireti na lolo ima lotu nona Jew mo sopo te matahu hinia. Pani Priscilla enia Aquila lara la rongoa, la tovi ūrohia vano hasena, ale la vere tataholoi na malelen God isana.

²⁷ Hitahu, Apollos mara mo opoia vara i sivo Achaia, vorai kalesia peresi na vevorai kalesia la retiuetuenia vara i vaia. Ale la uli na leta matea isana vorai kalesia Achaia vara la lavia. Mara mo pala isan la haratu la rasua atu, mo tuenira mo tavera usuri na ūromūhu non Moli, ²⁸ matan mo vilijovjovi vevuhi na ūromūmi nona Jew na naho tamlohi. Ale mo vujangira usuri na Retitapu vara Křisto atu enia Iesu.

19

Hatolu Hahau Mata Vavahinau Non Paul

¹ Ale hin rani atu Apollos mo lo toho Corinth, Paul mo hahau roto na uratan Asia mo pala Ephesus. Ale hin jara atu mo tapai na tamlohi usuri hai, ² ale mo verea isara mara, “Kamim ka lavi na Tanume Tapu hin rani atu ka tapulo rasua, teni mo vono?”

La ūramaria lara, “Mo vono, kama sopo lo rongoa vara te Tanume Tapu mo lo toho.”

³ Ale Paul mo verea mara, “Vara sohena, kamim ka paptijo na sava?”

Lara, “Paptijo atu John mo lo vaia.”

⁴ Paul mara, “Paptijo atu John mo lo vaia, enia paptijo mata vahaři na hehe, ale mo lo verea isana tamlohi vara la pa tau na nora rasua hin haratu mo lo mai hitahu hinia, enia mo lo vere Iesu sei.”

⁵ Lara la rongo hinau atu, la paptijo na hijan Moli Iesu, ⁶ ale Paul mara mo tau na limana hinira, Tanume Tapu mo mai

hinira ale la tapulo retireti na leo tinatinapua, ale la lo retimangovi. ⁷ Korong, enira tupu sangavulu ūromana mo rua.

Vavahinau Non Paul Ephesus

⁸ Ale Paul mo unu na ima lotu nona Jew, ale mo retivujavujangi mo sopo te matahu isana mata vitu mo tolu. Mo vere mamahunia vara mauri atu God mo aulu hinia mo sohena sava, ale mo vaira la hitevosahi na nona vujangi matan mauri atu. ⁹ Pani tatuara la lo turu ūlangi na ūromira hasera, ale la ūhu vara la rasu. La vereleleji rasua atu na naho tamlohi. Ale Paul mo malue mo lavi la tamlohi usuri atu peresia. Na rani hatehateahi la lo pulutahi na ima matavuhi matan Tyrannus, ale mo lo retivujavujangira ea. ¹⁰ Paul mo vaia sohena mata tauni mo rua matan haratu tamlohi tari sei la lo toho Asia, Jew peresi na tamlohi ūrohia, la rongo na reti non Moli.

La Natun Sceva Atu Mo Limaravrua

¹¹ God mo lo vai na matamata tavera tinatinapua na liman Paul. ¹² Ale matana, hina purongo vara te ruru kamoti teni ruru mata voko purongo la tia na huřin Paul, ale vara la lavira la vano isana tamlohi rojoa, mo vai na nora rojoa la tihai, ale tanume sasati la malue hinira.

¹³ Ale pani Jew hai sohena, la lo titiu nařihi na tanume sasati na taon la lo vano hinira, pani la vahitea vara la vaia na hijan Moli Iesu isan la haratu sei tanume sasati la lo toho hinira, ale la verea sohen harihi lara, “Na lo retileu ūlangi isam na hijan Iesu sei Paul mo lo retivujavujangia vara o malue!” ¹⁴ Vorai mo limaravrua la natun Jew matea hijana Sceva, enia mo lo hase verea vara enia přis aulu matea, enira natu la lo vai la hinau nike. ¹⁵ Pani lara la vaia, tanume sasati matea mo ūramaria mara, “Na levosahi Iesu, ale na levosahi Paul makomona, pani kamim sava tamlohi hin kamim?” ¹⁶ Pa tamlohi atu sei tanume sasati mo lo toho hinia mo kue matara mo hamajira vavano la levosahi, ale la hitea sohena la sopo eři mele vai te hinau, la turu la maro la rovo malamala, pani la loso na ūraera la vano.

¹⁷ Jew tari peresi na tamlohi ūrohia tari Ephesus la rongo sorasora akerihi, ale mo vaira la matahu enira mo isoiso. Ale hijan Moli Iesu mo lavi na hasohaso tavera

matana. ¹⁸ Matuvana hin la haratu sei la rasu Iesu, la sinai la turu nahonaho, la taviti na sava hehe la vaira. ¹⁹ Vao tavera sei la lo mahumahu, la lavi na nora puku mata mahumahu la takonahira jara matea, ale la sulira na naho tamlohi tari. Lara la evi na volin la puku atu hate-hateahi, evira mo isoiso mo tataholo na volvoli mata voko mata rani mo tari vaha ngavulu lima ^(50,000). ²⁰ Matan haratu, retisohai hin Moli mo ulua, ale suihana mo posi na mauri tamlohi matuvana.

Tamlohi Lotulotu Vono La Mai Jara Matea

²¹ Hitahun la hinau atu, Paul mo tau na ūromina vara i sivo Jerusalem, ale vara i hahau roto Macedonia enia Achai. Mo verea mara, “Vara na sivo atu moiso, na opoia vara a vano a hite Rome.” ²² Mo ūrule na nona tamlohi tuetueni mo rua, Timothy enia Erastus la vano Macedonia, pani enia mo mele toho atu Asia mata makomo rani.

²³ Hin la rani atu patumasa tavera matea Ephesus mo pala mata rasua hin Iesu. ²⁴ Mo tapulo na tamlohi matea hijana Demetrius, enia tamlohi matea mo lo vai na tamasi varihi mata nora Temple sei la tovia Artemis na silver. Ale enia peresi la haratu la lo vaira, la lo vai na mania tavera matana. ²⁵ Mo tovi matavuhi la tamlohi atu peresi la haratu la lo vavahinau na hinau mariviti i sohera, ale mara, “La tapala, ka levosahia vara nōra mauri tavytavi mo lo mai na nōra vavahinau. ²⁶ Ale ka hitea ale ka rongoa vara Paul akerihi natu, mo lo vai na tamlohi vao tavera la lo rasua, ale nake la lo vahāi hin nōra god Artemis, matan mo lo verea isara mara god sei tamlohi la lo vaira na limara purongo, la sopo god vararuhi, ale mo sopo vujangia nike Ephesus purongo, pani na jara tari Asia sei mo lo vano ea. ²⁷ I pa sopo sati purongo na nōra vavahinau mata tavytav, pani matan tamlohi la pa ūrom̄omi purongo na temple non god hārai aulu sei Artemis, enia peresi na tamlohi na jara tari Asia peresi na varama sei la lo lotua, la pa rongo i sati matan hijana mo jovi.”

²⁸ Lara la rongoa la lolokoru patura, ale la tapulo ngara lara, “Artemis nona mara Ephesus enia mo aulu jea!” ²⁹ Taon tavera atu mo māivi na uloulo, ale vao tavera

atu la maro la vano na nora jara tavera mata matavuhi, la lo reve tahitahi Gaius enia Aristarchus, tamlohi mo rua mara Macedonia sei la lo usuri Paul na nona hahau. ³⁰ Pani Paul mara mo opoia vara i unu hin jara matavuhi tavera atu, tamlohi usuri la horoa. ³¹ Mo sopo enira purongo pani tapalan Paul hai sohena, enira tamlohi aulu matan jara atu Asia, ale la sohai na retisohai matea isana la usia ūrilangi vara i sopo unu hin jara matavuhi atu.

³² Hin matavuhi atu, tamlohi hai la lo ngara mata hinau matea, hai la ngara na hinau tinapua matan matavuhi atu mo vaore hajavua, ale matuvana la sopo levosahia vara la lo matavuhi mata sava. ³³ Tatuara hin vao atu la ūrom̄omia vara enia matan Alexander, matan Jew hai la sohaia mo sahe na nahon matavuhi atu. Ale Alexander mo lo tahe na limana matan mo opoia vara i vere mamahunia na nahon vao atu, vara hinau nike Jew la sopo vaia. ³⁴ Pani vao atu lara la hitea vara enia Jew matea, la mele tapulo uloulo, ale la taurilati uloulo atu mata aoa mo rua lara, “Artemis nona mara Ephesus enia mo aulu jea!”

³⁵ Ale hitahun haratu, tamlohi tavera matan taon atu mara mo vaira la toho malum mo verea mara, “Mara Ephesus, sava tamlohi natu mo sopo levosahia vara taon matan Ephesus mo lo kilau mamahuni na temple non Artemis aulu peresi na vatuna sei mo jovi na tuka?

³⁶ Matan la hinau atu tea i sopo ēri halu hinira, mo ūruhu jea vara ha toho malum ha sopo rongorongo vono! ³⁷ Matan ka lavi la tamlohi nike la sinai nike, la sopo tamlohi mata vavanaho na temple teni la lo retisatihi nōra god hārai. ³⁸ Ale, vara Demetrius peresi la haratu la lo vai voko akerihi, la rongo mo sati matan tea, ima aria mo lo roi, ale tamlohi aria la lo toho purongo, mo ūruhu vara la usuri na malele leu ea. ³⁹ Pani vara ka mele opoi te hinau aulu hinia, ha pa vai tataholoia na nōra matavuhi tavera hitahu. ⁴⁰ Matan vara i vono, tamlohi tavera matan Rome, la pa sile na talai isan matavuhi tavera nike matan mo vaore hajavua, ale mo sopo te retireti ūruhu tea i ēri verea matan matavuhi nike.” ⁴¹ Mara mo vere la hinau

atu mo isoiso, mo ūlula la mule.

20

Paul Mo Mele Vano Macedonia Peresi Greece

¹ Matavuhi tavera atu mara mo isoiso, Paul mo tovi na tamlohi usuri la mai jara matea. Ale mo retituetuenira moiso mo vere en̄a vuho isara ale mo malue mo vano Macedonia. ² Na nona hahau mo lo vano mo retituetueni na kalesia na taon hatehateahi na malelena vavano mo pala Greece. ³ Mo lo toho vitu mo tolu atu, ale Paul mo tatahu mara i vele na boti matea i sivo Syria, pani matan mo rongoa vara Jew la hatihī moiso vara la pa vai te hinau isana, mo posa na ūromina ale mo mele sahe mo hahau roto Macedonia.

⁴ Tamlohi hai la lo usuri Paul sohen: Sopater mara Berea natun Pyrrhus; Aristarchus enia Secundus mara Thessalonica, Gaius mara Derbe; Timothy, Tychicus enia Trophimus matan Asia. ⁵ La tamlohi niki la vano Troas tiroma vara la lo saovi kamam ea. ⁶ Rani mata Passover la vano moiso, kama vele na boti matea Philippi, ale kama maro na tasi mata rani mo lima moiso, ale kama pa hoso isara Troas. Kama lo toho atu mata rani mo limaravrua.

Paul Mo Mele Vano Troas

⁷ Na Sunday, kamara kama pulutahi jara matea mata hanhani non Moli, Paul mo tapulo vujangi na tamlohi, pani matan mo tau na ūromina moiso yara i mele rani sahe i pa malue, mo vujangira vavano mo livuha vutepongi. ⁸ Kama lo sakele na jara matea mo aulu makomona na lolon ima atu kama lo toho hinia, ale lamu matuvana la lo hani hin jara atu, ⁹ ale uluvou matea hijana Eutychus mo lo sakele na windoa matea, ale mo lo tapulo juruvi ūromaliho, matan Paul mo retireti mo peravu. Ale mara mo juruvi ūromaliho hin jara atu sei mo aulu sohena ima mo tolu, mo jovi sivo na lepa mo mate. ¹⁰ Pani Paul mo sivo isana mo rautoho, ale mo tapea na limana ale mara, "Ha sopo matahu, mo lo mauri." ¹¹ Moiso Paul mo mele vele sahe aulu hin jara atu, ale mara mo tope na pereti ale la hania moiso, mo mele tapulo retireti peresira vavano mo rani, moiso mo malue isara. ¹² Ale la lavi

uluvou atu mo mule, ale la avulahi tavera matan mo lo ūruhū purongo.

Patu Tamlohi Kalesia Matan Ephesus

¹³ Kama vano tiroma na boti ale kama malue kama sivo Assos, matan vara kama pa tapai Paul ea, matan enia mo verea mara i pa hahau purongo i sivo atu, ale kama pa lingia atu. ¹⁴ Kamara kama tapai Paul Assos, mo vele na boti kama sivo Mitylene. ¹⁵ Kama malue atu ale mo mele rani sahe kama tikeli Chios, mo mele rani sahe kama pala Samos, ale mo mele rani sahe, kama tikeli Miletus.

¹⁶ Matan Paul mo opoia vara i jeu Ephesus matan vara i sopo mele toho matan te rani atu Asia matan mo lo vaivila vara i sivo Jerusalem tiroma moiso i pa rani mata Pentecost. ¹⁷ Kama hoso Miletus ale Paul mo sohai na retisohai matea isana patu tamlohi mata vao kalesia Ephesus vara la sinai la tapaia atu.

¹⁸ Lara la pala mo vere isara mara, "Kamim ka levosahi na mauriku hin rani atu na lo toho peresi kamim mo tapulo hin rani atu na tau na paloku Asia. ¹⁹ Na volitusi non Moli na posposi ūromatano peresi na tangi ale peresi na rani ūrlangi sei la mai isaku na sava Jew la hatihia matakua. ²⁰ Pani ka levosahi mamahunia vara hin la rani atu na sopo turu juha na noku retivujavujangi isamim matan te hinau sei vara i eři tueni kamim hinia. Ale na sopo turu juha hin te hinau na noku vujangi isamim na naho vao tamlohi teni na lolo ima hatehateahi, ²¹ ale na lo retivuhesi isana Jew peresi na tamlohi ūroha mata vahaři na hehe la mai isan God na rasua hin nora Moli Iesu.

²² Ale nakerihi, Tanume Tapu mo lo sohaiau vara a sivo Jerusalem, ale na sopo levosahi na sava i pa masese isaku atu, ²³ pani Tanume Tapu mo pete re-tiroařohaiau hinia moiso na taon tari sei na lo vano ea vara ima ūrlangi peresi na noku tipahi la lo saoviau ea. ²⁴ Pani mauriku i pa sopo ūruhū matan te hinau isaku vara a sopo vai vevuhi na sava Moli Iesu mo taua na limaku, enia vavahinau sei mata vereuli na Retiřuhu mata ūromruhu non God.

²⁵ Ale nakerihi na lo vere tataholoia kamim hinia vara i pa sopo te vonamim

hatea sei na lo hahau ūalihi na lo retivu-javujangi mauri atu God mo aulu hinia isana, i pa mele hiteau. ²⁶ Matan haratu, na lo verea vara mo sopo te noku hinau hinia na ūaemim. ²⁷ Matan na sopo turu juha vara a sopo vereuli kamim na ūromromi tavera tari non God.

²⁸ Ha hase kilau mamahuni kamim peresi na vao kalesia sei Tanume Tapu mo vai kamim ka aulu hinira, vara ha tiroma na vao kalesia non God sei mo volira na ūaena. ²⁹ Na levosahia, vara a malue isamim, tamlohi sasati sohena viriu jala la pa mai isamim, la pa komo na vao kalesia, ale la sopo eři ūromromira. ³⁰ Mo sopo haratu purongo pani na lolomim tataholo te tamlohi la pa turu la vujangileji na retivarařuhu matan vara la pa lavi te nora tamlohi usuri isamim. ³¹ Matan haratu, ha pa sopo peka, ha lo ūromromia vara, mata tauni mo tolu, tarea na lo retiroařohai kamim hatehateahi peresi na wai matakua.

³² Ale nakerihi, na lo tau kamim na li-man God matan vara ha pa sile na retiso-hai mata nona ūromřuhu. Retisohai nike i eři tueni kamim vara ha ūilangi, ale i sile kamim na koruna peresi la haratu sei God mo tapuhira.

³³ Ka levosahi mamahunia vara na sopo usi tea hin te silver, gold teni ruru. ³⁴ Kamim ka levosahi mamahunia vara enau peresi la haratu sei la toho pere-siau, kama lo hanhani na masumasuku purongo. ³⁵ Na noku tovongi na lo vujangi kamim hinia vara, vara ha lo vavahinau ha pa tueni la haratu la sopo ūilangi, ale ha ūromřomi na reti non Moli Iesu sei enia hasena mo verea mara, ‘Avulahi tavera i pa vano isan haratu sei mo lo silea mo jeu haratu mo lavia.’”

³⁶ Mara mo vere la hinau atu moiso, mo papaohi sivo atano peresira ale mo usiusi. ³⁷ Enira mo isoiso la tapulo tangi aulu, la raho Paul ale la pungosia, ³⁸ ūromira mo pa sati jea matan mo verea mara la pa sopo eři mele hitea, moiso la usuria la sivo vara la taua na boti.

21

Paul Mo Sivo Jerusalem

¹ Kamara kama tinařihira, kama malue vano na tasi, ale kama sivo tataholo na ureuren Cos, ale mo mele rani sahe kama pala

Rhodes, ale kama malue atu kama hoso Patara. ² Hin jara atu kama tapai na boti matea, mo tatamahu vara i sivo Phoenicia, kama vele hinia ale kama malue vano na tasi. ³ Kama kilau vano na ureuren Cyprus mo lo sale vara i tihai na marau-mam, ale kama lo sivo Syria, ale kama hoso Tyre matan boti atu i pa tinařihira na nona lavlavi atu. ⁴ Ale kama ale na tamlohi usuri hin jara atu ale kama hitera, kama lo toho peresira mata rani mo limaravrua. La lo ūarea isan Paul lara Tanume Tapu mo verea isara vara i sopo tau na palona Jerusalem. ⁵ Mo turu tetelehi na rani vara kama pa malue na boti, enira mo isoiso peresi na naroura, na natura, la usuri ka-mam kama malue hin taon tavera atu, ale kamara kama papaohi na oneone kama usiusi moiso, ⁶ kama vere enřa vuho isara hatehateahi moiso kama vele hin pa boti, ale enira la mele mule.

⁷ Kama mele tapulo na nomam hahau atu Tyre kama sivo kama hoso Ptole-mais, ale kamara kama tulahi na vorai kalesia peresi na vevorai kalesia atu moiso, kama lo toho peresira mata rani matea. ⁸ Mo mele rani sahe, kama malue kama sivo kama hoso Caesarea, ale kama unu na iman Philip. Enia evangelist matea, enia deacon matea hin la haratu mo limaravrua, ale kama lo toho peresia. ⁹ Venatuna mo vati la sopo lo lahi, ale la lo retimangovi.

¹⁰ Kama lo toho atu mata rani mo visa moiso, přovet matea hijana Agabus mo tai Judea mo sinai. ¹¹ Mo mai isamam, mo lavi na otin Paul, mo liho na limana peresi na palona hinia ale mara, “Tanume Tapu mo verea mara, ‘Hin malele akerihi natu, Jew matan Jerusalem la pa liho tamlohi atu sei otina nakerihi, ale la pa taua na lima tamlohi ūrořoha.’” ¹² Kamam peresi la haratu la lo toho atu, kama rongo hinau atu sohena, kama verea ūilangi isan Paul vara i sopo sahe Jerusalem.

¹³ Moiso Paul mo verea mara, “Ka lo vai na sava nahai? Matan nomim tangi mo lo vaiau na lo rongo mo sati! Matan enau na tatamahu moiso vara la pa lihoau, ale vara a mate Jerusalem mata hijan Moli Iesu.”

¹⁴ Ale matan kama sopo eři horoa, kama sopo mele vere te hinau pani kamara, “Ra

pa usuri na masolon Moli purongo."

Paul Mo Kakau Jerusalem

¹⁵ Hitahun la rani atu, kama tatamahu, ale kama sahe Jerusalem. ¹⁶ Tamlohi usuri mara Caesarea hai la usuri kamam, ale la lavi kamam la tau kamam na iman Manson mara Cyprus, enia mo mai tamlohi usuri tuai moiso. ¹⁷ Hin rani atu kama pala Jerusalem, vorai peresi na vevorai kalesia la lavi kamam na avulahi tavera.

¹⁸ Mo mele rani sahe, Paul mo usuri kamam kama vano vara kama hite James peresi na vajiah aulu na vao kalesia atu sei la lo toho atu. ¹⁹ Ale Paul mara mo sile na retiololo isara moiso, mo tapulo vereuli mamahuni na hinau tari God mo vaia isana tamlohi ūroha na nona vavahinau. ²⁰ Lara la rongoa la hasohaso God moiso, la verea isana lara, "Ko levosahia vorai vara Jew mo tari vaha visa moiso la tau na nora rasu hin Iesu pani la pa lo turu ūilangi na leu non Moses. ²¹ Ale la rongoa moiso vara ko lo verea isana Jew tari sei la lo toho na jara tamlohi ūroha vara la sopo mele usuri na leu non Moses, ale ko verea isara vara la sopo taiālihi na natura teni vara la sopo usuri na posīra matan tuai. ²² Vara mo sohena, ūa pa eīi vai na sava? La pa levosahia vara ko pala nike moiso.

²³ Ale matana, o pa vai na sava kama pa verea isam nakerihi: nomam tamlohi tupu vati nahai, la vai na retitauhi isan God moiso matan vara la pa hiri pilopilo, ²⁴ o lavira o vano peresira, o hase one-hiho usuri na leu non Moses peresira, ale o voli na nora silesilea matan vara enira la eīi hiri pilopilo. Moiso tamlohi tari la pa levosahia natu vara sava la lo rongoa matam enira hina purongo matan engko ko lo hahau usuri na leu.

²⁵ Pani isana tamlohi ūroha sei la rasua, kama pete sohai na leta moiso peresi na nomam ūromomi vara la sopo hani na mit sei la silea isana tamasi moiso, ale la sopo inu na ūae, ale vara la sopo hani te maji sei la punia, ale vara la toho asau na mauri maji."

La Taurilati Paul

²⁶ Moiso mo mele rani sahe, Paul mo lavi la tamlohi atu, ale enia mo hase vaia

mo vokevoke peresira, moiso mo vano na Temple mo vereuli na isoiso rani mata nora retitauhi mata vokevoke isana p̄is vara la pa sile na malamalai matara hate-hateahi.

²⁷ La rani mo limaravrua atu mariviti vara la isoiso, Jew hai matan Asia la hite Paul na lolo rope Temple. La halu na vao matea matan vara la pa taurilati Paul. ²⁸ La lo uloulo lara, "Tavtavuin Israel! Ha tueni kamam! Tamlohi nike natu mo lo vujangi na tamlohi tari na jara tari vara la ūrohu na nōa tamlohi, nōa leu ale jara tapu nike! Aulu hin haratu, mo lavi na tamlohi ūroha hai la unu na lolo rope Temple, ale mo vai jara tapu nike mo lumiha!" ²⁹ Matan hin rani atu purongo la hite Trophimus, mara Ephesus matea, mo lo toho peresi Paul Jerusalem, ale la lo ūromūomia vara mo lavia mo unu na lolo rope Temple.

³⁰ Ale tamlohi tari hin taon tavera atu la sopo mele sakele malum, ale tamlohi la maro jara matea, la tauri Paul ale la reve tahitahia mo malue na lolo Temple, ale va-hatea purongo mataruana la pelati. ³¹ Ale la pa lo vaihitea vara la vilimateia. Pani retisohai matea mo tikeli na commander nona tamlohi vuro non Rome vara tamlohi tari la lo vai na vaore rongorongo vono Jerusalem. ³² Vahatea purongo commander atu mo lavi na tamlohi vuro peresi na captain la maro la sivo hin vao atu. Ale vao atu lara la hite commander atu mo mai peresi la tamlohi vuro atu, la sopo mele tamaji Paul.

³³ Moiso pa commander atu mo sinai mo taurilatia, ale mo retileu vara la lihoa na jen mo rua, moiso mo usia vara enia hare ale vara mo vai na sava mo sati. ³⁴ Pani hai hin vao atu la lo ulo na hinau matea, hai la lo ulo na hinau tinapua, ale pa commander atu mara mo levosahia vara i pa sopo eīi lavuti na retivaraūhu matan vaore atu, mo retileu vara la lavi Paul i unu na patu ima mata vuro Jerusalem. ³⁵ Ale lara la mai na jara sevsevuti hin patu ima mata vuro atu, tamlohi vuro la tauri Paul aulu na pilira matan vao atu la lo vaihitea mo ūilangi jea vara la vilimateia, ³⁶ matan vao tamlohi atu la lo usuria la lo ngara lara, "Ha vilimateia!"

Paul Mo Retireti Isan Vao Tavera Atu

³⁷ Ale lara la pa lo lavi Paul mo lo unu hin patu ima mata vuro atu, Paul mo verea isan commander atu mara, “A eři vere na hinau matea isam?”

Commander atu mo hutua, mo ūaramia mara, “Avei, engko ko levosahi na leo mara Greek? ³⁸ Engko mo sopo pa mara Egypt atu sei mo lo tiroma na vao mata valum naturihi, ale sei mo tiroma na tamlohi mata vili na tamlohi mo tari vaha vati **(4000)** la vano na jara tano koru?”

³⁹ Paul mo ūaramia mara, “Mo vono! Enau Jew matea mara Tarsus hin Cilicia, enau matan taon aulu atu! O eři tinařihia vara a retireti isan la tamlohi nike?”

⁴⁰ Commander atu mara mo tinařihia, Paul mo turu hin jara sevsevuti atu, ale mo tahe na limana isan vao atu, ale lara la toho malum, mo retireti isara na leon tavitavuin Israel.

22

Paul Mo Tapulo Retireti

¹ Ale Paul mara, “La vorai peresi na vajahaa, ha tapurongo na sava a pa verea mata noku vavahinau.”

² Lara la rongoa vara mo lo retireti isara na leon tavitavuin Israel, la mele toho malum jea, ale mo verea mara, ³“Enau Jew matea, na vora Tarsus hin Cilicia, pani na ulua hin taon tavera nike, na lavi na noku lelevosahi isan Gamaliel usuri na posposi tatahola mata leu nona nořa pua, ale na lo ūilangi hin God sohen kamim nahapani. ⁴ Na lo tipahi na tamlohi hin rasua sei, hai la mate na noku vavahinau, na liho na lamane peresi na hařai na taura na ima ūilangi, ⁵ sohen přis aulu peresi na tamlohi tari mata council la eři verea matak. Na lavi na leta isara matan vara a lavia i vano isana voraiřa Jew, Damascus. Ale na pa lo vano na maleleku matan vara a taurilatira ale a tiroma hinira la mai Jerusalem vara la lavi na talai nike, ⁶ ale na pa lo vano mariviti Damascus, korong alo mo posi moiso, ale vahatea purongo, memera tavera matea mo sasari ūalihiau. ⁷ Ale na jovi sivo na lepa na rongo na leo matea mo verea isaku mara, ‘Saul, Saul, mata sava ko lo tipahiau?’

⁸ Ale na ūaramia nara, ‘Tamlohi tavera, engko hare?’

Ale mo verea isaku mara, ‘Enau Iesu pa mara Nazareth atu sei ko lo tipahia!’

⁹ La haratu la lo toho peresiau la hite memera atu, pani la sopo rongovosahi na leon haratu mo lo retireti isaku.

¹⁰ Ale na usia nara, ‘A pa vai na sava Moli?’

Ale Moli mo verea isaku mara, ‘O turu o vano Damascus, hin jara atu la pa vereho na hinau tari sei na viřoniho vara o pa vaira.’ ¹¹ Ale matan na sopo mele eři kilau matan memera tavera atu, la haratu la lo toho peresiau la tiroma hiniau na vano Damascus.

¹² Tamlohi matea hijana Ananias, mo lotu God tarea usuri na leu, ale Jew Damascus la verea vara enia tamlohi ūahu matea, ¹³ mo mai isaku, mo turu na pahisaku ale mo verea isaku mara, ‘Vorai Saul, o mele kilau!’ Ale vahatea purongo na kilau sahe na hitea.

¹⁴ Moiso mo verea mara, ‘God nona nořa pua mo viřoniho moiso, vara o pa levosahi na masalona vara o pa hite haratu mo Tatahola Jea, ale vara o pa eři rongo na retileu matea na jingona, ¹⁵ matan engko, o pa nona tuetueni isana tamlohi tari na sava ko hitea ale sava ko rongoa. ¹⁶ Ale nakerihi, ko lo saovi na sava? O turu, o lavi na paptijo, ale God i pa hoje nařihi na nom hehe, o tau na nom rasua na hijan Moli.’

¹⁷ Na rani na mele mai Jerusalem, ale na lo usiusi na lolo Temple, na hite na hinau matea sohena mavuho matea, ¹⁸ ale na hite Moli mo lo verea isaku mara, ‘O vila, o malue Jerusalem vila matan la pa sopo eři lavi na nom vereulia matak.’

¹⁹ Na verea isana nara, ‘Pani Moli, enira hasera la eři verea vara enau natu, na lo tau la haratu la rasuho na ima ūilangi, ale na lo hamajira na ima lotu nona Jew tari. ²⁰ Ale na rani nom tuetueni Stephen mo mate, na lo turu atu na majinga hinia, ale na lo kilau mamahuni na ruru non la haratu la lo vilia.’

²¹ Ale mo verea isaku mara, ‘O malue Jerusalem, matan a pa ūuleho o vano asau ūrove isana tamlohi ūrořha!’

La Ari Paul Na Lolo Patu Ima Mata Vuro

²² Vao atu la lo tapurongo hinia mo tikeli reti sei Paul mo verea mara, ‘La haratu la tamlohi ūrořha.’ Ale la ngaruhia lara,

“Ha vilimateia! Mo sopo tataholo vara i lo mauri!” ²³ La ngara ngara, ale la lo lanařihi na nora ruru peravu, ale la lo pulahi na tangotango aulu na masapa, ²⁴ ale pa commander atu mo retileu vara la lavia i unu hin patu ima mata vuro atu. Mo vere na nona tamlohi vara la pa rupia na asi maja mata lavi na ūarami nona retiusia, matan mo opoia vara i levosahia vara vao atu mo lo ngarahia mata sava.

Paul Enia Mara Rome Matea

²⁵ Lara la ūirahi Paul na jara mata tamaji na tamlohi moiso, Paul mo verea isana captain mata tamlohi vuro matea mo lo turu na pahisana mara, “Mo tataholo vara ha rupi na mara Rome matea na asi maja matea, pani ka sopo lo aria?”

²⁶ Pa captain atu mara mo rongoa sohena, mo vano isan nona commander, ale mo verea isana mara, “Ko levosahi na sava ko lo tatamahu vara o vaia? Matan tamlohi nika enia mara Rome matea!”

²⁷ Pa commander atu mo mai mo usia isan Paul mara, “O to verea isaku, vararuhu vara engko mara Rome matea?”

Ale Paul mo ūaramia mara, “He'e.”

²⁸ Ale commander atu mo ūaramia mara, “Enau na jalahi na mania tavera matan vara a eři mai mara Rome matea.”

Paul mara, “Pani enau, na vora mara Rome matea.”

²⁹ Ale la haratu sei la lo tatamahu vara la pa rupia na asi maja, la turu juha hinia vahatea. Pa patu tamlohi vuro aulu atu mo matahu matan mo levosahia vara Paul enia mara Rome tataholo matea, ale enia natu mo verea vara la lihoa.

³⁰ Mo mele rani sahe, ale matan pa patu tamlohi vuro aulu atu mo opoia vara i levosahia i ūruhvara Jew la lo tuvai Paul mata sava, mo uli nařihia ale mo retileu vara moli nona přis peresi na tamlohi tari mata council matan Jerusalem la mai jara matea. Ale mo lavi Paul ale mo vaia mo turu na nahora.

23

Paul Mo Turu Na Naho Council Jerusalem

¹ Ale Paul mo kilau tataholo isana tamlohi hin council atu, ale mara, “La vorai, na mauriku na nahon God mo tikeli nake, ūromiku mo sopo kaka hin te hinau.”

² Ananias přis aulu mara mo rongoa, mo verea mara la haratu la lo turu na pahisana la vojahia na jingona. ³ Ale Paul mo verea isana mara, “God i pa vojahiho, ko tapnetano! Ko sakele atu vara o ariau usuri na leu, moiso ko lo tope na leu na nom retileu vara la vojahiau.”

⁴ La haratu la lo turu mariviti la verea lara, “Ko ūrom vara mo tataholo vara o retisan přis aulu non God sohen haratu?”

⁵ Ale Paul mara, “La vorai, na sopo lo levosahia vara enia přis aulu. Matan na levosahia vara Retiulia mo verea vara, ‘Ha sopo veresati na nomim tamlohi aulu’.”

Exo 22.28

⁶ Moiso, Paul mo hitea vara sopen vao atu enia Sadducee, ale sopera enira Pharisee, ale mo ulo aulu isana tamlohin council atu mara, “La vorai, enau Pharisee matea, enau natu Pharisee. Na lo turu na aria matan na lo ūromtoho na sauteterahi!”

⁷ Mara mo verea sohena, vasvas matea mo malue isana Pharisee peresi na Sadducee ale vao atu la patumasa. ⁸ Matan Sadducee la verea vara mo sopo te sauteterahi, teni te angelo teni te tanume, pani Pharisee la rasu la hinau sei. ⁹ Ale vao atu la vaore tavera, tamlohi vujangi mata leu na vao Pharisee la turu ale la verea mo ūrlangi lara, “Kama sopo hite te hinau i sati isan tamlohi nika. I pa sohena sava vara te tanume ūruhvara teni te angelo mo lo retireti isana?” ¹⁰ Ale commander atu mara mo hitea, mo matahu vara la pa ūrariřari Paul, ale mo retileu vara nona tamlohi vuro la sivo la lavi nařihia na nora suiha, ale la mele lavia i vano i unu na patu ima mata vuro.

¹¹ Hin vutepongi atu Moli mo turu mariviti isan Paul ale mo verea mara, “O sopo matahu! Matan sohena nakerihi ko lo vereuliau nika Jerusalem, o pa vereuliau sohena Rome.”

La Hatihia Vara La Pa Vilimatei Paul

¹² Mo mele rani sahe, vao Jew matea la mai jara matea, la lihora na retitauhi matea vara la pa sopo tikeli te hanhani teni te wai vavano, la vilimatei Paul. ¹³ Vao atu sei la vai retitauhi atu mo jeu mo ngavulu vati (40).

¹⁴ La vano isana přis aulu peresi na vajiahara, ale lara, “Kama liho kamam na retitauhi matea vara kama pa sopo mele tikeli

te hanhani teni te wai vavano kama vilimatei Paul. ¹⁵ Ale nakerihi kamim peresi na tamlohi council ha vahařule matana isan patu tamlohi vuro aulu atu, vara i lavia i sinai isamim. Ale ha vaia sohena vara ha pa mele kilau usuri mamahuni na nona aria. Ale kama pa tatamahu vara kama vilia na malele, ale i pa sopo eři kakau nike.”

¹⁶ Pani natun vetasin Paul mara mo rongoa vara la pa luhu hinia, mo mai mo unu hin patu ima mata vuro atu mo vereulia isan Paul ¹⁷ Ale Paul mo tovi na captain matea hin la captian atu mara, “O lavi uluvou nike i sahe isan nom commander, ale uluvou nike i pa vere na hinau matea isana.”

¹⁸ Ale captain atu, mo lavia mo sahe isan nona commander ale mara, “Paul mo toviau mo usiau vara a lavi uluvou nike i mai isam, matan enia mo lavi na retisohai matea vara i pa silea isam.”

¹⁹ Pa commander atu mo tauri na limana, ale mo lavia la sivo enira hasera, ale mo usia mara, “Sava natu ko opoia vara o verea isaku?”

²⁰ Mo řaramia mara, “Jew la majinga moiso vara pavuho, la pa usiho vara o lavi Paul i sivo na council, vara la pa mele kilau usuri mamahuni na nona aria. ²¹ Pani o sopo tinařihia vara la haluhaluho matana! Matan tamlohi mo jeu mo ngavulu vati ⁽⁴⁰⁾ la pa luhu la lo saovia. La lihora na retitauhi matea moiso vara la pa sopo tikeli te hanhani teni te wai vavano la vilimateia. Ale nakerihi la tatamahu moiso, la lo saovi na nom majinga purongo natu.”

²² Moiso, commander atu mo řule uluvou atu mo mele malue, ale mo verea isana mara, “O sopo mele vere tea hin hinau akerihi ko verea isaku.”

La Lavi Paul Mo Sivo Caesarea

²³ Moiso, pa commander atu mo tovi na nona captain mo rua, ale mo verea isara mara, “Ha tatamahuni te tamlohi vuro i ngavulu sangavulu rua ⁽²⁰⁰⁾ vara la sivo Caesarea nohorihi na matan alo i limaravati na vutepongi, peresi te hos i ngavulu limaravrua ⁽⁷⁰⁾ peresi na tamlohire, ale peresi te tamlohi vuro mata sari i ngavulu sangavulu rua ⁽²⁰⁰⁾. ²⁴ Ha tatamahuni te hos non Paul vara i pa vele

hinia, ale ha lavi mamahunia i sivo isan Felix tamlohi aulu matan Palestine.”

²⁵ Moiso mo uli leta nike isan Felix mara,

²⁶ “Leta nike enau Claudius Lysias na lo uli na noku retioloolo mo vano isam Felix tamlohi aulu řuhuřuhu. ²⁷ Tamlohi akerihi, Jew hai la taurilatia ale la tatamahu vara la pa vilia ale na sinai peresi na noku tamlohi vuro ale kama nařihia, ale matan na levosahia vara enia mara Rome matea na lo matahia. ²⁸ Na lavia mo sivo na nora council matan na opoia vara a levosahi mamahunia vara la lo aria mata sava. ²⁹ Na hiteulia vara la lo tuvaia matan te hinau usuri na leu mata nora rasua, pani mo sopo matan te hinau vara i pa toho na ima řilangi teni i mate matana. ³⁰ Pani nara na levosahia vara la lo vai na malele matea vara la pa vilimateia, na řulea mo mai nike isam vahatea. Ale na verea isan la haratu la lo aria vara la pa lavi na nora retiaria sei la lo aria hinia la verea isam.”

³¹ Ale la tamlohi vuro atu la vaia usuri na nona retileu. La lavi Paul mo sivo Antipatris hin vutepongi atu. ³² Mo mele rani sahe, la tinařihia vara tamlohi vuro na hos purongo la sivo peresia. Ale enira la mele hilu la sahe na nora patu ima mata vuro Jerusalem. ³³ La tamlohi vuro na hos atu lara la pala Caesarea, la lavi Paul peresi pa leta atu la silea isan tamlohi aulu atu Felix. ³⁴ Tamlohi aulu atu mara mo evi leta atu moiso, mo usi Paul vara mo tai na sava jara, ale mara mo levosahia vara mo tai Cilicia, ³⁵ mo verea mara, “A pa sileho na masapa vara o retireti hin rani atu vara nom meresahi la pala nike.” Moiso, mo retileu vara la pa pelati horo Paul na jara matea na lolo ima tavera, iman Herod Agrippa.

24

Paul Mo Turu Na Nahon Felix

¹ Ale rani mo lima la vano moiso, Ananias pa přis aulu atu mo sinai peresi na vajiahai peresi na tamlohi retireti na leu matea hijana Tertullus, ale matan vara la sile na nora retiaria matan Paul isan tamlohi aulu atu Felix. ² Ale lara la tovi Paul mo sinai moiso, Tertullus mo tapulo aria mara:

“Tamlohi aulu Felix, kama lo toho na tamata mo peravu jea na ruhuruhum,

ale hina paro ūruhу hai la malue na jaramam usuri na nom kilakilau. ³ Kama lo vere la hinau nike na jara tari, ale na malele tari na nomam vere meje. ⁴ Pani matan vara a sopo mele taurilatiho i peravu, na lo usia isam vara o tapurongo isamam makomona purongo usuri na nom ūromruhu. ⁵ Matan kama tapaia vara tamlohi nike enia tamlohi lejileji matea, enia tamlohi matea mo lo vai na tamlohi la lo matavuhi mata vai na hina sati na jara tari Jew la lo toho ea na varama, ale enia patu tamlohi nona vao haluhalu matea la lo tovia lara vao mara Nazareth. ⁶ Mo sopo haratu purongo, pani kama tauria hin rani atu mo lo vahitea vara i vai na Temple i lumiha. ⁷⁻⁸ O pa eři tapai na retivarařuhу mata nomam aria isana hasena vara o usia.”

Paul Mo Raramira

⁹ Ale, la Jew atu sei la lo tapurongo usuria, la tapulo verelejlejia, ale lara hinau tari sei Tertullus mo lo verera la varařuhу.

¹⁰ Pa tamlohi aulu mara mo tahe na limana vara Paul i eři retireti, Paul mo ūramaria mara: “Matan na levosahia vara engko ko lo toho sohena tamlohi aria matea matan jara nike tuai moiso mo mai, mo vaiau na sopo matahu vara a vere na noku retireti. ¹¹ Ale vara ko opoia, o pa eři levosahia vara rani mo sopo lo jeu sangavulu ūromana mo rua na sahe Jerusalem mata lotu. ¹² La sopo tapaiau vara a lo vasvas peresi tea teni vara a lo tovi matavuhi na tamlohi matan vara la vai te hina sasati na lolo rope Temple, teni hin te ima lotu hatea teni na malele matan taon tavera atu Jerusalem. ¹³ Ale la tamlohi nike, la sopo eři pisuhiau hin te hinau hatea hin la hinau nike la lo ariau vara na vaira.

¹⁴ Pani na taviti vara na lo lotu God non nomam pua usuri na malele rasua hara sei la lo verea vara enia rasua haluhalu matea. Ale na lo rasu na hinau tari sei Moses peresi na přovet la ulia na Leu. ¹⁵ Enau na lo tau na noku ūromtoho isan God sohen la tamlohi nike vara i pa sauteterahi na tamlohi tari, la haratu la tataholo peresi la haratu la sopo tataholo. ¹⁶ Matan hinau atu natu, mo lo vaiau na lo vahitea tarea vara ūromiku i pa sopo kaka hin te hinau isan God teni isana tamlohi.

¹⁷ Tauni mo visa la vano moiso na sopo mele toho Jerusalem, ale na mele sinai ea peresi na otori nona noku tamlohi vara a silea isan la haratu la tilavono, ale vara a sile na noku silesilea mata malamalai, ¹⁸ sei na lo vaira hin rani atu la tapaiau na lolo rope Temple. Na pete vokevokе moiso usuri na nomam posposi, ale mo sopo te vao teni tea i lo vai na valum. ¹⁹ Pani Jew hai matan Asia, i pa ūruhу jea vara la lo toho akerihi na nahom nakerihi matan vara la tuvaiau hin te retiaria matan te hinau sati vara la eři verea matakа. ²⁰ O to usi la tamlohi nike vara sava hina sati natu, la hitea hiniau hin rani atu na lo turu na nahon council atu, ²¹ pani hinau matea purongo na ulo na verea na nahora nara, na lo turu nike na aria nahapani matan na rasu na sauteterahi nona mateia.”

²² Moiso Felix, matan enia mo levosahi mamahuni na malele nora rasua mo ūruhу, mo verea mara nora masapa mata sile na nora retireti mo isoiso, ale mo verea isara mara, “Sava rani vara patu tamlohi vuro aulu atu Lysias i sinai nike, a pa sile na noku ūromřomi mata nomim aria.” ²³ Ale mo retileu vara captain atu, i lo kilau mamahuni Paul na ima tavera atu purongo. Ale vara i sopo horoa na masalona, ale vara i sopo horo na tapalan Paul vara la opoia vara la mai la tuenia.

Felix Mo Tapurongo Isan Paul

²⁴ Rani mo visa la vano moiso, Felix enia narouna Drusilla sei enia Jew matea, la pala. Ale mo vahařule matan Paul vara la tapurongo hinia vara i verera hin rasua atu hin Iesu Kristo. ²⁵ Ale Felix mara mo rongo Paul mo lo sorahi na mauri tataholo, ale mata hase taurilatiho peresi na rani ari tavera sei mo lo mai, enia mo matahu tavera, ale mara, “O vano takо, ale vara te masapaku a pa mele vahařule matam.” ²⁶ Mo lo tapurongo hinia, pani mo lo ūromtau vara Paul i pa silea hin te mania na haři tamlohi, ale matan haratu, mo vahařule matana vaha visa vara i mai i sorasora peresia.

²⁷ Tauni mo rua la vano sohen haratu moiso, natu Porcius Festus mo pete lavi na jaran Felix, pani matan Felix mo opoia vara i vai na Jew la avulahi, mo tau Paul na ima ūrlangi.

25

Paul Mo Turu Na Nahon Festus

¹ Festus mo pala Caesarea ale rani mo tolu tinapua la vano moiso, ale mo sahe Jerusalem. ² Ale moli nona pris peresi na tamlohi aulu nona Jew la lavi na nora retiaria hin Paul la vano isana. ³ La usia isana vara i vai na sava la opoia matan Paul, la usi Festus mo ūlangi vara i vaharule vara i mai Jerusalem matan la hatihia moiso vara la pa luhu na malele vara la vilimateia. ⁴ Moiso Festus mo ūramira mara la lo taurilatia Caesarea, ale enia i pa mele sivo atu i sopo tuai. ⁵ Mo verea mara, “Ale, mo ūruhvara nomim tamlohi tatavera la sivo atu peresiau, ale vara tamlohi akerihi mo vai te hinau mo sati, la pa eři sile na nora retiaria.”

⁶ Ale Festus mo mele toho Jerusalem mariviti rani i sangavulu, moiso mo pa sivo Caesarea. Ale mo mele rani sahe mo sakele na jara sakele mata aria, ale mo retileu vara la lavi Paul i mai isana. ⁷ Paul mara mo pala, la Jew atu sei la lo tai Jerusalem la lo sinai, la turu ūliahia la lo tuvaia na hinau sasati hai sei la sopo eři vujangira vara la vararuhi. ⁸ Paul mo sile na nona retireti mata horora mara, “Na sopo vai te hinau i sati mata i vaiau a meresahi na leu nona Jew, teni na Temple, teni isana supe matan Rome.”

⁹ Pani Festus mo opoia vara i vai na Jew la avulahi, mo usia mara, “O pa avulahi vara o sahe Jerusalem vara o turu na aria na nahoku matan la hinau nike?”

¹⁰ Paul mo ūramia mara, “Nakerihi na lo turu na jara tatahola moiso mata aria na naho jara sakele mata ari non supe matan Rome. Na sopo vai te hinau i sati isana Jew sohen engko ko levosahi mamahunia.

¹¹ Vara na vai te hinau mo tatahola vara a mate matana, na sopo ūruhvara na mate. Pani vara na lo vokevole purongo, engko teni te hatea i sopo eři tauau na liman la tamlohi nike sei la opoia vara la vilimateiau. Na opoia vara a turu na nahon supe matan Rome!”

¹² Festus mo sorasora peresi na nona tamlohi tuetueni sei vara la sile te ūromromi hatea isana, moiso mo ūramia mara, “Ko opoia vara o turu na nahon supe

matan Rome, ale isan supe matan Rome o pa vano.”

Festus Mo Sorahi Paul Peresi Harua Supe Agrippa

¹³ Rani mo visa la vano moiso, harua supe Agrippa mo pala Caesarea peresi vetasina Bernice, matan vara la sile na nora ūolo isan Festus. ¹⁴ Hin la rani atu la lo toho peresia, Festus mo vereuli na sora-sora matan Paul isan supe atu matan vara i sile te retireti matana mara:

“Felix mo tau na tamlohi matea mo lo toho na ima ūlangi. ¹⁵ Na rani na lo toho Jerusalem, moli nona pris peresi na vajjaha nona Jew la vereau hinia, la usiau vara a sile na talai isana. ¹⁶ Na verea isara nara, mo sopo usuri na posposi nona mara Rome vara a sile te tamlohi na talai vara mo sopo lo lavi te masapa vara i turu nahonahoh peresira, ale i ūrami na retireti non la haratu la lo tuvaia.

¹⁷ Ale hitahuna, la mele usuriau la sinai nike, na sopo mele toho i peravu, pani mara mo mele rani sahe na sakele vara a aria. Ale na tovia vara i mai na nahoku. ¹⁸ Pani la haratu la lo tuvaia lara la turu, la sopo tuvai Paul hin te hinau sasati sohen na lo ūromromia. ¹⁹ Mo vono, la sopo turu jara matea na nora ūromromi matan te hinau mata nora rasua, ale mata tamlohi matea hijana Iesu sei mo mate, hara sei Paul mo lo verea vara mo mele mauri. ²⁰ Matan na sopo levosahia vara a pa vileiuli la hinau nike sohena sava, na usia isana vara mo avulahi vara i sahe Jerusalem ale i pa turu na aria ea. ²¹ Pani Paul mo opoia vara i lo toho tako na ima ūlangi, i lo saovi na ūromromi non nořa tamlohi tavera supe matan Rome. Matan haratu, na retileu vara la lo kilaua i tikeli rani atu a eři ūrulea i vano isan supe matan Rome.”

²² Moiso Agrippa mo verea isan Festus mara, “Enau na opoia vara a tapurongo hin tamlohi atu.”

Mo ūramia mara, “Pavuho o pa tapurongo isana.”

Paul Mo Turu Na Nahon Supe Agrippa

²³ Ale mo mele rani sahe, supe Agrippa peresi Bernice la mai na nora pohapoha, ale la unu na jara tavera atu mata matavuhi peresi na nora patu tamlohi

aulu mata vuro, peresi na tamlohi aulu matan taon tavera atu. Moiso Festus mara mo retileu, la lavi Paul mo unu. ²⁴ Ale Festus mara, "Supe Agrippa peresi kamim mo isoiso sei ka lo toho peresi kamam nakerihi, ka hite tamlohi nike natu sei tamlohi aulu nona Jew tari la lo usiau mo ūilangi Jerusalem peresi nike Caesarea, vara a taua na mateia. ²⁵ Pani na noku kilakilau na hitea vara mo sopo vai te hinau vara i lavi na mateia matana. Ale mara mo opoia vara i turu na nahon nōra tamlohi tavera, supe matan Rome, na majinga vara a pa ūrulea i sahe isana. ²⁶ Pani na sopo levosahia vara a pa uli na sava isan noku supe matana. Matan haratu, na revea mo sinai na nahomim tari, pani na nahom supe Agrippa, matan vara na isoison retireti akerihi, korong a pa ēri lavi te retireti vara a ulia. ²⁷ Matan na hitea vara mo sopo tataholo isaku vara a ūrule te tamlohi hatea sei mo lo toho na ima ūilangi vara la sopo vere mamahuni na nora tuvai matana."

26

Paul Mo Sile Na Nona Retireti

¹ Ale supe Agrippa mo verea isan Paul mara, "O ēri turu natu, o retireti."

Ale Paul mo turu mo tahe na limana ale mo tapulo retireti mara, ² "Enau na avulahi jea supe Agrippa matan engko natu o pa tapurongo na noku retireti matan la hinau nike tamlohi tatavera nona Jew la lo tuvaiau hinira. ³ Matan na levosahia vara engko ko levosahi mamahuni na posposi nona Jew peresi na retiusia sei tamlohi la lo sorahira tarea. Ale matan haratu, na lo usia isam vara o ūromperavu mata tapurongo isaku.

⁴ Jew tari la levosahi mamahuni na mau-riku, mo tapulo na lo uluvou peresi na tahisaku tataholo ale na rani na lo toho Jerusalem. ⁵ Vara la majinga la ēri verea vara enau Pharisee matea, vao matea sei la ūilangi jea mata nōra rasua. ⁶ Ale nakerihi na lo turu na aria, na lo ūromtoho matan retitauhi atu God mo vaia isana nōra pua vara i masese. ⁷ Supe Agrippa, noku tamlohi tavera, retitauhi atu natu mo vai la tavytavui tupu sangavulu ūromana mo rua atu la lo volitusi isan God tarea matana.

Matan ūromtoho atu natu, la Jew nike la lo tuvaiau matana. ⁸ Mata sava natu, mo ūilangi vara tea i rasua vara God mo lo sauteterahi na tamlohi mate?

⁹ Vararuhu, tiroma enau haseku na levosahi mamahunia vara mo tataholo vara a komo na tamlohi usuri non Iesu mara Nazareth. ¹⁰ Ale hinau atu natu, na vaia Jerusalem. Na sopo tau na tapuhi na ima ūilangi na suiha na lavia isana moli nona p̄ris purongo, pani na majinga vara la pa vilimateira. ¹¹ Vaha visa na rupira na asi maja matea na ima lotu nona Jew, ale na vahitea vara la retisati hin Kristo. Matan na lo lolokoru sasati hinira, na vano vara a tipahira na taon tavera na jara tinapua sohena.

¹² Na lo vai hinau atu natu hin rani atu na lo sahe Damascus, moli nona p̄ris la sileau na suiha vara a ēri vaia, ¹³ moiso na pa lo toho na maleleku korong alo mo posis noku tamlohi tavera, na hite na memera tavera matea mo tai na tuka, mo mera mo jeu na alo, mo sasari ūrahia peresi la haratu la lo hahau peresiau. ¹⁴ Kamara kama jovi sivo na lepa moiso, na rongo na leo matea mo retireti isaku na leomam tavytavui Israel mara, 'Saul, Saul, mata sava ko lo tipahia? Ko lo hasem hotiho!'

¹⁵ Ale nara, 'Engko hare tamlohi tavera?'

Ale Moli mo verea isaku mara, 'Enau sei Iesu haratu ko lo tipahiau. ¹⁶ Pani o turu! Matan na pala isam vara a vīroniho vara engko volitusi matea. Ale o pa vereuli na hinau ko hitera ale hin te hinau a pa mele vujangira isam. ¹⁷ A pa juriho isana tavytavui peresi la tamlohi ūrōoha sei na lo ūruleho vano isara, ¹⁸ matan vara o pa roi na matara vara la pa vahari na ūrōoha la mai na malarani, ale vara la malue na suihan Setan la mai isan God matan vara i ēri ūromi na nora hehe, ale la pa lavi na ūngara peresi la haratu sei God mo tapuhira mata nora rasua hiniau.'

¹⁹ Matan haratu supe Agrippa, enau na oolo olo hin hinau atu Moli na tuka mo vujangia isaku, ²⁰ ale matana, na vereulia isana mara Damascus tiroma, moiso isan la haratu la lo toho Jerusalem ale na jara tari Judea, ale isana tamlohi ūrōoha matan vara la pa vahari na nora hehe la mai isan God, ale la vujangia vara vararuhu la posis moiso na nora vavahinau ūruhu la

lo vaira. ²¹ Matan hinau atu natu, Jew la tauriau na lolo rope Temple, ale la lo vaihitea vara la vilimateiau. ²² Pani, na lo lavi na tuetueni isan God tarea mo tikeli nahapani, ale na lo turu na lo vereulia isan la haratu la tamlohi purongo, peresi la haratu la aulu, na sopo vere te hinau tinapua, pani haratu purongo sei p̄rovet peresi Moses la lo verea vara i pa masese; ²³ vara K̄risto i pa lavi na nona rani ūilangi, ale i pa tiroma hin la haratu la turu na mateia sohena malarani matea isana Jew peresi na tamlohi ūōroha.”

²⁴ Vahatea purongo, Festus mo ulo mara, “Paul, nom lelevosahi tavera mo vaiho ko putu!”

²⁵ Pani Paul mo ūaramia mara, “Noku tamlohi tavera Festus, na sopo putu, pani na lo vere na vararuhu na hinau na levosahi mamahunira. ²⁶ Matan supe Agrippa mo levosahi la hinau nike, ale na lo vere la hinau nike isana matan a sopo eři rasua vara enia mo sopo levosahi la hinau nike, matan la hinau nike la sopo masese hin te tavalu jara rihirihi hatea. ²⁷ Supe Agrippa, engko ko rasu na p̄rovet teni mo vono? Na levosahia vara ko rasura.”

²⁸ Agrippa mo verea isan Paul mara, “Ko ūom vara o eři vaiau na mai kalesia matea vila sohen harihi?”

²⁹ Paul mo ūaramia mara, “Vara i vila teni mo vono, pani na lo usiusi isan God vara engko peresi la tamlohi sei ka lo tapurongo isaku nakerihi, vara ha pa mai soheku – pani i sopo peresi na jen.”

³⁰ Moiso, pa supe atu mo turu ale Festus, Bernice peresi la haratu la lo sakele peresira la usuria, ³¹ ale lara la lo malue, la lo vereverea isara lara, “Tamlohi nike mo sopo vai te hinau vara i tataholo mata i mate matana, teni vara i vano na ima ūilangi matana.”

³² Agrippa mo verea isan Festus mara, “Tamlohi akerihi i eři malue purongo vara i sopo lo usia vara i turu na nahon supe matan Rome.”

27

Paul Mo Malue Vara I Sahe Rome

¹ Lara la hatihia vara kama pa malue matan vara kama sahe Italy, la tau Paul peresi na tatua tamlohi tinapua na ima

ūilangi na lima captain mata tamlohi vuro matea hijana Julius. Enia mo lo kilau na vao tamlohi vuro matea, ale vao tamlohi vuro atu la lavi na hijan nora supe matea matan Rome tuai sei Augustus. ² Kama vele na boti matea mo malue Adramyttium sei mo tatamahu vara i pa maro usuri na vusalean Asia, ale kama malue. Aristarchus mara Macedonia matea mo tai Thessalonica mo usuri kamam.

³ Mo mele rani sahe kama hoso Sidon, ale Julius mo kilau mamahuni Paul na posposi ūruhu, ale mo tinařihia vara i eři sahe i hite na tapalana matan vara la eři tuenia na nona vejuveju. ⁴ Kama mele malue atu kama sivo na tasi, ale kama maro na maumau ureuren Cyprus matan kama lo songai na langin hapuara hařua. ⁵ Kama maro roto na tasi tavera moiso, kama sahe usuri vusalean Cilicia ale Pamphylia. Ale kama hoso Myra hin Lycia. ⁶ Hin jara atu captain mata tamlohi vuro atu mo tapai na boti tinapua matea matan Alexandria mo lo sahe Italy, ale mo tau kamam hinia.

⁷ Kama maro malum na tasi mata rani matuvana, mo ūilangi pani kama mai mariviti Cnidus, pani langin hapuara hařua atu mo horo kamam, kama pa sopo eři mele vano. Ale kama posi sivo kama maro usuri na maumau ureuren Crete kama jeu na jingon Salmone. ⁸ Kama maro usuri na vusaleana, kama lavi na rani ūilangi. Ale kama mai na jara matea la tovia Fair Havens, enia mo lo toho mariviti na taon matan Lasea.

Kama Ori Na Langi Tavera

⁹ Matan rani ūruhu mo visa la vano purongo moiso, nomam hahau nakerihi mo pa mele sati jea matan taro hamariri tavera peresi na langi sati matan October mo pala moiso, ale rani mata tapuhoro na hanhani nona Jew mo isoiso tuai moiso. Ale Paul mo verea isara mara,

¹⁰ “La tamlohi tavera, na hitevosahia vara nořa hahau i pa isoiso na rani sati vara ūa malue akerihi nakerihi. Ale mo sopo hinahinau na lolo boti purongo la pa tihai, pani mauriřa sohena.” ¹¹ Pani pa captain atu, mo tapurongo na retireti non captain nona boti atu peresi na tamlohin boti atu, ale mo sopo tapurongo na sava Paul mo lo verea. ¹² Matan jara atu enia

mo sopo ūahu vara tea i eři toho atu na taro hamariri teni na taro langi, vaora la hatihia vara la malue atu. La lo ūomtaua vara la eři tikeli Phoenix, mo naho sivo Malahařua enia jara matea matan Crete ale jara ūahu mata luhu na langi, ale la pa toho atu na taro hamariri.

Langi Tavera Mo Vilira Na Tasi

¹³ Langin tahuna matea mara mo tapulo ivi malum, la lo ūomřomia vara la pa eři tikeli Phoenix. Ale kama reve nařhi na matalalavo, kama hapahapani usuri na vusalean Crete. ¹⁴ Pani mo sopo tuai, langi sati tavera matan Tokalau mo jovi mo malue hin ureure atu mo vili kamam. ¹⁵ Boti atu mara mo kali hinia, i sopo eři mele songaia, kama tavuti kama tinařhia mo sere kamam.

¹⁶ Kama sivo kama tikeli na maumau ureuren Cauda. Mo ūilangi pani kama taurilati boti rihirihi atu sei boti tavera atu mo lo revea. ¹⁷ Tamlohi voko mata boti lara la sau nařhia moiso, la talihi na tali na pangen boti tavera atu ale la liholatia. Ale matan la matahu vara langi i pa pulahi kamam kama hoso na rataratan Syrtis, la tuhu na timlen boti atu matan vara i taurilatira, ale la pa sivo malum purongo.

¹⁸ Mo mele rani sahe, matan langi atu mo tapulo ūari boti atu, tamlohi voko la tapulo pulahi na lavilavi sivo na lolo tasi. ¹⁹ Mara mo mele rani sahe la tapulo pulahi na hinahinaun boti atu peresi te hinau sei la hitera la lo toho toho purongo. ²⁰ Ale matan kama sopo mele hite na alo teni te vitusarasara mata rani matuvana moiso, ale langi atu mo sopo moti, kama sopo mele ūomtoho vara kama pa juri hinia.

²¹ Matan vao tavera la ūohu na hanhani, Paul mo turu sahe na livuhara, ale mara:

“La tamlohi, vara ha pa lo tapurongo isaku, vara ūa sopo lo malue Crete, ūa pa sopo eři lavi na rani ūilangi sohen harihi, teni vara ūa pulahi tihai te hinau na tasi. ²² Pani nakerihi, na lo vere kamim hinia vara ha sopo matahu, matan tea i pa sopo eři mate, pani boti akerihi purongo i pa tihai. ²³ Matan na vutepongi na hite na angelo matea non God sei enau nona volutusi, mo turu na pahisaku ²⁴ ale mo verea isaku mara, ‘Paul, o sopo matahu! O pa turu na nahon supe matan Rome, ale God

mo tinařhia vara tamlohi tari sei la lo toho peresiho la pa mauri.’

²⁵ Matan haratu, ha ūomřilangi la tamlohi, matan enau na tau na noku rasua hin God vara i pa sohen haratu mo verea isaku.

²⁶ Pani na levosahia vara boti akerihi i pa takosa hin te ureure hatea.”

Boti Mo Mai Mariviti Na Jarauta

²⁷ Na sangavulu ūomana mo vati vutepongi matan langi atu, langi atu mara mo lo pulahi kamam, kama lo sivo roto na tasin Adria. Tamlohi voko hin boti atu la levosahia vara kama lo mai mariviti na jarauta. ²⁸ Matana, la tuhu na asihai ale la hiteulia vara puahana mo tikeli na metre mo ngavulu vati ⁽⁴⁰⁾. Ale la mele sahe makomona la mele tuhu pa asihai atu, ale la mele hiteulia vara nakerihi natu puahana mo tikeli na metre mo ngavulu tolu moiso ⁽³⁰⁾.

²⁹ Ale matan la matahu vara kama pa kali hin te paranga, la tuhu na matalalavo mo vati na pulo boti, ale la opoia vara i rani vila. ³⁰ Moiso tamlohi voko la vahitea vara la rovo hin boti atu, la tuhu pa boti rihirihi atu, ale lara la lo vaia, o hitea sohena vara la pa tuhu na matalalavo na patun boti tavera atu. ³¹ Pani Paul mo verea isan nora captain mata tamlohi vuro atu peresi la tamlohi vuro atu mara, “Vara la tamlohi akerihi la malue hin boti akerihi, ha pa sopo eři juri!” ³² Moiso la tamlohi vuro atu la tai roto na asin pa boti rihirihi atu, la tinařhia mo sale.

³³ Mo pa lo nahonaho rani, Paul mo verea ūilangi isara vara la hani te hinau mara, “Nahapani enia harau wík natu sei ka sopo hani te hinau matan ka sopo levosahia vara ha pa mauri teni mo vono.

³⁴ Matan haratu, na lo verea ūilangi vara ha hani te hinau matan enia i pa tueni kamim vara ha pa sopo mate. Matan te vulun te vonamim hatea i pa sopo eři tihai na patuna.” ³⁵ Mara mo vere hinau atu mo isoiso, Paul mo lavi na pereti ale mo vere meje isan God na nahora mo isoiso matana, mo topea ale mo tapulo hania.

³⁶ Matan haratu, enira mo isoiso ūomira mo mele ūilangi ale la hanhani. ³⁷ Evimam hin boti atu mo tikeli ngavulu sangavulu

rua mo ngavulu limaravrua mo limarave ([276](#)).

[38](#) Lara la hanhani la masu, la pulahi na tanga wit mo sivo na lolo tasi matan vara i vai na boti i salesale.

Boti Mo Kali Na Paranga

[39](#) Rani mara mo pala, la sopo hitevosahi jara atu, pani la hite na jara luhu matea peresi na oneone, ale la hatihia vara la eři vaia vara boti atu i hoso hinia. [40](#) Ale la tai roto na asi mata matalalavo sei la lo toho na lolo tasi, ale la uli nařhi asihai atu sei mo lo tauri la stian boti atu jara matea, moiso la tahe na hapanin patu boti atu mo sahe na langi, la haloa mo sahe na oneone. [41](#) Pani la tia na jara matea tasi mo lo maro leji hinia, ale patun boti atu mo kali na ratarata mo ūlangi i sopo eři mele hisu, pani loloputu la lo tapulo kauti na pulo boti moiso.

[42](#) La tamlohi vuro atu la hatihia vara la pa vilimatei la tamlohi atu mata ima ūlangi matan vara tea i sopo olo i rovo. [43](#) Pani pa captain mata tamlohi vuro atu matan mo opoia vara i juri na maurin Paul, mo horora vara la sopo vai na sava la hatihia moiso. Mo retileu mara la haratu la eři olo la kue nařhi tiroma ale la olo sahe na jarauta, [44](#) ale sopera la pa lo hitahu, tea la pa keho hin te tavalu tapea teni te hinau i eři sale hin boti atu. Hin malele akerihi natu, tamlohi tari hin boti atu la jelu la sahe na jarauta hinia.

28

La Hoso Na Ureuren Malta

[1](#) Kama hoso na jarauta mo ūhu moiso, kama pa levosahia vara kama lo toho na Ureuren Malta. [2](#) Tamlohin jara atu la ūhu ūhu isamam hajavua, matan mo lo usa ale hamariri tavera. Ale la avulahi vara la lavi kamam, matan la polo na hapu tavera matea matan vara kama pa marijo hinia.

[3](#) Paul mara mo rako na oti rangaranga hapu matea, ale mo lo taua na hapu, mata sasati matea mo malue matan hapu atu ale mo katoho na limana. [4](#) Tamlohin jara atu lara la hite maji atu mo lo keho na liman Paul, la lo vereverea isara lara, "Mo sopo te retiusia vara tamlohi akerihi enia tamlohi vili tamlohi matea teni mo vono, hina

purongo vara mo juri na tasi, pani nořa god hařai sei Justice, mo sopo tinařhia vara i mauri." [5](#) Pani Paul mo pulapulahi nařhi maji atu mo sivo na lolo hapu, ale mo sopo rongo i sati. [6](#) Pani la tamlohi atu la lo kilau vara epena la pa sosohi teni i pa jovi i mate vahatea. Ale la lo saovi mo peravu moiso ale lara la sopo hite te hinau i vaia, la posi na ūmira lara enia god matea.

[7](#) Ale ūalihi hin jara atu lepa enia non patu tamlohi matan Malta, hijana Publius; ale enia mo avulahi hin kamam, mo lavi kamam mo lo kilau mamahuni kamam mata rani mo tolu. [8](#) Taman Publius mo rojo mo lo juruvi na vatana. Mo lo rongohaji na seserei peresi na jimajima. Paul mo unu mo sivo mo hitea, ale mo usiusi isana, moiso mo tau na limana hinia ale mo vai na nona rojoa la tihai. [9](#) Hinau atu mara mo masese mo isoiso, tamlohi matuvana hin ureure atu sei la rojo, enira sohena la mai isan Paul ale la mele ūhu. [10](#) Matan haratu, la sile kamam na hinau matuvana, ale kama lo tatamahu vara kama pa mele malue, la sile na hinau tari kama pa vejuveju hinira na boti.

Paul Mo Kakau Rome

[11](#) Vitu mo tolu la vano moiso, kama pa mele malue sivo na tasi na boti tinapua matea matan Alexandria sei mo lo luhu hin ureure atu. Ale na patuna la tai na patu god mo rua sei la tovira 'Havo Matan Tuka'.

[12](#) Kama maro kama hoso Syracuse na ureuren Sicily, ale kama lo toho atu mata rani mo tolu. [13](#) Kama malue atu kama hapahapani kama vano na jara tinatina-pua, ale kama sahe kama hoso Rhegium, ale mo mele rani sahe, langin tahuna mo sere, ale na harua rani kama hoso Puteoli. [14](#) Hin jara atu kama hite na vorai kalesia hai, ale la usi kamam vara kama pa toho peresira, ale kama lo toho atu mata rani mo limaravrua. Kama usuri na malele atu kama hahau kama sahe kama pala Rome.

[15](#) Vorai kalesia ūalihi hin jara atu lara la rongoa vara kama lo sahe Rome, la tai Rome la sinai vara la hite kamam. La jara atu la hahau matara la asau ūve sohen na taon sei Forum matan Appius peresi Ima Mo Tolu atu mata tamlohi hahau. Paul mara mo hitera, mo vere meje isan God ale mo mele ūlařilangi.

¹⁶ Kamara kama unu Rome, la tinařihia vara Paul i eři toho enia hasena peresi na tamlohi vuro matea mo lo kilaua.

Paul Mo Retivujavujangi Isana Jew Rome

¹⁷ Rani mo tolu la vano moiso, Paul mo tovi na tamlohi tavera nona Jew hin jara atu la mai jara matea. Lara la sakele matavuhi moiso, mo verea isara mara:

“La vorai, hina purongo vara na sopo vai te hinau i sati isana nořa tamlohi teni na posposi nona nořa pua, la taurilatiau Jerusalem ale la tauau sohena tamlohi sasati matea na lima mara Rome.

¹⁸ Tamlohi tavera atu lara la kilau usuri na sava la tuvaihunira, la opoia vara la tinařihiau matan la sopo lavuti te hinau vara a pa mate matana. ¹⁹ Pani Jew lara la sopo avulahi hinia, mo vaiau na mele usia vara a pa turu na nahon supe matan Rome, mo sopo matan vara a pa tuvai na tahisaku hin te retireti. ²⁰ Matan hinau atu natu, mo vaiau na opoia vara a hite kamim ale a retireti isamim. Matan enau na lo toho hin jen nike matan na lo tau na noku rasua hin řomtoho atu nona tautauin Israel matan Tamlohi Jujuri.”

²¹ La řaramia lara, “Kama sopo lo lavi te leta Judea matam, teni te vorai atu mo sopo lo sinai nike vara i vere te hina sasati matam. ²² Pani kama opoia vara kama rongo na řomim hin rasua nike sei tamlohi na jara tari la lo verelejlejia.”

²³ La tau na rani matea vara la pa matavuhi peresia. Ale la mai na jara mo lo toho ea, enira vao tavera, mo tapulo na ralavuho mo tikeli na ravravi mo lo vere mamahunia, ale mo vereuli mauri atu God mo aulu hinia, ale mo vahitea vara la tau na nora rasua hin Iesu hin na leu non Moses peresi na přovet. ²⁴ Tatuara la rasu na sava mo lo verea, pani hai la řohu vara la rasua. ²⁵ Ale la tapulo malmalue, matan řomira mo sopo matea. Hitahuna, Paul mo sile na isoiso reti isara mara, “Tanume Tapu mo verea mo tataholo mata nomim pua na sava sei přovet Isaiah mo verea mara:

²⁶ ‘O vano isan la tamlohi nike,
ale o verea vara,
Ha pa rongoa vavano,
pani ha sopo eři rongovosahia,
ale ha pa lo kilaua vavano,

pani ha sopo eři hitevosahia.

²⁷ Matan mapun la tamlohi nike
la mate,
ale perora la sopo rongo,
ale la pelati na matara moiso,
matan vara la pa sopo kilau,
ale perora la pa sopo rongo,
ale mapura la pa sopo rongovosahi,
vara i vono la pa posi

ale a pa vai mamahunira.’ *Isa 6.9-10*

²⁸ Matan haratu, ha lo levosahi mamahunia vara vavahinau sei God mo vaia mata juri na tamlohi, enia mo sohaia mo vano isana tamlohi řořoha: ale enira la tapurongo hinia!”

²⁹⁻³⁰ Paul mo lo toho atu mata tauni mo rua na ima matea mo pakaia, ale mo avulahi na tamlohi tari sei la lo mai isana.

³¹ Mo lo retivujavujangi mauri atu God mo aulu hinia, ale mo lo vujangi hin Moli Iesu Křisto mo sopo te matahu hinia, ale mo sopo tea i horoa.

**Romans
Leta
Paul Mo Ulia
Isana Mara
Rome
Puku Nike**

Paul mo uli leta nike isana mara Rome. Rome enia taon tavera na varama hin pongi atu. Mo levosahi na kalesia ea (15.22–16.21). Mo verea isara mara Iesu mo vironia vara enia i pa nona volitusi isara (1.1) mo lavi na retisohai matea ‘— matan enia suihan God mata juri na tamlohi tari sei la rasua, tiroma isana Jew moiso i pa isana tamlohi ūrōha.’ (1.16). Paul mo verea mara tamlohi tari la hehe (3.23). Pani mo vai na malele mata vai na tamlohi la tatahola na nahona:

‘Matan tamlohi tari la vai na hehe, la lo toho asau na hina ūruhu sei non God hasena, ale God mo avulahi vara i vai na tamlohi la tatahola na nahona na nona ūromruhu purongo, mo vaia na malele mata volituhu hin Křisto Iesu, enia sei, God mo taua na nahořa, ūraena mo volituhu na talai lolokoru non God mata hehe, ale rasua enia malele sei tamlohil a eři lavi na vuan vavahinau sei. God mo vujangia vara posina mo tatahola matan enia mo sopo sile na talai mata hehe tari isana tamlohi sei la vaira tuai.’ (3.23–25). Paul mo vujangia vara rasua nike mo sohen rasua atu non Abraham tuai (4.13). Ale nake vara tamlohi la mai kalesia, la pa mauri usuri na suiha Tanumen God (8.1–27). God mo sile na suiha hai isana nona tamlohi mata hahau usuri na masalona (12.1–13).

Hin Leta Nike

1. Paul Mo Vujangi Na Retiřuhu (1.1–17)
2. Tamlohi Tari La Ori Na Hehe (1.18–3.20)
3. God Mo Vai Na Tamlohi La Tatahola Na Nahona (3.21–4.25)
4. Mauri Paro Nona Tamlohi (5.1–8.39)
5. Vujangi Mata Tavtavuin Israel (9.1–11.36)
6. Mauri Paro Nona Kalesia (12.1–15.13)
7. Vavahinau Non Paul, Isoiso Retireti (15.14–16.27)

Paul Mo Sile Na Nona Retioloolo

¹ Enau Paul, volitusi non Křisto Iesu matea, enia mo toviau vara a vahařule,

mo tapuhiau vara a retivujavujangi na Retiřuhu non God. ² Mo retitauhi hin Retiřuhu sei tuai moiso na reti nona přovet na Retitapu mo tapu, ³ mo lo vereuli Natuna, enia mahapin Supe David usuri na malele tamlohi, ⁴ ale God mo vujangia vara enia Natun God na suihan Tanume Tapu na nona mele turu na mateia, Iesu Křisto nořa Moli, ⁵ ale hinia, kama lo lavi na ūromruhu peresi na hija ūruhu mata vahařule matan vara kama eři tiroma na tamlohi vara la oloolo usuri na mauri rasua, matan vara hijana i pa aulu na tamlohi ūrōha, ⁶ kamim sohena, God mo tovi kamim vara ha mai tamlohi non Iesu Křisto.

⁷ Isan la haratu tari la lo toho Rome sei God mo opoira, ale mo tovira vara la mai nona tapuhi:

Romruhu peresi na tamata non God Tamařa peresi Moli Iesu Křisto la mai isamim.

Retiřuhu Non God

⁸ Tiroma, na opoia vara a vere meje isan noku God matamim hin Iesu Křisto, matan tamlohi na jara tari na varama la lo sorahi na nomim rasua. ⁹ Matan God sei na lo volitusi isana na mauriku usuri na Retiřuhu matan Natuna, enia noku tuetueni sei mo levosahia vara na lo vere kamim tarea ¹⁰ na noku usiusi, tarea na lo usia vara te masapa na masalon God vara a eři mai isamim. ¹¹ Matan tuai moiso, ūromiku tavera na opoia vara a hite kamim, vara Tanume Tapu i eři sile kamim hin te otori na limaku matan vara i eři ūlangi na maurimim hinia, ¹² na lo ūramia vara, enřa eři ūromřomi ūlangi mata nořa rasua, nomim peresi na noku.

¹³ La vorai peresi na vevorai, na opoia vara ha levosahia vara na opoia vaha visa moiso vara a mai, pani mo tikeli nake, mo sopo lo te masapa, matan vara a eři hite na vua nomim rasua sohen na hitea moiso isana tamlohi ūrōha tinatinapua.

¹⁴ God mo tauau moiso vara a pa tueni la haratu la lo retireti na leo mara Greek peresi la haratu la tamlohi ūrōha, ale isan la haratu la lelevosahi peresi la haratu la rongorongo vono. ¹⁵ Matana, enau na opoia mo tavera jea vara a retivujavujangi na Retiřuhu isamim sei ka lo toho Rome.

¹⁶ Matan enau na sopo mahanuhanu na Retiruhu, matan enia suihan God mata juri na tamlohi tari sei la rasua, tiroma isana Jew moiso i pa isana tamlohi ūroha. ¹⁷ Matan hin Retiruhu sei, malelen God mo vaia vara tamlohi la mai la tatahola na nahona, mo malue na jara tavera, enia mata rasua purongo, matan la ulia moiso vara, ‘Haratu mo tatahola na nahon God la pa mauri usuri na malele rasua purongo’.

Hab 2.4

Lolokoru Non God Mata Hehe

¹⁸ Matan God mo lo vujangi na nona talai lolokoru mata hehe na tuka mo sinai nā varama mata posposi varama tari peresi na posposi hehe tari nona tamlohi, ale matan nora posposi hehe sei mata turuhoro na retivarařuhu vara i malue na jara tavera. ¹⁹ Matan sava hinau tamlohi la eři levosahia hin God mo memera isara, matan God mo vujangia isara moiso. ²⁰ Matan ūruřuhun God sei nona hasena la lo luhu sohen harihi; nona suiha matan tui tui peresi mauri atu sei enia non God hasena. Ale la hinau sei tamlohi la eři hitevosahira matan la memera purongo hin la hinau atu God mo vaira na tapulo rani sei mo vai na varama. Ale matan haratu, tamlohi la sopo eři verea vara God mo sopo toho.

²¹ Matan hina purongo vara la levosahi God moiso, pani la sopo hasohasoa vara enia God teni la sopo vere meje isana, ale ūromira la mai la putu, ale mapura la rongorongo vono la mai la ūroha, ²² la verea lara la lelevosahi, pani la mai la rongorongo vono, ²³ la sopo lotu na ūruřuhun God sei i sopo eři tihai, pani la lo lotu na hinau sohena tamasi sei la vaira sohena tamlohi peresi na maji avuavu, peresi na maji palo vati, peresi na maji haraho sohena mata teni malupa, enira mo isoiso la pa tihai!

²⁴ Ale matana, God mo silera la vano na masalo mapura, ale la usuri na posposi lumihia, la vai na hina mahanuhanu na epera hasera, ²⁵ matan la jeni na retivarařuhu hin God mata halu, ale la lo lotu ale la volitusi nona hinau God mo vaira, pani mo sopo isan God sei mo vaira, enia hasena mo tatahola vara tamlohi la hasohasoa na rani tui tui tarea! Amen.

²⁶ Matan harihi, God mo silera la vano na nora opoia mata posposi mahanuhanu, matan nora hařai la jeni na posposi tatahola nona hařai matan la lo hasse lavilavira. ²⁷ Ale lamane sohena la tinařihi na posposi tatahola peresi na hařai, matan posposi mata opoi na lamane mo jeu na masalora tinatinapua, lamane la vai na hina mahanuhanu peresi na lamane, ale la hani na vua pulara vetali mata nora lejileji.

²⁸ Ale matan la ūruvara la ūromřomi God, ale God mo silera na ūromřomi nona maji matan vara la vai na hinau mo sopo tatahola vara tamlohi la eři vaira. ²⁹ La mařivi na posposi tari la sopo tatahola, la lo vaivaileu, la lo ūromusuri, la sasati, la mařivi na mereimerei, la lo vilimatei na tamlohi, la lo hitesatih, la lo halu, la lo vaisatih na tinapua, la lo sorasora tamlohi, ³⁰ la lo retiřeřen, la ūruhin God, la lo vatařa, la lo mangisi, la lo retihapahapa, la lo ūromřomi, ale la aleale malele paro mata la vai na hina sasati hinia, la sopo oolo olo hin tamara teni tinara, ³¹ ūromira mo vono, la lo tope na nora retitauhi, mo sopo te nora opoia, la sopo ūromopoi te tinapua. ³² Hina purongo vara la levosahia mo ūru moiso vara God mo pete tau na retileu moiso vara tea mo topea i pa mate matana, enira la sopo vaira purongo, pani la retituetueni la haratu la lo vaira.

2

God I Pa Ari Na Nom Hehe

¹ Ale nake, mo sopo te hinau hatea vara o eři halu hinia tapala, kamim mo isoiso sei ka lo ari na tinapua. Matan vara ko lo ari na tinapua, ko lo hasem ariho matan engko ko lo vai la hinau atu na lo verea moiso vara tamlohi la lo vaira. ² Ra levosahia vara talai non God mo lo jovi isan la haratu la lo vai la hinau sei, ale enia mo tatahola.

³ Tapala, engko sei ko lo ari la haratu la lo vai la hinau sei, ko ūrom vara o pa eři jelu na talai non God, pani i pa sohena sava matan engko sohena ko lo vaira? ⁴ Ko lo ūromřomi purongo na nona ūromřuhu peresi na nona ūrompurongo peresi na nona ūromperavu tavera isam, pani ko sopo levosahia vara nona ūromperavu mo lo sileho na masapa vara o posi na nom hehe.

⁵ Pani matan mapum mo ūilangi, ale ko ūihu vara o posí, ko lo hasem takonahi na nom talai matan rani aria atu sei God i pa vujangi na nona talai lolokoru mata hehe usuri na nona posposi tataholo hinia. ⁶ God i pa ari na tamlohi i tataholo na nora vavahinau: ⁷ God i pa sile na mauri tui isan la haratu la lo ūomperavu vara la vai na vavahinau ūihu, ale la lo ale na hasohaso peresi na ooloalo tavera peresi mauri atu sei i pa sopo eři tihai hin te rani; ⁸ pani isan la haratu la lo vai na masalora purongo, ale la sopo ooloalo na retivarařuhu, pani la lo ooloalo na posposi mo sopo tataholo na nahon God, enira la pa lavi na talai lolokoru non God mata hehe peresi na nona lolokoru sasati. ⁹ Ale tamlohi tari sei la lo vai na vavahinau hehe la pa lavi na rani ūilangi peresi na rani sasati, isana Jew tiroma moiso i pa isana tamlohi ūrořoha, ¹⁰ pani God i pa sile na hasohaso, ooloalo peresi na tamata isana tamlohi tari sei la lo vai na vavahinau ūihu, isana Jew tiroma moiso i pa isana tamlohi ūrořoha, ¹¹ matan God mo sopo tametame tea.

¹² God i pa sile na talai isana tamlohi la sopo Jew vara la hehe, hina purongo vara la sopo lo lavi na nona leu. Ale i pa sile na talai isana Jew vara la hehe matan nona leu mo lo pisuhi na nora hehe. ¹³ Matan mo sopo la haratu sei la lo rongo na leu purongo mo vaira la tataholo na nahon God, pani la haratu sei la lo vai na sava leu mo verea, enira natu la tataholo na nahon God. ¹⁴ Matan vara la tamlohi ūrořoha sei la sopo lavi na leu, pani la lo vai na sava leu mo verea, mo vujangia vara leu mo lo toho hinira moiso, hina purongo vara la sopo lo lavi na leu. ¹⁵ La lo vujangia vara sava hinau leu non God mo verea, mo lo toho na mapura moiso, matan ūomira sohena mo vereulia isara vara la lo vai na hina ūihu teni te hina hehe, ¹⁶ hin rani atu usuri noku Retiřuhu sei mo lo verea vara God mo ari na hina luhu nona tamlohi hin Kristo Iesu.

Leu Non God Mo Reti Isana Jew

¹⁷ Pani vara ko lo verea vara engko Jew matea, ale ko lo turu na leu, ale ko lo hapahapa vara ko levosahi God, ¹⁸ ale vara ko levosahi na masalona, ale ko lo avulahi na sava hinau la ūuhuřuhu jea matan ko

lo lavi na lelevosahi na leu, ¹⁹ ale vara ko levosahi mamahunia vara engko tamlohi tiroma na matavuso matea, ale lamu matea isan la haratu na ūrořoha, ²⁰ ale vara engko tamlohi matea mata vujangi la haratu la sopo rongovosahi, ale tamlohi vujangi na natuvarihi matan ko lavi ve-vuhi na lelevosahi peresi na retivarařuhu na leu, ²¹ ale vara ko lo vujangira sohena, mata sava ko sopo hasem vujangiho? Ko lo retivujavujangi vara tamlohi la pa sopo vavanaho, pani engko, ko lo vavanaho teni mo vono? ²² Engko sei ko lo verea vara mo sopo tataholo vara tamlohi la vaivaileu peresi na tinapua mo lahi moiso, ko lo vaivaileu peresi na tinapua mo lahi moiso teni mo vono? Ko lo verea vara ko sopo lotulotu vono, pani ko lo vanaho na hinau na lolo temple nona tamasi teni mo vono? ²³ Engko sei ko lo hapahapa na leu, ko lo topea, ale ko lo komo na hijan God matana. ²⁴ Matan sohen la ulia vara, ‘Tamlohi ūrořoha matuvana na varama la lo veresatih na hijan God matamim’.

Isa 52.5

²⁵ Matan posposi taiřalihi mo ūihu purongo vara ko ooloalo na leu, pani vara ko lo tope na leu, nom taiřalihi enia hina purongo. ²⁶ Ale matana, vara tamlohi matea mo sopo taiřalihi, pani mo lo tauri na vujangi mata leu, ko hitea vara God i pa hitea vara posina mo tataholo hin la haratu la taiřalihi teni mo vono? ²⁷ Ale matana, tamlohi atu mo sopo taiřalihi, ale mo lo tauri na leu, enia i pa verea vara talai i pa jovi isam sei ko taiřalihi sei ko lavi na leu, matan engko natu ko lo tope leu atu.

²⁸ Matan engko mo sopo Jew matea tataholo vara tamam enia tinam enira Jew teni matan engko ko lavi na taiřalihi na epem. ²⁹ Mo vono. Jew tataholo matea enia haratu mapuna mo tataholo na nahon God. Ale taiřalihi vararuhu enia mo sopo taiřalihi na epe, pani sava Tanume Tapu mo vaia na mapum. Tamlohi sohena, mo lo ale hasohaso atu God mo lo silea, mo sopo hasohaso sei tamlohi la lo silea.

¹ Vara mo sohen haratu, sava mo ūruhu natu vara engko Jew matea? Teni sava natu mo ūruhu na taiālihi? ² Varaūruhu, God mo leūruhu na Jew na malele matuvana, tiromara enia God mo sile na nona vereulia isara. ³ Varaūruhu, tatuara la tope na nora retitauhi, pani nora posposi mata tope na retitauhi i pa vai na retitauhi non God i vano hina purongo teni i vono? ⁴ I vono! Tamlohi tari enira tamlohi halu, pani God mo lo varaūruhu, sohen la ulia vara, ‘Nom reti la vujangia vara engko ko tataholo, ale engko o pa jeu na nora retituvai na court’.

Psa 51.4

⁵ Pani vara hai la lo verea lara nora hehe mo sile God na masapa vara i pa vujangi na nona posposi tataholo, ūra pa ūrārami ūromrōmi atu sohena sava? Vara mo sopo tataholo vara God i sile na nona talai lolokoru mata hehe isara teni mo vono? Na lo retireti usuri na ūromrōmi tamlohi nahai. ⁶ I vono! Vara sohena, God i pa eri ari na varama sohena sava? ⁷ Pani tea la pa verea vara, ‘Vara noku halu mo lo vujangia vara reti non God mo varaūruhu sohena sava, ale mo lo lavi na hasohaso matana, mata sava natu, na lo lavi na talai sohena tamlohi hehe matea?’ ⁸ Ale mata sava ūra sopo eři verea vara, ‘Mo ūruhu vara ūra vai na hina sasati matan vara hina ūruhu i eři mai matana.’ Matan tea la lo retiřeřen hin kamam lara kama lo vujangia sohena. Pani hara talai sei God i pa silea isara matana i pa tataholo.

Tamlohi Tari La Hehe

⁹ Nake i pa sohena sava? Kamam Jew kama ūruhu kama jeu na tinapua teni mo vono? I vono, matan ūra pete vujangia moiso vara tamlohi tari, Jew teni tamlohi ūrořoha, la lo toho na ruhuruhu suiha hehe, ¹⁰ mo sohen la ulia vara, ‘Mo sopo tea i tataholo, mo vono, mo sopo te hatelete.

¹¹ mo sopo tea i lelevosahi; mo sopo tea i lo ale God.

¹² Tamlohi tari la vahāři hinia, enira mo isoiso la sopo mele ūruhu matan te hinau; mo sopo tea i vai te hina ūruhu, mo vono, mo sopo te hatelete.’

Psa 14.1-3; 53.1-3

¹³ ‘Nora retireti mo ūranga

sohena pona taptap roi matea; la vai na memera la halu.’ *Psa 5.9*
‘Nora reti mo sohena poison mata mata sasati mo lo toho na jingora.’ *Psa 140.3*

¹⁴ ‘Jingora mo mařivi na lesati peresi na lolokoru.’ *Psa 10.7*

¹⁵ ‘La tamlohi akerihi la tatamahu moiso mata vili na tamlohi;

¹⁶ Sava jara la vano hinia, la vaikomokomoa, ale rongohaji mo voro,

¹⁷ ale malele mata tamata enira la sopo levosahi te hinau hinia.’ *Psa 59.7-8*

¹⁸ ‘Mo sopo te matahu matan God na nora vavahinau.’ *Psa 36.1*

¹⁹ Ale nake ūra levosahia vara sava hinau leu mo verea, mo verea isan la haratu la lo toho na leu matan mo vai na tamlohi tari la tapanono, ale mo vujangia vara tamlohi tari na varama la pa toho na ruhuruhu talai non God. ²⁰ Matana, mo sopo te tamlohi vara i eři tataholo na nahon God matan enia mo lo usuri na leu. Matan leu mo sile na lelevosahi mata hehe.

Kristo Mo Lavi Na Nōra Talai

²¹ Pani nake, malele tamlohi mata la mai la tataholo na nahon God mo lo toho na jara tavera, pani leu mo sopo toho na lolona, o pa hitea vara Leu non Moses peresi na retireti nona přovet la lo vereulia ²² sohena sava God mo lo vujangi na nona posposi tataholo na malele rasua. Tamlohi tari la tau nora rasua hin Iesu Kristo la mai la tataholo na nahon God matan God mo sopo ase na tamlohi, ²³ matan tamlohi tari la lo vai na hehe, la toho asau na hina ūruhu sei non God hasena, ²⁴ ale God mo avulahi vara i vai na tamlohi la tataholo na nahona na nona ūromrōmi purongo, mo vaia na malele mata volituhi hin Kristo Iesu, ²⁵ enia sei, God mo taua na nahořa, ūraena mo volituhi na talai lolokoru non God mata hehe, ale rasua enia malele sei tamlohi la eři lavi na vuan vavahinau sei. God mo vujangia vara posina mo tataholo matan enia mo sopo sile na talai mata hehe tari isana tamlohi sei la vaira tuai. ²⁶ Nake mo vaia matan vara i vujangia vara nona aria mo tataholo, ale mo tataholo vara enia i vai na tamlohi la tau na nora rasu hin Iesu, ale la mai la tataholo na nahona.

²⁷ Ale, hare natu i eři retihapahapa i verea vara mo tataholo mata nona vavahinau? I pa sopo tea! Mo mai mata sayava leu? Matan ūa lo oloolo na leu? Mo vono, pani matan ūa usuri na leu mata rasua. ²⁸ Matan kama lo verea vara tamlohi la mai la tataholo na nahon God mata rasua, mo sopo matan la lo oloolo na leu.

²⁹ Pani God enia God nona Jew purongo teni mo vono? Enia God nona tamlohi ūroha teni mo vono? Enjora, enia God nona tamlohi ūroha, ³⁰ matan God enia mo matelete. Enia i pa vai la haratu la taiřalihi peresi la haratu la sopo taiřalihi la tataholo na nahona mata rasua. ³¹ Ale, vara mo sohena, rasua mo vai na suihan leu atu mo isoiso teni mo vono? Mo vono, matan kama lo verea vara leu mo tataholo.

4

Rasua Non Abraham

¹ Ale vara mo sohena, ūa pa vere na sava matan hinau sei piřa Abraham mo vileia tuai? ² Matan, vara Abraham mo tataholo na nahon God mata nona vavahinau, enia i pa hapahapa matana. Pani i sopo eři hapahapa na nahon God. ³ Retitapu mo vere na sava matana? ‘Abraham mo rasu God, ale God mo verea vara enia mo tataholo na nahona matana’. ^{Gen 15.6}

⁴ Ale isana tamlohi voko matea, volina mo sopo hina silesilea matea, pani enia voli nona voko. ⁵ Pani isan haratu mo sopo vai te voko, pani mo tau na nona rasu hin God sei mo eři vai na tamlohi varama la mai la tataholo na nahona, ale God mo verea vara rasua non tamlohi atu mo vaia mo mai mo tataholo na nahona.

⁶ Mo sohen supe David mo verea matan avulahi tavera non haratu sei God mo hitea vara mo tataholo na nahona, mo sopo matan te hinau enia mo vaia:

⁷ ‘Avulahi tavera isan la haratu
God mo ūromi na nora vaivaileu,
ale mo tatavuhi na nora hehe;

⁸ avulahi tavera isan tamlohi sei
Moli i pa sopo evi na nona hehe hin te
rani.’ ^{Psa 32.1-2}

⁹ Avulahi tavera nike enia non la haratu la taiřalihi purongo? Mo vono, avulahi sei enia non la haratu la sopo taiřalihi peresi la haratu la taiřalihi, matan kama lo verea vara, ‘God mo verea vara Abraham

mo tataholo na nahona mata nona rasua purongo’.

^{Gen 15.6}

¹⁰ God mo pa vaia sohena isan Abraham sohena sava? Mo vaia tiroma teni hitahu moiso mo pa taiřalihi? Mo sopo hitahu, pani tiroma na nona taiřalihi.

¹¹ Mo lavi na taiřalihi sohena matamata matea mata vujangia vara enia mo tataholo mata nona rasua hin rani atu mo sopo lo taiřalihi. Enia matan vara God i vaia i tama tamlohi tari sei la rasua, pani la sopo taiřalihi, matan vara God i pa vaira la tataholo na nahona sohen Abraham, ¹² ale mo vai Abraham mo taman la haratu la taiřalihi, mo sopo mata taiřalihi purongo, pani matan la lo hahau usuri na malele rasua non tamařa Abraham hin rani atu mo sopo lo taiřalihi.

¹³ Matan retitauhi sei God mo silea isan Abraham peresi na taniana mo verea vara varama i pa nora, mo sopo mai mata leu, pani mata rasua sei mo vai na tamlohi la tataholo na nahon God. ¹⁴ Matan, vara la haratu la lo usuri na leu la lavi na vuan retitauhi sei, rasua enia mo sopo te suihana, ale retitauhi atu mo vano hina purongo. ¹⁵ Matan leu mo lavi na talai lolokoru non God mata hehe mo mai isana tamlohi, pani vara i sopo lo te leu, i pa sopo te hehe.

¹⁶ Mo pa sohena matan mo turu na rasua purongo, matan vara sava retitauhi mo verea, mo mai mata ūromruhu, mo turu ūilangi mata taniana tari, mo sopo isan haratu mo lo usuri na leu purongo pani isan haratu mo rasua sohen Abraham mo lo rasua, enia tamařa enřa mo isoiso, ¹⁷ sohena la ulia vara, ‘Enau na viřoniho vara engko o pa tama tamlohi jara matuvana’.

^{Gen}

^{17.5} Ale God mo hitea vara Abraham mo rasua vara enia i eři sile na mauri isana mate, ale mo retireti purongo ale hinau sei la sopo lo toho la pala. ¹⁸ Abraham mo lo ūromtoho, hina purongo vara mo sopo levosahia vara i pa sohena sohena sava, pani mo lo ūromtoho vara i pa tama mara jara matuvana usuri na sava God mo verea isana mara, ‘Ale taniam la pa matuvana sohena vitusarasara’.

^{Gen 15.5}

¹⁹ Nona rasua mo sopo jovi, hina purongo vara epena mo vajiahā mariviti i pa mate purongo matan taunina mo lo

lavilavi na tauni mo ngavulu sangavulu ([100](#)), ale hina purongo vara Sarah mo aroaro.

[20](#) Mo sopo ūromkaka na retitauhi non God, pani mo ulua ūrilangi na nona rasua, ale mo lo sile na oloolo isan God, [21](#) mo levosahi mamahunia vara God i eři vai na sava mo retitauhi hinia. [22](#) Ale matan nona rasua atu, 'God mo verea vara enia mo tataholo na nahona.'

[23](#) Pani reti sei akerihi, 'God mo verea vara enia mo tataholo...' la sopo ulia matan Abraham hasena, [24](#) pani matan nořa rasua sohena. God i pa verea sohena isan la haratu la lo tau nora rasua hin God sei mo sauteterahi Iesu nořa Moli na mateia. [25](#) Enia, God mo silea mata nořa hehe, ale mo sauteterahia matan vara i vaiřa ūta-holo na nahona.

5

Rasua Mo Sile Na Avulahi

[1](#) Ale matan nake ūta-holo moiso na nahon God na rasua, ūta toho na tamata peresi God hin nořa Moli Iesu Křisto.

[2](#) Hinia, ūta eři unu na ūromřuhu sei ūta lo turu hinia mata rasua, ale ūta lo avulahi tavera matan ūta lo ūromtoho vara ūta pa toho peresi God na hasohasona. [3](#) Aulu hin haratu, ūta avulahi na nořa rani ūrilangi, matan ūta levosahia vara nořa rani ūrilangi, vuana enia posposi mata turu ūrilangi, [4](#) ale posposi mata turu ūrilangi, vuana enia jelu na hinau vahite, ale posposi mata jelu na hinau vahite, vuana enia ūromtoho, [5](#) ale nořa ūromtoho sei i pa sopo eři vano ūromřomi purongo matan Tanume Tapu sei God mo silea isařa mo surei na opoia non God na mapuřa.

[6](#) Matan na rani mo sopo lo te nořa suiha, na ranina tataholo, Křisto mo mate matařa tamlohi sei ūta lo usuri na posposi varama. [7](#) I pa ūrilangi vara o eři vilei tea vara i mate mata tamlohi tataholo matea, pani korong, tea i pa eři ūromřilangi vara i mate matan te tamlohi ūruh hatea; [8](#) pani God mo vu-jangia vara nona opoia matařa mo sohena sava matan, hin rani atu ūta pa lo tamlohi hehe, Křisto mo mate matařa. [9](#) Matan ūta mai ūta tataholo na nahon God mata ūraen Iesu moiso, ale nake, mo sopo te retiusia hatea vara Iesu i eři juriřa na talai lolokoru non God mata hehe. [10](#) Matan, vara God

mo sari tamata peresiřa na mateia non Natuna na rani ūta pa lo nona meresahi, nake matan ūta turu na tamata peresia moiso, mo sopo te retiusia hatea vara ūta pa eři juri na maurina teni i vono. [11](#) Aulu hin haratu, ūta avulahi tavera hin God hin nořa Moli Iesu Křisto, ale hinia, nake ūta lavi na nona sari tamata, ūta mai ūta tapalana.

Mateia Mo Mai Matan Adam

[12](#) Ale matana, sohena hehe mo mai na varama na tamlohi matea purongo, ale mateia mo mai mata hehe, ale sohena, mateia mo tikeli na tamlohi tari matan enira mo isoiso la vai na hehe, [13](#) matan hehe mo lo toho na varama moiso God mo pa sile na leu, ale mo sopo te hehe vara i sopo te leu hatea i pisuhia. [14](#) Hina purongo matana, mateia mo lo aulu na tamlohi mo tapulo hin Adam mo tikeli Moses, hina purongo vara la sopo vai na hehe sohena hehe non Adam, mateia mo lo aulu hinira. Ale Adam enia tovongi matea hin harasei mo lo mai hitahu.

Mauri Tui Mo Mai Matan Iesu

[15](#) Pani hehe non Adam mo sopo sohen ūromřuhu sei God mo sile purongoia, matan hehe nona tamlohi matea purongo, mateia mo vano isana tamlohi matuvana, pani hin na tamlohi tinapua matea, Iesu Křisto, God mo sile purongoi na otori ūruh mata ūromřuhu mo masuree isana tamlohi matuvana. [16](#) Ale otori ūruh sei God mo sile purongoia, mo sopo sohena vua hehe non tamlohi atu, matan vua aria matan hehe atu enia matea purongo, mo lavi na talai mo mai, pani otori ūruh sei God mo sile purongoia, mo mai hitahun na hehe matuvana, mo roi na malele vara God i eři verea vara tamlohi la mai tataholo na nahona. [17](#) Varařuhu, mateia mo aulu na tamlohi tari matan hehe atu matea non tamlohi atu matea purongo, pani la haratu la lo lavi ūromřuhu sei mo mařivi savulevule peresi na otori sei God mo sile purongoia mata i vai na tamlohi la tataholo na nahona, enira natu, maurira la pa aulu na mauri nake ale hitahu hin tamlohi atu matea, enia Iesu Křisto.

[18](#) Ale matana, sohena hehe nona tamlohi matea purongo mo vai na talai mo mai isana tamlohi tari, ale vavahinau tataholo matea purongo, mo vai na malele vara God i verea vara tamlohi la tataholo na nahona,

ale matan vara i eři sile na mauri isana tamlohi tari. ¹⁹ Ale sohena lejileji nona tamlohi matea purongo mo vai na tamlohi matuvana la hehe, ale mo sohena oolo nona tamlohi matea purongo mo vai na tamlohi matuvana la tataholo na nahon God. ²⁰ Ale nakerihi natu, leu mo mai vara i vai na hehe i memera i ūruhu, pani vara hehe mo mai mo mele tavera, ūromruhu natu, mo mai mo mele mařivi savulevule jea, ²¹ matan vara sohena mateia mo vujangi na suiha nona hehe, ūromruhu i pa eři vujangi na nona suiha hin malele sei God mo vai na tamlohi la tataholo na nahona hinia, ale vuana, enia mauri tui hin Iesu Křisto nořa Moli.

6

Suihan Hehe Mo Moti

¹ Ale nake ūra pa vere na sava vara mo sohena? Mo tataholo vara ūra lo vai na hehe i lo vano matan vara ūromruhu i pa lo mařivi savulevule matana, teni mo vono? ² Mo vono! I pa sohena sava natu vara enřa sei ūra mate na hehe moiso, ūra lo toho hinia? ³ Teni ka sopo levosahia vara enřa sei ūra lavi na paptijo hin Křisto Iesu, ūra paptijo hin na nona mateia? ⁴ God mo tavunřa peresi Iesu na nona mateia na rani ūra paptijo hinia, matan vara enřa sohena, ūra eři hahau na mauri paro sohen Křisto sei mo turu na mateia na mauri paro na suihan God Tama.

⁵ Matan, vara enřa ūra sořotahi peresia na nořa mate sohen na nona mate, ūra levosahia vara ūra pa sořotahi peresia na sauteterahi sohen na nona sauteterahi. ⁶ Ra levosahia vara nořa mauri tuai mo mate peresia na talopeilopei matan vara i tope na suihan hehe na mauriřa, matan vara ūra pa sopo mele slev isan hehe. ⁷ Matan haratu mo mate moiso, mo pete materi moiso na hehe. ⁸ Ale vara ūra mate peresi Křisto, ūra rasua vara ūra pa mauri peresia. ⁹ Ra levosahia vara God mo sauteterahi Křisto na mateia moiso, ale i pa sopo eři mele mate; mate mo sopo te suihana vara i eři aulu hinia. ¹⁰ Matan mateia atu mo mate hinia, mo mate vara i jeu na hehe, vahatea mata rani tari, pani mauri atu mo mauri hinia nake, mo mauri matan God. ¹¹ Ale kamim sohena ha levosahia

vara kamim sohena ka mate isan hehe, ale ka mauri matan God hin Křisto Iesu.

¹² Matan haratu, ha sopo tinařihia vara hehe i aulu na epemim nike na varama, vara i vai kamim ha oolo na masalora. ¹³ Ha sopo tinařihia vara te epemim la mai volitusi na hehe mata posposi mo sopo tataholo na nahon God, pani ha sile kamim isan God sohen la haratu sei God mo vaira la malue na mateia la mauri, ale ha sile na epemim isan God sohena volitusi mata posposi tataholo na nahon God. ¹⁴ Matan hehe i sopo eři te suihana vara i aulu hin kamim, matan kamim ka sopo toho na ruhuruhu leu, pani ka lo toho na ruhuruhu ūromruhu.

Ra Eři Oolo lo Hin God

¹⁵ I pa sohena sava natu? Matan ūromruhu non God mo vairā ūra materi moiso, mo tataholo vara ūra hahau na hehe matan nake ūra sopo toho na ruhuruhu leu teni mo vono? Mo vono! ¹⁶ Ka levosahia vara, vara ka sile kamim isan tea sohena slev matea, ha pa oolo hobia ale ka slev isan haratu sei ka lo oolo hobia. Vara ka slev na hehe, vuana enia mateia, vara ka slev mata oolo hobia God, vuana enia posposi tataholo na nahona. ¹⁷ Pani ūra vere meje isan God matamim sei tuai ka lo slev non hehe, pani nake ka mai ka oolo na mapumim na vujangi tataholo sei la silea isamim moiso, ¹⁸ ale nake, ka materi na hehe, ale ka mai slev non posposi atu mo tataholo na nahon God.

¹⁹ Na lo vere na tovongi na slev sohena matan vara i tueni na nomim lelevosahia. Matan sohen tiroma ka lo sile na epemim sohena slev mata hina lumiha teni vaivaileu sei vuana mo mele vaivaileu jea, ale nake ha sile na epemim sohena slev isan posposi sei mo tataholo na nahon God sei vuana mo lo vai kamim vara ha tapu na maurimim.

²⁰ Na rani ka pa lo slev non hehe, ka sopo ūromromi na posposi sei mo tataholo na nahon God. ²¹ Pani vuana enia sava? Vuana mo sopo ūruhu matan nake ka lo mahuhanu matan la hinaus sei ka lo vaira tiroma, matan isoison la hinaus sei, enia mate. ²² Pani matan nake ka materi moiso na hehe, ale ka mai slev non God, vua ka lavia matana mo vai kamim vara ha pa tapu na maurimim, ale isoisona, enia

mauri tui. ²³ Matan voli hehe enia mateia, pani otori non God sei mo lo sile purongoia, enia mauri tui hin Křisto Iesu nōra Moli.

7

Leu Mo Sopo Mele Aulu Hinirā

¹ Teni, ka levosahia la vorai peresi na vevorai vara, vara leu mo lo suiha purongo vara tamlohi mo lo mauri? Na lo retireti isan la haratu la levosahi na leu. ² Mo sohena hařai lahi matea, leu mo lo tauria vara tuana mo lo mauri, pani vara tuana mo mate, hařai atu mo materi na leu mata lahi. ³ Ale vara tuana mo lo mauri, pani mo mele juruvi peresi na tamlohi tinapua, la pa verea vara enia hařai vaivaileu matea. Pani vara tuana mo mate, hařai atu i pa materi na leu, vara i vano isana tamlohi tinapua matea, enia mo sopo hařai vaivaileu.

⁴ Mo sohena natu, la voraiku peresi na vevoraiku, kamim sohena, ka mate na leu peresi Křisto matan vara ha pa mai tamlohi non tinapua, haratu non Křisto sei God mo sauteterahia na mateia matan vara řa eři vua řuhu isan God. ⁵ Matan tiroma řa lo usuri na masalo varama, leu mo lo řohai na masalořa sei mo lo vua hehe, ale vuana enia mateia. ⁶ Pani nake řa materi na leu, matan řa mate peresi Křisto moiso, ale řa sopo mele toho na ruhuruhi suiha leu, matan vara řa eři volitusi isan God, mo sopo na malele mata oloolo na retileu la ulia tuai, pani na malele paro, hin mauri atu Tanumena mo lo silea.

Leu Non God Mo Vujangi Na Hehe

⁷ Ra pa verea sohena sava natu? Ra pa verea vara leu enia hehe teni mo vono? Mo vono! Pani vara leu i sopo lo mai a pa sopo eři levosahi na hehe. A pa sopo eři levosahia vara řomusuri enia sava, vara leu mo sopo verea vara, 'O sopo řomusuri'.

Exo 20.17; Deut 5.21

⁸ Pani hehe mo lavi na masapa hin retileu atu, mo vaiau na vua na řomusuri tinatinapua matuvana. Vara leu i sopo lo toho, hehe i pa sopo mauri. ⁹ Tiroma na lo toho hin mauri atu na sopo levosahi na leu hinia, pani na rani leu mo pala mo pisuhi na hehe ale mo mera purongo vara hehe mo lo mauri hiniau, ¹⁰ ale mo tauau

na ruhuruhi talai mata mate. Matan na vileia vara retileu atu sei mo lo retitauhi na mauri mo sopo silea, pani mo sile na mateia isaku. ¹¹ Matan hehe mo lavi na masapa matea na retileu, hehe mo halhaluau, ale retileu atu mo viliau, ¹² hina purongo vara řa levosahia vara leu tari la tapu, ale retileu enia mo tapu mo tataholo ale mo řuhu.

¹³ Ale ka hitea vara mo tataholo vara leu sei mo řuhu mo sile na mateia isaku? Mo vono! Hehe mo tauau na malele mata mate usuri na sava retileu sei mo řuhu mo vujangiau, matan vara hehe i pa pala hehe varařuhu, ale hin retileu sei, hehe mo pala mo sasati jea.

Suiha Hehe Na Mauriřa

¹⁴ Matan řa levosahia vara leu enia mata i vujangi mauri atu God mo opoia, pani enau na lo toho hin mauri atu nona tamlohi sei mo lo toho na ruhuruhi suihan hehe. ¹⁵ Na sopo levosahia mata sava na lo vai na hinau na lo vaia. Matan na sopo vai na sava na opoia, pani na lo vai pa hinau sei na lo řohu vara a vaia. ¹⁶ Na levosahi mamahunia vara sava hinau na lo vaia mo sopo tataholo, enia mo vujangia vara na lo majinga vara leu enia mo řuhu. ¹⁷ Pani nake, mo sopo enau sei na lo vaia, pani hehe sei mo lo toho isaku.

¹⁸ Matan na levosahia vara mo sopo te hinau řuhu na loloku, na lo vere na masalo varama na loloku. Matan na opoia vara a vai na hinau mo tataholo, pani na sopo eři vaia. ¹⁹ Matan na sopo vai na sava hinau řuhu na opoia, pani tarea na lo vai na hina sasati sei na sopo opoia. ²⁰ Ale, pani vara enau na lo vai na hinau na sopo opoia, enia mo sopo enau sei na lo vaia, pani hehe na loloku.

²¹ Ale na mauri na hitea vara na opoia vara a vai na hina tataholo, sasati mo lo kilau řořoiau. ²² Matan na loloku, enau na avulahi mo tavera jea na leu non God, ²³ pani na hite na leu tinapua matea mo lo voko na epeku, mo lo valum peresi na leu mata řomiku, mo opoia vara a lo toho na ruhuruhi suiha leu mata hehe na epeku.

²⁴ Enau tamlohi sasati matea! Hare i pa eři juriau na epeku sei mo tauau na ruhuruhi talai matan mateia nike? ²⁵ Pani řa vere meje isan God hin Iesu Křisto nōra Moli matan malele mo roi! Ale nake, enau

na lo volitusi isan leu non God na ūromiku, pani na loloku, na lo volitusi isana leu mata hehe.

8

Mauri Atu Tanumen God Mo Lo Silea

¹ Ale matan sava God mo vaia hin Kristo Iesu, nake natu, mo sopo te talai non la haratu sei la lo toho hin Kristo Iesu. ² Matan suiha non Tanume mata mauri hin Kristo Iesu mo teriho na suiha mata hehe peresi na mateia. ³ Matan leu mo sopo te suihana vara i eři posa na masalo varama na loloku, pani God mo vaia hin Natuna sei mo ūrulea mo mai vara i tamlohi, matan vara i mai sohena malamalai mata hehe, pani mo sopo te hehe hinia, ale hinia, God mo komo na suihan hehe sei mo lo aulu hinira, ⁴ matan vara sava hinau tatahola sei leu mo lo verea la pa toho na mauriřa sei ūra sopo mele hahau usuri na masalo varama, pani ūra lo hahau usuri na Tanume Tapu.

⁵ Matan la haratu la lo usuri na masalo varama, la lo tau na ūromira na hinau mata masalon mauri atu, pani la haratu la lo usuri na Tanume Tapu na maurira, la lo tau na ūromira na hinau non Tanume Tapu. ⁶ Matan vua ūromřomi mata masalo varama, enia mateia, pani vua ūromřomi mata Tanume Tapu enia mata mauri peresi na tamata. ⁷ Matan ūromřomi atu mo lo usuri na masalo varama, enia meresahi isan God, matan enia mo sopo oolo na leu non God, matan i pa sopo eři oolo hinia. ⁸ La haratu la lo usuri na masalo varama, la pa sopo eři vai na sava God mo avulahi hinia.

⁹ Pani kamim sei, ka sopo toho na ruhu-ruhu suihan masalo varama, matan ka lo toho na ruhuruhu suihan Tanume Tapu, vararuhi vara Tanumen God mo lo toho isamim. Vara tea mo sopo lavi na Tanumen Kristo, enia mo sopo nona. ¹⁰ Pani vara Kristo mo lo toho hin kamim, hina purongo vara epemim la pa mate mata hehe, Tanumena mo sile kamim na mauri matan mo vai kamim ka tatahola na nahona. ¹¹ Vara Tanumen haratu sei mo lo sauteterahi Iesu na mateia mo lo toho hin kamim, haratu mo sauteterahi Kristo Iesu na mateia i pa sile na mauri na epemim na Tanumena sei mo lo toho hin kamim.

¹² Matan haratu, la vorai peresi na vevo-rai enřa tamlohi ave, pani mo sopo isana masalo varama, ūra sopo usuri na masalon mauri atu. ¹³ Matan, vara ha lo usuri na masalo varama, ha pa mate, pani vara hin Tanume Tapu ka lo tau nařihi na vavahinau sasati nona epemim, ha pa mauri. ¹⁴ Matan tamlohi tari sei Tanume Tapu mo lo tiroma hinira, enira natun God.

¹⁵ Matan ka sopo lavi na Tanumena vara ha lo sohena slev sei la lo juhajuha mata matahu, pani ka lavi na Tanumena vara i korohi kamim sohena natuna, ale hinia, ūra lo ulo vara, 'Tata, Tamaku!' ¹⁶ Tanume Tapu hasena mo lo vujangi mamahuni na mapuřa hinia mara enřa ūra natun God, ¹⁷ ale vara enřa ūra natuna, enřa ūra pa lavi na hinau God mo silea isan Natuna Kristo, vara ūra lavi na rani ūrlangi peresia matan vara ūra pa eři lavi na hija aulu peresia.

Mauri Pongi Hitahu

¹⁸ Matan enau na levosahia vara rani ūrlangi mata mauri nake, enira hina purongo na hina hasohaso ūruhuřuhu sei God i pa vujangia isařa. ¹⁹ Matan hinau tari God mo vaira la lo sasaovi vara la hite rani atu natun God la pa pala hinia. ²⁰ Matan God mo tau na lesati isana hinau tari na varama tuai tuai jea, mo sopo matan la opoia vara la sohena, pani matan God mo taura sohena, ale la lo kilau matan rani atu, ²¹ hinau tari na varama peresi na natun God la pa lavi materi sei mo ūruhuřuhu jea. La pa malue hin mauri atu mata mate peresi na mauri mata ūrovo. ²² Matan ūra levosahia vara hinau tari God mo vaira, la lo ngutu na rongohaji mata vasusu mo tikeli nake. ²³ Ale mo sopo hinau God mo vaira purongo, pani enřa sohena sei ūra lavi na tiroma asitauni isan Tanume Tapu, ūra lo ngutu na lolořa, ūra lo saovi matan rani atu sei ūra pa mai sohena natuna tatahola, ale ūra lavi na epeřa paro. ²⁴ Matan hin ūromtoho sei, God mo juriria. Vara ūra lo hite na sava ūra lo ūromtoho hinia, mo sopo ūromtoho vararuhi natu. Matan hare mo lo ūromtoho na hinau mo eři hitea? ²⁵ Pani vara ūra lo ūromtoho na hinau ūra sopo hitea, ūra pa lo kilau matana na nořa ūromperavu. ²⁶ Mo sohena natu, Tanume Tapu mo lo tueniřa na nořa vejuveju, matan ūra

sopo levosahia vara ūa pa usiusi mata sava hinau sohen God mo opoia, pani Tanume Tapu hasena mo lo usiusi nōa na malele matea mo sopo te reti vara i ēri vere na ūaramina. ²⁷ Pani haratu sei mo levosahi na mapu tari, mo levosahi na sava mo lo toho na ūomin Tanume Tapu, matan Tanume Tapu mo lo usiusi nona tapuhi usuri na masalon God. ²⁸ Ale ūa levosahia vara la haratu la opoi God, hinau tari la voko jara matea mata ūuhu non la haratu God mo tovira usuri na nona ūomromi tavera. ²⁹ Matan la haratu mo vīonira tiroma, mo pete tapuhira moiso vara la pa mai sohen Natuna, matan vara enia i pa vora tiroma na vorai matuvana. ³⁰ Ale la haratu mo pete tapuhira moiso, mo tovira, ale la haratu mo tovira, mo vaira la tataholo na nahona, ale la haratu mo vaira la tataholo na nahona, mo tahera aulu na hasohasona.

Opoia Non God

³¹ Ra pa verea sohena sava natu? Vara God enia nōa, hare i pa ēri komōa? ³² Vara God mo sopo horo Natuna tataholo, pani mo silea matāa en̄a mo isoiso, sohena sava natu, God sei mo sile K̄risto isāa i pa sopo ēri sile na hinau tari isāa?

³³ Hare i ēri pisuhi na vīoni non God matan te hinau? God natu, mo vaira la tataholo na nahona. ³⁴ Hare natu i pa verea vara i pa ēri sile na talai isāa?* K̄risto Iesu enia haratu mo mate, aulu hin haratu, enia mo turu na mateia, ale mo lo toho na suiha na matuan God, ale enia natu mo lo usiusi nōa. ³⁵ Hare i pa asēa na opoia non K̄risto? Rani ūilangi, teni rani sasati, teni tipahi, teni māua, teni malamala, teni hinau mo ēri komo na mauri, teni vuro? ³⁶ Vara ūahu la uli la hinau sei moiso na Retiulia vara, ‘Matam, mateia mo lo toho na nahomam tarea, ale la hite kamam sohen natu sipsip sei la pa vilimateira’. *Psa 44.22*

³⁷ Mo vono, hina purongo hin la hinau tari sei matan ūa ēri jeura hin K̄risto sei mo opoīra. ³⁸ Matan na levosahi mamahunia vara ūa mate teni ūa lo mauri, teni angelo, teni tamlohi aulu, teni hinau nake la lo toho, teni hinau la pa mai, teni haratu la

ūilangi, ³⁹ teni te hinau aulu na masapa teni na puaha atano na lolo tasi teni varama, teni te hinau tinapua na varama, i pa sopo ēri asēa na opoia non God hin K̄risto Iesu nōa Moli.

9

Tapuhi Non God Hin Israel

¹ Na lo vere na retivara ūahu na hijan K̄risto, na sopo halu; ūomiku mo levosahia vara Tanume Tapu mo levosahia ² vara ūomiku mo jovi tavera, ale mapuku mo tangi, ³ vara te malele vara voraiku sei tahisaku Israel, la ēri juri hinia, a pa hase tai nāihiau hin K̄risto, a mai hina lesati mata malelera. ⁴ Enira la tavitavuin Israel, ale enira korohi non God, mo vujangi na nona matamata tavera isara la ūuhu ūahu jea, peresi na nona retitauhi isara tuai, la lavi na nona leu, la lavi na posposi mata lotua, ale nona retitauhi mata jurira. ⁵ Ale pira tuai enira tamlohi aulu non God, ale K̄risto vara ūa usuri na malele tamlohi, enia mo tai isara, enia God sei mo aulu na hinau tari, ale i pa lavi na hasohaso tarea tui tui, amen.

⁶ Pani mo sopo sohena vara God mo ūomaliho na nona retitauhi isan tavitavuin Israel, matan mo sopo tamlohi tari sei la tai isan Israel la tavitavuin Israel, ⁷ ale mo sopo vara enia mo isoiso natun Abraham vara enira taniana, pani matan la ulia vara, ‘Taniam la pa lavi na hijam hin Isaac’. *Gen 21.12*

⁸ Enia mo ūaramia vara na nahon God mo sopo taniana tari la tai isan Abraham la natun God, pani natuna tari na nona retitauhi, enira mahapin Abraham. ⁹ Matan retitauhi mo verea sohen harihi mara, ‘Sohen harakerihi tavul tauni a pa mele mai, ale Sarah i pa vasusui na lamane matea’. *Gen 18.10, 14*

¹⁰ Mo sopo haratu purongo, pani Rebecca sohena mara mo vasusui na havo isan tamlohi matea purongo pīra Isaac, ¹¹ pani tiroma la pa vora, teni tiroma la pa vai te hinau mo ūuhu teni mo sati, matan vara ūomromi non God mata vīoni na nona tamlohi i pa turu, ¹² mo sopo mata nora vavahinau, pani matan God mo tovia,

* ^{8:34:} sile na talai: tamlohi teni Tiapolo la pa vahitea pani God mo sile na talai isan K̄risto matāa.

mo verea isan Rebecca mara, ‘Vora tiroma i pa volitusi isan vora hitahu’. *Gen 25.23*

13 Sohen la ulia vara God mo verea mara, ‘Na opoi Jacob, pani na ūru hin Esau’. *Mal 1.2-3*

14 Vara sohena, ū pa vere na sava? God mo tametame tea teni mo vono? Mo vono!

15 Matan God mo verea isan Moses mara, ‘A pa ūromruhu hin haratu sei na ūromruhu hinia, a pa ūromopoi hin haratu sei na ūromopoi.’ *Exo 33.19*

16 Matan haratu, mo sopo turu na masalon te tamlohi teni te nona vavahinau, pani mo turu hin God sei mo lo ūromopoi.

17 Matan na Retitapu God mo verea isan Pharaoh mara, ‘Na taheho sahe aulu matan hinau akerihi natu, vara a pa eři vuhesi na suihaku hinihi, ale matan vara tamlohi la pa hasohaso na hijaku na jara tari na varama’. *Exo 9.16*

18 Ale matan haratu mo vujangia vara God mo lo ūromopoi na sava tamlohi enia mo opoia, ale enia mo lo pelati na mapun hare enia mo opoia.

19 Korong tea i pa verea isaku vara, “Avei, vara God mo vai na masalona sohena, mata sava natu mo pa lo hite na hehe? Matan hare natu, i pa eři horo na masalona?”

20 Pani engko sava tamlohi natu, vara o pa eři reti isan God sohena? ‘Mo tataholo vara hinau sei God mo vaia, i eři verea isan God sei mo vaia vara, “Mata sava ko vaiau sohen harihi”?’ *Isa 29.16; 45.9*

21 Teni vara tamlohi sei mo lo vai na jilivi na lepa, ko hitea vara mo sopo tataholo vara i vai na jilivi i rua na vořoli lepa matea vara matea mata jara lakolako, ale matea mata jara utauta? **22** Ko hitea mo tataholo vara God mo opoia vara i lo ūromperavu tako hin la haratu mo viřonira mata komo moiso, matan vara i eři vujangi na nona talai lolokoru mata hehe peresi na suihana isana tamlohi, **23** matan vara i eři vujangia vara ūruhuřuhuna mo ūruhuřuhuna jea sohena sava isan la haratu sei i pa ūromopoira, enira sei mo viřonira moiso mata lavi na ūruhuřuhuna, **24** enřa sohena, enia mo tovřa, pani mo sopo tovřa isana

Jew purongo, pani isana tamlohi ūrořoha sohena.

25 Sohen God mo verea na Retiulia non Hosea mara, ‘La haratu sei la sopo noku tamlohi, nake a pa tovira “noku tamlohi” ale a pa opoi hařai sei mo sopo tea i opoia.’ *Hos 2.23*

26 Ale, ‘Tiroma mo verea isara mara, “Ka sopo noku tamlohi”, pani nake i pa verea vara, “Kamim ka natun God sei mo mauri”. *Hos 1.10*

27 Ale Isaiah mo lo ulo aulu matan Israel mara, ‘Hina purongo vara evi natun Israel la sohena oneone vavarihi na tasi, tupu visalete purongo la pa juri.

28 Matan Moli i pa sile vevuhi na nona talai i vila, ūromina i pa sopo rua hinia.’ *Isa 10.22-23*

29 Ale sohen Isaiah mo verea tiroma moiso mara, ‘Vara Moli Suiha Tavera Jea na tuka i sopo lo tinařihia vara te mahapimam la mauri, korong kama pa tihai sohen Sodom peresi Gomorrah moiso.’ *Isa 1.9*

Israel La Sopo Rasu God

30 Ra pa verea sohena sava natu? Ra pa eři verea vara haratu la tamlohi ūrořoha la mai la tataholo na nahon God pani mo sopo matan la lo tutungua pani matan la rasu God, **31** pani Israel sei la lo tutungui na leu vara i pa vaira la tataholo na nahon God, pani la sopo eři vai vevuhi leu atu. **32** La sopo eři vaia mata sava? Matan la sopo tutungua na malele rasua, pani la hitea vara la pa vaia na nora vavahinau. La tialahalahin datu atu mata tialahalahin, **33** sohena la ulia vara, ‘Ka hitea? Na lo tau na vatu matea hin Zion mata tialahalahin,* ale na tau na vatu matea matan i pa vaira la jovi, pani haratu mo tau na nona rasua hinia, i pa sopo tea i eři vaia i manuhananu.’ *Isa 8.14; 28.16*

* **9:33:** Zion: Zion enia Jerusalem.

10

God Mo Juri Na Tamlohi Mata Rasua

¹ La voraiku peresi na vevoraiku, noku usiusi isan God peresi na opoia na mapuku mata tautavuiku Israel, enia vara la pa juri.
² Na lo vereulia matara, vara la lo ūromjea hin God, pani la sopo usuria na malele mata lelevosahi. ³ Matan, la sopo rongovosahi na malele sei God mo taua vara tamlohi la pa mai la tatahola na nahona hinia, ale la lo ale na malelera purongo sei vara la pa tatahola na nahon God hinia, la ūrohu vara la usuri malele atu God mo lo vai na tamlohi la mai la tatahola na nahona hinia. ⁴ Matan hin Kristo mo vai vevuhi na leu, matan hinia, tamlohi tari sei la rasua la mai la tatahola na nahon God.

Israel La Jalio Na Malele

⁵ Matan Moses mo ulia mara te tamlohi mo opoia vara i mai i tatahola na nahona na malele mata leu, enia i pa usuri vevuhi na nona retileu na maurina. *Lev 18:5*

⁶ Pani vujangi atu mo vujangia vara tamlohi la mai la tatahola na nahon God na rasua mo vereea mara, ‘O sopo vereea na mapum vara, “Hare natu i pa sahe na tuka?”

Deut 30:12

vara i tapai Kristo, ale i lavia i sinai vara i vujangiho. ⁷ Ale vujangi atu mo vereea mara, ‘Hare natu i pa sivo hin koko tavera jea atu sei mo sivo atano jea na lolo varama mata mateia?’ *Deut 30:13* vara i lavi Kristo i mele mauri na mate. ⁸ Malele mata juri mo mai mata rasua hin Kristo, enia natu, Retiūahu sei kama lo retivujavujangia, mo mariviti isam purongo, pani mo lo vere na sava? ‘Retisohai sei mo mariviti, mo lo toho na huřurivim, ale mo lo toho na mapum’.

Deut 30:14

⁹ Matan, vara o taviti na jingom vara Iesu enia Moli, ale o rasua na mapum vara God mo sauteterahia na mateia, o pa juri.

¹⁰ Matan rasua na mapum purongo, enia natu, mo vaiho ko tatahola na nahon God, ale ko pa juri matan ko taviti na jingom.

¹¹ Matan Retitapu mo vereea mara, ‘Tamlohi tari sei la tau na nora rasua hinia, i pa sopo tea i vaira la mahantuhanu’. *Isa 28:16*

¹² Ale nave God mo sopo mele vereea vara Jew teni mara Greek matan enia Moli matelete nora Moli enira mo isoiso, enia

mo sile na nona ūruhu ūuhuna isana tamlohi tari sei la lo kilau isana. ¹³ Matan Retiulia mo vara, ‘Tamlohi tari sei la tovi na hijan Moli God la pa juri’. *Joel 2:32*

¹⁴ Sohena sava natu, la haratu la sopo lo rasua la pa eři tovia? Ale sohena sava natu, la pa tau na nora rasua hinia matan la sopo lo levosahia? Ale la pa rongoa sohena sava vara tea i sopo retivujavujangis isara? ¹⁵ Ale sohena sava natu la pa retivujavujangis isara vara tea mo sopo ūrulera? Mo sohen la ulia vara, ‘Rani ūruhu mata avulahi matan la haratu la lo retivujavujangis na Retiūahu la pala!’

Isa 52:7; Nah 1:15

¹⁶ Pani mo sopo tamlohi tari la rasu na Retiūahu, sohen Isaiah mo vereea mara, ‘Moli, hare mo rasu na sava mo rongoa isamam?’ *Isa 53:1*

¹⁷ Ale haratu mo vujangia vara rasua mo vora na sava la rongoa, ale sava la rongoa mo mai na retivujavujangis na reti non Kristo.

¹⁸ Pani na lo usia vara korong, Jew la sopo lo rongoa? Mo vono, la rongoa, matan Retiulia mo vereea vara, ‘Leora mo vano na jara tari na varama, nora reti la vano na jara mo isoiso na varama.’ *Psa 19:4*

¹⁹ Pani na mele usia vara, korong Israel mo sopo levosahia? Matan na rani non Moses, God mo vereea mara, ‘A pa vai kamim ha mereimerei na mara jara tinatinapua, a pa vai kamim ha lolokoru na tamlohi ūroha mara jara tinatinapua.’ *Deut 32:21*

²⁰ Ale hitahu Isaiah mo ūromūlangi vara i vereea vara, ‘La haratu la sopo aleau la hiteau. Na hase vuhesiau isan la haratu la sopo usia isaku.’ *Isa 65:1*

²¹ Pani isan Israel God mo vereea mara, ‘Tarea na roi na limaku matara, pani tarea la sopo oolo hiniā, ale la lo lejiau.’ *Isa 65:2*

11

God Mo Tipahi Israel Teni?

¹ Ale na lo usia nara, korong God mo tipahi na nona tamlohi teni mo vono? Mo

vono! Matan enau sohena matea na vora Israel, mahapin Abraham, tautauvin Benjamin.

² Mo vono, God mo sopo tipahi na nona tamlohi sei mo levosahira tiroma moiso. Ka lo ūromūomi na sava Retitapu mo verea matan Elijah sohena sava mo usia ūilangi isan God mata posposi nona tautauvin Israel sei mara, ³ Moli, la vilimatei na nom provet, la viliroiroi na nom votavota, enau haseku na pa lo toho, ale la lo aleau vara la vilimateiau'.

1 Kings 19.10, 14

⁴ Pani God hasena mo ūaramia isana sohena sava? Enia mara, 'Enau na tapuhi na ūihī na tamlohi mo tari vaha limaravrua (*7000*) moiso sei la sopo popovitoho isan Baal'.

1 Kings 19.18

⁵ Mo sohena nake, tupu visalete purongo God mo viñonira na nona ūomūruhu. ⁶ Ale vara mo usuri na nona ūomūruhu, mo sopo matan te vavahinau, vara i vono, ūomūruhu atu i pa sopo ūomūruhu.

⁷ I pa sohena sava natu? Israel la jovi na sava la lo ale, la ale vara la mai la tatahola na nahon God. Tatuara God sei mo tapuhira la lavia, pani mo pelati na ūomin la haratu mo sopo tapuhira,

⁸ mo usuri na sava la ulia vara,
'God mo vai na ūomira la mate mo tikeli
nake,
mo pelati na matara,
ale la sopo hitevosahi,
mo pelati na perora,
ale la sopo rongovosahi.'

Deut 29.4; Isa 29.10

⁹ Ale David mo verea mara,
'God o vai na hinau la opoira
sohena vuna teni tara matea,
la sohena hinau mata tialalahala isara,
hinau mata sile na talai isara.'

¹⁰ O vai na matara la ūroha
matan vara la sopo hitevosahi,
ale o vai na hařira
la hoho na hina puhoni la lo lavira.'

Psa 69.22-23

Matan Israel Romūruhu Non God Mo Mai

¹¹ Na lo usia vara korong, enira la tialalahala matan vara la pa jovi vevuhi? Mo vono! Pani matan na nora jovi, God mo juri na tamlohi ūroha, mo vaia matan vara i vai Israel i mereimerei. ¹² Ale vara vua nora hehe matan la tipahi nora Jujuri mo

vai na nona tautav mo mai isana tamlohi tari, ale vara vua nora jovi enia tautav nona tamlohi ūroha, ūa sopo levosahia vara i pa mele ūruhu jea sohena sava hin rani atu vara la mele pulutahi vevuhi isan God!

¹³ Na lo vere la hinau tari nike matamim ka tamlohi ūroha, God mo viñoniau vara a vahařule isana tamlohi ūroha, na tahe na noku vavahinau isamim na nahora, ¹⁴ vara a hite te malele hatea vara a vai na Jew la opoi na sava kamim ka tamlohi ūroha ka lo lavia, ale hin malele atu a pa eři juri te tatuara. ¹⁵ Matan, vara vua nora tipahi enia God mo sari tamata mata tamlohi tari, i pa mele ūruhu jea na varama sohena sava vara la mele hilu, korong i pa sohen la haratu la mele turu na mateia. ¹⁶ Vara sope silesilea atu mata flaua sei la lo silea isan God tiroma mo tapu, sope flaua tari la pa tapu, ale vara wari vipahai atu la pa tapu, rangarangana sohena la tapu.

Israel Enia Pulo Olive Atu God Mo Lavo

¹⁷ Pani vara God mo tai nařihī na tattua rangarangan polo olive atu, ale God mo sořotahi kamim olive urata, ka vano na livuhara, ale ka ulua na hanhani ūruhu na pulon olive atu, ¹⁸ ha sopo hapahapa mata rangarangana. Pani vara ha hapahapa, ha lo ūomūromia vara kamim ka sopo tueni na warina, pani warina mo lo tueni kamim.

¹⁹ Ale vara ka lo verea vara, 'La rangaranga atu God mo tai nařihira vara i vai na masapa matak.' ²⁰ Vara ūruhu, mo vaia, pani ha lo ūomūromia, la rangarangana atu enira Jew, God mo tai nařihira matan la sopo rasua, ale kamim ka lo toho atu matan ka rasua. Ha sopo ūomaulu hin kamim, pani ha matahuni na sava i eři masese isamim. ²¹ Vara God i sopo ūomi na rangarangana tatahola matan la tipahi nora Jujuri, i pa sopo ūomi kamim.

²² Ha hitevosahia, vara posin God mo sohena sava, mo ūomūruhu ale mo ūilangi jea. Mo ūilangi jea isan la haratu la tipahi na nora Jujuri, pani mo ūomūruhu isamim, ale i pa ūomūruhu isamim vara ka lo tau na nomim rasu hinia, pani vara ka sopo mele tau na nomim rasua hinia, kamim sohena i pa tai narihi kamim. ²³ Ale vara Jew la posi mai la tau na nora rasua hinia, God

i pa mele sořotahira vano na pulon olive atu, matan God i eři mele sořotahira.

²⁴ Matan, vara mo avulahi vara i lavi kamim olive urata purongo, ale i sořotahi kamim ha vano na pulo pulana olive řuhu, enia hina mařurahi matea, i pa mele malum isan God vara i mele tau na rangarangana tatahola i mele sořotahia na jarana tatahola na pulon olive atu.

Jujuri I Pa Tai Jerusalem

²⁵ Matana, la voraiku peresi na vevraiku, na opoia vara ha levosahi hina luhu nike matan vara ha sopo řomaulu, God mo vai na mapun tatua tavytavuin Israel la řilangi i pa tikeli rani atu evi tamlohi ſrořoha la unu vevuhi. ²⁶ Ale vaon Israel tari la pa juri hin malele atu, sohen la ulia moiso vara,

'Tamlohi Jujuri matea i pa tai Zion,*
ale i pa posa na tavytavuin Israel
na nona posposi varama.

²⁷ Ale harihi enia noku retitauhi peresira,
hin rani atu na lavi nařihi na nora
hehe.' *Isa 59.20-21*

²⁸ Jew matuvana nake la meresahi na Retiřuhu matamim, pani enira la pa lo toho viřoni non God mata nona retitauhi isan Abraham, Isaac peresi Jacob. ²⁹ Matan silesilea peresi na tovi non God la sopo eři jovi. ³⁰ Sohen tuai ka sopo oloolo hin God, pani nake ka lavi na nona řomopoia matan la sopo oloolo, ³¹ enira nake sohena, la sopo oloolo matan vara God i pa řomopoi kamim, pani enira sohena, la pa eři lavi na nona řomopoia. ³² Matan mo sohen God mo pelatihoro na tamlohi tari na nora hehe matan la sopo oloolo, matan vara nona řomopoia i eři toho isara isoiso.

Paul Mo Hasohaso God

³³ Hare natu i eři verea vara nona lelevosahi peresi na sava mo levosahia la řuhuřuhu sohena sava! Mo sopo tea i eři levosahia na sava mo hatihia moiso, ale mo sopo tea i eři hitevosahia vara sava mo lo vaira mo vaira sohena sava.

³⁴ Matan hare i eři levosahia vara God mo lo řomřomi na sava? Hare mo tatahola vara i eři pisuhi na malele isana? *Isa 40.13*

* **11:26:** Zion: Zion enia Jerusalem.

³⁵ Teni hare natu, mo sile te hina silesilea isana matan vara i pa mele spaia? *Job 41.11*

³⁶ Matan God enia pulo hina tari matan enia mo vaira, mo vaira la lo toho vara la pa sile na hasohaso isana. Mo tatahola vara tamlohi tari la sile na oloolo isana tarea mata rani tui tui. Amen.

12

Mauri Paro Peresi Křisto

¹ Matan la hina sei God mo vaira moiso la vorai peresi na vevorai, na lo usia řilangi vara ha sile na epemim isan God sohena hina malamalai matea mo mauri mo tapu isana, haratu God i pa avulahi hinia. Harihi enia nomim lotu tatahola vara ha lo vaia isana. ² Ha sopo hahau usuri na posposi non varama nike, pani ha tinařihia vara God i posa kamim matan vara ha eři levosahi na malele paro mata řomřomi, ale hin malele sei ha pa eři levosahia vara masalon God mo opoia vara ha pa vai na sava mo řuhu, ale mo tatahola, ale sava natu, mo vaia mo avulahi.

³ Matan usuri na řomřuhu sei God mo silea isaku na lo verea vara ha sopo hase řomaulu hin kamim i jeu na sava mo tatahola vara ha řomřomia, pani ha hase řomvosaři kamim i usuri na silesilea mata rasu atu God mo lo silea isamim. ⁴ Sohen epeřa sopesopera mo mařivi, ale nora vavahinau la tinatinapua, ⁵ ale mo sohena na open Křisto. Enřa mo isoiso řa sopesope epa, pani epa enia matelete, ale enřa hatehateahi nořa vavahinau la tinatinapua vara řa vaia. Ale matan enřa mo isoiso řa matea na epe hin Křisto, enřa řa nořa hatehateahi.

⁶ Romřuhu non God mo silea isara mo vaira řa eři vai na hina hai, ale vara nom enia mata o retimangovi, o vereuli na sava ko rasua vara God mo lo verea isam, ⁷ vara nom enia mata o tueni na tinapua, o tueni mamahunira, vara nom enia mata o vujangi, o vujangi i řuhu, ⁸ vara nom enia mata o retituetueni, o vaia, vara nom enia mata o silesile, o silea na avulahi, vara nom enia mata o tiroma na tamlohi, o vai mamahunia, vara nom enia mata o řomopoi hin te tinapua, o vaia na avulahi.

Posposi Tatahola Nona Mauri Kalesia

⁹ O sopo halu na nom opoia mata tina-pua, pani o opoira varāruhu, ha ūahu na sava mo hina sasati, ha turu na hinau mo ūahu. ¹⁰ Ha opoiopoi kamim na opoia varāruhu, ha lo kilau mata masapa vara ha sile na ooloalo isana tinapua tiroma. ¹¹ Ha sopo malokovari, pani ha varilele na vavahinau non Moli.

¹² Ha avulahi matan hinau sei ka lo ūomtoho hinia vara God i pa vaia isamim, ha ūomperavu na rani ūilangi, ha lo usiusi tarea. ¹³ Vara te tapuhi non God mo vejuveju hin te hinau, ha tuenira na nomim hinahinau, ale ha avulahi vara ha lavi na tamlohi na imamim.

¹⁴ Ha usi God vara i vaia i ūahu isan la haratu la lo tipahi kamim, ha leūuhu hinira, ha sopo lesati hinira. ¹⁵ Ha avulahi peresi la haratu la avulahi, ha tangi peresi la haratu la rongo mo sati. ¹⁶ Ha ūomromi na tinapua i tatahola hin kamim, ha sopo haruharu matan vara tamlohi aulu la pa tametame kamim, pani ha avulahi vara ha lo toho peresi na tamlohi purongo, ale ha sopo ūomaulu hin te rani.

¹⁷ Ha sopo kelekele. Ha hahau na malele matea sei tamlohi tari la hitevosahia vara mo ūahu. ¹⁸ Vara ha eři vaia, ha mauri usuri na malele mata tamata peresi na tamlohi tari.

¹⁹ La tapala ūuhuřuhu, ha sopo kelekele hin te rani, pani ha sile na masapa isan God vara i eři sile na nona talai lolokoru mata hehe matan la ulia na Retiulia vara,
‘Enau a pa kelea,

enau a pa volira,

enau Moli na lo vereea.’

Deut 32.35

²⁰ Ha vaia sohen harihi:

‘Vara nom meresahi mo marohati,

o vahania,

vara mo mařohu,

o sile te wai isana,

ale matana, i pa mahantuhanu

mata sava mo vaia isam.’

Prov 25.21-22

²¹ Ha sopo tinařihi na hehe vara i jeu kamim, pani ha jeu na hehe na vavahinau ūahu.

13

Ha Ooloalo Hin La Haratu La Lo Tauri Na Suiha

¹ Tamlohi rasua tari ha ooloalo hin la haratu la lo tauri na suiha, matan mo sopo tea vara i lo toho na suiha vara God mo sopo tinařihi, ale la haratu la lo turu, la turu matan God mo turuhira. ² Matana, sava tamlohi mo leji la haratu God mo taura la tauri na suiha, la lo leji na sava God atu mo vaia, ale la pa lavi na nona talai. ³ Matan tamlohi aulu na jara, la sopo matan vara tamlohi la pa matahunira vara la lo vai na posposi tatahola, pani tamlohi sei la lo vai na sasati la pa matahunira. Vara o vai na hinau tatahola, la pa ūahu isam. ⁴ God mo tau la haratu la lo aulu matan vara la tueniho. Pani vara ko lo vai na hehe, o pa matahu, matan God mo taua na limara vara la pa sileho na nom talai. ⁵ Matana, mo tatahola vara o ooloalo, mo sopo mata talai purongo, pani matan vara ūomim i tatahola na nahon God.

⁶ Matan hinau sei, mo tatahola vara ha voli na nomim takis. Mania atu i pa tueni la haratu la lo tauri na suiha vara la vai voko atu God mo taua na limara. ⁷ Ha sile na sava ka ave hinia isara, ale ha voli na takis tinatinapua isan la haratu la lo toho vara ha pa volia isara, ha sile na ooloalo isan la haratu mo tatahola vara la lavi na ooloalo.

Opoia Mo Mařivisi Na Leu

⁸ Ha sopo ave isan tea, pani ave atu enia vara ha pa volia tarea enia vara ha opoiopoi kamim, matan haratu mo opoi na tinapua mo lo mařivisi na leu non God.

⁹ Na leu non God, retileu matuvana la lo toho sohen harihi: o sopo vaivaileu peresi na tinapua mo lahi moiso, o sopo vilimatei na tamlohi, o sopo vavanaho, o sopo ūomusuri, peresi te mele retileu tinapua la pisuhi na retileu matelete purongo sei mara, ‘O opoi na tinapua sohen ko lo hasem opoipo!’

Lev 19.18

¹⁰ Opoia mo sopo vai te hina sati isana tinapua, ale matana, opoia enia mo mařivisi na leu.

¹¹ Varāruhu ha levosahia vara nake mo sopo rani mata juruvi ūomaliho, matan rani mata juri mo vejuveju, mo mele mariviti mo jeu rani atu ūa pa tau na nořa rasua hinia tiroma sei. ¹² Pongi mariviti vara i isoiso, rani juri mariviti vara i pala, ale ūa sopo toho na ūoroha, ūa pulahi na nořa posposi sasati, ale ūa ru na posposi

tataholo sei mo tai isan God. ¹³ Ra hahau na posposi tataholo sohen ū lo hahau na malarani, mo sopo hin na matavuhi mata lavilavi na tinapua, peresi na putu mata wai, teni posposi viriu, teni ūromromi na hina lumiha, teni vasvas teni mereimerei. ¹⁴ Pani ha ru Moli Iesu Křisto na maurimim, ha sopo sile na masapa vara ha vahani na maurimim na masalo varama.

14

Haratu La Sopo Rilangi Na Nora Rasua

¹ Ha lavi la haratu ūromira la lo kaka vara sava natu mo tataholo na posposi rasua, ale ha sopo arera na hinau la rasua. ² Tamlohi hai la ūromromia vara mo tataholo vara la hani na hinau tari, pani hai ūromira la sopo ūrilangi sohera, la lo hani na pere pahai purongo. ³ Haratu mo hani na hinau tari i pa sopo hiteřesi haratu mo tapuhoro te hanhani, ale haratu mo tapuhoro te hanhani, i pa sopo ari haratu mo lo hani na hinau tari, matan God mo lavia nona moiso. ⁴ Engko hare vara o eři ari na volitusi nona tinapua? Nona tamlohi tavera purongo i pa verea vara enia mo tataholo teni mo vono, ale i pa turu matan Moli i pa eři vaia i turu na rani aria.

⁵ Tamlohi hai la ūromromia vara na nahon God rani matea mo mele tapu mo jeu na tinapua mata lotu God, pani tamlohi hai la hitea vara rani tari la sohesohera purongo. Mo tataholo vara tamlohi hatehateahi la hatihia vara sava mo tataholo na ūromira. ⁶ Haratu mo sile na ooloolo isana rani matea, mo vaia matan vara i sile na ooloolo isan Moli. Haratu mo lo hani na hinau tari, mo sile na ooloolo isan Moli na nona vere meje matana, ale haratu mo tapuhoro na hanhani, mo tapuhoroa matan vara i sile na ooloolo isan Moli, ale mo vere meje isan God. ⁷ Matan mo sopo tea vara i mauri nona hasena, ale mo sopo tea vara i mate nona hasena. ⁸ Vara ūmauri, ūmauri non Moli, vara ūmate, ūmate ūsahe isan Moli, matan haratu, vara ūmauri teni ūmate, enřa non Moli. ⁹ Matan harakerihi natu Křisto mo mate ale mo mele mauri, matan vara i eři Moli non la haratu la mate peresi la haratu la mauri.

¹⁰ Engko, mata sava ko ari na voraim, teni vara ko hiteřesia? Matan enřa tari ū

pa turu na nahon God mata aria, ¹¹ matan la ulia vara,
‘Moli mo verea mara:

Matan enau na lo mauri,
tamlohi tari la pa popovitoho isaku,
ale meme tari la pa taviti isan God.’

Isa 45:23

¹² Matan haratu mo mera purongo vara enřa tari ūla pa turu na nahon God vara ūla ūrārami na nona aria mata nořa vavahinau.

¹³ Matan hinau atu, ūla sopo mele sile na talai isařa hatehateahi, pani i pa mele ūruhu vara ūhatihia vara ūla sopo mele vai te hinau vara i vai na voraiřa tinapua i tialahalaha teni i ori hinia.

¹⁴ Usuri na ūromromia non Moli Iesu, na lo levosahia mo ūruhu vara mo sopo te hanhani mo lumiha vara ūla sopo eři hania, pani enia mo lumiha isan haratu mo ūromromia vara mo lumiha. ¹⁵ Vara voraim ūromina mo lo sati na sava ko lo hania, ko sopo mele hahau na opoia. O sopo komo haratu Křisto mo mate matana, mata ham hinau purongo. ¹⁶ Ale matana, o sopo sile na masapa isan tea vara i jovi na hehe mata sava ko levosahia vara la pa retisasati hiniho matana, hina purongo vara ko levosahia vara mo tataholo.

¹⁷ Matan sava ko lo hania teni ko lo inua, la sopo aulu hin mauri atu God mo aulu hinia, pani posposi tataholo, tamata peresi avulahi atu la tai isan Tanume Tapu la aulu na mauri. ¹⁸ Hare sei, mo volitusi isan Křisto hin malele sei, God i pa avulahi hinia, ale tamlohi sohena la pa avulahi hinia. ¹⁹ Matan haratu, mo ūruhu vara ūla tutungui na sava i pa vai na tamata, ale na sava i pa tueni na tamlohi la ulua na nora rasua.

²⁰ O sopo komo na vavahinau non God mata hanhani purongo, vararuhi hinau tari la vokevoke, pani mo sopo tataholo vara o hani te hinau vara i pa vai na tinapua i jovi matana. ²¹ I pa mele ūruhu vara o sopo hani te mit teni o inu te wai ūrilangi vara i pa vai na voraim i jovi na nona rasua. ²² Nom rasua enia nom hasem peresi God. Haratu mo vai na hinau matan mo levosahia vara mo tataholo vara i vaia, i pa avulahi matan mo levosahia vara i pa sopo lavi na talai matana. ²³ Pani haratu mo sopo levosahia mamahunia vara sava mo lo hania mo tataholo na nahon God teni

mo vono, enia i pa lavi na talai vara i hania matan mo sopo hania usuri na nona rasua, ale sava mo sopo vora na rasua enia hehe.

15

Ha Vai Na Tovongi Ruhu

¹ En̄a sei nōa rasua mo ūilangi, mo tataholo vara ūa tueni la haratu ūomira mo sopo ūilangi, mo sopo tataholo vara ūa hase kilaūa purongo. ² Mo tataholo vara en̄a hatehateahi ūa vaia i ūahu isana tautavuīa, ūa tuenira la ulua na nora rasua, ³ matan K̄risto mo vai na tovongi matea isāra mo sopo hase kilaūa purongo, pani sohen la ulia vara K̄risto mo verea isan God mara,
'Na rani tamlohi la veresatiho, enau na rongo mo sati matana.'

Psa 69.9

⁴ Matan sava la ulia tuai la ulia matan vara i pa vujangī̄a, la lo silēa na ūomtoho, la tahe na ūomīa na nōa saovi na ūomperavu mata Retitapu non God.

⁵ Ale nake na lo usiusi vara God mata ūomperavu peresi na tuetueni, i tinařihia vara ha ūomromi na tinapua i tataholo hin kamim sohen K̄risto Iesu mo lo vaia, ⁶ matan vara kamim mo isoiso na leo matea, ha pa sile na hasohaso tavera isan God Taman nōa Moli Iesu K̄risto.

⁷ Matana, ha avulahi hin kamim hatehateahi sohen K̄risto mo avulahi hin kamim matan vara God i lavi na hasohaso matana. ⁸ Ka levosahia vara K̄risto mo sinai sohena volitusi isana Jew, vara i vujangia vara God mo sopo tope na nona reti mo retitauhi hinia isana tama Jew tuai, ⁹ ale matan vara tamlohi ūořoha la pa hasohaso God mata nona ūomopoa sohen la ulia vara,

'A pa hasohasoho isana tamlohi mara jara tinatinapua, a pa lalavete a tahe na hijam i aulu.'

Psa 18.49

¹⁰ Mo mele verea na jara tinapua vara, 'Kamim tamlohi ūořoha!'

Ha avulahi peresi na nona tamlohi, tautavuin Israel.'

Deut 32.43

¹¹ Ale mo mele verea vara, 'Kamim tamlohi sei ka tamlohi ūořoha,

ha hasohaso Moli, ale tamlohi tari

ha tahe na hijana i aulu.'

Psa 117.1

¹² Ale mele vahatea, Isaiah mara,

'Mahapin Jesse matea i pa turu, enia sei i pa aulu na tamlohi ūořoha, ale enira la pa lo ūomtoho isana.'

Isa 11.10

¹³ Ale nake na lo usiusi vara God sei mo lo sile na ūomtoho, i mařivisi kamim na avulahi peresi na tamata na nomim rasua, matan vara na suihan Tanume Tapu nomim ūomtoho i pa mařivi savulevule.

Paul Mo Verera Na Nona Vavahinau

¹⁴ Ale la voraiku peresi na vevoraiku, na hase levosahia mo ūahu vara ka lo vai na posposi ūahu isana tinapua, matan ka pete levosahi na sava God mo opoia moiso, ale ha pa eři vere tataholoia isamim hasemim. ¹⁵ Pani hin te hinau, na lo uliuli ūilangi isamim vara ha mele ūomromira, na vaia matan ūomruhu non God enia mo viřoniu, ¹⁶ matan vara a volitusi non K̄risto Iesu isana tamlohi ūořoha, vara a lavi na Retiřuhu non God isara sohena vavahinau nona přis matea matan vara haratu la tamlohi ūořoha la eři tau na nora rasua hin K̄risto, la mai sohena malařalai ūahu matea God mo avulahi hinia, ale matan vara i pa vaira la vokevoke na suihan Tanume Tapu. ¹⁷ Hin K̄risto Iesu enau a eři hapahapa na noku vavahinau na vaia non God, ¹⁸ matan a pa sopo vere te hinau, pani sava K̄risto mo vaia hiniau matan vara haratu la tamlohi ūořoha la oloolo na Retiřuhu na noku retireti peresi na noku vavahinau, ¹⁹ ale hiniau la oloolo mata suiha mata matamata peresi na hina mařurahi tavera na suihan Tanumen God, matan vara i tapulo Jerusalem i ūalihi i tikeli Illyricum, enau na mařivisi vevuhi na vavahinau mata Retiřuhu non K̄risto;

²⁰ ale na tau na ūomiku vara a retivujavujiangi na Retiřuhu, pani mo sopo na jara sei la pete rongo na hijan K̄risto ea moiso, mo sopo ūahu vara a voro na jara nona tamlohi tinapua enia mo pete tapulo voro na vao kalesia tiroma ea moiso, ²¹ pani mo lo usuri na sava la ulia vara,

'La haratu mo sopo tea la sorahia isara hin te rani, la pa hitevosahia, ale la haratu la sopo lo rongo na sorasorahina hin te rani, la pa rongovosahia.'

Isa 52.15

²² Vavahinau atu natu, mo horoau vaha visa moiso vara a mai isamim.

Paul Mara I Pa Sivo Jerusalem

²³ Pani nake, matan mo sopo te mele masapa vara a vavahinau hin la jara atu na lo vano hinira moiso, ale matan tuai moiso na opoia vara a pa mai isamim, ²⁴ na lo ūromtoho vara na malele vara a sivo Spain a pa rohi kamim, na opoia vara a pa toho peresi kamim mata makomo rani, ale na rani vara a malue, ha pa tueniau na maleleku.

²⁵ Pani nake, na lo sivo Jerusalem, na lavi na silesilea mata mania vara i pa tueni na tapuhi non God atu. ²⁶ Matan tamlohin Macedonia peresi Achaia la avulahi vara la sile te silesilea matan vara i pa tueni na tapuhi tilavono Jerusalem. ²⁷ Enira la avulahi vara la tuenira, ale mo tatahola vara la vaia isara, matan haratu tamlohi ūrofaha sei la lavi na hina ūruhu ūruhu Tanumen God mo silea, i pa tatahola vara la ase na nora silesilea mata mania isara Jerusalem. ²⁸ Hin rani atu vara a tau pa mania atu isan la haratu Jerusalem, moiso vara na maleleku vara a sivo Spain a pa rohi kamim. ²⁹ Na levosahia vara a mai isamim, a pa mai na lefuhu non Křisto sei i pa ūruhu jea matamim.

³⁰ La voraiku peresi na vevoraiku, na lo usia ūlangi isamim na hijan Moli Iesu Křisto, ale na opoia non Tanumen God, ha turu peresiau na nomim usiusi isan God matak, ³¹ ha usiusi vara i juriau na liman la haratu Judea sei la sopo rasua, ale vara noku vavahinau Jerusalem i pa tatahola na naho tapuhi non God ea, ³² matan vara na masalon God, a pa mai isamim na avulahi, ale ūra pa rongo i ūruhu jara matea matan a pa toho peresi kamim.

³³ God mata tamata i pa toho isamim mo isoiso, amen.

16

Retiololo Non Paul

¹ Ale na tau vevorai'a nike na nahomim, Deacon Phoebe volitusi mata vao kalesia mata vanuan Cenchreae, ² na opoia vara ha avulahi vara ha lavia hin Moli usuri posposi sei mo tatahola isana tapuhi non God, ale ha tuenia na nona opoia tari, matan enia hařai tuetueni ūruhu matea mo

tueni na tamlohi matuvana, ale mo lo tueniau sohera.

³ Ha sile na retiololo isan Priscilla enia Aquila, tapalaku na vavahinau non Křisto Iesu, ⁴ enira mariviti la mate matan la lo tueniau, mo sopo enau haseku na lo vere meje isara, pani vao kalesia tari non la haratu la tamlohi ūrofaha la vere meje isara. ⁵ Ha sile na retiololo isan la haratu la lo matavuhi na imara, ha sile na retiololo isan Epaenetus tamlohi ūruhu matea sei tamlohi la ūromřuhu hinia, enia mo tamlohi tiroma matan Asia sei mo posi mo mai isan Křisto mata noku vavahinau. ⁶ Ha sile na retiololo isan Mary, enia sei mo voko ūlangi matamim. ⁷ Ha sile na retiololo isan Andronicus peresi narouna Junias tavtauvin Israel, na rani na lo toho na ima ūlangi enira la lo toho peresiau. Vahule non Iesu la levosahi mamahunira, enira la mai isan Křisto tiroma hiniau. ⁸ Ha sile na retiololo isan Ampliatus, tamlohi ūruhu matea na opoia hin Moli. ⁹ Ha sile na retiololo isan Urbanus, tapalařna na vavahinau non Křisto, peresi Stachys na opoia.

¹⁰ Ha sile na retiololo isan Apelles, mo turu ūlangi na rani ūlangi moiso, ale Křisto mo avulahi hinia. Ha sile na retiololo na iman Aristobulus. ¹¹ Ha sile na retiololo isan tavtauiku na vaon Herodion, ha sile na retiololo isan la haratu non Moli na iman Narcissus. ¹² Ha sile na retiololo isan la hařai atu la lo vavahinau non Moli, Tryphaena peresi Tryphosa. Ha sile na retiololo isan hařai ūruhu sei Persis, enia mo vavahinau mo ūlangi non Moli. ¹³ Ha sile na retiololo isan Rufus, viřoni non Moli, peresi tinana sei, enia mo kilauau sohena natuna matea.

¹⁴ Ha sile na retiololo isan Asyncritus, Phlegon, Hermes, Patrobas, Hermas, peresi la vorai atu la lo toho peresira. ¹⁵ Ha sile na retiololo isan Philologus, Julia, Nereus peresi vetasina Olympas, peresi na tapuhi tari sei non God la lo toho peresira. ¹⁶ Ha tapatapai kamim na pungosi mata oloolo, vao kalesia tari non Křisto la sile na nora retiololo isamim.

Isoiso Reti Non Paul

¹⁷ La voraiku peresi na vevoraiku, na lo usia ūlangi isamim vara ha lo kilau matan la haratu la pulo patumasa, ale haratu

la lo posileji na vujangi tataholo ka lavi moiso, ale ha vahaři hinira,¹⁸ matan tamlohi sohen haratu la sopo volitusi non nořa Moli Křisto, pani mata pangera purongo, ale na nora haruharu peresi na nora retimemeji la lo halu na řomin haratu la sopo lelevosahi.¹⁹ Matan tamlohi tari la levosahi na nomim oloolo, ale mo vaiau na avulahi hin kamim, pani na opoia vara ha lelevosahi na sava mo řuhu, ale vara ha sopo tia na hina sasati.²⁰ Ale i pa sopo tuai God mata tamata i pa putputi Setan na ruhuruhu palomim. Ale řomřuhu non Moli Iesu Křisto i pa toho isamim.

²¹ Timothy, tapalaku na vavahinau, mo sile na retiololo isamim; enia peresi Lucius enia Jason, peresi Sosipater, enira tavytavuiku Israel.

²² Enau Tertius, na uli leta nike usuri na sava Paul mo verea isaku, enau sohena, na lo sile na noku retiololo isamim hin Moli.

²³ Enau Paul na lo toho na iman Gaius, mo lo sile na nona retiololo isamim, enia sei tamlohi tavera sei mo lo tueni na vao kalesia tari nike, ale Erastus, treasurer mata taon tavera nike peresi voraiřa Quartus, la sile na nora retiololo isamim.

²⁴⁻²⁵ Ra hasohaso God, enia i eři vai kamim ha řilangi i usuri na noku Retiřuhu peresi na retivujavujangi hin Iesu Křisto, i usuri na vujangi mata hina luhu sei God mo jarohia tuai tuai jea,²⁶ pani nake mo pala, ale na Retiulia sohena přovet la ulia tuai la vujangia mo mera isana mara jara tinatinapua tari, mo usuri na retileu non God sei mo lo toho rani tui tui, matan vara i vai na tamlohi la oloolo usuri na malele rasua,²⁷ isan God enia hasena mo lelevosahi, i pa lavi na hasohaso mata rani tui tui hin Iesu Křisto. Amen.

1 Corinthians

Tiroma Leta

Paul Mo Ulia Isana Mara

Corinth

Leta Nike

Leta akerihi mo usuri leta na tinapua matea Paul mo ulia isana mara Corinth moiso (5.9), hin leta nike Paul mo ūrami na nora retiusia sei la sohaia isana moiso (7.1). Corinth enia taon tavera jea matea na pahisa tasi Greece. Vao kalesia Corinth la patumasa, la lo aseasera (1.10–4.21). Mo ūrami na retiusia mata lahi (7.1–40), mata hanhani sei la silea isana tamasi (8.1–13), mata posposi tatahola mata lotu (10.1–14.40), peresi na sauteterahi non Iesu peresi na nona tamlohi usuri (15.1–58). Paul mo verea isara mara opoia mo aulu jea, mo jeu na rasua peresi na ūromtoho matan enia i pa toho jejeu (13.13).

Hin Leta Nike

1. Tiroma Retireti Non Paul (1.1–9)
2. Paul Mo Verea Mara La Turu Jara Matea (1.10–4.21)
3. Mauri Na Vao Kalesia (5.1–7.40)
4. Posposi Tatahola Mata Vao Kalesia (8.1–11.1)
5. Posposi Tatahola Mata Lotu God (11.2–14.40)
6. Křisto Mo Aulu Na Mateia (15.1–58)
7. Silesilea Nona Kalesia Jerusalem (16.1–4)
8. Paul Mo Hahau Corinth Mata Sava (16.5–12)
9. Retiololo Non Paul (16.13–24)

Retiololo Non Paul Isana Kalesia

¹ Enau Paul, na vahařule non Křisto Iesu usuri na masalon God, peresi voraira Sosthenes, ² kama sohai leta nike isana vao kalesia non God Corinth, isana tapuhi hin Křisto Iesu, God mo tovi kamim tapuhi peresi la haratu na jara tari sei la lo lotu Moli Iesu Křisto, nora Moli, ale enia nora Moli,

³ ūromruhu peresi na tamata la tai isan God Tamařa, peresi Moli Iesu Křisto, la vano isamim.

Paul Mo Vere Meje Isan God

⁴ Na lo vere meje isan God tarea matamim matan ūromruhu sei God mo

silea isamim hin Křisto Iesu, ⁵ matan enia mo vai kamim ka ulua mo ūruhu hinia na retireti tari peresi na lelevosahi tari, ⁶ harihi mo vujangia vara sava na verea isamim matan Křisto mo vararuhu na maurimim, ⁷ matan vara ka sopo vejuveju hin te otori sei Tanumen God mo lo silea, ale ka lo kilau matan rani atu nora Moli Iesu Křisto i pa mele pala hinia, ⁸ enia i pa vai na nomim rasua i ūrlangi i kakau na isoisona, i pa sopo tea i eři tuvai kamim hin te hinau hin rani atu non nora Moli Iesu Křisto. ⁹ God enia i sopo eři tope na nona retitauhi, God mo tovi kamim vara ha tapala peresi Natuna, Iesu Křisto, nora Moli.

Patumasa Na Lolo Vao Kalesia

¹⁰ Na lo usia ūrlangi isamim la voraiku peresi na vevoraiku, na hijan nora Moli Iesu Křisto, vara kamim mo isoiso nomim reti i matea, ale i sopo te patumasa isamim, pani ha matea na ūromřomi matea, ale ha matea na nomim ari. ¹¹ Matan la voraiku peresi na vevoraiku, na rongo na reti matea mo tai na vaon Chloe vara, kamim ka lo vasvas isamim. ¹² Na lo verea matan vonamim hai la lo verea lara, “Enau na usuri Paul!” tea la vara “Enau na usuri Apollos!” tea la vara “Enau na usuri Peter!” moiso tea la vara “Enau na usuri Křisto!” ¹³ Ha eři topetope Křisto? Paul mo mate na talopeilopei matamim? Teni ka lavi na paptijo na hijan Paul? ¹⁴ Enau na lo vere meje isan God matan enau na sopo paptijo hin te vonamim hatea, pani Crispus peresi Gaius purongo, ¹⁵ matan vara i pa sopo te vonamim hatea i eři verea vara enia mo lavi na paptijo na hijaku. ¹⁶ Vararuhu, na paptijo na vao iman Stephanas, pani korong na sopo mele paptijo hin te tinapua. ¹⁷ Matan Křisto mo sopo ūruleau vara a paptijo, pani vara a retivujavujangi na Retiřuhu ale mo sopo hin te reti mo ūrlangi mata levosahia, vara i vono talopeilopei non Křisto i pa sopo te ūramina.

Lelevosahi Non God

¹⁸ Matan reti mata talopeilopei enia hina rongorongo vono isan la haratu la lo vano na komokomo, pani isařa sei ūra juri hinia, enia suihan God. ¹⁹ Matan Isaiah mo ulia vara, ‘Enau a pa komo na lelevosahi

nona tamlohi lelevosahi,
ale a pa vai na ūromōromi nona tamlohi
lelevosahi
i mai hina purongo.' *Isa 29.14*

²⁰ Nene tamlohi lelevosahi? Nene tamlohi vujangi mata leu non God? Nene tamlohi mo eři retireti na varama nake? Ra eři verea vara God mo vai na lelevosahi nona tamlohi mata varama la mai hina rongorongo vono purongo. ²¹ Matan usuri na lelevosahi non God, God mo taua vara tamlohi na varama, la sopo eři lavutia na nora lelevosahi purongo. God mo avulahi vara i juri la haratu la rasu na hina rongorongo vono sei kama lo retivujavujangi hinia, ²² matan Jew la lo usia ūrlangi vara God i vai te matamata vara la hitea ale la pa rasua, ale tamlohi ūrōha la opoi vara la ale na lelevosahi vara la rasua, ²³ pani kamam kama lo retivujavujangi na mateia non Křisto na talopeilopei, enia hina tialahala matea isana Jew, ale enia hina rongorongo vono isana tamlohi ūrōha sohena mara Greek. ²⁴ Pani isařa sei God mo toviřa, hina purongo vara enřa Jew teni tamlohi ūrōha, enřa ūrā eři hitevosahi na suihan God peresi na nona lelevosahi ūruhu hin Křisto. ²⁵ Matan hina rongorongo vono non God enia mo jeu na lelevosahi nona tamlohi, ale hinau non God sei tamlohi la verea vara mo sopo te suihā hinia, enia mo jeu na suihā nona tamlohi.

²⁶ Ale la voraiku peresi na vevoraiku, ha to ūromōmia vara hin rani atu God mo toviřa, mo sopo te matuvana isamim ka tamlohi lelevosahi na naho tamlohi, mo sopo te matuvana ka tauri na suihā, mo sopo te matuvana ka vora tamlohi aulu. ²⁷ Pani God mo viřoni na hinau la rongorongo vono na varama matan vara i vai na tamlohi lelevosahi la mahanuhanu; ale God mo viřoni na hinau sei mo sopo te suihā hinira na varama vara i vai na tamlohi suihā la mahanuhanu. ²⁸ God mo viřoni na hinau la atano na varama, tamlohi la hiteřesira, hinau mo sopo te hinau hinira, mo vaira matan vara i vai la hinau sei tamlohi la lo verea vara la hina aulu, la mai hina purongo, ²⁹ matan vara tea i pa sopo eři retihapahapa na nahon God.

³⁰ Enia pulo maurimim hin Křisto Iesu. God mo vai Křisto enia nořa hina lelevosahi, enia natu, mo vairā ūtataholo

na nahon God, ale enia malele mata vairā ūt tapu, enia mo hase silea vara i volituhuřa. ³¹ Ale matan haratu sohen la ulia vara,

'Mo ūruhu vara haratu mo lo retihapahapa, i pa hapahapa hin Moli.' *Jer 9.24*

2

Talopeilopei Non Křisto

¹ La voraiku peresi na vevoraiku, hin rani atu na mai isamim, na sopo mai vara a retivujavujangi na hina luhu mata juri non God na retitavera teni na retilelevosahi. ² Matan enau na tau na ūromiku vara a pa sopo vujangi te hinau tinapua pani Iesu Křisto purongo, ale hin na nona mateia na talopeilopei. ³ Ale hin rani atu na lo toho peresi kamim mo sopo te suihaku, na matahu, ale na savaravara tavera matan na sopo levosahia vara sava i pa masese isaku, ⁴ ale noku retireti peresi na noku retivujavujangi la sopo retihaluhalu mata lelevosahi, pani na limaku Tanumen God mo vujangia isamim na matamata peresi na suihā, ⁵ matan vara nomim rasua i pa sopo turu na lelevosahi nona tamlohi, pani na suihā God purongo.

Lelevosahi Mo Tai Isan God

⁶ Pani isan la haratu la jea, kama lo retireti na hina lelevosahi, pani mo sopo na hina lelevosahi mata varama nake, teni hina lelevosahi nona tamlohi aulu mata varama nake, enira la haratu sei la lo vano na nora komokomo. ⁷ Pani kama lo verea na lelevosahi non God matea sei mo lo luhu, enia God mo taua matařa tuai moiso varama mo sopo lo toho, matan mauri ūruhu atu na tuka. ⁸ Mo sopo te tamlohi aulu na varama nake i levosahia matan, vara la pa lo levosahia la pa sopo vili matei Moli mata ūruhu atu na talopeilopei atu. ⁹ Pani sohen la ulia mo verēa vara,

'Sava te mata mo sopo lo hitea,
teni te pero i rongoa,
teni tea i ūromōmia,
sava God mo tau mamahunia moiso,
matan la haratu mo lo opoira.' *Isa 64.4*

¹⁰ La hinau nike, God mo vujangia isařa hin Tanumena. Matan Tanumena mo levosahia na hinau tari peresi na lolo ūromōmi

non God. ¹¹ Matan hare mo levosahi na ūromūromi non tamlohi tinapua matea pani tanumen tamlohi atu purongo sei mo lo toho na lolona? Ale mo sohena purongo, mo sopo tea i eři levosahi na ūromūromi non God pani Tanumen God purongo. ¹² Ale nake, enřa ūra sopo lavi na tanume mo tai na varama, pani ūra lavi Tanume atu mo tai isan God matan vara ūra pa eři levosahi na hinau God mo sile purongoia isara. ¹³ Ale kama vujangila hinau sei mo sopo usuri na lelevosahi nona tamlohi, pani na retireti Tanumena mo vujangia isamam, kama lo sořotahi na ūromūromi non Tanumena peresi na retivarařuhu non Tanumena, ale kama vereulira isan la haratu Tanumena mo lo toho isara. ¹⁴ Tamlohi purongo i sopo eři lavi na hinahinau non Tanumen God, matan enira hina rongorongo vono isana, ale enia i sopo eři levosahira matan Tanumen God purongo i eři vujangira isana. ¹⁵ Tamlohi atu Tanumen God mo lo toho isana, i eři ari mamahuni na hinau tari, pani tinapua i pa sopo eři mele ari tamlohi atu. ¹⁶ Matan reti non God mo verea vara, 'Hare mo levosahi na ūromin Moli?

Hare i pa eři pisuhi na malele isana?

Isa 40.13

Pani enřa ūra lavi na ūromin Křisto.

3

Volitusi Non Křisto

¹ Pani, la vorai peresi na vevorai, hin rani atu enau na lo toho peresi kamim, na sopo retireti isamim sohena tamlohi rasua la jea. Mo vono. Na lo retireti isamim sohena natuvarihi matan ka pa lo usuri na posí tamlohi varama, ka pa lo pipi na maurin Křisto. ² Na vahani kamim na wai susu, mo sopo na hanhani ūlangi, ale mo tikeli nake, ka sopo lo tatamahu matana, ³ matan ka pa lo toho na suiha masalomim. Matan ka mereimerei hin kamim hatehateahi, ale ka lo vasvas hin kamim hatehateahi. Matan posposi sei mo vujangia vara kamim ka pa lo toho na suiha masalomim. Ka lo hahau sohena tamlohi varama. ⁴ Matan vonamim matea mara, 'Enau na usuri Paul!' moiso tinapua mo verea mara, 'Enau na usuri Apollos!'

* ^{3:17:} temple: Paul mo lo vere temple nike, ale ūramina enia matavuhi nona kalesia hin jara atu, mo sopo verea na epe tamlohi matea.

mo vujangia vara ka lo hahau sohena tamlohi purongo.

⁵ Apollos enia mo ūruhu mata sava? Paul mo ūruhu mata sava? Kamam volitusi, ale hin kamam kamim ka mai na rasua, sohena Moli mo taua moiso vara hare i pa vai na sava. ⁶ Enau na lavo, Apollos mo tau na wai, pani God natu, mo vaia mo ulua. ⁷ Haratu mo lo lavo teni haratu mo lo tau na wai, mo sopo te hinau ūruhu hinia, pani God purongo sei mo lo vaia mo ulua. ⁸ Haratu mo lo lavo, ale haratu mo lo tau na wai, enira la matea, ale la pa lavi na volira i tataholo na sava la lo vaira hatehateahi. ⁹ Matan kamam kama tapala na vavahinau non God. Kamim lovuhai non God, ale ka iman God.

¹⁰ Enau tamlohi tavera mata voro ima usuri na ūromřuhu non God, ale na tau na pulo ima, ale tamlohi tinapua matea mo lo voro aulu hinia. Mo ūruhu vara tamlohi hatehateahi i kilau mamahunia vara sohena sava i pa voro na ima hinia. ¹¹ Matan mo sopo tea i eři tau te pulona tinapua hin haratu mo lo toho moiso. Enia sei, Iesu Křisto. ¹² Vara tea i voro hin pulona atu na gold teni silver, teni vatu angangi ūruhu, teni mo lo voro hin te vipahai teni rato teni ere, ¹³ voko nona tamlohi hatehateahi, i pa mera purongo matan rani aria i pa vaia i mera, matan suiha hapu i pa vahite na voko nona tamlohi hatehateahi vara mo sohena sava. ¹⁴ Vara te voko atu sei tea mo voro aulu hin pulo ima atu mo jeu na hapu, enia i pa lavi na nona otori matana. ¹⁵ Vara hapu mo hani vevuhi na voko non tea, nona otori i pa tihai, ale tamlohi atu i pa juri, pani i pa sohena tamlohi matea la juri nařihia na hapu mo lo turu lekoleko purongo.

¹⁶ Ka sopo levosahia vara kamim ka temple non God, ale Tanumen God mo lo toho na lolomim? ¹⁷ Vara tea i komo na temple non God, God i pa komoa, matan temple non God enia mo tapu, ale kamim natu, ka temple atu.*

¹⁸ Tea i sopo eři hase halua hasena. Vara te vonamim mo lo ūromřomia vara enia tamlohi lelevosahi matea hin varama nike nake, i pa mele ūruhu jea isana vara i mai

tamlahi rongorongo vono, matan vara i pa mai tamlohi lelevosahi vararuhu. ¹⁹ Matan lelevosahi matan varama nike, enia rongorongo vono isan God matan la ulia mo verea vara,

'Enia mo vunai na tamlohi lelevosahi na nora posposi mata lelevosahi.'

Job 5.13

²⁰ Ale mo mele verea vara,
'Moli mo levosahia vara ūromūromi nona tamlohi lelevosahi
la sopo ūruhu matan te hinau hatea.'

Psa 94.11

²¹ Matan mo sohena, i pa sopo teai eři hapahapa hin te hinau nona tamlohi. Matan hinau tari enira mata tueni kamim, ²² vara Paul, teni Apollos, teni Peter, teni varama, teni mauri, teni mateia, teni hinau nake, teni hinau la pa mai, enira mo isoiso nomim, ²³ ale kamim non Křisto, ale Křisto enia non God.

4

Vavahinau Nona Vaharule Non God

¹ Kamim mo tatahola vara ha kilau kama sohena volitusi non Křisto, volitusi sei mata tauri na hina tatalanghi non God. ² Ale aulu hinia, mo tatahola vara la haratu la lo tauri na hinau sohena, la pa turu ūrlangi na sava la lo vaia. ³ Pani enia hina rihirihi purongo isaku vara te vonamim teni te court nona tamlohi hatea i ariau. Vararuhu, matan enau haseku na sopo ariau. ⁴ Na sopo ūromūromi te hinau vara na vaia mo sati, pani mo sopo haratu natu vara mo vaiau na tatahola na nahon Moli, matan Moli hasena i pa ariau. ⁵ Matan hinau sei, ha sopo sile te talai i tiroma hin rani atu mata aria, i tiroma na mele mai non Moli sei i pa lavi na hina luhu na ūroha nake la mai na malarani, ale i pa vujangia vara tamlohi la lo vai na nora vavahinau mata sava. Ale hin rani atu, God i pa sile na nona reti ūruhu isara hatehateahi.

⁶ La voraiku, na lo verea enau Apollos sohen tovongi matea isamim mo usuri na noku vujangi nike. Ale vara ha turu na sava la ulia na Retitapu moiso, ha pa sopo eři retihapahapa hin te tamlohi hatea

matan mo pa aulu na vavahinau non tina-pua. ⁷ Sava mo vai kamim ka ūromūromia vara ka ūruhu ka jeu na tinapua? Sava enia nomim sei God mo sopo silea isamim? Ale vara hinau tari nomim mo tai isan God, mata sava ka lo retihapahapa sohena vara ka sopo lavi te hinau isana?

⁸ Ka pete lavi vevuhi na hinau tari ka opoira moiso. Ka pete tavitav moiso. Ka jeu kamam matan ka pete supe moiso, ale i pa ūruhu vara ka pete tauri suiha atu moiso matan kama pa tauri na suiha peresi kamim. ⁹ Matan na hitea sohena vara God mo tau kamam vaharule sohen tovongi matea, mo tau kamam hitahu jea na tamlohi,* sohena tamlohi la lo vano na nora mateia, kama mai sohena hinau matea varama peresi na angelo peresi na tamlohi la pa varoia.

¹⁰ Kamam kama tamlohi rongorongo vono matan Křisto, pani kamim ka tamlohi lelevosahi hin Křisto. Kamam kama tamlohi malum, pani kamim ka tamlohi ūrlangi. Kamim, tamlohi la sile na oloolo isamim, pani kamam, la hitelehilehi kamam. ¹¹ Mo mai nake, kama pa lo marohati, ale kama pa lo mařohu, nomam ruru la sopo ūruhu, tamlohi la vailehilehi kamam, ale mo sopo te imamam. ¹² Ale kama kalvono, kama voko na limamam, vara la veresatihikamam, kama leřuhu hinira, ale vara la tipahi kamam, kama turu ūrlangi tarea, ¹³ vara la vereřesiresi kamam, kama reti ūruhu isara. Kama mai sohena, ale kama pa lo toho sohena utauta na varama, sohena tapahuri.

¹⁴ Na sopo uli la hinau nike, matan vara a vai kamim ha mahanuhanu, pani vara a retiroařoahai kamim sohena natuku ūruhuřuhu. ¹⁵ Matan hina purongo vara nomim tamlohi vujangi mo matuvana hin Křisto, tamamim mata rasua la tupu visalete purongo. Matan enau na mai tamamim hin Křisto Iesu na Retiřuhu. ¹⁶ Ale matana, na lo usia ūrlangi isamim vara ha usuri na noku tovongi.

¹⁷ Matan hinau sei natu, na pa ūrule Timothy natuku ūruhuřuhu isamim, ale enia mo ūromturu ūrlangi tarea hin Moli, i pa mai

* **4:9:** hitahu jea na tamlohi enia mo lo ūrami rani atu tamlohi vuro la lavi la tamlohi atu mata vilimateira la taura na isoiso vao atu sei la tiroma hinira na naho tamlohi tari na rani la mele pala na jarara tatahola.

vara i mele vere kamim na noku posposi hin Kristo, i pa vujangi kamim sohen enau na lo vujangi na vao kalesia tari na jara tari.

¹⁸ Tatuamim nake la lo mangisi tavera jea matan la lo ūromūromia vara a pa sopo mele mai isamim. ¹⁹ Pani vara masalon Moli, a pa mele mai isamim vila, ale a pa vileiulia vara la tamlohi mangisi nike la lo vaore purongo teni vara nora suiha mo tai isan God. ²⁰ Matan mauri atu God mo aulu hinia mo sopo turu na retireti nona tamlohi purongo, pani na suihan God. ²¹ Ka opoi na sava? A pa mai isamim peresi na hamim maja, teni a pa mai isamim peresi na opoia na posposi ūromatano?

5

Tau Nārihi Haratu Mo Hehe

¹ Sorasora mo lo vano vara posposi maji mo lo toho isamim, ale posposi maji sei mo sopo te tamlohi ūrōoha i ēri majinga hinia vara tea i ēri vaia sohena, matan tamlohi matea mo lo lavi na naroun tamana, ² ale kamim ka ūromaulu pani ūromimmo sopo sati mata sava? Ha tau nārihi tamlohi atu mo lo vai posposi atu na livuhamim.

³ Matan hina purongo vara na sopo toho peresi kamim nake, noku ūromūromi mo lo toho isamim, na pete sile na talai moiso isan haratu sei mo vai posposi atu. ⁴ Vara ha matavuhi na hijan Moli Iesu, ale noku ūromūromi i pa lo toho peresi kamim na suihan nōra Moli Iesu, ⁵ ha pa sile tamlohi nike na liman Setan matan vara i komo na epena, matan vara maurina i pa juri na rani aria non Moli.

⁶ Nomim hapahapa mo sopo tataholo. Ka sopo levosahia vara ha tau na makomo isi na flaua, i pa vai na flaua i sosohi vevuhi? ⁷ Ha tau nārihi na flaua tuai isi mo lo toho hinia, matan vara ha pa mai flaua paro, matan kamim ka flaua paro vararuhu. Matan la sile Kristo nōra natu sipsip mata Passover, Kristo, enia malamalai atu mo mate matāa. ⁸ Mo ūruhu vara ūra matavuhi mata hanhani Passover, mo sopo peresi na flaua tuai isi mo lo toho hinia, isi atu enia posposi vaisatihi na tinapua, ale enia hina sasati, pani ūra pa hani pereti atu mo sopo te isi hinia,

pereti atu enia mauri vokevoke peresi na retivarařuhu.

Hehe Na Lolo Vao Kalesia

⁹ Na uliuli isamim moiso na noku leta vara ha pa sopo tapala peresi na tamlohi la lo vai na posposi maji, ¹⁰ na sopo ūramami la haratu non varama la sopo tatuāra sei la lo vai na posposi maji, teni la haratu ūromūromi hařivi mo lo vilira, teni la haratu la lo vavanaho, teni la haratu la lo lotulotu vono. Matan, vara na lo verea sohena, ha pa malue hin varama nike vara ha ēri toho asau hinira. ¹¹ Pani nakerihi na lo uliuli isamim vara ha sopo pulutahi peresi tea sei mo verea vara mo vorai rasua vara mo jovi na posposi maji, teni na ūromūromi hařivi, teni mo lotulotu vono, teni mo lo hiteřesiřesi na tinapua, teni mo lo putu na wai ūrlangi tarea, teni mo tamlohi halu, ale ha pa sopo sakele vara ha hanhani matavuhi peresi tea vara mo sohena.

¹² Matan mo sopo noku hinau vara ari na tamlohi la sopo rasua. Pani enia nomim hinau mata ari la haratu na lolo vao kalesia. ¹³ God i pa ari la haratu la sopo tamlohi rasua ale mo verea mara, ‘Ha tipahi nārihi na tamlohi hehe sasati na livuhamim!’ *Deut 17.7; 19.19*

6

Nomim Vauriuri

¹ Vara te vonamim mo vauriuri peresi na vonamim matea, mo pa hitea sohena sava vara i vano isana tamlohi ari na jingoima, ale mo sopo taua na lima tapuhi non God? ² Teni ka sopo levosahia vara tapuhi non God la pa ari na varama? Ale vara ha pa ari na varama, mo toma, ka sopo navu vara ha ari na nomim vauriuri vavarihi? ³ Ka sopo levosahia vara enřa ūra pa ari na angelo? Matan haratu, mata sava ka sopo ēri tau na tamata na vauriuri vavarihi nike na varama? ⁴ Vara te hinau isamim mo sohena, mata sava natu, ka lo vano isana tamlohi varama, haratu sei mo sopo te nora hinau vara la ēri reti matana na lolo vao kalesia? ⁵ Na lo vere hinau nike, vara a vai kamim ha mahanuhanu. Varařuhu, mo sopo tea na lolo vaomim kalesia vara mo sopo lo jea na lelevosahi vara i ēri tau na tamata na vauriuri nona vorai kalesia? ⁶ Pani kamim, ka hitea vara

mo tataholo purongo vara te voraimim i tau na voraina kalesia tinapua matea na aria nona tamlohi varama!

⁷ Ka lo vauriuri peresi kamim hasemim na naho tamlohi aria mata varama, enia mo vujangia mo memera moiso vara ka lo toho asau hin mauri atu God mo opoia. I pa mele ūruhu vara ha tinařihi purongoia, i pa mele ūruhu vara ha tinařihira la jeu kamim. ⁸ Pani kamim purongo kamim hasemim, ka lo vai na hehe isamim, ale ka lo haluhalu na voraimim kalesia!

Ha Toho Asau Na Posposi Lumiha

⁹ Ka sopo levosahia vara la haratu la lo vai na hehe la pa sopo eři lavi mauri atu God mo aulu hinia? Ha mera hinia, la haratu la lo vai na posposi viriu, teni la haratu la lotulotu vono, teni la haratu la lo vaivaileu peresi na tinapua, teni tamlohi la juruvi peresi na tamlohi teni hařai la juruvi peresi na hařai purongo, ¹⁰ teni tamlohi vavanaho, teni la haratu la lo ūromusuri na hinau non te tinapua, teni la haratu la opoi jea na wai ūrlangi tarea, teni la haratu la lo veresatihi na tinapua, teni la haratu la lo uri na tamlohi mata vavanaho na nora hinau, enira mo isoiso atu la pa sopo lavi mauri atu God mo aulu hinia. ¹¹ Ale tuai tatuamim ka sohena, pani nake God mo hoje nařihi na nomim hehe moiso, ale mo tapuhi kamim, mo vai kamim ka tataholo na nahon God na hijan Moli Iesu Křisto peresi na Tanumen nořa God.

Hahau Mo Tataholo

¹² Hai la lo verea lara, "Matan enau kalesia matea, mo tataholo purongo vara a usuri na masaloku tari." Pani a eři verea vara hinau tari la pa sopo eři tueni kamim, pani hina purongo vara, "Enau kalesia matea, mo tataholo purongo vara a usuri na masaloku tari." A pa sopo tinařihi vara a toho na ruhuruhun te hinau hatea. ¹³ Ale hai la lo verea vara, "Hanhani mo lo toho mata pangeřa, ale pangeřa mo lo toho mata hanhani!" Mo vararuhi pani ko hitea, God i pa komora enira mo rua. Epeřa mo sopo toho mata posposi viriu, mo vono! Epeřa la lo toho mata non Moli, ale Moli mo aulu na epeřa. ¹⁴ Ale God mo sauteterahi Moli na mateia, ale i pa sauteterahi na epeřa sohena na suisana.

¹⁵ Ka sopo levosahia vara epemim enira vonara matea na epen Křisto? Mo tataholo vara a lavi te vonara hatea na epen Křisto, ale a vaia i sořotahi isana hařai malele matea? I vonovono ūruhu! ¹⁶ Teni ka sopo levosahia vara haratu mo sořotahi peresi na hařai malele matea mo mai epe matelete peresia? Matan sohen la ulia mo verea vara, 'Enira rua, la pa mai epe matelete'.

Gen 2.24

¹⁷ Pani haratu sei mo sořotahi isan Moli, enia mo mai matelete peresi na Tanume.

¹⁸ Ha rovo asau na posposi viriu. Hina sasati tinapua tari tamlohi la lo vaira mo sopo komo na epena, pani haratu mo lo vai na posposi viriu mo lo hase hehe na epena.

¹⁹ Teni ka sopo levosahia vara epemim enia temple non Tanume Tapu sei mo lo toho na lolomim sei God mo silea isamim? Ka sopo nomim hasemim, ²⁰ matan sava God mo volituhu kamim hinia vara i juri kamim mo tavera jea. Ale na epemim tari ha vaira na posposi ūruhu vara la tahe na hijan God i aulu.

7

Vujangi Mata Lahi

¹ Ale nakerihi, usuri na sava ka usia na nomim leta, ka usia vara, "Mo tataholo vara tamlohi la sopo juruvi peresi na hařai teni mo vono?" Ale noku ūrami nahai, ² mo ūruhu, pani matan posposi viriu mo marivi hajavua, i pa mele ūruhu jea vara tamlohi matea i lahi, ale i lo toho peresi narouna purongo, ale hařai matea i toho peresi tuana purongo. ³ Mo sopo tataholo vara tamlohi lahi matea i horo narouna vara mo opoia vara i juruvi peresia, matan mo tataholo vara i usia, ale narouna sohena i pa sopo horo tuana. ⁴ Hařai lahi matea i sopo eři vai na sava tarea enia hasena mo opoia, matan tuana mo aulu na epena, ale tuana sohena i sopo eři vai na sava tarea enia hasena mo opoia, matan narouna mo aulu na epena. ⁵ Ha sopo horohoro kamim, pani matan te hinau purongo sohen harihi: vara engko peresi naroum ka majinga hinia matan vara ha hase tau kamim mata usiusi matan te makomo rani purongo. Pani vara mo

isoiso, ha mele juruvi jara matea matan vara Setan i sopo eři vahite kamim vara ha vano isana tinapua matan ka sopo eři hase taurilati kamim.

⁶ Sava na lo verea matana mo tataholo, pani enia mo sopo retileu matea. ⁷ Enau na opoia vara tamlohi tari la soheku, pani tatua tamlohi God mo vaira la tataholo vara la lahi, ale tatuara God mo vaira la tataholo matan la sopo lahi.

⁸ Ale isan la haratu la sopo lahi teni la hařai malepu, na verea vara mo mele ūruhu jea vara la sopo lahi soheku. ⁹ Pani vara la sopo eři hase taurilatira, mo ūruhu vara la lahi. Matan enia mo mele ūruhu jea vara la lahi mo jeua vara la sopo eři taurilati na masalo epera.

¹⁰ Ale isan la haratu la lahi mo sopo enau na lo verea pani Moli mo lo verea vara, hařai lahi i pa sopo rovo hin tuana, ¹¹ pani vara i vaia, i pa sopo eři mele lahi, pani vara mo ūruhu hin ūromřomi atu, mo sopo te mele malele tinapua, i pa vai na tamata peresi tuana i mele mai isana, ale tamlohi lahi sohena i sopo ūruhu hin narouna.

¹² Isana tamlohi tinapua enau na lo verea mo sopo Moli mo verea vara te vorai kalesia hatea sei narouna mo sopo kalesia, pani ūromina mo ūrilangi vara i toho peresi tuana, i pa sopo ūruhu hinia. ¹³ Vara te hařai kalesia hatea tuana mo sopo kalesia matea, pani vara ūromina mo ūrilangi vara i lo toho peresi narouna, narouna i pa sopo ūruhu hinia. ¹⁴ Matan God mo tapuhi na tamlohi mo sopo rasu matan narouna enia hařai kalesia matea, ale God mo tapuhi na hařai mo sopo rasu matan tuana enia tamlohi kalesia matea. Vara i vono, natumim la pa lumiha na nahon God, pani matan mo sohen haratu, enira la tapu na nahona. ¹⁵ Pani vara vonara matea sei na lahi mo sopo kalesia, ale mo rovo, ha tinařihia vara i sohena. Hin posposi sei vorai kalesia atu i sopo eři tia hin lahi atu, matan God mo tovi kamim vara ha toho na tamata. ¹⁶ Hařai lahi, ko pa levosahia sohena sava vara o eři juri tuam? Tamlohi lahi, ko pa levosahia sohena sava vara o eři juri naroum?

¹⁷ Mo ūruhu vara tamlohi kalesia hatehateahi la toho hin mauri atu sohen Moli mo silea isara, hara sei God mo tovira matana, harihi enia noku retileu isana vao

kalesia tari. ¹⁸ Vara tea mo taiřalihi tiroma moiso hin rani atu God mo pa tovia, i pa sopo vahitea vara i vaitihai na hapila nona taiřalihi! Vara tea mo sopo taiřalihi hin rani atu God mo tovia, i pa sopo ale na taiřalihi! ¹⁹ Matan mo sopo te hinau hinia vara ko taiřalihi teni ko sopo taiřalihi, hina aulu enia vara ha oloolo na retileu non God.

²⁰ Mo ūruhu vara tamlohi hatehateahi la lo toho hin mauri atu God mo tovira hinia. ²¹ Vara te vonamim mo lo slev hin pongi atu God mo tovia, i pa sopo ūromřomi te hinau vara i pa lo toho sohena slev teni mo vono. Pani vara nona tamlohi tavera mo opoia vara i teria, mo ūruhu vara i vano. ²² Matan hara sei Moli mo tovia na rani mo pa lo toho sohena slev matea, enia mo materi hin Moli, ale sohen haratu, haratu sei mo materi hin rani atu Moli mo tovia, enia mo slev non Kristo. ²³ Volimim atu God mo volia mata juri kamim mo tavera jea, ha sopo mai slev nona tamlohi. ²⁴ Ale la voraiku peresi na vevoraiku, na sava mauri vara God mo tovi kamim hatehateahi hinia, mo ūruhu vara ha lo toho atu, ale God i pa toho peresiho.

²⁵ Ale isana kalesia sei la sopo lo lahi, na sopo lavi te retileu isan Moli matara, pani na sile na noku kilakilau sohena tamlohi matea sei Moli mo ūromopoia, hinau sei ha eři rasua. ²⁶ Ale na ūromiku na sava mauri mo lo toho nake, mo ūruhu vara haratu mo lo toho na sava mauri, i lo toho hinia. ²⁷ Vara ko lahi moiso, o sopo rovo hin naroum. Vara ko sopo lo lahi, mo mele ūruhu jea vara o sopo aleale naroum. ²⁸ Pani vara ko lahi, ko sopo vai na hehe, ale vara te hařai matea la tapuhoroa moiso mo lahi, mo sopo vai na hehe. Pani la haratu la lahi la pa lavi na rani ūrilangi matana, na verea matan na opoia vara a horo kamim na rani ūrilangi mata lahi.

²⁹ La voraiku peresi na vevoraiku, ūrami noku reti mo sohen harihi: rani sei God mo taua matan varama nike mo vejuveju sati moiso. Ale matana, mo tapulo nake, la haratu sei naroura, la pa toho sohena mo sopo te naroura, ³⁰ ale la haratu sei la lo tangtangi la pa vaia sohena la sopo tangtangi, ale la haratu sei la lo avulahi, la pa vaia sohena la sopo avulahi, ale la haratu sei la lo volvoli, la

pa sopo taurilati na sava la volia,³¹ ale la haratu la lo vai na yoko hin varama nike, la pa sopo tia hin varama nike, matan varama nike mo lo vano vara i tihai.³² Na opoia vara ūromimim la sopo tiatia na hina tinatinapua matuvana, matan haratu mo sopo lo lahi i pa eři tau na ūromina na vavahinau non Moli vara i pa vai Moli i avulahi hinia.³³ Pani tamlohi atu mo lahi moiso, mo lo tau na ūromina na hinahinau mata varama matan vara i pa vai narouna i avulahi hinia,³⁴ ale ūromina mo lo masanga, ale hařai mo sopo lo lahi, teni hařai la tauhoroa moiso vara i pa lahi, enira la tau na ūromira na vavahinau non Moli vara la pa hahau na mauri vokevoke na epera peresi na ūromira. Pani hařai atu mo lahi moiso mo lo tau na ūromina na hinahinau mata varama mata i vai tuana i avulahi hinia.

³⁵ Na lo retireti sohena vara a tueni kamim, mo sopo matan vara a horo kamim hin te hinau, pani vara hinau tari isamim la pa maro tataholo, moiso vara i vai na ūromimim i ūrilangi isan Moli matan vara i sopo masanga.³⁶ Vara tea isamim mo lo hase tapuhoroa vara i sopo lahi isan tapalana, ale nake mo ūromřomia vara mo sopo ūromřomi ūruhu natu, ale vara ūromina mo ūrilangi vara i lahi, ha tinařihia vara i vaia sohena, ha tinařihira vara la lahi, enia mo sopo vai na hehe.³⁷ Pani haratu sei ūromina mo ūrilangi vara i hase tapuhoroa na lahi, mo sopo matan te hinau tinapua, pani matan mo hase eři taurilatia, ale vara ūromina mo turu ūrilangi hinia, mo lo ūruhu purongo vara i sopo lahi.³⁸ Ale matana, haratu mo lahi isan tapalana, enia mo vai na hina ūruhu matea, ale isan haratu mo lo hase tapuhoroa na lahi, mo vai na hinau mo mele ūruhu jea.

³⁹ Hařai lahi matea mo lo toho na ruhuruhan tuana i tikeli rani atu tuana mo mate. Pani vara mo mate, enia mo materi vara i eři mele lahi vara mo opoia, pani isana tamlohi kalesia matea purongo.⁴⁰ Pani na noku kilakilau, hařai malepu atu i pa mele avulahi jea vara i lo toho hasena purongo. Ale na levosahia vara enau na lo usuri na ūmin Tanumen God matana.

Hanhani La Silea Isana Tamasi

¹ Ale nakerihi na opoia vara a mele retireti makomona na hinau matea na nomim leta sei mata hanhani sei tamlohi la silera isana tamasi moiso. Enřa mo isoiso řa levosahia vara: Enřa řa lavi na lelevosahi. Pani 'lelevosahi' sei la lo verea mo lo vai na tamlohi la ūromaulu, pani opoia mo lo vai na tamlohi la ulua na posposi ūruhu.² Vara tea, ūromina mo ūromřomia vara mo levosahi te hinau, tamlohi atu mo sopo lo levosahi te hinau na sava vara i pa levosahia.³ Pani vara tea mo opoi God, God mo levosahi tamlohi atu.

⁴ Matan haratu, na ūromřomi mata hani na hanhani sei la silea isana tamasi, řa levosahia vara tamasi la sopo mauri, ale řa levosahia vara mo sopo te God tina-pua, pani matelete purongo.⁵ Matan hina purongo vara hinau hai na tuka teni na varama la tovira god la lo toho, varauhu god matuvana peresi na moli matuvana la lo toho,⁶ pani isařa, God mo matelete enia Tamară, hinau tari la tai isana, enira mo isoiso nona, ale Moli matelete enia Iesu Kristo, ale hinia, hinau tari la pala, ale hinia, enřa řa lo mauri.

⁷ Pani, mo sopo tamlohi tari la lavi lelevosahi nike. Pani matan tamlohi kale-sia hai tiroma la lo pulutahi peresi na tamasi moiso vara la hani na hanhani la silea isana tamasi moiso, la pa ūromřomia vara la lo vai na hehe, ale la pa rongoa vara la lumiha matana.⁸ Pani hanhani i sopo eři vairā řa tataholo na nahon God. Ra sopo eři vejuveju hin te hinau vara řa sopo hania, ale vara řa hania i pa sopo eři tueniřa.⁹ Pani ha lo kilau i ūruhu vara nomim materi sohen harihi i sopo vai te voraimim kale-sia hatea i jovi matan ūromina mo sopo lo ūrilangi hinia.

¹⁰ Matan, vara tea ūromina mo sopo lo ūrilangi mo hiteho ko lo hanhani na lolo temple nona tamasi matea, ale ko sopo levosahia vara nomim materi sei i pa vai tamlohi atu mo sopo lo ūrilangi vara i hani hanhani atu la silea isana tamasi moiso i pa jovi?¹¹ Ale matan nom lelevosahi sei, voraim kalesia sei ūromina mo sopo lo ūrilangi, i pa jovi nařihi na nona rasua, vorai sei Kristo mo mate matana.¹² Ale matana, ko lo vai na hehe isan Kristo vara ko lo ūruleřule te vorai kalesia tinapua hin

te hinau la rasua vara mo sopo tataholo. ¹³ Matan haratu vara te hanhani na lo hania mo vai te voraiku kalesia mo jovi, a pa sopo eři mele hani mit atu vara i vai voraiku kalesia atu i jovi matana.

9

Mauri Nona Vaharule Tataholo Matea

¹ Enau mo sopo tamlohi materi matea? Teni enau mo sopo vaharule matea? Enau mo sopo haratu sei mo hite Iesu nořa Moli na matak? Kamim mo sopo noku vua vavahinau hin Moli? ² Vara isana tinapua enau mo sopo vaharule matea, pani isamim, enau vaharule matea, matan kamim ka mai kalesia mata noku vua vavahinau, ale mo vujangia vara enau tamlohi vaharule non Moli.

³ Hinau sei enia noku ūrami isan la haratu la lo aleau mata noku vavahinau. ⁴ Ka ūromi vara mo sopo tataholo vara ha vahani kamam? ⁵ Ka ūromi vara mo sopo tataholo vara kama lavi na naroumam sei la kalesia la usuri kamam, sohen la vaharule tinapua sei la lo vaia, ale sohen tasin Moli peresi Peter la lo vaia? ⁶ Teni, enia matan enau Barnabas purongo vara mo sopo tataholo vara kama isoiso na nomam voko mata mania? ⁷ Sava tamlohi vuro mo lo hasena volia? Sava tamlohi isa mo lavo na isa matea, ale mo sopo hani te vuana? Teni hare mo lo korohi te nani pani mo sopo inu te wai susuna?

⁸ Ka ūromi vara na lo vere la hinau nike usuri na noku ūromi ūromi purongo? Ka ūromi vara leu mo sopo verea sohena? ⁹ Matan la ulia na Leu non Moses moiso, vara 'O sopo pesihoro na jingo buluk vara mo lo varasi nařihi na piri wit'.

Deut 25.4

Ka ūromi vara God mo lo ūromi ūromi na buluk purongo? ¹⁰ Ka ūromi vara mo sopo vere reti sei matařa? La ulia matařa, matan haratu mo lo ūrule na lepa mo lo ūrule na nona ūromtau, ale haratu mo lo pete na piri wit mo lo petera na nona ūromtau vara i pa lavi na ūrungana hin la piri wit atu?

¹¹ Vara kamam vaharule kama lo lavo na piri ūruhu mata mauri isamim, ka ūromi vara mo sopo tataholo vara kama lavi te hinau mata i tueni na maurimam nake isamim? ¹² Vara tinapua la opoia vara la lavi na ooloolo isamim, ka ūromi vara kamam mo sopo tataholo vara kama lavia i

jeu na vaharule tinapua? Hina purongo, kama sopo ngurunguru hin kamim vara ha sile na ooloolo isamam, pani kama hitea vara i pa mele ūruhu jea vara kama sopo mele tau te hinau i vai kamim ha tialaha-laha hinia, ale ha ūruhu na Retiūruhu non Křisto matana.

¹³ Kamim ka sopo levosahia vara la přis atu la lo kilau na Temple nona Jew, la lo lavi na hara hinau na hanhani mata sile-silea nona tamlohi? Ale ka sopo levosahia vara přis sei la lo volitusi na votavota mata malamalai atu la lo asease na silesilea mata malamalai? ¹⁴ Hin malele akerihi natu, Moli mo retileu hinia vara la haratu la lo vereuli na Retiūruhu non Křisto la pa lavi na hara hinau mata nora vavahinau na Retiūruhu.

¹⁵ Mo tataholo vara a usi kamim vara ha tueniu, pani na sopo usia. Na sopo uliuli isamim nake vara a usia isamim. Mo vono. I pa mele ūruhu isaku vara a mate i jeua vara a usi kamim mata nomim tuetueni!

¹⁶ Vara a lo retivujavujangi na Retiūruhu, mo sopo sile te masapa isaku vara a pa mangisi matana. Matan God mo taua na limaku vara a pa vaia. Rani sati i pa mai isaku vara a sopo retivujavujangi na Retiūruhu.

¹⁷ Vara na lo vaia usuri na masaloku a pa lavi na noku otori matana, pani God mo viřoniu, ale mo sileau hin voko tapu nika, ale enau, a sopo eři vai te hinau tinapua. ¹⁸ Sava natu enia noku otori? Enia masapa vara a retivujavujangi purongoi na Retiūruhu, ale na sopo usi na sava sei mo tataholo mata tamlohi retivujavujangi na Retiūruhu matea i eři lavia.

¹⁹ Matan hina purongo vara enau tamlohi materi, na sopo toho na ruhuruhan tea, pani na hase vaiau vara a volitusi isana tamlohi tari vara a pa eři lavi te vaora isara la mai isan Křisto.

²⁰ Isana Jew, na mai sohena Jew matea matan vara a lavi na Jew la mai isan Křisto. Isan la haratu la lo toho na ruhuruhan leu, na mai isara sohena tamlohi matea sei mo lo toho na ruhuruhan leu, pani na sopo toho na ruhuruhan leu matan vara a lavi la haratu la lo toho na ruhuruhan leu la mai isana. ²¹ Isan la haratu la sopo toho na ruhuruhan te leu, na mai sohena tamlohi matea mo sopo toho na ruhuruhan te leu, mo sopo vara na sopo toho na ruhuruhan

leu non God, pani na lo toho na ruhuruahu leu non Křisto, matan vara a eři lavi la haratu la sopo toho na ruhuruuhun te leu la mai isan Křisto.

²² Isan la haratu la sopo lo řomřilangi na retivarařuhu, na mai sohera, matan vara a lavi la haratu la sopo lo řomřilangi la mai. Isana tamlohi tari tinatinapua na mai sohera na malelera tari matan vara a eři juri tea. ²³ Na lo vai la hinau tari sei mata Retiřuhu purongo, matan vara hinira enau peresira a pa eři lavi na hina řuhuřuhu sei Retiřuhu mo retitauhi hinira.

²⁴ Korong ka levosahia vara na rani maromaro matea, tamlohi maromaro tari la maro, pani tamlohi matelete purongo i pa mai tiroma. Ale matana, ha maro matan vara ha eři mai tiroma. ²⁵ Tamlohi maromaro hatehateahi tari, la tau na řomira vara la hase taurilatira na hinahinau matuvana. La lo vaia matan vara la eři lavi na řongořongo rau vipahai purongo sei i pa řovo. Pani enřa, řa lo vaia matan vara řa pa lavi na hinau i pa sopo eři řovo. ²⁶ Matan hinau sei, enau na sopo maromaro purongo; na sopo tutuhi sohen tamlohi matea mo lo tutuhi purongoi na masapa. ²⁷ Pani na lo taurilati na epeku, ale na aulu hinia matan vara i vono, hitahu na noku retivujavujangi isana tina-pua, enau haseku purongo na mele tau nařihiau na noku vujangi.

10

Rongorongo Vono Nona Tavtavuin Israel Tuai

¹ La voraiku peresi na vevoraiku, na opoia vara ha levosahia vara tamara la lo toho na ruhuruuhun telangi atu, ale enira mo isoiso la hahau roto na tasi hin masapa atu God mo vaia, ² ale enira mo isoiso la mai tamlohi usuri non Moses ale la paptijo hinia hin telangi atu ale hin tasi atu, ³ enira mo isoiso la hani hanhani atu God mo silea, ⁴ enira mo isoiso la inu hin wai atu God mo silea. Matan la inu hin vatu mauri atu sei mo lo usurira, ale vatu atu enia Křisto. ⁵ Pani God mo sopo avulahi na sope vaora tavera, matan God mo vilimateira, ale mo pla hau na tarapera na jara hasetoho atu.

⁶ La hinau sei la masese sohena tovongi matea isařa, matan vara řa pa sopo opoi na

hina sasati sohera. ⁷ Ha pa sopo lotulotu vono sohena tatuara la lo vaia tuai, sohen la ulia moiso vara, 'Tamlahi la sakele vara la hanhani, la inu, ale hitahu, la turu la velu'.

Exo 32.6 ⁸ Ra pa sopo usuri na posposi maji sohena tatuara sei la lo vaia tuai, rani matelete purongo vao sei la mate, evira mo tikeli tari vaha ngavulu rua mo tolu

(23,000). ⁹ Ra

sopo vahite Moli sohen la tatuara atu la lo vahitea tuai sei ale mata la hati matemateira, ¹⁰ teni řa sopo reti vavarihi sohen la tatuara atu la lo vaia tuai, ale angelo mata mateia mo vilimatemateira. ¹¹ La hinau sei la mai isara tuai sohena tovongi matea isařa, ale la ulira mata retiřoařohai isařa nake, enřa sei řa lo toho na pongi hitahu.

¹² Matan haratu, sava tamlohi mo lo řomřomia vara enia mo lo turu řilangi, ilo kilau mamahunia vara i sopo jovi sohera.

¹³ Mo sopo te vahite hatea vara ko jovi hinia mo tinapua hin la haratu la lo tikeli na tamlohi tari. God mo lo turu řilangi tarea, ale i pa sopo tinařihia vara te hinau hatea i vahite kamim i jeu na vahite sei ha eři horora, pani hin vahite atu God i pa sile te malele mata rovo hinia matan vara ha pa eři jelu hinia.

Leřuhu Non Moli Na Hanhani Tapu

¹⁴ Matan hinau sei, la voraiku řuhuřuhu, ha rovo na lotulotu vono. ¹⁵ Noku reti mo lo vano isana tamlohi la tamlohi tapurongo, ha ari na sava na lo verea isamim. ¹⁶ Paniken mata leřuhu non God sei řa lo vere meje isana matana, enia matan vara enřa mo isoiso řa eři lavi na leřuhu na řaen Křisto hinia. Ale pereti atu řa lo topea, enia matan vara enřa mo isoiso řa eři lavi na leřuhu na epen Křisto hinia.

¹⁷ Matan pereti atu enia pereti matelete purongo, enřa sei řa vao matuvana, řa mai epe matelete, matan enřa mo isoiso řa hani na pereti matelete purongo. ¹⁸ Ha to řomřomi na tavtavuin Israel. Ka hitea vara la haratu sei la lo hani na malamalai, la sopo mai matelete matana?

¹⁹ Ka řomi vara na lo vere na sava? Na sopo verea vara tamasi teni te hanhani sei la silea isara enira hinau purongo.

²⁰ Mo vono! Na lo verea vara malamalai atu tamlohi řořoha la lo silea, la lo silea isana tanume sasati, mo sopo isan God.

Na sopo opoia vara kamim ha matavuhi peresi na tanume sasati. ²¹ Ha sopo eři inu na paniken non Moli, ale ha inu na paniken nona tanume sasati! ²² Mo toma? Mo tataholo vara ūa vaivai Moli i lolokoru? Ka ūomi vara enřa ūa ūilangi ūa jeu Moli?

Materi Nona Kalesia

²³ Tamlohi hai la lo verea lara, “A eři vai na hinau tari na opoia!” Mo ūahu pani hinau tari la pa sopo ūahu hiniho ale hai lara, “A eři vai na hinau tari na opoia!” Mo ūahu pani hinau tari la pa sopo tueniho vara o ulua. ²⁴ I pa sopo tea i ūomromi na sava mo ūahu isana purongo. Ha ūomromi na tinapua, ale sava i pa ūahu isara.

²⁵ Ha hani na mit la ařehira na jara maket, i sopo te retiusia vara la silea isana tamasi moiso teni mo vono matan vara ūomimim i sopo ūomkaka hinia. ²⁶ Matan Retitapu mo verea vara, ‘Varama enia non Moli, ale hinau tari la lo toho hinia enira nona’.

Psa 24.1

²⁷ Ale vara te tamlohi ūrořha mo tovi kamim vara ha hanhani peresia, ale ka avulahi vara ha vano, ha hani na sava hinau la taua na nahomim, i sopo te retiusia hinira vara la tataholo vara ha eři hanira teni mo vono. ²⁸ Pani vara tea mo verea isamim vara, “Hinau sei la silea sohen malamalai moiso!” vara mo sohena, ha sopo hania matan enia mo vere kamim hinia, ale matan vara i sopo komo te ūomina. ²⁹ Pani na sopo vere na ūomimim, pani ūomin tamlohi atu. Matan mata sava natu, noku materi i pa isoiso mata ūomromi non te tinapua? ³⁰ Vara na lavia peresi na vere meje isan God, mata sava natu, tea la eři tuvaiau matan hinau sei na vere meje matana moiso?

³¹ Ale matana, sava ka hania teni ka inua teni ka vaira, ha vaira matan vara hasohaso i pa vano isan God matana. ³² Ha sopo vai te hinau mata vaivai na Jew, teni na tamlohi ūrořha teni isana vao kalesia non God, ³³ sohen enau sei na vahitea vara a vai na tamlohi tari la avulahi na hinau tari sei na lo vaira. Na sopo vaia mata i pa ūahu isaku, pani na lo alea vara a vaia i tueni na tamlohi matuvana matan la pa eři juri.

11

Vujangi Mata Tamlohi Peresi Na Hařai

¹ Ha usuri na noku tovongi sohen enau na lo usuri na tovongi non Křisto.

² Ale nakerihi, na lo hasohaso kamim matan ka lo ūromromiau na hinau tari, matana ka lo tauri mamahuni na mauri kalesia, sohen enau na lo vujangi kamim hinia. ³ Pani na opoia vara ha pa levosahia vara patu hařai lahi matea enia tuana, patu lamane tari enia Křisto, ale patun Křisto enia God. ⁴ Lamane tari sei la ropoi na patura, ale vara la lo usiusi teni la lo retimangovi, enira la lo vai mahanuhanu na patura sei, enia Křisto. ⁵ Pani hařai lahi tari sei, vara la sopo ropoi na patura ale la lo usiusi teni la lo retimangovi, enira la lo vai mahanuhanu na patura sei tuara, mo sohena vara la hiripilopiloia.* ⁶ Vara hařai lahi matea mo ūahu vara i ropoi na patuna, mo ūahu vara i tai na vuluna i vejuveju. Pani matan enia hina mahanuhanu matea vara te hařai lahi i tai na vuluna teni la hiripilopilo na patuna, mo ūahu vara i ropoi na patuna. ⁷ Matan mo sopo tataholo vara lamane matea i ropoi na patuna, matan enia niniun God, enia mo lo vujangi na ūuhuřuhun God, pani hařai enira la vujangi na ūuhuřuhu nona tamlohi. ⁸ Matan God mo sopo vai na lamane na hařai, pani mo vai na hařai na lamane. ⁹ Ale mo sohena purongo, God mo sopo vai na lamane mata hařai, pani hařai mata lamane. ¹⁰ Matan haratu natu, mo ūahu vara hařai la ropoi na patura sohena mata-mata matea mo vujangia vara la lo toho na ruhuruřu suiha tinapua, matan angelo la lo kilau matana.

¹¹ Pani na vao kalesia non Moli, hařai mo sopo matan i toho hasena, teni tamlohi i toho hasena, ¹² matan God mo vai na hařai na lamane, ale nake lamane mo vora isan hařai, ale hinau tari la tai isan God.

¹³ Kamim hasemim ka hitea vara mo tataholo vara hařai matea i usiusi isan God, ale i sopo ropoi na patuna? ¹⁴ Mauri mo sopo vujangi kamim moiso i mera vara lamane matea vuluna mo peravu, enia hina mahanuhanu isana? ¹⁵ Pani vara vulu hařai mo peravu, enia hina

* **11:5:** La lo hiripilopilo na hařai sohena tuai matan la tope na nora retitauhi mata lahi.

ruhuruhan harai atu teni mo vono? Matan God mo sile na vuluna mata ropoi na patuna. ¹⁶ Vara tea ūromina mo sopo opoi hinau sei, pani mo sohen haratu natu isamam peresi na lolo vao kalesia non God.

Posposi Tataholo Mata Hanhani Tapu

¹⁷ Pani sava a pa verea nakerihi, na sopo hasohaso kamim matara, matan ka lo pulutahi jara matea, enia mo sopo matan ha pa vai te hinau i mele ūruhu, pani ka vaia mo mele sati jea sivo. ¹⁸ Matan tiroma hinau na rongoa, enia vara ka lo pulutahi mata lotu ale patumasa mo lo toho isamim. Ale na rongoa vara mo varauhu, ¹⁹ matan ūra levosahia vara patumasa la pa vora isamim, matan vara i memera vara hare nakonako isamim la jea na mauri rasua.

²⁰ Matan ka lo pulutahi jara matea, mo sopo hanhani tapu sei ka lo hania. ²¹ Matan, na nomim hanhani, tamlohi hatehateahi la hasera hani na hara hinau. Matea mo marohati, ale tinapua mo drong! ²² Mo toma? Mo sopo te imamim vara ha eři hanhani teni ha inu hinira? Teni ka lo hitelihilehi na vao kalesia non God, matan ka vai la haratu mo sopo te nora hinau la mahantuhanu? Na sopo levosahia vara a pa vere na sava isamim! Ka ūromi vara a pa hasohaso kamim matana? Mo vono!

Isoiso Hanhani

(Mt 26.26-29; Mk 14.22-25; Lk 22.14-20)

²³ Matan sava na silea isamim na layia isan Moli. Hin vutepongi atu sei Judas mo turuposi hinia, Moli Iesu mo lavi na pereti, ²⁴ ale mo vere meje matana moiso mo topea mo verea mara, “Harihi enia epeku sei na silea matamim. Ha vai harihi ūromromi na sava na vaia matamim.” ²⁵ Mo mele vaia sohena purongo na isoison hanhani atu, enia mo lavi paniken atu, mo verea mara, “Harihi enia retitauhi paro na ūraeku. Vara ha inua, ha vai harihi ūromromi na sava na vaia matamim.” ²⁶ Matan sava rani ka lo hani pereti atu, ale ka inu hin paniken atu, ka lo vujangi na mateia non Moli, ale ha lo vaia sohena i tikeli na rani i mele mai hinia.

²⁷ Sava tamlohi vara mo hani pereti atu teni mo inu hin paniken atu non Moli na malele matea mo sopo tataholo, enia

mo lo vai na hehe matan mo lo kilau purongoi na epen Moli peresi na ūraena. ²⁸ Tamlohi hatehateahi hasera la pa kilau usurira matan te hehe na maurira la pa vahari hinia, moiso la pa eři hani pereti atu, ale la inu hin paniken atu. ²⁹ Matan, vara tea mo hani teni mo inu, pani mo sopo ūromromi na kalesia tinapua, enia mo hase hani teni mo inu na nona talai. ^{† 30} Hinau sei natu, mo vai kamim matuvana mo sopo te suihamim, ale ka rojo, ale hai la mate.

³¹ Pani vara ūra hasera kilau usuri mamahuniřa, God i pa sopo ariřa matana.

³² Pani vara Moli i ariřa, mo vai matan vara i vai tataholořa matan vara ūra pa sopo lavi na talai peresi na tamlohi tinapua na varama na pongi hitahu. ³³ Matana, la voraiku peresi na vevoraiku, vara ha pulutahi mata hanhani tapu, ha saovi kamim hatehateahi. ³⁴ Vara tea mo marohati, i pa hanhani na ima purongo, matan vara ka pulutahi, i sopo mata lavi na talai. Ale mata hinau tinatinapua a pa vere na malelera tataholo isamim vara a mai.

12

Silesilea Non Tanume Tapu

¹ Ale nakerihi, la vorai peresi na vevorai, enau na opoia vara ha mera na hinau sei Tanumen God mo lo silera. ² Ka levosahia vara hin pongi atu ka lo toho na ūrořha, suihan Tiapolo mo lo tikauleji kamim usuri na malele mo tiroman kamim ka vano isana tamasi mengo. ³ Matan haratu, na opoi vara ha levosahia vara mo sopo te tamlohi mo lo reti na suihan Tanumen God, i eři verea hin te rani vara, “Na lesati hin Křisto!” Moiso i sopo tea i eři verea, i vara “Iesu enia Moli!” vara Tanume Tapu mo sopo toho isana.

⁴ Ale, otori tinatinapua matuvana la lo toho, pani pulora matelete purongo, enia Tanume Tapu. ⁵ Ale vavahinau mata tuetueni tinatinapua matuvana, pani Moli matelete purongo; ⁶ ale malele mata vavahinau tinatinapua mo matuvana, pani God matelete purongo sei mo lo voko hinira hatehateahi. ⁷ Tanume Tapu mo vuhesi na suihana isara hatehateahi mata tueni na tinapua.

[†] 11:29: Mt 5.23-26

⁸ Isana tamlohi matea, Tanume Tapu mo silea na retireti mata lelevosahi, ale isana tinapua mo sile na retireti mata levosahi matan te hinau. ⁹ Isana tinapua pa Tanume Tapu atu mo sile na rasua, ale isana tinapua mo sile na otori mata na vai rojoa i tihai, ¹⁰ isana tinapua suiha mata vai na hinau mařurahi, isana tinapua retimangovi, isana tinapua eřia mata eři hitevosahi na sava tanume enia pulo retireti matea, isana tinapua i eři retireti na leo tinatinapua, isana tinapua i eři rongovosahi na leo tinatinapua.

¹¹ Enia pa Tanume Tapu atu sei enia hasena mo lo aseasehi la otori sei. Enia hasena mo hatihia vara sava tamlohi i pa lavi na sava otori.

¹² Matan epe tamlohi matea enia matelete, ale tавтavaluna matuvana, ale tавтavaluna matuvana pani la vai na epe matelete, mo sohen harihi peresi Křisto.

¹³ Matan hin Tanume Tapu matelete purongo, enřa mo isoiso řa paptijo na epe matelete, vara tamlohi řořoha teni Jew, slev teni tamlohi materi, mo vaiřa enřa mo isoiso vara řa inu isana Tanume Tapu matelete purongo.

¹⁴ Matan epe tamlohi, tавалуна mo sopo matelete purongo, pani matuvana. ¹⁵ Vara palona i verea vara, "Enau na sopo tавалу epe matea matan enau na sopo limana!" řomřomi sohena haratu mo sopo vaia vara enia mo sopo tавалу epe matea. ¹⁶ Vara perona i verea vara, "Enau na sopo tавалу epe matea, matan enau na sopo matana!" řomřomi sohen haratu mo sopo vaia vara enia mo sopo tавалу epe matea. ¹⁷ Vara tавалу epe tari enira matana matea i pa rongo te hinau na savana? Vara tавалу epe tari enira perona matea, i pa ngusahi te hinau na savana?

¹⁸ Pani mo sohen haratu natu, God mo tau mamahuni na tавалу epe tari na jarara usuri na masalona. ¹⁹ Vara enira mo isoiso tавалуна matelete purongo, epena i pa toho epu? ²⁰ Pani mo sohen haratu natu, tавтavaluna matuvana, pani epe matelete.

²¹ Matam i sopo eři verea isana limam vara, "Ko sopo řuhu matan te hinau!" teni vara patum i verea isana palom vara, "Ko sopo řuhu matan te hinau."

²² Varařuhu, la tавалу epe atu sei ka lo hitera vara la sopo řilangi teni la sopo řuhu, pani nora vavahinau la aulu jea mata tueni na epe, ²³ ale la tавалу epe atu ka lo řompurongo hinira, enira pa la haratu sei ka lo ru mamahunira matan vara tea i pa sopo eři hitera, ²⁴ pani tатua tавалу epe řa sopo řomřomia vara řa ru-rura sohera. Pani God mo vai na epe na malele matea vara řa sile na oloolo isana tавалу epe sei řa hitera vara la sopo eři lavi te oloolo. ²⁵ Mo vaia matan vara la sopo patumasa na epe, pani vara tавтavalу epe tari atu la kilau mamahuni na tатуара tinatinapua. ²⁶ Vara te tавалу epe hatea mo rongohaji, enira mo isoiso la rongohaji. Vara tавалу epe matea mo lavi na oloolo, enira isoiso la avulahi matana.

²⁷ Ale kamim epen Křisto, ale kamim hatehateahi ka tавтavaluna. ²⁸ Ale God mo vřoni na tamlohi mata vavahinau na lolo vao kalesia sohen harihi:

tiromara enia vaharule,
haruana enia přovet,
hatoluna enia tamlohi vujangi mata reti
non God,
moiso la haratu la lo vai na hinau
mařurahi tavera,
moiso la haratu la lo vai na rojoa la tihai,
moiso tamlohi tueni,
moiso tamlohi tiroma na vavahinau,
moiso mata retireti na leo tinatinapua.

²⁹ Enira mo isoiso la vahařule teni mo vono? Enira mo isoiso la přovet teni mo vono? Enira mo isoiso la tamlohi vujangi teni mo vono? Enira mo isoiso la eři vai na hina mařurahi tavera teni mo vono?

³⁰ Enira mo isoiso la eři vai na rojoa i tihai teni mo vono? Enira mo isoiso la eři retireti na leo tinatinapua teni mo vono? Enira mo isoiso la eři vereuli na řarami leo tinatinapua teni mo vono? Mo vono!

Opoia Mo Aulu Na Hinahinau Tari

³¹ Pani ha tau na řomimim mata otori la mele aulu hinira. Ale enau a pa mele vujangi kamim na malele tinapua matea mo řuhuřuhu jea.

13

Opoia Mo Aulu Jea

¹ Vara a eři reti na leo nona tamlohi tinatinapua, teni na leo nona angelo na tuka, pani vara mo sopo te opoia isaku,

enau na lo vaore purongo sohena belo sei mo lo tangi teni mo lo kolekole roro purongo. ² Vara a lavi na suiha mata retimangovi, ale a levosahi na hina luhu tari peresi na lelevosahi tari, ale vara noku rasua mo ūilangi vara a eři juhati te vutivuti, pani vara mo sopo te opoia isaku, enau hina purongo matea. ³ Vara a lo sile na noku hinau tari isana tinapua, teni vara a sile na epeku vara la sulimateia, pani vara i sopo te opoia isaku, enau na sopo ūahu hin te hinau.

Opoia

⁴ Opoia na mauriřa mo sohen harihi:
Opoia enia ūomperavu, ale enia ūomruhu.
Opoia mo sopo mereimerei,
teni mo sopo retihapahapa.
⁵ Opoia enia mo sopo vai na hina ma-
hanuhanu na naho tamlohi.
Opoia enia mo sopo opoi na masalona
purongo.
Opoia enia mo sopo lolokoru vila.
Opoia enia mo sopo evi na hehe nona tina-
pua isana.
⁶ Opoia enia mo sopo avulahi na posposi
hehe,
pani mo avulahi na retivarařuhu.
⁷ Opoia enia mo tatamahu mata hina
řilangi tari.
Opoia enia mo lo kilau mata hina ūahu
purongo.
Opoia enia ūomřilangi mata hina ūahu la
pa mai.
Opoia enia turu ūilangi tarea.

⁸ Opoia, i pa sopo te isoisona hin te rani
pani retimangovi la pa tihai, leo tinatinapua la pa isoiso, ale lelevosahi la pa tihai.

⁹ Matan enřa ūa levosahi makomona
purongo, ale ūa lo retimangovi makomona
purongo, ¹⁰ pani vara haratu sei mo sopo
vejuveju hin te suiha hatea i pala, ūa pa
sopo mele opoi la hinau sei ūa lo vejuveju
hinira nake, matan la pa tihai.

¹¹ Hin pongi atu na lo natirihi, na re-
tireti sohena natirihi. Na lo ūomřomi so-
hena natirihi, noku kilakilau mo sohena
natirihi. Hin pongi atu na mai tamlohi,
na tau nařihi na posposi nona natuvar-
ihi. ¹² Matan nake nořa kilakilau mo pa
lo vusovusoha, pani na pongi hitahu nořa

kilakilau i pa mera i ūahu. Nake na lo lev-
osahi na makomona purongo, pani hitahu
a pa levosahi vevuhia tataholo sohena God
mo pete levosahi vevuhiau moiso.

¹³ La hinau akerihi mo tolu natu, la pa lo
toho jejeu:
rasua, ūomtaho, peresi na opoia,
pani hinau aulu hinira, enia opoia.

14

Otori Sei Tanume Tapu Mo Lo Silera

¹ Ha tau na opoia hina tiroma na mau-
rimim, ale ha tau na ūomim i ūilangi
mata lavi la otori ūahuřuhu sei Tanume
Tapu i eři silea isamim, ale hinau atu mo
ūahu jea hinira, enia matan vara ha eři
vere na retimangovi sohena God mo man-
govi kamim hinia. ² Matan haratu mo lo
retireti na leo tinapua matea Tanume Tapu
mo silea, mo sopo retireti isana tamlohi,
pani isan God, matan mo sopo tea i ron-
govosahia, matan enia mo lo vere na hina
luhu hin Tanume Tapu. ³ Pani haratu mo
lo retimangovi sohen God mo mangovia
hinia, enia mo lo tueni na tamlohi vara la
eři ulua hin Moli, ale mo lo retituetuenira,
ale mo lo retinanauhira. ⁴ Haratu mo lo
retireti hin te leo matea Tanume Tapu mo
silea isana, enia mo lo tuenia hasena vara i
ulua, pani haratu mo lo retimangovi sohen
God mo mangovia hinia, enia mo lo tueni
na vao kalesia vara la ulua.

⁵ Ale, a pa avulahi vara kamim mo isoiso
ha eři retireti hin la leo tinatinapua atu sei
Tanume Tapu mo lo silea, pani i pa mele
ūahu jea vara ha eři retimangovi sohena
God mo mangovia kamim hinia. Retiman-
govi enia mo mele aulu jea na retireti na
leo tinapua matea sei Tanume Tapu mo
lo silera, i pa mele ūahu jea vara tea i eři
posi leo atu matan vara vao kalesia la eři
levosahi na ūaramina, ale la pa eři ulua
matana.

⁶ Ale la voraiku peresi na vevoraiku,
vara a mai isamim, ale a retireti isamim
hin te leo tinapua hatea sei Tanume Tapu
mo lo silera, i pa tueni kamim sohena sava?
Pani vara a lavi te reti hin te hinau God
mo vuhesia isaku, teni te hina lelevosahi,
teni te retimangovi matea God mo man-
govia isaku, teni te vujangi matea, ale
haratu io, i pa tueni kamim. ⁷ Mo sohena

pue tangtangi teni te potikevu matea, mo sopo te mauri hinira, enira sohena, vara tea mo sopo soro tataholoi te vete hinira, hare i pa rongovosahi vete atu mo lo soro hinia? ⁸ Ale vara tea mo tiv na trumpet, ale roroana mo sopo tataholo, hare i pa tatamahunia hasena mata vuro? ⁹ Ale mo sohena isamim, vara mememim mo lo retireti na leo matea tea i sopo eři rongovosahia, tea i pa eři levosahi na sava ka lo verea sohena sava? Matan ka lo vaore purongo.

¹⁰ Varařuhu, leo tinatinapua la lo toho na varama, ale mo sopo tea vara mo sopo te ūraramina. ¹¹ Pani vara na sopo levosahi na ūraramin te reti hatea a pa sohena vinano isan haratu mo lo verea, ale haratu mo lo retireti enia i pa sohena vinano isaku. ¹² Ale matan ka lo opoia jea vara ha lavi te otori isan Tanume Tapu, mo ūruhu vara ha usi God matan la haratu sei la eři tueni na vao kalesia tari vara la ulua.

¹³ Matan haratu, haratu mo lo retireti na leo tinapua matea Tanume Tapu mo silea isana, mo tataholo vara i usiusi vara i eři lavi na suiha mata i vereuli na ūraramin la retireti atu. ¹⁴ Matan vara na lo usiusi na leo tinapua matea Tanume Tapu mo silea isaku, mapuku mo lo usiusi usuri na suihan otori atu, pani ūromiku mo sopo rongovosahi na sava na lo verea.

¹⁵ Vara mo sohen haratu a pa vai na sava? A pa usiusi usuri na suihan otori atu na mapuku, ale a pa usiusi usuri na sava mo lo toho na ūromiku sohena; a pa lalavete usuri na suihan otori atu na mapuku, ale a pa lalavete usuri na reti enau na levosahi na ūramira. ¹⁶ Matan vara ko lo hasohaso God usuri na suihan otori atu na mapum, sohena sava natu, te tamlohi mo sopo tahisam i eři vere ‘amen’ vara mo sopo rongovosahi na sava ko lo verea na nom vere meje isan God? ¹⁷ Matan korong, nom vere meje mo tataholo purongo, pani i pa sopo eři tueni pa tamlohi atu vara i ulua.

¹⁸ Na vere meje isan God matan enau na lo retireti hin leo atu Tanume Tapu mo silea isaku mo tavera, mo jeu kamim mo isoiso. ¹⁹ Pani na naho vao kalesia, i pa mele ūruhu jea vara a vere te reti i lima isara vara la eři rongovosahira matan vara i eři tuenira, mo jeuva vara a vere na reti mo tari

vaha sangavulu (*10,000*) na leo tinapua matea la sopo rongovosahia.

²⁰ La voraiku peresi na vevoraiku, ūromi nona natuvarihi i sopo toho isamim. Ha pipi mata vai na hehe, pani ha tamlohi na nomim ūromi. ²¹ La ulia na Leu lara,

Moli mo verea vara:

‘A pa retireti isan noku tamlohi
na leo tinatinapua,
ale na jingo vinano.
Pani isoisona,
la pa sopo tapurongo isaku.’

Isa 28.11-12

²² Ale matan reti atu, retireti na leo tinatinapua, enira matamata matea mo sopo nona tamlohi rasua, pani nona tamlohi la sopo rasu. Ale retimangovi sei God mo mangovira enia matamata matea mo sopo nona tamlohi la sopo rasua, pani nona tamlohi la rasua. ²³ Ale vara tamlohi kalesia tari la lo pulutahi jara matea, ale la lo retireti na leo tinatinapua Tanume Tapu mo silea isara, ale vara te vinano teni te tamlohi la sopo rasu la unu atu, ūra levosahia vara la pa verea vara kamim ka putu. ²⁴ Pani vara kamim mo isoiso ka lo retimangovi, ale vara te vinano teni te tamlohi mo sopo rasu mo unu atu, i pa levosahia vara enia tamlohi hehe matea matan God i pa pisuhi na hehe na maurina, ale i pa rongovosahia na mapuna vara mo pete tia moiso mata talai non God. ²⁵ Hina luhu na mapuna la mavuhesi, ale i pa jovi popovitoho, ale i pa lotu God i pa verea vara, “Varařuhu purongo! God mo lo toho na livuhamim.”

Posposi Tataholo Mata Lotu

²⁶ La voraiku peresi na vevoraiku, i pa sohena sava natu? Vara ha pulutahi jara matea, te hatea i pa lavi te vete, te tinapua i vujangi, te tinapua i vereuli te hinau paro God mo vujangia isana, te tinapua i pa retireti na leo tinapua matea Tanume Tapu mo silea isana, ale te tinapua i pa posposi reti atu matan vara vao kalesia la eři levosahia. Hinau tari ka lo vaira, ha pa vaira matan vara tamlohi la pa ulua matara. ²⁷ Vara tea la eři retireti na leo tinapua matea Tanume Tapu mo silea isana, ha sopo tinařihia vara i jeu i rua teni i tolu la

retireti, ale te hatea i retireti moiso, ale te tinapua i pa pete retireti, ale te hatea i pa vere na ūrami nora retireti. ²⁸ Pani vara mo sopo tea vara i eři posa na nora retireti, la pa sakele malum purongo, ale la retireti isara hasera peresi God.

²⁹ Ha tinařihia vara te přovet i rua teni i tolu la retireti, ale tatuá přovet la pa tapurongo usuri na sava la lo verea. ³⁰ Vara God i vuheſi te hinau isan te tinapua mo lo sakele atu, haratu mo lo reti tiroma i pa sopo reve na nona retireti i peravu, pani i sile na masapa isana vara i eři retireti. ³¹ Matan kamim mo isoiso ha eři sile te reti God mo mangovia isamim, matea i retireti moiso ale matea, matan vara kamim mo isoiso ha eři lavi te lelevosahi atu, ale ha ulua na nomim rasua. ³² Ha levosahia vara la haratu la lo vere na retimangovi God mo silea isara, enira la eři hase taurilatira, la sasaovi mata masapa vara la eři retireti hinia, ³³ matan God enia mo sopo God mata kojokojohi, mo vono, enia God mata tamata, ale posposi tataholo akerihi sei la lo vaia na vao kalesia mata tapuhi tari non God.

³⁴ Hařai la pa toho malum na lolo ima lotu, matan mo tapu isara vara la eři retireti ea, ale la pa tapurongo sohena leu mo verea. ³⁵ Vara la opoia vara la levosahi mamahuni te hinau, la pa usi na tuara hinia na imara, matan mo sopo tataholo vara te hařai i retireti na naho vao kalesia.

³⁶ Ka ūromi vara lelevosahi mata reti non God mo tapulo isamim, ale ka ūromi vara mo isoiso isamim purongo? ³⁷ Vara tea mo lo ūromromia vara enia přovet matea, teni enia mo tapu, enia i pa ūromromi mamahuni na sava na lo ulia isamim vara enira retileu non Moli. ³⁸ Vara tea mo lo kilau purongoi hinau nika, tamlohi atu mo sopo ūruhui matan te hinau.

³⁹ Ale matan hinau tari atu la voraiku peresi na vevoraiku, ha opoia jea vara ha eři vere na retimangovi God mo silea isamim. Ale ha sopo horo na retireti na leo tinapua sei Tanume Tapu mo silera. ⁴⁰ Pani ha vai na hinau tari usuri na posposi tataholo na malelera tataholo.

15

Vujangi Mata Sauteterahi Non Křisto

¹ Ale la voraiku peresi na vevoraiku, na opoia vara ha mele ūromromi pa Retifuhu sei na lo retivujavujangi kamim hinia sei ka lavia moiso, ale mo tikeli nake, ka pa lo turu ūlangi hinia. ² Ale ka lo juri hinia nake, vara ha lo taurilati ūlangi reti atu sei na retivujavujangia isamim, vara i vono, korong nomim rasua enia hina purongo.

³ Matan na pete sile kamim hin vujiangi aulu atu hin la haratu Moli mo lo silera isaku moiso, enia vara Křisto mo matea mata nořa hehe, sohena Retitapu mo verea, ⁴ ale usuri na noku vujangi, enia la tavunia, ale na hatolu rani God mo sauteterahia sohena Retitapu mo verea.

⁵ Ale hin rani atu enia mo pala isan Peter, moiso isan la nona tamlohi usuri atu tupu sangavulu ūromana mo rua. ⁶ Moiso, mo mele pala isana vao vorai kalesia matea na rani matea, evira mo jeu mo ngav sangavulu lima, ⁽⁵⁰⁰⁾ vao tavera hinira la pa lo mauri mo tikeli nake, pani tatuara la mate moiso. ⁷ Ale moiso mo pala isan James, moiso mo pa isana vahařule tari. ⁸ Hitahu mo pala isaku, mo sohena vara na sopo vora na noku rani vora tataholo. ⁹ Matan na nona vao vahařule enau na atano jea, ale mo sopo tataholo vara la toviau vara a vahařule matea, matan na lo levuti na vao kalesia non God.

¹⁰ Pani ūromuhu non God mo vaiau na mai sava tamlohi nake, ale nona ūromuhu isaku mo sopo vano hina purongo. Mo vono, matan enau na voko ūlangi mo jeu na vahařule tari, pani mo sopo enau haseku na lo voko, pani ūromuhu non God sei mo lo toho hiniau. ¹¹ Mo sopo te hinau hinia vara hare natu mo retivujavujangia isamim vara enau teni enira, hina aulu hinia enia matan ka rasu na sava kama retivujavujangia isamim.

Mele Turu Na Mateia

¹² Ale ha to verea isaku, mata sava natu, tatuamim la lo verea vara i pa sopo te sauteterahi na mateia? Na lo usia sohena matan kama lo retivujavujangia vara Křisto mo turu na mateia. ¹³ Matan, vara i sopo te sauteterahi na mateia, mo verea vara Křisto mo sopo mele turu na mateia. ¹⁴ Ale vara Křisto mo sopo turu na mateia, nomam retivujavujangi enira la vano hina

purongo, ale nomim rasua mo vano hina purongo. ¹⁵ Ale vara sohena, kamam nona vahařule kama lo retihalu hin God matan kama lo verea vara God mo sauteterahi Křisto na mateia, pani vara reti atu mo vararuhi, mo verea vara God i pa sopo sauteterahi na tamlohi. ¹⁶ Matan, vara la haratu la mate la sopo mele turu na mateia, Křisto sohena mo sopo turu na mateia. ¹⁷ Ale vara Křisto mo sopo mele turu na mateia, nomim rasua enia hina purongo, ale kamim ka pa lo toho na nomim hehe. ¹⁸ Ale la haratu la mate hin Křisto la tihai jejeu. ¹⁹ Vara nořa řomtoho hin Křisto enia matan mauri nike nake purongo, tamlohi tinapua la pa řomřomia vara enřa řa rongorongo vono.

²⁰ Pani mo vono! Enia hina vararuhi matea vara Křisto mo turu na mateia, enia vua tiroma hin la haratu la mate moiso.

²¹ Matan sohen mateia mo mai na tamlohi matea, ale mele turu na mateia mo mai na tamlohi matea. ²² Matan hin Adam, tamlohi tari la mate, ale tamlohi tari hin Křisto la pa mele mauri. ²³ Pani usuri na malele tatahola mata sauteterahi, Křisto mo tiroma, moiso la haratu nona na nona mele mai.

²⁴ Moiso pongi hitahu i pa pala hin rani atu vara Křisto i komo na suiha meresahi tari sei la aulu teni la lo tauri na suiha peresi na řilangi, moiso i pa sile na nona suiha mata aulu na hinau tari isan God Tama. ²⁵ Matan enia i pa tauri na suiha i tikeli rani atu vara mo tau vevuhi na nona meresahi tari na ruhuruhi palona.

²⁶ Isoiso meresahi vara i pa komoa, enia mateia. ²⁷ Matan Retitapu mo verea vara, ‘God mo tau vevuhi na hinau tari vara la pa toho na ruhuruhi palona’. *Psa 8.6*

Reti atu mo verea vara, ‘hinau tari vara la pa toho na ruhuruhi palona’ mo memera purongo vara God Tama i pa sopo toho na ruhuruhi. ²⁸ Hin rani atu hinau tari la mai na ruhuruhi Natuna, ale Natun God sohena i pa hase taua i toho na ruhuruhi God Tama sei mo tau na hinau tari na ruhuruhi, ale God i pa aulu na hinau tari na jara tari.

²⁹ Vara tamlohi la pa sopo turu na mateia, sava natu mo lo toho na řomin la haratu la lo lavi na paptijo matan la haratu la mate moiso? Vara tamlohi la pa sopo

turu na mateia, mata sava natu tamlohi la lo lavi na paptijo matara?

³⁰ Sava natu mo řuhu na nomam vavahinau nike, matan mo lo tau na mateia na nahomam tarea? ³¹ Matan na lo vere tataholaia isamim la voraiku peresi na vevoraiku, noku hapahapa hin Křisto enia kamim sei, matan rani mo visa moiso, mariyiti a lo mate matamim. ³² Sava hina řuhu i pa malue na noku valum peresi maji jala sei, la tamlohi atu Ephesus, vara i pa sopo te sauteterahi na mateia? Vara mo sopo te sauteterahi, mo řuhu vara řa vaia usuri retireti nike vara,
‘Ra vai na hanhani tavera,
ale řa inu, matan pavuho řa pa mate.’

Isa 22.13

³³ Ha sopo tinařihia vara tea i halu kamim hin haratu la lo verealara, “Posposi nona tamlohi sasati i eři posa na posposi tatahola nona tamlohi řuhu.”

³⁴ Ha rovo na nomim posposi sasaruhu, ale ha isoiso na hehe, matan tatuamim la sopo levosahi te hinau hin God. Na verea matan vara a vai kamim ha mahanuhanu.

Epe Tuai Peresi Na Epe Paro

³⁵ Pani tea i pa usia vara, ‘Tamlohi mate la pa mele turu sohena sava? Ale epera la pa sohena sava?’ ³⁶ Kamim tamlohi rongorongo vono! Sava ka lavoa i pa sopo eři mauri vara i sopo mate tiroma. ³⁷ Ale sava ka lavoa, mo sopo enia natu mo mele tuvu, matan enia piri matea purongo, hina purongo vara piri wit teni te piri vipahai tinapua. ³⁸ Ale God mo silea na epena usuri na masalona, ale mo sile na piri hate-hateahi na epe tinatinapua. ³⁹ Matan epe tari la sopo sohesohera, pani epe tamlohi enira la sohesohera, epe maji palo vati la tinatinapua, epe maji avuavu mo mele tinapua, ale epe maji tasi mo tinapua.

⁴⁰ Epe hinau na tuka la tinapua na epe hinau na varama, pani memera epe na tuka la tinapua, ale memera epe na varama la tinapua. ⁴¹ Memera alo enia hinau matea, memera vitu enia mo tinapua, memera vitusarasara la mele tinapua, matan memera vitusarasara matea matea la tinatinapua.

⁴² Ale mo sohena natu na sauteterahi nona mateia. Sava la tavunia enia i pa řovo, sava mo mele turu enia i sopo eři

řovo. ⁴³ Sava la tavunia enia hina purongo, ale sava mo turu enia mo ūruhu jea. Sava la tavunia enia mo talekoleko, ale sava mo turu enia mo ūlangi. ⁴⁴ Sava la tavunia enia epe mata varama, ale sava mo turu enia epe matan na tuka. Vara epe matea matan varama nike, i pa epe matea matan na tuka.

⁴⁵ Sohen la ulia lara, ‘Tamlohi tiroma atu Adam mo mai tamlohi mo lo mauri’. *Gen 2:7* Harua Adam atu mo pa mai hitahu, enia mo sile na mauri mata Tanumen God. ⁴⁶ Sava mo mai tiroma, mo sopo haratu matan na tuka, pani haratu mata varama, haratu matan na tuka mo pa usuria hitahu. ⁴⁷ Tamlohi tiroma, enia mo tai na varama, mo malue na lepa, pani harua tamlohi enia mo tai na tuka. ⁴⁸ Tamlohi tari na varama la lavi na epe varama sohen Adam, pani epeña matan na tuka i pa sohen open Křisto. ⁴⁹ Nake ū sohen Adam, tamlohi mata varama, ale hitahu ū pa sohen Křisto sei mo tai na tuka.

⁵⁰ La voraiku peresi na vevoraiku, na verea isamim, vara epe peresi na ūrae matan varama nike la pa sopo eři unu hin mauri atu na tuka, teni haratu i pa ūovo i pa sopo eři unu hin mauri atu i sopo eři ūovo.

⁵¹ Ha tapurongo, a pa vere kamim na hina luhu matea. Enřa mo isoiso ū pa sopo mate, pani enřa mo isoiso ū pa posi, ⁵² vahatea purongo na isoiso roroa trumpet non God. Matan roroan trumpet atu i pa roroa, ale la haratu la mate la pa turu la sopo eři mele ūovo. Enřa mo isoiso ū pa posi. ⁵³ Matan epe mata ūovo nike, i pa ru epe atu i sopo eři ūovo, ale epe mata mate nike, i pa ru na epe i sopo eři mate.

⁵⁴ Hin rani atu vara hinau mata ūovo mo ru na hinau i sopo eři ūovo, ale epe mata mate i ru na epe i sopo eři mate, ha pa levosahia vara sava la ulia tuai moiso i pa masese natu vara,

‘Suiha mata mauri mo ūrolomi na mateia.’

Isa 25:8

⁵⁵ ‘Eh mateia! Suiham enia epu?

Eh mateia! Suiham mata sile na rongohaji enia epu?’

Hos 13:14

⁵⁶ Suiha mata sile na rongohaji non mateia enia hehe, ale suiha mata hehe enia leu non God. ⁵⁷ Pani ū vere meje isan God sei mo lo sileřa na suiha matan vara ū jeu

na nořa meresahi tari hin nořa Moli Iesu Křisto.

⁵⁸ Matan hinau sei, la voraiku kalesia ūruhu, ha turu ūlangi, ale ha sopo hisuhisu, tarea ha vai na vavahinau non Moli matan ka levosahia vara hin Moli nomim vavahinau i sopo eři vano hina purongo.

16

Silesilea Mata Kalesia Jerusalem

¹ Ale usuri na hinau na nomim leta mata silesilea mata mania nona tapuhi, sava na verea isana mara Galatia, kamim sohena, ha pa vaia sohera. ² Na tiroma rani na wik hatehateahi, kamim hatehateahi ha pa tauhasehi te mania na volimim, ale ha tau mamahunia, sohen ka hitea mo tataholo isamim, matan vara hin pongi atu vara a mai isamim, ka pete tatamahunia moiso vara a lavia. ³ Ale hin rani atu vara a pala, a pa ūrule la haratu ka viřonira moiso peresi na leta vara i vereulia vara enira la tai epu peresi na nomim silesilea i sivo Jerusalem. ⁴ Vara ka hitea vara mo tataholo vara a sivo peresira, mo lo ūru purongo, la pa usuriau.

Romromi Mata Rorohi Corinth

⁵ A pa rohi kamim vara a hahau roto Macedonia, matan na lo ūromřomia vara a pa hahau roto Macedonia. ⁶ Korong a pa toho isamim makomona, vara i vono, a pa toho isamim na pongi hamariri, matan vara ha eři tueniau na maleleku na sava jara vara a vano ea. ⁷ Matan na sopo opoia vara a hite kamim mata makomo rani purongo. Na lo ūromtoho vara a pa toho peresi kamim i peravu makomona vara Moli mo avulahi. ⁸ Pani a pa toho Ephesus i tikeli na pongin Pentecost, ⁹ matan masapa mata vavahinau matea mo roi isaku vara a eři vai te vavahinau non Moli nike, ale noku meresahi enira matuvana.

¹⁰ Vara Timothy i mai isamim, ha kilau mamahunia, enia mo lo vai na vavahinau non Moli sohek. ¹¹ Ha sopo tinařihia vara tea i hitelehilehia. Ha ūrulea na malelena peresi na nomim leřuhu vara i mai isaku. Na lo kilau vara a pa hitea peresi na tatua vorai kalesia tinapua i sopo tuai.

¹² Ale voraiřa atu Apollos, na lo usia ūlangi isana vara i rohi kamim tolu na

voraīra kalesia tinapua nike. Pani mo sopo opoia vara i mai nake, i pa mai hitahu vara i hite te masapana.

¹³ Ha lo kilau, ha lo turu ūilangi na rasua, ha ūomūilangi, ha ūilaūilangi. ¹⁴ Na hinau tari ka lo vaira, ha vaira na opoia.

¹⁵ Ka levosahi Stephanas peresi na vao imana enira la mai kalesia tiroma nike Greece, ale la sile na maurira matan vara la vavahinai la tueni na kalesia tinapua. Na lo usia ūilangi isamim la voraiku peresi na vevoraiku, ¹⁶ vara ha sile na oloolo isara peresi la haratu sei mapura la lo toho na nora vavahinai sohera. ¹⁷ Na lo ayulahi tavera na mai non tahisamim Stephanas, Fortunatus peresi Achaicas, matan enira la lavi na jaramim nike peresiau. ¹⁸ Matan la vai na ūomiku mo mele ūruhu sohen la lo vaia na maurimim. Ha sile na oloolo isana tamlohi sohen harihi.

Isoiso Retioloolo Non Paul

¹⁹ Vao kalesia nike Asia, la sohai na nora retioloolo isamim. Aquila enia Priscilla peresi na vao kalesia na imara la sohai na retioloolo ūruhu ūruhu isamim hin Moli. ²⁰ La vorai kalesia tari nike, la sohai na nora retioloolo isamim. Ha tapatapai kamim hatehateahi na posposi tataholo nona tapuhi non God.

²¹ Enau Paul na uli la retioloolo nike na limaku. ²² Vara tea mo sopo te opoia non Moli isana, lesati i pa toho isana. Nořa Moli, o mai. ²³ Romūruhu non Moli Iesu i pa toho isamim. ²⁴ Noku opoia i pa toho isamim mo isoiso, hin Křisto Iesu. Amen.

2 Corinthians

Harua Leta

Paul Mo Ulia Isana Mara

Corinth

Leta Nike

Paul mo ūrami na retiusia nona kalesia Corinth, vara Paul i pa pala sohen mo verea isara moiso teni mo vono. Mo sopo opoia vara i rohira matan mo levosahia vara i pa arira mata nora hehe (1.23). Paul mo opoia vara i sile na masapa isara vara i eři hitea vara la pa hahau usuri na mauri rasua sohena sava (2.5–11).

Paul mo verea isara mara posin God mo ūruhu isan la haratu la vejveju, ale mo lo kilau vara la pa tueni na kalesia la tilavono Jerusalem peresi Judea (8.1–9.15).

Paul mo verea mara enia volitusi mata retitauhi paro non God (3.1–17). Mo lo turu ūlangi mata lavi na tamlohi la mai isan God, hina purongo vara mo lo lavi na rani ūlangi matana. (4.1–6.13; 10.1–12.10).

'La hinau tari nike la tai isan God sei mo sara tamata peresi na tamlohi na varama hin Kristo, ale enia natu mo sile kamam na vavahinau mata tau na tamata.

Matan ūra eři verea vara hin Kristo, God mo sari tamata non varama vara i mele tapala peresia. Mo sopo mele evi na hehe nona tamlohi, ale mo sile kamam na retisohai mata sari tamata.' (5.18–19)

Hin Leta Nike

1. Paul mo vere meje isan God (1.1–11)
2. Vavahinau nona vahařule non God (1.12–2.17)
3. Opoia non Kristo mo haloa (3.1–7.16)
4. Otori nona tilavono (8.1–9.15)
5. Vahařule vararuhi (10.1–13.10)
6. Isoiso Retiololo (13.11–13)

Retiololo Non Paul

¹ Enau Paul na uli leta nike peresi voraiřa Timothy, enau vahařule non Kristo Iesu matea usuri na masalon God. Kama lo uliuli mo vano isana vao kalesia non God Corinth peresi na tapuhi sei la lo toho ūlili na jara tavera matan Achaia. ² Romruhi peresi na tamata la mai isamim la tai isan God Tamařa peresi Moli Iesu Kristo.

God Mo Tahe Na Romi Nona Tamlohi

³ Hasohaso tavera i vano isan God sei Taman nořa Moli Iesu Kristo, enia God mo lo ūromopoi na tamlohi, ale God mata tahe la haratu ūromira la jovi. ⁴ Enia mo lo tahe na ūromimam na nomam rani ūlangi tari matan vara kama eři tahe na ūromin tinapua na nora rani ūlangi hin nanauhi sei God mo silea isamam. ⁵ Ale sohena kamam kama lo lavi na rani ūlangi matuvana matan Kristo, ale hin Kristo sohena nomam nanauhi mo mařivi savulevule. ⁶ Pani vara kama lo lavi na mauri ūlangi, ka levosahia vara kama lavira mata i tahe na ūromimim ale mata maurimim la juri; ale vara God mo tahe na ūromimam, enia matan vara kama eři tahe na ūromimim na nomim rani ūlangi. Ale matana, ha eři ūrom peravu ha turu ūlangi na rani ūlangi sei sohen kama lo lavira. ⁷ Kama levosahi mamahunia vara ka lavi na rani ūlangi peresi kamam, God i pa tahe na ūromimim sohen mo lo vaia isamam.

⁸ Matan, la vorai peresi na vevorai, kama opoia vara ha levosahi mamahuni na rani ūlangi sei kama lavira na jara tavera matan Asia. La lo puhoni kamam la jeu na suihamam tari, ale kama ūrom vara kama pa mate. ⁹ Varařuhu, kama ūrom vara talai mata mateia mo jovi isamam moiso hin la rani ūlangi atu, ale matana, kama sopo mele rasu na suihamam pani kama tau na nomam rasua hin God sei mo sauteterahi la haratu la mate. ¹⁰ God mo sau nařihi kamam na liman mateia, ale i pa juri kamam, ale kama tau na nomam ūromtoho isana vara i pa mele juri kamam. ¹¹ Kamim sohena, ha pa tueni kamam na nomim usiusi matamam, ale vuana, tamlohi matuvana la pa vere meje isan God matamam matan enia mo juri kamam na usiusi nona tamlohi matuvana.

Paul Mo Posi Na Romina

¹² Kama lo retihapahapa sohena matan kama eři vere tataholoia vara ūromimam la sopo pisuhi kamam hin te nomam vavahinau mo sati kama lo vaira na naho tamlohi tari teni isamim. Kamam kama lo turu na ūromřuhu non God, mo sopo na lelevosahi nona tamlohi, kama ūromatano kama lo hahau sohena natirihni na naho tamlohi, ale kama lo vaia nike isamim mo jeu na jara tinatinapua. ¹³ Matan kama lo uli na sava mo lo toho na ūromimam hin leta

nike matan vara ha eri levosahi mamahuni, ale na lo ūromtau vara ha pa levosahi mamahuni kamam,¹⁴ hina purongo vara nake ka sopo lo levosahi mamahuni kamam. Hin rani atu vara nořa Moli Iesu i mele pala, kamim ha pa hapahaha matamam sohen nake kamam kama lo hapahaha matamim.

¹⁵ Ale matan na levosahi hinau atu, na lo verea isamim tiroma vara a pa rohi kamim mata a sile na leřuhu vaha rua isamim vara a toho peresi kamim.¹⁶ Hin rani atu na ūromi vara a pa toho peresi kamim na maleleku na lo vano Macedonia, ale vara a lo mele mule ha pa tueniau na maleleku vara a sivo Judea.

¹⁷ Korong ka ūromūromia vara na posa na ūromiku vara a pa rohi kamim matan na sopo mele pala isamim sohen na verea moiso. Korong kara na lo halu sohena tamlohi varama sei lara “io” pani ūrami nora retireti tataholo enia “mo vono”.¹⁸ Sohen God mo lo vararuhu tarea, nomam retisohai isamim mo sopo “io” ale hitahu “mo vono”.¹⁹ Matan Natun God, Iesu Křisto, haratu sei enau, Silas peresi Timothy, kama lo retivujavujangia isamim enia mo sopo “io” ale hitahu “mo vono”, pani hin Iesu enia “io” tarea.²⁰ Matan retitauhi tari non God hin Iesu enira mo isoiso “io”, ale matan haratu natu ūra lo vere “amen” na rani ūra lo hasohaso God hin Křisto.²¹ Pani God natu mo vai kamam kama ūrlangi peresi kamim na rasua hin Křisto, ale enia natu mo viřonířa mata nona vavahinau,²² ale enia mo tapuhířa, ale mo tau na Tanumena na mapuřa mo sohena vara mo tau na sope voliřa tiroma na hinau tari la pa mai hitahu.

²³ Ale na nahon God, na sopo halu, na sopo mele mai isamim Corinth matan na sopo opoia vara a vere komokomo kamim.²⁴ Na sopo opoia vara kama aulu na nomim rasua, pani vara kama tapala peresi kamim na vavahinau matan vara nomim avulahi i pa mařivi na nomim turu ūrlangi na nomim rasua.

2

¹ Ale mo vaia na tau na ūromiku vara a pa sopo rohi kamim ale ha mele rongo i sati matana.² Matan, vara a vai kamim

ha rongo i sati, hare natu i pa vaiau a avulahi pani la haratu sei na lo vaira la rongo mo sati?³ Ale na uli hinau akerihi isamim matan vara a mai, a pa sopo rongo i sati hin la haratu sei mo tataholo vara la vai na noku avulahi i tavera jea. Ka sopo levosahia vara noku avulahi mo lo turu na nomim avulahi?⁴ Na rongo mo sati hajavua hin rani atu na uli leta atu isamim, ūromiku mo jovi tavera ale na tangi matana. Na sopo opoia vara a vai kamim ha ūrom sasati, pani na opoia vara ha levosahia sohena sava na lo opoi kamim.

God Mo Romi Na Tamlohi Hehe

⁵ Vara tamlohi atu mo vaiau na rongo mo sati, mo sopo vaiau haseku vara a rongo i sati, pani na malele tinapua mo vai kamim mo isoiso ka rongo mo sati.⁶ Enia mo lavi na rani ūrlangi tavera mata talai atu sei ka lo silea isana moiso hin rani atu kamim mo isoiso ka pulutahi jara matea mata aria.⁷ Ale nake mo tataholo vara ha ūromia, ale ha mele tahe na ūromina, vara i vono, ūromina i pa sati jea ale i jovi nařihi na nona rasua vevuhi.⁸ Ale nakerihi, i pa ūruhu jea vara ha vujangia vara ka pa lo opoia.

⁹ Hin rani atu na lo uliuli sohena isamim matan vara a pa hitea vara ha pa oloolo hiniau i tikeli epu.¹⁰ Vara ha ūromi tamlohi akerihi hin te hinau, enau sohena a pa ūromia vara te hinau mata ūromia mo lo toho mo tikeli nake, ale na vaia na suihan Křisto matamim,¹¹ matan vara Setan i pa sopo jeuřa, matan enřa ūra levosahi mamahuni na malelen Setan.

Volutusi Mata Retitauhi Paro

¹² Hin rani atu nara na pala Troas vara a retivujavujangi na Retiřuhu hin Křisto, hina purongo vara Moli mo sileau na masapa tavera matea,¹³ ūromiku mo sopo sakele matan na sopo lo hite voraiku Titus ea matan vara i vereau vara kamim ka lo toho sohena sava. Ale matana, na enřa vuho isara Troas ale na malue na vano Macedonia.

Vavahinau Nona Vaharule

¹⁴ Pani ūra vere meje tavera isan God sei hin Křisto, mo lo tiromařa ūra lo jeu na nořa meresahi tarea. Ale na sava jara ūra lo vano hinira, enia mo vairā ūra lo vere

na tinapua hin Moli, ale ūa lo sohai na Retīruhu sohena hasori ponaha ūahu matea. ¹⁵ Matan enā ūa hasori ponaha ūahu non Kriſto isan God isan la haratu sei God mo lo jurira, ale isan la haratu sei la pa tihai — ¹⁶ enā hasori ponaha ranga matea mata i sile na mate isara, pani isan vao atu la rasua enā hasori ponaha ūahu matea mata i sile na mauri. Ale hare natu mo tataholo mata i vai la vavahinau nike? ¹⁷ Matan kamam kama sopo sohen la vao tamlohi vujangi tinapua sei la lo vere na reti non God na nora halu mata lavi na mania. Mo vono, kamam kama lo retivujavujangi na retisohai non God mo sopo te halu hinia na nahon God, ale peresi na suihan Kriſto usuri na posposi tataholo nona vahařule non God.

3

¹ Ka ūomi vara kama lo mele tapulo tahe kamam hasemam teni mo vono? Korong ka lo ūomromia vara kama pa lavi te leta isamim teni i mai isamim vara i verea vara kamam sava tamlohi, sohena tamlohi tinapua la lo lavira matan tamlohi la sopo levosahira? ² Kamim ka nomam leta sei God mo ulia na mapumam, tamlohi tari la levosahia ale la eři evia, ³ mo vujangia vara kamim ka leta matea non Kriſto sei kamam kama lo lavia mo mai isana, tea mo sopo ulia na pepa na limara pani Tanumen God sei mo mauri mo ulia, mo sopo sohena leu mo ulia na tavalu vatu, pani na mapu tamlohi.

⁴ Kama levosahi mamahuni la hinau nike nomam rasua hin God hin Kriſto mo tavera. ⁵ Enia mo sopo vara kama ūomromia vara kama eři vai te hinau kamam hasemam, pani nomam eřieři mo tai isan God, ⁶ sei mo vařa ūa tataholo mata eři vai na vavahinau non retitauhi paro mata mauri sei mo sopo usuri na leu la ulia na pepa, pani na Tanumen, matan leu mo sile na mateia, pani Tanumen mo sile na mauri.

Ruhuřuhu Retitauhi Paro

⁷ Pani, vara vavahinau atu tuai mata leu la ulia na tavalu vatu mo sile na mateia, hina purongo mo pala peresi na mera tavera ale mo vaia tavytavuin Israel atu la sopo eři kilau tataholo na nahon Moses mata meran God mo mera na nahona

pani mera atu mo lo majara, ⁸ ūa levosahi mamahunia vara mera vavahinau non Tanumenia i pa mele ūahu jea! ⁹ Matan, vara mera ūuhuřuhu mo lo toho hin retitauhi tuai atu mata leu sei mo sile na talai, ūa levosahia vara retitauhi paro sei mo lo vai na tamlohi la tataholo na nahon God mo mele ūahu jea. ¹⁰ Varařuhu, sava retitauhi tuai mata leu mo verea vara mo mera mo ūahu tiroma, nake mo sopo mele mera i ūahu matan retitauhi paro mo pete lavi na jarana moiso, ale mo mera mo ūuhuřuhu jea. ¹¹ Matan, vara sava mo lo majara tiroma mo mai peresi na mera ūuhuřuhu, meran retitauhi paro i pa toho jejeu i pa mele ūuhuřuhu jea.

¹² Ale matan retitauhi paro nike mo vai na ūomřa mo ūilangi, mo sopo te matahu na nomam vavahinau, ¹³ ale mo sopo sohen Moses sei tuai mo lo ropoi na nahona na tavalu ruru matea matan vara tavytavuin Israel la sopo eři varoi mera atu mo lo majara na nahona. *Exo 34.30-35*

¹⁴ Pani ūomira mo pelati, ale mo kakau nake, tavalu ruru atu mo pa lo toho vara la rongo tea mo evi retitauhi tuai atu. Tea i sopo eři lavi nařihia hasena matan hin Kriſto hasena tavalu ruru atu i eři malue. ¹⁵ Pani ūomira mo pa lo pelati mo kakau nake vara la tapurongo na sava Moses mo ulia tuai, tavalu ruru atu mo pa lo ropoi na ūomira.

¹⁶ Pani vara tea mo posi mo mai isan Moli, Moli mo lanařihi tavalu ruru atu. ¹⁷ Ale Moli enia Tanumen God, ale na sava jara Tanumen Moli mo lo toho hinia, tamlohi la pa materi. ¹⁸ Ale enā mo isoiso nahořa mo lo toho na jara tavera, ale la mera na meran Moli, ale mo lo posířa ūa mai sohena na merana makomakomona na suihan Moli sei enia Tanumen God.

4

Hina Ruhuřuhu Na Lolořa

¹ Matan haratu, matan kama lavi vavahinau nike usuri na ūomopoiia non God, ūomimam la sopo eři jovi. ² Pani kama ūohu na hina luhu mata mahanuhanu, ale kama sopo vahitea vara kama halu tea teni kama sopo posileji na reti non God. Pani kama lo retivujavujangi na retivarařuhu na jara tavera matan vara

tamlohi la pa hitevosahia vara kama lo vararuhu na nahon God. ³ Pani hina purongo vara God mo tavuhoro na nořa Retiřuhu, mo tavuhoro purongo isan la haratu sei la pa tihai sei, ⁴ Setan, god matan varama nike, mo vusohi na řomin la haratu sei la sopo rasu, ale la pa sopo eři hitevosahi na meran Retiřuhu sei non Křisto – enia niniun God tataholo.

⁵ Kama sopo retivujavujangi hin kamam hasemam, pani hin Iesu Křisto sei enia Moli, ale kama verea vara kamam nomim slev mata sava Iesu mo vaia matamam. ⁶ Matan God sei mo verea mara, ‘Malarani i mera na řořoha.’ *Gen 1.3* enia haratu sei mo lo mera na mapuřa matan vara i sileřa na mera mata lelevosahi řuhuřuhu non God řa hitea na maurin Iesu Křisto.

Hasohaso Tavera Mo Lo Mai

⁷ Pani kama lo lavi la hina řuhuřuhu nike na jilivi lepa purongo, matan vara suiha tavera sei tamlohi la eři hitea mo lo malue hin kamam mo sopo nomam pani non God hasena.

⁸ Kama lo lavi na rani řilangi na malele tari, pani la sopo lomolomo kamam. Kama sopo levosahia vara kama pa vai na sava, pani kama sopo hilu atu, ⁹ la tipahi kamam, pani God mo sopo rovo hin kamam, la vili sati kamam, pani kama mele turu. ¹⁰ Kama lo lavi na rani řilangi tarea na epemam hin mauri nike, ale la lo lavi na řungara mata mateia non Iesu matan vara tamlohi la pa eři hite na maurin Iesu na epemam.

¹¹ Varařuhu kama lo toho tarea na matarua mateia matan kama lo volitusi isan Iesu matan vara maurin Iesu i pa mera na jara tavera na epemam sei mata mate. ¹² Matana, kama lo nahoi na mateia, pani vuana enia nomim mauri tui tui.

¹³ Pani kama pa lo retivujavujangi matan nomam rasua mo tataholo na sava la ulia na psalm mara,
‘Na rasua, ale matana, na pa retireti.’

Psa 116.10

Ale kamam sohena, kama rasua, ale matana, kama pa retireti.

¹⁴ Kama pa vaia sohena matan kama levosahia vara God sei mo sauteterahi Iesu, i pa lavi kamam peresi kamim řa turu na nahona. ¹⁵ Hinau řilangi kama lo lavira na maurimam nake enira mata la tueni

kamim. Ale sohen řomřuhu non God mo lo lavi na tamlohi matuvana la lo mai isan Křisto, tamlohi la pa mele hasohaso God i tavera jea.

¹⁶ Enia matan haratu natu mo vaia kama sopo hilu taleu. Hina purongo vara suiha epemam mo lo majara, pani maurimam la lo ulua na rani hatehateahi. ¹⁷ Hina purongo vara řa hite na nořa rani řilangi matan nake sohena hina tavera, pani enira la varihi purongo matan enira mata makomo rani purongo. Ra levosahia vara nořa rani řilangi nake la pa sileřa na hasohaso tavera sei i pa toho jejeu hin mauri atu mo lo mai. ¹⁸ Ale řa sopo řomřomi na nořa rani řilangi matan nake, mo vono, pani řa lo kilau toho mata hinau řa sopo eři hitera. Matan sava sei řa eři hitera, enira la pa toho mata makomo rani purongo, pani sava řa sopo eři hitera la pa toho jejeu.

5

Epe Paro Matan Tui Tui

¹ Matan řa levosahia vara epeřa nike na varama řa lo toho hinia mo řovo – vara řa mate řa pa malue hinia – řa levosahia vara jarařa matea mo lo toho na tuka na epe matea matan tui tui sei tamlohi la sopo voroa na limara, pani God hasena mo vaia matařa. ² Ra lo malokoloko hin epeřa nike nake, ale řa lo kilau toho matan rani atu sei God i pa ru na epe matan tuka hiniřa sohena ruru paro. ³ Matan řa pa sopo toho sohena tanume mo sopo te epera, pani řa pa ru na epe paro matan tuka. ⁴ Epeřa nike nake la lo mate, la vaiřa řa rongohaji ale la puhoniřa, pani mo sopo matan vara řa opoia vara řa mate ale řa sopo lavi te epe hatea. Ra opoia vara řa unu na epeřa paro matan vara mauri tui atu i řolomi epeřa tuai nike. ⁵ God hasena mo tatamahuniřa matan la hinau akerihi, ale mo sileřa na Tanumena sohena sope voliřa tiroma na hinau tari i pa silera hitahu.

⁶ Ale matana, tarea řa lo řomřilangi, hina purongo vara řa levosahia vara řa lo toho nike na varama na epeřa nakerihi, řa sopo lo toho peresi Moli, ⁷ matan nake, řa lo mauri na rasua, mo sopo na sava řa lo hitera. ⁸ Vararuhu řa řomřilangi, ale řa levosahia vara i pa mele řuhu vara řa eři

malue hin la epe nike matan vara ūa pa toho na jaraña na tuka peresi Moli. ⁹ Hina purongo vara ūa lo mauri hin epe nike teni vara ūa mate ūa malue hinia, ūa lo tau na ūomiřa hinia mata i lo vai Moli i avulahi tarea. ¹⁰ Matana enřa tari ūa pa turu na nahon Křisto na nonajara sakele mata aria vara i ariřa. Ra pa lavi na sava mo tataholo isana usuri na sava ūa vaia mo ūruhu teni mo sati hin epeřa nike na varama.

Vahařule Non Retitauhi Paro

¹¹ Matan kama levosahi matahu tavera akerihi mata aria non Křisto, enia mo vai kamam kama voko ūilangi vara kama reve na tinapua isana. God mo levosahia vara kama lo vararuhu, ale na lo ūomotoho vara kamim sohena ka levosahia. ¹² Kamam kama sopo mele vahitea vara kama hase tahe kamam, mo vono. Kama lo vere kamim hin la hinau nike matan vara ha eři hapahapa hin kamam, ale matan vara ha eři ūarami la tamlohi vujangi haluhalu atu sei la lo reti mangisi na nora vavahinau purongo, pani la sopo verea vararuhu vara enira la sava tamlohi. ¹³ Matan vara tea la hitea vara kama rongorongo vono, enia matan vara kama pa sile na hasohaso isan God hinira. Ale vara kama lo vai na hinau tataholo, enia matan vara i tueni kamim. ¹⁴ Matan opoia non Křisto mo lo halo kamam, matan kama levosahi mamahunia vara Křisto mo mate mata tamlohi tari: ale matan hinia tamlohi tari la mate. ¹⁵ Ale enia mo mate mata tamlohi tari matan vara la haratu la lo mauri la pa sopo mauri nora hasera, pani la pa mauri non haratu sei mo mate matara, ale God mo sauteterahia na mateia.

¹⁶ Matan haratu nake, kama sopo mele kilau na tamlohi usuri na ūom tamlohi. Tuai na lo ūomřomia sohena hin Křisto vara enia tamlohi matea purongo. Pani nake noku kilakilau mo sopo mele sohena. ¹⁷ Mo ūaramia vara la haratu la mai kalesia hin Křisto la mai tamlohi paro. La sopo mele sohen tuai, matan mauri tuai mo tihai, ale mauri paro mo tapulo moiso.

¹⁸ La hinau tari nike la tai isan God sei mo sari tamata peresi na tamlohi na varama hin Křisto, ale enia natu mo sile kamam na vavahinau mata tau na tamata. ¹⁹ Matan ūa eři verea vara hin Křisto, God mo sari tamata non varama vara i mele tapala

peresia. Mo sopo mele evi na hehe nona tamlohi, ale mo sile kamam na retisohai mata sari tamata. ²⁰ Matan haratu, kamam kama vahařule non Křisto, ale hin kamam, God mo lo usi kamim ūilangi sohen Křisto hasena mo lo usia vara ha sari tamata peresi God! ²¹ Matan God mo vai Křisto sei mo sopo hehe hin te rani, mo mai nora malamalai mata hehe, matan vara hinia, ūa pa eři mai ūa tataholo na nahon God.

6

¹ Ale matan enřa ūa tapala na vavahinau non Moli, kama lo usi kamim mo ūilangi vara ha sopo ūomřomia purongo na retisohai ūruhuřuhu mata ūomřuhu non God. ² Matan God mo verea mara,

'Na ranina tataholo na rongoho,

Na rani mata juri na tueniho.' *Isa 49:8*
Vararuhu, God mo lo tatamuha mata i tueni kamim nakerihi. Nakerihi enia rani mata juri.

Rani Rilangi Non Paul

³ Kama sopo sile na masapa vara tea i pa ūohu hin Moli na sava kama lo vaia, matan vara tea i sopo eři hite te hina sati na nomam vavahinau. ⁴ Matan hinau tari kamam vahařule kama lo vaira, kama vahitea vara tamlohi la hitea vara vararuhu kamam vahařule vararuhu non God. Kama lo ūomperavu tarea na rongohaji peresi na rani ūilangi peresi na rani sasati tinatinapua, ⁵ ale na rani tamlohi la tamaji kamam, teni vara la pulahi kamam na lolo ima ūilangi, teni vara vao tamlohi la meresahi hin kamam, teni vara kama voko mate, ale kama kilau rani vaha visa, ale kama marohati. ⁶ Kama lo hahau na posposi vokevoke, kama lo vujangi na nomam lelevosahi hin Křisto, ale na nomam ūomperavu, na nomam ūomřuhu, na nomam opoia vararuhu, ale na suihan Tanume Tapu. ⁷ Kama lo turu ūilangi na retivujavujangi mata retivarařuhu. Suihan God mo lo voko hin kamam. Nomam posposi tataholo mo sohena sita vuro matea mata i taijovjovi na hehe na matua limamam, ale tingting matea mata i turuhoro na meresahi na marau limamam. ⁸ Kama lo volitusi isan God, hina purongo vara tamlohi la sile na oloolo isamam teni vara la ūohu hin kamam, hina purongo

vara la vereſresi kamam teni la haso-haso kamam. Kama lo vararuhu, pani hai la verea lara kama tamlohi halu! ⁹ Tamlohi la levosahi mamahuni kamam, pani la vai kamam sohena la sopo levosahi kamam. Kama lo toho na matarua mateia, pani ka hitea kama pa lo mauri nahai! La hamaji komokomo kamam pani kama sopo mate, ¹⁰ ale ūromimam la sati, pani kama avulahi, kama sohena tilavono, pani kama vai na mauri tamlohi matuvana la mele ūruhu jea, ale sohena mo sopo te nomam hinahinau, pani hinau tari enira nomam.

¹¹ La tapala ūruhu matan Corinth, kama lo retireti tataholo peresi kamim, kama avulahi tarea mata kama tueni kamim. ¹² Mo sopo te hinau i turuhoro na nomam opoia isamim, pani matan kamim purongo ka horo na nomim opoia isamam. ¹³ Ale ka levosahia vara na lo retireti isamim na opoia sohena natuku tataholo, ale kamim sohena, ha avulahi vara ūa mele tapala.

Temple Non God Mo Mauri

¹⁴ Ha sopo turu jara matea na vavahinau non la haratu la sopo usuri na mauri rasa, matan i pa sohena sava vara tea i vai na posposi tataholo i eři tapala peresi la haratu la lo tope na leu? Teni sohena sava natu malarani i eři tapala peresi na ūrořoha? ¹⁵ Kristo enia Tiapolo la eři turu jara matea hin te hinau teni mo vono? Ka levosahia vara la haratu la rasu God la lo lotua, pani la haratu la sopo rasua la lo lotulotu vono. ¹⁶ Ale sohena sava natu hinau mata lotulotu vono i eři turu jara matea na lolo Temple non God? Matan enřa ūa temple non God sei mo lo mauri, mo sohen God mo retitauhi hinira moiso mara,

‘A pa toho hinira

ale a pa lo hahau na livuhara.
Enau a pa nora God,
ale enira la pa noku tamlohi.’

Lev 26.12; Ezek 37.27

¹⁷ Matana, ha malue hinira
ale ha turu hasemim hinira,
Moli mo verea.
Ha sopo tikeli na nora hina lumiha,
ale a pa avulahi hin kamim.’

Isa 52.11; Ezek 20.34

¹⁸ ‘A pa Tamamim,

ale kamim ha pa natuku,
peresi na venatuku,
Moli God Suiha mo verea.’ *2 Sam 7.14*

7

¹ La tapala ūruhu matan ūa lavi la retitauhi nike, ūa tau nařihi na posposi tari sei la eři vai na epeřa peresi na mauriřa la lumiha, matan vara ūa eři lavi mauri atu mo tapu matan ūa lo lotu God na nořa matahu.

Paul Mo Avulahi

² Ha avulahi vara ūa mele tapala! Kama sopo vai te hinau i sati isan tea, kama sopo tikauleji tea, kama sopo haluhalu tea.

³ Na sopo vere harihi matan vara i vai na ūromimim i sati, matan na pete verea isamim moiso vara kamim ka lo toho na mapumam, ale vara ūa mate jara matea, ūa pa mauri jara matea. ⁴ Enau na rasu kamim, ale noku hapahaha matamim mo tavera jea. Ka tahe na ūromiku, ale ka vaiau na avulahi hina purongo na nomam rani ūilangi nake.

⁵ Na rani kama kakau Macedonia, kama sopo mapu matan ūalihi hin kamam rani ūilangi la lo mai na jara tari, ale na lolomam, matahu mo lo malue matana. ⁶ Pani God atu sei mo lo tahe na ūromin la haratu ūromira la jovi mo tahe na ūromimam na rani Titus mo pala. ⁷ Kama sopo avulahi purongo na nona pala pani na retisohai ūruhu sej ka silea isana. Noku avulahi mo tavera na nona pala matan mo vereau hinia sohena sava ka lo kilau toho matan rani atu vara a pa mele rohi kamim hinia, ale sohena sava ūromimim mo sati, ale sohena sava ūromimim mo sati matan hehe atu, ale vara nomim opoia hiniau mo sohena sava.

⁸ Romiku mo sopo mele sati matan leta atu na sohaia, hina purongo vara ūromiku mo sati mata makomo rani, matan na levosahia vara ka rongo mo sati matana mata makomo rani. ⁹ Nake na lo avulahi matan na sohaia, mo sopo matan mo vai kamim ka rongo mo sati, pani matan nomim ūromi sati mo vai kamim ka posj na nomim hehe. Romi sati atu natu God mo lo opoi na nona tamlohi vara la lavia, ale na isoisona, kama sopo komo kamim hin te hinau matana. ¹⁰ Matan God i eři vai na ūromi sati mata hehe na mauriřa i tueniřa, mata i vairā ūa

posi na nořa hehe, ale vuana enia ūa pa juri. Ale mauriřa i sopo eři sati na ūomi sati sohen harihi. Pani ūomi sati sei mo sopo te posí matana mata hehe, enia pa haratu sei vuana enia mateia.

¹¹ Ka hite na sava ūomi sati ūuhu ūuhu niķe mo vaia na maurimim? Mo vujangia vara ka tatamahu varařuhu mata oloolo sohena sava, ale mata vai na hijamim la vokevoke, ale vara lolokoru matan hehe akerihi sei mo vai na matamim mo lo roi matana, ale sohena ka lo kilau toho mata ha mele hiteau, ale sohena ka ūomjea vara ha sile na talai isan tamlohi atu mo lo hehe.

1Co 5.1-2

Ka lo vujangia vara ka vahitea vara ha vai na hinau tari ka eři vaira mata vai na hinau la tatahola. ¹² Ale matana, hina purongo vara na uliuli isamim, pani mo sopo matan haratu mo lo vai na hehe, teni isan haratu sei hehe atu mo vai na ūomina mo sati, pani matan vara a vujangi kamim sohena sava ka lo tatamahu mata usuri na nomam reti na nahon God. ¹³ Ale kama avulahi tavera matana, mo sopo matan haratu purongo, pani matan kama avulahi tavera matan kama hite na avulahi non Titus mata nomim posposi ūhu sei ka lavia hinia, ale sohena sava ka vai na ūomina mo sakele matan hinau akerihi. ¹⁴ Enau na verea isana sohena sava na hapahapa hin kamim, ale kamim ka sopo vai na ūomiku i jovi. Tarea na lo reti varařuhu isamim, ale nakerihi na levosahia vara noku reti hapahapa isan Titus matamim mo varařuhu.

¹⁵ Ale nake mo lo opoi kamim mo tavera jea vara mo lo ūomřomi na nomim oloolo, ale sohena sava ka lavia na oloolo tavera. ¹⁶ Nake na avulahi tavera matan noku rasua mo ūilangi hin kamim.

8

Ra Pa Hansohai Tarea

¹ Ale nakerihi na opoia vara a verea isamim la vorai peresi na vevorai, na sava God na nona ūomřuhu mo vaia na nona vao kalesia tari Macedonia. ² Hina purongo vara nora rani ūilangi peresi na rani sasati mo matuvana, nora avulahi ūuhuřuhu peresi na mauri tilavono mo vaira la avulahi jea mata tueni na tinapua na nora hansohai. ³ Matan a eři verea vara la sopo sile purongoi na sava la eři silea pani mo jeu haratu, matan la silea

na nora ūomavulahi purongo. ⁴ La usia vaha visa moiso vara la eři ūotahai peresi na tinapua mata la sile te tuetueni mata i tueni na kalesia tilavono Jerusalem ale na jara tavera matan Judea. ⁵ Ale aulu hin haratu, la vai na hinau mo jeu na nomam ūomtau, matan la hase silera isan Moli tiroma, moiso la tatamahu mata vai na sava kama verea usuri na masalon God.

⁶ Ale kamim vao kalesia sei Corinth, ka levosahia vara kama mele usi Titus sei mo lo verea isamim tiroma moiso vara i pa mele vano isamim, ale i usi kamim vara ha vai mařivisi na nomim silesilea. ⁷ Ale matan usuri na posimim ka lo vaia mo ūuhuřuhu jea na hinau tari – nomim rasua mo tavera jea, nomim tamlohi hai la eři retireti mo ūhu, ka lelevosah, ūomimim mo ūilangi mata ha vai na hinau, ale nomim opoia hin kamam mo tavera jea – pani nake na opoia vara ha mařivisi na nomim vavahinau mata sile na silesilea sohen ka lo vaia na hinau tinatinapua mo ūhu. ⁸ Na sopo verea vara ha pa sile na silesilea niķe sohena retileu matea, pani na lo vahite na nomim opoia. Matan na opoia vara a hitea vara i pa sohena opoia nona vao kalesia tinapua Macedonia teni mo vono.

⁹ Matan kamim ka levosahia na ūomřuhu non nořa Moli Iesu Kristo, vara hina purongo vara enia mo tavytav sohen God mo tavytav, enia mo mai tamlohi tilavono matamim, matan vara na nona tilavono kamim ha pa tavytav na mauri.

¹⁰ Ale mo ūhu vara ha vai vevuhi na silesilea sei ka tapulona na tauni sei mo vano moiso, matan kamim natu ka verea ūomřomi sei, ale kamim natu ka tapulona mata ha vaia. ¹¹ Mo tatahola mata ha vai vevuhia sohen ka ūomjea hinia na tapulona. Ha sile na sava ha eři silea. ¹² Vara ka avulahi jea mata ha sile na silesilea, mo sopo te hinau hinia vara ha eři sile i visa. God mo opoia vara ha sile na sava ha eři silea, mo sopo usi na hinau mo sopo te nomim. ¹³ Na sopo verea vara ha pa silea hajavua matan vara i vai kamim ha vejuveju. Na lo verea matan na sopo opoia vara tea i eři verea vara kama lo tametame te tatuva vao kalesia purongo. ¹⁴ Nake nomim tavytav mo mařivi, ale ha eři tuenira Judea na nora vejuveju. Ale hin te rani vara ka vejuveju, enira sohena la pa eři tueni

kamim. Hin malele akerihi natu vao kalesia tari la pa sopo eři vejuveju hin te hinau hinia. ¹⁵ Mo sohen la ulia tuai na Retitapu vara, ‘Haratu mo takonahi na mana mo mařivi, nona mo sopo mařivi hajavua, ale haratu mo takonahi makomona, nona mo sopo makomona hajavua’. *Exo 16:18*

Titus Tolu Na Tapalana

¹⁶ Pani na lo vere meje isan God sei mo tau na ūromūomi matea hin Titus sohen mo taua hiniau mata kama kilau kamim. ¹⁷ Kama usia vara i mele rohi kamim, ale mo avulahi matana, aulu hin haratu, enia mo lo tatamahu moiso vara i mele vano i hite kamim. ¹⁸ Kama pa ūrule na vorai tinapua matea vara i usuri Titus. Vao kalesia tari la majinga vara vorai sei enia tamlohi ūruhu matea mata retivujavu-jangi na Retiřuhu. ¹⁹ Aulu hin haratu vao kalesia nike Macedonia la viřoni vorai sei vara i pa usuri kamam na rani kama sivo Jerusalem mata sile silesilea nike isana kalesia tilavono ea – enia vavahinau matea i pa sile na hasohaso isan Moli, ale mo vujangia vara kama tatamahu mata tuetueni. ²⁰ Kama pa hahau jara matea matan vara i pa sopo sile te masapa vara tea la ūromūomia vara kama lo roro hin silesilea avulahi nike. ²¹ Ale matana, kama lo vahitea tarea vara kama vai na hina tataholo na nahon God peresi na naho tamlohi.

²² Ale kama lo mele ūrule na vorai kalesia tinapua matea peresira Corinth, enia mo jeu na nomam hina vahite moiso, ale mo mera purongo vara mo avulahi na hinau matuvana, pani nake mo mele jeu tiroma matan mo rasu kamim mo tavera jea. ²³ Vara te retiusia matan Titus, ha verea isara vara enia tapalaku mata i vai na vavahinau non Moli matamim. Ale la vorai tinapua sei la lo usuria enira vahite ūruhu nona vao kalesia nike, ale nora tovongi mo vai na tamlohi la hasohaso Kristo matara. ²⁴ Ale matana, ha turu peresira matan vara vao kalesia la pa eři hitevosahi na nomim opoi, ale vara i vujangia vara nomam reti hapahapa matamim mo vararuhu.

9

Silesilea Nona Kalesia Jerusalem

¹ Na levosahia vara mo sopo te hinau hinia vara a sopo uliuli matan silesilea nike nona tapuhi Jerusalem, ² matan na levosahia vara ka lo tatamahu mata ha tuenira moiso. Ale na reti hapahapa moiso isan tapalařa nike Macedonia vara kamim kalesia Corinth ka tatamahu hin tauni sei mo vano moiso vara ha sohai na silesilea matea, ale nomim avulahi mo vai na vao kalesia tinapua ūromira mo ūlangi mata la tapulo na tuetueni. ³ Pani na lo ūrule la vorai kalesia nike vara la hitea vara vararuhu ka tatamahu sohen na verea isara vara ha pa tatamahuni na mania moiso. Na sopo opoi vara la pa hitea vara noku reti hapahapa nike hin kamim i vano hina purongo. ⁴ Matan, vara te mara Macedonia i mai peresiau ale vara i hitea vara ka sopo tatamahu, kama pa mahanuhanu ale kamim sohena, matan kama verea moiso vara kama lo rasu kamim. ⁵ Matan na sopo opoi vara a mahanuhanu, na ūromūomia vara a usila vorai kalesia nike vara la mai isamim tiroma mata la tatamahuni na nomim silesilea tavera sei ka lo retitauhi hinia moiso. Ale mo sopo hinau matea mata ngurunguru matana, pani enia silesilea matea usuri na nomim ūromavulahi.

Ha Hansohai Matan God Mo Hansohai Tiroma

⁶ Ha lo levosahia vara tamlohi isa matea vara mo lavo na piri mo visalete, i pa vua makomona purongo. Pani haratu mo lavo na piri matuvana, i pa lavi na vuana matuvana. ⁷ Kamim hatehateahi ha pa silesile usuri na ūromim hasemim, mo sopo matan ka sopo ūromavulahi teni matan tea mo ngurunguru hin kamim, pani matan God mo opoi haratu sei mo sile na nona silesilea na avulahi. ⁸ Ale God i eři sile kamim na hinau tari ka opoira, matan vara ha sopo eři vejuveju hin te hinau ka opoi, ale matana, ha eři mele tueni na tinapua na sopena. ⁹ Mo sohena Retitapu mo verea vara, ‘Haratu la tataholo na nahon God, la lo hansohai tarea isana tilavono. Ale God i pa sopo ūromaliho

na nora vavahinau ūruhu sei hin te rani.’ *Psa 112:9*

¹⁰ Matan God enia haratu sei mo lo sile na piri wit isana tamlohi isa, moiso mo vai

na pereti mata hanhani hinia. Hin malele akerihi natu God i pa sile na masapa matuvana isamim mata ha vai na vavahinau ūruhu, ale enia i pa vai na nomim hansohai i vua tavera isamim.

¹¹ Enjora, ha pa mařivi savulevule matan vara ha eři hansohai i jeu tiroma. Ale na rani vara kama lavi na nomim silesilea i vano isan la haratu la vejuveju, la pa ulo na vere meje isan God matana.

¹² Hinau mo rua vahatea la pa masese matan silesilea atu, i pa mařivisi na vejuveju nona tapuhi Jerusalem, ale la pa hasohaso God na nora vere meje matana.

¹³ Kamim ha pa tahe na hijan God na nomim silesilea na avulahi. Matan nomim hansohai isara i pa vujangia vara kamim ka lo oolo lo na Retiřuhu non Křisto, ale la kalesia atu la pa hasohaso God matamim.

¹⁴ Ale la pa usiusi matamim na opoia tavera mata ūromřuhu ūruhu ūruhu non God sei mo lo malue hin kamim.

¹⁵ Ha vere meje isan God matan Natuna – matan nona otori ūruhu ūruhu sei mo sopo te reti i eři verea vara mo ūruhu sohena sava.

10

Suiha Nona Vahařule Vararuhu Non God

¹ Enau Paul haseku, na lo usia ūilangi isamim vara ha tapurongo isaku. Na lo vaia usuri na ūommalum peresi na posposi malum non Křisto, enau sei tamlohi hai Corinth la lo verea vara enau na malum vara na lo toho isamim pani vara na malue na lo ūilangi isamim na noku leta! ² Na lo ūomtau vara i pa sopo sohena, pani korong vara na mai a pa ūilangi isan la haratu sei la ūom vara kama lo vavahinau usuri na posposi tamlohi purongo. ³ Hina purongo kamam kama tamlohi varama, pani kama sopo vai na vuro usuri na ūomřomi nona tamlohi, ⁴ matan nomam hinahinau mata vai na vuro mo sopo matan varama nike, pani God mo vai na retivarařuhu mo suiha mata vilijovjovi na ūomřomi ūilangi non Tiapolo sei la lo taurilati na tamlohi. Ale la suiha mata la vilijovjovi na ūomřomi ⁵ peresi na ūomaulu tari sei la lo turuhoro na tamlohi na lelevosahi hin God. Ale kama taurilati na ūomřomi tari na retivarařuhu, ale kama vaira la oolo lo hin Křisto. ⁶ Ale kama lo tatamahu mata kama

sile na talai isana tamlohi lejileji tari sei atu, ale kama pa vaia hin rani atu vara kamim mo isoiso ka lo oolo lo hin Křisto moiso.

⁷ Kamim ka lo kilau na huri tamlohi purongo. Kamim ka hitevosahia moiso vara kamam kama tamlohi non Křisto, sohen la haratu sei la lo reti hapahapa lara enira non Křisto. ⁸ Korong, ha pa hitea vara na lo pohapoha na suiha sei Moli mo silea isamam. Pani suiha nike enia matan vara i turuhi kamim, mo sopo matan vara i vilijovjovi kamim. Ale a pa sopo tinařihia vara tea i vaiau a mahuanhanu, vara i vai na noku vavahinau isamim i mai hina purongo.

⁹ Na sopo opoia vara tea i ūromřomia vara na lo ūilangi na noku leta purongo ale i vai na tamlohi la matahuniau matana,

¹⁰ matan hai la lo verea lara, “Paul enia hare? Nona leta la ūilangi pani enia mo sopo te suihana, ale mo sopo tamlohi matea mata retireti i ūruhu.” ¹¹ La haratu la lo retireti sohen harihi, la levosahia moiso vara kamam kama lo ūilangi na nahomim sohen kama lo ūilangi na nomam leta.

¹² Matan kamam kama sopo ūromřomia vara kama pa verea vara kama tamlohi ūruhu i tikeli la tamlohi sei la lo verea vara enira io. Pani ka hitea, enira la lo hase kilau usurira na tatuara purongo vara hare natu mo ūruhu sohena sava. Hinau akerihi enia rongorongo vono purongo!

¹³ Pani kama pa sopo reti hapahapa hin te hinau sei mo sopo nomam. Mata kama tau na ūomimam mata vai na vavahinau sei God mo taua na limamam purongo, ale mo taua vara kama pa vavahinau na jaramim mara Corinth. ¹⁴ Matan mo tataholo purongo vara kama lo verea vara kama aulu hin kamim na mauri rasua, matan kamam natu, kama tiroma tamlohi sei mata lavi na Retiřuhu non Křisto isamim. ¹⁵ Ale kama sopo lavi na hasohaso mata vavahinau nona tinapua, mo vono, kama lo ūomtau vara nomim rasua i pa ulua, ale vara nomam vavahinau isamam i pa ulua i mele tavera jea, ¹⁶ matan vara kama pa retivujavujangi na jara tinapua sei tele vano na jaramim. Ale kama pa sopo reti hapahapa hin te vavahinau tamlohi tinapua la vaira hin la jara tinapua atu.

¹⁷ Pani Retitapu mo verea vara,

'Vara tea mo opoia vara i reti hapahapa,
i pa reti hapahapa na sava Moli mo
vaia purongo.' *Jer 9:24*

¹⁸ Matan hina aulu mo sopo haratu sei mo
hase verea hasena, pani haratu Moli mo
verea vara mo vaia mo ūru.

11

Vahařule Haluhalu

¹ Na opoia vara ha ūromperavu mata makomo rani peresiau, ale a pa retireti sohena tamlohi rongorongo vono matea mo lo retireti, pani na levosahia vara vararūhu ka lo ūromperavu isaku. ² Enau na mereimerei matamim na mereimerei non God. Matan na retitauhi vara kamim ha pa sohena hařai lahi vokevokē matea tuana matelete, enia Křisto. ³ Pani na lo matahu vara sohen tuai mata sasati atu Tiapolo mo halu Eve na nona haluhalu, ale vara tinapua sohena i posa na ūromimim ale i tiroma hin kamim ha malue na malele mata lotu Křisto na mapumim tari sei mo vararūhu. ⁴ Matan vara te tamlohi vujangi tinapua mo mai ale mo retivujavujangi na vujangi tinapua matea hin Iesu hin haratu kama lo vujangi kamim hinia moiso, teni hin te tanume tinapua hin Tanume Tapu atu ka lo lavia moiso, teni te Retiřuhu tinapua hin haratu ka lo rasua, ale mo mera purongo vara kamim ka hitea mo ūru purongo. ⁵ Matan na sopo ūromřomia vara enau na vejuveju hin la haratu Corinth sei la lo verea vara la vahařule aulu jea, enira la jeuau. ⁶ Hina purongo vara na sopo levosahi na malele mata retireti sohera, pani enau a eři verea vara na sopo vejuveju na lelevosahi. Varařuhu kamim ka levosahia vara kama lo vujangi na lelevosahi mo mera isamim moiso na malele tinatinapua matuvana.

⁷ Ka ūrom vara na vai te hehe hin haratu na hase tauau atano matan vara a tahe kamim na oloolo matan na lo retivujavujangi na Retiřuhu non God isamim, ale na sopo usi te hinau hatea matana? ⁸ Korong ka ūrom vara na lo vanaho na vao kalesia tinapua matan na avulahi mata a lavi na nora mania matan vara a eři mai a lo volitusi purongo isamim. ⁹ Ale na rani na lo toho peresi kamim, na noku vejuveju na sopo usi te tuetueni isan te vonamim

hatelete, matan la vorai kalesia atu sei la tai Macedonia, la lavi na tuetueni tinapua matea mo mařivisi vevuhi na noku vejuveju. Noku retihapahapa sei enia matan na hase taurilatiau vara a pa sopo tau te tetehi puhoni hatea isamim hin te malele, ale a pa sopo eři vaia hin te rani. ¹⁰ Sohen retivarařuhu non Křisto mo lo toho hiniau, a pa sopo eři isoiso na noku retihapahapa matan hinau atu na jara tari matan Achaia. ¹¹ A pa reti hapahapa mata sava? Matan na sopo opoi kamim teni mo vono? God mo levosahia vara na opoia kamim.

¹² Ale sava na lo retihapahapa hinia, a pa lo retihapahapa hinia, matan vara a la-nářihi na masapa tari mata retihapahapa isan la haratu sei la lo verea lara enira la sohemam na nomam vavahinau tari. ¹³ Matan, la tamlohi níke enira la vahařule haluhalu, la tamlohi haluhalu, ale la lo vaia sohena vara enira la vahařule non Křisto na nora halu. ¹⁴ Pani enau na sopo mařurahi hinira matan Setan i eři hase vaia i mai sohena angelo mata malarani. ¹⁵ Matan haratu, mo sopo hinau mařurahi matea vara volitusi non Setan la lo hase vaira sohen la volitusi tataholo non God, pani na isoisona, nora talai i pa tataholo i ūru na nora vavahinau.

Paul Mo Sopo Avulahi Hinira

¹⁶ A mele verea vara ha sopo ūromřomia vara enau na rongorongo vono matan na lo retireti sohen harihi, pani hina purongo vara na lo vaia, ha lo tapurongo tako matan a pa mele retihapahapa makomona. ¹⁷ Ra levosahia vara Moli mo sopo avulahi na retihapahapa sohen harihi, pani na lo vaia sohena vara enau na tamlohi rongorongo vono matea. ¹⁸ Matan tamlohi tinatinapua la lo retihapahapa usuri na vavahinau nona tamlohi, enau sohena a pa vaia. ¹⁹ Ka ūrom vara nomim lelevosahi sei mo tavera jea, i pa tataholo vara ha tapurongo isana tamlohi rongorongo vono teni mo vono! ²⁰ Avei, nomim lelevosahi mo sohena sava matan mo sopo te hinau hinia vara te vonara mo vai kamim ka slev, teni vara ka levosahia vara mo lo haluhalu kamim mata nomim tavytav, teni vara la lo hani na masumasumim, teni vara la lo ūromaulu hinira hasera, teni vara la lo varasi na

patumim. ²¹ Na hitea mo sati matan kamam kama sopo eři vaia sohera!

Paul Mo Lo Retihapahapa

Pani vara tea mo ūromřilangi vara i retihapahapa na nona rongorongo vono, enau sohena a eři vaia. ²² La tamlohi halu nika, la lo retihapahapa lara enira hasera la Hebrew, pani enau na Hebrew. Enira, la ūrom vara enira hasera la tavytavuin Israel, pani enau sohera. Enira, la ūrom vara enira hasera la mahapin Abraham, pani enau sohera. ²³ Na levosahia vara na lo retireti sohen na tamlohi rongorongo vono matea, pani na levosahia vara ka lo ūromřomia vara enira la lo volitusi non Kristo, pani enau na jeura, noku vavahinau mo jeura, la tauriau na vano na ima ūrilangi vaha visa, la rupi lejilejiau na asi maja vaha visa, mariviti vara a mate vaha visa. ²⁴ Vaha lima moiso, Jew la rupiau mo vaha ngavulu tolu mo limaravati ⁽³⁹⁾. *Deut 25:1-3*

²⁵ Vaha tolu, la hamajiau na vipahai. Na rani matea la paruuvara a mate. Na pute na lanis vaha tolu. Na rani matea, na lo sale na pahai matea na tasi masapa mata rani matea ale pongi matea. ²⁶ Na hahau ūralihi mata jara la asau ūrove vaha visa, ale na lavi na rani sasati na wai tavei, rani sasati mata tamlohi sei la lo vili na tamlohi mata mania, ale rani sasati isana Jew, rani sasati isana tamlohi ūrořoha, rani sasati na lolo taon tavera, rani sasati na rani na lo toho na jara hasetoho, rani sasati na tasi, rani sasati isana vorai kalesia haluhalu. ²⁷ Na lo mauri peresi na noku malokoloko, noku rongohaji, ale na sopo eři juruvi vaha visa moiso mata marohati peresi na mařohu, ale vaha visa moiso mo sopo te haku hinau. Vaha visa moiso na lo toho na jara hamariri sati pani mo sopo te noku ruru hamariri.

²⁸ Ale aulu hin la hinau sei, na rani hatehateahi, ūromiku mo lo puhoni matan na sopo levosahia vara vao kalesia tari la lo toho sohena sava. ²⁹ Hare natu vara mo rongoa vara mo sopo te suishana, vara enau sohena na sopo rongoa, enjora. Hare natu vara i malue na malele rasua matan tea mo tikaulejia pani enau a pa sopo lolokoru matana, enjora.

³⁰ Vara a eři retihapahapa hin te hinau, a pa retihapahapa na hinau sei na sopo eři vaia haseku. ³¹ God, Taman Moli Iesu, enia i pa lavi na hasohaso mata rani tui tui. Enia mo levosahia vara enau na sopo halu, ³² ale hin rani atu na lo toho Damascus, tamlohi aulu na ruhuruhun Supe Aretas, mo sile na retileu matea isana tamlohi la lo kilau na matarua tavera matan taon tavera atu vara la pa taurilatiau, ³³ pani kalesia hai atu la tuhuau na windoa na sivo atano na tanga tavera matea na ropen taon atu, matan vara a eři malue a rovo!

12

Paul Mo Hite Na Tuka Na Mamavuho Matea

¹ Na levosahia vara noku reti hapahapa nika mo rongorongo vono, pani a pa mele vere te makomona hin te hinau sei Moli mo vujangia isaku mo sohena mamavuho matea. ² God mo sauau na sahe aulu na hatolu tuka na rani matea tauni mo sangavulu ūromana mo vati la vano moiso, na sopo levosahia vara na lo toho na epeku teni mo vono, pani God mo levosahia. ³ Ale na levosahia vara enau vara na epeku teni mo vono na sopo levosahia pani God mo levosahia, ⁴ na sahe aulu na toho Paradise na tuka, ale na rongo te hinau la tapu jea vara tea i eři mele verera isan tea na varama. ⁵ Matan la hinau atu natu God mo vujangira isaku a eři retihapahapa. A pa sopo eři retihapahapa hin na sava na vaia, pani hin haratu purongo sei na sopo eři vaia haseku. ⁶ Matan, vara a opoia vara a retihapahapa, a pa sopo tamlohi rongorongo vono matea matan na lo retivararu. Pani a pa sopo vaia matan na sopo opoia vara tea i ūromaulu hiniau i jeu na hinau mo eři hitea hiniau moiso teni na sava mo rongora isaku, ⁷ hina purongo vara God mo vujangiau na hinau ūruhruhu jea. Matan haratu, God mo tinařihia vara a lavi na rani ūrilangi na lima angelo matea non Setan, ale mo vailejleji na epeku matan vara a pa sopo retihapahapa hin la hinau sei God mo vujangiau hinya.

⁸ Na usi Moli vaha tolu vara i lanařihia isaku. ⁹ Pani mo verea isaku mara, "Noku ūromřuhu enia mo tataholo matam. Mata

suihaku mo lo voko na hinau ko sopo eři hasem vaia."

Ale matana, nake na avulahi purongo vara a reti hapahapa na hinau na sopo eři vaira haseku vara suihan Křisto i sopo lo toho hiniau. ¹⁰ Matan haratu, enau na avulahi vara na sopo eři vai te hinau haseku, ale matan haratu a eři lavi na retisasati nona tinapua peresi na rani řilangi, teni vara tamlohi la tipahiau, peresi na hina puhoni na lo lavia matan Křisto. Matan hin rani atu natu na sopo eři vai te hinau haseku, suihan Křisto mo lo tueniau.

Paul Mo Romřomi Na Kalesia Corinth

¹¹ Kamim ka vaiau na vaia sohena tamlohi rongorongo vono matea, matan na lo retihapahapa sohen harihi. I pa tatahola vara ha verea tatahola isara vara enau tamlohi matea tamlohi la eři rasua. Matan enau na sopo vejuveju hin te hinau hatelete sohen la ‘vahařule aulu jea’ sevano, hina purongo vara enau hina purongo matea. ¹² Varařuhu na vai na matamata tatahola nona vahařule vararuhu. Na noku řomperavu na vai na matamata tavera peresi na hinau mařurahi peresi na vavahinau mata suiha na nahomim. ¹³ Ale, hinau matea purongo sei na sopo vaia na lo vaia isana vao kalesia tinapua, enia vara na sopo usi te tuetueni isamim. Ha řomiau matan na sopo usia!

¹⁴ Ka hitea, na tatamahu moiso vara a mele rohi kamim na hatolu noku hahau. Ale na sopo opoia vara a mai tetehi puhoni matea isamim. Na sopo opoia vara a lavi te nomim hinau, na opoi kamim purongo! Matan natuvarihi varihi la sopo sile na mania isana tamara peresi na tinara mata hara hinau, pani tamara peresi na tinara la vaia mata natura. ¹⁵ Ale a pa avulahi jea vara a hase jalahi na mauriku peresi na noku hinau tari mata maurimim. Ka řom vara mo tatahola vara hina purongo vara noku opoia mo tavera matamim, kamim ha pa opoiau makomona purongo?

¹⁶ Vara mo sohen haratu, na sopo lo tau te tetehi puhoni isamim. Pani hai la pa lo verea vara enau na mai luhu isamim vara a tikauleji kamim na noku haluhalu. ¹⁷ Pani vara mo sohena, a pa halu kamim sohena sava? Mo toma, na vaia hin te vonan la tamlohi atu sei na lo řulera la

vano isamim? ¹⁸ Na rani na usi Titus vara i rohi kamim ale na mele řule na vorai tinapua matea vara i usuria, korong Titus mo haluhalu kamim? Mo vono! Matan kamam rua kama hahau na posposi matelete purongo. Korong ka hitea vara kamam rua kama sopo vaia sohena teni mo vono?

¹⁹ Korong ka lo řomřomia vara tarea kama lo vere la hinau nike enira, matan vara kama hase verea vara kama tatahola mata vaira, pani mo vono. Kamam volitusi non Křisto, ale kama lo vere la hinau nike isamim na nahon God, ale na hinau tari kama lo vaira, enira matan vara la tueni kamim ha ulua. ²⁰ Matan na levosahia vara a mai isamim, a pa sopo avulahi na sava a pa hitea isamim, ale ha pa sopo opoi na sava a pa verea matana. Na levosahia vara a pa vileia vara kamim ka lo vasvas, ka lo mereimerei, ka lo lolokoru patumim, ka lo hanmarua, ka lo verelejleji na tinapua, ka lo sorasora tamlohi, ka lo mangisi ale mo sopo te oloolo isamim. ²¹ Enjora, na levosahia vara a mai isamim God ipa vaiau a mahanuhanu mata nomim posposi natuvarihi, ale řomiku i pa sati matan matuvana isamim sei la hehe tiroma moiso, la sopo lo vahari na nora posposi lumiha, teni na nora posposi maji peresi na nora marohati mata posposi sohen haratu.

13

Isoiso Retituetueni Non Paul

¹ Harihi enia noku hatolu mai vara a rohi kamim. Ale sohena Retitapu mo verea vara, ‘Ha pa turu na retireti non te tupra rua teni te tupu tolu matan te hinau tea mo vaia mo sati’.

Deut 19.15

² Na pete retiřořoahai la haratu la lo hehe na harua noku rohi sei moiso. Ale nakerihi, na lo mele retiřořoahair a peresi na tamlohi tari, sohen na pete vaia tiroma moiso, vara hin harakerihi, a pa sopo řom tea vara i sopo lavi na talai mata nona hehe, ³ matan ka lo opoia vara ha levosahia vara vararuhu, Křisto mo lo retireti hiniau. Křisto mo sopo kilau purongoi na sava ka lo vaira, pani hin kamam, enia suiha tavera jea matea na livuhamim. ⁴ Hina purongo vara mo mate na talopeilopei sohena mo sopo te suihana, pani nake mo lo

mauri mata suihan God. Ale, kamam sohena mo sopo te suihamam, pani kama pa toho peresi kamim na suihan God. Suiha atu sei kama lo vayahinai hinia matamim.

⁵ Ha hase vaihite kamim hasemim vara varauhu nomim rasua mo varauhu. Ha hase kilau usuri kamim hasemim! Vara ha sopo eři hitevosahia vara Iesu Křisto mo lo mauri hin kamim, mo řaramia vara ka jovi na nomim vaihite. ⁶ Ale na lo řomtau vara kamim ka hitevosahia vara kamam kama jeu vaihite nike moiso.

⁷ Ale kama lo usiusi isan God vara ha pa sopo vai te hinau sasati. Mo sopo matan vara tamlohi la pa hitea vara kama jeu vaihite atu moiso, pani matan vara ha pa vai na hinau tataholo, hina purongo vara ka lo řomřomia vara kama sopo lo jeu vaihite atu. ⁸ Matan kama sopo eři vai te hinau vara i turuleji na retivarařuhu, pani kama pa lo turu řilangi mata retivarařuhu tarea. ⁹ Matan enia hina purongo vara mo sopo mele te suihamam, pani kama pa avulahi vara kamim ka řilangi varauhu. Nomam usiusi enia vara ha jea i řuhu na mauri rasua.

¹⁰ Matan haratu, na lo uli la hinau nike Macedonia isamim vara ha lo vai tatalohoi na maurimim, matan vara na rani vara a pala, a pa sopo vai na posposi řilangi hajavua na noku suiha sei Moli mo sileau hinia mata vai na kalesia la ulua, pani mo sopo mata vilijovjovira.

Isoiso Retireti

¹¹ Ale isoiso hinau la vorai peresi na vevorai, enia vara ha avulahi, ha mele vai mamahuni na maurimim la tataholo, ha řomřilangi, ha turu jara matea na řomimim hatehateahi, ha toho na tamata, ale God mata opoia peresi na tamata i pa toho peresi kamim.

¹² Ha tapatapai kamim na posposi mo tataholo mata kalesia. Tapuhi tari nike la sile na nora retioloolo isamim.

¹³ Romřuhu non Moli Iesu Křisto peresi na opoia non God peresi na tapala řuhu nona Tanume Tapu i pa toho peresi kamim mo isoiso. Amen.

Galatians Leta Paul Mo Ulia Isana Mara Galatia Leta Nike

Na rani tiroma leta nike mo vano isana kalesia hin jara atu Galatia, Paul mo lo verea mo memera isara moiso vara enia mo silera hin Retiřuhu tatahola atu sei Iesu mo lo silea isana tiroma. Retiřuhu sei hasena, enia hina vararuhu (1.1-10). Haranike enia hina aulu matan te tamlohi la lo verea vara reti non Paul mo halu na Retiřuhu non God matan enia tamlohi halu.

Paul enia vahařule vararuhu non Iesu. Iesu mo řulea isana tamlohi la sopo levosahi God. Patu tamlohi na vao kalesia matan Jerusalem la lo avulahi hin Paul peresi na nona Retiřuhu (1.18-2.10). Paul mo reti isan Peter na rani matea Antioch, matan mo vaileji na vujangi non Retiřuhu, matan mo lo tametame na tautavuin Israel la lo toho peresia (2.1-18).

Paul mo vujangia vara rasua hin Křisto, enia hasena malele tatahola vara tamlohi la lavi na mauri mo materi hinia. Enia malele sei God mo silea isan Abraham tuai (3.1-4.31).

‘Matan hin leu atu na lo usuria, na mate matan leu atu, matan vara a pa mauri hin God, enau na mate peresi Křisto na nona talopeilopei. Nake mo sopo enau sei na lo mauri, pani Křisto enia mo lo mauri hiniau.’ (2.19-20)

Hin Puku Nike

1. Vahařule Varařuhu, Retiřuhu Varařuhu (1.1-10)
2. God mo vřoni Paul vara i nona vahařule (1.11-24)
3. Paul mo mele tahe na Retiřuhu (2.1-21)
4. Rasua enia malele vararuhu mata tamlohi la juri (3.1-4.31)
5. Tanumen God mo revera na opoia (5.1-6.10)
6. Isoiso retireti (6.11-18)

Retireti Tiroma Non Paul Isara

¹ Leta nike, enau Paul na ulia, enau vahařule matea, pani mo sopo na řomřomi tamlohi teni tea la vřoniuvara a vahařule, mo vono. Iesu Křisto hasena peresi

God Tama la toviau, God sei mo lo sauteterahi Iesu na mateia.

² Ale la vorai nike peresiau, kama sohai na nomam retioloolo isamim kamim vao kalesia na jara tari Galatia. ³ Na lo usiusi vara God Tamařa enia Moli Iesu Křisto vara la sile na nora řomřuhu peresi na nora tamata isamim. ⁴ Iesu mo hase silea vara i mate mata nořa hehe vara i jurirřa řa materi na suihan sasati na varama nake, usuri na masalon nořa God Tamařa, ⁵ hasohaso tavera enia nona, mata rani tui tui tarea. Amen.

Retiřuhu Enia Matelete

⁶ Na mařurahi jea, matan vila řuhu purongo, ka rovo isan haratu mo tovi kamim na nona řomřuhu non Křisto, ale ka lo posí vano na retiřuhu tinapua, ⁷ mo sopo mele te retiřuhu tinapua, pani na levosahia vara tamlohi hai la vai na řomimim la lo kaka. La opoia vara la vai na retiřuhu non Křisto i mele tinapua.

⁸ Pani vara kamam teni te angelo na tuka i lo retivujavujangi na retiřuhu matea mo sopo tatahola hin haratu kama lo retivujavujangi kamim hinia moiso, talai tavera non God i pa toho isana. ⁹ Sohena kama pete verea tiroma moiso, ale na mele verea vara, tea mo lo retivujavujangi na retiřuhu tinapua isamim, ale mo sopo na retiřuhu sei ka lavia tiroma moiso, talai tavera non God i pa toho isana.

¹⁰ Ka řom vara na lo reti sohena matan vara tamlohi, teni God la avulahi hiniau matana? Teni ka hitea vara na lo vahitea vara a vai na tamlohi la avulahi hiniau? Vara a lo vahitea vara a vai na tamlohi la avulahi hiniau, i pa vujangia vara enau na sopo slev vararuhu matea non Křisto.

Vujangia Non Paul Mo Tai Isan Křisto

¹¹ La vorai peresi na vevorai, na opoia vara ha levosahia vara Retiřuhu atu na lo retivujavujangi hinia, enia mo sopo tai isana tamlohi. ¹² Matan na sopo lavia isan te tamlohi teni tea mo sopo vujangiau hinia, pani na lavia matan Iesu Křisto mo vujangia isaku.

¹³ Matan ka rongoa moiso, vara mauriku mo sohena sava tiroma, na lo usuri na posposi rasua nona Jew. Ale sohena sava hin pongi atu na lo tipahi řilangi na vao kalesia non God, ale na vahitea vara

a komora. ¹⁴ Hin pongi atu, na lo sahe aulu jea na posposi rasua nona Jew, mo jeu na tamlohi tinapua la tautauniku na tahisamam, matan na lo turu ūilangi na posposi nona tamamam.

¹⁵ Pani na rani na sopo lo vora, God mo tapuhiau moiso, ale mo toviau na nona ūromruhu, ¹⁶ ale enia mo avulahi vara i vujangi Natuna isaku, matan vara a pa retivujavujangi Iesu isana tamlohi ūrōoha. Ale na sopo vano vahatea vara a usi rongorongoa isan tea, ¹⁷ teni vara a sahe Jerusalem isan la haratu la vahařule tiroma hiniau, pani na vano Arabia, moiso na mele mai Damascus.

¹⁸ Ale tauni mo tolu la vano moiso na sahe Jerusalem vara a hite Peter, ale na lo toho isana mata rani mo sangavulu ūromana mo lima ⁽¹⁵⁾.

¹⁹ Hin rani atu, na sopo hite te vahařule tinapua, pani James purongo, tasin nořa Moli. ²⁰ La hinau sei na lo ulia isamim na nahon God na sopo halu hinira.

²¹ Moiso na vano na lolon la jara tavera sei mo rua, Syria enia Cilicia. ²² Hin rani atu, vao kalesia hin Křisto la lo toho na vao kalesia tari Judea, la sopo lo levosahiau i ūruhu. ²³ Pani la lo rongo purongoi na sorasora la lo verea lara, "Tamlohi niké natu, tiroma mo lo tipahiřa, pani nake mo lo retivujavujangi pa rasua sei, tiroma mo vahitea vara i komoa." ²⁴ Matan hinau atu, la lo sile na hasohaso tavera isan God matakau.

2

Vahařule Jerusalem La Avulahi Hin Paul

¹ Moiso, tauni mo sangavulu ūromana mo vati mo vano moiso, enau Barnabas peresi Titus, kama sahe Jerusalem. ² Na sahe matan God mo vujangia isaku vara a sahe. Enau tolu na tamlohi tatavera mata rasua kama hasemam sorasora matavuhi atu matan na opoia vara la levosahi mamahuni na sava na lo retivujavujangi hinia isana tamlohi ūrōoha, matan vara a levosahi tataholoia vara la majinga hinia vara i vono, noku vavahinau i pa vano hina purongo.

³ Pani hina purongo vara la levosahia vara Titus enia mara Greek matea, la sopo ngurunguru hinia vara i taiřalihi, ⁴ mo

sopo matan vara ūromřomi atu i pa malue, pani matan hin matavuhi atu, matea mo lavi na vorai hai la sopo vorai varāruhu na nořa rasua, la mai sohena tanume luhu, matan vara la eři levosahia vara nomam materi hin Křisto Iesu mo sohena sava, matan vara la eři tau kamam sohena nora slev na ruhuruhun nora posposi rasua, ⁵ pani kama sopo usuri na ūromira, hina purongo vara enia mata makomo rani purongo, matan vara hina varāruhu mata Retiřuhu i pa toho jejeu matamim.

⁶ Ale patu tamlohi mata vao kalesia atu, la sopo vere te hinau aulu na sava na lo retivujavujangi hinia. Ale na vere tataholoia vara na sopo ūromřomi na nora hija tavera sohena patu tamlohi, matan God mo sopo tametame tea. ⁷ Pani la hitevosahia vara God mo tauau vara a pa retivujavujangi na Retiřuhu, isan la haratu la sopo Jew, sohena mo tau Peter vara i pa retivujavujangi na Retiřuhu isana Jew.

⁸ Matan haratu mo lo voko hin Peter mata nona vavahinau sohena vahařule isana Jew, enia haratu sei mo lo voko hiniau na nona vavahinau mata tamlohi ūrōoha.

⁹ Ale hin rani atu James, Peter, John, enira la lo kilaura sohena vřiřa mata vao kalesia, enira la hitevosahia vara God mo tau na vavahinau ūruhu na limaku usuri na nona ūromřuhu. La tulahi enau Barnabas vara kama voko matea peresira, ale lara kama pa vano isana tamlohi ūrōoha, ale enira, isana Jew. ¹⁰ Hinau matea purongo la usia lara kama pa lo ūromřomi na tamlohi tilavono, hinau atu natu na lo opoia mo tavera jea vara a vaia.

Paul Mo Vujangi Peter

¹¹ Pani na rani Peter mo mai Antioch, na reti isana na naho vao. Na reti ūilangi isana mata sava mo lo vaia, matan sava mo lo vaia mo sopo tataholo. ¹² Matan, tiroma moiso tamlohi hai Jerusalem, la pa pala la tai isan James, enia mo lo hanhani tolu na voraiřa la tamlohi ūrōoha, pani na rani la pala, Peter mo turujuha hinira mo toho asau, matan mo matahuni la haratu la lo reti na taiřalihi. ¹³ Ale tamlohi rasua Jew tari tinapua atu, la usuri na posposi tapnetano non Peter, ale Barnabas sohena, la tikaulejia mo usurira na nora tapnetano.

¹⁴ Pani nara na hitea vara la sopo usuri tataholoi na retivarařuhu mata Retiřuhu, na verea isan Peter na nahora enira mo isoiso nara, “Vara engko ko vora Jew matea, ale ko sopo mele usuri na posposi nona Jew, ale nake ko lo toho sohen na tamlohi ſorōha, mata sava natu, ko lo vai hitea vara o vai la tamlohi ſorōha nike vara la oolo lo na posposi nona Jew sei, engko ko tinařihira moiso?” ¹⁵ Enřa řa vora řa Jew, řa sopo tai isana ‘tamlohi hehe’ sei la tamlohi ſorōha, ¹⁶ pani enřa řa levosahia vara tamlohi mo sopo tataholo na nahon God matan vara mo lo oolo na Leu non Moses, pani matan nona rasua hin Iesu Křisto purongo. Ale enřa sohena, řa rasu Křisto Iesu matan vara řa pa tataholo na nahon God matan nořa rasua, mo sopo matan řa lo vai na Leu. Matan tea i sopo eři tataholo na nahon God vara mo lo vai na leu.

¹⁷ Pani i pa sohena sava, vara řa lo aleale malele vara řa tataholo na nahon God mata rasua hin Křisto, ale řa vileiulia vara enřa řa pa lo tamlohi hehe? Korong Křisto mo vařa řa mai sohena ‘tamlohi hehe’? Mo vono! ¹⁸ Matan, vara a mele turuhi na sava na vilijovjovia moiso, i pa vujangiau vara enau tamlohi tope leu matea. ¹⁹ Matan hin leu atu na lo usuria, na mate matan leu atu, matan vara a pa mauri hin God, enau na mate peresi Křisto na nona talopeilopei. ²⁰ Nake mo sopo enau sei na lo mauri, pani Křisto enia mo lo mauri hiniau. Ale nake na mauriku na lo toho hinia na epeku, na lo mauri usuri na rasua hin Natun God sei mo opoiau, ale mo hasena silea matak. ²¹ Enau na sopo vonavonan la haratu sei, la lo vai na ſorōhu non God sohena hinau purongo matea. Matan vara řa eři juri vara řa oolo na leu, mo ſaramia vara mateia non Křisto, enia mo sopo te hinau hinia!

3

La Jilio Na Malele Mata Rasua

¹ Kamim mara Galatia, ka rongorongo vono! Sava tamlohi natu, mo mahuhi kamim? Na levosahia vara na vujangi mamahuni na ſarami mateia non Iesu Křisto na nona talopeilopei, mo memera isamim moiso. ² Na opoia vara a usi na retiusia mateia isamim tiroma. Ka lavi na

Tanumen God matan ka vai na vavahinau mata leu, teni matan ka rongo na Retiřuhu, ale ka rasua? ³ Varařuhu, ka rongorongo vono sohen haratu natu? Ka tapulo na mauri rasua na Tanumen God, pani nake ka ſromřomia vara ha pa tataholo na nahon God na nomim vavahinau? ⁴ Ka lavi na rani ſilangi tavera moiso mata retiřuhu, mo sopo matan vara i pa vano hina purongo teni ka lo ſromřomi purongo hinia?

⁵ Ale, haratu sei mo lo sile kamim na Tanumena, mo vai na hinau mařurahi matuvana na nahomim matan ka lo vai na vavahinau mata leu, teni matan ka lo rasu na retiřuhu sei ka rongoa?

⁶ Hin malele nike Abraham sohena mo ‘rasu God, ale God mo verea vara enia mo tataholo na nahona’. *Gen 15.6*

⁷ Ha levosahi mamahunia vara la haratu la rasu God, enira natun Abraham tataholo. ⁸ Ale Retiulia mo retitauhi hinia tuai mara, God i pa vai na tamlohi ſorōha la tataholo na nahona mata rasua. Retitapu sei mo retivujavujangi na Retiřuhu tuai isan Abraham mara, ‘Hiniho a pa leřuhu na mara jara tinatinapua tari’. *Gen 12.3; 18.18; 22.18* ⁹ Ale mo sohena natu, la haratu la rasu Křisto, la lavi na leřuhu peresi Abraham, tamlohi rasua sei tuai.

¹⁰ Matan tamlohi tari sei la lo turu ſilangi na nora vavahinau mata leu, la lo toho na ruhuruhi lesati moiso, matan Retiulia mara, ‘Lesati i pa toho isana tamlohi tari sei la sopo usuri vevuhi na hinau tari na lolo Puku mata Leu la ulia’. *Deut 27.26*

¹¹ Nake mo memera purongo, vara tea i sopo eři mai tataholo na nahon God, matan vara mo lo oolo na Leu, matan ‘Tamlohi sei la tataholo na nahon God, la pa mauri na rasua’. *Hab 2.4*

¹² Pani malele leu mo sopo sohena malele mata rasua, matan Retiulia mo verea mara, ‘Vara tea mo opoia vara i tapai na mauri matan mo lo usuri na leu, i pa oolo vevuhi na leu tari na maurina’. *Lev 18.5* ¹³ Křisto mo volituřuřa hin lesati atu leu mo lo silea, ale enia mo mai lesati matařa, sohena Retiulia mo verea mara, ‘Lesati mo lo toho na tamlohi tari sei la taua mo sevu aulu na vipahai mata talai’. *Deut 21.23* ¹⁴ Matan vara hin Křisto Iesu leřuhu God mo retitauhi hinia isan Abraham, i pa pala isana tamlohi ſorōha, matan vara

ra eři lavi na Tanume Tapu sei God mo retitauhi hinia na rasua.

Retitauhi Mo Lo Toho Tiroma Na Leu

¹⁵ La vorai peresi na vevorai, a pa vai na tovongi matea na posposi tamlohi. Vara te tamlohi la retitauhi hin te hinau moiso, mo sopo tea i eři topea teni i mele tau te hinau aulu hinia. ¹⁶ Ale la retitauhi atu God mo verea, mo verea isan Abraham peresi na mahapina. Mo sopo verea vara, ‘peresi te mahapina tinapua’ sei mo lo ūrārami na vao matuvana, mo vono, mo lo ūrārami matea purongo mo verea mara ‘peresi na mahapim’ enia Kristo. *Gen 12.7*

¹⁷ Rarami noku reti sei mo sohen harihi: Leu sei, mo pa pala tauni mo ngavulu sangavulu vati mo sangavulu tolu *(430)* mo usuri la retitauhi sei, i sopo eři tope la retitauhi sei God mo vaia tiroma moiso isan Abraham vara la mai hina purongo. ¹⁸ Matan, vara ūrārami lavi na vua retitauhi non God mata ūrārami usuri na leu, ale vua retitauhi mo sopo mele mai mata retitauhi, pani God mo silea isan Abraham na malele retitauhi matea.

¹⁹ Vara sohena, God mo sile na Leu mata sava? God mo pa tau na leu mata hehe, vara i toho i tikeli rani atu mahapin Abraham sei God mo retitauhi hinia i pala. Ale God mo sile na leu isana angelo vara la pa silea isan Moses, enia haratu mo lo turu na livuhan God peresi na tamlohi. ²⁰ Ale ūrārami levosahia vara tamlohi matea i pa turu na livuha tamlohi mo rua sei la opoia vara la vai na retitauhi matea, pani nike, God hasena mo vai na retitauhi isan Abraham.

Vayahinau Mata Leu

²¹ Vara sohena leu mo horo na retitauhi non God? Mo vono, matan vara te leu hatea la silea vara i eři sile na mauri, ale tamlohi la pa eři mai tatahola na nahon God matan vara la lo oloolo hin leu atu. ²² Pani Retitapu mo vereulia vara, enia mo isoiso, ūrārami toho na ruhuruhi suiha hehe, matan vara vua retitauhi mata rasua hin Iesu Kristo, i pa mai isan la haratu la rasua.

²³ Ale rasua mo pa mai isařa sei, leu mo lo taurilatiřa moiso, mo tapoviřa mo tikeli rani atu God mo vujangi na malele mata rasua. ²⁴ Ale matana, leu atu mo lo kilauřa mo sinai mo tikeli rani atu Kristo mo mai, matan vara ūrārami eři mai tatahola

na nahon God na rasua. ²⁵ Pani nake, matan rasua mo mai moiso, ūrārami sopo mele toho na ruhuruhi tea, ²⁶ matan hin Kristo Iesu, kamim mo isoiso ka natun God mata rasua. ²⁷ Matan kamim matuvana ka paptijo hin Kristo, ka ru Kristo na maurimim. ²⁸ Matan haratu, mo sopo te Jew teni te tamlohi ūrōroha, teni slev, teni te tamlohi purongo teni te lamane teni te hařai, matan kamim mo isoiso ka matea hin Kristo Iesu. ²⁹ Ale vara kamim non Kristo, kamim ka mahapin Abraham, la haratu sei la pa lavi na vua retitauhi.

4

Enia Ra Natun God

¹ Rarami noku reti enia vara natun tamlohi matea enia i pa lavi na korun tamana, enia mo sopo tinapua na slev matea, hina purongo vara hinau tari enia nona. ² Pani natirihi atu, i pa lo toho na ruhuruhi lima tamlohi matea mata i pa kilaua peresi na volitusi non tamana i tikeli rani atu tamana mo taua moiso.

³ Mo sohen haratu isařa, na rani ūrārami pa lo natuvarihi, nořa řomřomi mo lo toho na ruhuruhi liman vui varama nike.

⁴ Pani rani tatahola mo pala, God mo ūrule Natuna, mo vora isana hařai matea, mo vora na ruhuruhi leu, ⁵ vara i volituhu la haratu la lo toho na ruhuruhi leu, matan vara God i pa korohiřa ūrārami natuna tatahola. ⁶ Ale matan ka natun God, enia mo ūrule na Tanumen Natuna mo mai na lolo mapuřa, mo vairā ūrārami tovi God sohena, “Tata, Tamaku”. ⁷ Matan haratu, ko sopo mele slev, pani ko natun God, ale vara natun God, o pa lavi na vua retitauhi non God.

Paul Mo Romi Na Mara Galatia

⁸ Tuai ka sopo lo levosahi God, ka lo toho na ruhuruhi lima vui varama sei tamlohi hai la verea vara enira god, pani enira la sopo god. ⁹ Pani nake, matan ka levosahi God, pani vara a reti tatahola, God mo levosahi kamim tiroma, ale mata sava ka opoia vara ha mele slev nona vui varama sei, la sopo eři vai te hinau, ale la sopo ūruhi hin te hinau hatelete? ¹⁰ Ka lo oloolo hin te rani tapu, teni te vitu tapu, teni te taro, teni te tauni mata sava?

¹¹ Enau na lo řomřomia vara korong vara i vono, na lo kalvono purongo

matamim. ¹² La vorai peresi na vevorai, na usia isamim vara ha materi sohekū, matan na sohemim kamim mo sopo Jew, ka materi na leu. Hin rani atu na lo toho peresi kamim, ka sopo vai te hinau i sati isaku. ¹³ Ka levosahia vara hin rani atu, na pa tapulo retivujavujangi na retiřuhu isamim, na rojo makomona. ¹⁴ Hina purongo vara epeku mo sati sohena vahite matea isamim, pani kamim ka sopo hitelehilehiau teni tipahiau. Ka kilauau sohena enau angelo non God matea teni sohen Křisto Iesu. ¹⁵ Pani nake nomim avulahi mo haipu? Na levosahi mamahunia vara hin rani atu, vara ha eři vaia, korong ka julai nařihi na matamim moiso vara ha silera isaku vara i tueniau na noku rojua. ¹⁶ Korong na mai sohena nomim meresahi matan na lo vere na retivarařuhu isamim?

¹⁷ La tamlohi vujangi haluhalu atu sei la lo vahitea vara ha usurira, mo sopo matan vara la pa tueni kamim. La vahitea vara ha řuhu hiniau matan vara ha tapurongo isara purongo. ¹⁸ Tarea mo řuhu vara ha turu řilangi mata vai na vavahinau řuhu, mo mele řuhu jea na rani na sopo toho peresi kamim. ¹⁹ La natuku řuhuřuhu, enau na sohena hařai matea mo rongohaji vara i mele lavilavi, ale i pa lo sohena isaku i tikeli rani atu, maurin Křisto i jea isamim. ²⁰ Vara a pa lo toho peresi kamim nakerihi, a pa retireti malum peresi kamim, matan na sopo levosahia vara a pa mele vai na sava isamim.

Hagar Enia Sarah

²¹ Ha to verea isaku kamim sei ka opoia vara ha lo toho na ruhuruahu leu, ka levosahi na sava leu mo lo verea? ²² Matan la ulia na Retiulia, vara Abraham natuna lamane mo rua, matea isana hařai slev matea, moiso matea isana hařai materi matea, narouna. ²³ Pani natun hařai slev atu, mo vora na masalo tamlohi purongo, ale natun narouna, mo vora usuri na retitauhi non God.

²⁴ Ale la hařai atu mo rua la tovongi la retitauhi atu mo rua sei God mo vaira. Hařai sei Hagar, mo sohena retitauhi sei God mo vaia na vutivutin Sinai, hin jara atu natu, tamlohi la tapulo mai slev mata leu ea. ²⁵ Ale Hagar enia vutivutin Sinai

atu Arabia; enia mo sohen Jerusalem sei matan nona tamlohi la lo toho na ruhuruahu leu, la sohena slev mo kakau nake.

²⁶ Pani Sarah, hařai materi atu mo sohen Jerusalem aulu na tuka, enia tinařa. ²⁷ Ale Isaiah mo ulia na Retiulia mo verea mara, ‘Hařai aroaro, o avulahi, o avulahi tavera, o ulo aulu, hina purongo ko sopo vasusui te natum, matan nake, haratu mo aroaro mo vasusui mo jaea na hařai lahi tinapua.’ *Isa 54.1*

²⁸ Ale nake la vorai peresi na vevorai, kamim ka sohen Isaac, ka natuvarihi mata retitauhi. ²⁹ Pani nake, mo pa lo sohen rani atu, haratu sei mo vora usuri na masalo tamlohi, mo lo tipahi haratu sei mo vora usuri na Tanumen God.

³⁰ Pani Retitapu mo vere na sava? Mo verea mara, ‘O tipahi nařihi na hařai slev enia natuna, matan natuna i sopo lavi na korum, matan korum enia non natun hařai materi purongo.’ *Gen 21.10*

³¹ Ale la vorai, mo sohena natu, enřa řa sopo natun hařai slev atu, pani enřa natun hařai materi atu.

5

Ka Materi Na Leu

¹ Křisto mo teriřa vara řa materi jejeu. Ale ha turu řilangi hinia, ha sopo tinařihia vara ha mele mai slev nona leu.

² Ka hitea, enau Paul na verea isamim, vara ha lavi na taiřalihi matan vara ka řomřomia vara i pa vai kamim ha tatahola na nahon God, vavahinau non Křisto i sopo eři tueni kamim. ³ A mele vereulia isamim tari sei ka lavi na taiřalihi vara kamim ha pa oloolo vevuhi na leu tari matana.

⁴ Kamim sei ka lo opoia vara ha oloolo na leu, matan vara i vai kamim ha tatahola na nahon God, ka lo hase langahi nařihi kamim isan Křisto, ale ka jovi nařihi na řomřuhu non God.

⁵ Matan enřa sei Tanume Tapu mo lo mauri isařa mata rasua, řa lo kilau toho mata retitauhi sei vara God i pa vairā řa tatahola na nahona. ⁶ Matan hin Křisto Iesu, taiřalihi teni tea vara mo sopo taiřalihi, enia hina purongo. Pani hina aulu mata rasua, enia vara opoia i vujangi na vavahinau tari.

⁷ Tiroma ka lo vano mo ūruhu moiso. Hare mo posí na ūromimim, mo vai kamim ka sopo mele usuri na retivaraūruhu? ⁸ God sei mo tovi kamim, mo sopo posí na ūromimim sohena. ⁹ Ha levosahi retireti sei la verea lara, ‘Wai vahona makomona purongo, i pa eři vai na mit tari la hohona’. **1Co 5.6** ¹⁰ Hin Moli, na levosahi mo ūruhu vara, ūromiřa i pa matea na hinau tari, ale vara ha levosahia vara saya tamlohi natu mo lo tikauleji kamim, i pa lavi na talai non God.

¹¹ La vorai peresi na vevorai, vara a pa lo retivujavujangi vara ha pa taiřalihi sohena hai la verea vara na lo vaia, mata sava natu Jew la lo tipahiau? Matan la lo ūrohu hiniau, mo vujangia vara na lo retivujavujangi na talopeilopei non Křisto. ¹² Na opoia vara la haratu sei la lo vai na ūromimim la lo kaka, la lo opoi jea vara ha taiřalihi, mo ūruhu vara la hase votaira.

¹³ La vorai peresi na vevorai, God mo tovi kamim moiso vara ha materi, pani ha lo kilaua, ha sopo usuri na masalo varama, pani na nomim opoia, ha lo kilau mata masapa vara ha tueni na tamlohi rasua tinapua. ¹⁴ Matan leu tari řa eři verera vara la vere na leu matea purongo, ‘O opoi na tinapua sohen ko lo hasem opoipo.’ **Lev 19.18**

¹⁵ Pani vara ka lo hatihati kamim hasemim, ale ka lo ūrolomi kamim hasemim, ha lo kilau matan posposi sei i pa eři vaikomokomo kamim hasemim.

Masalo Tamlohi Mo Rohu Hin Tanume Tapu

¹⁶ Pani na verea vara ha hahau usuri na Tanume Tapu matan vara ha sopo mele usuri na masalo varama. ¹⁷ Matan masalo varama mo ūrohu hin la hinau atu Tanume Tapu mo opoia. Ale Tanume Tapu sohena, mo ūrohu hin la hinau atu, masalo varama mo opoia, matan enira la mere-sahi isara hatehateahi, ale matana, mo vaia mo ūrilangi vara ha vai na sava ka opoia. ¹⁸ Pani vara Tanume Tapu mo lo tiroma hin kamim, kamim ka sopo toho na ruhuruahu leu.

¹⁹ Vavahinau mata masalo varama la memera purongo sohen harihi: mauri maji, ūromřomi hina lumiha, posposi mo lumiha jea, ²⁰ lotulotu vono, majaputu,

valum lolokoru, vasvas, mereimerei, lolokoru patum, ūromřomi hasem na hinau tari, patumasa, ūromřomia vara vaom hasena purongo la tataholo, ²¹ ūromusuri, putu na wai ūrilangi, la matavuhi mata lavilavi na tinapua, ale mele hinau tinatinapua sohera. Na lo mele retiřořoahai kamim sohen na retiřořoahai kamim tiroma moiso, vara haratu mo lo vai la hinau sei, enia i pa sopo unu hin mauri atu God mo aulu hinia.

²² Pani, vua Tanume Tapu mo sohen harihi: opoia, avulahi jea, tamata, ūromperavu, ūromřuhu, posposi mo ūruhu, o vai na sava ko retitauhi hinia, ²³ posposi malum, o hase taurilatiho i ūruhu. Mo sopo te leu mata i pisuhi na posposi sohera.

²⁴ Ale la haratu la tamlohi rasu non Křisto Iesu, la vosae na masalo varama peresi na nona opoia sasati, peresi na nona ūromřomi lumiha na talopeilopei. ²⁵ Vara řa lavi na Tanume Tapu, řa pa hahau usuri na Tanume Tapu. ²⁶ Ra sopo pohapoha, teni řa lo vaivaiřa teni řa lo mereimerei hiniřa.

6

Tueniřa Tarea

¹ La vorai peresi na vevorai, vara tea mo jovi hin te hehe, kamim sei ka lo usuri Tanume Tapu, na posposi malum, ha tuenia vara i mele turu. Ha hase kilau mamahuni kamim, vara tea i sopo jovi hin hehe atu tamlohi atu mo vaia.

² Ha tuetueni kamim tarea na nomim rani ūrilangi, ale vara ha lo vaia sohena, ka lo vai marivisi na leu non Křisto. ³ Matan vara te vonamim mo ūromřomia vara enia te hinau hinia, pani mo sopo te hinau hinia, mo lo hasena halua.

⁴ Pani mo ūruhu vara o hasem vahite na nom vavahinau, ale vara mo ūruhu, o pa eři mangisi matana, pani mo sopo mata vavahinau nona tinapua. ⁵ Matan enřa hatehateahi řa pa hase lavi na nořa tetehi.

⁶ Mo ūruhu vara haratu la lo lavi na vu-jangi mata reti non God, la voli la haratu la lo vujangira.

⁷ Ha sopo tinařihia vara tea i halu kamim. Ha sopo ūromřomia vara God mo lo kilau purongoi na sava ka lo vaia, sava ka lo lavoa, ha pa hani na vuana. ⁸ Matan haratu mo lavo na masalo varama, hin

masalo varama atu i pa lavi na vua mata komokomo. Pani haratu sei mo lavo isan Tanume Tapu, i pa lavi na vua mauri tui. ⁹ Ale mo ūruhvara ūra sopo maloko mata vai na posposi ūruhvara, matan na pongina tataholo vara ūra sopo maloko, ūra pa lavi na vuana. ¹⁰ Ale, nake matan masapařa, mo ūruhvara ūra vai na hina ūruhvara isana tamlohi tari, ale i pa mele ūruhvara jea vara ūra vaia isan la haratu la rasua.

Isoiso Reti

¹¹ Ha hitevosahia vara na lo uliuli hin leta nike na leta hatehateahi tatavera isamim. ¹² La haratu la lo vaihitea vara la vai kamim ha taiřalihi, la lo vaia mata hinau matelete purongo, la matahu vara tea la pa tipahira matan vujangi sei vara talopeilopei non Křisto hasena, i eři juri na tamlohi. ¹³ Ale la haratu sei la lo vere na taiřalihi, la sopo oloolo tataholo na leu tari. Pani la opoia purongo vara ha taiřalihi matan la pa eři retipohapoha matana, ale la pa verea vara kamim nora tamlohi.

¹⁴ Pani enau, mo sopo te hinau vara a eři mangisi matana, pani talopeilopei non nořa Moli Iesu Křisto purongo. Nona talopeilopei mo vai na masalo varama la mate hiniau, ale mo vaiau na sopo mele ūromřomi na masalo varama. ¹⁵ Mo sopo te hinau hinia vara te tamlohi mo taiřalihi teni i vono. Pani hina aulu enia vara mauri paro sei mo posí na mauri tamlohi. ¹⁶ Na lo usiusi vara ūromopobia non God peresi na nona tamata, la toho isan la haratu la lo usuri mauri nike. Enira natu, Israel vararuhu non God.

¹⁷ Ale mo tapulo nake mo vano, na sopo opoia vara te tamlohi i vai na rani ūrilangi isaku, matan na lavi na matara maja na epeku mo vujangia vara enau tamlohi non Iesu.

¹⁸ La vorai peresi na vevorai, noku usiusi vara ūromřuhu non nořa Moli Iesu Křisto i toho isamim tarea. Amen.

Ephesians

Leta

Paul Mo Ulia Isana Mara Ephesus Leta Nike

‘Ra hasohaso God sei enia Taman Moli Iesu Křisto, matan enia mo leřuhu hiniřa na leřuhu tari matan tuka sei la tai isan Tanumena matan Křisto.’ (1.3). Paul mo tapulo uli na hina aulu hin nona retisohai sei, vara Křisto mo mate na talopeilopei mo vaiřa řa materi řa mai natun God (1.7–8). Ale nake mo lo sakele aulu na tuka na matuan God, mo aulu na hinau tari nake i pa aulu tui tui (1.20–21).

Křisto mo vilijojovi vořa tavera sei mo lo turu na livuhařa sei mo lo vaiřa řa lo meresahi (2.14) mo vaiřa řa mai matea na Tanume Tapu (2.22) usuri na masalon God (3.11).

Moli matalete, Tanume Tapu matalete, God matalete mo aulu na hinau tari (4.4–5). Mo verea mara kalesia la pa hahau na tamata usuri na Tanumen God (4.3).

Ephesus mo lo toho mariviti na pahistaši Asia Minor (nake la tovia Turkey). Hin rani atu enia havati taon tavera hin jara atu na ruhuruuhun Rome. Enia jaran Artemis, god hařai atu tamlohi řořoha la lo lotua ea (Acts 19).

Paul mo vujangia vara na natun God la pa hahau hin mauri paro nike sohena sava (4.17–5.20). Tamlohi usuri non Moli la lo toho na opoia non God, ale la pa usuri na masalona (5.1). La malue na řořoha, la pa hahau na malarani, ale maurira la pa merasahi na tinapua (5.8–9).

Paul mo vujangia vara tamlohi, hařai lahi peresi na natura, ale slev peresi na nora tamlohi tavera la pa hahau sohena na maurira hin Křisto (5.21–6.9).

Paul mo levosahi mamahuni na řomopoia non God:

‘Pani God, na nona řomopoia tavera jea, mo opořa mo tavera jea, mo sořotahiřa peresi Křisto ale mo sileřa na mauri paro, hina purongo vara enřa řa pa lo toho na mate mata nořa lejileji – God mo juri kamim usuri na nona řomřuhu – Matan kamim ka lo juri usuri na nona řomřuhu na rasua, kamim hasemim ka

sopo vaia, enia otori non God isářa.’ (2.4–5, 8)

Hin Leta Nike

1. Retiololo (1.1–2)
2. Otori non Křisto hin Tanume Tapu (1.3–3.21)
3. Mauri paro hin Křisto (4.1–6.20)
4. Isoiso Retiololo (6.21–24)

Retiololo Non Paul Isana Mara Ephesus

¹ Enau Paul, enau vahařule matea non Křisto Iesu usuri na masalon God. Na lo uli leta nike isana tapuhi Ephesus, la haratu la lo turu řilangi hin Křisto Iesu.

² Na lo ususi vara God Tamařa peresi nořa Moli Iesu Křisto la sohai na nora řomřuhu peresi na tamata isamim.

God Mo Leřuhu Hiniřa Hin Křisto

³ Ra hasohaso God sei enia Taman Moli Iesu Křisto, matan enia mo leřuhu hiniřa na leřuhu tari matan tuka sei la tai isan Tanumena matan Křisto. ⁴ Matan God na nona opoia mo vironiřa hin Křisto tiroma moiso mo pa vai na varama, vara řa pa tapu ale řa vokevoke na nahona. ⁵ God mo taua tiroma moiso vara i pa laviřa sohena nona korohi řa mai natuna tatahola hin Iesu Křisto, usuri na nona řomavulahi peresi na masalona.

⁶ Matan haratu, řa hasohaso God matan nona řomřuhu tavera sei mo sureia hiniřa, matan enřa non Natuna sei mo opoia mo tavera jea. ⁷ Křisto mo volituhuřa na řaena, ale God mo řomiřa mata nořa hehe usuri na řuhuřuhu mata nona řomřuhu, ⁸ ale mo surei tavuniřa na nona řomřuhu usuri na nona lelevosahi.

⁹ God mo vaia hin haratu mo vuhesia na jara tavera. Mo vuhesi na nona hina luhu mata masalona usuri na nona řomavulahi sei mo taua hin Křisto, ¹⁰ ale řomřomi tavera atu non God sei mo taua moiso i pa masese na ranina tatahola sei vara Křisto i pa aulu na hinau tari na tuka peresi na varama. ¹¹ Ale God mo vai na hinau tari la masese usuri na masalona, mo taua tiroma moiso vara i pa vironiřa nona vara řa pa vao matea hin Křisto.

¹² Matan vara kamam Jew sei kama lo tau na nomam řomtoho tiroma hin Křisto, God i pa lavi na hasohaso tavera matana. ¹³ Ale kamim sohena, ka sořotahi peresi na vaon Křisto hin rani atu ka rongo na reti mata

varařuhu sei Retiřuhu mata nomim juri. Kamim ka tau na nomim rasua hin Křisto ale ka lo sořotahi peresia, ale matan ka sořotahi peresi Křisto, God mo sile kamim na Tanume Tapu sei mo retitauhi hinia tiroma moiso isana nona tamlohi. God mo vujangia vara ka nona matan mo sile kamim na Tanumena Tapu. ¹⁴ Tanume Tapu sei mo sohena retitauhi matea sei mo vujangia vara God i pa sileřa na hina řuhuřuhu sei mo retitauhi hinira moiso, vavano i tikeli rani atu God i mařivisi na nona vavahinau mata volituhu na nona tamlohi tari, ale matan haratu, řa pa haso-haso nořa God.

Usiusi Mata Lelevosahi Varařuhu

¹⁵ Matan hinau akerihi natu, mo tapulo hin rani atu nara na rongo na nomim rasua hin Moli Iesu peresi na nomim opoia isana tapuhi tari, ¹⁶ na sopo lo isoiso na noku vere meje isan God matamim na rani na lo usiusi vara na řomřomi kamim. ¹⁷ Na lo usiusi vara God non nořa Moli Iesu Křisto sei memerana řuhuřuhu mo tavera jea, vara Tanumena i sile kamim na nona lelevosahi peresi na hitevosahi matan vara ha eři ulua na nomim levosahi hin God, ¹⁸ matan enia mo vai na mapumim mo mařivi na memera, matan vara ha eři hitevosahi na řomtoho řuhuřuhu sei mo tovi kamim matana, ale matan vara ha eři hitevosahia vara nona leřuhu řuhuřuhu sei la řuhuřuhu jea la sohena sava isana nona tamlohi.

¹⁹ Ale na lo usiusi vara ha pa tapulo hitevosahi na tavera suihana řuhuřuhu sei enia nořa, enřa sei řa rasua. Suiha nike enia pa suiha tavera jea atu ²⁰ sei mo sauteterahi Křisto na mateia ale mo sakelelia na jara oloolo tavera na matuan God na tuka aulu hinia, ²¹ God mo tahea mo aulu jea mo jeu la haratu la aulu, teni la haratu la lo tauri na suiha, teni la haratu la lo řilangi, teni la haratu la lo tiroma hin tea, teni na hija tari sei la lo toho, mo sopo hin pongi akerihi purongo pani hin pongi atu mo lo maji sohena. ²² Ale God mo tau na hinau tari na ruhurušu palon Křisto, ale mo vai Křisto sei mo aulu na hinau tari vara i patu nona kalesia tari, ²³ ale nona vao kalesia tari enira epena, ale maurin Křisto natu mo lo mařivisi na hinau tari.

2

Mauri Paro Hin Křisto

¹ Tiroma ka mate mata nomim lejileji peresi na hehe sei ² ka lo toho hinira usuri na malelen varama nike nake, usuri na masalon Setan, enia supe rihirihi řilangi atu sei mo aulu na masapa, natu mo lo voko na mapun la haratu sei la řohu vara la oloolo hin God. ³ Enřa řa sohera tiroma, řa lo hahau usuri na masalořa, ale řa loloso na masalořa sei mata epera peresi na řomiřa, ale řa vora řa natu talai lolokoru non God mata hehe sohena tamlohi tari tinapua.

⁴ Pani God, na nona řomopoia tavera jea, mo opořa mo tavera jea, ⁵ mo sořotahiřa peresi Křisto ale mo sileřa na mauri paro, hina purongo vara enřa řa pa lo toho na mate mata nořa lejileji – God mo juri kamim usuri na nona řomřuhu. ⁶ Matan God mo sauteterahi na mateia peresi Křisto, ale mo sakelehiřa peresia na tuka matan enřa řa matea peresi Křisto Iesu, ⁷ mo vaia matan vara hin la pongi sei la pa mai, i pa vujangia vara nona řomřuhu mo tavera jea sohena sava isařa usuri na nona řomřuhu tari hiniřa hin Křisto Iesu.

⁸ Matan kamim ka lo juri usuri na nona řomřuhu na rasua, kamim hasemim ka sopo vaia, God sei mo sile purongoi otori nike isařa; ⁹ mo sopo juri kamim mata nomim vavahinau, mo vono matan vara tea i sopo eři mangisi matana. ¹⁰ Matan enřa vavahinau non God, mo vaiřa řa mai hina paro matea hin Křisto Iesu matan vara řa pa vai na vavahinau řuhu sei God mo tatamahunira tiroma moiso matan vara řa pa hahau hinira.

Enřa Ra Matea Hin Křisto

¹¹ Matan haratu, na opoia vara kamim sei ka vora tamlohi řořoha, ha to řomřomia sohena sava ka lo toho tiroma, ale Jew la lo verea vara kamim ka sopo tatuara matan ka sopo taiřalihi sohera, hinau sei tamlohi la lo vaia na epera purongo pani mo sopo tueni na mapura, ¹² ale ha sopo řomaliho vara hin la rani atu ka lo toho pani mo sopo te nomim Křisto, ka lo toho ka sopo tatuva vao tavytavuun Israel, ale ka vinano na nora retitauhi mata leřuhu non God, ale mo sopo te

nomim ūromtoho, ka lo toho na varama pani ka sopo levosahi God. ¹³ Pani nake hin Křisto Iesu, kamim sei tiroma ka lo toho assau ūrove isan God, God mo lavi kamim ka mai mariviti isana na ūraen Křisto Iesu. ¹⁴ Matan Křisto natu, mo tau na tamata isamam Jew peresi kamim tamlohi ūrořoha, mo vaiřa ūra mai vao matea. Nona mateia mo vilijojovi vořa tavera mata hitesatihī na tinapua sei mo lo turu na livuhařa, ale mo lo vaiřa ūra lo meresahi, ¹⁵ na nona mateia mo vai na leu tari nona Jew la isoiso. Mo vaia matan vara i vai na vao tamlohi paro matea i malue hin la haratu mo rua mata nona sari tamata, ¹⁶ ale Křisto mo vaira la epe matea, mo sořotahira jara matea isan God na nona mateia, ale hinia, mo vilimatei na nořa hitesatisatihiřa. ¹⁷ Ale mo mai ale mo retivujavujangi na tamata isamim sei tiroma ka lo toho assau ūrove hin God, ale tamata isan la haratu la lo toho mariviti, ¹⁸ matan vara hin Křisto enřa tolu ūra pa eři mai isan God Tama na Tanumena sei mo matelete purongo.

Ra Mai Iman God Paro

¹⁹ Ale nake ka sopo mele vinano teni tamlohi mata jara tinapua. Pani ka tamlohi hin jara atu tolu na nona tapuhi, ka tamlohi lolo iman God. ²⁰ Enřa ūra imana, ūra lo turu na pulon ima sei God mo vaia na nona vaharule peresi na přovet matan nake, ale Křisto Iesu natu enia pulo vatu matan ima atu. ²¹ Hinia, ima tari la lo sořotahi mamahu mo ūruhu, la ulua la mai temple tapu matea hin Moli sei ²² kamim sohena, God mo lo voro kamim ka mai jara matea vara ha mai jara toho matea non Tanumen God.

3

Romřomi Luhu Non God

¹ Matan ūromřuhu non God sei natu, enau Paul na lo toho na ima ūrilangi matan noku vavahinai non Křisto Iesu matamim la tamlohi ūrořoha. ² Na levosahia vara ka levosahia moiso sohena sava God mo sileau hin vavahinai ūruhu nike mata vereuli na sava hinai ūruhu mo vaia mata juri kamim. ³ Sohena na ulia makomona tiroma moiso hin leta nike vara God hasena mo vuhesi na nona ūromřomi luhu isaku moiso. ⁴ Vara ha lo evia, ha pa eři hitevosahia na sava na levosahia moiso hin hina luhu atu hin

Křisto. ⁵ Hina luhu nike, God mo sopo vuhesi isan te pina tamlohi na varama tuai sohena Tanumena mo vuhesia nake isana nona vaharule tapu peresi na přovet.

⁶ Hina luhu atu enia harihi: enia vara tamlohi ūrořoha tolu na Jew tari enira la pa lavi na hina ūruhu ūruhu sei God i pa silea isana natuna. Enira tupra rua la pa juri matan la rasu na Retřuhu, ale la sopesope tavalu epe matea purongo, ale enira tupra rua la pa lavi na vua retitauhi hin Křisto Iesu. ⁷ Enau na mai volitusi matea non Retřuhu nike usuri na otori ūruhu ūruhu mata ūromřuhu non God sei mo silea isaku usuri na nona vavahinai na suihana.

⁸ Hina purongo vara enau na atano jea na tapuhi non God, enia mo ūromřuhu isaku vara a pa retivujavujangi na ūruhu ūruhu Křisto isana tamlohi ūrořoha na sava tea i sopo eři levosahi te hinau matana, ⁹ ale vara a vai na tamlohi tari la memera na ūromřomi luhu non God sei mo vai na hinau tari sei mo jarohia tuai moiso.

¹⁰ Romřomi tavera non God enia mata vujangi na nona lelevosahi na malele tinatinapua tari na lima nona tamlohi isana vui varama sei la lo aulu peresi la haratu la lo tauri na suihai na masapa peresi na tuka. ¹¹ Haratu natu mo usuri na nona ūromřomi sei mo taua matan tuai tiroma moiso vara Křisto Iesu nořa Moli i pa vai mařivisia.

¹² Matan hin Křisto ūra eři turu ūrilangi, ale enia mo vaiřa ūra eři ūromřilangi na nořa rasua ūra sopo matahu vara ūra mai na nahon God. ¹³ Matan haratu, na lo usi kamim vara mapumim la sopo jovi mata noku rani ūrilangi matamim, ha lavia sohena hina ūruhu matea isamim.

Usiusi Non Paul

¹⁴ Matan hinau nike, na lo papaohi atano na nahon God Tama, ¹⁵ enia haratu sei mo tau na hija vao tari na tuka peresi na varama. ¹⁶ Na lo usiusi vara God na nona leřuhu ūruhu ūruhu matuvana, i tinařihia vara i vai na lolomim la suihai hin suihai atu Tanume Tapu mo lo silea.

¹⁷ Na lo usiusi vara Křisto i pa toho na lolo mapumim na nomim rasua, na lo usiusi vara na nomim wariha i ūrilangi na opoia ūruhu ūruhu non God, ¹⁸ na lo usiusi vara ha pa eři hitevosahia peresi na tapuhi tari vara nona opoia mo tavera sohena sava,

mo peravu sohena sava, mo aulu sohena sava, ale mo puaha sohena sava, ¹⁹ ale matana, na lo usiusi vara ēri levosahi na opoia non Křisto sei mo jeu na lelevosahi, matan vara ha pa mařivi savulevule na mauri peresi na suiha tari sei la lo tai isan God.

²⁰ Na lo usiusi isan God sei suihana tavera jea mo lo voko hiniřa sei i ēri vai na hinau la jeu na sava řa lo usia teni řa lo řomřomia, ²¹ vara i lavi hasohaso tavera na vao kalesia tari, ale hin Křisto Iesu na rani tari, tui tui, amen.

4

Enřa Epe Matea Hin Křisto

¹ Matan haratu, enau prisoner matea non Moli, na lo usia řilangi vara ha hahau na malele mo tataholo na nahon God usuri mauri atu mo tovi kamim matana. ² Ha řomatano, ha řuhu isana tinapua, ha řomperavu isamim hatehateahi, na opoia ha řomřomi purongo na hinau sei tinapua la jovi hinira. ³ Tanume Tapu mo sořotahi kamim moiso, ale ha hahau na tamata matan vara ha pa matea.

⁴ Enřa mo isoiso řa epe matea, ale enřa mo isoiso řa lavi na Tanume Tapu matelete purongo, ale enřa mo isoiso God mo toviřa matan mauri řuhuřuhu atu na rani mo lo mai. ⁵ Moli enia matelete purongo, rasua matea, paptijo matea, ⁶ ale God matelete purongo, enia Tamařa sei enia mo aulu hiniřa mo isoiso, ale mo lo toho hiniřa mo isoiso, ale mo lo vavahinau hiniřa mo isoiso.

⁷ Pani Křisto mo sileřa hatehateahi na vavahinau řuhu usuri na masalona řuhuřuhu. ⁸ Matan Retitapu mo verea tuai moiso vara,

'Rani atu mo sahe aulu na tuka,

mo tiroma na vao matea mo terira,
ale mo sile na otori isana nona tamlohi.'

Psa

68.18

⁹ Reti sei 'mo sahe aulu' mo lo řarami na sava? Mo řaramia vara enia mo sivo na lolo varama tiroma. ¹⁰ Haratu sei mo lo sivo atano na lolo varama enia haratu sei mo sahe aulu vara i aulu na hinau tari na tuka.

¹¹ Enia haratu sei mo sile na tamlohi hai isana vao kalesia sohena vahařule, hai sohena přovet, hai la evangelist, hai la

tavui kalesia, ale hai la tamlohi vujangi. ¹² Nora vavahinau enia matan vara la pa ēri vujangi mamahuni na tapuhi, matan vara la ēri vai na vavahinau non God, ale enia vara la vai na epen Křisto sei enřa kalesia tari, la ulua i řilangi, ¹³ vavano i tikeli na rani enřa mo isoiso řa matea na rasua peresi na lelevosahi hin Natun God. Ale řa mai tamlohi jea na řomřomi, ale řa ulua řa sohen Křisto vevuhi.

¹⁴ Moiso řa pa sopo mele sohena natuvarihi sei tarea řomira la sopo levosahi mamahuni na sava la lo rasua. Ale la řomkaka matan tea mo vere te hinau tinapua isara teni te reti nona tamlohi vujangi haluhalu sei mo vai halu atu la rongoa sohena retivarařuhu matea isara.

¹⁵ Ra pa sopo sohera pani řa lo taurilati na retivarařuhu na opoia, ale na hinau tari řa pa ulua hin Křisto sei enia patu epena. ¹⁶ Epena tari la lo ulua na limanā purongo, la lo sořotahi mo řuhu matan manmanina tari la lo taurilatirā jara matea. Vara kalesia hatehateahi la vai na řungara vavahinau, pa epena mo ulua na opoia.

Mauri Paro Hin Křisto

¹⁷ Ale na lo verea řilangi isamim na hijan Moli vara ha sopo mele hahau sohena tamlohi řořoha sei nora řomřomi mo rongorongo vono. ¹⁸ Nora řomřomi řořoha, mo lo toho asau ſove na maurin God matan mapura mo řilangi ale mo horora vara la sopo ēri lelevosahi. ¹⁹ Matan la sopo ēri mele mahanuhanu hin te nora hehe, la pute na nora mauri maji, ale la lo řomřomjea vara la vai na posposi lumiha sasati tari.

²⁰ Pani hin rani atu ka tau na nomim rasua hin Křisto, la sopo vujangia vara ha mauri sohena, ²¹ na levosahia mo řuhu vara ka pete rongo te hinau matana moiso, ale ka sořotahi peresi Iesu usuri na retivarařuhu sei la vujangia isamim moiso.

²² La vujangia isamim tiroma moiso vara ha tau nařihi na nomim mauri tuai mata hehe sei la posposi lumiha sasati sei mata halu la vaia mo lo ranga jea, ²³ ale ha tinařiřia vara Tanumen God i posí na řomimim peresi na nomim kilakilau la paro. ²⁴ La vujangia isamim vara ha ru na mauri paro sei God mo vaia usuri na

masalona, mo tataholo, mo tapu ale mo varauhu.

²⁵ Matan haratu, ha isoiso na halu sohen p̄ovet matea mo verea mara, ‘kamim hatehateahi ha retireti tataholo isana tahisamim’ *Zec 8.16* matan en̄a ūra nōa hatehateahi. ²⁶ ‘Vara ka lolokoru, ha sopo hehe!’

Psa 4.4 Ha sopo tinařihia vara pulo nomim lolokoru i aulu hin kamim i peravu, ²⁷ vara i vono, ha pa sile na masapa isan Tiapolo vara i aulu hin kamim.

²⁸ Vara engko tamlohi vavanaho matea, o isoiso na vavanaho. O tapulo hani na masumasum, ale o hansohai isan la haratu la vejuveju. ²⁹ Ha sopo tinařihia vara te reti sasati hatea i malue na jingomim, pani ha pa lo vere na reti ūruhu purongo matan vara la eři tueni la haratu la lo rongora.

³⁰ Ale ha sopo vai na Tanume Tapu non God i rongo i sati na sava ka lo vaia, matan enia natu mo tapuhi kamim moiso matan rani atu God i pa juri kamim hinia.

³¹ Ha pulahi nařihi na nomim posposi hohona, lolokoru sati, lolokoru, ngaruhi na tinapua, retiřeřesi na tinapua, ale ha pulahi nařihi na posposi sasati tari la sopo toho na maurimim.

³² Pani ha vai na posposi ūruhu isamim hatehateahi, ha ūromopoi, ha ūromi kamim hatehateahi sohen God hin Křisto mo ūromi kamim.

5

Ha Hahau Na Malarani

¹ Matan haratu, ha usuri na tovongi non God na hinau tari ka lo vaira sohena natuna tataholo sei mo opoira mo tavera jea, ² ale ha toho na opoia sohen Křisto mo opořa sei mo sile na maurina matařa sohena malamalai matea asuna mo ponaha mo ūruhu isan God.

³ Ha sopo tinařihia vara te mauri maji teni te ūromřomi lumiha, teni te hanmarua i toho isamim. Matan la hinau nike la sopo eři toho isana tapuhi non God. ⁴ Ha sopo vere na hina lumiha teni retireti rongorongo vono, teni sorahi sati na hařai teni tamlohi – la hinau tari sei enira la sopo tataholo isamim. Pani na jarara, ha vere meje isan God. ⁵ Matan ha levosahi mamahunia vara haratu mo lo vai na mauri maji, teni ūromina mo lumiha, teni

mo hanmarua matan tamlohi hanmarua matea enia tamlohi lotulotu vono matea, i pa sopo eři unu hin mauri atu Křisto enia God la supe hinia. ⁶ Ha sopo tinařihia vara tea i halu kamim i verea vara sava na lo verea akerihi la retireti purongo, matan talai lolokoru non God mata hehe i pa jovi isana tamlohi lejileji tari. ⁷ Ha sopo vai la hinau sei la lo vaira, ⁸ matan na pongi matea kamim ka lo toho na ūrořoha, pani nake kamim ka lo toho na malarani matan Moli. Ha hahau sohena natu malarani, ⁹ matan vua malarani enia mo vai na hina ūruhu tari sei la tataholo ale la varauhu la pala.

¹⁰ Ha vahitea vara ha levosahi na sava God mo avulahi hinia. ¹¹ Ha sopo ūrotahi peresi tea mata vai na hina sasati mata ūrořoha, pani na jarara ha vai na tamlohi la levosahia vara la hinau atu la sati. ¹² Matan enia hina mahanuhanu matea vara ha lo eři sorahi na hinau tamlohi lejileji la lo vai luhu hinira. ¹³ Pani hinau tari, malarani mo merasahira la mera mo ūruhu vara la sasati sohena sava. ¹⁴ Matan hinau tari sei la pala na jara tavera malarani mo vaira la memera, ale Retitapu mo verea vara,
‘O turu o kilau na nom ūrommate!

O turu na mateia,
ale Křisto i pa merasahiro,
ale ha pa lelevosahi.’

Isa 26.19; 51.17; 52.1; 60.1

Ha Mauri Na Suihan Tanume Tapu

¹⁵ Matan haratu, ha lo kilau mamahunia vara ka lo hahau sohena sava, i sopo sohena tamlohi rongorongo vono pani sohena tamlohi lelevosahi. ¹⁶ Ha sopo toho purongo pani ha vai na hina ūruhu matan la rani nike hehe mo mařivi hinira. ¹⁷ Matan haratu ha sopo rongorongo vono, pani ha tamlohi lelevosahi mata levosahi na masalon Moli. ¹⁸ Ale ha sopo drong na wai ūrilangi sei i pa komo na maurimim, pani ha tinařihi na Tanumen God i mařivisi kamim, ¹⁹ ale ha lalavete na psalm, na hymn peresi na vete Tanume Tapu mo silera, ale ha sohai na vete sei la lo toho na mapumim la sahe isan God. ²⁰ Tarea ha vere meje isan God Tama matamim hatehateahi na hijan nořa Moli, Iesu Křisto.

Reti Mata Lahi Nona Kalesia

²¹ A mele verea vara ha ooloolo hin kamim hatehateahi matan ka lo lotu Křisto na ooloolo. ²² Kamim hařai lahi, ha ooloolo na tuamim sohena ka lo ooloolo hin Moli. ²³ Matan tamlohi lahi matea enia patun narouna, mo sohen Křisto enia patu epena sei vao kalesia tari, enia hasena mo sile na maurina vara i jurira. ²⁴ Sohena vao kalesia tari la lo ooloolo hin Křisto, ale kamim hařai lahi sohena ha pa ooloolo na tuamim na hinau tari.

Tamlohi Lahi La Sohen Křisto

²⁵ Tamlohi lahi ha opoi na naroumim sohen Křisto mo opoi na nona vao kalesia ale mo hase sile na maurina matana, ²⁶ matan vara i tapuhia ale Tanumena mo vaia mo vokevoke na paptijo peresi na nona reti. ²⁷ Mo vaia matan vara i tatamahuni na vao kalesia vara i nona hasena sei mo řuhuřuhu jea, mo sopo te hina lumiha hinia, teni te hehe teni te hina sasati tina-pua hatea, pani mo tapu mo sopo te hinau vara tea i eři tuvaia hinia. ²⁸ Mo sohen purongo, tamlohi lahi la pa opoi na naroura sohen la lo opoi na epera hasera. Matan tamlohi lahi sei mo lo opoi narouna, mo lo hasena opoia. ²⁹ Matan tea mo sopo hasena řohu na epena, pani mo vahania na nona reti ale mo kilau mamahunia, sohen Křisto mo lo vaia isana vao kalesia. ³⁰ Ale enřa řa sopesope epena. ³¹ Sohena Retitapu mo verea vara, ‘Matan hinau atu, tamlohi matea i pa tinařihi tamana enia tinana, ale i sořotahi isan narouna, ale enira tupra rua la mai matea’. *Gen 2.24*

³² Hinau nike enia vujangi puhoni matea, matan enia mo lo vujangia sohena sava Křisto mo lo sořotahi isana vao kalesia, ale la matea. ³³ Matana, a mele verea vara tamlohi hatehateahi i pa opoi narouna sohen mo lo hase opoia, ale narouna i pa sile na ooloolo isan tuana.

6

Reti Mata Natuvarihi Peresi Na Tamara

¹ Natuvarihi tari, ha ooloolo na tamamim peresi na tinamim, matan enia mo tata-holo. ² ‘Ha ooloolo hin tamamim peresi na tinamim’ — matan harihi enia tiroma leu sei retitauhi matea mo lo toho hinia, ³ ale sopena mo lo verea mara vara ha ooloolo

hinira — ‘maurim i pa peravu, ale i pa mařivi na leřuhu’. *Deut 5.16*

⁴ Tama, ha sopo vaivai na natumim vara la lolokoru, pani ha vaira la ulua na ooloolo peresi na vujangi hin Moli.

Reti Mata Slev Peresi Na Nora Tamlohi Tavera

⁵ Kamim slev, hin mauri nike ha tatamahu tarea vara ha ooloolo na nomim tamlohi tavera, ha lo ooloolo hinira na mapumim tari mo sopo te halu hinia, sohen ka lo vaia isan Křisto. ⁶ Ha sopo sohen la haratu sei la lo voko matan tamlohi la lo kilaura — sohen la haratu la opoia vara tamlohi la pa avulahi hinira purongo — pani ha sohena slev non Křisto sei la lo vai na masalon God na mapura, ⁷ ale ha avulahi hinia ha vaia sohen ka lo volitusi isan Moli mo sopo isana tamlohi. ⁸ Kamim ha lo levosahia vara Moli i pa sile na voliřa hatehateahi usuri na hina řuhu řa lo vaira, hina purongo vara enřa řa materi teni řa lo slev.

⁹ Ale usuri posposi nike, kamim tamlohi tavera ha pa vaia isana nomim slev sohen, ha isoiso na nomim reti řilangi isara matan ha lo levosahia vara kamim rua nomim tamlohi tavera matea purongo na tuka, ale enia mo sopo tametame tea.

Ruru Mata Vuro Non God

¹⁰ Isoiso noku reti nahai: ha řilařilangi hin Moli na řilangi nona suihana. ¹¹ Ha ru na ruru mata vuro tari non God matan vara ha eři turu řilangi mata turuhoro na vavahinau non Tiapolo sei la lo mai la lo haluhalu na tamlohi na malele matuvana. ¹² Matan nořa vuro mo sopo peresi na tamlohi sei řa eři hitera, pani peresi na angelo sasati sei la aulu, peresi la haratu la řilangi, peresi la haratu sei la aulu na řořoha hin varama nike, peresi na suiha vui sasati na masapa.

¹³ Matan haratu, ha ru na ruru vuro tari non God matan vara ha eři turu na jaramim hin rani sasati nike, ale ha vai na hinau tari ha eři vaira, ale ha turu řilangi. ¹⁴ Ha turu řilangi ha sopo juha, ha ototi na oti mata retivarařuhu, ale ha ru na řumamim na ruru vuro mata posposi tataholo non God. ¹⁵ Ale sohena nomim sabat mata palomim, ha ru na Retiřuhu sei mo lo sile na tamata matan vara ha pa tatamahu tarea mata ha hahau peresia.

¹⁶ Ha tauri ūilangi na nomim rasua sohena tingting matea sei i eři tinghoro na evine hani non Tiapolo. ¹⁷ Ha ru na hati vuro mata juri sei mo lo matahi na maurimim, ale ha taurilati na sita vuro non Tanume Tapu sei enia reti non God. ¹⁸ Ha usiusi ale ha usi God vara i tueni kamim tarea. Tarea ha usiusi usuri na Tanumen God, ale matana, tarea ha lo kilau i ūahu, ale ha tau na ūomim mata usiusi mata tapuhi tari non God.

¹⁹ Ha usiusi matakū matan vara God i pa sileau na retisohai sei mo opoia vara a verea, ale vara a sopo matahu mata vere mamahuni na hina luhu mata Retiūhu i memera i ūahu vara enia mata tamlohi tari. ²⁰ Enau na lo toho na jen nakerihi matan na lo retivujavujangi retisohai nike sohen God mo ūruleau matana.

Isoiso Reti Non Paul

²¹ Tychicus, vorai ūahu ūahu sei mo lo turu ūilangi mata volutisi na vavahinau non Moli, enia i pa vere kamim na hinau tari vara ha levosahira, matan ha pa levosahia vara na lo toho sohena sava. ²² Na lo ūrulea mai isamim matan haratu natu, vara ha pa eři levosahia vara kamam kama lo toho sohena sava nike, ale vara i eři retituetueni na mapumim.

²³ Noku usiusi vara tamata, opoia peresi na rasua la tai isan God Tama peresi Moli Iesu Křisto, la pa toho isamim la vorai peresi na vevorai. ²⁴ Na lo usiusi vara ūomruhu non God i pa toho isan la haratu sei la opoi nořa Moli Iesu Křisto na opoia sei mo sopo te isoisona.

**Leta
Paul Mo Ulia Isana Mara
Philippi
Leta Nike**

Paul mo uli leta nike na ima ūilangi (1.7) vara i vere meje isana kalesia Philippi mata nora otori peresi nora usiusi matana (1.5; 4.10–19). Mo lo kilau toho vara i pa materi matan vara i eři mele retivujavujangi na Retiřuhu (3.17–19). Pani mo levosahia vara korong la pa vilimateia hin ima ūilangi atu (1.21; 2.17; 3.10).

Philippi mo lo toho auta Greece hin jara atu la tovia Macedonia. Paul mo tapulo na vao kalesia atu Philippi usuri na nona retivujavujangi ea (Acts 16). Ale mo retiřoařoahaira vara la pa lavi na rani ūilangi sohen Paul mo lo lavia moiso. Pani mo verea isara mara vara i sohena, leřuhu non God i pa toho isara matana (1.28–30).

Paul mo verea isara mara la pa lo kilau matan la tamlohi atu la lo posa na vujangi tatahola non Křisto (3.2–11). Paul mo avulahi tavera, hina purongo mo lo toho na ima ūilangi matan Křisto. Paul mo verea mara la pa hahau jara matea (2.2; 4.2–3) ale vara la pa usuri na ūomřomi non Křisto Iesu sohen harihi:

‘Romimim i pa sohena ūomin Křisto Iesu,
hina purongo vara tiroma enia God
tatahola,
enia mo sopo ūomřomia vara i taurilati
řomřomi atu vara enia God,
pani mo hasena taua sivo atano
mo mai sohena volitusi matea tatahola,
ale mo vora mo mai mo sohena tam-
lohi purongo,
ale mo hasena taua sivo atano,
ale mo ololo mo kakau na nona
mateia,
mateia atu enia mateia sasati
mata talai na talopeilopei matea.’ (2.6–
8)

Hin Leta Nike

1. Retiololo (1.1–11)
2. Maurin Paul (1.12–30)
3. Maurin Iesu (2.1–18)
4. Retisohai Hin Te Tapalan Paul (2.19–30)
5. God Mo Laviřa (3.1–4.9)
6. Paul Mo Vere Meje Isara (4.10–20)

7. Isoiso Reti (4.21–23)

¹ Enau Paul peresi Timothy, kamam kama slev non Křisto Iesu, kama uli leta nike isana tamlohi viřoni non God hin Křisto Iesu la lo toho Philippi, peresi la haratu la lo tiroma na tamlohi peresi la haratu la lo deacon ea. ² Romřuhu peresi na tamata non God Tamařa peresi Moli Iesu Křisto i pa toho isamim.

Usiusi Non Paul

³ Vara na lo ūomřomi kamim, tarea na lo vere meje isan God matamim. ⁴ Ale na rani na lo usiusi matamim sohena, na lo usiusi na noku ūomavulahi, ⁵ matan kamim ka tapala na vavahinau mata Retiřuhu, mo tapulo na tiroma rani mo tikeli nake, ⁶ Na levosahia mo ūruhu vara haratu mo lo tapulo na vavahinau ūruhu na maurimim, i pa lo vaia i tikeli rani atu Iesu i mele mai, ale i pa mai na isoisona.

⁷ Mo tatahola vara a ūomřomia sohena matamim matan noku opoia matamim mo tavera jea, hina purongo vara na lo toho nike na ima ūilangi teni vara a lo matahi na Retiřuhu sei ka lavia, teni vara a lo vujangia vara enia mo retivarařuhu, ale mata ūomřuhu non God, enřa mo isoiso ūra tapala matana. ⁸ God mo levosahia vara na lo opoi kamim, mo tatahola na opoia non Křisto Iesu isamim. ⁹ ale harihi enia noku usiusi: vara nomim opoia i pa lo ulua i tavera tarea, na lo usiusi vara ha ulua na nomim levosahi ūruhu tari peresi na rongovosahi na hinau mo vararuhu, ¹⁰ matan vara ha pa eři rongovosahi na sava natu, mo tatahola vara ha vaia, ale matan haratu, ha pa eři toho vokevoke i pa sopo tea i tuvai kamim i tikeli rani atu Křisto i mele mai, ¹¹ ale ha pa marivi na vua mata mauri tatahola sei mo tai isan Iesu Křisto, i pa vai na tamlohi la tahe na hijana, ale la pa sile na hasohaso isan God.

Retivujavujangi Hin Křisto

¹² Ale la vorai peresi na vevorai, na opoia vara ha pa levosahia vara sava rani ūilangi mo mai isaku nike, mo mai matan vara tamlohi matuvana la eři rasu na Retiřuhu. ¹³ Ale matan haratu, tamlohi vuro tari non Supen Rome sei la lo kilauau nike, peresi na tamlohi tari la levosahia vara enau na lo toho na ima ūilangi matan Křisto. ¹⁴ Matan

na lo toho na ima ūilangi nike, Moli mo vai na ūomūromi nona vorai kalesia nike la ūomūilangi vara la pa vereuli na Reti non God la sopo matahu matana.

¹⁵ Varaūruhi tamlohi hai la lo retivujavujangi hin Kristo na nora mereimerei, na nora ūomaulu, pani hai la lo vaia na posposi tataholo. ¹⁶ La haratu hitahu, la lo vaia na nora opoia matan la levosahia vara enau na lo toho na ima ūilangi matan na lo matahi na Retiūruhi. ¹⁷ La haratu tiroma la lo retivujavujangi hin Kristo na ūomaulu, ūomira la sopo tataholo, la lo ūomtau vara la pa mele vai na noku rongohaji i mele tavera nike na ima ūilangi matana. ¹⁸ Pani mo sopo te hinau hinia. Hinau aulu hinia, enia vara tamlohi la retivujavujangi Kristo, hina purongo vara la lo vaia na nora tapnetano teni la varaūruhi. Matan haratu na avulahi, ale a pa lo avulahi, ¹⁹ matan na levosahia vara nomim usiusi peresi na tuetueni sei Tanumen Iesu Kristo mo silea, sava mo masese isaku, isoisona God i pa juriau.

Paul Mo Mauri Matan Iesu

²⁰ Na levosahia mo ūruhi, ale na lo ūomtoho vara a pa sopo vai te hinau vara i eři vaiau a mahantuhanu matana, pani na noku ūomūilangi nake sohena tarea, a pa lo sile na ooloolo isan Kristo na hinau tari na lo vaira, vara a mauri teni a mate. ²¹ Matan isaku, mauri enia matan Kristo, ale mate, i pa mele ūruhi. ²² Vara a lo mauri hin epe nike, enia masapa vara noku vavahinau ūruhi la pa vuaha. Pani na sopo levosahia vara sahara mo mele ūruhi, ²³ ūomiku mo opoira enira rua. Na opoia vara a malue a toho peresi Kristo matan haratu mo ūruhi jea, ²⁴ pani i pa mele ūruhi jea isamim vara a lo mauri.

²⁵ Matan na levosahia mo ūruhi vara a lo mauri, a eři tueni kamim mo isoiso, ale ha pa ulua na avulahi na nomim rasua, ²⁶ matan vara ha pa hasohaso Kristo Iesu mata mo tinařihia vara a mele toho peresi kamim.

Ra Pa Tamlohin Tuka

²⁷ Hinau aulu enia harihi: vara ha hahau na malele mo tataholo na Retiūruhi non Kristo, matan vara a mai a hite kamim teni vara a rongo te sorasorahimim, a pa levosahia vara kaloturu ūilangi jara matea

sohena tamlohi matelete, mata matahi na sava Retiūruhi mo vujangia, ²⁸ ale ha sopo matahuni la haratu sei la nomim mere-sahi, matan nomim rasua enia i pa mata-mata mera matea isara mata vujangira vara maurira la pa sopo juri, pani kamim ha pa juri, harihi God i pa vaia. ²⁹ Matan God mo taua vara ha pa sopo rasu Kristo purongo, pani vara ha pa lavi na rani ūilangi matan Kristo, ³⁰ matan na levosahia vara ka lo lavi na rani ūilangi sohen ka hitea isaku hin rani atu na lo toho peresi kamim, ale nakerihi sohena na lo lavia na ima ūilangi.

2

Tarea Ra Pa Usuri Na Posin Kristo

¹ Matan ka lo sořotahi hin Kristo, vara te nomim retituetueni, teni ka nanau matan nona opoia mo lo toho isamim, teni ka tapala peresi na Tanumena, teni te opoia na mapumim teni te ūomoporia, ² ha mařivisi na noku avulahi sohen harihi: ūomimim i matea, ha opoipoji kamim, mapumim peresi na ūomimim i matea na sava ha pa vaia, ³ ha sopo vai te hinau matan ka opoia vara ha pa jeu na tinapua, teni ha vai na hinau na ūomaulu, pani na posposi ūomatano, ha ūomūromi na tinapua i jeu kamim. ⁴ Kamim hatehateahi, ha sopo ūomūromi kamim hasemim purongo, pani na hinau i pa ūruhi isana tinapua. ⁵ Romimim i pa sohena ūomin Kristo Iesu, ⁶ hina purongo vara tiroma enia God tataholo, enia mo sopo ūomūromia vara i taurilati ūomūromi atu vara enia God, ⁷ pani mo hasena taua sivo atano mo mai sohena volitusi matea tataholo, ale mo vora mo mai mo sohena tamlohi purongo, ⁸ ale mo hasena taua sivo atano, ale mo ooloolo mo kakau na nona mateia, mateia atu enia mateia sasati mata talai na talopeilopei matea. ⁹ Matan haratu, God mo tahea hin jara atu mata lavi na ooloolo tavera jea, mo silea hin hija atu mo aulu jea mo jeu na hija tari, ¹⁰ matan vara na hijan Iesu, tamlohi tari la pa papaohi, la haratu la lo toho na tuka, na varama peresi na jarana haratu la mate na lolo varama, ¹¹ ale meme tari la pa taviti vara Iesu Kristo enia Moli, hasohaso tari i pa sahe isan God Tamařa matana.

Kamim Ka Malarani Na Varama

¹² Matana, la tapalaku ūhuūhu hin rani atu na lo toho peresi kamim ka lo oloolo tarea, ale nake, matan na sopo toho peresi kamim, i pa mele ūhu vara ha lo kilau mamahu vara ha vai na vavahinau nona tamlohi sei God mo jurira na posposi matahu peresi na savarvara, ¹³ matan God hasena sei mo lo vavahinau hin kamim, mo vai kamim vara ha avulahi vara ha vavahinau i usuri na sava mo opoia.

¹⁴ Na vavahinau tari ka lo vaira, ha sopo ngutungutu teni ha vasvas, ¹⁵ matan vara i pa sopo te hinau vara tamlohi tinapua la eři tuvai kamim hinia. Ha toho na mauri vokevoke, i sohena natun God na livuhan pina haluhalu sei mo hehe, ale kamim ka lo mera sohena majou na varama. ¹⁶ Ha taurilati reti atu mo sile na mauri, matan vara a pa eři retihapahapa hin pongi atu non Křisto, vara noku vavahinau isamim la sopo vano hina purongo, ¹⁷ pani hina purongo vara mauriku i sohena wai malamalai matea, ale i vano peresi na nomim rasua isan God, enau na avulahi vara a silea vara enřa tolu ūra pa avulahi jara matea. ¹⁸ Ale mo ūhu vara ha avulahi matana sohena, ale ha avulahi peresiau.

Paul I Pa Rule Timothy Isara

¹⁹ Na lo ūmotoho vara a pa ūrule Timothy i vano isamim i pa sopo tuai, vara Moli Iesu i tinařihia, matan vara enau sohena a pa rongo i ūhu vara a rongo te sorasorahimim. ²⁰ Matan mo sopo tea nika, ūmina i tavera matamim sohen Timothy, matan enia mo opoia vara ha lo toho i ūhu. ²¹ Matan tamlohi tinapua mo isoiso la lo ale na masalora purongo, mo sopo masalon Iesu Křisto. ²² Pani kamim ka levosahi mamahuni na posposi ūhu non Timothy moiso, matan enia mo lo tueniau sohen natuku matea tataholo na vavahinau mata Retiřhu. ²³ Matana, na lo ūmotoho vara a pa ūrulea nohorihu, pani a pa hitea vara i pa sohena sava isaku tako. ²⁴ Ale hin Moli, na levosahia mo ūhu vara i sopo tuai enau sohena a pa mai.

Paul Mo Rule Epaphroditus

* ^{3:2:} viriu: Paul mo lo vere vara Jew enira viriu, enira haratu sei la ūlangi vara la tairalihi na tamlohi.

²⁵ Pani na lo ūromromia vara a pa mele ūrule Epaphroditus vano isamim. Enia voraiku, tapalaku na vavahinau, ale tapala tamlohi vuro matea mata rasua, ale nomim vahařule, haratu ka lo ūrulea isaku vara i tueniau nike. ²⁶ Matan enia mo opoia vara i mele hite kamim, ale mo rongo mo sati matan ka rongoa vara enia mo rojo, ²⁷ vara ūhu enia mo rojo, mariviti vara i mate, pani God mo ūromopoia, mo sopo isana hasena, pani enau sohena, mo sopo opoia vara i vaiau a rongo i sati aulu na noku rongo sati. ²⁸ Matan haratu, na avulahi vara a mele ūrulea vano isamim, matan vara ha pa avulahi vara ha mele hitea, ale enau ūromiku i sopo mele kaka hajavua hinia. ²⁹ Ale, ha mele lavia mai isamim na hijan Moli na avulahi tavera. Ale mo tataholo vara ha sile na oloolo isana tamlohi sohena, ³⁰ matan mariviti i mate mata vavahinau non Křisto, matan mo hařehi na maurina vara i vai vevuhi na nomim vavahinau sei ka sopo eři vaia isaku.

3

Vara A Levosahi Křisto Peresi Na Suihana

¹ Mele hina tinapua la vorai peresi na vevorai, ha avulahi tavera matan Moli. Mo sopo te hinau hinia vara a mele uli la hinau sei na pete verea isamim tiroma moiso matan la pa turuhoro kamim.

² Ha lo kilau la viriu sei, la tamlohi sasati atu la lo tai komokomo na epe tamlohi na tairalihi.* ³ Matan enřa natu, tairalihi varuřhu, ūra lo lotu na suihan Tanumen God, ale ūra lo retihasohaso Křisto Iesu na sava mo vaia matařa, ale ūra sopo mele tau na rasua na nořa vavahinau, ⁴ hina purongo vara enau a eři tau na noku rasua na noku vavahinau sohera. Vara tea mo ūromromia vara i eři tau na nona rasua na nona vavahinau, enau na jeua, ⁵ enau na tairalihi na rani mo limaravtolu na noku pongi vora, enau na tavytavuin Israel, tavytavuin Benjamin, enau Jew tataholo, usuri na Leu, enau Pharisee matea. ⁶ Ale na ūlafilangi na noku rasua, na tipahi na vao kalesia non Iesu. Ale usuri na leu tataholo ūhu, tea i sopo eři tuvaiu hin

te hinau matana, ⁷ pani na noku kilakilau mata hinau vara la pa tueniau tiroma, nake matan hin Křisto, na hitera sohen hina purongo. ⁸ Aulu hin haratu, na levosahia vara hinau tari enira hina purongo na rani na lo kilau usurira peresi na hinau mo mele ūruhu jea, enia vara a levosahi Křisto Iesu noku Moli, ale matan Křisto, na sopo mele tau na noku rasua na noku vavahinau tari, na hitera sohena utauta matan vara a lavi Křisto, ⁹ ale vara a pa toho isana, mo sopo matan na vai te hinau mo tataholo matan na lo usuri na Leu, pani vara a mai a tataholo na nahona mata noku rasua hin Křisto, hinau sei, God hasena mo verea vara enau na tataholo mata noku rasua hinia, ¹⁰ matan vara a levosahi Křisto peresi na suiha nona sauteterahi, ale na opoia vara a sořotahi peresia na nona rani ūlangi, ale a sohena na nona mateia, ¹¹ ale, matan la hinau tari sei vara enau sohena, a pa lavi na sauteterahi na mateia.

¹² Na sopo verea vara na pete lavi la hinau tari atu moiso, teni vara God mo vaiau na tataholo vevuhi moiso, pani na lo tutungua vara a lavi la haratu sei Křisto Iesu mo vřoniu matara. ¹³ La vorai peresi na vevorai, na sopo verea vara na lavira noku moiso, pani hina aulu matea na lo tau na ūromiku vara a vaia enia harihi: na sopo mele tauri na hinaun tuai, pani na lo kilau na hinau mo lo mai, ¹⁴ ale na lo tutungua vara a kakau na isoisona, matan vara a lavi otori atu na tuka God mo toviau matana hin Křisto Iesu.

¹⁵ Mo ūruhu vara enřa sei ūra jea na malele rasua, ūra lo ūromřomi sohena. Pani vara kilakilau non tea mo sopo sohena, God i pa vujangia vara sava na lo verea mo tataholo isamim. ¹⁶ Hina aulu hin la hinau sei ūra lavira moiso enia vara ūra usurira na sava ūra pete levosahia moiso vara la tataholo.

Tunguhi Na Palon Paul

¹⁷ La vorai peresi na vevorai, ha pulutahi ha tutungui na paloku, ale ha kilau mamahuni la haratu la lo hahau usurir tovongi sei kama lo sile kamim hinia.

¹⁸ Matan sohen na pete verea isamim moiso, ale nake na lo mele verea isamim na ūromsatí, vara tamlohi matuvana la lo hahau sohena meresahi na sava Křisto mo

vaia na nona talopeilopei. ¹⁹ Isoisona enia la pa hase komora, nora god enia masalora, la retihapahapa na nora vavahinau mata mahanuhanu, la lo tau na ūromira na hinau mata varama purongo. ²⁰ Pani enřa tamlohin tuka, ale ūra lo kilau matan nořa Jujuri i pa tai ea, enia Moli Iesu Křisto, ²¹ enia i pa posí na epeřa la mai la tataholo na epena sei mo ūruhu ūruhu jea, i pa vaia hin suiha atu sei mo lo vai na hinau tari la toho na ruhuruuhuna.

4

¹ Matan haratu, la vorai peresi na vevorai, na lo opoi kamim, ale na opoia vara a mele hite kamim, matan ka vaiau na avulahi, kamim sohena noku otori, ha turu ūlangi hin Moli, la tapalaku ūruhu ūruhu.

Romin Paul

² Na usia ūlangi vara Euodia enia Syntyché la avulahi hinira rua hin Moli. ³ Io, ale na lo usiho tapalaku ūruhu ūruhu, o tueni la hřai atu, enira la lo voko jara matea persiau hin rani atu na lo vavahinau atu mata Retřuhu peresi Clement peresi la tattua tapalaku atu mata vavahinau, la haratu sei hijara la lo toho na Puku mata Mauri.

⁴ Ha avulahi hin Moli tarea, a mele verea, ha avulahi jea! ⁵ Ha vujangi na nomim posposi ūruhu isana tamlohi tari. Moli mo lo mai mariviti.

⁶ Ha sopo ūromkaka hin te hinau hatea, pani na hinau tari na nomim usiusi isan God matan te hinau, ha vere meje isana, ale ha vere na nomim opoia. ⁷ Ale vara ha lo vaia sohena, tamata non God atu tamlohi la sopo levosahia, i pa matahi na mapumim peresi na ūromim hin Křisto Iesu. ⁸ Isoiso hinau la vorai peresi na vevorai, sava mo varauhu, sava la tataholo mata sile na oloolo hinira, sava mo tataholo, sava mo vokevoke, sava mo ūruhu, sava mo tataholo vara ūra opoia, vara te posposi ūruhu teni te hinau mata hasohasoa, ha tau na ūromim hinira. ⁹ Ale sava hinau, ka levosahia, ka lavia, ka rongoa, ale ka hitea hiniau, ha hahau hinira, ale God mata tamata i pa toho peresi kamim.

Paul Mo Vere Meje

¹⁰ Na avulahi tavera hin Moli matan nake ka lo mele ūromřomiau. Na levosahia

vara ka ūromūromiau, pani mo sopo te masapa vara ha eři vujangia. ¹¹ Na sopo verea haranike matan te noku opoia, matan na levosahi na malele vara a ayulahi na sava mo masese na mauriku. ¹² Na levosahi na mauri tilavono, na levosahi na mauri tavyt, na levosahi na hina luhu mata avulahi na hinau tari la mai na mauriku, vara a masu teni a marohati, vara tanga mo lo measurere, teni te rani na vejuveju. ¹³ A eři vai na hinau tari matan Křisto mo lo tueniau. ¹⁴ Pani ka meje tavera isamim matan ka lo tueniau na noku rani ūilangi.

¹⁵ Kamim mara Philippi ka levosahia vara na pongi tiroma ka rongo na Retiřuhu, ale na rani na malue Macedonia, mo sopo te vao kalesia tinapua vara i tueniau na silesilea, pani kamim hasemim purongo. ¹⁶ Matan na rani na lo toho Thessalonica, ka sohai na hinau vaha visa vara i tueniau. ¹⁷ Na sopo verea matan na lo kilau mata silesilea, pani na opoia vara ha mele lavi na vua ūruhuřuhu mata nomim posposi ūruhu.

¹⁸ Pani na lavi la otori sei ka sohaira mo mai isaku peresi Epaphroditus, ale hinau tari sei la marivi savulevule la jeu na noku opoia. Hinau sei ka vaia isaku mo sohena malamalai matea ponana mo ūruhu, mo tataholo na nahon God, ale mo avulahi hinia. ¹⁹ Ale noku God, i pa sile kamim na hinau tari ka opoia i usuri na nona tavyt ūruhuřuhu hin Křisto Iesu. ²⁰ Isan God Tamařa, hasohaso i sahe isana mata rani tui tui, amen. ²¹ Ha sile na retiololo i vano isana tapuhi tari non God hin Křisto Iesu. La vorai kalesia nike, la lo toho persiau, la sohai na nora retiololo isamim. ²² Tapuhi tari nike, la sohai na nora retiololo isamim, la haratu la lo vavahinau na lolo iman supe matan Rome sohena la opoia mo tavera vara ha levosahi na nora retiololo isamim. ²³ Romřuhu non nořa Moli Iesu Křisto i pa lo toho na maurimim.

Colossians Leta Paul Mo Ulia Isana Mara Colossae Leta Nike

Colossae enia taon tavera mo aulu na jara matan Asia Minor, mo lo toho Opae na vanuan Ephesus ale la asa asau. Paul mo sopo lo vano ea hin te rani, pani mo avulahi matan mo levosahia vara rasua nona kalesia ea hin Křisto mo lo mauri (1.3-7; 2.6-7). Epaphras mo vujangi na Retiřuhu isara tiroma, enia mara Colossae, pani enia mo pa lo toho na ima řilangi peresi Paul hin rani atu Paul mo uli leta nike. (1.14;4.3, 10, 18).

Tamlohi ſořoha la mařivi hin jara atu (1.27), ale hai la lo lavi na ſomromi tinapua la sopo varařuhu (2.16-23). La jalio na retivarařuhu, la lo ſomromia lara tamlohi i pa mai i tataholo na nahon God vara i horo na masalo epena. La lo hasohaso na angelo peresi na suiha tinapua na tuka, pani Paul mo opoia vara la levosahi mamahunia vara Křisto mo aulu jea na suiha tari na jara tari, mo lo toho na tuka peresi God Tamana (3.1). Moiso matan vara la pa haso Iesu Křisto purongo.

Hite Leta Nike

1. Reti Tiroma (1.1-2)
2. Usiusi Mata Vere Meje (1.3-8)
3. Křisto Peresi Na Nona Vavahinau (1.9-2.19)
4. Mauri Paro Hin Křisto (2.20-4.6)
5. Isoiso Retireti (4.7-18)

¹ Enau Paul, enau vahařule matea non Křisto Iesu na masalon God, peresi Timothy, enia voraiřa, ² enau na lo uli leta nike isana tapuhi non God la vorai kalesia sei la ſomturu řilangi hin Křisto atu Colossae, ſomřuhu isamim peresi na tamata mo tai isan God Tamařa.

Usiusi Non Paul

³ Tarea kama lo vere meje isan God, Taman nořa Moli Iesu Křisto na rani kama lo usiusi matamim, ⁴ mo tapulo na rani kama rongo na sorasora mata nomim rasua hin Křisto Iesu peresi na nomim opoia isana tapuhi non God, ⁵ ka lo vaia sohena matan ka ſomtoho na hinau God mo

tauua na tuka matamim, hara sei ka rongoa moiso na retivarařuhu na Retiřuhu, ⁶ Retiřuhu sei mo mai isamim, enia mo vano řalihi na varama, mo lo vua mo posi na tamlohi, ale mo talulu, sohen mo vaia isamim mo tapulo hin rani atu ka rongoa, ale ka levosahi mamahuni na ſomřuhu non God, ⁷ sohen ka hitevosahia moiso isan Epaphras, voraiřa volitusi tinapua sei na nona vujangi na Retiřuhu isamim, enia mo lo ſomturu řilangi na vavahinau non Křisto matamim, ⁸ ale mo verea isamam sohena sava opoia non Tanumen God mo lo toho isamim.

⁹ Ale matana, mo tapulo hin rani atu kama rongoa, kama lo usiusi tarea matamim, kama lo usia vara,

Tanumen God i sile kamim, na lelevosahi peresi na levosahi tari, matan vara ha pa levosahi mamahuni na masalon God, ¹⁰ matan vara ha pa hahau na mauri ſuhu, sohena God mo avulahi hinia, ale ha vua na nomim vavahinau ſuhu tari, moiso matana, ha pa levosahi God i mele ſuhu jea.

¹¹ Kama lo usiusi vara ha pa řilangi na suiha tari na nona suiha tavera ſuhuřuhu jea matan vara ha pa turu řilangi na nomim ſomperavu peresi na nomim rani řilangi, ale na posposi mo avulahi ſuhu, ¹² ha vere meje isan Tama matan enia mo vai kamim ka tataholo vara ha lavi hinau atu God mo taua moiso mata nona tapuhi, haratu la mauri hin malarani atu retivarařuhu mo lo silea, ¹³ God enia mo juriřa na suihan ſořoha, ale mo laviřa řa mai hin mauri atu non Natuna sei God mo aulu hinia,

Křisto Enia God Tataholo

¹⁴ Ale hinia, God mo volituhuřa, mo ſomi na nořa hina sasati.

¹⁵ Natun God enia niniun God, haratu řa sopo eři hitea, enia mo vora tiroma non God, ale mo aulu na vavahinau tari non God, ¹⁶ matan Křisto mo vai na hinau tarila pala, hinau tari na tuka peresi na varama, la haratu řa eři hitera peresi la haratu řa sopo eři hitera, suihan supe aulu teni suihan moli, teni tamlohi aulu, teni la haratu la lo tauri na suiha, hin Natuna, hinau tari la pala na nona suiha matan vara la oloolo hinia, ¹⁷ ale enia mo tiroma na hinau tari,

ale hinia, hinau tari la lo toho la sořotahi mo ūruhu.

¹⁸ Enia patu epena, epena enia vao kalesia tari, enia mo tiroma, enia mo tiroma hin la haratu la pa turu na mateia, matan vara enia i pa tiroma i aulu na hinau tari, ¹⁹ matan God mo avulahi vara enia ilo toho vevuhi hin Natuna, ²⁰ ale hinia, God mo sari tamata na hinau tari na tuka peresi na varama na ūraena na nona talopeilopei matan vara la pa toho na ruhuruuhuna. ²¹ Ale tiroma moiso kamim ka vinano isan God, ale ka nona meresahi mata ūromimim la vai kamim ka vai na vavahinau sasati, ²² ale nake natu, mo sari tamata na epena na nona mateia, ale mo vai kamim ka tapu ka vokevoke, ale tea i sopo eři tuvai kamim na nahon God, ²³ vara tarea ha lo tauri ūrlangi na nomim rasua, vara ha sopo tinařihi na nomim ūromtoho na retitauhi mata Retiřuhu sei ka rongoa moiso, hara sei la lo retivujavujangia isana tamlohi tari na varama, hara sei enau na mai na volitusi matana.

Vavahinau Non Paul

²⁴ Nake na lo avulahi matan vara na epeku a lavi na rani ūrlangi matamim, na lo mařivisi na sava mo vejuveju na rongohaji non Křisto na noku vavahinau na lo vaia mata epena, epena enia vao kalesia tari, ²⁵ hara sei God mo tauau vara a mai nona volitusi matana, mo vřoniau matamim vara a vereuli vevuhi na Reti non God isamim, ²⁶ ale ūromřomi luhu atu God mo jarohia tuai tuai isana mahapi tamlohi, pani nake mo vujangia isana nona tapuhi, ²⁷ isana tapuhi natu, God mo hatihia vara i vujangia na nona ūromřomi luhu mata nona ūromřuhu i malue na jara tavera matan vara tamlohi ūroha la pa levosahia vara mo ūruhruhu jea sohena sava, ūromřomi luhu sei enia harihi: Křisto mo lo toho hin kamim, enia pulo ūromtoho atu mo verea vara ha pa lavi na ooolo tavera jea peresia, ²⁸ na lelevosahi atu Tanumena mo lo silea, kama lo retivujavujangi hin Křisto, ale kama lo retiroařoahai isana tamlohi tari, ale kama lo vujangia na tamlohi tari, matan kama opoia vara kama pa sile na tamlohi tari isan God la jea hin Křisto. ²⁹ Matan harihi, enau na lo vavahinau ūrlangi na malele tari a eři vaia, pani na lo vaia na suihan Křisto mo lo vavahinau ūrlangi hiniau.

2

Hasohason Křisto

¹ Na opoia vara ha levosahi na noku kalvono tavera vara a matahi na ūromimim peresi la haratu la lo toho Laodicea, moiso la haratu la sopo lo hite na nahoku hin te rani, ² matan vara a eři retituetueni na mapura vara la mai na vao matea na nora opoia, matan vara la pa mařivi na levosahi ūruhu sei mo tai na levosahi mata hina luhu non God sei, enia natu, Křisto, ³ ale God mo jarohi na nona tavytav mata lelevosahi peresi na levosahi tari hin Křisto hasena.

⁴ Na lo vere reti sei isamim matan vara tea i sopo halu kamim na nora retimemeji.

⁵ Hina purongo vara na sopo toho peresi kamim, pani ūromiku mo lo toho isamim, ale na avulahi matan na hitea vara ka lo hase kilau kamim, ale ka lo turu ūrlangi na nomim rasua hin Křisto.

Křisto Mo Vairā Ra Materi

⁶ Matan haratu, sohen ka lavi Křisto Iesu sohena nomim Moli, ha hahau sohena nona tamlohi la lo hahau, ⁷ ha tau na warimim hinia, ha ulua hinia vara ha pa toho jejeu na nomim rasua usuri vujangi sei ka lo lavia moiso, ale tarea ha tatamahu mata vere meje isan God matana. ⁸ Ha lo kilau, mo sopo ūruhu vara tea i tikauleji kamim na nora ūromřomi purongo teni na nora retireti halu usuri na posposi tamlohi peresi na posposi mata tau na rasua na vui varama, pani la sopo usuri na vujangia hin Křisto, ⁹ matan hin Křisto, God mo lo toho vevuhi na epen tamlohi purongo, ¹⁰ ale mo vai kamim ka mařivi hinia, enia haratu mo patun la haratu la aulu tari peresi la haratu la lo tauri na suiha. ¹¹ Ale hin Křisto, kamim ka tairalihi, pani mo sopo tairalihi atu na epemim, pani haratu Tanumena mo vaia sei mo tai nařihi na nomim hehe na maurimim, ¹² hinau atu mo masese hin rani atu ka paptijo hin Křisto, mo sohen God mo tavuni kamim peresia, ale ka mele turu na mauri paro peresia matan ka rasu na suiha tavera non God, haratu mo lo sauteterahi Křisto na mateia. ¹³ Tiroma ka lo mate mata nomim hehe matan mo sopo lo tai nařihi na masalo varama na maurimim, moiso nake God mo vai kamim ka mauri peresi Křisto matan enia mo ūromi na nořa hehe tari, ¹⁴ Ale mo sohen nořa

hehe la lo toho na pepa matea la lo tuvaīra mo usuri na leu non Moses, pani God mo jarai nařihira mo lavi pepa atu mo vosaea na talopeilopei, ¹⁵ varařuhu, Křisto mo lavi nařihira na suiha isan la haratu la lo aulu tari peresi la haratu la lo tauri na suiha na varama, ale mo vaira la mahanuhanu na naho tamlohi hin rani atu na nona talopeilopei.

¹⁶ Matan hinau sei ha sopo majinga vara tea i ari kamim mata hanhani teni na sava ka lo inua, teni matan te rani tavera, teni matan te rani tavera mata vitu paro teni te rani tapu hatea, ¹⁷ matan la hinau sei enira řořo hinau purongo mata hinau i pa pala, pani hinau atu mo mai moiso, enia Křisto. ¹⁸ Ha sopo majinga vara tea mo opoia vara i tau nařihira kamim na nomim rasua, matan enia mo lo verea vara ka sopo hase tauhoro kamim hin te hinau, ale vara ka sopo lotu na angelo mo lo verea vara mo hitera na nona mavuho, matan enia mo lo mangisi mata nona řomřomi varama purongo, ¹⁹ ale mo sopo sořotahi hin Křisto, enia natu, patu epena tari, pani enřa manmanina řilangi peresi na sořosořo epena, řa ulua řa sořotahi hinia matan řa lavi na ulua mo tai hin suiha atu God mo lo silea.

Mauri Paro Hin Křisto

²⁰ Ale matan hin Křisto ka mate moiso, ale mo vai kamim ka materi na suiha vui sasati mata varama, ale mata sava ka pa lo řomřomi sohena tamlohi varama, ale ka lo oloolo na leu sohen harihi: ²¹ "Ha sopo eři tauri hinau sei! Ha sopo eři hani hinau sei! Ha sopo tikeli hinau sei!" ²² La retileu sei enira vujangi nona tamlohi purongo, ale i pa sopo tuai la hinau sei la pa tihai. ²³ Vararuhu, tamlohi la pa hitea vara la retileu sei enira la hina lelevosahi na malele rasua tataholo, na posposi řomatano, peresi na hase tauhoro, pani la hinau sei la pa sopo eři tueni tea vara i horo na nona řomřomi hehe teni masalona.

3

Ha Kilau Matan Tuka

* **3:11:** teni tamlohi řořoha, teni tamlohi sasati mara Scythia: Tamlohi řořoha la tamlohi sei la sopo levosahi na leon mara Greek, ale mara Scythia la lavi na hija mata vilimatei na tamlohi.

¹ Matan God mo pete sau kamim na mauri paro peresi Křisto moiso, ha tau na řomimim hin mauri atu na tuka, hin jara atu Křisto mo lo sakele na jara suiha tavera atu na matuan God, *Psa 110.1.*

² ha tau na řomimim na hinau matan tuka, pani i sopo na hinau mata varama, ³ matan kamim ka mate moiso, ale maurimim la lo jarohi peresi Křisto hin God. ⁴ Maurimim la lo toho hin Křisto, ale hin rani atu i pa mai, kamim sohena, ha pa pala peresia na nona hasohaso tavera.

⁵ Ale matan haratu, ha vilimatei na hina hehe mata varama na lolomim sohen harihi: mauri maji, posposi lumiha, řomusuri hařai, masalo sasati, ale posposi hanmarua sei enia pulo hinau mata lotulotu vono, ⁶ matan talai lolokoru non God mata hehe mo lo mai isan la haratu la lo vai la hinau atu. ⁷ Kamim sohena, ka lo vaira na maurimim tuai hin rani atu ka pa lo toho na mauri varama. ⁸ Pani nake, ha tau nařihira la hinau sei na verea moiso, ale la hinau sohen harihi: lolokoru, lolokoru patumim, vaisatihi na tinapua, retisasati hin God, teni vara jingomim la retisasati teni varikali. ⁹ Ha sopo haluhalu kamim matan ka pete tau nařihira mauri tuai atu moiso peresi na nona posposi hehe na maurimim, ¹⁰ ale ka pete lavi na mauri paro moiso sei tarea mo lo mele ulua na levosahi, ale mo lo mele posi mai tataholo na niniun haratu mo vai mauri paro sei. *Gen 1.26.*

¹¹ Nake, mo sopo te hinau vara tamlohi řořoha, teni Jew, teni haratu mo taiřalihi, teni haratu mo sopo taiřalihi, teni tamlohi řořoha, teni tamlohi sasati mara Scythia,* teni slev, teni tamlohi teri, pani Křisto enia patu hinau tari, ale enia mo lo mauri hinira mo isoiso.

Posposi Tamlohi Rasu

¹² Ale matan kamim ka haratu sei God mo opoira, God mo viřonira, God mo tapuhira, ha ruru na řomopoia, řomřuhu na tamlohi tinapua, řomatano, řommalum, řomperavu, ¹³ Ale vara te vorai tinapua mo vai te hinau mo hehe isamim, ha řomperavu isana, ale vara

tea mo vai te retireti matan te vonamim, ha ūromia, matan Moli mo ūromi kamim moiso, kamim ha pa hase ūromi kamim. ¹⁴ Ale aulu hin la hinau nike, ha ruru na opoia matan enia mo lo sořotahi na hinau tari, ale ha pa eři turu jara matea. ¹⁵ Ale ha tutungui na tamata non Křisto i aulu na mapumim, matan God mo vai kamim ka vao epe matea, ale mo tovi kamim vara ha toho na tamata, ale vara tarea ha lo vere meje. ¹⁶ Ha lavi vevuhi na reti non Křisto na lolo mapumim, matan vara tarea ha eři tau na ūromimim hinira. Ale ha vujangira isamim hasemim, ale ha vaitataholoi kamim hatehateahi na malele lelevosahi tari, ale na lolo mapumim ha avulahi vara ha lalavete na vete mata psalm, ale vete la sile na hasohaso isan God peresi na vete Tanumena mo silera na ūromimim. ¹⁷ Ale vara sava ka lo vaia teni ka lo verea, ha sopo ūromaliho vara kamim ka tamlohi non Moli Iesu, ale tarea ha vere meje isan God Tama hinia.

Retireti Mata Posposi Oloolo

¹⁸ Hařai lahi, ha oolo na tuamim matan enia mo tataholo na nahon Moli, ¹⁹ tamlohi lahi, ha opoi na naroumim, ale ha sopo vai na hinau ūrilangi isara. ²⁰ Natuvarihi, ha oolo na tamamim peresi na tinamim na hinau tari, matan haratu enia God mo avulahi hinia. ²¹ Tama, ha sopo plele na natumim, vara i vono, la pa maloko vara la tapurongo isamim.

²² Kamim slev, tarea ha lo oolo na nomim tamlohi tavera nike na varama, ha sopo vaia mata tamlohi purongo, teni ha vaia mata ūrom tamlohi tinapua i avulahi hin kamim, pani, ha vaia varauhu na mapumim matan ka lo sile na oolo tavera isan Moli. ²³ Sava vavahinai ka lo vaia, ha vaia na mapumim sohena vara non God, mo sopo nona tamlohi, ²⁴ matan ka levosahia vara Moli i pa sile na korumim sohena nomim otori. Ka lo volitusi isan Moli Křisto, ²⁵ matan ka levosahia vara haratu mo lo vai na hina sasati i pa lavi na voli hina sasati mo vaia, matan God mo sopo tametame tea.

Deut 10.17; Eph 6.9

4

¹ Kamim la tamlohi tavera, ha kilau mamahuni na nomim slev na posposi ūruhu, matan kamim sohena, ka levosahia vara nomim tamlohi tavera sei, Moli na tuka, mo lo kilau kamim.

Usiusi Matan Paul

² Ha turu ūrilangi na nomim usiusi, ha ūromřomi mamahuni na sava ka lo usiusi matana, ale ha vere meje na mapumim i vano isana, ³ ha usiusi matamam sohena, ha usiusi vara God i sile te masapa matan vara kama pa vereuli na nona retisohai sei mo lo vujangi na nona ūromřomi luhu hin Křisto, haratu natu, na lo toho na ima ūrilangi matana, ⁴ ha usiusi matakura vara a pa vereulia i pa memera i ūruhu na malele God mo opoia. ⁵ Ale mo ūruhu vara ha sopo toho purongo na nahon tamlohi atu la sopo rasua, pani ha lo usuri na posposi tataholo non Moli. ⁶ Mo ūruhu vara tarea na nomim retireti, ha retiholoholo, ha ūromřomi na sava reti ka verea, ale ha pa tatamahu vara ha pa ūrami mamahuni na tamlohi hatehateahi sohena sava.

Retiololo Isan Tapalan Paul

⁷ Tychicus voraiřa atu enřa řa opoia, enia tapalaku volitusi matea non Moli, tarea mo lo ūromturu ūrilangi na vavahinai non Moli, enia i pa sorahi na sava na lo vaia isamim, ⁸ ale na lo ūrule Tychicus isamim matan haratu, vara ha pa levosahia vara kama lo toho sohena sava, ale vara i eři retituetueni na mapumim, ⁹ moiso Onesimus mo lo usuri Tychicus, enia voraiřa matea, řa opoia mo ūromturu ūrilangi, enia vonamim matea, ale la pa sorahi na sava hinau kama lo vaira nike.

¹⁰ Aristarchus, enia mo lo toho peresiau na ima ūrilangi nike, mo sile na nona retiololo isamim, moiso Mark atu vorain Barnabas, korong ka lavi te reti moiso vara i pala isamim, ale ha pa lavia, ¹¹ peresi na tamlohi matea hijan Iesu la lo tovia Jastas. La harihi tupu visalete purongo na Jew tari la lo vavahinai matan mauri atu God mo aulu hinia peresiau nike, ale na avulahi tavera mata enira la lo tueniau. ¹² Epaphras, enia vonamim matea, enia volitusi non Křisto Iesu, mo sile na retiololo isamim, mo lo usiusi ūrilangi tarea

matamim na nona usiusi matan vara ha pa mai ha pa jea, ale ha levosahi mamahuni na masalon God. ¹³ Enau a eři verea isamim vara enia mo lo vavahinau ūilangi matamim peresi la haratu Laodicea peresi la haratu Hierapolis. ¹⁴ Doctor Luke voraiřa sei řa opoia, peresi Demas, enira la sile na nora retiololo isamim. ¹⁵ Ha sile na noku retiololo isana vorai kalesia atu Laodicea, ale isan hařai atu Nympha peresi na vao kalesia la lo matavuhi na imana. ¹⁶ Ale vara ka evi leta nike isamim mo isoiso, ha mele evia isana vao kalesia la lo matavuhi Laodicea. Ale mo ūruhu vara ha evi leta atu na pete sohaia tiroma moiso isan la haratu Laodicea. ¹⁷ Ale ha verea isan Archippus vara, “O vaihitea vara o vai mařivisi na vavahinau non Moli sei mo lo silea isam.” ¹⁸ Enau Paul na lo uli la retiololo nike na limaku haseku.

Ha sopo ūromalihlo vara enau na lo toho na ima ūilangi, ale ūromřuhu non God i pa toho isamim.

1 Thessalonians

Tiroma Leta

Paul Mo Ulia Isana Mara

Thessalonica

Leta Nike

Paul mo tapulo na vao kalesia Thessalonica (2.13–14), ale mo sopo kilau matan te mania, pani mo lo hani na masumasuna (2.9). Tiroma, la kalesia atu la lo lotulotu vono (1.9), pani nake la turu ūilangi hin Moli, ale mata nora oloolo, Retiūhu mo vano ūalihi hin jara atu (1.8).

Tamlohi hai atu, la turuleji hin Paul, ale mo rovo mo vano Athens, pani mo ūule Timothy mo vano vara i rohira Thessalonica (3.1–5). Timothy mara mo mele hilu, mo verea isan Paul mara la lo turu ūilangi ale vara la lo hahau na opoia (3.6–10).

Kalesia hai Thessalonica la sopo voko, la lo toho purongo matan la lo ūromōmia vara i pa sopo tuai Moli i pa mele pala na varama (4.11–12). Hai la lo ūmkaka matan te vonara la mate moiso pani Křisto mo sopo lo pala, la pa mele turu teni mo vono? (4.13–15), Paul mo retinanauhira, mo verea mara la lo hahau usuri na masalon God tarea (5.1–11).

Mo ūruhu vara tarea ūa lo ūromōmi na sava Paul mo verea akerihi:

‘Ha avulahi tarea, ha lo tatamahu mata usiusi tarea, ha vere meje mata hinau tari, matan harihi enia masalon God hin Křisto Iesu matamim.’ (5.16–18)

Hin Leta Nike

1. Retiololo (1.1–3)
2. Tovongi mata rasua nona Kalesia Thessalonica (1.4–3.13)
3. Mauri atu God mo avulahi hinia (4.1–12)
4. Vara Moli i mele pala (4.13–5.11)
5. Isoiso Retiololo (5.12–28)

¹ Enau Paul na uli leta nike isamim vao kalesia sei Thessalonica, na hijan God Tama peresi Moli Iesu Křisto, Silas peresi Timothy la lo toho peresiau nike.

Romōruhu peresi na tamata i pa toho isamim.

Nora Rasua

² Kama lo vere meje isan God tarea matamim mo isoiso na nomam usiusi,

³ kama lo vere kamim isan nořa God

Tamařa, mata nomim voko sei ka lo vaira mata nomim rasua, ale mata nomim vavahinai sei ka lo vaira mata nomim opoia, peresi na nomim turu ūilangi tarea sei ka lo vaia matan ka lo ūromtoho matan nořa Moli Iesu Křisto.

⁴ La voraiku peresi na vevoraiku ūruhu, God mo opoi kamim, ale kama levosahia mo ūruhu vara God mo viřoni kamim, ⁵ matan nomam Retiūhu mo mai isamim, mo sopo mai na retireti purongo, pani mo mai peresi na suiha matan Tanume Tapu mo tueni kamim matan vara ha pa levosahia i ūruhu vara Retiūhu enia mo varařuhu. Kamim ka levosahia mo ūruhu vara posimam hin rani atu kama lo toho isamim mo sohena sava matamim, ⁶ ale ka lo tovongi kamam peresi Moli matan kamim ka lavi na Retiūhu, hina purongo vara ka lavi na rongohaji sasati matana, pani ka avulahi na avulahi non Tanume Tapu, ⁷ matan ka mai sohena tovongi matea isana tamlohi rasua tari Macedonia peresi Achaia. ⁸ Mata reti non Moli sei mo lo malue isamim mo roroa Macedonia peresi Achaia, ale nomim rasua hin God mo roroa na jara tari, ale mo vaia kama sopo eři mele vere te hinau mata nomim rasua isara. ⁹ Matan enira hasera la lo mele verea vara ka lavi kamam na posposi ūruhu sohena sava na nomam hahau. La verea sohena sava ka vahaři na tamasi, ale ka posíka vano isan Moli matan vara ha volitusi isan God varařuhu sei mo lo mauri, ¹⁰ ale ka lo saovi matan Natuna sei i pa tai na tuka, God mo sauteterahia na mateia, Iesu, enia mo juriřa na talai lolokoru non God mata hehe sei mo lo mai.

2

¹ Kamim ka levosahia mo ūruhu la voraiku peresi na vevoraiku ūruhu, vara nomam mai isamim mo sopo vano hina purongo. ² Pani hina purongo vara kama lavi na rongohaji moiso na nora vailejleji hin kamam Philippi, sohen ka levosahia, pani kama lo turu ūilangi hin nořa God vara kama lo vereuli na Retiūhu non God isamim na livuha rani ūilangi. ³ Matan nomam ngurunguru matamim, mo sopo malue na hinau mo sopo tataholo teni na hina lumiha, teni vara kama vahitea vara kama halu, ⁴ pani matan kama lo retireti

sohena vahařule sei God mo majinga hin kamam vara kama lavi na Retiřuhu. Kama sopo vaia matan vara tamlohi la pa avulahi hin kamam, pani vara God i avulahi, enia natu, haratu mo lo arifa vara řa lo vai te vavahinau mata sava. ⁵ Matan kama sopo mai isamim mata haruharu sohen ka levosahia, teni vara kama tapala peresi kamim mata mania, haratu God mo levosahia, ⁶ ale kama sopo ale na hasohaso nona tamlohi, mo sopo isamim teni isante tinapua, ⁷ hina purongo vara mo tataholo vara kama usi te hinau isamim matan kamam kama vahařule non Křisto. Pani kama mai isamim na posposi malum sohena hařai vasusu matea mo lo susui na natuna, ale mo lo kilaura. ⁸ Ale matan kama opoi kamim mo tavera, mo vai kamam kama avulahi vara kama sile kamim na Retiřuhu non God, ale maurimam sohena, kama silera isamim, matan ka mai ka vorai řuhuřuhu isamam.

⁹ Matan ka levosahia la voraiku peresi na vevoraiku řuhuřuhu, vara na rani kama lo retivujavujangi isamim, kama voko řilangi na rani peresi na vutepongi mata mania matan vara kama sopo tau te tetehi isan te vonamim. ¹⁰ Kamim ka levosahia, ale God mo levosahia vara nomam posposi mo tapu isamim sei ka rasua, ale mo tataholo sohena sava, ale mo sopo te hinau i sati vara tea i pa eři pisuhi kamam hinia. ¹¹ Matan ka levosahia vara mo sohena sava isana tata matea peresi natuna, ¹² kama lo ngurunguru hin kamim, ale kama lo retituetueni kamim, ale kama lo verea řilangi vara ha hahau na mauri sei God i pa avulahi hin kamim hinia, enia natu, mo tovi kamim vara ha mai hin nona mauri atu enia mo supe hinia peresi na hasohasona.

¹³ Ale kama lo vere meje isan God tarea matan hin rani atu ka lavi na reti non God isamam, ka sopo lavia sohena retireti nona tamlohi purongo, pani reti non God varauřuhu, ale mo lo vai na nona vavahinau hin kamim sei ka rasua.

¹⁴ Matan kamim ka vorai kalesia řuhuřuhu, ka tovongi na vao kalesia tinatinapu hin Křisto Iesu non God hin Judea, matan ka lavi na rani řilangi isana tahisamim mo sohena tamlohi rasua Judea la lo lavia isana Jew.

¹⁵ Enira la haratu sei la vilimatei Moli Iesu peresi na přovet, la levuti nařihi kamam, ale God mo sopo avulahi hinira, ale enira la lo turuleji na tamlohi tari, ¹⁶ matan la turuhoro kamam vara kama sopo retireti isana tamlohi řořoha matan vara la pa juri. Hin posposi akerihi tarea la lo takonahi na nora hehe mo sahe vara i marivi, pani talai lolokoru non God mata hehe i pa jovi vevuhi isara.

Romromi Non Paul

¹⁷ Pani la vorai peresi na vevorai řuhuřuhu, mo tapulo hin rani atu la lavi nařihi kamam isamim mata makomo rani – ka sopo mele hite na nahomam, pani mapumam la lo toho isamim. Ale matan kama opoia mo tavera vara kama eři mele mai isamim, kama vahitea mo řilangi matan vara kama mele mai. ¹⁸ Matan kamam kama opoia vara kama mele mai isamim, varauřuhu enau, Paul na opoia vaha visa, pani Setan mo lo turuhoro kamam. ¹⁹ Matan sava natu, enia nomam řomtoho teni avulahi teni řongořongo nona supe kama pa avulahi tavera hinia na nahon Moli Iesu hin rani atu vara i pala? Enia kamim. ²⁰ Varařuhu, kamim ka nomam hasohaso peresi na nomam avulahi.

3

¹ Matan haratu, kama sopo eři mele tauřilatia i peravu, ale kama hatihia vara kamam hasemam, kama pa lo toho Athens, ² Ale hitahu kama řule Timothy voraimam enia mo tapala na vavahinau non God mata sohai na Retiřuhu non Křisto, vara i vai kamim ha řilangi i retituetueni kamim na nomim rasua, ³ matan vara i pa sopo tea i řomkaka na rani mata vahite. Ka levosahia mamahunia vara God mo viřoni na rani mata vahite vara la pa vahiteřa. ⁴ Ka levosahia, na rani kama lo toho peresi kamim, kama lo verea isamim moiso vara řa pa lavi na nora tipahi, ale ka levosahia vara la pala.

⁵ Matan haratu, na sopo eři mele tauřilatia i peravu, ale na lo řulea vara i pa to hitea vara nomim rasua mo lo sohena sava. Na matahu vara korong hin te malele Tiapolo mo halu kamim moiso, ale nomam kalvono korong la vano hina purongo.

⁶ Pani Timothy mo pa pala isamam nakerihi, mo tai isamim, ale mo lavi na retiřuhu mo verea mara, nomim rasua peresi na nomim opoia la lo řilangi. Mo vere kamam hinia vara tarea ka lo řomřomi na nořa rani řuhu, ale vara kamim ka opoia jea vara ha mele hite kamam, sohen kamam kama opoia vara kama mele hite kamim. ⁷ Matan haratu la voraiku peresi na vevoraiku řuhuřuhu, hina purongo vara kama lo lavi na rani řilangi tavera peresi na rongohaji, nomim rasua mo vai kamam kama avulahi. ⁸ Ale nake, mauri mo mele řuhu isamam matan kama levosahia vara kamim ka lo turu řilangi hin Moli.

⁹ Kama pa vere meje isan God i tataholo sohena sava matamim, matan ka vai kamam kama avulahi na nahon nořa God matamim. ¹⁰ Tarea kama lo usiusi řilangi vara kama pa eři mele hite kamim, ale kama sile kamim na sava ka vejuveju hinia na nomim rasua. ¹¹ Nake nomam usiusi vara nořa God Tamařa hasena, peresi nořa Moli Iesu i vai na malele tataholo vara kama mai isamim. ¹² Kama lo usiusi vara Moli i vai na nomim opoia i ulua, ale i mařivi savulevule matamim hatehateahi peresi na tamlohi tari tinapua, sohen nomam opoia mo vaia matamim. ¹³ God i pa vai na mapumim la řilangi matan vara tea i pa sopo eři tuvai kamim hin te hinau, ale ha tapu na nahon nořa God enia Tamařa hin rani atu nořa Moli Iesu i pa mai peresi na nona tamlohi tapu.

4

Posposi Atu God Mo Opoia

¹ La voraiku peresi na vevoraiku řuhuřuhu, mele hinau matea, hin rani atu kama lo toho peresi kamim, kama vujangi kamim vara ha pa hahau sohena sava na maurimim vara ha vai God i avulahi, ale ka lo usuria sohena. Ale nake na hijan Moli Iesu, kama vere kamim vara ha lo ulua i tavera hinia. ² Matan ka levosahi vujangi atu kama lo taua na limamim moiso na suiha non Moli Iesu. ³ Matan masalon God mo sohen harihi, vara maurimim la vokevoke, ale ha toho asau na mauri maji, ⁴ ale vara kamim hatehateahi ha levosahi na malele mata hase kilau mamahuni na epemim na malele tapu vara tamlohi la pa hasohaso kamim matana, ⁵ mo sopo na

masalo epemim sohena tamlohi ſrořoha la lo vaia.

⁶ Ha sopo vai te hehe sei isan te voraimim kalesia hatea, teni ha halua hin malele akerihi, matan God i pa sile na talai isana tamlohi sohena, vara la lo vai na hina sati sohen harihi, sohen kama pete sile na nomam retireti řilangi isamim matara moiso.

⁷ Matan God mo sopo toviřa mata mauri mo lumiha, pani vara řa hahau na mauri vokevoke řuhu. ⁸ Matan haratu, vara tea mo řohu hin la vujangi nike, mo sopo řohu na tamlohi, pani mo lo řohu hin God sei mo lo sileřa na nona Tanume Tapu.

⁹ Nake, na posposi vorai la opoioporia, kama sopo opoia vara kama mele uli te hinai isamim matana, matan kamim God mo vujangi kamim moiso vara ha opoiopoi kamim. ¹⁰ Ale varauřuhu, kamim ka opoi na vorai kalesia tari řalihi Macedonia. Ale la voraiku peresi na vevoraiku řuhuřuhu, sava ka lo vaia mo řuhu, pani ha mele ulua i tavera hinia. ¹¹ Ha tau na řomimim vara ha usuri na mauri malum, ha sopo sohai na ngalsumim na hinai non tina-pua, ha hani na masmasumim hasemim sohena kama verea isamim, ¹² matan vara la haratu la sopo rasua la pa hitevosahia na nomim hahau, ale la hasohaso kamim matana, matan vara ha pa sopo řomtoho na tinapua.

Rani Sei Moli I Pa Mele Mai Hinia

¹³ La voraiku peresi na vevoraiku řuhuřuhu, kama sopo opoia vara ha sopo levosahia vara i pa sohena sava isan la haratu la mate moiso teni vara ha tangi sohen la haratu sei mo sopo te nora řomtoho. ¹⁴ Ra rasua vara Iesu mo mate, ale mo mele turu, ale řa rasua vara God i pa vai la haratu la mate moiso hin Iesu, la pa mai peresi Iesu.

¹⁵ Sohen Moli mo hase verea, kama verea isamim vara enřa sei řa pa lo mauri, vara řa pa toho i tikeli rani atu Moli i mele mai, řa pa sopo tiroma hin la haratu la mate moiso, ¹⁶ matan Moli hasena, i pa tai na tuka i sinai i ulo na retileu, peresi na leo supe nona angelo matea, ale peresi na roroa trumpet non God, ale la haratu la mate hin Kristo la pa turu tiroma. ¹⁷ Ale hitahun haratu, enřa sei řa pa lo mauri, ale řa pa

lo toho, ūa pa sahe peresira aulu na telangi vara ūa pulutahi peresi Moli na masapa, ale ūa pa toho peresi Moli tui tui. ¹⁸ Matana, ha retituetueni kamim hatehateahi hin la reti nike.

5

Isoiso Rani

¹ Ale nake, la voraiku peresi na vevoraiku ūhuřuhu, kama sopo opoia vara kama uliuli isamim matan la rani sei, ² matan ka levosahia mo ūhu moiso vara rani atu vara Moli i pa mele mai hinia i pa sohena tamlohi vavanaho matea mo mai na vutepongi. ³ Vara tamlohi la lo verea lara, ‘Tamata mo lo toho, ale ūa tatamahu!’ Vahatea purongo, komokomo i pa jovi isara, sohena hafi varihaji isana hařai mata lavilavi. La pa sopo eři rovo.

⁴ Pani kamim la voraiku peresi na vevoraiku ūhuřuhu, ka sopo toho na ūrořoha matan vara rani atu i vai kamim ha pa hutu kamim sohena ka hutu kamim na tamlohi vavanaho matea. ⁵ Kamim mo isoiso ka natun malarani, ale nomim hahau enia mata rani. Enřa ūa sopo mata vutepongi teni mata ūrořoha. ⁶ ale matana, ūa sopo sohena tatuara sei la lo juruvi, pani ūa tatamahu, ale ūa hase taurilatiřa. ⁷ Matan la haratu la lo juruvi, la juruvi na vutepongi, ale la haratu la lo putu na wai ūlangi, la putu hinia na vutepongi. ⁸ Pani matan enřa ūa tamlohi mata malarani ūa hase taurilatiřa tarea, ūa ru na rasua peresi na opoia sohena ruru mata tingting matea, ale nomim ūromtoho mata juri i pa sohena hat matea mata vuro. ⁹ Matan God mo sopo viřoniřa vara i pa sile na nona talai lolokoru mata hehe isára, pani matan vara ūa lavi na juri hin nořa Moli Iesu Křisto. ¹⁰ Enia mo mate matára matan vara hina purongo vara ūa lo kilau teni ūa juruvi, ūa pa toho peresia. ¹¹ Matan haratu, ha retituetueni, ale ha tueni kamim hatehateahi sohen ka lo vaia nake.

Isoiso Retireti

¹² Nake kama lo usi kamim la vorai peresi na vevorai ūhuřuhu vara ha sile na oloolo isan la haratu la lo voko ūlangi isamim, haratu la aulu hin kamim hin Moli, ale la lo retiřoařohai kamim. ¹³ Matan sava la lo vaia ha silera na oloolo tavera na opoia mata nora voko. Ale ha

sopo vasvas peresi na tinapua. ¹⁴ Ale kama lo usia ūlangi isamim la voraiku peresi na vevoraiku ūhuřuhu vara ha retiřoařohai la haratu la maloko, ha retituetueni la haratu la matahu, ha tueni la haratu la sopo suiha, ha ūromperavu isan tamlohi tari. ¹⁵ Ha lo kilau matan tea i sopo kele na hehe peresi na hehe, pani tarea ha vahite vara ha vai na posposi ūhu isamim hatehateahi, ale isana tamlohi la sopo rasua.

¹⁶ Ha avulahi tarea, ¹⁷ ha lo tatamahu mata usiusi tarea, ¹⁸ ha vere meje mata hinau tari, matan harihi enia masalon God hin Křisto Iesu matamim.

¹⁹ Ha sopo vuni na hapu Tanumen God, ²⁰ ha sopo hitelehilehi na sava tamlohi rasua tinapua mo verea vara Tanumen God mo vujangia isana. ²¹ Pani ha tapurongo hinia, ale ha vahite na sava mo verea vara la varuřuhu teni, ale ha taurilati na sava mo ūhu. ²² Ha toho asau na hinau tari la sasati.

Usiusi Non Paul

²³ Nake God mata tamata, enia hasena i pa vai kamim ha tapu vevuhi, God i pa vai mamahuni na tanumemim, na maurimim peresi na epemim matan vara la pa toho vokevoke, ale tea i sopo eři tuvai kamim hin te hinau na mele mai nona nořa Moli Iesu Křisto. ²⁴ Haratu sei mo tovi kamim enia i pa sopo eři tope na nona retitauhi, varuřuhu enia i pa vaia.

²⁵ La voraiku peresi na vevoraiku ūhuřuhu, ha usiusi matamam.

²⁶ Ha sile na retioloolo mata opoia isana vorai peresi na vevorai ūhuřuhu tari.

²⁷ Na lo retileu isamim na nahon Moli vara ha evi leta nike isana vorai kalesia mo isoiso.

²⁸ Romřuhu non nořa Moli Iesu Křisto i pa lo toho isamim.

2 Thessalonians

Harua Leta

Paul Mo Ulia Isana Mara

Thessalonica

Leta Nike

Hin leta nike Paul mo lo vere meje isan God matan nora rasua mo lo ulua (1.3), hina purongo vara la lo lavi na rani ūilangi, pani Paul mo verea mara God mo lo vahite na nora rasua (1.4–5).

Kalesia hai Thessalonica la lo ūromūromia lara Paul mo sohai na leta isara moiso mara Moli mo mele pala moiso (2.2). Pani mo vono, Paul mo retiōraōahaira vara la sopo tinařihia vara tea i halura sohena matan Iesu i pa sopo pala matan te hinau la pa masese tako (2.3–12).

Paul sohena mo lo retiōraōahaira matan vara la sopo toho purongo (3.6–10), ale vara la lo kilau vara tea i ūahu vara i oloolo na nona reti hin leta nike.

Paul mo verea mara God i pa sile na talai tavera isan la haratu sei la ūahu vara la rasu na nona reti hin pongi atu mo lo mai:

‘Ale matana, God i pa sohai na hina haluhalu isara, matan vara la pa rasu la hinau haluhalu atu. Matan vara enira mo isoiso la pa lavi na talai matan la sopo rasu na retivarařuhu, matan la lo avulahi na hehe la lo vaira.’ (3.11–12)

Hin Leta Nike

1. Retioloolo (1.1–2)
2. Moli i pa ari na varama (1.3–12)
3. Moli mo sopo mele pala (2.1–12)
4. Turu ūilangi tarea (2.13–17)
5. Ha usiusi, ha voko (3.1–15)
6. Isoiso usiusi (3.16–18)

Tiroma Reti

¹ Enau Paul na uli leta nike isamim vao kalesia Thessalonica hin God Tamařa peresi Moli Iesu Křisto, Silas peresi Timothy la lo toho peresiau nike.

² Romřuhu peresi na tamata mo tai isan God Tama peresi Moli Iesu Křisto i pa toho isamim.

Paul Mo Vere Meje

³ La vorai peresi na vevorai, tarea mo tatahola vara kama vere meje isan God matamim, ale mo tatahola matan nomim rasua mo lo ulua mo tavera, ale nomim opoia isamim hatehateahi mo lo tavera jea.

⁴ Mo vai kamam kama lo retiōapahapa matamim isana vao kalesia tinapua sei la rasu God mata nomim turu ūilangi peresi na nomim rasua na rani tipahi tari peresi na rani ūilangi ka lo lavira. ⁵ Harihi mo vu-jangi na aria tatahola non God, matan vara i vai kamim ha tatahola mata ha lavi mauri atu God mo aulu hinia, sei ka lo lavi na rani ūilangi matana. ⁶ Matan mo tatahola vara God i sile na rani ūilangi isan la haratu sei la lo sile na rani ūilangi isamim, ⁷ ale God i pa sile na mapu isamim sei ka lo lavi na rani ūilangi sohemam hin rani atu Moli Iesu i pala na tuka. Enia i pa mai peresi na nona angelo suiha jea, ⁸ na pepe hapu tavera jea vara i lavi na talai tavera i silea isan la haratu la sopo levosahi God peresi la haratu sei la lo ūahu vara la oloolo na Retiřuhu non nořa Moli Iesu. ⁹ Nora talai i pa vaikomokomora i sopo te isoisona, la pa toho mata rani tui tui hasera assau na nahon God peresi na mera suihana tavera jea, *Isa 2.10* ¹⁰ hin rani atu vara Iesu i mele mai vara i lavi na hasohaso isana nona tapuhi sei la tau na nora rasua hinia, la pa mařurahi tavera matana, matan ka lo rasu na nomam retisohai isamim.

¹¹ Matan haratu kama lo usiusi tarea vara nořa God i pa vai kamim ha tatahola mata lavi mauri atu mo tovi kamim matana, ale matan vara i tueni kamim na suihana mata vai vevuhi na nomim hinau ūahu tari peresi na vavahinau ka lo vaira mata rasua, ¹² matan vara hijan nořa Moli Iesu i pa lavi na hasohaso hin kamim, ale kamim hinia, i usuri na ūromřuhu non nořa God peresi Moli Iesu Křisto.

2

Tamlohi Enia Meresahi Nona Leu

¹ Ale nake, mata mele mai non nořa Moli Iesu Křisto peresi na nořa pulutahi isana, la vorai peresi na vevorai, kama lo usi kamim ² vara ha sopo hisuhisu na ūromim teni ha matahu matan ka rongo te reti non te tanume, teni te sorasora, teni te leta la verea vara mo tai isamam, mo lo verea vara rani non Moli mo mai moiso. ³ Ha sopo tinařihira vara tea i halu kamim hin te malele, matan rani atu i pa sopo eři mai, i tiroma hin rani tavera atu tamlohi la pa vahaři hin God hinia, ale rani pala nona

tamlahi vaivaileu atu i pa usuria. Tamlohi atu, God i pa vaikomokomoa. ⁴ Enia i pa hase tahea aulu, ale i pa turuleji isana hinau tari sei tamlohi la tovira vara God teni te hinau mata lotu. Enia i pa sakele na lolo Temple, ale i verea vara enia God. *Dan 11.36; Ezek 28.2*

⁵ Ka ūromaliho vara na vere kamim hin la hinau atu hin rani atu na pa lo toho peresi kamim? ⁶ Ale nake natu, ka levosahi na sava mo lo turuhoroa matan i pa sopo eři malue na jara tavera i tikeli rani atu God mo viřonia matana. ⁷ Matan, suiha luhu atu mata vaivaileu mo pete voko moiso, pani i pa lo luhu i tikeli rani atu God i pa lavi nařihi haratu sei mo lo turuhoroa nake.* ⁸ Ale nake natu, haratu sei mo lo vaivaileu i pa pala, ale Moli Iesu i pa vilimateia na maromarona purongo, ale i pa vaikomokomoa na sasarami tavera hin rani atu vara i mele mai. *Isa 11.4*

⁹ Rani non tamlohi vaivaileu atu i pa pala na vavahinau non Setan, i pa pala na suiha tavera peresi na matamata halu tavera peresi na hina marurahi, ¹⁰ ale enia i pa vai na hina halu sasati tari matan vara i eři halu la haratu la lo vano na nora komokomo matan la ūrohu vara la rasu na retivarařuhu sei i eři jurira. ¹¹ Matana, God i pa sohai na hina haluhalu isara, matan vara la pa rasu la hinau haluhalu atu. ¹² Matan vara enira mo isoiso la pa lavi na talai matan la sopo rasu na retivarařuhu, pani matan la lo avulahi na hehe la lo vaira.

Kamim Ha Turu Rilangi Tarea

¹³ Pani mo tatahola vara tarea kama lo vere meje isan God matamim vorai peresi na vevorai sei Moli mo opoi kamim, matan God mo viřoni kamim vara kamim ha pa juri tiroma hin malele sei Tanume Tapu mo lo vairā ūra tapu hinia, ale matan ka lo rasu na retivarařuhu. ¹⁴ God mo tovi kamim hin na nomam Retiřuhu matan vara ha pa lavi na hasohason nořa Moli Iesu Křisto.

¹⁵ Ale matana, la vorai peresi na vevorai, ha turu ūlangi, ale ha taurilati vujangi sei kama lo vujangi kamim hinia moiso, na

retireti teni hin te nomam leta. ¹⁶ Ale nořa Moli Iesu Křisto hasena, God Tamařa sei mo opořa, ale na nona ūromřuhu mo sileřa na nanau matan tui tui peresi na ūromřuhu, ¹⁷ i pa nanau na mapumim, ale i turuhi ūlangi kamim na vavahinau tari peresi na retireti ūruh.

3

Paul Mo Usia Vara La Lo Usiusi Matana

¹ Ale isoiso hinau la vorai peresi na vevorai, ha usiusi matamam, vara reti non Moli i pa vano i vila na jara tari, ale vara tamlohi la pa hasohasoa sohen ka lo hasohasoa, ² ale matan vara God i pa juriřa isana tamlohi lejileji la sasati, matan mo sopo tamlohi tari la rasua. ³ Pani Moli i pa sopo tope na nona retitauhi, enia i pa turuhi kamim, ale i pa lo matahi kamim matan tamlohi sasati atu Tiapolo. ⁴ Ale nomam ūromřomi mo ūlangi hin Moli matamim vara ka lo vai na sava kama retileu hinira isamim moiso, ale vara ha pa lo vaira. ⁵ Kama usia vara Moli i vujangi kamim vara nona opoia isamim vara mo sohena sava, ale ha turu ūlangi hin Křisto.

Retiřoaraoahai Mata Maloko

⁶ La vorai peresi na vevorai, na hijan Moli Iesu Křisto na retileu isamim vara ha toho asau isan te vorai tinapua sei mo tamlohi maloko, mo sopo hani na masmasuna usuri na posposi sei kama lo verea isamim moiso. ⁷ Matan kamim ka levosahia vara ha pa usuri na nomam tovongi ūruh, matan kama sopo toho purongo hin rani atu kama lo toho peresi kamim. ⁸ Ale kama sopo hani te pereti sei vara kama sopo volia, ale kama lo voko mo ūlangi tarea, matan vara kama sopo tau te tetehi isan te vonamim hatea. ⁹ Mo sopo matan mo sopo tatahola vara kama usia isamim, pani matan kama opoia vara kama pa sile kamim na tovongi ūruh matea mata usuria. ¹⁰ Matan hin rani atu kama lo toho peresi kamim, kama sile retileu akerihi, mara vara tea mo sopo avulahi vara i vai na voko, ha sopo vahania.

¹¹ Matan kama lo rongoa vara tamlohi hai isamim la lo toho purongo, la sopo

* **2:7:** God i lavi nařihi: Tamlohi vujangi la sopo levosahia vara Paul mo lo verea hare mo lavi nařihi teni hare mo lo turuhoroa, ūromřomi enia vara Paul mo lo verea God mo turuhoroa hin te malele.

hahau i tataholo, pani la lo sanga hau.

¹² Ale nake, kama lo retileu, ale kama lo retiuetueni na tamlohi sohen harihi hin Moli Iesu Křisto vara la pa vai na nora voko na posposi malum matan vara la pa hani na masmasura purongo. ¹³ Pani isamim la vorai peresi na vevorai, ha pa sopo malokoloko mata vai na hina ūruhu. ¹⁴ Vara tea mo ūruhu vara i oloolo na sava kama lo verea hin leta nike, ha lavi na hijana, ale ha sopo mele pulutahi peresia matan vara i pa vaia i mahantuhanu. ¹⁵ Ale, pani, ha sopo kilaua vara enia meresahi matea, pani ha retiūroaōahaia sohena vorai vonamim matea.

Isoiso Reti

¹⁶ Nake, kama lo usiusi vara Moli mata tamata hasena, i pa sile na tamata tarea isamim na malele tari. Moli i pa toho peresi kamim mo isoiso. ¹⁷ Enau Paul, na lo uli retiololo nike na limaku haseku. Na vaia sohena matamata vararūhu vara ha pa hitevosahia vara enau na lo uli na noku leta sohena.

¹⁸ Romrūhu non Moli Iesu Křisto i lo toho isamim mo isoiso.

**Tiroma Leta
Paul Mo Ulia Isan
Timothy
Leta Nike**

Timothy mo lo usuri Paul na nona voko (Rom 16.21; 1Co 16.10; Php 2.19) mata nora rasua hin Iesu. Paul mo hitea sohena natuna matea (1.2). Timothy mo mai patu tamlohi na nona rani peresi Paul, enia tapalan Paul. Paul mo sohai leta sei isan Timothy, pani vujangi hinia mo tueni na mauri vao kalesia non God. Mo vujangi na malele tataholo vara ţa viřoni na patu tamlohi hinia, deacon la vai na vavahinau non God (3.1-7; 8-13; 5.17-20).

Reti non Paul akerihi ū epi rasua tarea: ‘Reti nike, o epi rasua ale mo tataholo vara o lavi vevuhia, vara, ‘Kristo Iesu mo mai na varama vara i juri na tamlohi hehe.’ Enau na sasati jea hinira. Pani God mo ūromopoiau matan hinaus sei, matan enau na sasati jea hinira, ale Iesu Kristo mo tauau vara a mai tovongi matea vara i vujangi na nona ūromperavu isan la haratu la pa rasua mata mauri tui.’ (1.15–16)

Hin Leta Nike

1. Retioloolo (1.1–2)
 2. Retivujangi mata mauri kalesia (1.3–3.13)
 3. Hina aulu na nořa lotu (3.14–4.5)
 4. Paul mo retituetueni Timothy (4.6–6.21)

Reti Tiroma

¹ Enau Paul, vahařule matea non Křisto
Iesu God mo viřoniau na nona suiha,
Křisto Iesu nořa Jujuri enia nořa řomtoho.
² Timothy, natuku hin nořa mauri rasua,
na lo usiusi matam vara God Tamařa
enia Křisto Iesu nořa Moli, la sileho na
řomřuhu, na řomopoia peresi na tamata.

Retiro aroahai Mata Vujangi Haluhalu

³ Sohen na verea ūlangi isam hin rani
atu na tauho Ephesus vara a vano Macedonia,
na verea vara o pa toho vara o sile na
reti isan la tamlohi atu vara la sopo vujangi
te vujangi tinapua, ⁴ teni vara la sopo usuri
te sorasora halu teni te sorasora vono mata
sava pina tuai la tataholo hinira, vuana
enia ūromūromi vono purongo, la hinau sei

la sopo tueni te tamlohi na mauri mata rasua hin God. ⁵ Pani norā ūromūromi tавера hinia, enia opoia, opoia mo tai isana mapu vokevoke peresi na rongovosahi na hinau tataholo, peresi na rasua vararuhi. ⁶ Tamlohi hai, la jalio, la posī la usuri na sorasora vono, ⁷ la opoia vara la mai tamlohi vujangi mata leu, pani la sopo levosahi na sava la lo verea teni na hinau sei la verea vara la levosahira mo ūruhi vara la tataholo teni mo vono.

⁸ Ale ūra levosahia vara Leu mo ūruhu,
pani vara tea mo lavia na posposi tata-
holo purongo, ⁹ ha levosahi harihi: God
mo sopo sile na leu mata tamlohi tata-
holo, pani isan la haratu la lo vaivaileu, la
haratu la sopo oloolo hin te tamlohi hatea,
la haratu la lo usuri na posposi varama,
la haratu la lo hehe, la haratu la sopo
sile na oloolo isan te hinau mata oloolo,
la haratu la lo vilimatei na tamara teni
tinara, la haratu la lo vilimatei na tamlohi
tinapua, ¹⁰ ale la haratu la lo vai na posposi
lumiha, tamlohi la vaivaileu peresi na tam-
lohi, hařai la vaivaileu peresi na hařai, la
haratu la lo tauri vanaho na tamlohi mata
la hařehira, ale la haratu la lo retihalu
tarea, la haratu la lo taviti halu na lolo
court, ale na posposi lejileji tarī sei la lo
turuleji na vujangi ūruhu sei, ¹¹ mo lo usuri
na Retiřuhu ūruhu non God sei enia
avulahi tavera, ale Retiřuhu sei mo taua
isaku.

Isaku.
12 Na vere meje isan Křisto Iesu nořa Moli, mo sile na řilařilangi isaku, matan mo hitea sohena vara a eři vai na masalona, ale mo vřoniu vara a volitusi isana,
13 hina purongo vara tiroma na lo verelejleji Křisto, na lo unuhi na nona tamlohi vara a komora, ale na kerekera, pani God mo řomopoiau mata na sopo lo levosahi na sava na lo vaia matan na sopo rasua, 14 Ale řomřuhu non nořa Moli mo mařivi savulevule matak na rasua peresi na opoia hin Křisto Iesu. 15 Reti nike, o eři rasua mo tataholo vara o lavi vevuhia vara; Křisto Iesu mo mai na varama vara i juri na tamlohi hehe. Enau na sasati jea hinira. 16 Pani God mo řomopoiau matan hinau sei, matan enau na sasati jea hinira, ale Iesu Křisto mo tauau vara a mai tovongi matea vara i vujangi na nona řomperavu isan la haratu la pa rasua mata mauri tui. 17 Nake, isan

Supe mata tauni tari, i sopo eři tihai, tea i sopo eři hitea, enia God matelete, řa pa silea na ooloolo tavera peresi na hasohaso na rani tui tui tarea. Amen.

Vavahinau Non Timothy

¹⁸ Timothy natuku, reti nike na lo verea isam, mo lo usuri na retimangovi sei la verea matam moiso, la pa tueniho vara o eři vai na vuro řuhu, ¹⁹ tarea o tauri řilangi na nom rasua peresi na nom rongovosahi na hinau mo tatahola, ale tamlohi hai la tau nařihira, la komo na nora rasua sohena boti mo vujahi kosahia na paranga. ²⁰ Tatuara sei, Hymenaeus enia Alexander, enau na taura la vano na liman Setan vara i pa vujangira vara la pa sopo mele turuleji hin God na nora vujangi haluhalu.

2

Vujangi Mata Lotu

¹ Tiroma, na lo verea řilangi vara tamlohi na nora usiusi mata tamlohi tari, la usi God mata tuetueni, la usiusi mata tinapua, ale vara la vere meje isan God. ² Mata supe peresi la haratu sei la lo tauri na suiha, matan vara řa pa eři mauri na mauri mo tamata, ale mo malum vara řa eři usuri na mauri tatahola, ale řa sile na ooloolo isan God. ³ Usiusi sohena, mo řuhu na nahon God, nořa Jujuri, ale mo avulahi hinia, ⁴ matan God mo opoia vara i juri na tamlohi tari, ale vara la pa levosahi na retivarařuhu.

⁵ Matan God enia matelete purongo, ale tamlohi tuetueni matelete purongo sei enia mo malele tamlohi la mai isan God, tamlohi atu enia Křisto Iesu, ⁶ mo hase silea sohena volituhu mata tamlohi tari, reti sei enia vereulia sei God mo silea na rani tatahola.

⁷ Matana, God mo vřioniau vara a mai vahařule matea, ale vara a mai tamlohi retivujavujangi matea, na lo vere na varvarařuhu na sopo halu, God mo řuleau vara a vujangi na tamlohi řořoha na malele rasua peresi na retivarařuhu.

Posposi Mata Hařai

⁸ Moiso, na opoia vara tamlohi na jara tari la usiusi, ale la tahe na limara tapu

isan God, i pa sopo te lolokoru teni vasvas hinira. ⁹ Sohena, na opoia vara tarea hařai la ruru na ruru na řomřomi řuhu i tatahola na naho tamlohi. Mo řuhu vara la sopo peri na vulura na malele tinatinapua peresi na hinau mata gold teni huřutavila teni ruru volina mo sahe aulu jea, ¹⁰ pani hin haratu purongo, mo tatahola mata hařai sei mo lo verea vara enia mo lo usuri posposi atu God mo opoia, peresi na vavahinau řuhu. ¹¹ Hařai la pa toho malum la tapurongo, ale la tatamahu vara la ooloolo matan vara la eři lelevosahi. ¹² Tarea, enau na sopo majinga vara hařai la vujangi teni la mai patu tamlohi la tiroma la aulu na tamlohi. Mo vono, enira la pa toho malum purongo, ¹³ matan God mo vai Adam tiroma moiso mo pa vai Eve.

Gen 2.7, 21-22

¹⁴ Ale Tiapolo mo sopo halu Adam, mo halu na hařai, ale mo tope na retileu non God.

Gen 3.1-6

¹⁵ Pani God i pa juri na hařai na tapetape, vara la lo turu řilangi na rasua, opoia, la hahau na mauri vokevoke peresi na posposi hasera taurilatira.

3

Patu Tamlohi Na Vao Kalesia

¹ Reti nike o eři rasua, vara tea mo tau na řomina vara i pa patu tamlohi rasua matea mata tamlohi rasua, mo opoi na vavahinau řuhu matea.* ² Ale matana, o kilau vara mo sopo te hinau na maurina, mo lahi na hařai matelete, mo hase taurilatia, enia tamlohi řomřomi, o hitea vara tamlohi la lo sile na ooloolo isana moiso, enia mo avulahi vara i lavi na tamlohi tinapua na imana, ale enia mo levosahi na posposi mata vujangi mo řuhu, ³ Ale, enia mo sopo tamlohi inu hajavua, mo sopo tamlohi valum, pani řomina mo malum, mo sopo tamlohi vasvas, ale mo sopo tamlohi řomjea na mania, ⁴ ale mo lo kilau mamahuni na lolo imana, ale natuna la sile na ooloolo isana, ale la ooloolo hinia. ⁵ Matan vara tea mo sopo eři kilau mamahuni na imana, i pa kilau mamahuni na vao kalesia non God sohena sava? ⁶ Enia i pa sopo tamlohi matea mo pa mai purongo na

* **3:1:** patu tamlohi rasua: řaramin reti sei, patu tamlohi enia tamlohi atu mo lo kilau na tamlohi rasua na jara matea.

mauri kalesia, matan patuna i pa sosohi na mangisi tavera, ale i jovi sivo na talai non Tiapolo. ⁷ Moiso aulu hin haratu, tamlohi na jingoima la verea vara maurina mo tataholo, ale matan i sopo eři jovi hin te vuna non Tiapolo, ale i mahantuhanu matana.

Malele Viřoni Na Deacon

⁸ Deacon sohena, o hitea vara tamlohi la lo sile na oloolo isara moiso, ale enira la sopo meme masanga, la sopo tamlohi inu hajavua, la sopo ūromtutuni na mania. ⁹ Ale la tauri ūrilangi na hinau luhu mata rasua na posposi sei tarea ūromira la tataholo na nahon God. ¹⁰ Ale o vaihitera tiroma vara ko sopo hite te hinau na maurira, ale o pa majinga hinira vara la volitusi sohena deacon.

Hařai Deacon

¹¹ Hařai sohena, vara la deacon, o hitea vara tamlohi la lo sile na oloolo isara moiso, la sopo sorasora tamlohi, la lo hase taurilatira, tarea la lo usuri na masalon God na hinau tari la lo vaira.[†]

¹² Deacon la lahi na hařai matelete, la lo kilau mamahuni na natura peresi na imara.[‡] ¹³ Matan la haratu la lo volitusi ūruhu sohena deacon la pa lavi na hija ūruhu nora, ale la pa lavi na ūromřilangi na nora rasua hin Křisto Iesu.

Posposi Tataholo Na Vao Kalesia

¹⁴ La hinau sei na lo ulia isam, na lo ūromtoho vara a pa vano isam vila, ¹⁵ pani vara te hinau mo tauriau, leta nike i pa tueniho vara o levosahi na posposi mo tataholo na vaon God. Vaona enia vao kalesia non God mauri, vao kalesia enia peri, ale enia lapiti retivarařuhu. ¹⁶ Hina tavera matea kama taviti hinia, pulo nořa rasua enia hina luhu matea:
Křisto, mo pala mo mai tamlohi,

Tanume Tapu mo vujangia vara enia natu Křisto,
angelo la hitea,
ale tamlohi la vereulia na mara jara tinatinapua tari,
moiso tamlohi na varama la rasua,

[†] 3:11: hařai: hai la verea vara hařai mo opoia vara i mai deacon, teni narou deacon. [‡] 3:12: hařai matea: mo sopo tipahi na narouna hin te rani. * 4:10: reti sei: God enia Jujuri nona tamlohi tari mata enia hasena i pa eři juri na tamlohi, pani i pa sopo tamlohi tari la pa mauri matan la pa sopo rasua, pani isan la haratu la rasu God nora Jujuri, enira la pa mauri.

ale God mo lavia mo sahe aulu na hasohaso na tuka.'

4

Vujangi Nona Tanume Sasati

¹ Pani, Tanumen God mo vere mamahunia vara na pongi hitahu tamlohi hai la pa vahaři na malele rasua matan la pa tapurongo isana tanume haluhalu peresi na vujangi non tanume sasati, ² ale retihaluhalu sei la pa tai isana tamlohi tapnetano, ūromira la sulimateira, ale la sopo mele levosahia vara sava mo tataholo, ³ ale enira la tapuhoro na lahi, moiso la horo na tatua hanhani sei God mo vaira matan vara la haratu la rasua la levosahi na retivarařuhu la pa lavira na vere meje, ⁴ matan hinau tari God mo vaira la ūruhu, ale mo sopo te hinau vara tamlohi la ūruhu hinia vara la lavia la vere meje matana moiso, ⁵ matan reti non God peresi na usiusi mo lo vai na hanhani la ūruhu na nahon God.

Paul Mo Retituetueni Timothy

⁶ Vara o vujangi la hinau sei isana vorai peresi na vevorai, o pa volitusi ūruhu non Křisto Iesu, matan ko hase vahaniho na Retiřuhu peresi na vujangi ūruhu sei ko lo usuria. ⁷ Pani o toho asau na sorasora vono la rongorongo vono, ale o hase vujangihio na posposi sei God mo opoia, ⁸ matan ūra levosahia vara, vara ko vai na epem mo ūrilangi, haratu mo ūruhu makomona purongo, pani vara tarea o lo usuri na posposi God mo opoia, i pa ūruhu jea na maurim tari, mo ūruhu mata maurin nake peresi na mauri atu i pa mai hitahu. ⁹ Reti nike o eři rasua, ale mo tataholo vara tamlohi la pa usuri vevuhia. ¹⁰ Matan harihi, ūra lo tau na ūromřa mo ūrilangi na vavahinau matana, ūra ūromtoho hin God sei mo mauri, enia Jujuri nona tamlohi tari, pani isan la haratu la rasua enia mo Jujuri vararuhu.*

¹¹ O retileu, ale vujangi na hinau nike. ¹² O sopo tinařihia vara tamlohi la hitesatihiho matan ko uluvou purongo, pani tarea o vai na tovongi ūruhu isana tamlohi

rasua na nom retireti, na nom vavahinau, na nom opoia, na nom rasua peresi na nom posposi vokevoke. ¹³ Ale i pa tikeli na rani a mai isam, o lo tau na ūromim vara tarea o lo evievi na Retitapu na naho tamlohi rasua, o lo vere mamahunira na malele tari mata mauri rasua, ale o lo vujangi na retivaraūruhu. ¹⁴ O sopo ūrompurongo hin nom silesilea atu God mo silea isam na retimangovi atu hin rani atu la patu tamlohi rasua na vao kalesia la usiusi la tau na limara na patum.[†] ¹⁵ Tarea o lo hahau usuri la vujangi atu, o tau veyuhi na ūromim hinira matan vara tamlohi la pa hitea vara ko lo ulua na mauri rasua. ¹⁶ O hase kilauho, o kilau mamahuni sava ko lo vujangia. O turu ūilangi hin la hinau sei matan vara o vaia o pa eři juriho peresi la haratu la lo tapurongo isam.

5

Vavahinau Nona Patu Tamlohi Rasua

¹ O sopo hapuhi na tamlohi taunina mo jeu na taunim, pani o usia i ūilangi isana sohen ko lo vaia isan tamam, ale o retireti isan la haratu taunira mo sopo lo jeu na taunim sohena tasim. ² Isana hařai taunira la jeu na taunim, o retireti isara sohen ko lo retireti i ūruhu isan tinam, ale o retireti i ūruhu isana hařai taunira la sopo jeu na taunim sohena vetasim, ale o sopo sile na masapa isam hasem mata o ūromlumiha hinira.

Ha Lo Kilau Na Hařai Malepu

³ O sile na ooloolo isana hařai malepu la haratu la hařai malepu varaūruhu, harasei mo sopo te tinapua vara la pa lo kilaura. ⁴ Pani vara te hařai malepu te natura teni nona vajiahia mo lo toho, mo ūruhu vara enira la vujangi na nora rasu na vavahinau mata la kilaua sohen hařai atu mo lo tapna kilaura tiroma, matan God mo avulahi hin posposi sei. ⁵ Hařai malepu varaūruhu mo sohen harihi, mo lo toho hasena, ale enia matea mo tau na ūromina isan God tarea, ale posina enia mata usiusi mata tuetueni na rani teni na vutepongi, ⁶ pani vara te hařai malepu mo lo ūromromia enia

hasena, mo lo mauri, pani mo mate moiso. ⁷ O retileu hin la hinau nike isara matan i pa sopo te masapa vara tamlohi la pa pisuhira. ⁸ Pani vara tea mo sopo kilau na tahisana, ale aulu hin haratu, mo sopo kilau la haratu na lolo imana, mo vahāri na posposi rasua, posina sei mo sati mo jeu la haratu la sopo rasu God.

⁹ O tau na hija hařai matea na pepa sei mo verea vara sava hařai malepu natu, vao kalesia i pa tuenira, hijan haratu purongo mo lahi vahatelete, ale taunina mo jeu mo ngavulu limarave. ¹⁰ Hařai atu tamlohi la lo verea tarea vara enia hařai matea mo lo vai na vavahinau ūruhu, ale vara te natuna, mo kilau mamahunira la mai la tavera, ale tarea mo avulahi vara i lo lavi na vinano la mai na imana, ale posina mo lo sile na ooloolo isana tapuhi tinatinapua non God, mo avulahi vara i hoje na palora, ale mo tau na ūromina vara i vai na vavahinau ūruhu tari.* ¹¹ O sopo uli na hija hařai malepu la sopo vajiahia matan masalora mata lahi mo jeu na ūromira vara la usuri Křisto, ale la pa rovo hinia matana. ¹² Matana, talai i pa mai isara matan la tope na nora retitauhi isan Křisto vara la pa sopo mele lahi. ¹³ Mo sopo haratu purongo, pani la hařai maloko vari purongo, la lo hahau ūalihi na jara la vavano na ima tinatinapua matan vara la aleale retireti. Enira la sopo vai na posposi mata maloko vari purongo, la lo sorasora tamlohi, ale la lo tau na ngalsura hin te hinau mo sopo te nora hinau hinia, ale la lo verea te hinau la sopo tatahola vara la verera. ¹⁴ Ale na lo verea vara i pa mele ūruhu jea vara hařai malepu la sopo vajiahia la mele lahi, la mele vasusu moiso, la kilau mamahuni na imara, ale la sopo sile na masapa isan nořa meresahi teni te masapa vara tea i retiřeřen hiniřa matara. ¹⁵ Matan hai la vano la posi moiso, la usuri Setan. ¹⁶ Pani vara te hařai rasua te hařai malepu la lo toho na vaona, i pa lo kilau mamahunira vara la sopo tau na tetehi isana vao kalesia atu, matan vao kalesia la pa lo kilau la haratu la hařai malepu varaūruhu.

* ^{4:14:} patu tamlohi rasua: la posia mo tinapua sohen harihi: patu tamlohi, elda teni bishop. O hite: 5.17, 19

* ^{5:10:} Leon Greek mo verea sohen harihi: vara mo hoje na palo tamlohi viřoni. Mo verea matan tuai la lo tau nora Sabbath na jingoima, ale posposi tatahola enia vara engko teni nom volitusi i pa hoje na palora.

Volin Patu Tamlohi Rasu

¹⁷ Na tavaluna, patu tamlohi rasua la ūruhū mata tiroma na vao kalesia, mo tataholo vara ha volira i vaha rua, sohen la haratu la lo voko ūlangi na nora retivujavujangi peresi na vujangi. ¹⁸ Matan, Retitapu mo verea vara, ‘Na rani buluk mo lo savahi na patu wit, ha sopo lasi na jingona vara i sopo eři hani te wit makomo atu’. *Deut 25.4* Ale mo mele verea vara ‘Mo tataholo vara tamlohi voko i lavi na volina’. *Lk 10.7* ¹⁹ Ale, o sopo tapurongo tiroma isan tea vara mo tuvai na patu tamlohi rasua matea, pani vara tamlohi mo rua teni mo tolu, la levosahia mo ūruhū vara tuvai atu mo tataholo, ale nake o eři tapurongo hinira. ²⁰ Vara te patu tamlohi rasua hatea mo lo usuri na nona hehe, o hapuhia na naho tamlohi rasua tari matan vara enira mo isoiso la pa matahu matana. ²¹ Na nahon God peresi na nahon Kristo Iesu peresi na angelo God mo viřonira, na lo sile na retileu isam vara o taurilati la retileu tari sei na lo verea isam vara o sopo opoi na tatuara purongo, ale o sopo vai te hinau na posposi tametame! ²² Ale o sopo vilavila vara o tau na limam hin te tamlohi matan varā o tahea vara i vai na vavahinau non Moli, o pa levosahi mamahuni na posina tako, vara i vono engko o pa hase komoho na nona hehe. O lo toho na mauri voke-voke. ²³ Ale o sopo inu na wai purongo, pani o lo inu na waen makomona matan pangem peresi na nom rojoa sei la lo toho isam. ²⁴ Hehe nona tamlohi hai la malue na jara tavera la tiromara na rani mata aria, pani te hehe nona tamlohi tinapua, la pa pala hitahu. ²⁵ Mo sohen haratu isana vavahinau ūruhū nona tamlohi, la memera purongo, pani vara la sopo pala tako, pani la pa pala hitahu.

6

Vavahinau Nona Slev

¹ Haratu la rasua, pani la lo slev, mo tataholo vara la sile na oolo lo isana nora tamlohi tatavera tarea matan vara tea i sopo eři retisatihi na hijan God teni na vujangi ūruhū. ² Vara slev te nora tamlohi tatavera la vorai rasua, la pa sile na oolo isara, matan enira la vorai rasua sohera, mo ūruhū vara la vai na vavahinau ūruhū isara, i jeu na tamlohi tatavera tinapua

matan, enira la vorai rasua, ale God mo opoira.

Reti Haluhalu Peresi Na Tavtav Vararuahu

Timothy o vujangi la hinau sei isana tamlohi, o verea ūlangi vara la pa oolo lo hinira. ³ Vara tea mo lo vujangi te vujangi tinapua, ale mo sopo majinga na reti tataholo non nořa Moli Iesu Kristo, peresi na vujangi sei mo lo usuri na mauri God mo opoia, ⁴ tamlohi sohena, mo mangisi jea, mo sopo levosahi te hinau hatea. Mo opoia hajavua vara i lo sorasora hin te hinau tamlohi la sopo levosahia vara mo vararuahu teni mo vono, ale mo lo retireti na hinau matuvana mata vasi purongo. Posposi atu mo lo vaia mo vai na tamlohi la lo mereimerei, la patumasa, la retireřen, la ūromřomi sati hinira, ⁵ ale tarea la vasvas peresi haratu ūromira la lejileji, mo sopo te retivarařuhu hinira, ale la ūromřomia vara posposi mata mauri rasua mo sile na masapa isara vara la tavtav, ⁶ vararuahu, posposi mata mauri rasua i pa vai na maurim i tavtav, pani isan la haratu purongo sei tarea la sopo ūromusuri te hinau tinatinapua, ⁷ matan ūra vora lekoleko na varama, ale vara ūra mate, ūra pa malue lekoleko. ⁸ Pani vara te hařa hanhani teni te nořa ruru, ūra pa avulahi matara, ⁹ pani la haratu la opoia vara la tavtav, la pa jovi na hina vahite, ale masalora mo lihora na hinau rongorongo vono peresi na hinau mata komora purongo, ale hinau sei mo putehi na tamlohi na komokomo tavera. ¹⁰ Matan, opoia mata mania enia pulo hinau mata hina sasati tari. Matan masalo sohena, mo reve nařihi na tamlohi hai na malele rasua moiso, ale la hase sarihira hin te rongosati matuvana.

Isoiso Reti Non Paul Isan Timothy

¹¹ Pani isam, tamlohi non God, o rovo hin la hinau sei. O tutungui na malele mata mauri tataholo, o tutungui na posposi atu God mo opoia, rasua, opoia, ūromperavu peresi na ūommalum. ¹² O vai na valum ūruhū mata rasua, o taurilati mauri tui atu God mo toviho hinia, peresi taviti ūruhū atu ko vaia na naho tamlohi matuvana. ¹³ Na lo verea na nahon God sei mo lo sile na mauri isana hinau tari la mauri, peresi

nahon Křisto Iesu sei mo vere na taviti ūruhu mata retivarařuhu na nahon Pontius Pilate, ale na lo verea vara ¹⁴ engko o pa taurilati retileu nike, o sopo malue nařihi hinia i tikeli rani atu Iesu Křisto nořa Moli i mele pala:

¹⁵ na nona rani tataholo,
enia haratu mo avulahi mo tavera jea,
ale enia hasena mo aulu na hinau tari,
enia Supe nona supe,

enia Moli nona moli.

¹⁶ Enia hasena, mo lo toho jejeu,
mo lo toho hin memera tavera atu
tamlohi la sopo eři mai mariviti hinia,
mo sopo lo tea i hitea,
teni tea i eři hitea.
Isana, řa pa sile na oloolo,
ale enia i pa lo tauri na suiha tui tui
tarea. Amen.

Haratu La Tavtav

¹⁷ Isan la haratu la tavtav nake na varama, o verea isara vara la sopo tau na ūromira i sahe aulu teni vara la ūromtoho na nora tavtav, matan řa sopo levosahia vara la pa toho i tikeli pangisa. Pani o verea isara vara la lo ūromtoho hin God hasena, matan enia mo lo sile na hinau tari isařa matan vara řa avulahi hinira.

¹⁸ O verea isara vara la lo vai na hinau la ūruhu, o verea isara vara la tavtav na nora vavahinau ūruhu, la pa hansohai, ale na nora ūromavulahi la tatamahu vara la asease na nora hinau. ¹⁹ Hin malele sei, la lo takonahi na tavtav tavera matara hasera, sohena pulo ūruhu matea matan mauri atu mo lo mai, ale o verea isara matan vara la eři taurilati mauri atu, enia mauri varauhu.

Isoiso Reti Non Paul

²⁰ Timothy o matahi la hinau sei God mo lo silea isam moiso. O sopo usuri na sora-sora vono teni te ūromřomi sei la verea vara enia ‘hina lelevosahi’ ²¹ matan tamlohi hai la lo turu hinia la lo vano malue na malele rasua moiso.

Noku usiusi vara ūromřuhu non God i pa toho isamim isoiso.

**Harua Leta
Paul Mo Ulia Isan
Timothy
Leta Nike**

Harua leta nike isan Timothy, mo lo reti sohena vara enia taman Timothy, mo lo ūromūromia na nona usiusi (1.2-3) matan mo opoia vara Timothy i mai tamlohi vuro ūruhu matea non Křisto ale i tatamahu mata lavi na rani ūilangi (2.1, 3).

Paul mo verea mara tamlohi rasua hai la jovi na hehe, ale matana, Tiapolo mo lo taurilatira na nona vuna, ale mo re-ti-roāohai Timothy vara i rovo na vaihite sei uluvou la lo tia hinira (2.20-26; 3.1-9). Mo verea vara i retivujavujangi na retiso-hai non God, hina purongo vara tamlohi la opoia teni mo vono (4.2). I pa lo kilau mata tamlohi vujangi haluhalu.

Paul mo levosahia vara i pa sopo tuai i pa mate, mo levosahia vara i pa lavi otori mata mauri sei God i pa silea mata nona turu ūilangi (4.6-8), ale mo mele verea vara Timothy i levosahi retivarařuhu akerihi:

Harihi enia retivarařuhu:
 Vara ūa mate peresia,
 ūa pa mauri peresia;
 vara ūa turu ūilangi,
 ūa pa tauri na suiha peresia;
 vara ūa vunvunia,
 i pa vunvuniřa,
 vara hina purongo vara ūa sopo ūomturu ūilangi,
 enia mo lo ūomturu ūilangi,
 matan enia i sopo eři posí na ūomina.
 (2.11-13)

Hin Leta Nike

1. Retiololo (1.1-2)
2. Ha sopo mahanuhanu hin Moli (1.3-18)
3. Mauri tamlohi vuro ūruhu (2.1-26)
4. Posi tamlohi na pongi hitahu (3.1-9)
5. Ha turu ūilangi tarea (3.10-4.8)
6. Retituetueni peresi na isoiso reti-ololo (4.9-22)

Reti Tiroma

* **1:6:** hin rani atu na tau na limaku hiniho: Patu tamlohi mata vao kalesia, la tau na limara hin la haratu la pa lavi te vavahinau non Moli matea. Hite 1 Tim 4.14.

1 Enau Paul, vahařule non Křisto Iesu usuri na masalon God mo usuri na reti-tauhi mata mauri sei mo lo toho hin Křisto Iesu.

2 Na lo uliuli isam Timothy natuku ūruhuřuhu; God Tama peresi Křisto Iesu nořa Moli la sile na nora ūomřuhu, ūomopoia peresi na tamata isam tarea.

Paul Mo Vere Meje Isan God

3 Timothy, na vere meje isan God matam. Enia God sei na lo volitusi isana sohen piku tuai la lo vaia, na vaia, ale ūomiku mo sopo tuvaiau hin te hinau, ale tarea na lo ūomřomiho na noku usiusi vara na rani teni na vutepongi. **4** Na opoia mo tavera vara a mele hiteho, matan na lo ūomřomi rani atu ko lo tangisiau, ale a pa avulahi tavera hin rani atu vara ūa mele tapatapaiřa. **5** Na levosahi na nom rasua vararuhu, mo lo usuri na rasua non nom pua Lois peresi non nom nana Eu-nice. **6** Matan haratu, na lo mele vereho hin pa silesilea atu God mo lo silea isam hin rani atu na tau na limaku hiniho* na lo verea vara o iriiria vara i lo pepe, **7** matan tanume atu God mo sileřa hinia mo sopo mata matahu, pani mata suiha, opoia peresi na posposi mata hase tauri-latiho. **8** Ale matana, o sopo mahanuhanu na vereulia non nořa Moli, teni hiniau, matan na lo toho na ima ūilangi, pani o pa tatamahu vara o lavi na rani ūilangi mata Retiřuhu hin suiha atu God mo silea.

9 Enia mo juriřa moiso, mo viřoniřa vara ūa hahau na mauri tapu tarea. Mo sopo mata nořa vavahinau, pani mata masalona peresi na nona ūomřuhu mo silea isářa hin Křisto Iesu tiroma moiso, varama mo pa tapulo, **10** pani nake masalon God atu, mo mera na maurin nořa Jujuri, Křisto Iesu, enia mo komo na suihan mateia, ale mo vuhesi mauri atu i pa sopo eři tihai hin te rani, sohena Retiřuhu mo verea, **11** God mo viřoniau matan vara a mai tamlohi retivujavujangi matea, a vahařule, ale a tamlohi vujangi matan Retiřuhu atu.

12 Matana, na lo lavi na rani ūilangi nike na ima ūilangi. Pani enau na sopo mahanuhanu matana, matan na

levosahi haratu na lo rasua, ale na levosahi mamahunia vara enia i pa eři tau mamahuni na sava mo retitauhi vara a pa lavia, i tikeli rani tavera atu a pa lavia. ¹³ O usuri mamahuni tovongi ūruhu atu mata noku vujangi sei ko lo rongora isaku, mo usuri na tovongi mata rasua peresi na opoia hin Kristo Iesu. ¹⁴ na suihan Tanume Tapu atu mo lo toho hiniřa, o matahi mamahuni retivarařuhu ūruhuřuhu atu God mo silea isam.

¹⁵ Timothy ko levosahia moiso vara tamlohi tari nike na province matan Asia la vaharī hiniau, ale Phygelus peresi Hermogenes enira tatuara. ¹⁶ Na lo usi God vara i pa ūromopoi na vao iman Onesiphorus, matan tarea mo lo vai na ūromiku mo avulahi, ale matan mo sopo matahu vara i mai isaku na ima ūrilangi, ¹⁷ ale hin rani atu mo pala Rome mo lo aleau vavano mo pa tapaiau, ¹⁸ na lo usi Moli vara i ūromopoia hin rani tavera atu. Ale ko levosahi mamahuni na nona vavahinau tari sei mo lo vaira matakui sei Ephesus.

2

Tamlohi Vuro Non Iesu Kristo

¹ Natuku Timothy, ūromřuhu sei mo lo toho isan Kristo Iesu, i pa tueniho na nona suiha, ² ale sava vujangi ko rongoa isaku moiso na naho tamlohi matuvana, o mele silea isana tamlohi sei, la taurilati na nora retitauhi tarea, ale la eři vujangi mamahunia na tinapua hinia, ³ o tatamahu mata lavi na nom rani ūrilangi sohena tamlohi vuro ūruhu matea non Kristo Iesu. ⁴ Mo sopo te tamlohi vuro i lo usuri na mauri tamlohi purongo matan nona ūromřomi enia vara i vai haratu mo viřonia i avulahi. ⁵ Tamlohi roro matea i pa sopo eři lavi na otori mata roro vara mo sopo usuri na leu mata roro. ⁶ Mo tatahola vara tamlohi ūrilařilangi mata voko na isa i lavi na vua asitauni tiroma. ⁷ O lo ūromřomi na sava na lo verea, matan Moli i pa sileho na lelevosahi matan la hinau tari atu.

⁸ O tau na ūromim hin Iesu Kristo, tahisan Supe David tuai, enia mo mele turu na mateia sohen na lo retivujavujangi hinia na noku Retiřuhu, ⁹ matan na lo retivujavujangi hin Retiřuhu sei, na lo lavi na

rani ūrilangi, la pesiau na jen sohena tamlohi sasati matea. Pani tea i sopo eři taurilati na reti non God! ¹⁰ Ale matana, na lo turu ūrilangi hin la hinau atu matan vara la haratu God mo viřonira la pa eři juri, ale la lavi mauri atu hin Kristo Iesu peresi na hasohasona tavera sei mo sopo te isoisona.

¹¹ Harihi enia retivarařuhu:

Vara ūra mate peresia,

ūra pa mauri peresia;

¹² vara ūra turu ūrilangi,

ūra pa tauri na suiha peresia;

vara ūra vunvunia,

i pa vunvuniřa;

¹³ vara hina purongo vara ūra sopo ūromturu

ūrilangi,

enia mo lo ūromturu ūrilangi,

matan enia i sopo eři posí na ūromina.

Tamlohi Ruhu Mata Voko

¹⁴ O mele verera hin la hinau nike, ale o retileu isara na nahon God vara la sopo vauriuri mata retireti, matan posposi sei mo sopo vai te hinau i ūruhu, pani i pa komo na rasua non la haratu la lo tapurongo hinira. ¹⁵ O lo kilau mamahu vara o lo hahau tatahola na nahon God na posposi mo opoia, sohena tamlohi voko matea mo sopo te hinau vara i pa mahantuhanu matan enia mo vujangi mamahuni na retivarařuhu. ¹⁶ Pani o toho asau na retireti vono nona tamlohi varama purongo, matan enia i pa vai la haratu la lo usuria la mele sati jea na posposi varama, ¹⁷ ale nora retireti la pa varhasahi sohena ūranga sola sohen Hymenaeus peresi Philetus, ¹⁸ enira la lo jalio na malele mata retivarařuhu la vujangia lara rani sauteterahi mo pete masese moiso, retireti sohena mo komo na rasua nona tamlohi hai.

¹⁹ Pani retivarařuhu non God mo sohena pulo datu matea mo lo turu ūrilangi, ale uliuli hinia mo verea vara, ‘Moli mo levosahi na nona tamlohi’ ale ‘la haratu la lo verea lara enira la tamlohi non Moli, la pa vaharī na posposi sasati tari’.

Num 16.5

²⁰ Na iman tamlohi tavera matea, o pa sopo hite na pesin la vaia na gold teni silver purongo, pani o pa hite te pesin la vaia na pahai teni lepa. Hai la tauhasehira mata hanhani tavera purongo, hai mata hanhani purongo.

²¹ Matana, vara tea mo lo toho asau na posposi sasati, i pa sohena pesin la tauhasehia mata vavahinau ūru purongo, la tapuhia mata vavahinau ūru non tamlohi tavera matan ima atu, mo lo tatamahu mata vavahinau ūru tari. ²² Ale matana, o rovo na masalo uluvou, ale o tutungui na posposi tataholo, rasua, opoia peresi na tamata peresi la haratu sei la lo tovi Moli la haratu mapura la vokevoke.

²³ O toho asau na ūromūromi sei la rongorongo vono, ale sorasora vono, ko levosahia vara vuan hinau atu enia vasvas purongo. ²⁴ Ale volitusi non Moli i pa sopo tamlohi vasvas, pani posina i pa ūru na tamlohi tari, i pa eři vujangi, i pa ūromperavu, ²⁵ i pa vaitataholoi la haratu la turuposi hinia na ūommalam. Korong God i pa silera na massapa teni i vono vara la eři vahaři na nora hehe, ale la levosahi na retivarařuhu, ²⁶ ale vara ūromira la mele mai, la eři rovo na vuna non Tiapolo, matan tiroma enia mo taurilatira matan vara la pa vai na masalona.

3

Na Pongi Hitahu

¹ Pani o lo levosahi harihi: na pongi hitahu, rani ūrilangi sasati la pa mai. ² Matan tamlohi la pa hase opoira, la pa opoi na mania, la pa hase taura aulu, la pa hapa-hapa, la pa retiretileji, la pa sopo oloolo na tamara teni tinara, la pa sopo vere meje matan te hinau, la pa sopo sile na oloolo isan te hinau mata oloolo, ³ mo sopo te ūromopoia hinira, ūromira la pa sopo jovi matan te hina ūru tea mo vaia isara, la pa verelejileji na hija tamlohi tinapua, la pa usuri na masalora purongo, la pa ūrompurongo na mauri, la pa ūrohu na hina ūru, ⁴ la pa tamlohi turuposi, la rongorongo vono, la ūromvono, la ūromaulu, la pa opoia vara la rongo i ūru purongo, pani la pa ūrohu vara la opoi God, ⁵ o pa hitera la vaia sohena la lo usuri na posposi God mo opoia, pani la pa sopo levosahi na suiha matan mauri sei God mo lo silea. Ale o sopo tapala peresi na tamlohi sohen haratu, ⁶ matan vonara hai la lo unu na ima tamlohi vara la haluhalu na hārāi rongorongo vono sei hehe nona hārāi la puhonira, ale masalora sasati tinatinapua

la lo revera, ⁷ tarea la hārāi atu la opoia vara la lavi na lelevosahi, pani la pa sopo eři tikeli na levosahi mata retivarařuhu. ⁸ Mo sohen Jannes enia Jambres sei la ruleji hin Moses tuai, ale la tamlohi nike sohena la turuposi na retivarařuhu, ale la lo vaikomokomo na ūromira, ale na mauri rasua, God mo tipahira. *Exo 7.11* ⁹ Pani la pa sopo eři turu i tuai, matan tamlohi la pa hitevosahia vara nora rongorongo vono mo sohen la tamlohi tupra rua atu tuai.

¹⁰ Pani engko, ko lo usuri na noku vujangi, posiku, ūromiku mata mauri, noku rasua, noku ūromperavu, noku opoia, posiku mata turu ūrilangi, ¹¹ ale ko levosahia sohena sava tamlohi la pa tipahiau, ale rani ūrilangi sei tamlohi la lo silea isaku hin la jara sei Antioch, Iconium peresi Lystra, la rani tipahi atu la sati jea, pani noku Moli mo juriau hin la hinau tari atu! ¹² Varařuhu, na lo verea vara tamlohi la pa tipahi na tamlohi tari sei la opoia vara la usuri mauri atu God mo opoia hin Křisto Iesu. ¹³ Pani tamlohi sasati peresi na tamlohi halu la pa mai la mele sasati jea, la pa lo halu, ale tamlohi la pa halura.

¹⁴ Pani engko o lo turu ūrilangi na hinau tari ko lavira moiso, ale ko levosahia mo ūru vara enira retivarařuhu, matan ko levosahi hare mo vujangihinira, ¹⁵ ale mo tapulo na rani engko ko pa lo natirihi ko pa levosahi na Retiulia tapu, enira natu purongo la eři vaiho o lelevosahi mata juri na malele rasua hin Křisto Iesu. ¹⁶ God mo mangovi na Retitapu tari, enira la ūru mata vujangi, mo ūru mata i vaitataholoi na ūromūromi mo sopo tataholo, mo ūru mata i mele vaitataholoi na posposi tamlohi, ale mo ūru mata vujangi na malele matan mauri atu mo tataholo, ¹⁷ matan vara tamlohi non God i mai tamlohi eřieri matea matan mo tatamahu moiso mata vavahinau ūru tari.

4

¹ Na nahon God peresi Křisto Iesu, enia haratu sei i pa aři la haratu la lo mauri peresi la haratu la mate hin rani tavera atu i pa pala, ale i pa Supe na varama, enau na lo vere harihi isam, ² o retivujavujangi na Reti non God; o tatamahu tarea vara o vaia, hina purongo vara tamlohi la opoia teni la

ŕohu hinia, o pisuhi na hehe nona tamlohi, o vere mamahunia na posposi lejileji, o retituetueni, ale o ūromřomi peravu hin la hinau sei.

³ Matan rani mo lo mai vara tamlohi la pa sopo tapurongo na vujangi ūruhu, pani la pa takonahi la tija atu sei la lo vujangi la hinau sei mo lo usuri na masalora purongo. La pa usuri na vujangi purongo sei mo memeje na perora. ⁴ La pa pelati na perora la vahāri na retivararūhu, ale la pa usuri na sorasora halu mata hinau matan tuai.

⁵ Pani engko, tarea ūromim i lo mera, o turu ūrlangi na rani ūrlangi, o vai na vavahinau nona evangelist, o vai vevuhi na nom vavahinau. ⁶ Matan nake mauriku la sureia mo sohena wai silesilea matea isan God, noku rani mate mo mai moiso. ⁷ Na pete vai na valum ūruhu peresi na maromaro moiso, matan na turu ūrlangi hin retivararūhu atu na lo vujangia mo tikeli nake. ⁸ Ale nake, God mo tau mamahuni na ūrongo ūrongo nona supe mataku mata noku mauri tataholo. Moli sei enia haratu mo lo ari tataholo, i pa silea isaku hin rani tavera atu, ale mo sopo isaku haseku, pani isan la haratu ūromira mo tavera la lo kilau mata nona mele pala na varama.

Retireti Mata Tueni Timothy

⁹ Timothy, o vahitea vara o mai isaku vila. ¹⁰ Matan Demas mo opoi varama nike, ale mo rovo hiniau mo vano Thessalonica, ale Crescens mo vano Galatia, ale Titus mo vano Dalmatia. ¹¹ Luke hasena mo lo toho peresiau.

Mo ūruhu vara o lavi Mark i mai matan i pa eři tueniau tavera na vavahinau non Moli. ¹² Na ūrule Tychicus mo vano Ephesus. ¹³ Vara ko mai, o lavi na noku ruru hamariri sei na taua na iman Carpus na vanua Troas. O lo ūromřomia vara o pa lavi na puku atu, ale o sopo ūromaliho na viriviri pepa.* ¹⁴ Alexander tamlohi atu mo lo voko na aen kopa, enia mo vaisatihiau, pani Moli i pa volia i tataholo na sava mo vaia. ¹⁵ O lo kilauho hasem matan Alexander, matan enia mo lo tuleiji ūrlangi na nořa retisohai. ¹⁶ Tiroma

na noku vahite na nahon Supe matan Rome, tea mo sopo turu peresiau, pani enira mo isoiso la rovo hiniau, i pa ūruhu vara God i ūromira matana. ¹⁷ Pani Moli mo lo turu na pahisaku, mo sileau na suiha matan vara a eři retivujavujangi vevuhi na nona retisohai isana tamlohi ūrořoha, matan vara la eři rongovosahia. Pani Moli mo juriau, vara i vono, la viliau moiso. ¹⁸ Moli i pa juriau na vavahinau sasati tari vara la pa sopo komoau, ale i pa laviau a unu hin mauri atu mo supe hinia na tuka. Isana, hasohaso tavera i vano mata rani tui tui, tarea. Amen.

Isoiso Reti

¹⁹ O sile na noku retiololo isan Priscilla enia Aquila peresi na vao iman Onesiphorus. ²⁰ Erastus mo lo toho Corinth, Trophimus na taua mo rojo na taon Miletus. ²¹ O to vahitea vara o mai tioma moiso i pa taro hamariri. Eubulus, Pudens, Linus, Claudia peresi na vorai tari na rasua la sohai na nora retiololo isam.

²² Noku usiusi vara Moli i pa lo toho na maurim, nona ūromřuhu i pa lo toho isamim.

* ^{4:13:} viriviri pepa: Hijan hinau sei tuai la lo uli na Retiulia non God hinia la vaia na huri nani, teni pepa.

Titus Leta Paul Mo Ulia Isan Titus Puku Nike

Paul mo lo vere na hijan Titus na nona leta mara mo lo usuria hin rani atu mo lo vavahinau Asia Minor peresi Greece (2Co 2.13; 7.6, 13; 8.6, 16, 23; 12.18; Gal 2.3). Paul mo verea vara i pa viřoni na patu tamlohi nona kalesia atu na Uren Crete.

Pani Paul mo vere Titus vara te hinau la pa tataholo tiroma sohen harihi: hijara la pa ūruhu (1.5-9) ale i pa tataholo vara la sopo hase vaira la lumiha na posposi sei la sopo tataholo nona tamlohi non God moiso (1.10-2.9).

Paul mo verea vara mauri paro nike mo mai matan savā God mo vaia hin Iesu Křisto: God mo jurira, mo hojera na nona reti na suihan Tanume Tapu matan vara la pa tau na nora ūromtoho na mauri tui:

'Mo juriřa, pani mo sopo matan te pospositataholo řa vaia, pani mata nona ūromopoia, mo juriřa na malele vora paro, ale mo hoje nařihi na nořa hehe, mo vaiřa řa turu na mauri paro, la hinau sei mo vaira na suihan Tanume Tapu. God mo sile purongoi na Tanume Tapu isařa hin Iesu Křisto nořa Jujuri.' (3.5-6)

Hin leta nike

1. Retiololo peresi na usiusi matan Titus (1.1-4)
2. Retileu mata patu tamlohi kalesia (1.5-16)
3. Retileu mata tamlohi kalesia (2.1-3.11)
4. Retituetueni peresi na isoiso retioloolo (3.12-15)

Retiololo Isan Titus

¹ Leta nike, enau Paul na ulia, enau volitusi matea non God, ale vahařule non Iesu Křisto, matan vara a tueni na rasua non la haratu God mo viřonira, vara la pa levosahi na hina varafuhrmo lo tuenira vara la pa hahau na malele God mo avulahi hinia, ² i usuri ūromtoho atu mata mauri tui, haratu God mo sopo halu mo retitauhi hinia na pongi tiroma. ³ Na rani tataholo

God mo taua moiso, mo vuhesi na nona reti na malele retivujavujangi, haratu God nořa Jujuri mo silea isaku usuri na nona retileu. ⁴ Leta nike, mo vano isam Titus, natuku tataholo na nořa rasua, ūromfuhu peresi na tamata non God Tamařa peresi Kristo Iesu nořa Jujuri la mai isam.

Vavahinau Non Titus

⁵ Hin rani atu na malue na ureuren Crete, na tauho matan vara o pa vai vevuhi tataholoi na sava na sopo isoiso hinia, ale vara o pa viřoni na patu tamlohi mata vao kalesia na taon tari atu, sohen na verea isam. ⁶ Patu tamlohi matea mo sopo te hinau na maurina vara tea i eři pisuhia matana, narouna matea purongo, natuna la rasu Moli, ale la sopo lavi na hija sati mata lejileji teni matan la sopo oolo. ⁷ Patu tamlohi atu mata kilau na vavahinau non God, i pa sopo tea i eři pisuhia hin te hinau na maurina, enia i pa sopo tamlohi matea mo lo ūrompurongo na tinapua, i pa sopo tamlohi lolokoru vila, i pa sopo tamlohi inu hajavua matea, i sopo tamlohi valvalum matea, moiso enia i pa sopo tamlohi haluhalu matea mata mania.* ⁸ Pani i pa tamlohi matea imana mo roi isana tamlohi tari, mo opoia vara i tueni na hinau mo ūruhu, ūromřomi ūruhu mo lo toho isana, nona aria mo tataholo, mo vokevoke, moiso ūromina mo ūlangi vara i taurilati na masalona. ⁹ Enia i pa tauri ūlangi reti atu řa eři rasua sei haratu la vujangia moiso matan vara i eři tueni na tinapua na vujangi tataholo, ale i turuhoro la haratu la lo turuleji hinia.

Ha Lo Kilau Mata Vujangi Haluhalu

¹⁰ Matan, tamlohi matuvana la ūruhu vara la oolo na tamlohi la lo tauri na suinha, la lo verevere vono, ale la tamlohi halu, na lo vere la haratu na vao tairalihi. ¹¹ O sopo tinařihia vara la vujangi matan la lo komo na vao ima matan la lo vujangi na hinau mo sopo tataholo vara la vujangia, la lo vaia matan vara la pa lavi na mania. ¹² Tuai, vonara matea nora přovet matea mara Crete, mo verea vara,
'Mara Crete
la lo retihalu tarea,
la tamlohi sasati,

* ^{1:7:} tamlohi mo kilau na tamlohi rasua: Greek mara bishop - patu tamlohi mata tamlohi rasua.

la maloko vari,
la lo sohena poi.'

¹³ Retivuhesi sei mo lo verea mo vararuhu. Matan haratu, o hapuhira i ūilangi matan vara nora rasua i mauri i ūihu, ¹⁴ ale la pa sopo mele tapurongo na sorasora vono nona Jew teni na retileu non la haratu la lo ūihu na retivararuhu. ¹⁵ Isana tamlohi ūomira la vokevoke, hinau tari la ūihu, pani isana tamlohi ūomira la hehe, ale la sopo rasua, hinau tari la vaia mo sopo ūihu. Tarea hehe mo tavuni na ūomira, la sopo mele levosahia vara sava mo tataholo teni sava mo sati. ¹⁶ La lo verea vara la levosahi God, pani nora vavahinau mo lo vujangia mo memera vara enira la sopo levosahia, la sasati, la sopo oolo hin God, ale la sopo ūihu matan vara la vai te hinau i ūihu.

2

Vujangi Tataholo

¹ Pani engko, o pa vujangi na sava hinau mo usuri na retivararuhu purongo. ² O vujangi na vajiahā vara la pa hase taurilatira, ale posira i tataholo matan vara la lavi na oolo matana, na nora vavahinau tari, la pa vaira i usuri na posposi lelevosahi, ale nora rasua i ūilangi vararuhu peresi na nora opoia, ale nora turu ūilangi tarea. ³ Hařai jea sohena, o vujangira vara la vai na posira i tataholo matan vara la pa lavi na oolo matana, la sopo sorasora tamlohi, moiso la sopo slev nona wai ūilangi, pani la pa vujangi na sava hinau mo ūihu, ⁴ moiso la pa tatamahu vara la vujangi na hařai lahi vara la pa opoi na tuara peresi na natura i ūihu, ⁵ vara nora vavahinau tari la pa vaira i usuri na posposi lelevosahi, ale ūomina i ūilangi hin tuana purongo, ale la pa hařai ūihu na posposi kilau mamahuni na lolo imara tarea, la ūomruhu, tarea la oolo hin tuara, matan vara i pa sopo sile te masapa vara te tamlohi i veresatihi na reti non God matara. ⁶ Uluvou sohena o pa retituetueni isara vara la vai na posira i tataholo matan vara la lavi na oolo matana, ⁷ na vavahinau tari la lo vaira, engko o pa vujangira na tovongi ūihu na nom vavahinau vara la eři usurira, ale na nom vujangi o sopo vaia mata masalom,

pani mata masalon God na posposi tataholo, ⁸ ale nom reti i pa tataholo vararuhu matan vara i pa sopo sile na masapa vara nom meresahi la pa veresatihi matan vara la haratu la meresahi isam, la pa manuhananu matan mo sopo te hinau sasati vara la pa verea matařa. ⁹ O vujangi na slev vara la oolo hin nora moli na hinau tari, la pa vahitea vara la vaira la avulahi tarea, la sopo talai vara nora moli, ¹⁰ ale la sopo vavanaho isara, pani la vujangia isana nora moli vara la eři rasura, matan posira i pa vai na tamlohi la opoia vara la tapurongo na retisohai non God nořa Jujuri.

¹¹ Matan God mo vujangi na nona ūomruhu mata juri isana tamlohi tari.

¹² Mo vujangira vara ūa isoiso na posposi hehe peresi na nořa masalo varama, ale nake na varama ūa lo toho na mauri ūa hase taurilatira, ūa tataholo, ale ūa usuri posposi atu God mo opoia, ¹³ enřa ūa pa usuri la hinau atu nake ūa lo sasaovi matan nořa ūomtoho atu, rani atu nořa God sei nořa Jujuri Iesu Křisto i pa mele pala na hasohasona tavera hinia, ¹⁴ enia sei mo hasena silea matařa vara i volituhuřa na suiha vaivaileu tari, ale vara i onehira matan vara ūa mai nona tamlohi, ale matan vara ūa ūomjea tarea mata ūa vai na vavahinau ūihu. *Psa 130.8; Exo 19.5*

¹⁵ Enira natu, la hinau atu o pa vujangira. O retituetueni, ale o retitataholoira na nom suiha mata aulu. O sopo tinarihia vara tea i hitelehilehi na nom reti.

3

Mauri Tataholo

¹ O mele vere na tamlohi rasua vara la sile na oolo isana tamlohi aulu peresi la haratu la lo tauri na suiha, ale vara la pa oolo hinira, la tatamahu vara la vai na hina ūihu tarea. ² O vujangira vara la sopo veresatihi na tinapua, la vahaři na vasvas, ale la ūomruhu, ale posira la vujangi na ūommalum isana tamlohi tari, ³ matan tiroma moiso enřa sohera, ūa rongorongo vono, ūa lejileji, tamlohi la haluřa, ūa slev na masalo varama peresi na hinau ūa opoira jea, ūa lo usuri na posposi vaisatihi na tinapua peresi na posposi mereimerei moiso tamlohi la ūihu hiniřa, ale ūa ūihu

hinira. ⁴ Pani na rani God nořa Jujuri mo vujangi na nona ūromruhu peresi nona opoia isařa, ⁵ mo juriřa, pani mo sopo matan te posposi tataholo ūra vaia, pani mata nona ūromopoia, mo juriřa na malele vora paro, ale mo hoje narihi na nořa hehe, mo vaiřa ūra turu na mauri paro, la hinau sei mo vaira na suihan Tanume Tapu. ⁶ God mo sile purongoi na Tanume Tapu isařa hin Iesu Křisto nořa Jujuri, ⁷ matan vara ūra pa eři mai natuna, ale matan vara ūra levosahi mamahunia vara ūra pa mauri jejeu, matan nona ūromruhu mo vaiřa ūra tataholo na nahona.

⁸ Reti nike, ha eři rasua, ale na opoia vara o vere mamahuni la reti nike, matan vara la haratu la tau na nora rasua hin God la pa tatamahu vara la tau na ūromira vara la vai na sava mo ūruhu. La reti nike, la ūruhu mata tuetueni isana tamlohi tari. ⁹ Pani o vahaři na sorasora vono peresi na sorasora mata mahapira, ale o vahaři na vasvas peresi na vauriuri mata Leu, matan la sopo eři tueni tea, ale enira la sopo ūruhu hin te hinau. ¹⁰ Isana tamlohi mo patumasa, o pa retiřoařoahai vaha rua, pani vara mo sopo tapurongo, o tipahia, ¹¹ o pa eři levosahi mamahunia vara tamlohi sohena, enia mo vahaři na retivarařuhu, mo hehe, mo hase tau na talai isana.

Isoiso Reti

¹² Titus, vara a ūrule Artemas teni Tychicus isam, na opoia vara o vahitea vara o mai isaku Nicopolis matan enau a pa toho atu na taro hamariri. ¹³ O tueni Zenas tamlohi lelevosahi mata leu atu peresi Apollos na malelera, o silera na sava la opoia mata malelera. ¹⁴ Mo ūruhu vara nořa tamlohi la levosahia vara la tau ūromira mata tueni na tinapua, isan la haratu la vejuveju, ale o verea isara vara la sopo toho purongo. ¹⁵ Tamlohi tari nike peresiau, la sohai na retioloolo isam. O sile retioloolo sei isan la haratu la opoi kamam na rasua. Romruhu non God i toho isamim mo isoiso.

Philemon

Leta

Paul Mo Ulia Isan

Philemon

Leta Nike

Philemon enia tamlohi tautavu matea, nona slev la lo kilau na nona ima tavera, ale kalesia matuvana la lo matavuhi ea (1.2). Korong mo lo toho Colossae, matan leta Paul mo ulia isana mara Colossae mo vere na hijan nona slev sei Onesimus (Col 4.9, 17).

Paul mo lo uliuli na ima ūilangi, mo uliuli matan Onesimus mo rovo na iman Philemon. Onesimus mo mai kalesia matea na rani mo tapai Paul, ale Paul mo uliuli isan Philemon vara i mele lavi Onesimus na imana sohena tapala matea hin Moli.

Hin leta nike

1. Retiololo isan Philemon (1-3)
2. Paul mo vere Philemon hin Onesimus (4-22)
3. Isoiso retiololo peresi na nona usiusi (23-25)

Tapulo Reti Isan Philemon

¹ Enau, Paul peresi voraiřa Timothy nike, kama uli leta nike isam Philemon. Nike Rome, na lo toho na lolo ima ūilangi, mata noku vavahinau na lo vaia matan Křisto Iesu. Ale engko tapalamam, kama lo hiteho sohena voraimam matea na vavahinau non Moli. ² Ale leta nike, mo vano isan vevoraiřa Apphia sohena, ale isan Archippus tamlohi vuro matea mata rasua sohemam hin Iesu, ale isana vao kalesia la lo matavuhi na imam. ³ Romřuhu peresi na tamata non God Tamara peresi Moli Iesu Křisto i pa toho isamim.

Opoia Rasua Non Philemon

⁴ Tarea na noku usiusi na lo vere meje isan noku God matam, ⁵ mata na rongoa vara nom rasua hin Moli Iesu peresi na nom opoia isan la haratu la tapuhi non God, mo ūilangi. ⁶ Enau na lo usiusi vara nom mauri rasua sei ko lo vujangia isana tamlohi rasua tinapua, i pa ulua, matan vara o pa levosahi mamahuni na hina ūru matuvana na mauriřa matan Křisto.

⁷ Voraiku, nom opoia mata tamlohi tina-pua mo vaiau na avulahi mo tavera jea, ale mo tahe na ūomiku matan ko lo tueni na ūom tapuhi non God la mele ūilangi.

Paul Mo Usi Philemon Matan Onesimus

⁸⁻⁹ Ale matan ko opoi na tapuhi non God, enřa rua ūa levosahia vara i pa tataholo vara a vereho vara o vai na hinau tata-holo purongo, pani na posposi opoia, na lo usiřo vara o vai na hinau matea. Enau Paul na vajaha nake, ale na lo toho na ima ūilangi matan Křisto Iesu, ¹⁰ ale na lo retireti matan nom slev sei Onesimus, enia mo mai natuku na rani sei mo lo rohiau nike na ima ūilangi. ¹¹ Tiroma mo sopo ūruhu matan te hinau hatea isam, pani nake mo ūruhu isařa, enřa rua. ¹² Hina purongo vara na opoia mo tavera jea, na lo ūrulea vara i mele hilu mai isam. ¹³ Na pa lo opoia vara i lo toho peresiau matan vara i lavi na jaram nike, vara i tueniau na noku rani ūilangi mata Retiřuhu na ima ūilangi. ¹⁴ Pani na sopo opoia vara a vai te hinau ko sopo avulahi hinia, teni matan vara te hina ūruhu o pa vaia, o pa vaia i usuri na masalom purongo, pani mo sopo matan na lo ngurunguru hinia. ¹⁵ Korong Onesimus mo rovo hiniho mata makomo rani purongo, matan vara i mele mai isam i pa toho jejeu, ¹⁶ pani nake, enia mo sopo slev purongo, pani mo jeu na slev, isaku enia vorai ūruhuřuhu matea, ale vararuhu enia i pa sohena isam, i pa mele hilu isam sohena tamlohi tuetueni matea, ale vorai matea hin Moli. ¹⁷ Ale vara ko lo ūromřomia vara enřa ūa tapala, o mele lavi Onesimus i mai isam sohena ko laviau. ¹⁸ Vara Onesimus mo lejihio teni mo ave hin te hinau isam, enia i pa noku ave. ¹⁹ Enau Paul, na lo hase uliuli isam, na sopo halu, enau a pa voli na nona ave, ale a pa sopo mele verea vara maurim enia noku, matan ko pa lavi na mauri paro mata Retiřuhu isaku. ²⁰ Ale voraiku, mo ūruhu vara, o pa vai te hina ūruhu hatea isaku matan Moli, o vaiau a avulahi, ²¹ na lo uliuli isam, na lo levosahia mo ūruhu, vara o pa vai na sava na lo verea. ²² Moiso, mele hinau matea, o tatamahuni te jaraku hatea, matan na lo ūomtoho vara a pa malue na ima ūilangi nike, a pa mele mai isam matan ko lo usiusi matana.

Isoiso Reti Non Paul Isan Philemon

²³ Epaphras enia soheku mo lo toho na ima ūilangi matan Křisto Iesu, enia mo sohai na retiololo isam. ²⁴ Ale, Mark, Aristarchus, Demas peresi Luke, la haratu la lo vavahinau peresiau sohena, la sohai na nora retiololo isam, ²⁵ Ale ūomřuhu non Moli Iesu Křisto i pa toho na mapumim mo isoiso.

Hebrews Leta Mo Vano Isana Tavtavuin Israel Leta Nike

Leta nike, enia mo vano isana tavtavuin Israel sei la tau nora rasua hin Iesu Křisto. Hija sei Hebrew enia hija atu Israel la hase tovira hasera hinia. Tatuara la lo řomkaka vara la pa usuri Iesu teni vara la mele usuri na leu non Moses. Puku akerihi mo vujangia vara Iesu mo jeu na hinau tari sohena angelo, Moses, přovet tari tuai, teni te přis aulu tuai, vao přis matan Israel. Ale enia mo marivisi na hinau tari na Retitauhi Tuai (Old Testament). Mo verea vara enřa řa pa sopo řomkaka na mauri rasua matan, Iesu enia nořa tovongi řuhu (Heb 12.2-3).

Hin puku nike

1. Natun God mo aulu jea (1.1-4)
2. Iesu mo jeu na angelo (1.5-2.18)
3. Iesu mo jeu Moses (3.1-4.13)
4. Iesu enia Přis Aulu (4.14-7.28)
5. Retitauhi řuhu mo mai (8.1-9.22)
6. Mo mate vahatea mata rani tari (9.23-10.31)
7. Tovongi řuhu mata rasua (11.1-40)
8. Tovongi řuhu non Iesu (12.1-13.19)
9. Isoiso usiusi (13.20-25)

Iesu Křisto Enia Natun God

¹ Tuai tiroma, God mo retireti vaha visa moiso, ale na malele matuvana isana nořa pua na nona přovet, ² pani hin la pungi hitahu nike, enia mo pete retireti moiso isařa hin Natuna tataholo, God mo vřonka vara hinau tari enira koruna, ale hinia sei God mo vai na varama. ³ Natuna enia sasarami meran God, ale enia tovongina tataholo řa eři hitea, ale enia suiha sei mo vai na hinau tari la lo toho na nona reti suiha. Ale hin rani atu mo isoiso na nona vovahinau mata vairā řa vokevoke na hehe, mo sahe mo sakele na tavalu liman God mata suiha tavera jea aulu na tuka.

Křisto Enia Mo Jeu Na Angelo

⁴ Harihi mo vujangia vara Natun God enia mo aulu mo jeu na angelo, sohen hija atu sei God mo silea isana sei mo aulu jea na hijara. ⁵ Matan God mo sopo verea isan te angelo na sava mo verea isan Iesu sei mara:

'Engko natu, natuku.
Nahapani enau na mai Tamam.' *Psa 2.7*

Ale God mo mele verea mara,
'Enau a pa tamana,
ale enia i pa natuku.' *2 Sam 7.14*

⁶ Ale hin rani atu mara mo lavi Natuna vora tiroma mo unu na varama mo verea mara,

'Angelo tari la pa lotua!' *Deut 32.43*

⁷ Ale mo retireti mata angelo mara,
'Mo vai na nona angelo la sohena langi,
ale enira la volitusi purongo sei
mo vaira na pepe hapu.' *Psa 104.4*

⁸ Pani isan natuna mo vere na reti matea mo aulu jea matana mara,
'God, nom jara sakele mata suiha,
enia i pa toho tui tui tarea.'

Nom suiha mata Supe Aulu
mo pala na hinau mo tataholo.

⁹ Engko ko opoi na sava mo tataholo,
ale ko řohu na sava mo sasati.
Matan haratu God, enau nom God na
vřonkiho,

na surei na wel mata noku avulahi
isam mo jeu na angelo.' *Psa 45.6-7*

¹⁰ Ale mo mele verea mara,
'Moli, na tapulo vovahinau na varama,
engko ko tau na pulon varama nike,
ale tuka enira vua nom vovahinau.'

¹¹ Hina purongo vara enira la pa tihai,
pani engko o pa toho jejeu.

Enira la pa řovo sohena ruru tuai.
¹² O pa virivirira sohena tavalu ruru tuai,
enira la pa posí,

pani engko o pa lo sohena tarea,
o pa sopo eři vajaha.' *Psa 102.25-27*

¹³ Ale God mo sopo retireti isana angelo sohen mo verea isan Natuna mara,
'O sakele na jara suiha na matuaku
vavano a vai na nom meresahi
la toho na ruhuruhu palom!' *Psa 110.1*

¹⁴ Pani mo verea mata angelo vara enira volitusi purongo sei mo lo řulera vara la lo matahi la haratu sei God i pa jurira.

2

Retiroařohai Mata Vahři Hin God

¹ Matan haratu řa pa tapurongo mamahu na Retiřuhu sei řa pete rongoa moiso matan vara řa pa sopo sale nřihi hinia. ² Retisohai matan leu atu God mo

lo silea na lima angelo isan Moses mata tamlohi enia mo lo vararuhu tarea, ale mo vai na tamlohi la lavi talai atu mo tataholo mata nora tope na leu peresi na nora lejileji. ³ Ra pa sopo eři rovo na talai tavera vara ū lo ūromřomi purongo na vavahinau God sei mo vaia mata i juriřa hinia. Retisohai mata juriřa sei Moli mo vereulia isana nona tamlohi usuri tiroma, moiso enira la pa vereulia isařa. ⁴ God mo tueni na nora retisohai sei na matamata tatavera, peresi na hinau tamlohi la hutura hinira, peresi na hinau mařurahi tinatinapua peresi na otori sei Tanume Tapu mo asera usuri na masalona isana nona tamlohi.

Iesu Mo Mai Tamlohi

⁵ Matan sava kama lo vereulia nakerihi matan varama paro sei i pa mai, i pa sopo toho na lima angelo. ⁶ Matan hin te jara na Retitapu, tamlohi matea mo vereea isan God mara:

Tamlohi enia sava hinau
vara o lo ūromřomia,
ale Natun Tamlohi
vara o lo kilaua?
⁷ Matan ko vaia mo atano
mo jeu na angelo
mata makomo rani,
ale ko mele tahea aulu na hasohaso
tavera
mata lavi na ooloolo tavera.
⁸ Ko tau na hinau tari na limana.'

Psa 8.4

Ale reti sei mo vereea vara mo aulu 'na hinau tari' mo ūramia vara mo sopo te hinau hatea vara mo sopo toho na ruhu-ruhu limana, pani nakerihi ū sopo lo hitera vara la lo toho na ruhuruhu limana enira mo isoiso.

⁹ Pani ū lo hite Iesu sei God, 'mo vaia mo atano jea na angelo mata makomo rani'. Nake mo mele, 'tahea aulu na hasohaso tavera mata lavi na ooloolo tavera' matan enia mo vano na mateia matařa, matan vara na ūromřuhu non God enia i pa lavi na mateia mata tamlohi tari. ¹⁰ Matan mo tataholo vara God sei mo lo vai na hinau tari, ale hinau tari enira nona, mo tataholo mata i lavi na natuna matuvana la unu na hasohasona. Hin la rani ūlangi atu Iesu mo lavira, God mo vaia mo tataholo mo ūruhuhu mata tiroma na tamlohi, enia natu mo tataholo vara i jurira.

¹¹ Ale nakerihi Iesu peresi la haratu mo vaira la tapu, enira Tamara matelete. Matan hinau atu natu, Iesu mo sopo manuhanuhu vara i toviřa tasina teni vetasina, ¹² ale mo vereea isan God mara:

'A pa vereulia vara hijam
mo ūruhuhu jea sohena sava
isana tasiku peresi na vetasiku.'

Psa 22.22

Ale mo mele vereea mara,
'A pa hasohasoho na livuha vao nom tamlohi.'

¹³ Mo mele vereea mara,
'A pa rasu God!'

Isa 8.17

ale usuri haratu mara,
'Enau nahai peresi la natuvarihi atu
sei God mo lo silera isaku.'

Isa 8.18

¹⁴ Matan haratu, matan natuna la vora tamlohi, enia sohena mo mai tamlohi tataholo, matan vara na nona mateia i pa komo na suihani Tiapolo sei mo lo tauri na suihani mata mateia, ¹⁵ ale i teri la haratu sei tarea la lo slev isana nora matahu mata mateia.

¹⁶ Ra levosahi mamahunia vara Iesu mo sopo mai vara i tueni na angelo, pani matan vara i tueni na mahapin Abraham.

¹⁷ Matan haratu, God mo vai Iesu mo mai soheřa tasina peresi na vetasina na malele tari, matan vara i eři mai nořa Přis Aulu na ūromopoia, ale mo turu ūlangi vara i vai na vavahinau isan God mata i voli nařihi na hehe nona tamlohi. ¹⁸ Matan enia sohena mo lavi na rani ūlangi na vahite sei la lo mai isana tamlohi tari, ale nake enia i eři tueniřa na nořa vahite.

3

Iesu Mo Aulu Mo Jezu Moses

¹ Matan kamim ka vorai peresi na vevorai sei God mo tapuhiřa matan na tuka, ha to ūromřomi Iesu, enia Vahařule, ale Přis Aulu sei ū lo tau na nořa rasua hinia.

² Enia mo lo turu ūlangi na hinau tari God mo vřionia matana, sohen Moses mo lo turu ūlangi mata vao iman God. ³ Matan mo tataholo vara Iesu i lavi na hasohaso tavera i jeu Moses, sohena tamlohi voro ima mateia i pa lavi na hasohaso tavera i jeu ima atu mo lo voro. ⁴ Matan ima tari tamlohi matea mo vorora, pani God enia haratu sei mo voro na hinau tari.

⁵ Moses mo turu ūlangi na hinau tari God mo taua na limana vara i pa kilaura,

pani enia volitusi matea purongo, ale sava mo lo vaira enira tovongi matea mata vu-jangi na hinau sei God i pa vuhesia hitahu. ⁶ Pani Křisto mo lo turu řilangi jea na hinau tari God mo taua na limana vara i pa vaira, matan enia Natuna tataholo sei mo aulu na iman God. Ale enřa řa vao iman God, vara varauhu vara řa lo turu řilangi na řomřilangi peresi na nořa řomtoho hin Křisto.

Mapu Tataholo Non God

⁷ Matan hinau atu natu, Tanume Tapu mo verea matana mara:
 'Nohorihi vara ha rongo na leoku,
⁸ ha sopo vai na mapumim i řilangi isaku sohen Israel la lo vaia hin rani atu la turuleji hinau,
 hin rani atu la lo vahite na noku řomperavu na tano koru.
⁹ Hin jara atu tamamim la vaivai la vahiteau,
 hina purongo vara la lo hite
 na noku hinau mařurahi tavera
 mata tauni mo ngavulu vati moiso
 (40).
¹⁰ Ale matana na lolokoru hinira, ale na verea nara:
 Tarea mapura mo lo kaka,
 ale la sopo levosahi na masaloku.
¹¹ Ale na noku lolokoru tavera mata nora hehe,
 na vai na retitauhi matea nara:
 La pa sopo eři unu na noku mapu hin te rani.'

Psa 95.7-11

¹² Ale matana, la vorai peresi na vevorai řuhuřuhu, ha lo kilau mamahu vara te vonamim i sopo lavi te řomřomi sati mata vai na mapuna i sopo mele rasu God sei mo mauri. ¹³ Pani ha retituetueni kamim hatehateahi na rani hatehateahi tari sei řa lo tovira 'nohorihi', matan vara i pa sopo tea isamim i jovi na hehe, ale mapuna i mai i řilangi isan God. ¹⁴ Matan řa mai řa tapala peresi Křisto na nona vavahinau, vara varauhu řa lo turu řilangi hin nořa rasua atu tiroma i tikeli na isoisona. ¹⁵ Pani ha sopo řomaliho hin retiřoařohai níke hin te rani:

'Ha tapurongo na sava mo lo verea naker- ihi!

Ha sopo vai na mapumim i řilangi isan God sohen Israel mo vaia hin rani atu la turuleji

hinia na jara tano koru.' *Psa 95.7-8*

¹⁶ Ale la tamlohi atu sei la lo turuleji hin God enira hare, hina purongo vara la rongo na leona? Enjora, enira pa la tamlohi atu sei Moses mo tiroma hinira la malue Egypt. ¹⁷ Ale hare natu mo vai God mo lolokoru mata tauni mo ngavulu vati? Enjora, enira pa la tamlohi atu sei la lo hehe ale la mate na tano koru. ¹⁸ Ale God mo retitauhi isan hare natu vara la pa sopo eři unu na nona mapu hin te rani? Mo lo retireti isan la haratu la sopo oloolo hinia. ¹⁹ Ale matana, řa levosahia vara la sopo eři unu na nona mapu matan la sopo rasua.

4

Mapu Nona Tamlohi Non God

¹ Matan haratu, řa lo kilau mamahu i řuhu matan, vara i vono, ha pa sopo eři lavi na vua nona retitauhi mata nona mapu sei mo lo turu. ² Matan la retivujavujangi na Retiřuhu isařa sohen la vaia isan Israel tiroma moiso. Pani retisohai atu sei la rongoa mo sopo tuenira matan la sopo lavi na vuana peresi la haratu la rasu na sava la lo rongora. ³ Matan enřa purongo sei řa rasua řa lo toho na nona mapu. Pani isan la haratu la sopo rasua, God mo verea mara, 'Matan na noku lolokoru tavera na vere na retitauhi matea nara:

La pa sopo eři unu na noku mapu!'

Psa 95.11

Hina purongo vara nona mapu mo tatamahunia moiso mo tapulo hin rani atu mo pa vai na varama. ⁴ Ra levosahia vara mo tatamahu moiso matan Retitapu mo retireti na halimaravrua rani sohen harihi vara, 'Ale God mo mapu na halimaravrua rani na nona vavahinau tari'. *Gen 2.2*

⁵ Pani hin pa reti atu tiroma sei God mo lo verea mara, 'La pa sopo eři unu na noku mapu'.

Psa 95.11

⁶ Matan haratu mapu non God atu enia mo lo turu vara tamlohi la unu hinia. Pani la haratu la lo rongo na Retiřuhu tiroma la sopo unu hinia matan la sopo oloolo. ⁷ Ale matana, God mo mele tau na rani tinapua matea mata unu na nona mapu, ale rani atu enia nakerihi. God mo mele vere rani mapu tinapua atu na sava David mo verea hin rani atu hitahu hin reti atu na verea isamim moiso sei nara:

'Ha tapurongo nakerihi na sava mo lo verea.

Ha sopo vai na mapumim i ūilangi isan God.'

Psa 95.7-8

8 Mapu paro nike la sopo lo lavia hin rani atu sei Joshua mo tiromara la lo toho Canaan, matan God mo pa vere nona mapu paro nike hitahu. **9** Ale matana, rani mapu tataholo matea mata tamlohi non God mo lo turu. **10** Matan tamlohi tari sei la unu hin Sabbath nike sei rani mapu non God atu, la pa mapu na nora vavahinau sohen God mo vaia na nona vavahinau. **11** Ale matana, ūa vaihitea vara ūa unu hin mapu atu. Matan vara tea i usuri na tovongi mata lejileji atu nona tautauvin Israel tuai, i pa jovi sohera.

12 Matan reti non God mo lo mauri, ale enia mo suiha. Enia mo voro mo jeu te sita vuro tavalu rua, mo unu na loloā mo ase na ūomiā na masalōā, mo ariā ale mo vujangīrā vara enā ūa sava tamlohi. **13** Mo sopo te hina mauri hatea i eī luhi hin God. Enia mo lo hite na hinau tari. Ale enā mo isoiso ūa pa turu na nahona, ale ūa pa vereuli na sava ūa lo vaira isana.

Kristo Enia Nōra P̄ris Aulu

14 Matana, ūa lo taurilati na nōra rasua hin nōra p̄ris aulu sei Iesu, Natun God sei mo sahe na tuka moiso. **15** Matan nōra p̄ris aulu nike mo levosahi na nōra vejuveju, ale na varama enia mo lavi na vaihite tari sei ūa lo lavira, pani mo sopo hehe. **16** Matan haratu, ūa ūomilangi mata mai na naho jara sakele non nōra God ūruhu ūruhu jea. Atu ūa pa lavi na nona ūmopoia, ale i pa tuenīrā usuri na nona ūromruhu mata nōra vejuveju na maurīrā.

5

1 Matan p̄ris aulu tari la viōnira na vao tamlohi matan vara la pa turu na nahon God mata tamlohi, enia i pa lo sile na nora silesile isan God, peresi na malamalai mata hehe. **2** Enia i eī ūmopoia la haratu la sopo lelevosahi teni la jalio na retivara ūruhu, matan enia sohena mo sohera. **3** Ale matan haratu, enia i pa sile na silesile mata hehe nona tamlohi peresi na nona hehe. **4** Ale tea i sopo eī mai p̄ris aulu matea usuri na masalona hasena, pani vara God mo tovia purongo sohen mo tovi Aaron tuai. **5** Ale Kristo sohena, mo

sopo hase tahea aulu vara i mai P̄ris Aulu, pani God natu mo tahea aulu, sohen reti nike sei mo lo verea isana mara, 'Engko natuku,

nahapani na mai Tamam.' *Psa 2.7*

6 Ale na jara tinapua matea na Retiulia God mo mele verea isana mara, 'Engko p̄ris matea usuri na pin Melchizedek sei i pa toho jejeu.'

Psa 110.4

7 Hin rani atu Kristo mo pa lo toho na varama, mo lo sohai na usiusi peresi na nona tangi na ūomina peresi na tangi tavera, ale wai matana la lo jovi, ale nona usiusi mo sahe isan haratu sei i eī juria na mateia. Ale God mo lo rongoa matan Kristo mo tau na ūomina mata lotua na oloolo. **8** Hina purongo vara enia natun God, enia mo pa levosahi na oloolo na malele rani ūilangi. **9** Ale hin malele sei God mo vaitataholia mo mai P̄ris Aulu matea, ale mo mai pulon juri atu mata rani tui tui isana nona tamlohi tari sei la lo oloolo hinia. **10** Ale God mo taua vara i P̄ris Aulu usuri na pin Melchizedek.

Ha Ulua Na Mauri Rasua

11 Hinau mo marīvi mo pa lo toho sei kama opoia vara kama mele vereulira, pani kama hitea vara peromim la sopo rongo, ale mo ūilangi vara kama eī vai kamim ha lelevosahi. **12** Kamim ka kalesia mo tuai moiso, ale i pa tataholo vara kamim ha lo vujangi na tinapua moiso, pani kama hitea vara kama lo mele vujangi kamim sohen la haratu la pa tapulo purongo na levosahi mata Retitapu. Ka mele sivo leji ka opoi na wai susu, mo sopo hanhani ūilangi. **13** Matan tamlohi tari sei la lo mauri na wai susu, la sopo lo levosahi na vujangi mata posposi tataholo matan enira la pa lo pipi. **14** Pani hanhani ūilangi enia hani la haratu la jea sei la lo hasera vujangira vara la eī hitevosahi na sava mo tataholo ale sava mo sasati.

6

1 Matana haratu, ūa ulua i jeu vujangi atu ūa lavia na nōra mai paroparo na tapulo mauri rasua, ale ūa vano ūa jea, mo sopo matan vara ūa pa mele vano na vujangi mata posi na vaivai vono, teni mata tau na rasua hin God, **2** teni na vujangi mata

paptijo, teni tau na limařa mata usiusi na tamlohi, teni mata sauteterahi nona mate, ale mata aria tavera non God. ³ Ale vara na masalon God, ţa pa mele ulua ţa vano na lelevosahi mata hinau tinatinapua.

⁴ Matan mo sopo mele te malele tinapua hatea vara tea i eři mele posí na nona hehe hinia, la haratu sei tiroma moiso la lavi na levosahi hin God, teni la hatiřoro na otori ţuhu sei God mo lo silera, teni la tapala peresi na Tanume Tapu moiso, ⁵ ale la hatiřoro moiso na reti ţuhu non God peresi na hinau mařurahi matan pungi atu mo lo mai, ⁶ ale na isoisona la vahaři hin God. Mo sopo te malele hatea isara vara la eři mele posí na nora hehe, matan la lo mele vosae Natun God na talopeilopei na nora tipahia, ale la lo vaia na naho tamlohi.

⁷ Ha lo levosahi harihi: vara lepa sei mo lo himi na wai usa mo lo jovi hinia, mo sile na vuana ţuhu isan tamlohi isa matea, lepa atu mo lavi na leřuhu isan God. ⁸ Pani vara lepa atu mo vua na pahai ngarngariha teni piko, mo sopo ţuhu matan te hinau, ale tamlohi isa atu i pa ţuhu hin isa atu ale i pa sulia.

⁹ Pani isamim la tapala ţuhuřuhu, hina purongo vara ţa lo retireti sohen harihi, kama sopo rasua vara reti sei mo lo pisuhi kamim sohen lepa sati atu. Kama levosahia vara kamim ka lo toho mata hina ţuhuřuhu sei la lo mai peresi na nomim juri. ¹⁰ Matan God mo sopo tametame tea. I pa sopo ţomaliho sohena sava ka lo voko ţilangi nona, ale sohena sava ka lo vujangi na nomim opoia isana na nomim kilau ţuhu na kalesia tinapua, sohen ka pa lo vaia nake. ¹¹ Kama opoia mo tavera vara ha lo opoi na tinapua i tikeli na isoiso maurimim, matan vara sava ka lo ţomtoho hinia i pa masese nomim. ¹² Ale kama sopo opoia vara ţomimim la mate, pani ha pa usuri na tovongi non la haratu sei la pa lavi na retitauhi non God mata nora rasua peresi na nora ţomperavu.

Romtoho Mo Tai Na Retitauhi Non God

¹³ Sohen rani atu God mo retitauhi isan Abraham, God mo retitauhi na hijana purongo matan mo sopo te hija tinapua vara i mele aulu jea hinia mara:

¹⁴ 'Varařuhu a pa leřuhu hiniho i tavera jea, ale a pa vai na mahapim la mařivi savulevule.'

Gen 22.17

¹⁵ Ale Abraham mo lo sasaovi peresi na ţomperavu, ale mo lavi na sava God mo retitauhi hinia.

¹⁶ Vara tamlohi la vai na retitauhi matea, la pa verea na hijan tea sei mo mele aulu jea hinira, hija atu mo lihora vano hin retitauhi atu mo sopo te retiusia hinia vara i pa turu teni i vono. ¹⁷ God sohena, mo lihoa na retitauhi matea matan vara la haratu sei la lavi retitauhi atu la pa levosahi mamahunia vara i pa sopo eři posí na ţomina. ¹⁸ Ale God mo sileřa na nona retitauhi ale mo tau na hijana hinia. La hinau atu mo rua la sopo eři posí matan God enia i sopo eři halu. Matan haratu, enřa sei ţa rovo vano isana mata luhu, ţa eři mele lavi na ţomřilangi paro, matan ţa eři taurilati na nona retitauhi mata nořa rasua hinia.

¹⁹ Nořa rasua hin retitauhi nike mo sohena matalalavo matea sei mo puhoni ale ţa eři rasua mata mauriřa. Rasua nike natu mo vairá ţa eři unu hin jara tapu sei non God na tuka. ²⁰ Iesu mo pete unu atu tiroma moiso matařa. Enia mo mai nořa Přis Aulu matan tui tui usuri na pin Melchizedek.

7

Melchizedek Peresi Abraham

¹ Melchizedek nike enia supe mata taon tavera matan Salem, ale enia Přis Aulu non God sei mo aulu jea. Hin rani atu Abraham mo lo mele mule na vuro tavera matea mo vaia peresi na supe matuvana, ale matan mo jeua, Melchizedek mo malue mo vano vara i tapaia ale mo leřuhu hinia. ² Ale Abraham mo sile na sangavulu hinau tari sei mo lavira na vuro isan Melchizedek. Rarami hijana enia 'Supe Mata Ari Tataholo'. Ale enia sohena mo supe mata tamata matan ţaramin Salem enia 'tamata'. ³ Tea mo sopo levosahi tamana teni tinana teni te tahisana, mo sopo te tapulo teni isoiso maurina. Enia mo lo toho jejeu sohena přis matea, mo sohen Natun God.

Melchizedek Mo Aulu Hin Abraham

⁴ Ha to ūromūromia vara Melchizedek mo aulu sohena sava, matan Abraham hina purongo vara enia mo pulo vaon Israel, mo hitevosahia sohena sava Melchizedek mo mele aulu hinia, ale Abraham mo silea na sangavulu hinahinau sei mo lavira na vuro isan Melchizedek. ⁵ Ale p̄ris matan Israell la tai na vaon Levi, Leu non Moses mo retileu vara la pa lavi na sangavulu hinau isana tahisara, hina purongo vara la mahapin Abraham sohera. ⁶ Pani Melchizedek, hina purongo mo sopo tahisan Levi, mo lavi na sangavulu hinahinau isan Abraham. Ale Melchizedek mo tau na lēruhu matea isan Abraham, Abraham mo pete lavi na retitauhi isan God moiso. ⁷ Ale mo sopo te retiusia hatea vara hare mo mele aulu: haratu mo lo sile na lēruhu enia mo aulu mo jeu haratu mo lo lavi na lēruhu.

⁸ Ra levosahia vara tamlohi la lo sile na sangavulu hinahinau isana p̄ris nona tavytavuin Israel sei la tamlohi purongo ale la pa mate hin te pongi. Pani Melchizedek mo mele aulu mo jeura matan ūrasua vara mo pa lo mauri. ⁹ Ale aulu hin haratu ūra eři verea vara mahapin Levi, la haratu sei la lo lavi na sangavulu hinahinau, la lo sile na sangavulu nora hinahinau isan Melchizedek hin nora pua Abraham. ¹⁰ Hina purongo vara Levi mo sopo lo vora hin rani atu, enia mo lo toho na epen Abraham moiso hin rani atu sei Melchizedek mo lo lavi na sangavulu hinahinau isan Abraham.

Kristo Mo Sohen Melchizedek Tuai

¹¹ Ale vara p̄ris na vaon Levi la eři vai vevuhi na masalon God, ale enira la p̄ris usuri na leu, mata sava natu God mo mele sohai na p̄ris tinapua matea mo sohen Melchizedek, ale mo sopo lavia isana mahapin Levi sohen Aaron sei tasin Moses?

¹² Ale vara la haratu la lo tauri na vavahinau nona p̄ris la sopo mele tauria matan God mo mele v̄ironi na tinapua, leu sohena i pa posi matan vara i majinga hinia. ¹³ Matan haratu sei ūra lo retireti hinia, enia mo malue na tavytavui tinapua matea, mo sopo isan Levi sei la lo volitusi na votavota na lolo Temple.

Kristo Enia P̄ris Aulu

¹⁴ Ale mo memera vara nořa Moli Iesu enia tavytavuin Judah matea, pani ūra levosahia vara Moses mo sopo verea vara te tavytavuin Judah matea i eři mai p̄ris matea.

¹⁵ Ale nakerihi mo memera vara Křisto enia natu p̄ris tinapua atu i pa pala mo sohen Melchizedek. ¹⁶ Mo mai p̄ris matea mo sopo tai na tavytavuin Levi usuri na Leu, pani mo usuri na suihan mauri atu non God sei i pa sopo eři mate hin te rani. ¹⁷ Ale David sei mo lo uli na psalm mo pisuhia hin rani atu God mo lo retireti hin Křisto mara, ‘Engko o pa p̄ris matea tui tui, sohen Melchizedek.’

Psa 110.4

¹⁸ Enjora, leu atu matan tuai mata p̄ris, God mo tau pahipahia matan i sopo eři mele vai te hinau matan mo sopo mele ūruhu matan te hinau hatelete. ¹⁹ Matan leu mo sopo eři vai tea i mai i tataholo na nahon God, ale nake ūromtoho matea mo mele ūruhu jea mo pete lavi na jarana moiso, matan hin Křisto ūra eři mai mariviti isan God.

²⁰ God mo retitauhi na hijana hasena vara Křisto i pa p̄ris jejeu, pani mo sopo verea isan te p̄ris tinapua. ²¹ Pani isan Iesu hasena purongo God mo verea mara, ‘Moli God mo vai na retitauhi matea na hijana hasena,

ale i pa sopo eři tope na nona retitauhi
nike:

Engko o pa p̄ris matea matan tui tui.’

Psa 110.4

²² Matan God mo vai retitauhi atu na hijana hasena, ale matan Iesu mo lo toho hinia, retitauhi ūruhu nike mo mele ūruhu mo jeu retitauhi tuai atu mata Leu, matan i pa vai na sava God mo taua matana.

²³ Ale mele hinau tinapua matea hin hinau nike, enia vara tuai p̄ris mo mařivi, ale vara matea mo mate nona vavahinau mo hilu atu, ale tinapua i pa mele lavi na jarana. ²⁴ Pani Iesu i pa lo toho sohena p̄ris jejeu; matan nona vavahinau mata p̄ris i pa sopo isoiso hin te rani. ²⁵ Matan haratu enia i eři juri na tamlohi tari sei la lo mai isan God mo vaia vahatelete purongo matan tui tui. Enia mo lo mauri jejeu matan vara i pa lo turu na nahon God mata i usiusi matara.

²⁶ Iesu enia P̄ris Aulu tataholo sei ūra opoia matan enia mo tapu ale tea i sopo eři

tuvai hin te hinau, mo sopo te hehe isana. Nake God mo tauhasehia isana tamlohi hehe, ale mo silea na jara aulu mata oolo lo mo jeu na tinapua na tuka. ²⁷ Ale enia i pa sopo sile na malamalai na rani hate-hateahi sohena p̄ris aulu tinapua la lo vaia. Enira la vaia mata nora hehe tiroma moiso la pa vaia mata hehe nona tamlohi tinapua. Pani Iesu mo vaia vahatelete purongo matan tui tui hin rani sei mo hasena silea sohena malamalai na talopeilopei. ²⁸ La haratu la lo p̄ris aulu na ruhuruhi leu non Moses, la sopo ēri vai na tatua hinau tinapua, matan enira la tamlohi purongo. Pani hitahu hin rani atu haratu sei God mo sile na leu, God mo vīroni Natuna na retitauhi na hijana hasena, ale God mo vai natuna mo tataholo tui tui.

8

Kristo Enia Nōra P̄ris Aulu

¹ Ale ūrom̄omi tavera kama lo verea enia nahai:

Nōra P̄ris Aulu mo sakele na jara aulu mata oolo lo mo jeu na tinapua na tuka na tavalu liman God. ² Hin jara atu nōra P̄ris Aulu Iesu mo lo vavahinau na lolo jara tapu sei Tabernacle varařuhu na tuka God sei mo voroa, mo sopo tamlohi.

³ Ale matan p̄ris aulu tari la lo sile na sile-silea peresi na malamalai isan God, matan haratu mo tataholo vara nōra P̄ris Aulu sohera i pa sile te hinau sohera. ⁴ Vara enia i pa lo toho hin varama nike, i pa sopo p̄ris matea, matan p̄ris la pete toho moiso mata sile na silesilea sei leu non Moses mo verea. ⁵ La lo volitusi na tent sei la tovia Tabernacle nike na varama, ale enia tovongin haratu na tuka purongo, hina varařuhu mo lo toho na tuka. Matan hin rani atu Moses mo tatamahu vara i voro Tabernacle atu, God mo sile retiroaroahai nike isan Moses mara, ‘O lo kilau mamahuna vara ko lo voroa, o voroa usuri tovongi atu na vujangia isam nike na vutivuti’.

Exo 25.40; 26.30

⁶ Pani nōra P̄ris Aulu mo lavi na vavahinau matea mo aulu mo jeu la haratu la lo volitusi usuri na leu tuai. Ale matan enia natu mo lo toho hinia, retitauhi sei God mo silea mo mele ūruhi jea matan mo turu na retitauhi ūruhi mo jeu la haratu mo lo silera tiroma.

⁷ Ra leyosahia vara retitauhi atu tiroma usuri na leu mo sopo ūruhi, matan God mo mele vai na harua retitauhi tinapua matea vara ilavi na jarana. ⁸ God hasena mo hitea vara tiroma retitauhi atu mo sopo ūruhi hin haratu mo verea akerihi mara: ‘Rani matea i pa mai, Moli God mo lo verea vara:

A pa vai na retitauhi paro matea peresi na tavitavuin Israel peresi la haratu Judah.

⁹ Retitauhi paro nike i pa sopo sohen haratu na vaia tiroma peresi na nomim pua hin rani atu na lo tauri na limara ale na tiroma hinira la malue Egypt. La sopo usuri tataholoi na noku retitauhi ale na vahāri hinira, Moli God mo verea.

¹⁰ Pani matan harihi natu, a pa vai na retitauhi paro sei peresi na tavitavuin Israel hin rani atu mo lo mai, enau Moli God na verea nara:

A pa tau na noku leu na ūromira, matan vara la ēri rongovosahira, ale a pa ulira na mapura, matan vara la ēri oolo lo hinira. Enau a pa nora God, ale la pa noku tamlohi.

¹¹ Ale la pa sopo mele vujangi na tavitavuira tinapua teni na voraira hatehateahi lara, “Ha levosahi Moli God!”

Matan tamlohi tari, mo tapulo na tamlohi purongo mo tikeli na tamlohi aulu, enira mo isoiso la pa levosahiau.

¹² Ale a pa ūromi na nora hehe, ale a pa sopo mele ūrom̄omi na nora hehe.’

Jer 31.31-34

¹³ Ale hin rani atu God mo retireti hin retitauhi paro nike, mo ūramia vara retitauhi tuai atu mo vaia tiroma mo pete isoiso moiso. Enia mo pete vajaha moiso ale mariviti i tihai.

9

Posposi Lotu Tuai Nona Jew

¹ Ale hin retitauhi atu tiroma God mo vaia peresi Israel, mo tau na retileu mata lotu peresi na nona tent tapu mata lotu matea na varama. ² Vara la turuhi tent atu,

la pa viliroto na jara mo rua na lolon tent atu. Na tiroma jara, peri lamu matea, ale tep matea sei la lo tau na pereti tapu hinia. Tiroma jara nike la tovia Jara Tapu. ³ Ale tavalu ruru matea mo kehohoro na harua jara sei la tovia Jara Tapu Jea. ⁴ Hin jara atu, la tau na votavota mata suli na hasori matea la vaia na gold, peresi na puhoro matea la evea na gold la tovia 'Puhoro Mata Retitauhi'. Ale na lolon puhoro atu, potele matea la vaia na gold, manna mo lo toho na lolona, tihonin Aaron sei mo lo juliha, peresi la vatu atu Moses mo lo uli la retileu atu mo sangavulu hinira. ⁵ La vai na tovongi angelo mo rua na gold la tovira cherubim na pusan puhoro atu. La ūrāhi na hapara vara la tavuni na pusan puhoro atu, jara tataholo atu natu p̄ris aulu mo lo turusi na ūrae mata malamalai hinia. Pani nakerihi kama sopo eři vereuli vevuhi la hinau nike.

⁶ Vara la tau mamahuni la hinau atu mata lotu moiso, p̄ris la eři tapulo unu ale la lo malue mata vai na nora vavahinau hin Jara Tapu atu. ⁷ Pani p̄ris aulu hasena i eři unu hin jara atu mo tapu jea, ale vahatelete purongo na tauni matea, ale tarea peresi na ūrae sei mo lo silea isan God matan vara i tavuni na nona hehe peresi na hehe nona tamlohi tinapua sei la lo vaira pani la sopo levosahira. ⁸ Tanume Tapu mo vaia mo memera isařa nake vara malele atu sei God mo lo tinařihia vara tamlohi purongo la eři mai mariviti isana hin jara atu sei mo tapu jea mo sopo lo pala hin rani atu tent atu mo lo turu.

⁹ Hinau nike enia tovongi matea mo lo pisuhi rani nike nahapani. Matan la otori atu peresi na malamalai sei p̄ris la lo silera, la sopo eři vai na ūromi tamlohi sei la lo lavira la mai mata lotua la vokevoke. ¹⁰ Matan retileu matan tuai usuri na leu, enia mata hanhani peresi na wai, ale hoje na hinau tinatinapua peresi la hinau sei tamlohi la lo vaira na limara purongo, enira la lo toho vavano malele paro mata mai mariviti isan God mo pala.

Křisto Enia Malamalai Tataholo

¹¹ Pani nakerihi Křisto mo mai P̄ris Aulu mo aulu na hinahinau ūruhu tari sei la mai moiso, ale mo unu hin Jara Tapu atu na tuka sei mo tataholo jea, hara sei lima

tamlohi la sopo vaia, mo sopo sopesopen varama nike, ¹² ale mo unu hin Jara Tapu Jea atu vahatea mata rani tari, pani mo sopo unu peresi na ūrae nani teni natu buluk, pani mo unu peresi na ūraena hasena. Ale na ūraena mo vai tataholoi na malele mata nořa juri matan tui tui.

¹³ Matan vara posposi tuai mata turusi na ūrae nani peresi na ūrae buluk peresi na patmakovi mata natu buluk mo eři vai na epe tamlohi la vokevoke mata nora posposi mata tope na leu sei mo vaira la lumiha, ¹⁴ ale ha to ūromřomia sohena sava ūraen Křisto i eři onehi na mapuřa na nořa rasua na nořa vavahinau purongo, matan vara i vairā ūra eři lotu God sei mo mauri usuri na masalona. Křisto na suihan Tanumen God sei mata tui tui, mo hasena silea isan God sohena malamalai tataholo matea mata hehe. ¹⁵ Ale matan haratu, enia natu mo vai na malele matan vara retitauhi paro atu i eři mai, matan vara la haratu sei God mo lo tovira la eři lavi na koruna sei la sopo eři tihai God mo retitauhi hinira. Matan Křisto mo mate vara i vaira la materi na talai mata hehe sei la vaira na ruhuruhan retitauhi atu tiroma.

Mateia Non Iesu Mo Vai Na Retitauhi Paro Mo Mauri

¹⁶ Ale vara tea mo sile na nona reti matan te koruna ale hitahu i pa mate, i pa sopo tea i eři lavi te koruna i tikeli rani atu la levosahia mo ūruhu vara mo mate. ¹⁷ Nona reti atu mata koruna i pa lo turu i tikeli rani atu tamlohi atu mo lo ulia mo mate. Vara mo pa lo mauri, tea i sopo eři lavi te koruna sei mo retitauhi hinia isara.

¹⁸ Matan hinau atu natu, retitauhi atu tuai mo tapulo peresi na ūrae. ¹⁹ Matan Moses mara mo sile na retileu isana tamlohi tari usuri na hinau tari na leu, mo lavi na ūrae natu buluk peresi na nani, ale wai peresi na vulu sipsip hahara peresi na bras rihirihi matea la vaia na ranga hyssop vipahai matea, ale mo turusi na puku leu peresi na tamlohi tari na ūrae, ²⁰ ale mo lo verea mara, 'Harihi enia ūrae mata retitauhi sei God mo retileu hinia vara ha lo turu hinia'.

Exo 24:8

²¹ Ale hin malele atu purongo mo turusi na tent peresi na hinau tari sei la lo vavahinau peresira mata lotu God. ²² Varařuhu, ūra eři verea usuri na leu non Moses, mariviti hinau tari la mai la vokevoke na malele

turusi na ūae, ale God i pa sopo ūomi na hehe vara ūae i sopo roro.

²³ Ale la hinau atu la lo masese na lolo tent, la lo tovongi na hinau na tuka, ale p̄is mo vaira la vokevoke na ūae maji purongo. Pani hinau atu na tuka, God mo vaira la vokevoke na malamalai ūruhu jea matea, mo jeu na ūae maji.

²⁴ Matan K̄risto mo unu na tuka tataholo vara i turu na nahon God sohena nōa tuetueni. Enia mo sopo unu na tent mata lotu nona tamlohi varama matan haratu na varama enia tovongi matea hin Temple atu na tuka. ²⁵ Mo sopo unu na tuka matan vara i mele hasena silea tarea sohena p̄is aulu matea mo lo vaia hin rani atu mo lo unu na Jara Tapu Jea na tent hin varama nike na tauni hatehateahi vara i lo sile na ūae maji. ²⁶ Vara i sohena K̄risto i pa lo mate vaha visa, i tapulo hin rani atu varama mo tapulo, pani mo vono. Mo mai vahatea mata rani tari hin rani hitahu nike vara i lavi nařihi na suiha hehe jejeu na nona malamalai sei mo mate matařa.

²⁷ Ale God mo taua vara tamlohi hatehateahi la pa mate vahatea, ale hitahuna la pa turu na aria, ²⁸ ale mo sohena purongo, K̄risto mo mate vahatelete purongo sohena malamalai matea mata lavi nařihi na hehe nona tamlohi matuvana. I pa mele mai, pani mo sopo mata nōa hehe. Hin rani atu i pa lavi na juri non la haratu sei la lo kilau matana.

10

Malamalai Non K̄risto

¹ Posposi tuai mata leu non Moses enia ūroa hinau purongo mata hinau ūru sei la pa mai, hina vararuhu sei K̄risto mo vaia matařa. Malamalai na posposi tuai mata leu, la lo vaia tarea na tauni hatehateahi, la sopo eři vai la haratu sei la lo mai mata lotu vara la vokevoke vevuhi. ² Vara la pa lo eři vai na tamlohi la vokevoke vevuhi, malamalai korong mo isoiso moiso. Matan la haratu la lo lotu la pa vokevoke vahatea mata rani tari, ale puhonu nora hehe mo pete tihai isara moiso. ³ Pani la malamalai atu la lo vai na tamlohi la lo mele ūrom̄omi na nora hehe na tauni hatehateahi. ⁴ Matan ūae buluk peresi na ūae nani la sopo eři lavi nařihi na hehe.

⁵ Matan hinau atu, na rani K̄risto mo sinai na varama mo vereea isan God mara, 'Ko sopo opoi na malamalai la lo vaia na maji teni na hanhani.

Pani ko sileau na epe matea vara a mai nom malamalai tataholo.

⁶ Vararuhu ko sopo avulahi na maji la lo sulira na votavota teni na silesile mata hehe.

⁷ Ale na mele vereea nara: Ko hiteau, enau nahai na sinai

vara a vai na masalom God vara a usuri na sava la ulia moiso na Retitapu mataku.'

Psa 40.6-8

⁸ Sohen K̄risto mo vereea moiso mara, 'Ko sopo opoi na malamalai la vaira na maji teni na hanhani teni na maji la sulira na votavota teni te silesile tinapua mata hehe, ko sopo avulahi hinira.'

(Ko hitea, Iesu mo lo vereea sohen harahi, hina purongo vara leu non Moses mo vereea vara tamlohi la pa vaira.)

⁹ Ale K̄risto mo mele vereea mara, 'Ko hitea, enau na lo mai vara a vai na masalom.' Iesu mo vai na retitauhi matan tiroma vara i isoiso matan vara harua retitauhi nike i eři turu. ¹⁰ Ale usuri na masalon God enia mo vairā ūa tapu na malamalai mata open Iesu K̄risto vahatea mata rani tari.

¹¹ Usuri na retitauhi tuai, p̄is la turu na naho votavota na rani hatehateahi mata sile na malamalai sei la sopo eři lavi nařihi te hehe hin te rani. ¹² Pani nōa P̄is Aulu mo hasena silea isan God sohena malamalai matea mata hehe sei mo ūru mata rani tari. Ale naked mo lo sakele na jara ooloolo tavera mo aulu mo jeu na tinapua na tavalu liman God. ¹³ I pa lo sasaovi atu vavano i tikeli rani atu God i vai na nona meresahi la toho na ruhuruhi palona.

¹⁴ Matan hin silesile atu matelete purongo, K̄risto mo vai tataholoi na nona tamlohi sei mo lo vaira la tapu mata rani tui tui. ¹⁵ Ale Tanume Tapu sohena mo vereulia vara enia mo sohena; matan mo lo vereea na reti non Jeremiah mara,

¹⁶ 'Moli God mo vereea mara: Retitauhi paro akerihi natu,
a pa mele vaia peresi na noku tamlohi
hin rani atu.

A pa tau na noku leu na mapura,
matan vara la pa levosahira,

ale a pa ulira na ūromira, matan vara la pa eři oloolo hinira.' *Jer 31.33*

¹⁷ Ale mo mele verea mara,
'A pa sopo mele ūromřomi na nora hehe peresi na nora tope na leu.' *Jer 31.34*

¹⁸ Ale vara God mo ūromi na hehe moiso, mata sava natu tea mo opoia vara i mele sile te malamalai mata hehe?

Ra Turu Rilangi Hin Křisto

¹⁹ Ale la vorai peresi na vevorai ūruhuřuhu, nake ūromiřa i eři ūrilangi mata unu hin Jara Tapu Jea atu na tuka mata ūraen Iesu. ²⁰ Mateia non Křisto mo vai na malele paro sei mo lo sile na mauri, ale mo roia vara ūra eři jeu tavalu ruru tapu atu ūra mai mariviti isan God.

²¹ Ale matan Iesu nořa Přis Aulu jea mo lo kilau na iman God, ²² mo ūruhu vara ūra mai mariviti isan God, ūromiřa i sopo ūromkaka, nořa rasua i ūrilangi, matan nořa ūromřomi sasati God mo turusira moiso na ūraen Křisto, matan vara i vai na ūromiřa la vokevoke, ale mo paptijo na epeřa na wai niro.

²³ Ha sopo ūromkaka, pani ūra lo taurilati ūromtoho nike sei ūra lo verea vara ūra lavia moiso, matan ūra eři rasua vara God i pa sopo tope nona retitauhi paro nike.

²⁴ Ha aleale malele vara ha eři tueni kamim hatehateahi hinia mata vujangi na nomim opoia isana tinapua. ²⁵ Ale ūra sopo ūromřomi purongo na nořa pulutahi jara matea sohena tamlohi hai la lo ūromřomia, pani ūra retituetueni ale ūra retiřoařoahairá hatehateahi, ūra tau na ūromiřa mata nořa pulutahi tarea matan nona mele mai mo lo mai mariviti.

²⁶ La tapala ūruhuřuhu, vara ūra lo opoia vara ūra lo hehe, hina purongo vara ūra lavi vevuhi na lelevosahi mata retivarařuhu moiso, mo sopo te mele malamalai tinapua vara i eři tavuhoro la hehe atu. ²⁷ Pani halо levosahia vara ūra pa sopo eři kilau matan te hina ūruhu pani ūra pa lo kilau purongo mata lolokoru sasati sei mata aria non God sei i pa mai sohena hapu ūrilangi jea matea matan vara i suli nařihi na nona meresahi.

²⁸ Tuai vara tea mo ūrohu vara i oloolo na leu non Moses, la pa sopo ūromopoia, ale la pa vilimateia usuri na vereulia nona tamlohi mo rua teni mo tolu mata nona hehe. ²⁹ Ha lo levosahia vara i pa sati jea isan la haratu sei la rasua moiso ale la mele

jovi na hehe, matan la lo varasi Natun God, ale la lo vai na ūrae mata retitauhi sei mo tapuhira hinia mo sohena hina purongo matea. Tamlohi sohena, la lo vaivai na Tanumen God sei mo lo lavi na ūromřuhu non God mo mai isara.

³⁰ Matan ūra levosahia vara haratu sei mo lo verea mara,
'Enau a pa kele.

Enau a pa mele sile na volira i tataholo na sava la vaira.' *Deut 32.35*
Ale mo mele verea mara,
'Moli i pa ari na nona tamlohi.'

Deut 32.36; Psa 135.14
³¹ Enia hina sasati tavera mata matahu matea vara ko jovi sivo na liman God sei mo lo mauri.

³² Ha sopo ūromaliho hin la rani atu tiroma sei ka lavi na lelevosahi hin Křisto hinira. Ha mele ūromřomia sohena sava ka lo turu ūrilangi, hina purongo vara ka levosahia vara ha pa lavi na rani ūrilangi tavera matana.

³³ Hin la rani atu tamlohi la verelejileji kamim na naho tamlohi, ale la tamaji kamim, ale hin rani atu ka lo tueni na tinapua sei la lo lavi na rani ūrilangi sohemim. ³⁴ Ka lo lavi na rani ūrilangi peresi la haratu sei la pulahira na ima ūrilangi, ale hin la rani atu la lavi nařihi na nomim hinahinau tari, ka tinařihia, ale ūromim mo sopo sati matana, matan ka levosahia moiso vara hina ūruhuřuhu jea hai matan tui tui la lo saovi kamim na pongi hitahu.

³⁵ Ha sopo tinařihi na nomim rasua ūrilangi hin Moli, hina purongo vara sava i pa masese. Ha ūromřomia vara voli nomim rasua sei i pa mai mo tavera jea matana.

³⁶ Ale nakerihi ha ūromperavu! Ha turu ūrilangi mata vai na masalon God, matan hitahu ha pa lavi vevuhi na sava mo retitauhi hinira moiso.

³⁷ Ale God mo verea vara,
'I pa sopo tuai haratu sei mo lo mai i pa pala,
ale i pa sopo vai malum.'

³⁸ Ale tamlohi sei la tataholo na nahoku la pa hahau na nora rasua.
Pani a pa sopo avulahi hin la haratu sei la vahaři hiniau.'

Hab 2.3-4

³⁹ Pani enřa ūra sopo sohen la haratu sei la vahaři hin God, ale la pelati na nora malele mauri tui. Nořa rasua nike mo vairā ūra levosahia mamahunia vara God i pa juriřa.

11

Tovongi Rahu Mata Rasua

¹ Rasua enia sava? Enia levosahi mamahuni sei vara sava ū lo ūromtoho matana i pa masese. Enia nōa levosahi mamahuni na hinau sei ū sopo lo ēri hitera nake. ²⁻³ Na rasua, ū levosahia vara varama nike mo pa pala usuri na reti non God, ale na rasua ū levosahia vara hinau tari ū lo hitera la tai na hinau ū sopo ēri hitera.

God mo avulahi na tamlohi matan tuai mata nora rasua.

⁴ Enia mata rasua sei, Abel mo sile na malamalai mo jeu Cain, ale God avulahi hinia ale hinau nike mo vujangia vara Abel mo tataholo na nahon God. Ale hina purongo vara Abel mo mate tuai ūruhu moiso, tovongi mata nona rasua mo pa lo retireti isāra nake.

⁵ Enia mata rasua sei, Enoch mo sahe na tuka mo sopo mate – ‘vahatea purongo mo tihai matan God mo lavi nārihia, matan God mo avulahi hinia mata nona rasua’. *Gen 5.24* ⁶ Ale ka hitea, o sopo ēri vai God i avulahi vara mo sopo te nom rasua. Tea vara mo opoia vara i mai isana, i pa rasua vara God mo lo toho ale enia i pa voli la haratu sei la lo alea vararūhu.

⁷ Enia mata rasu sei, Noah mo voro na aka matea vara i pa juri na vao imana hin wai tatave tavera atu. Matan mo lo lotu God na matahu, mo lo oolo na nona retiroāohai mata hinau matea mo sopo lo masese hin te pongi. Sava mo vaia usuri na nona rasua mo sile na talai isana tamlohi tari na varama hin rani atu, ale matan nona rasua sei mo mai mo tataholo na nahon God.

⁸ Enia mata rasua sei Abraham mo oolo hin God hin rani atu mo tovia vara i malue na jarana vara i vano na jara tina-pua matea, jara atu God i pa silea sohena koruna isana. Abraham mo vano pani mo sopo levosahia vara i pa vano tataholo epu. ⁹ Ale mara mo kakau hin jara atu God mo retitaui hinia isana, mo lo toho atu na rasua matan enia mo sohena vinano matea, ale mo lo juruvi na tent matea. Ale Isaac enia Jacob la juruvi na tent sohena. Retitaui atu God mo silea isan Abraham enia nora sohena. ¹⁰ Abraham mo pa vaia sohena matan mo lo kilau toho matan taon

tavera atu sei mo puloha, ale God sei mo voroa usuri na ūromina.

¹¹ Enia mata rasua sei Sarah enia Abraham la ēri tape na natirihi matea, hina purongo vara la vajiahia sasati moiso ale Sarah enia mo aroaro. Abraham mo rasua vara God i pa vai na nona retitaui isan Sarah. ¹² Ale vao tavera sei la malue hin tamlohi nike matelete purongo sei mo vajiahia sasati moiso vara i ēri vasusu, mahapina la vao vao sohena vitusarasara na masapa, ale mo sohena piri oneone na pahisa tasi sei tea i sopo ēri evira.

¹³ La tamlohi tari nike la mate, pani la sopo lo lavi na sava God mo retitaui hinia isara, pani na nora rasua la kilau vano la hitea mo lo toho asau, ale la avulahi na retitaui non God. La majinga vara enira la vinano purongo ale mata hahau ūalihi purongo na varama. ¹⁴ Matan tamlohi sei la lo retireti sohen haratu na varama, la lo vujangia mo memera vara enira la lo kilau toho mata jarara tataholo. ¹⁵ Vara la lo ūromōmi na jara sei la malue hinia, korong la mele mule moiso. ¹⁶ Pani enira la lo ale na jara ūruhu matea aulu na tuka. Matan haratu, God mo avulahi vara la tovia nora God matan enia mo tatamahu na taon tavera matea na tuka matara.

¹⁷ Enia mata rasua sei Abraham mo sile Isaac sohena malamalai matea hin rani atu God mo vahitea aulu hin vutivuti atu. Pa Abraham atu sei mo lo lavi na retitaui non God mo tatamahu vara i vilimatei natuna vorahese Isaac sohena malamalai. ¹⁸ God mo retitaui isan Abraham mara, ‘Hin natum Isaac natu mahapim la pa lo tauri na hijam’.

Gen 21.12

¹⁹ Abraham mo ūromōmia mara vara Isaac i mate, God i ēri mele vaia i mauri. Ale na malele matea, vararūhu Abraham mo pa mele lavi natuna na mateia.

²⁰ Enia mata rasua sei Isaac mo lēruhu hin la natuna atu mo rua, Jacob enia Esau. Enia mo levosahi mamahuni na sava God i pa vaia na pongi mo lo mai.

²¹ Enia mata rasua sei Jacob hin rani atu mo vajiahia ale mariviti vara i mate, mo lēruhu na natun Joseph hatehateahi, ale Jacob mo popovitohu mata lotu God, ale mo lo tauri na tihonina.

²² Ale enia mata rasua sei Joseph hin rani atu mariviti vara i mate, mo retireti sohen mo levosahi mamahunia vara God i

pa lavi nařihi na tamlohin Israel la malue Egypt vara la sahe Canaan. Mo levosahi mamahunia hin rani atu sei mo retileu isara mara vara la malue la pa lavi na suina peresira.

²³ Enia mata rasua sei taman Moses enia tinana la jarohia mata vitu mo tolu. La hitevosahia vara God mo silera na natirihia matea mo tinapua, ale la sopo matahuni na sava supe nona mara Egypt i eři vaia isara.

²⁴ Enia mata rasu sei Moses hin rani atu mo ulua, mo ūahu vara la kilaua sohena natun venatun supe nona mara Egypt matea. ²⁵ Moses mo tau na ūomina vara i pa usuri na malele mata rani ūilangi peresi na tamlohi non God. Mo sopo opoia vara i avulahi na hehe sei avulahina mo lo toho mata makomo rani purongo. ²⁶ Enia mo levosahia vara i pa mele ūuhu jea vara i lavi na rani ūilangi matan Křisto, mo jeu haratu vara i lavi veyuhi na tavtav matan Egypt, matan mo lo kilau toho mata nona otori tavera atu sei God i pa silea isana. ²⁷ Enia mata rasua sei Moses mo malue na lepan Egypt hina purongo vara supe nona mara Egypt mo lolokoru hinia. Enia mo turu mo lo vano matan mo lo kilau matan haratu sei tea i sopo eři hitea. ²⁸ Hitahu enia mata rasua sei Moses mo retileu isana tamlohin Israel vara la taurilati na Passover, ale vara la turusi na ūae na peri matarua matan vara angelo mata mateia i pa sopo vilimatei na natura vora tiroma.

²⁹ Enia mata rasua sei tamlohin Israel la hahau roto tasi sei la tovia Tasi Hahara sohena vara la lo hahau na lepa mamaša purongo. Pani hin rani atu mara Egypt lara la usurira, enira mo isoiso la pute la mate.

³⁰ Enia mata rasua sei, tamlohin Israel la hahau ūalihi na taon tavera matan Jericho mata rani mo limaravrua, ale rorona la maroe la jovi.

³¹ Enia mata rasua sei, Rahab hařai malele atu mo sopo mate peresi na tamlohi tari hin nona taon tavera atu Jericho sei la ūuhu vara la oloolo hin God. Mo sopo mate matan enia mo avulahi vara i jarohi la tamlohin Israel atu sei la luhu na imana. ³² Vara mo sohen haratu a pa mele vere na sava? I pa mele lavi na rani peravu jea vara a vere veyuhi na sorasora mata rasua non Gideon, Barak, Samson, Jephthah, David, Samuel peresi na p̄ovet tari.

³³ Enia mata rasua sei la tamlohi nike la pulahi na jara nona supe tinatinapua, la aulu na jarara usuri na posposi tataholo, ale la lavi na sava God mo retitauhi hinia isara. La pelati na jingo lion, ³⁴ la vuni na pepe hapu, la rovo na mateia na voro sita vuro. Epera malokoloko, mo posí mai epe ūilangi. La mai la ūilangi jea na vuro ale la levuti na vao tamlohi vuro tinatinapua la maro. ³⁵ Hařai la mele lavi la haratu sei la opoia na mateia.

Pani hai la rasu God, tamlohi la vailejlejira, la ūomromia vara mate i pa mele ūuhu, i jeua vara la vahari hin God vara la materi na ima ūilangi.

La tau na nora ūomtoho na sauteterahi mata mauri ūuhu jea tinapua matea.

³⁶ Tamlohi la kerehi hai, ale la rupi kotkotira na asi maja. Ale hai la lihora na jen na jara ūoroha na lolo ima ūilangi.

³⁷ Hai la mate matan la parura, ale hai la soara sopera mo rua; hai la vilira na sita vuro, ale hai la pa lo hahau la ru na huri sipsip peresi na nani purongo, la marohati, la lavi na rani ūilangi jea ale tamlohi la vailejlejira. ³⁸ Enira la ūuhu hajavua mata toho hin varama nike. La hahau roto na tano koru peresi na vutivuti, la luhu na papa vatu ale na koko lepa.

³⁹ La tamlohi tari nike sei kama verera moiso, God mo avulahi hinira enira mo isoiso mata nora rasua, pani te vonara hatea mo sopo lo lavi na hinau tari sei God mo lo retitauhi hinira. ⁴⁰ Matan God mo tatamahuni na hinau ūuhu ūuhu hai matařa matan vara God i eři vaira la tataholo ūuhu peresiřa nake vahatea.

12

Aria Non God Mo Vujangi Na Nona Opoia

¹ Ale matan ūa eři hite vao tavera atu matan tuai sei la tovongi ūuhu mata rasua, la lo turu ūalihiřa mata vujangi mauri atu mata rasua isařa nake. Ale matana, mo ūuhu vara ūa pulahi nařihi na hinau tari sei la lo puhoniřa ale la vaiřa ūa sopo eři maro ūilangi, ūa pulahi nařihiřa peresi na hehe sei la lo kaluti hiniřa, matan vara ūa eři maro peravu hin maro matan mauri nike mo lo toho na nahořa. ² Ale ūa eři vaia vara ūa lo kilau isan Iesu sei enia pulo

noña rasua na tapulona mo tikeli na isoisona. Matan enia mo avulahi vara i lavi na mateia mata mahanuhanu na talopeilopei, matan mo levosahia vara hitahunia i pa avulahi tavera matana. Nake mo lo sakele na jara oloolo tavera mo jeu na tinapua na pahisa jara sakele mata supe non God na tuka. ³ Ha to ūromūromi na rani ūrilangi tari mo lavira sei hin rani atu tamlohi hehe la vai na hina sasati jea isana, ha ūromūromia matan vara ha sopo malokoloko, ale ha tinařihi taleu na nomim rasua hinia. ⁴ Ale kamim ka sopo lo tikeli jara atu vara ha pa mate matan ka lo valum peresi na hehe na nomim turu ūrilangi mata turuhoroa.

⁵ Ale ka pete ūromaliho moiso na retituetueni non God isamim, la natuna? Mo verea mara,
'Natuku, o sopo kilau purongoi
vara Moli mo vujangih
matan te hinau ko vaia
mo sopo ūruhu.
Teni ūromim i sopo sati matana,
⁶ matan Moli mo lo vujangi la haratu mo
opoira,
ale mo lo reti tataholo isana natuna tari sei
mo lavira.'

Prov 3.11-12

⁷ Vara God mo lo vujangi kamim matan te hinau ka vaia mo sati, ha lo ūromūromia vara God mo lo vaia sohena matan kamim ka natuna tataholo. Sava natirihi mo vai na hina sati matea, pani la sopo vujangia matana? ⁸ Vara God mo sopo vujangi kamim matan te hinau ka vaia mo sati sohen mo lo vaia isana natuna tari, mo ūramaria vara kamim natu malele, ale kamim ka sopo natuna tataholo. ⁹ Vara tarea ūra lo oloolo na tamařa mata varama sei la lo vujangirā matan te hinau ūra vaia mo sati, i pa mele ūruhu jea vara ūra avulahi mata lavi na vujangi sei Tamařa na tuka mo lo silea matan te hinau ūra vaia mo sati matan vara ūra pa toho jejeu.

¹⁰ Matan tamařa mata varama la vujangirā matan noña hina sati mata tauni mo visalete purongo usuri na nora lelevosahi. Pani vujangi non God matan te hina sati isařa, enia tarea mo tataholo, ale enia mo ūruhu matan mo vaia matan vara ūra pa lavi maurina atu sei mo tapu. ¹¹ Na rani ūra lo lavi na vujangi matan te hinau ūra vaia mo sati, mo sopo rani matea mata avulahi

pani ūra rongo mo sati matana. Pani hitahu, vuana enia tamata peresi na mauri tataholo isan la haratu la ulua hinia.

¹² Ale matana, ha vai na limamim sei la malokoloko sati moiso vara la mele tau-tauri i ūrilangi, ale ha turu tataholo i ūrilangi na jaramim, hina purongo vara palomim la lo savaravara. ¹³ Ha hahau na malele tataholo, matan vara la haratu la lo usuri kamim, hina purongo vara la malokoloko, teni la pakajangjang moiso, la pa sopo eři tialahalaha vara la jovi, pani la pa mele ūrilangi.

Prov 4.26

Ha Tapurongo Hin God

¹⁴ Ha vahitea vara ha toho na tamata peresi na tamlohi tari, ale ha alea vara ha toho na mauri vokevoke sei mo tapu, matan la haratu sei la sopo tapu, la pa sopo eři hite Moli. ¹⁵ Ha kilau mamahuni kamim hatehateahi, matan vara te vonamim i pa sopo eři jovi nařihi na ūromūruhu non God. Ha sopo tinařihiha vara te ūromūromi sasati mata vahaři na rasua i malue hin kamim, vara i vono, i pa komo na vao tavera na honana, ale la pa jovi matana. ¹⁶ Ha sopo tinařihiha vara tea i vai na posposi maji, teni i usuri na posposi varama sohen Esau. Enia mo sile na korun tamana tataholo isan tasina mata peleti hanhani matelete purongo. ¹⁷ Ale hitahuna, mara mo opoia vara i lavi na leřuhu non tamana, tamana mo ūrohu hinia. Hina purongo vara mo tangisia, pani i sopo eři mele posí na sava mo lo toho moiso.

Retitaui Mata Leu Na Vutin Sinai

¹⁸ Matan kamim ka sopo mai isan God sohena tavtavyuin Israel tuai la lo vaia hin rani atu la lavi na leu isan God na vutivuti Sinai sei mo tapu vara la tikelia, teni na pepe hapu tavera sei mo lo hani aulu hin vutivuti atu, teni na ūrořoha tavera jea ea, teni na langi poripori tavera ea. ¹⁹ Matan la rongo na roroa trumpet tavera matea peresi na leo matea sei mo lo sile na retisohai matea. Ale mo vaira la tangi vara God i pa sopo mele retireti! ²⁰ La rongoa vara nona retileu mo ūrilangi jea matan mo verea mara, 'Hina purongo vara te maji palo vati purongo hatea, i tikeli pulon vutivuti nike, ha pa parumateia'.

Exo

19.12-13 ²¹ Moses sohena, matahu tavera mo sohonia na sava mo hitea ale mara, 'Na matahu tavera, ale na savaravara'. *Deut 9.19*

Retitauhi Paro Mo Mele Ruhu Jea

22 Pani kamim ka mai na Vutin Zion, taon tavera non God mauri, Jerusalem matan tuka, ale ka mai isana vao angelo tavera sei la lo pulutahi na nora avulahi tavera.

23 Kamim ka mai na pulutahi nona vora tiroma non God sei hijara la ulia na tuka. Kamim ka mai isan God, hara sei i pa ari na tamlohi tari. Ale ka lo mai isana tanumen la haratu na tuka sei God mo volituhura moiso, ale mo vaira la tataholo ūruhū na nahona. **24** Ka mai isan Iesu, hara sei mo lo turu na livuhan God peresi na tamlohi matan retitauhi paro nike, ale ka mai na ūraena sei la turusia mata ūromi na hehe, mo sopo sohena ūraen Abel sei mo lo tangi isan God vara i sile na talai matana.

25 Ha lo kilau mamahunia vara ha oolo lo hin God, hara sei mo lo retireti isamim. Matan, vara tavitavuin Israel la sopo eři rovo hin rani atu la ūruhū vara la tapurongo hin Moses sei vahārule matea enia tamlohi purongo, i pa mele sati jea vara ūra ūruhū hin haratu mo lo retireti ūra sei mo tai na tuka! **26** Hin rani atu God mo retireti isara na vutin Sinai, leona mo hisuhi na varama. Pani nake mo mele vai na retitauhi tinapua matea mara, 'Mele vahatea, a pa sopo hisuhi na varama purongo, pani a pa hisuhi na tuka peresia'. *Hag*

2.6 **27** Haratu mo ūramia vara hinau tari na varama la pa hutuhutehi, matan vara hinau matan tui tui purongo, la pa lo toho jejeu.

28 Ale matan ūra pa lavi mauri atu God mo aulu hinia sei i pa sopo eři ūrovo, mo ūruhū vara ūra vere meje isana, ale ūra vai God i avulahi na nořa lotua na oolo sei mo vaiřa ūra sile na oolo tavera jea isana.

29 Matan nořa God enia hapu tavera jea matea mata suli vevuhi na hinau tari. *Deut 4.24*

13

Isoiso Retireti

1 Ha pa opoiopoi kamim hasemim tarea na opoia varuřuhu. **2** Ha sopo ūromaliho vara ha avulahi mata lavi na vinano na imamim, matan hai la vaia moiso isana

angelo pani la sopo levosahia. **3** Ha sopo ūromaliho hin la haratu la lo vailejlejira na lolo ima ūrlangi, ha ūromřomira sohen kamim sohena ka lo toho peresira.

4 Ha ūromřomi i tataholo mata lahi, ha sopo mele juruvi peresi te tinapua, matan God i pa ari la haratu la lo vai na posposi viriu, peresi la haratu la lo vaivaileu peresi na tinapua mo lahi moiso. **5** Ha toho asau na opoia mata mania, ha avulahi na sava enia nomim, matan God mo verea mara, 'A pa sopo tinařihiho hin te rani.'

Ale a pa sopo revusehiho hin te rani.' *Deut 31.6; 31.8*

6 Matan haratu, ūra eři verea vara, 'Moli enia noku tuetueni, ale matana, a pa sopo matahu.

Vara mo sohen haratu natu, tamlohi la pa eři vai na sava isaku?' *Psa 118.6-7*

7 Ha mele ūromřomi la nomim patu tamlohi atu sei la lo vujangi kamim na reti non God tiroma. Ha ūromřomi na hinau ūruhū tari sei la mai isamim na maurira, ale ha rasu Moli sohen enira la rasua.

8 Iesu Křisto mo lo sohena nanovi, nahapani, ale jejeu. **9** Ha sopo tinařihiha vara te vujangi paro tinapua la haluhalu kamim. Kamim ka lo lavi na suiha na maurimim mata ūromřuhu non God, mo sopo na posposi tuai usuri na leu mata hanhani sei la sopo eři tueni la haratu la lo usurira.

10 Enřa nořa rasua paro nike mo sohena votavota paro matea, ale usuri ūromřomi atu přis mata rasua tuai la sopo eři lavi na hina ūruhū hinia matan malelena mo tinapua. **11** Usuri na rasua tuai na leu nona Jew, hin rani atu la lo toho na tano koru, přis aulu mo lo lavi na ūrae maji mo unu sivo na tent na Jara Tapu sohena malamalai matea mata hehe, pani usuri na leu la suli na tarape maji na tavalu rope jara tamlohi atu matan vara i vai na jarara i vokevoke. **12** Ale rasua paro nike mo sohena purongo, Iesu mo mate na tavalu open taon tavera atu Jerusalem, matan vara i eři vai na nona tamlohi la tapu na ūraena sei mo roro. **13** Ale matana, mo ūruhū vara ūra malue ūra vano isana hin jara sati atu na tavalu open taon tavera atu matan vara ūra lavi na rani ūrlangi sei mo lo lavia.

¹⁴ Matan varama nike mo sopo jaraña tata-holo: Enña ū lo kilau toho matan noña taon tavera atu na tuka sei i pa mai.

¹⁵ Hin Iesu, mo ūruhu vara tarea ū lo sile na hasohaso isan God na noña verea vara enia mo ūruhu sohena sava, sohena noña malamalai ūruhu matea ū lo silea isan God. ¹⁶ Ha sopo ūromalihi vara ha vai na vavahinau ūruhu ale ha lo ase na nomim hinahinau peresi la haratu la vejuveju, matan malamalai sohena, enia mo vai God mo avulahi tavera.

¹⁷ Ha ooloalo hin nomim patu tamlohi rasua, ale ha ooloalo na sava la lo verea isamim, matan enira la lo kilau na maurimim, ale la levosahia vara la pa turu na nahon God mata nora vavahinau. Mo ūruhu vara ha vaira la vaia na avulahi, mo sopo na ūromsati, matan vara i vono, i pa sopo tueni kamim hin rani atu mo lo mai.

¹⁸ Ha usiusi matamam, matan kama levo-sahia vara ūromimam la vokevoke, ale kama opoia vara kama toho na ooloalo na hinau tari kama lo vaira. ¹⁹ Ale nakerihi, na opoi na nomim usiusi mo tavera jea matan vara a eři mele mai isamim vila.

²⁰⁻²¹ Ale na lo usiusi vara God mata tamata sei mo mele lavi narihi noña Moli Iesu Kristo na mateia, vara i vai kamim ha tatamahu na hinau tari mata vai na masalona. Na lo usiusi vara na suihan Iesu Kristo i pa vai kamim ha vua na hinau tari sei i pa vai Iesu i avulahi. Iesu enia Tavui Sipsip aulu mata sipsip usuri na retitauhi matea matan tui tui, enia mo ulia na ūraena. Ale hasohaso i pa vano isana tarea tui tui. Amen.

²² Na usia ūlangi isamim la vorai peresi na vevorai ūruhu ūruhu, vara ha tapurongo i ūruhu na sava na pete verea moiso hin noku leta vejuveju nike.

²³ Na opoia vara ha levo-sahia vara vorai na rasua sei Timothy, mo malue na ima ūlangi moiso. Ale vara i pala nike vila, a pa lavia peresiau kama mai kama hite kamim.

²⁴ Ha sile na noku retioloolo i vano isana nomim patu tamlohi tari na rasua, peresi na kalesia tinapua sei la lo toho atu. Kalesia sei la tai Italy la sohai na nora retioloolo isamim.

²⁵ Na lo usiusi vara ūrom ūruhu non God i pa toho isamim mo isoiso.

James Leta James Mo Ulia Leta Nike

Leta nike, enia mo vano isana tautauuin Israel sei la tau na nora rasua hin Iesu Křisto. Mo vujangia mara vara te rasua varařuhu na maurim, tamlohi la pa hite na vaivaina, vara i vono, nom rasua enia hina purongo.

Mo retireti na hinau sohen harihi: vara ko tilavono, o sopo řomatano - o tauri řilangi na nom rasua na rani vahite la mai isam. O sopo lolokoru vilavila. O sopo kilau na huri tamlohi purongo. O vai na hina řuhu isana tamlohi. O vaitataholoi na memem. O ooloohin God, o turuhoro Tiapolo. O sopo retihapahapa na nom voko. Vara ko tautav, o tueni na tilavono. Sopesopen puku nike.

Hin leta nike

1. Retiololo (1.1)
2. Rasua enia hina lelevosahi na mauri (1.2-18)
3. Tapurongo moiso ooloohin na reti non God (1.19-27)
4. Vaia i řuhu isana tamlohi tinapua (2.1-13)
5. Rasua peresi na voko (2.14-26)
6. Lelevosahi peresi na retireti (3.1-18)
7. Retiroařohai isan la haratu la lo tapala peresi na varama (4.1-5.6)
8. Posi malum, řomřuhu peresi na usiusi (5.7-20)

¹ Enau James, slev non God enia Moli Iesu Křisto, na uli leta nike mo vano isamim Jew ka kalesia, ka lo toho hatehateahin varama nike.

Rasua Peresi Na Lelevosahi

² La voraiku peresi na vevoraiku řuhuřuhu, vara vahite la mai isamim, ha avulahi matara, ³ matan ka levosahia vara te hinau mo vahite na nomim rasua, enia i pa vai na nomim rasua i mele řilangi jea, matan vara ha pa turu řilangi tarea. ⁴ Ale vara ha turu řilangi sohena, enia i pa eři vai na maurimim i jejea řuhu, i pa mařivi na hinau řuhu tari, moiso ha pa sopo vejuveju hin te hinau na mauri kalesia.

⁵ Pani vara te vonamim mo levosahia vara nona lelevosahi mo rihirih purongo, enia i pa usia isan God, enia haratu mo hansohai isana tamlohi tari, mo sopo hitesatihi tea, ale enia i pa silea isana. ⁶ Pani i pa usia isana na rasua moiso i sopo řomkaka matana, matan vara tea mo lo řomkaka, enia mo sohena suhusuhu na tasi, langi mo lo serea mo lo pulahia. ⁷ Matan tamlohi atu i pa sopo řomřomia vara i pa lavi te hinau isan Moli, ⁸ matan enia tamlohi řom rua matea, enia řomina mo sopo matea na posina tari.

Tamlohi Tilavono Peresi Na Tamlohi Taytav

⁹ Ale vorai atu na rasua sei mo tamlohi purongo i pa eři retihapahapa matan God mo tahea aulu, ¹⁰ ale haratu mo tautav i pa eři retihapahapa matan God mo taua atano, matan enia mo sohena vira ſuvu matea, enia i pa tihai. *Isa 40.6-7*

¹¹ Matan alo mo vele peresi na langina tutuni, ale mo vai na ſuvuřuvu peresi na virana la mahoa, la jovi, ale majhira řuhuřuhu la tihai, ale i pa sohena isana tamlohi tautav sei la lo tutungui na nora tautav, la pa tihai.

Hinau Mo Vahite Na Tamlohi

¹² Avulahi isana tamlohi mo turu řilangi tarea na rani vahite, matan vara i jeu la vahite atu, God i pa silea na volina sei enia mauri tui mo usuri na nona retitauhi isan la haratu la lo opioa.

¹³ I pa sopo tea mo lo toho na vahite i eři verea vara, "God mo lo vahiteau!" Matan mo sopo te hina sasati hatea i eři vahite God, ale God mo sopo vahite te tamlohi. ¹⁴ Pani vahite la vora usuri na masalon tamlohi hasena purongo, la lo reve nařihia, ale la lo haluhalua, ¹⁵ moiso, masalona atu mo ulua na lolona, ale hehe mo vora hinia, ale na rani hehe atu mo taveri mo řuhu, mo vasusui na mateia.

¹⁶ La voraiku peresi na vevoraiku řuhuřuhu, ha sopo jalio na řomimim.

¹⁷ Ha lo levosahia vara otori řuhuřuhu tari peresi na otori la tatahola řuhu tari, la tai na tuka, la tai isan Tama memera aulu, la sinai atano. Ale enia mo sopo sohera matan mo sopo posposi, ale mo sopo te řorona. ¹⁸ Ale na masalona, mo vairā řa vora na retivarařuhu matan vara

ra pa mai sohena vora tiroma na nona vavahinau tari mo lo vaira.

Ha Vaia Ha Sopo Rongoa Purongo

¹⁹ La voraiku peresi na vevoraiku ūruhu, ha levosahi harihi; ha tatamahu i ūruhu vara ha tapurongo, pani ha sopo vilavila mata retireti teni lolokoru. ²⁰ Matan posposi tataholo atu God mo opoia, mo sopo vora na lolokoru nona tamlohi. ²¹ Matan haratu, ha pulahi nārihi na posposi lumiha peresi na posposi sasati tari na maurimim, ale na ūromatano, ha lavi reti atu God mo lavoa na mapumim moiso sei i eři juri na maurimim.

²² Ale nake, ha mai tamlohi mata vai na sava reti mo verea, ale ha sopo tamlohi mata tapurongo purongo sei la lo hase halura. ²³ Matan vara tea enia mata tapurongo na reti purongo, ale mo sopo mata vaia, enia mo sohena tamlohi matea mo lo kilau na nahona na titiro, ²⁴ matan enia mo lo kilau na niniuna, ale vara mo mele malue, ale vahatea purongo, mo ūromaliho vara enia mo sohena sava. ²⁵ Pani haratu mo lo kilakilau usuri na Leu ūruhu non God mo ūruhu, leu atu mo vaia mo materi, ale vara i lo vai na sava leu mo lo verea, ale i sopo ūromaliho na sava mo rongoa, God i pa leřuhu hinia na nona vavahinau.

²⁶ Vara tea mo ūromromia vara mo lo usuri na mauri tataholo, pani mo sopo vaitataholoi na memena, enia mo lo halu na mapuna, ūromromi mata mauri tataholo non tamlohi nike, mo sopo ūruhu hin te hinau hatea. ²⁷ Mauri tataholo vararuhu sei mo vokevoke na nahon God Tama, enia mo sohen harihi: vara o kilau mamahuni na natu marua peresi na malepu na nora rani ūrilangi, ale vara o toho asau na posposi varama.

2

Ha Sopo Tametame Na Tamlohi

¹ La voraiku peresi na vevoraiku, ha sopo tametame tea na mauri mata rasua hin nořa Moli Iesu Kristo, enia Moli mata hasohaso tavera jea. ² Matan vara te tamlohi la unu na nomim matavuhi, ale matea enia mo tau na gold ring na limana mo ru na ruru ūruhu, ale tamlohi

tinapua matea mo tilavono mo unu sohena, pani nona ruru mo mařařari, ³ ale vara ha sile na oolo lo hin haratu sei mo ru na ruru ūruhu, ha verea isana vara, "Tamlohi tavera, o sakele hin jara ūruhu nīke!" Pani isan haratu sei mo tilavono ha verea vara, "O turu purongo sevano, teni o sakele purongo nīke atano na paloku." ⁴ Harakerihi, enia posposi matahi isamim hasemim, ka mai ka tamlohi aria la lo ari na ūromromi sasati.

⁵ La voraiku peresi na vevoraiku ūruhu, ha tapurongo isaku, God mo viřoni la haratu la tilavono na varama vara la pa tavytav na nora rasua, ale la pa lavi mauri atu God mo aulu hinia sei mo retitauhi hinia moiso isan la haratu la opoia. ⁶ Pani ka lo kilau purongoi na tamlohi tilavono. Mo sopo la haratu sei la tavytav natu, la lo sile na rani ūrilangi isamim, teni la lo reve kamim ka vano na court? ⁷ Mo sopo enira natu sei la lo veresatihi na hijan Kristo sei ka lavia?

⁸ Pani vara ka lo oolo lo hin Leu atu mo aulu na Retitapu sei mo verea vara, 'O opoi na tamlohi la lo toho ūralihio sohen ko lo opoiho hasem.' *Lev 19.18* ⁹ Pani vara ka lo tametame na tinapua, ka lo vai na hehe, ale Leu mo verea vara ka tamlohi tope na Leu.

¹⁰ Matan hare mo lo oolo lo leu tari, pani mo tope matelete purongo, enia mo ori na leu tari. ¹¹ Matan haratu mo verea mara, 'Ha sopo vaivaileu peresi na tinapua mo lahi moiso!' Enia haratu mo verea mara, 'Ha sopo vili na tamlohi!' Vara ka sopo vaivaileu peresi na tinapua, pani ka vili na tamlohi, kamim ka mai tamlohi matea mata tope na Leu moiso. *Exo 20.13-14; Deut 5.17-18* ¹² Ale ha retireti, ale ha hahau sohen la haratu sei la pa lavi na aria non Leu mata materi. ¹³ Matan vara God i ari na tamlohi, i pa sopo ūromopoi tea sei mo sopo eři ūromopoi na tinapua. Matan ūromopoi mo vuni na aria non God.

Rasua Peresi Na Vaivaina

¹⁴ La voraiku peresi na vevoraiku, mo ūruhu sohena sava vara tea mo lo verea vara enia tamlohi rasua, pani mo sopo te vaivaina? Nona rasua i eři juria teni i vono? ¹⁵ Vara te vorai teni te vevorai hatea mo sopo te nora ruru teni te hara hinau, ¹⁶ ale vara te vonamim matea mo verea

isana mara, "Mo ūruhu, o vano, God i pa leřuhu hiniho, o pa sopo hamariri, o pa sopo marohati!" Pani ko sopo sile te hinau hatelete isana matan vara i tueni na epena, sava hinau mo ūruhu hinia?

¹⁷ Ale rasua mo lo toho hasena vara mo sopo te vaivaina, enia mo mate.

¹⁸ Pani tea i pa verea vara, "Engko nom rasua, pani enau na lo vai na hinau matuvana!" Ale a pa verea isana vara, "O vujangiau na nom rasua mo sopo te vaivaina, ale a pa vujangiho na noku rasua na noku vavahinau."

¹⁹ Ko rasua vara God enia matelete, haratu mo tatahola, vararūhu tanume sasati sohena la rasua, ale la matahu tavera la lo savaravara matana.

²⁰ Pani ko lo opoia vara a vujangia isam, tamlohi rongorongo vono, vara rasua mo sopo te vaivaina enia hina purongo.

²¹ Ko levosahia vara Abraham tamāra mo tatahola na nahon God mata vaivaina, hin rani atu mo sile natuna Isaac na votavota isan God? ²² Ko hitea vara nona rasua mo sořotahi peresi na nona vavahinau, ale nona vavahinau mo mařivisi na nona rasua, ²³ ale mo mařivisi na Retitapu sei mo verea vara, 'Ale Abraham mo rasu God, ale God mo verea vara enia mo tatahola na nahona matana'. *Gen 15.6* Ale matana, la tovia tapalan God.

Isa 41.8

²⁴ Ka hitea, tamlohi mo tatahola na nahon God na nona vavahinau, mo sopo mata rasua hasena purongo.

²⁵ Ale sohen haratu purongo Rehab, hařai malele atu, mo tatahola na nahon God na sava mo vaia, matan enia mo lavi la vahařule atu na imana, moiso mo vera na malele tinapua vara la mele malue hinia. ²⁶ Matan sohena, epe tamlohi mo mate vara tanumena mo malue hinia, ale rasua mo mate vara mo sopo te vaivaina.

3

Ha Lo Kilau Na Nomim Retireti

¹ La voraiku peresi na vevoraiku, mo sopo ūruhu vara kamim vao tavera ha mai ha tamlohi vujangi, matan ha lo levosahia vara na rani aria, God i pa ari ūlangi kamam tamlohi vujangi i jeu na tamlohi purongo.

² Matan enřa mo isoiso ūra jilio na malele matuvana, ale vara tea mo sopo jilio na sava mo lo verea, enia tamlohi tatahola matan i eři taurilati na epena tari. ³ Vara ūra tau na bit na jingo hos matan vara la ooloolo hiniřa, ūra eři posí vevuhi na epera sohena. ⁴ Ha ūromřomia, lanis sohena, la tavera hina purongo vara langi ūlangi mo lo sohaira vara i vano, pani stiana rihirihi atu i eři posí lanis tavera atu i vano na sava jara tamlohin lanis atu mo opoia. ⁵ Sohen haratu purongo, meme tamlohi enia mo rihirihi purongo, pani i eři retimangisi i tavera jea.

Ha ūromřomia vara te tanume hapu rihirihi hatea purongo i eři suli na urata tavera.

⁶ Ale meme tamlohi enia hapu, hina sasati tari matan varama nike la mařivi matana, enia hina rihirihi purongo na epeřa, pani mo sati mo jeu na epeřa tari, ale mo jilangi na malele mauri mo isoiso, matan hapu sei moruhapu mo lo polopoloa.

⁷ Matan tamlohi la eři taurilati na maji tari sohena maji jala, maji haraho, maji avuavu peresi na maji tasi, ale tamlohi la taurilatira moiso, ⁸ pani tea i sopo eři taurilati na memena. Enia hina sasati matea mo sopo eři toho malum, mo mařivi na poison sei mo sile na mate. ⁹ Ra hasohaso God Tamařa hinia, ale hinia ūra lo veresatihi na tamlohi sei God mo vaira la tatahola na nahona.

Gen 1.26 ¹⁰ Hin jingo atu matea purongo, leřuhu peresi na lesati la lo malue hinia. La voraiku, hinau atu mo sopo tatahola vara la sohen haratu. ¹¹ Wai peresi na tasi la eři tia vutvut hin te patu wai hatea purongo? ¹² La voraiku peresi na vevoraiku, pulo fig i eři vua olive teni grape i eři vua fig? Mo sohena purongo, paltungu tasi matea i sopo eři sile na wai purongo.

Lelevosahi Atu God Mo Silea

¹³ Hare isamim enia tamlohi lelevosahi matea, ale mo lelevosahi mamahuni na hinia? Vara tea, na nona posposi ūruhu, mo ūruhu vara i vujangi na nona vavahinau sei la vora mata nona posposi ūromřomia usuri na lelevosahi vararūhu. ¹⁴ Pani vara ha mařivi na mereimerei sasati, ale ka lo ūromřomia kamim hasemim na mapumim, ha sopo retihapahapa, ale ha sopo turuleji

na retivarařuhu. ¹⁵ Lelevosahi sohen harihī mo sopo tai na tuka, pani enia mata varama, enia nona tamlohi purongo, enia mo tai isana tanume sasati. ¹⁶ Matan varā sava jara mereimerei peresi na posposi ūromūromi kamim hasemim mo lo toho ea, patumasa peresi na posposi sasati tari la pa toho hinia.

¹⁷ Pani lelevosahi matan tuka, tiroma hinau hinia, enia mo sopo te ūromsati hinia, mo usuri na posposi tamata, mo usuri na posposi ūromřuhu, mo oloolo, mo mařivi na ūromopoia, ale vuana ūruhu mo mařivi, mo sopo tametame tea, ale mo vararuhu. ¹⁸ Ale tamlohi sei la lo vai na tamata, la pa lavo na piri mata tamata, ale la vu na astauni ūruhruhu.

4

Ha Mai Mařiviti Isan God

¹ Sava hinau enia pulo nomim vauriuri peresi na nomim vasvas? Pulona enia masalomim sei la lo valum na lolomim. ² Ka ūromusuri te hinau, pani ka sopo eři lavia, ale matana, ka vilimatei na tamlohi. Ka ūromijea hin te hinau nona tinapua, ale ha sopo eři lavia, ale matana, ka valum, ale ka vasvas. Ka sopo lavi te hinau matan ka sopo usia isan God. ³ Ka usia, pani ka sopo lavia matan ka lo usia na ūromřomi sati matan vara ha pa jalahia na masalomim.

⁴ Ka tamlohi vaivaileu! Ka sopo levosahia vara ha tapala peresi na varama i pa vai kamim ha meresahi isan God? Matana, hare mo opoia vara i tapala peresi na varama, mo hasena vaia mo meresahi isan God. ⁵ Teni ka lo ūromřomia vara Retitapu mo vere purongoi vara, ‘Romin God tari mo lo toho na Tanumena sei mo taua hiniřa?’ ⁶ Pani God mo mele sile na ūromřuhu mo jeu tiroma. Matan Retiulia mo verea vara,

‘God mo lo turuhoro
na tamlohi hapahapa
pani mo sile na ūromřuhu
isan la haratu la ūromatano.’ *Pro 3.34*

⁷ Matan hinau atu, ha hase tau kamim na ruhuruhan God. Ha turuhoro Tiapolo, ale enia i pa rovo isamim. ⁸ Ha mai mariviti isan God, ale enia i pa mai mariviti isamim. Ha sopo lavi na hina lumiha na maurimim, ka tamlohi hehe, ale ha onehi na mapumim la vokevoke, ka tamlohi ūrom

rua. ⁹ Ha ūromsati mata nomim hehe, ha tangtangi, ale ha tangi. Ha vai na nomim mana i mai tangtangi, ale nomim avulahi i mai ūromsati. ¹⁰ Ha hase tau kamim atano na nahon Moli, ale enia i pa tahe kamim.

Ha Sopo Ari Na Tamlohi

¹¹ La voraiku peresi na vevoraiku, ha sopo veresatihi kamim hatehateahi. Haratu mo lo veresatihi na voraina matea teni mo lo ari na voraina, enia mo lo veresatihi na Leu, ale mo lo ari na Leu. Pani vara ka lo ari na Leu kamim ka sopo tamlohi vai na Leu, pani ka tamlohi ari na Leu. ¹² God purongo mo sile na Leu, ale enia tamlohi aria, enia natu, i eři juri, ale i eři komo. Pani kamim hare matan vara ha pa ari na tamlohi la lo toho ūralihi kamim?

Ha Sopo Hapahapa

¹³ Ha tapurongo, la haratu la lo verea vara, “Nohorihi teni pavuho ūra pa vano hin te taon tavera nike, teni atu matan te tauni hatea, ale ūra pa turuhi te bisnis atu mata lavi te mania tavera!” *Pro 27.1*

¹⁴ Pani ka sopo levosahia vara sava i pa masese isamim pavuho? Maurimim enia sava? Matan ka sohena haravu na urata mo sinai mo toho makomona, ale mo mele tihai. ¹⁵ I pa mele ūruhu vara ha verea sohen harihi, “Vara na masalon Moli, ūra pa mauri, ale ūra pa haranike teni harasevano.” ¹⁶ Pani mo sohena natu, ka lo retimangisi na sava ha pa vaira. Retihapahapa tari sohen harihi enia hina sasati.

¹⁷ Matan haratu, hare mo levosahia na hinau tataholo vara i vaia, pani mo sopo vaia, enia hehe isana.

5

Retiřořoahai Isana Tamlohi Tavtav

¹ Ha tapurongo! Kamim tamlohi tavtav, ha tangi na tangtangi matan la rani ūrlangi atu la lo mai isamim. ² Nomim tavtav la ūrovo moiso, ale nomim ruru ūruhu pepe la hatiřarihira moiso. ³ Nomim gold peresi na silver la ūraeha moiso, ale ūraehara la pa pisuhi kamim, ale la pa hani na epemim sohena hapu. Ka pete takonahi na tavtav mata pongi hitahu moiso. ⁴ Ka hitea, yoli nomim tamlohi voko sei la lo vu na isamim, ka taurilati na sopena, mo lo tangi matamim, ale tangi nona nomim tamlohi

vu na isamim, mo tikeli na peron Moli Suiha Tavera Jea.

Deut 24.14-15

⁵ Ka lo mauri hin varama nike na masalomin peresi na nomim posposi ūromūromi hasemim purongo. Mapumim la ūravisvis na rani mata vilimatei na tamlohi. ⁶ Ka sile na talai, ale ka vilimatei na tamlohi tataholo sei la sopo turuhoro kamim.

Ha Romperavu Na Nomim Rani Rilangi

⁷ Matan haratu la voraiku peresi na vevoraiku, ha ūromperavu i tikeli rani atu Moli i mele mai hinia. Ka hitea sohena sava tamlohi isa mo lo saovi mata vua ūruhu mata lepa, mo ūromperavu matana mo tikeli usa atu mo mai tiroma mo vano mo tikeli usa atu mo pa mai hitahu. ⁸ Ale kamim sohena, ha ūromperavu. Ha vai na ūromimim la turu ūrilangi matan mele mai non Moli mo lo mai mariviti.

⁹ La voraiku peresi na vevoraiku, ha sopo retireti varihi hin kamim hatehateahi, matan God i pa ari kamim matana. Ka hitea! Tamlohi aria mo lo turu na matarua.

¹⁰ La voraiku peresi na vevoraiku, sohena tovongi matea mata lavi na rani ūrilangi, ale mata ūromperavu, ha ūromūromi na p̄rovet tuai sei la lo retireti na hijan Moli. ¹¹ Ka hitea, ūra lo ūromūromi la haratu God mo leruhu hinira sei la turu ūrilangi mo tikeli na isoisona. Ka pete rongoa sohena sava Job mo turu ūrilangi moiso, ale ka hitevosahi na ūromūromi non Moli hinia moiso, ale sohena sava Moli mo vujangi na nona opoia peresi na nona ūromopoia. *Job 1.21-22; 2.10; Psa 103.8*

Ha Retireti Varāruhu

¹² Pani aulu hin la hinau sei la voraiku peresi na vevoraiku, ha sopo retitauhi hin te hinau na tuka teni na varama teni hin te hinau tinapua, pani vara ka verea vara ‘io’, ale ha vaia, ale vara ka verea vara ‘mo vono’, ale ha sopo vaia, matan vara ha sopo lavi na talai matana.

Mt 5.34-37

Suiha Mata Usiusi

¹³ Te vonamim mo lo lavi na rani ūrilangi? I pa usiusi matana. Te vonamim mo avulahi? I pa hasohaso God na vete matana.

¹⁴ Te vonamim mo rojo? I pa usi na patu tamlohi na vao kalesia vara la mai la usiusi isan God matana. La pa tau surei na wel hinia na hijan Moli. ¹⁵ Ale usiusi na rasua i

pa juri haratu mo rojo, ale Moli i pa tahea. Ale vara mo vai te hehe, God i pa ūromia.

¹⁶ Matan haratu, ha taviti na nomim hehe isamim hatehateahi, ale ha usiusi matamim hatehateahi matan vara ha pa mele ūruhu. Usiusi nona tamlohi tataholo matea, suihana mo tavera jea vara mo lo usiusi. ¹⁷ Elijah, enia tamlohi matea maurina mo sohēra purongo, ale mo usiusi ūrilangi matan vara i sopo usa, ale mata tauni mo tolu vitu mo limarave, usa mo sopo jovi na lepa.

1Ki 17.1; 18.1

¹⁸ Moiso mo mele usiusi, ale usa mo mele jovi na tuka, ale isa la mele lavi na vuara. *1 Ki 18.42-45*

Ha Tueni La Haratu La Jovi

¹⁹ La voraiku peresi na vevoraiku, vara te vonamim hatea mo jalio na retivara ūruhu, ale tea mo mele lavia mo mai, ²⁰ enia i pa levosahia vara hare mo lavi na tamlohi hehe matea mo jalio mo mele mai, i pa juri na maurina na mateia, ale i pa tavuhoro na hehe matuvana. *Pro 10.12; 1Pe 4.8*

1 Peter

Tiroma Leta

Peter Mo Ulia

Leta Nike

Hin leta nike Peter mo sorahi mauri atu mo lavi na rani ūilangi nona kalesia hinia. Mo vujangia vara hin malele atu Moli mo lo vahite na rasua nona nona tamlohi hinia. Leta nike mo lo vano isana kalesia tari sei la lo toho ūalihi na jara matan Asia Minor. Tamlohi la sopo rasu Iesu, la sile na rani ūilangi isara, ale Peter mo verea vara la pa tatamahu mata turu ūilangi matan la pa mele lavia.

Peter mo retiuetuenira na nora rani ūilangi, ale mo verea mara mo tataholo vara la avulahi matana, matan vara la jeua God i pa silera na otori ūihu hin rani atu vara Iesu i mele pala na varama (1.6–7).

Peter mo verea isara mara Křisto sohena mo lavi na rani ūilangi na varama, i pa tataholo vara nona tamlohi usuri la lavia pani mata posposi tataholo purongo, mo sopo mata posposi sasati (2.18–25; 4.12–17).

Matan Křisto sohena, mo lavi na rongohaji na rani mo mate mata nořa hehe vahatea mata rani tari, enia mo sopo lo hehe hin te rani, pani mo mate mata tamlohi hehe matan vara i eři lavřa ūa mai isan God. Epena mo mate, pani mo mele turu, mo mauri na suihan Tanumen God. (3.18)

Hin leta nike

1. Retiololo peresi na usiusi (1.1–2)
2. Hinau mata ūomtoho (1.3–12)
3. Hahau usuri na posposi tapu non God (1.13–2.17)
4. Tovongi non Křisto (2.18–25)
5. Rani ūilangi nona kalesia (3.1–4.19)
6. Retiuetueni mata patu tamlohi kalesia (5.1–11)
7. Isoiso retiololo (5.12–14)

¹ Enau Peter, vaharule matea non Iesu Křisto, na lo uli leta nike, mo vano isan la haratu God mo viřonira la lo toho sohena vinano na province matan Pontus, Galatia, Cappadocia, Asia peresi Bithynia, ² God Tama mo pete viřoni kamim tuai moiso usuri na masalona, ale Tanumena mo tapuhi kamim mata mauri tapu, ale matana, ka lo oloolo hin Iesu Křisto,

ale ūaena mo vai kamim ka vokevoke. Romřuhu peresi na tamata la pa mařivi savulevule hin kamim.

Mauri Tui

³ Oloolo tavera isan God sei Taman nořa Moli Iesu Křisto! Na nona ūomopoia tavera mo vaiřa ūa mele vora, ale nořa ūomtoho mo lo mauri, mo mauri matan Iesu Křisto mo sauteterahi na mateia, ⁴ ale God mo tau mamahuni mauri atu sei mo ūuhuřuhu jea matamim na tuka sei i pa sopo eři ūovo, i pa sopo eři komo, ale i pa toho jejeu, ⁵ ale God na nona suiha tavera mo lo matahi kamim na malele mata rasua, i vano i tikeli rani atu i vujangji mauri ūuhuřuhu atu mo tatamahunia moiso matamim na pongi hitahu. ⁶ Ale harihi natu, mo vai kamim ka avulahi tavera, hina purongo vara nake God mo opoia vara ha pa lavi te rani ūilangi matan te makomo rani, ⁷ rani ūilangi tinatinapua la pa lo vahite na nomim rasua vara mo ūilangi sohena sava. Nomim rasua enia hina ūuhu matea mo jeu gold atu sei la sulia na hapu mata ūuhina. Ale vara nomim rasua mo lo turu, ha pa lavi na hasohaso peresi na hija ūuhu peresi na oloolo tavera hin pongi atu Iesu Křisto i pala hinia, ⁸ hina purongo vara ka sopo lo hitea hin te rani, ale ka sopo hitea nakerihi, pani ka lo opoia, ale ka lo rasua, ka lo avulahi tavera jea matana, avulahi tavera atu na mapumim mo sopo tea i eři verea, ⁹ matā vua nomim rasua enia maurimim la pa juri. ¹⁰ La přovet atu tuai sei la lo retimangovi na hina ūuhuřuhu sei vara la pa nomim, enira la alea, ale la vahite mamahunia, ¹¹ la opoia vara la levosahia vara sava tamlohi natu, teni pongi tataholo natu, Tanumen Křisto hinira mo lo verea, matan mo lo vereulia tuai moiso vara rani ūilangi atu non Křisto i pa sohena sava, ale hasohasona matan pongi hitahu atu la pa sohena sava.

¹² Ale God mo verea isara vara la hinau sei la pa sopo masese isara, pani isamim nake, ale nake, God na tuka mo ūrule na Tanume Tapu vara i tueni la haratu la lo retivujavujangi na Retiřuhu isamim, la hinau sei angelo la opoia tavera vara la pa levosahia mamahunira.

¹³ Matana, ha tatamahunia na ūomimim mata vavahinau, ale ha hase taurilati

kamim, ha tau vevuhi na nomim ūromtoho hin ūromruhu atu sei i pa mai isamim hin rani atu Iesu Křisto i pa mele pala hinia. ¹⁴ Sohena natuvarihi la oolo, ha sopo sarete vara ha mele sivo na masalomim matan tuai, ¹⁵ pani matan God atu sei mo tovi kamim enia mo tapu, ha tapu na nomim hahau. ¹⁶ Matan la ulia na Retiulia moiso vara, ‘Ha pa tapu, matan enau na tapu’.

Lev 11.44

¹⁷ Ale sohena ka tovia Tamamim, ha lo levosahia vara enia mo sopo tametame tea na nona aria mata vavahinau nona tamlohi hatehateahi, i pa ūruhu isamim vara ha hahau na nahona na oolo lavaera jea tarea matan nake ka lo vinano hin varama nike, ¹⁸ ka levosahia vara mo volituhu kamim na nomim posposi ūromvono sei ka lavia isana pimim tuai. Mo sopo volituhu kamim na hinau la eři ūrovo sohena silver teni gold, ¹⁹ pani mo volituhu kamim na ūraen Křisto, volina mo aulu jea, sohena ūrae natu sipsip matea mo vokevoke ūruhu jea. ²⁰ God mo viřonia tiroma na pulo varama, pani mo pa vuhesia na isoiso rani matamim, ²¹ hin Křisto kamim ka lo rasu God, mo sauteterahi Křisto na mateia, ale mo silea na hasohaso lavaera matan vara nomim rasua peresi na nomim ūromtoho la pa lo toho isan God. ²² Maurimim la vokevoke matan ka oolo na retivarařuhu, ale matana, ha opoiopoi kamim varařuhu, ale ha opoiopoi kamim i ūrlangi na mapu vokevoke, ²³ matan ka mele vora paro, mo sopo na piri mata ūrovo, pani hin haratu i pa sopo eři ūrovo matan enia reti mauri non God sei mo lo toho jejeu; ²⁴ mo verea vara, ‘Tamlahi tari la sohena ūrvuřuvu, nora hasohaso mo sohena vira ūrvuřuvu. Ale vara ūrvuřuvu mo mahoa, virana la pa jovi, ²⁵ pani reti non Moli i pa toho jejeu.’

Isa 40.6-8 ale reti nike enia Retiřuhu atu sei la lo retivujavujangia isamim.

2

Vatu Atu Mo Mauri

¹ Matan haratu, ha tau nařihi na posposi vaisatihi na tinapua tari, posposi halu tari, tapnetano, ūromusuri peresi na retiřeřen tari, ² ale sohena pipi matea mo pa vora, ha pa mařohu matan wai susu varařuhu

atu Tanumen God mo lo silea, matan vara hinia, ha pa ulua na mauri ūruhu sei ka juri hinia, ³ vara varařuhu ka inu rongorongo na ūromruhu non Moli moiso, ⁴ ale ka lo mai isan Křisto. Enia natu, vatu atu mo mauri, tamlohi la tipahia, pani God mo viřonia, mo ūruhuřuhu jea, ⁵ kamim sohena, ka sohena vatu sei la mauri, God mo voro kamim sohena iman Tanume Tapu matea, matan vara ha pa vao přis tapu matea mata sile na silesilea sei God mo avulahi hinira hin Iesu Křisto. ⁶ Matan Retitapu mo lo verea vara,

‘Ka hitea, enau na lo tau na vatu matea hin Zion,*

enia tapulo pulo vatu sei na viřonia, mo ūruhuřuhu jea,

ale sava tamlohi mo tau na nona rasua hinia,
řomina i pa sopo eři jovi hin te pongi matana.’

Isa 28.16

⁷ Ale matan haratu, isamim ka lo rasua, enia mo ūruhuřuhu jea, pani isan la haratu la sopo rasua, Retiulia mo lo verea vara, ‘Vatu atu tamlohi voro ima la tipahia, enia mo mai tapulo pulo vatu mata ima.’

Psa 118.22

⁸ Ale,
‘Tamlahi la pa tialahalaha hinia,
enia vatu mata vai na tamlohi la jovi hinia.’

Isa 8.14

La tialahalaha hinia matan la sopo oolo na nona reti, la jovi sohen haratu matan God mo taua sohena matara moiso.

⁹ Pani kamim vao tamlohi matea God mo viřoni kamim isana vao tamlohi tinatinapua, ka vao přis matea la supe, ka vao tamlohi tapu matea, ka vao lavaera matea God mo tapuhi kamim vara nona, matan vara ha pa vereuli na nona vavahinau ūruhuřuhu matuvana, enia mo tovi kamim ka malue na ūrořohu, ale ka mai na nona malarani ūruhuřuhu.

¹⁰ ‘Tiroma ka sopo nona vao tamlohi matea,
pani nake, ka tamlohi non God,

tiroma ka sopo lavi te ūromopoia,
pani nake, ka lavi na ūromopoia non God.’

Hos 1.6, 9; 2.23

¹¹ La tapalaku ūruhuřuhu, kamim ka sohena vinano hin varama nike, ale na lo retituetueni kamim hinia vara ha toho

* **2:6:** Zion: Zion enia Jerusalem

asau na masalo sasati sei mo lo vai na vuro na maurimim. ¹² Ha vai na posposi tataholo na naho tamlohi ūroha, hina purongo vara la pa verea vara kamim tamlohi sasati, matan la pa hite na nomim vavahinau ūruhu, ale la pa tahe na hijan God aulu matana hin pongi atu vara mo pala.

Ha Sile Na Ooloolo Isan La Haratu La Aulu

¹³ Ha vai Moli i avulahi tarea na nomim ooloolo na tamlohi tari la aulu, vara isan te Supe nona mara Rome sei mo lo tauri na suiha, ¹⁴ teni isan te nona tamlohi tatavera sei mo lo ūrulera vara la sile na talai isan la haratu la vai te hehe, ale vara la sile na hasohaso isan la haratula vai te vavahinau ūruhu.

¹⁵ Matan enia masalon God, vara ha vai na vavahinau ūruhu matan i pa horo na ūromvono non la haratu la rongorongo vono. ¹⁶ Ha lo toho sohena tamlohi materi, pani ha sopo ūromromia vara enia masapa matea mata vai te hina hehe, pani ha lo toho sohena volitusi non God. ¹⁷ Ha sile na ooloolo isana tamlohi tari, ha opoi la haratu la rasua, ale ha matahun God, ha sile na ooloolo isan supe matan Rome.

Slev

¹⁸ Volitusi, ha hase tau kamim na liman nomim tamlohi tavera na nomim ooloolo tari, mo sopo isan la haratu la ūruhu teni la ūrommalum purongo, pani isan la haratu la tamlohi ūrilangi sohena. ¹⁹ Matan God mo avulahi hin kamim matan nomim ūromromi hin God mo vai kamim ka lo turu ūrilangi na rani ka lo lavi na rani ūrilangi mata nora posposi ūrilangi sei mo sopo matan te hinau ka vai mo sati. ²⁰ Ka hite na sava hinau mo ūruhu hinia vara ka lo turu ūrilangi na rani ka lavi na talai matan te nomim hehe? Pani vara ha vai na vavahinau ūruhu, ale ha lavi na rani ūrilangi matana, pani ka turu ūrilangi hinia, haratu natu, God mo avulahi hin kamim matana.

²¹ God mo tovi kamim matan harihi, matan Kristo sohena mo lavi na rani ūrilangi matamim, mo tau na tovongi matea vara ha pa eři usuri na palona, ²² enia mo sopo vai te hehe teni te halu i malue na jingona. ²³ Na rani la lo veresasatia, mo sopo kelera, ale na rani la silea na rongohaji, mo sopo talaira, pani tarea mo lo hase

tau na liman God sei mo lo ari tataholo tarea. ²⁴ Enia mo hasena lavi nařihi na nořa hehe na epena hin rani atu mo sevu na talopeilopei matan vara ūra pa mate na nořa mauri hehe, ale ūra mauri na posposi tataholo. Ka mai ka ūruhu matan rongohaji atu mo lo lavia na epena. ²⁵ Matan kamim ka jalio sohena sipsip, pani nake ka mele mai isan tavuimim, enia haratu mo lo matahi na maurimim.

3

Harai Lahi

¹ Ale sohena, hařai lahi ha toho na ruhu-ruhu suihan tuamim, hina purongo vara la sopo ooloolo na reti non God, la pa rasua, mo sopo matan te reti ka verea, pani hina posimim purongo, ² vara la hite na nomim posposi vokevoke matan ka matahun God.

³ Ha sopo ūromromia vara sava ka vaia na epemim purongo i pa vai kamim ha ūruhu, vara hinau sohena peri vulu teni, tau na hinau la vaia na gold, teni ka ruru na ruru ūruhu, ⁴ pani ha ūromromi na sava mo vai kamim ka ūruhu na lolo mapumim i pa sopo eři ūrovo sohena posposi ūromatano, ale posposi malum, enira la ūruhu ūruhu jea na nahon God, ⁵ matan tuai mo sohena, hařai tapu enira la haratu la lo ūromtoho hin God, enira la hasera vaira la ūruhu na nora posposi ooloolo isana tuara, ⁶ sohen Sarah mo ooloolo hin Abraham mo tovia mara 'noku tamlohi tavera'. Ale kamim ka mai venatuna tataholo vara ha lo vai na hina ūruhu, ale ha sopo matahu, ha turu ūrilangi vara la ngurunguru hin kamim hin te hinau mo sopo tataholo vara ha vaia.

Tamlohi Lahi

⁷ Tamlohi lahi, sohena, ha toho peresi na naroumim, pani ha sopo ūromaliho vara enira la sopo ūrilangi sohemim, pani la malum matan enira hařai. Ha sile na ooloolo isara matan enira sohemim, la lavi mauri paro atu God mo silea moiso, vara i vono, God i pa sopo rongo na nomim usiusi.

Kalesia Tari

⁸ Ale isoisona, kamim mo isoiso, ha matea na ūromimim, ha ūromromi na tina-pua, ha opoiopoi kamim na ūromopoia, ha ūromatano, ⁹ ha sopo kele na posposi sasati teni te retileji, mo vono, pani ha leřuhu,

matan God mo tovi kamim vara ha pa lavi na nona lēruhu. ¹⁰ Matan Retitapu mo verea vara,

'Vara tea mo opoia vara i opoi na mauri, ale
i hite na rani ūruhu,
i pa isoiso na nona retiretileji,
ale i isoiso na nona retiretihalu;
¹¹ i pa vahāi na posposi hehe,
ale i vai na vavahinau ūruhu,
i pa ale na tamata, i tutunguia.

¹² Matan, matan Moli la lo kilau la haratu la tataholo,
ale perona la lo roi na nora usiusi.

Pani Moli mo lo turuleji isan la haratu la lo
vai na hehe.'

Psa 34.12-16

¹³ Ale hare natu, i pa komo kamim vara ka opoia ūilangi vara ha vai na posposi ūruhu? ¹⁴ Pani hina purongo vara ka lo lavi na rani ūilangi mata nomim posposi tataholo, God i pa lēruhu hin kamim matana. Ha sopo matahunira teni ha ūomkaka.

¹⁵ Pani ha vai K̄risto i Moli na maurimim, ale ha tatamahu tarea mata ha ūarami tea vara i usi kamim hin te retiusia vara ka lo ūomtoho hinia mata sava. ¹⁶ Pani ha vaia na posposi malum peresi na ooloolo tavera, ha turu ūilangi na posposi ūruhu matan vara tea i veresatihi kamim matan te nomim vavahinau ūruhu sei ka vaira hin K̄risto, ale la pa mahanuhanu matana.

¹⁷ Vara masalon God mo sohena, mo mele ūruhu vara ha lavi na rani ūilangi mata nomim posposi ūruhu ka lo vaira, mo jeua vara ha lavia mata posposi hehe.

¹⁸ Matan K̄risto sohena, mo lavi na rani ūilangi na rani mo mate, mata nōra hehe vahatea mata rani tari, enia mo sopo lo hehe hin te rani, pani mo mate mata tamlohi hehe matan vara i ēri lavirā ūai mai isan God. Epena mo mate, pani mo mele turu, mo mauri na suiha Tanumen God.

¹⁹ Ale hin suihana sei, mo sivo mo retivujavujangi isana tanume tamlohi sei God mo lo taurilatira na varama mata mateia,

²⁰ isan la haratu sei la sopo ooloolo hin God na pongi tuai sei God mo lo saovira hin rani atu sei Noah mo lo voro na botina. God mo juri na tamlohi mo limaravtolu purongo hin wai tavei tavera atu. ²¹ Wai tavei atu, enia tovongi matea mata malele paptijo vara i juri kamim usuri na suiha sauteterahi non Iesu K̄risto.

Paptijo enia tovongi matea mo sopo hoje nařihi na lumi epemim purongo, pani mo sohena ūomtauhi ūruhu matea ka lo vaia na ūomimim ūruhu isan God. ²² Ale K̄risto sei mo sahe na tuka, mo lo tauri na suiha non God na tavaluna, ale angelo peresi la haratu la lo tauri na suiha peresi la haratu la ūilangi, enira mo isoiso la lo toho na ruhuruhuna.

4

¹ Ale, matan K̄risto mo lavi na rongohaji na epena, ha tau na ūomimim vara ha lavi na rongohaji sohen K̄risto, matan haratu mo tatamahu vara i lavi na rongohaji, mo isoiso na hehe, ² matan vara nake, i pa sopo usuri na masalona, pani i pa usuri na masalon God purongo i tikeli na isoiso maurina. ³ Matan tauni matuvana moiso, ka lo vai na opoia nona masalo tamlohi ūoroha, sohena nora posposi viriu, la lo usuri na ūom ūomi lumiha, la lo putu na wai ūilangi, la lo matavuhi mata lavilavi na tinapua, la lo matavuhi mata inu na wai ūilangi, la lo vai na vaivaileu na nora lotulotu vono, ⁴ hin harihi, enira la verea vara kamim ka tinapua, matan ka sopo mele vano peresira na nora posposi lumiha sei, mo mai sohena wai tavei, ale la lo veresatihi kamim matana, ⁵ pani enira la pa turu na nahon haratu sei mo tatamahu vara i ari la haratu la mauri peresi la haratu la mate. ⁶ Vara ūruhu, matan hinau atu natu, K̄risto mo retivujavujangi na Retiřuhu isan la haratu la mate moiso, hina purongo vara la lavi na talai mata mate na epera, pani la pa ēri mauri sohen God mo lo mauri.

⁷ Nake, isoiso hinau tari mo lo mai mariviti; ale matana, ha hase taurilati kamim hasemim, ale ha tatamahu mata nomim usiusi, ⁸ hina aulu hin la hinau sei, enia vara ha opoiopoi kamim i ūilangi, matan opoia mo kamoti nařihi na hehe matuvana. ⁹ Ha roi na imamim isamim hatehateahi, ale ha sopo ngutungutu matana.

¹⁰ Ale sohen kamim hatehateahi ka lavi na otori isan God moiso, ha tuetueni kamim hinira, sohena volitusi ūruhu sei la lo kilau na otori ūruhu matuvana non

God; ¹¹ vara tea nona enia mata i retivujavujangi, i pa reti sohen God mo lo retireti hinia, ale vara tea nona enia mata i tuetueni, i pa vaia hin suiha atu God mo silea isana, matan vara na hinau tari, God i pa lavi na hasohaso hin Iesu Kristo. Isan Kristo hasohaso tavera, ale suiha i pa toho na limana mata pongi tari tui tui. Amen.

Mauri Rilangi Nona Kalesia

¹² La tapala ūhuřuhu, ha sopo mařurahi hin te rani sasati mata vahite kamim. Ha sopo hitera sohena hina mařurahi hai la pala isamim, ¹³ pani ha avulahi jea na rani ka lo lavi na rani ūlangi sohen Kristo mo lavia, matan vara ha pa avulahi i tavera jea sohena hin rani atu hasohasona i pala na naho tamlohi.

¹⁴ Vara tamlohi la veresatihi kamim matan ka lo lavi na hijan Kristo, kamim la haratu sei la pa lavi na leřuhu, matan Tanume mata hasohaso tavera sei enia Tanumen God, mo lo ttau isamim. ¹⁵ Pani i sopo tea isamim i lavi na rani ūlangi mata mo ori sohena tamlohi vili tamlohi matea teni te tamlohi vavanaho matea, teni te tamlohi lejileji matea, teni sohena tamlohi matea mo lo sohai na ngalsuna na hinau nona tinapua. ¹⁶ Pani vara tea i lavi na rani ūlangi matan enia kalesia matea, i pa sopo mahanuhanu matana, mo vono, pani i pa tahe na hijan God aulu na hijan Kristo. ¹⁷ Matan nake, aria i pa tapulo na lolo vaon God tiroma; ale vara i tapulo hiniřa tiroma, i pa sohena sava isan la haratu la sopo oloolo na Retiřuhu non God? ¹⁸ Ale, 'Vara mo ūlangi jea vara tamlohi tataholo la eři juri,

i pa sohena sava isan la haratu
la lo usuri na posposi varama
teni la haratu la lo hehe?' *Prov 11.31*

¹⁹ Ale isan la haratu la lo lavi na rani ūlangi mata masalon God, mo tataholo vara na nora hahau tari la tau na mau-riira na limana matan enia mo lo ūmturu ūlangi tarea.

5

¹ Ale matan haratu, na opoia vara a sile na retituetueni isana patu tamlohi rasua isamim. Enau patu tamlohi rasua matea

* ^{5:8:} paheu: Peter mo vere na lion nike. † ^{5:12:} Silas: hin Greek la ulia hija sei vara Silvanus, pani enia Silas sei tapalan Paul.

sohemim, na hitea sohena sava Kristo mo lavi nona rongohaji, ale enau sohena a pa lavi na hasohaso tavera atu God i pa vujangia i pa sopo tuai, ² ha tavui ūruhu mata sipsip non God sei enia mo taura na limamim, ha kilau mamahunira na ūromavulahi sohen God mo opoia, mo sopo matan vara tea mo ngurunguru hin kamim matana; mo sopo mata mania, pani mata nomim ūromavulahi, ³ ha sopo vaia i ūlangi isan la haratu la lo toho na ruhuruhi limamim, pani ha vai na tovongi ūruhu isana sipsip. ⁴ Ale hitahu vara Patu Tavui sipsip i pala, ha pa lavi na ūongořongo nona supe sei ūhuřuhuna i pa sopo eři tihai.

⁵ Ale kamim uluvou, ha oloolo hin la haratu la kalesia vajiaha. Kamim mo isoiso ha ruru na posposi ūromatano, matan 'God mo lo turuleji hin la haratu la lo mangisi,

pani mo lo tueni la haratu la lo ūromatano.' *Prov 3.34*

⁶ Ale matana, ha ūromatano, ha toho na ruhuruhi suiha tavera liman God matan vara na rani tataholo i pa tahe kamim aulu. ⁷ Ha sile vevuhi na nomim ūromkaka isana matan enia mo lo kilau kamim.

⁸ Ha tatamahu, ha lo kilau matan nomim meresahi Tiapolo, enia mo lo ūalihi sohena paheu matea mo lo aleale tamlohi vara i hanira.* ⁹ Ha turuhoroa, ale ha turu ūlangi na nomim rasua. Ha levosahia vara voraimim ūalihi na varama sohena la lo lavi na rani ūlangi tinatinapua sohen harihi.

¹⁰ Ale ha pa lavi na rani ūlangi mata makomo rani purongo, ale hitahuna, God mata ūromřuhu tari, haratu sei mo tovi kamim ka mai na lolo hasohaso tavera non Iesu Kristo mata rani tui tui, enia hasena i pa vai mamahuni kamim, ale i pa vai kamim ha turu ūlangi na nomim rasua, ale i pa vai kamim ha ūlariřlangi na mapumim, ale i pa vai kamim ha sopo eři juha na nomim rasua. ¹¹ I pa tauri na suiha mata rani tui tui tarea, amen.

Isoiso Retioloolo Non Peter

¹² Silas[†], vorai sei mo sopo lo tope na nona retitauhi hin te rani na noku kilakilau, mo tueniau vara a uliuli isamim vara a pa vere vujavujangi kamim, ale vara a

vereulia vara ūomruhu vararuhu non God
mo sohen harihi. Ha turu ūilangi hinia.

¹³ Ale la haratu la rasu nike Rome, ha-
rasei God mo viřonia sohemim, enira so-
hena la sohai na retiololo isamim, ale
natuku Mark sohena, mo sohaia isamim.[‡]
¹⁴ Ha tapatapai kamim hatehateahi na re-
tiololo mata opoia.

Tamata isamim tari sei ka tamlohi non
Kriſto.

[‡] **5:13:** 5.13 Rome: Peter mo lo vere Babylon, Rome enia retilulu matea matan Babylon.

2 Peter Harua Leta Peter Mo Ulia Leta Nike

Peter mo ulia vara kalesia la pa hahau sohena God mo opoia na maurira (1.3), ale vara la pa taurilati na retivarařuhu sei la lavia moiso (1.12).

Mo retiřoařohairā mara vara přovet peresi na tamlohi vujangi haluhalu la unu na vao kalesia matan vara la tikaulejira na retivarařuhu, pani Moli i pa sile na talai isana tamlohi sohen haratu (2.1-22). Kalesia la pa turu řilangi hin la rani atu, la pa hahau na mauri tataholo ale la pa tovongi na tovongi řuhu. La pa hase taurilatira, ale la usuri na malele lelevosahi, peresi na řomperavu, ale vujangi na posposi opoia isana tamlohi tari.

Hina purongo vara tamlohi na varama la sopo rasua, řa pa kilau toho matan rani atu Iesu i pa mele pala hinia (3.1-18)

'La tapalaku řuhuřuhu, ha sopo kilau purongoi hinau nike, vara isan Moli, rani matea mo sohena tauni mo tari vahatea (1000) ale tauni mo tari vahatea mo sohena rani matea. Moli mo sopo vaimalum vara i mařivisi na nona retitauhi sohena tamlohi hai la lo řomřomia vara enia mo lo vaimalum, pani mo lo řomperavu matamim, matan mo sopo opoia vara tea i tihai, pani vara tamlohi tari la posí na nora hehe.' (3.8-9)

Hin Leta Nike

1. Reti ooloolo peresi na usiusi (1.1-2)
2. Kalesia la pa lo toho sohena sava (1.3-15)
3. Hasohason Křisto (1.16-21)
4. Tamlohi vujangi peresi na Přovet haluhalu (2.1-22)
5. Varařuhu Iesu i pa mele mai (3.1-18)

Retiololo

¹ Enau Simon Peter, volitusi matea, ale vahařule non Iesu Křisto.

Na lo uliuli isan la haratu sei la lavi na rasua řuhuřuhu sohen kamam. Iesu Křisto sei mo sile rasua sei isařa, enia nořa God, nořa Jujuri, enia natu, mo vairā řa tataholo na nahon God, ² noku usiusi vara God i pa leřuhu hin kamim na nona řomřuhu

peresi na nona tamata vara la pa tueni kamim vara ha ulua na nomim levosahi hin God peresi Iesu nořa Moli.

Ulua Na Lelevosahi Hin God

³ Suihan God mo sileřa na hinau tari mata mauri, la tueniřa na nořa hahau na mauri sei sohen God mo opoia, la mai isařa na malele levosahi hin Iesu, ale enia haratu mo toviřa matan vara řa pa lavi na nona hasohaso peresi na nona posposi řuhuřuhu. ⁴ Hin nona suiha tavera atu, mo sileřa na nona retitauhi tavera matuvana, la řuhuřuhu jea. Mo retitauhi vara řa pa hitevosahia vara maurin God sei mo lo mauri na mauriřa mo sohena sava, ale řa pete jelu moiso na varama peresi na nona posposi lumiha sei mo lo komo na mauri tamlohi hinia.

⁵ Ale matana, ha vaihitea řilangi vara ha sořotahi na nomim rasua peresi na posposi řuhu, ale nomim posposi řuhu peresi na levosahi, ⁶ ale nomim levosahi peresi na posposi mata hase taurilati kamim, ale nomim posposi mata hase taurilati kamim peresi na posposi turu řilangi, ale nomim posposi turu řilangi peresi na posposi sei God mo opoia, ⁷ ale nomim posposi sei God mo opoia peresi na nomim opoiopoi kamim, ale nomim opoiopoi kamim peresi na řomopoia varařuhu. ⁸ Vara ka lo ulua hin la posposi akerihi, ale la lo vua řuhu jea, i pa vujangia vara ka sopo toho purongo, ale nomim vayahinau mo lo ulua matan ka lo tutungui na lelevosahi isan nořa Moli Iesu Křisto. ⁹ Pani vara tea mo sopo ulua hin la posposi řuhu sei, enia mo matavuso, ale mo sopo kilau vano řove, matan mo řomaliho vara God mo hoje nařihi na nona hehe mata maurina tuai moiso.

¹⁰ Ale matana, la voraiku peresi na vevořaiku, ha vujangi mamahunia i memera vara God mo tovi kamim, ale vara mo vřoni kamim varařuhu, matan vara ha lo vajla hinau řuhuřuhu sei ha sopo eři tialahalařuhu hin te rani. ¹¹ Matan hin malele sei God i pa vajna malele i roi i tavera jea vara ha pa unu hin mauri atu God mo aulu hinia sei mo lo toho jejeu, enia nořa Moli, nořa Jujuri Iesu Křisto.

Ha Tapurongo Na Retitapu

¹² Matana, tarea enau na opoia vara a lo vere ūraohai kamim hin la hinau ūruhu sei. Hina purongo vara ka pete levosahira moiso, ale ka lo turu ūlangi na retivaraūhu sei ka pete lavia moiso. ¹³ Pani na lo ūromōmia vara mo tataholo vara a lo vere ūraohai kamim hinia nake na pa lo mauri, ¹⁴ matan na levosahia vara a pa mate i pa sopo tuai sohen nōa Moli Iesu K̄risto mo vujangi mo mera isaku. ¹⁵ Na opoia ūlangi vara hitahu hin rani atu vara na vano, ha pa ēri mele ūromōmi la hinau sei.

¹⁶ Matan kamam kama sopo usuri te sorasora la vere mamahunia mata halu sei tamlohi la opoia vara la rongora hin rani atu kama lo vere mamahuni kamim na suiha peresi na mele mai non nōa Moli Iesu K̄risto, ale kamam kama hitea na matamam epena sei mo memera tavera hin rani atu.

¹⁷ Matan God Tama mo sile na oolo peresi na hasohaso tavera isana, ale leo matea mo tai isan God na masapa mo memera tavera atu, ale leo sei mo mai isana mara, "Harihi enia Natuku na opoia mo tavera jea, ale enau na avulahi tavera hinia." ¹⁸ Kamam sohena, kama rongo leo atu mo tai na tuka, matan kamam kama lo toho peresia hin vutivuti tapu atu.

¹⁹ Matana, kama ēri mele ūromūlangi na retisohai nona p̄ovet. Ha kilau mamahuni na sava la ulia matan nora reti la sohena lamu mo lo memera na jara ūroha i tikeli rani atu K̄risto i mele pala hinia, ale sohena majou matea, merana ūlangi i pa merasahi na mapumim. ²⁰ Tiroma hinau mo aulu, enia vara ha lo levosahia vara mo sopo te retimangovi hatea i tai isana p̄ovet na ūromira hasera, ²¹ matan mo sopo te retimangovi hatea na Retitapu i malue na masalon te tamlohi, pani tamlohi la retireti sohena God mo opoia. Ale la retireti matan Tanume Tapu mo mangovira na retireti.

2

Tamlohi Vujangi Haluhalu

¹ Pani p̄ovet haluhalu sohena la pala isana tamlohi tuai, ale sohena, tamlohi

vujangi haluhalu la pa pala isamim, enira la pa lo vujangi luhu na nora halu, vujangi atu i pa komo na mauri tamlohi, enjora, la pa vunvuni na vavahinau non Moli sei mo volituhura, ale matana, talai mata komo na maurira i pa mai vilavila isara. ² Moiso, tamlohi matuvana la pa usuri na nora posposi lumiha, ale matara, tamlohi la pa veresatihi na malele mauri sei mo usuri na retivaraūhu. ³ Ale mata nora ūromusuri la pa haluhalu kamim na nora retimemeji. Ale nora talai sei God mo taua tuai tuai moiso mo sopo toho purongo, ale nora rani komo mo sopo peka.

⁴ Matan vara God mo sopo kilau purongoi na angelo tuai mata nora hehe, pani mo pulahira la sivo Tatarus na varama mata mateia, ale hin jara atu mo pesilatira na moru ūroha tavera, la pa toho atu i tikeli na rani aria tavera.* ⁵ Ale vara God mo sopo kilau purongoi na tamlohi na varama tuai tuai, pani mo juri Noah sei mo lo retivujavujangi na malele mata mauri tataholo, peresi na tupu limaravrua tinapua hin wai tavei tavera atu mo mai isana tamlohi sasati na varama, ⁶ ale vara God mo posis na taon tavera non Sodom enia Gomorrah la mai patmakovi, enia mo silera na talai matan vara la tihai, mo vaia sohena toyongi matea vara tamlohi la pa levosahia vara i pa sohena sava isana tamlohi sasati, ⁷ ale vara God mo juri tamlohi tataholo atu Lot mata ūromina mo kaka jea mata posposi sasati jea nona tamlohi sasati atu, ⁸ matan tamlohi tataholo atu Lot, mo lo toho peresira na rani hatehateahi, ale ūromina mo lavi na rani ūlangi na sava mo lo rongora, ale mata nora vaivaileu la lo vaira na nahona.

⁹ Ale Moli God mo levosahia sohena sava vara i pa juri na tamlohi ūruhu na nora rani ūlangi, ale mo levosahia sohena sava vara i pa lo sile na talai isana tamlohi hehe i tikeli na rani aria tavera, ¹⁰ ale, mo mele ūlangi jea isan la haratu la lo hahau usuri na posposi lumiha sei mo lo komo na maurira, enira la sopo opoia vara tea i aulu hinira. La ngurunguru jea, ale la lo usuri na masalora purongo, la sopo matahu vara la veresatihi la angelo suiha sei la aulu jea

* ^{2:4:} Tatarus: Tatarus enia hijan jara atu mo lo toho atano na pulo varama mata mateia.

na merara tavera na tuka,¹¹ ale angelo, hina purongo vara la aulu jea na suiha peresi na ūilangi mo jeu la tamlohi nike, la sopo veresatihi la angelo suiha atu, na nora aria na nahon Moli.

¹² Pani la tamlohi nike, la sohena maji ūomira mo vono, la vora matan vara la pa taurira la vilimateira, la lo verelehilehi na hinau la sopo levosahi te hinau hinira, ale nora posposi sasati i pa vano i tihai peresira. ¹³ La lo lavi na rani ūilangi mata nora hehe. La opoia jea vara la vai na hehe na jara tavera. La lo toho isamim sohen hapila sasati sei la komo na naho tamlohi matea, matan la lo opoia jea na rani la lo hanhani matavuhi peresi kamim na nora halu, ¹⁴ la sopo kilau purongoi na hařai, matan matara mo mařivi na vaivaleu, la lo marohati mata hehe. La lo jine na tamlohi ūomira mo lo rua. Mapura la levosahi mamahuni na nora hanmarua pono. God mo pete viřonira moiso mata komo. ¹⁵ La sopo mele usuri na malele tataholo, ale la jalio, la usuri na malelen přovet Balaam tuai, natun Beor sei, mo opoia vara i vai na hina sati mata mania purongo. *Num 22.2-20*

¹⁶ Pani God mo reti ūilangi isana mata nona hehe; mo vai donki atu mo eři retireti, pa donki atu mo reti isana, ale mo horo Balaam pa přovet atu na nona posposi rongorongo vono.

Num 22.22-35

¹⁷ La tamlohi atu, la sohena patu wai mamasa, ale la sohena haravu sei ūoro tavera la lo pulahira la lo vano, God mo tau mamahuni na ūroho puaha matara. ¹⁸ Nora retireti tavera la vuruvuru purongo, la retireti matan vara la reve la haratu la pa jelu purongo na masalo varama, matan vara la usuri na nora posposi lumiha sasati. ¹⁹ La retitauhi isara vara la pa materi, pani la tamlohi atu, enira la slev matan mauri atu mata komo purongo. Sava hinau mo jeu na tamlohi enia mo slev hinia. ²⁰ Matan, vara la pete rovo moiso na posposi sasati mata varama mata nora levosahi hin nořa Jujuri, Moli Iesu Křisto, ale la mele kali na posposi sasati, suihara mo isoiso, maurira la pa mele sati i jeu haratu tiroma. ²¹ Matan i pa mele ūahu isara vara la sopo levosahi

na malele tataholo, mo jeu haratu vara la levosahia moiso, pani la mele vahāři na retileu tapu sei God mo silea isara tiroma. ²² Sava retilelevosahi varāruhu mo verea mo masese isara mara,

'Viriu mo mele hani na luana,
ale poi sei mo loloso moiso

mo mele hilu vano vara i vuluvului na makamaka.'

Prov 26.11

3

Rani Pala Non Moli Mo Lo Mai

¹ La tapalaku ūuhuřuhu, ka levosahia vara harihi enia harua leta na ulia isamim. Na lolon la leta nike, na lo retiřoařohai na nomim ūomřomi ūuhu, ² matan vara ha mele ūomřomi na reti nona přovet tapu tuai peresi na retileu non Moli nořa Jujuri atu sei nomim vahāřule la silea isamim.

³ Hinau tiroma vara ha pa levosahia, enia vara na pongi hitahu, tamlohi vaivai na tamlohi la pa vaivai na tamlohi, moiso la pa usuri na masalora sasati, ⁴ la pa verea vara, 'Nene nona retitauhi sei mo verea vara i pa mele mai? Hin rani atu tamamam la mate, hinau tari la pa lo toho sohena pongi tiroma sei God mo vai na hinau tari mo tikeli nake.'

⁵ Matan, enira la lo kilau purongoi na retivarařuhu sei vara reti non God mo vai na masapa aulu mo lo toho tuai tuai jea, ale mo vai na varama nařihi na wai, ale mo vai na varama hin wai atu, ⁶ ale hin malele atu natu wai tavei mo putehi na varama tuai, ale mo tihai. ⁷ Pani hin reti non God atu natu, nake God mo tatamahuni na masapa peresi na varama mata hapu, la pa toho i tikeli rani aria tavera atu peresi na komokomo nona tamlohi sasati.

⁸ La tapalaku ūuhuřuhu, ha sopo kilau purongoi hinau nike, vara isan Moli, rani matea mo sohena tauni mo tari vahatea *(1000)* ale tauni mo tari vahatea mo sohena rani matea. ⁹ Moli mo sopo vaimalum vara i mařivisi na nona retitauhi sohena tamlohi hai la ūomřomia vara enia mo vaimalum, pani mo lo ūomperavu matamim, matan mo sopo opoia vara tea i tihai, pani vara tamlohi tari la posí na nora hehe. ¹⁰ Pani rani non Moli i pa mai sohena tamlohi vanahao matea, tamlohi la pa hutura hinia, masapa i pa tihai na ūroha hapu tavera,

ale majou peresi na vitusarasara tari la pa koru la tihai, ale varama peresi na vavahinau nona tamlohi hinia la pa toho na jara tavera.

¹¹ Matan la hinau sei la pa tihai sohen harihi, kamim ha pa usuri na posposi mo tapu, ale la ūruhū sohen God mo opoia na maurimim, ¹² ha lo saovia, ale ha vaihitea vara rani non God atu i pala vila. Matan God i pa jilangi na masapa na hapu, ale i pa tihai, ale hinau tari na masapa la pa lolo hin tutuni hapu atu. ¹³ Pani enřa ūra lo usuri na nona retitauhi matan tuka paro peresi na varama paro sei mauri tataholo i pa toho hinira.

¹⁴ Matana, la tapalaku ūruhūruhu, matan ka lo saovi la hinau sei, ha vaihitea vara i pa sopo vilei te hina lumihā teni te hinau i eři tuvai kamim hinia, ale ha toho na tamata.

¹⁵ Ale ha hitevosahia vara ūromperavu non nořa Moli mo lo sile na masapa matan vara tamlohi la pa eři juri hinia. Mo sohen voraiřa Paul mo uliuli matana moiso usuri lelevosahi atu God mo lo silea isana — ¹⁶ mo sohen mo lo vai na nona leta tari na rani mo lo retireti hin la hinau nike. Te hinau mo ulira la ūilangi vara tea i eři levosahira, harihi, tamlohi sei la sopo lelevosahi peresi la haratu la lo ūrom rua, la lo pori na ūramira, ale la lo pori na ūrami retireti na Retitapu sohena — pani la pa vano na nora komo matan posposi sei.

Isoiso Reti Non Peter

¹⁷ Ale matana, la tapalaku ūruhūruhu, matan ka levosahi la hinau nike moiso, ha lo kilau! Ha pa sopo majinga vara te tamlohi vaivaleu i tikauleji kamim na nona haluhalu, vara i vono, ha pa jovi na nomim pulo turu ūilangi na retivarařuhu sei ka lo turu hinia moiso. ¹⁸ Pani kamim ha ulua na hina ūruhū peresi na levosahi non nořa Moli, nořa Jujuri Iesu Křisto. Isana, ūra pa sile na hasohaso tavera nake pongi tui tarea, amen.

1 John

Tiroma Leta John Mo Ulia

Leta Nike

John mo opoia vara tamlohi la rasua vara God i pa ūromiā hin rani atu vara la taviti na noā hehe (1.9).

Tamlohi la vujangia vara la rasua varaūhu vara la lo opoi opoira (3.11–24). Matan God enia opoia, nona tamlohi varaūhu la pa sohena (4.1–21). Vara tamlohi rasua la jeu na nora hehe la pa hahau na malelen opoipoira, ale la rasua vara Iesu Natuna God enia Jujuri varaūhu mo mai tamlohi vara i mate mataā (5.1–12).

'Reti matan mauri atu
mo lo toho tuai tiroma
na pungi tiroma,
... haratu kama hitea na matamam' (1.1)

Hin leta nike

1. Reti non God mo sile na mauri (1.1–4)
2. God enia malarani, Křisto enia noā tovongi (1.5–2.6)
3. Retileu paro (2.7–17)
4. Meresahi non Křisto peresi na tamlohi non God (2.18–3.10)
5. Opoia non God peresi na noā opoia (3.11–4.21)
6. Jeu na varama (5.1–21)

Reti Sei Mo Sile Na Mauri

¹ Kama lo vereuli kamim na reti mata mauri atu mo lo toho tuai na pungi tiroma, haratu kama rongoa, haratu kama hitea na matamam, ale haratu kama kilaua, ale kama tikelia na limamam tataholo, ² mauri atu mo pala, kama hitea, ale kama lo vereuli na sava kama hitea moiso. Nake, kama lo vere kamim hin mauri tui atu, haratu mo lo toho peresi God Tama, ale nake mo asi isařa. ³ Kama lo vere varaūhu na sava kama hitea, ale kama rongoa matan vara ha pa eři lavi na mauri tui sei peresi kamam, moiso enřa řa pa matea peresi Tama enia Natuna, Iesu Křisto.

⁴ Kama lo uli na hināu tari isamim matan vara ha pa avulahi jea.

God Enia Malarani

⁵ Haranike enia Retiřuhu kama rongoa isana, ale kama lo verea isamim: God enia malarani, ale mo sopo te ūrōra hinia.

⁶ Vara řa verea vara řa lavi na mauri peresi God, ale řa lo toho na ūrōra, enřa řa lo halu, řa sopo hahau usuri na retivarařuhu. ⁷ Pani vara řa lo hahau na malarani sohen God mo lo toho na malarani, enřa řa pete pulutahi hin mauri atu moiso peresi na tatuařa, ale řaen Iesu Natuna mo lo hoje nařihi na noā sasati. ⁸ Vara řa verea vara mo sopo te noā sasati, řa lo haluřa haseřa, ale retivarařuhu mo sopo toho isara. ⁹ Vara řa taviti na noā sasati isan God, God i pa vai na hina tataholo sohen mo verea isařa moiso mara, i pa ūromi na noā hehe, ale i pa vai na noā hehe tari la sopo vaiřa řa lumiha na nahona.

¹⁰ Pani vara řa verea vara řa sopo vai te hina sasati, řa lo verea vara God enia tamlohi halu matea, ale nona reti mo sopo toho isařa.

2

Křisto Mo Tueniřa

¹ La natuku, na lo uli la hinau sei matan vara ha sopo vai na hina sasati, pani vara ha vai na hina sasati, noā tuetueni matea mo lo toho peresi God Tama, enia Iesu Křisto haratu mo tataholo. ² Křisto mo hase silea vara i voli nařihi na noā sasati, pani mo sopo matan noā haserā, pani peresi na hina sasati nona tamlohi tari na varama.

³ Ra lo levosahia vara řa levosahi God hin malele akerihi: Ra lo levosahi God vara řa lo ololo na nona retileu. ⁴ Vara tea mo verea vara mo levosahi God, pani mo sopo ololo na nona retileu, enia tamlohi halu, ale hina varařuhu mo sopo toho isana, ⁵ pani haratu mo lo ololo na nona reti, opoia non God mo jea varařuhu isana. Hin malele nike, řa pa levosahi i ūruhvara enřa řa lo toho hinia: ⁶ haratu mo verea vara enia mo lo toho hinia, enia i pa hahau sohen Křisto mo hahau.

Retileu Paro

⁷ La tapalaku ūruhřuhu, na sopo uliuli isamim matan vara a mele sile kamim hin te retileu paro, pani enia pa haratu la lo sile kamim hinia tiroma moiso, ale enia retireti atu ka pete rongoa moiso, ⁸ pani

retileu atu na lo ulia isamim mo sohena retileu paro matea, ale mo lo toho na maurin Křisto peresi na maurimim, matan ka hite na řořoha mo lo majara, ale malarani varařuhu mo lo sasarami moiso.

⁹ Haratu mo lo verea vara mo lo toho na malarani, pani mo lo hitesatihi na vorain, enia mo pa lo toho na řořoha mo tikeli nake. ¹⁰ Haratu mo lo opoi na vorain Křisto, enia mo lo toho na malarani, ale mo sopo tea i eři jalio mata nona vavahinau. ¹¹ Pani haratu mo lo hitesatihi na vorain Křisto, mo pa lo toho na řořoha, mo lo hahau na řořoha, ale mo sopo levosahi na jara mo lo vano ea, matan řořoha mo vuſohi na matana.

¹² La natuku, na lo uliuli isamim matan nomim sasati God mo ſomiřa matan Křisto. ¹³ La haratu la vajiah, na lo uliuli isamim matan ka levosahi haratu mo lo toho atu tiroma na tapulon vavahinau. La uluvou, na lo uliuli isamim matan ka jeu Tiapolo enia pulo sasati. ¹⁴ La natuku, na lo uliuli isamim matan ka levosahi Tama moiso, ale la vajiah, na lo uliuli isamim matan ka levosahi haratu mo lo toho tiroma moiso na tapulo vavahinau. La uluvou, na lo uliuli isamim matan ka suih, ale reti non God mo lo toho hin kamim, ale ka jeu haratu enia pulo sasati.

¹⁵ Ha sopo opoi na varama teni te hinau non varama. Vara ha opoi na varama, ha pa eři opoi Tama sohena sava? ¹⁶ Matan hinau na varama mo sohen harihi: ſomjea na masalom sasati, ſomjea na hinau ko hitea, hapahapa na nom hinau, ale la hinau sei la sopo tai isan Tama, pani la tai na varama purongo, ¹⁷ moiso varama sei mo lo vano vara i tihai peresi na masalona tari, pani haratu mo lo vai na masalon God enia i pa toho jejeu.

Meresahi Non Křisto La Pala

¹⁸ La natuku, nake enia isoiso rani. Sohena ka pete rongoa moiso vara meresahi non Křisto la lo mai, ale meresahi matuvana non Křisto la pala moiso, ale matana řa levosahia vara pongi hitahu mo mai moiso. ¹⁹ Hina purongo vara la tamlohi atu la tai na vaořa, pani enira la sopo tatuařa. Vara la pa lo tatuařa varařuhu, la pa lo toho peresřa. Pani la malue isřa matan vara i memera vara enira la sopo tatuařa.

²⁰ Pani kamim mo isoiso ka levosahi harihi moiso, matan God Tapu mo viřoni kamim. ²¹ Na sopo uliuli isamim matan ka sopo levosahi na retivarařuhu, pani matan ka levosahia moiso, ka pete levosahia moiso vara retihaluhalu i pa sopo eři tai isana retivarařuhu. ²² Hare natu, enia tamlohi halu, haratu sei mo lo verea vara Iesu enia mo sopo Křisto varařuhu sei God mo viřonia. Vara tea mo verea sohena, enia natu, meresahi non Křisto, matan mo ſohu hin Tama peresi Natuna. ²³ Haratu mo ſohu hin Natuna mo sopo lavi Tama. Pani haratu mo verea vara Iesu enia Natun God, Tama mo lo toho peresia. ²⁴ Moiso, vara ha turu řilangi tarea na sava retireti ka rongoa tiroma moiso, ale ha pa lo matea na mapumim peresi Tama enia Natuna. ²⁵ Mauri tui enia retitauhi sei mo retitauhi hinia isřa.

²⁶ Enau na lo uliuli isamim matan la haratu la lo tikauleji kamim, ²⁷ pani Křisto mo viřoni kamim na Tanume Tapu, ale mo lo toho hin kamim. Ale kamim ha pa sopo mele opoi te tamlohi vujangi tinapua vara i vujangi kamim. Pani mo ſuhu vara ha toho hin Křisto, ale ha usuri na sava hinau Tanume Tapu mo vujangi kamim hinia matan hinau tari mo vujangia mo varařuhu, mo sopo te hina halu hinia.

La Natun God

²⁸ Natuvarihi, mo ſuhu vara ha toho jejeu hin Křisto, matan vara hin rani atu i mele mai, řa pa sopo eři matahu, ale řa pa sopo mahanuhanu hin te hinau hin rani atu, ²⁹ matan ka levosahia vara Křisto mo tataholo, ha pa levosahia sohena vara haratu mo lo vai na hinau mo tataholo, enia mo vora isana.

3

¹ Ka hite na opoia tavera non God Tama isřa mo sohena sava, matan mo toviřa vara enřa natuna, ale mo sohen haratu natu. Pani tamlohi varama la sopo levosahia matan la sopo levosahi God Tama.

² La tapalaku ſuhuřuhu, enřa natuna nake, pani mo sopo pala vara řa pa sohena sava hin pongi hitahu, pani řa levosahia vara hin pongi atu Křisto i mele pala hinia, enřa řa pa sohen Křisto, matan enřa řa pa hitevosahia i ſuhu vara enia mo sohena

sava. ³ Ale la haratu la ūomtoho sohen harahi, la hase vaira la vokevoke ūahu, sohen Křisto enia mo vokevoke ūahu.

⁴ La haratu la lo vai na hehe tarea, enira la lo vaivaileu tarea, ale hehe enia vaivaileu. ⁵ Ale ka levosahia vara Křisto mo pala vara i lavi nařhi na hehe, ale mo sopo te hehe isana. ⁶ Haratu la lo toho isana la sopo eři vai na hehe tarea, vara tea mo hehe tarea enia mo sopo levosahia Křisto, ale enia mo sopo hitevosahia teni levosahia hin te rani.

⁷ Natuvarihi, ha sopo tinarihia vara tea i halu kamim! Harepu mo vai na hinau tataholo tarea enia mo tataholo mo ūahu sohen Křisto mo tataholo. ⁸ Harepu mo lo hehe tarea enia non Tiapolo. Tiapolo mo lo hehe tiroma na tapulo varama mo tikeli nake. Pani Natun God mo mai vara i pa vaikomokomo na vavahinau non Tiapolo. ⁹ Haratu la vora isan God, la sopo eři vai na hehe tarea matan suihan God mo lo toho na maurira, mo vaira la mai natuna, ale matan haratu la pa sopo eři vai na hehe tarea.

God Enia Opoia

¹⁰ Ha pa levosahia la haratu la natun God isan la haratu la natun Tiapolo sohen harahi: haratu la sopo taura vara la vai na hinau i tataholo tarea la sopo non God, ale sohen haratu, la sopo opoi na vorairia.

¹¹ Pani retisohai sei enia retisohai atu ka rongoa moiso na pongi tiroma vara, ūa pa opoipořa, ¹² moiso, vara ha sopo sohen Cain atu tuai sei mo vilimatei tasina, enia non Tiapolo. Mo vilimateia mata sava? Mo vaia matan tarea tasina enia mo lo vai na hinau mo lo tataholo, pani enia mo lo vai na hinau mo lo hehe matan enia tamlohi hehe. *Gen 4:8*

¹³ La voraiku peresi na vevoraiku ūuhuřuhu, ha sopo mařurahi tavera vara tamlohi varama la ūohu hin kamim. ¹⁴ Ra levosahia vara ūa tai na mateia moiso ūa vano na mauri moiso matan ūa opoi na voraiřa kalesia. Pani haratu mo sopo te nona opoia, enia mo pa lo toho na suiha mateia.

¹⁵ Vara tea mo lo hitesatihi na voraina, enia tamlohi vili tamlohi matea moiso, ale ka levosahia vara mo sopo te tamlohi vili tamlohi hatea vara mauri tui mo lo toho isana. ¹⁶ Ra levosahia vara opoia varauhu

enia hin posposi sei; Iesu mo sile na maurina matařa, ale matan haratu, mo ūahu vara ūa sile na mauriřa mata vorai kalesia tinapua. ¹⁷ Ale matana, vara tea nona hinau mo matuvana, ale mo hite na vonna matea mo vejuveju na hinau matea, pani mo sopo tuenia, opoia non God mo lo toho hinia sohena sava? ¹⁸ Natuvarihi, ūa sopo retireti vono purongo, pani ūa pa opoi na tinapua na nořa vavahinau peresi na retivarařuhu.

¹⁹ Vara ūa opoi na tinapua ūa lo vujangia vara enřa non retivarařuhu, ale ūomiřa la sopo tialahalaha na nahon God, ²⁰ hina purongo vara ūomiřa la lo arřa hin te hinau, God mo aulu na ūomiřa, ale enia mo levosahia na hinau tari la varauhu. ²¹ La tapalaku ūuhuřuhu, vara ūomiřa la sopo hase arřa na nahon God, enřa ūa pa eři ūomřilangi vara ūa mai mariviti isana, ²² moiso enia i pa sileřa na sava hinau ūa usia isana matan ūa opoia vara ūa oloolo na nona retileu, ale tarea ūa lo vai na sava God mo avulahi hinia. ²³ Ale God mo sile nona retileu akerihi: vara ūa tau na nořa rasua hin Natuna Iesu Křisto, ale ūa opoipořa sohena Iesu mo retileu hinia isařa moiso. ²⁴ Ale haratu mo lo oloolo na retileu non God, mo lo toho hin God, ale God mo lo toho hinia, moiso hin malele akerihi natu, ūa levosahia vara God mo lo toho isařa, matan Tanumena atu mo silea mo lo toho isařa.

4

Ha Pa Rasu Na Sava Hinau

¹ La tapalaku ūuhuřuhu, ha sopo rasu na tanume tari vara la verea vara la lo retireti na suihan Tanume Tapu, pani ha vahitera vara la tai isan God teni mo vono, matan přovet haluhalu matuvana la vano na varama moiso, ² ale kamim ha pa eři levosahia varauhu vara sahara mo tai isan God sohen harihi: haratu mo verea vara Iesu enia Křisto, ale vara mo verea vara Iesu mo mai tamlohi varauhu, tanume atu natu mo tai isan God. ³ Pani haratu mo sopo taviti vara Iesu enia Křisto mo sopo tai isan God, ha pa levosahia vara enia meresahi non Křisto sei ka rongoa moiso vara i pa mai, ale nake mo pete toho na varama moiso.

⁴ Natuvarihi, kamim non God, ale kamim ka jeu la meresahi atu moiso matan

Tanumen God mo lo toho hin kamim, ale enia mo suiha mo jeu haratu mo lo toho na varama. ⁵ La meresahi nike, la tai na varama, ale matana, tamlohi na varama mo tapurongo isara matan la lo retireti na masalon varama.

⁶ Enřa non God, ale la haratu sei la levosahi God la pa tapurongo isařa, pani la haratu la sopo levosahi God la pa sopo tapurongo isařa. Hin posposi atu natu, řa pa eri levosahia i řuhu vara hare mo lo retireti: Tanume Tapu atu mo vararuhi teni te tanume haluhalu.

⁷ La tapalaku řuhuřuhu, řa pa opoipořa mata opoia mo tai isan God, ale haratu mo lo sile na opoia, enia mo vora isan God, ale mo levosahi God. ⁸ God enia opoia. Ale vara tea mo sopo opoi na tinapua, enia mo sopo levosahi God. ⁹ God mo vuhesi na nona opoia isařa sohen harihi: mo řule Natuna vorahese mo mai na varama matan vara řa pa mauri hinia. ¹⁰ Pulo opoia vararuhi enia mo sohen harihi; enřa řa sopo opoi God tiroma, pani God mo opořa tiroma. God mo řule Natuna vara i voli nařihi na nořa sasati. ¹¹ La tapalaku řuhuřuhu, matan God mo opořa mo tavera sohen harihi, mo ſuhu vara řa pa opoipořa.

¹² Tea mo sopo lo hite God hin te pongi, pani vara řa opoipořa, God mo lo toho hiniřa, ale nona opoia mo lo toho vararuhi na mapuřa.

¹³ Matan God mo sileřa na Tanumena, řa levosahia vara enřa řa lo toho hinia, sohen enia mo lo toho hiniřa. ¹⁴ Ale kama hitea, kama lo vereulia isana tinapua vara God mo řule Natuna vara i mai Jujuri mata varama. ¹⁵ Vara tea mo taviti vara Iesu enia Natun God, God mo lo toho isana, ale enia mo lo toho isan God. ¹⁶ Ale řa levosahi mo ſuhu moiso, řa rasua vara God mo opořa vararuhi. God enia opoia. Vara řa lo opoipořa, enřa řa pa matea na mapuřa peresi God, ale enia i pa toho peresiřa. ¹⁷ Hin malele akerihi, opoia mo jea vararuhi matan vara řa pa eri řomřilangi hin rani aria atu, ale matana, řa pa hahu sohen Křisto mo lo hahau na varama. ¹⁸ Opoia jea sohena, i pa levuti nařihi na

matahu. Ale haratu mo lo matahu enia mo matahu mata řomřomi mata aria, ale mo vujangia vara nona opoia mo pa lo makire.

¹⁹ Ra opoi God matan God mo opořa tiroma. ²⁰ Pani vara tea mo verea vara mo opoi God, pani mo sopo opoi na voraina, enia tamlohi halu. Mo sopo eri hite God nake, pani mo sohena sava natu, vara mo vere vara mo opoi God, pani mo sopo opoi na voraina mo eri hitera? ²¹ Retileu sei God mo sileřa hinia mo sohen harihi, "Haratu mo opoi God, enia i pa opoi na voraina."

5

Jeu na Varama

¹ La haratu la rasua vara Iesu enia Křisto, enira natun God. Ale la haratu la opoi God Tama, la pa opoi na natuna tari. ² Ra levosahia vara řa opoi na natuna tari hin posposi sei: matan řa opoi God, ale matan řa oloolo na nona retileu. ³ Matan řa vujangji na nořa opoia hin God na nořa oloolo na nona retileu, ale mo sopo řilangi mata usurira.

⁴ Haratu la vora isan God la pa eri jeu na varama mata nora rasua, enia natu, mo vaira la jeu na varama. ⁵ Ale haratu mo jeu na varama enia haratu mo rasua vara Iesu enia Natun God.

Iesu Enia Hare

⁶ Iesu Křisto mo mai na malele wai peresi na řae, mo sopo na wai hasena, pani wai peresi na řae.* Tanume Tapu mo vereulia matan Tanume Tapu mo vararuhi. ⁷ Varařuhu, hinau mo tolu la vereulia, ⁸ Tanume Tapu, wai peresi na řae la turu na jara matea purongo.

⁹ Vara řa lo rasu na retireti nona tamlohi purongo, sava God mo vereulia hinia hin Natuna mo mele ſuhu jea. Retivuhesi atu mo sohen harihi: ¹⁰ Vara řa tau na nořa rasua isan Natun God, řa lo vujangia vara řa rasu na vereulia non God hin Natuna. Pani vara řa sopo rasu na sava God mo vereulia hinia hin Natuna, řa lo verea vara God enia tamlohi halu. ¹¹ Ale vereulia atu mo sohen harihi: God mo sile na mauri tui moiso, mauri tui atu mo lo toho isan Natuna. ¹² Ale vara haratu mo lavi Natun God mo lavi na mauri tui, pani haratu

* ^{5:6:} wai peresi na řaena: wai peresi řaena mo roro hin rani atu tamlohi vuro matea mo urai Iesu. Hite: Jn 19.34. John mo ulia nike, vara řa levosahia vara Iesu mo lavi na epe tamlohi, mo sopo nunua purongo sohena hai la lo verea.

mo sopo lavi Natun God, mo sopo lavi na mauri tui.

Vujangi Mata Mauri Tui

¹³ Na lo uliuli isan la haratu la rasu Natun God, matan vara ha pa levosahia i ūhu vara kamim ka lavi na mauri tui moiso.

¹⁴ Ale ūra pa levosahia vara ūra usiusi i usuri na masalon God, enia i pa tapurongo isařa.

¹⁵ Ale vara ūra levosahia vara God mo lo tapurongo na nořa usiusi, ūra pa levosahia vara ūhu vara ūra pa lavi na sava ūra usia isana.

¹⁶ Vara tea mo hite na voraina matea mo lo vai na hehe sei mo sopo matan vara i mate matana, i pa eři usiusi vara God i silea na mauri. Pani vara hehe atu enia hehe mata mate, i pa sopo eři usiusi matana.

¹⁷ Lejileji tari enira hina sasati, pani hina sasati tari la pa sopo sile na mateia.

¹⁸ Ra lo levosahia i ūhu vara haratu la vora isan God la pa sopo eři vai na hehe tarea. Natun God mo lo tigi horora, ale Tiapolo i pa sopo eři komora.

¹⁹ Ra levosahia mo ūhu vara enřa ūra tai isan God, pani tatuara tinapua tari na varama la lo toho na suihan Tiapolo.

²⁰ Ra levosahia vara Natun God mo mai mo sile na levosahi vara ūra pa eři levosahi God vara ūhu. Ale ūra lo toho hin haratu mo vara ūhu, Natuna Iesu Kristo enia God vara ūhu, enia mauri tui.

²¹ Natuvarihi, ha toho asau na posposi mata lotulotu vono.

2 John Harua Leta John Mo Ulia Leta Nike

John mo uli leta nike, matan vara tamlohi rasua la pa eři levosahia vara opoia enia hina aulu na mauri rasua. Mo vujangia vara opoia peresi na retivarařuhu la pa toho jara matea na mauri rasua. Mo vujangia vara Iesu enia tamlohi varařuhu matea. John vujangia vara enřa ţa pa opoiopořa.

Hin leta nike

1. Retiololo (1-3)
2. Opoia peresi na retivarařuhu (4-11)
3. Isoiso reti (12-13)

¹ Leta nike, enau patu tamlohi rasua sei John, na ulia isan hařai sei God mo viřonia peresi na natuna.* Enau peresi la haratu la levosahi na retivarařuhu, kama opoi kamim mo isoiso. ² Kama opoi kamim mata retivarařuhu mo lo toho na mapuřa, ale i pa toho atu na pongi tui. ³ Moiso na usiusi vara God Tama peresi Natuna Iesu Křisto vara la pa řomřuhu hiniřa, ale la řomopořa, moiso vara la pa sileřa na nora tamata, na nora retivarařuhu, ale na nora opoia. ⁴ Enau na avulahi tavera matan na rongoa vara te natum la lo oloolo na retivarařuhu sohen God Tama mo retileu hinia isařa moiso.

Tamlohi Vujangi Haluhalu

⁵ Vetasiku řuhuřuhu, na sopo uliuli vara a vereho vara o pa oloolo hin te retileu paro hatea, mo vono, pani na lo uli haratu mo verea tiroma moiso vara ţa opoiopořa. ⁶ Opoia varařuhu enia vara ţa vai na sava God mo retileu hinia moiso, ale haratu ka rongoa moiso na tapulo rani, vara ţa pa hahau hinia. ⁷ Matan ka levosahia vara tamlohi haluhalu matuvana la vano na varama moiso. La tamlohi haluhalu atu la retihalu vara Iesu Křisto mo sopo mai tamlohi varařuhu. La tamlohi haluhalu atu enira meresahi non Křisto. ⁸ Ha lo kilau matara! Mo sopo řuhu vara sava kama

voko řilangi matana matamim i vano hina purongo, pani ha vaihitea vara ha lavi vevuhi na nomim otori isana. ⁹ Haratu řomina mo lo vano asau na hinau la vujangia hin Křisto moiso, ale mo sopo turu hinia, haratu natu, God Tama mo sopo lo toho peresia. Pani vara tea mo toho jejeu na sava hinau la vujangia moiso, God Tama peresi Natuna la pa lo toho peresia. ¹⁰ Vara tea i mai, pani mo lavi na vujangi tinapua, ha sopo tinařihia vara i unu na imamim, ha sopo silea na retiololo, ¹¹ matan, vara haratu mo sile na retiololo isara, enia mo lo tuenira na nora hehe.

Isoiso Retiololo

¹² Varafuhu na opoia vara a mele vere kamim na hinau matuvana, pani na sopo opoia vara a uli na leta purongo. I pa mele řuhu vara a mai vara enřa tolu ţa pa sorasora, ale ţa pa avulahi tavera matana. ¹³ Reti oloolo mo lo mai isamim mo tai isan la natun vetasimim nike God mo viřonia.

* **1:1:** hařai peresi na natuna: reti sei hařai peresi na natuna la verea vara John mo lo řaramia vara hařai atu enia vao kalesia matea, ale natuna enia vao kalesia matan vao kalesia atu.

3 John

Hatolu Leta John Mo Ulia

Leta nike

John mo uli leta nike matan vara kalesia la pa ūromiromi mata tueni la haratu la lo vai na vavahinau non Moli na jara tinatinapua na varama. Mo ulia isan Gaius, tamlohi tavera matea na rasua ale mo lo usuri posposi akerihi moiso.

Hin Leta Nike

1. Retiololo isan Gaius (1–4)
2. Kalesia la pa hase tuetuenira (5–12)
3. Isoiso retiololo (13–15)

¹ Leta nike, enau patu tamlohi rasua sei John na ulia isan tapalaku ūruhu sei Gaius, na opoiho na retivarařuhu. ² Tapalaku ūruhu, na usiusi vara hinau tari la pa ūruhu isam, na lo ūromtoho vara epem i pa suiha sohen ko suiha na nom mauri rasua. ³ Na rani vorai kalesia la rohi kamam nike, la verea vara engko, ko lo hahau usuri na retivarařuhu, ale enau na avulahi tavera matana. ⁴ Mo sopo te hinau hatea i vaiau a avulahi tavera sohen harihi hin haratu na rongoa vara natuku la lo hahau usuri na retivarařuhu. ⁵ Tapalaku ūruhu, ko vai na hina tatahola mata rasua matan ko lo tueni na vorai kalesia sei la lo mai isam, hina purongo vara enira la tamlohi tinapua, ⁶ enira la vere na nom opoia isan la vao kalesia nike. Ale mo ūruhu vara o ūuleria na nora hahau na posposi mo tatahola na nahon God, ⁷ matan la lo hahau mata hijan Moli, la hatihia moiso vara la pa sopo lavi te tuetueni isan te tinapua vara mo sopo levosahi God. ⁸ Matana, mo ūruhu vara ūra tueni na tamlohi sohen harihi, matan vara ūra eři voko peresira na retivarařuhu. ⁹ Na uliuli mo vano isana vao kalesia atu moiso, pani Diotrephes mo opoia vara enia i pa tiroma hinira, mo ūruhu vara i tapurongo hin kamam. ¹⁰ Ale vara a mai, a pa reti isana matan mo lo verelejileji kamam, ale mo sopo haratu purongo mo vaia, pani mo lo turuhoro na voraiřa la lo mai vara la rohi na vorai rasua ea. Ale mo tau nařihi na tamlohi mata vao kalesia matan la opoia vara la sile na retiololo

isara. ¹¹ Tapalaku, o sopo tisuri na posposi sasati, pani o tisuri na posposi ūruhu matan haratu la lo vai na hina ūruhu enira natun God, pani la haratu la lo lejileji tarea la pa sopo levosahi God. ¹² Tamlohi tari la verea vara Demetrius enia tamlohi ūruhu matea, ale nona vujangi mo varařuhu matan la vujangia vara enia tamlohi ūruhu. Kamam sohena, kama lo verea vara enia tamlohi ūruhu matea, ka levosahia vara kama lo verea varařuhu.

Isoiso Retiololo

¹³ Varařuhu na opoia vara a mele vere kamim na hinau matuvana, pani na sopo opoia vara a ulia hin leta nike purongo. ¹⁴ Pani na lo ūromtoho vara a pa mai nohorihī purongo, ale ūra pa sorasora matavuhi. ¹⁵ Na usiusi vara tamata non God i pa toho isam. Tapalam nike, la sohai na nora retiololo isam, ale o pa sile na retiololo isana tapalařa hatehateahi atu.

Jude Leta Jude Mo Ulia Leta nike

Jude mo vere na hinau matuvana mata tamlohi vujangi haluhalu, enira tamlohi sasati ale God i pa sile na talai tavera isara, matana, kalesia la pa lo kilau mamahu vara la pa sopo tapurongo na nora vujangi.

Isoiso reti non Jude hin leta nike enia usiusi matea mo lo sile na leřuhu isan God: ‘Ale nake, řa pa sile na ooloolo tavera isan God, matan enia hasena i pa eři turuhoro kamim vara ha sopo jovi, ale enia i pa lavi kamim i tau kamim na nahona ha vokevoke, ale ha pa avulahi tavera jea. Mo tatahola vara God nořa Jujuri hin nořa Moli Iesu Křisto, i lavi na ooloolo tavera, auluna, suiha, ale suiha mata i aulu na hinau tari. Amen.’ (24-25)

Hin leta nike

1. Retiololo (1-2)
2. Turu řilangi na rasua (3-13)
3. Turuhoro na tamlohi vujangi haluhalu (14-23)
4. Isoiso usiusi (24-25)

¹ Leta nike, enau Jude na ulia. Enau slev non Iesu Křisto, enau tasin James. Na uliuli isan la haratu, God Tama mo viřonira, ale mo taura na nona opoia, Iesu Křisto mo lo matahira.

² Na lo usiusi vara tarea, God i pa leřuhu hin kamim i tavera jea, ale vara tarea, i pa silea kamim na nona řomopoia peresi na nona tamata peresi na nona opoia!

Tamlohi Vujangi Haluhalu

³ La tapalaku řuhuřuhu, a pa verea vara, tiroma na lo řomřomia vara a uliuli isamim vara God mo juriřa sohena sava, pani nake, na hitea vara a pa uliuli vara a retituetueni kamim vara ha pa valum řilangi tarea mata taurilati vujangi vararuhu atu, God mo lo silea isana nona tapuhi moiso na rani matea mata rani tui tui. ⁴ Te tamlohi la mai luhu, la unu matan te řomira na livuhařa, ale la lo verea lara, ‘Mo řuhu purongo vara řa vai na hehe peresi na hařai teni řa vai te hina sasati

matuvana, matan řomřuhu non God i pa vai God i řomiřa.’ Posposi sohen harihi, mo lo vujangia vara la vahaři hin Moli Iesu Křisto nořa Tamlohi Tavera, enia sei mo matelete. Pani tuai jea, la ulia moiso, ale Retiulia mo retiřoařohai vara God i pa ari na tamlohi sei la řohu na posposi tatahola non God sohen harihi.

Angelo Sasati Matan Tuai

⁵ Pani nake na opoia vara a mele verea isamim na sava ka levosahia mo řuhu moiso, vara sava mo masese isana tamlohi atu Moli God mo jurira tuai Egypt, pani hitahun haratu, enia mo komo la haratu la sopo rasua.

Exo 12.51; Num 14.29-30

⁶ Ale sohena sava, God mo pesi la angelo atu tuai, haratu la sopo avulahi na suiha sei God mo taua isara, ale la malue na jarara tatahola, ale matana, God mo lo taurilatira na jara řořoha tavera matea. La pa toho atu, i tikeli na rani tavera mata aria.

2Pe 2.4, 9

⁷ Ale ha řomřomi na sava mo masese isana taon matan Sodom enia Gomorrah peresi na taon la lo toho mariviti hinira tuai, matan nora tamlohi la vaia sohen la angelo atu tuai, matan la lo hahau usuri na posposi viriu matuvana peresi la haratu la sopo tatahola isara, ale sohena sava God mo komora na hapu, mo vaia sohena tovongi matea isara mata talai tui tui.

Gen 19.1-24

Tamlohi Sasati La Mangisi

⁸ Sohen la haratu tuai, la tamlohi nike la unu, la vai na posposi hehe na epéra mo sati, matan la vere na tamlohi vara la pa vai na sava la lo mavuho hinira. Ale la tipahi na suiha tari sei la aulu hinira, ale la vereleholehi na angelo aulu.

⁹ Pani

Michael moli nona angelo, mo sopo vaia sohena. Hin rani atu mo opoia vara i lavi nařihi na tarapen Moses, enia Tiapolo la vauriuri matana, pani hina purongo hin haratu vara enia mo angelo aulu matea, mo sopo retileholehi na hijan Tiapolo, mo vono, Michael mo verea purongo mara, ‘Moli God i pa sileho na talai!’

Dan 10.13, 21; 12.1; Rev 12.7; Zec 3.2

¹⁰ Pani la tamlohi nike, la unu, tavalura matea la lo kerekerehi, ale la lo kali na hinau la sopo levosahí te hinau hinira, pani mele tavalura tinapua, la lo usuri na

nora rongovosahi purongo sohena maji, ale ūromira mo vono, pani hitahuna posira i pa komora hasera.

Talai Tavera I Pa Jovi Isara

¹¹ Rani sasati tavera i pa mai isara, matan la lo usuri na sava Cain mo vaia tuai, ale la lo vai na hehe sohen Balaam mo vaia tuai, matan la lo ūromrōmi na mania purongo. Ale sohena posposi sei non Korah tuai, la lo usuri na posposi lejileji atu, mo vaia tuai isan God, ale la pa tihai sei matana. *Gen 4.3-8; Num 22.1-35*

¹² La tamlohi nike, la sohena ratarata sasati na lolo tasi, boti la lo takosa hinira, matan la lo toho na nomim hanhani matavuhi kalesia, pani la sopo mahanuhanu vara la lo ūromrōmira hasera purongo. La tamlohi nike, la sohena telangi langi mo lo serera, pani la sopo eři sile te usa na rani alo mo ūrilangi. La mate vevuhi sohena pahai sei, mo marivu mo koru, mo sopo te vuana, mo sopo te rauna. ¹³ Nora hinau mahanuhanu la pala sohena valval loloputu tavera na tasi langivili. La sohena vitusarasara sei la jario na malelera, ale la pa toho jejeu na jara ūrořha tavera atu God mo tau mamahunia matara.

Enoch Mo Retimangovi Hin Moli

¹⁴ Ale sohena Enoch sei, enia mo halimaravrua pina mo usuri Adam, ale enia mo lo retireti hin la tamlohi nike moiso, mo verea mara, 'Ha hitea! Ha kilau sahe aulu, Moli God mo lo mai peresi na nona vao angelo tapu, tea i sopo eři evira, *Gen 5.18, 21-24* ¹⁵ matan vara i ari na tamlohi tari. I pa sile na talai isan la haratu la ūrořu na posposi tatahola sei God mo opoia, matan nora sasati tari la vaira na nora lejileji vano isan God. Moli i pa sile na talai isan la tamlohi lejileji sei, mata nora retihehe tari sei la verea isana. ¹⁶ La tamlohi nike, la lo retireti varihi, ale la lo ngutungutu, la lo usuri na masalora purongo. La lo retimangisi hinira hasera, ale la lo haluhalu na tinapua mata lavi te hinau isara.

Pongi Hitahu

¹⁷ La tapalaku ūruhuřu, ha sopo ūromaliho na retiroařoahai sei vahařule nona Moli Iesu Křisto la silea isamim

moiso. ¹⁸ La verea isamim vara mariviti na isoiso rani, tamlohi hanmarua peresi na tamlohi lejileji la pa tapulo kerehi God. ¹⁹ Ale la tamlohi nike, tarea enira la pulo patumasa matan enira tamlohi non varama purongo, ale Tanumen God mo sopo toho isara. ²⁰ Pani la tapalaku ūruhuřu, ha tuetueni kamim vara ha ulua na nomim rasua tapu, ale na rani vara ka lo usiusi, ha tinařihia vara Tanume Tapu i pa tiroma hin kamim. ²¹ Ha vujangia vara ka opoi God na nomim hahau, ale ha tau na ūromim na ūromopoia non Moli Iesu Křisto sei vuana enia mauri tui. ²² Ha vujangi na nomim ūromopoia isan la haratu sei, la lo ūromkaka mata nora rasua.* ²³ Ale ha juri na tinapua, ha reve nařihira na hapu aria. Ale tatua tamlohi ha pa ūromopoira, pani ha lo kilau vara ha vaia, ha pa nikei na nora ruru sohena vara nora hehe mo lo kaluti hinira.

Isoiso Reti

²⁴ Ale nake, ūra pa sile na oloolo tavera isan God, matan enia hasena i pa eři turuhoro kamim vara ha sopo jovi, ale enia i pa lavi kamim i tau kamim na nahona ha vokevoke, ale ha pa avulahi tavera jea. ²⁵ Mo tatahola vara God nořa Jujuri hin nořa Moli Iesu Křisto, i lavi na oloolo tavera, auluna, suiha, ale suiha mata i aulu na hinau tari. Amen.

* ^{1:22:} vujangi: hai la verea vara 'vaira la rongovosahi'.

Revelation Puku Nike

Puku nike, John mo ulia hin rani atu mo lo toho na Ureuren Patmos. Patmos mo sohena ima ūilangi matea mara Rome la lo tau na tamlohi hinia. La tau John ea matan enia mo retivujavujangi hin Křisto. John mo lo vere na hinau God mo vujangia isana hin rani atu mata vavahinau non Iesu Křisto matan pavuho na pongi hitahu (1.2). Retisohai sei sopena mo tolu. (1) Suiha sasati la lo toho na varama, la lo ūohu na tamlohi non God, ale la opoia vara la vilimateira; (2) Iesu enia Moli Aulu, enia i pa jeu na tamlohi tari peresi na suiha aulu sei la lo ūohu hin God; (3) God i pa sile na silesilea ūohu jea isana nona tamlohi sei la lo turu ūilangi na nora rasua hinia, ale i pa leřuhu tavera hin la haratu la mate matan Iesu.

Retisohai sei mo tueni na tamlohi rasua sei tuai hin rani ūilangi atu la mate mata nora rasua. Tamlohi rasua la levosahia vara hina purongo vara suiha na varama sohena nona mara Rome tuai la lo turu, pani God mo vujangia vara Natu Sipsip non God i pa jeu vevuhira. Levosahi atu mo vaira la ūomřilangi na maurira.

Na tapulon puku nike, leta mo limaravrua la vano isana vao kalesia mo limaravrua, la lo vujangiřa na posposi tamlohi na vao kalesia hatehateah, haratu mo ūohu, haratu mo sati (2.1-3.22).

John mo uli na hinau tari mo hitea sohen God mo vujangia isana. Mo sohena mavuho matea, pani John mo sopo juruvi. Mo hite na hinau matuvana la lo vujangi na suihan God peresi na talai tavera sei i pa silea isan la haratu la lo ūohu hinia. Mo hite na jara sakele nona supe non God (4.1-11) peresi na viriviri pepa non Natu Sipsip (5.1-14). Natu Sipsip hasena i eři roila pulu atu mo limaravrua hin viriviri pepa atu (6.1-8.5), angelo la tiv na trumpet non God (8.6-11.19), la surerei na jilivi mata talai (16.1-21) hin haratu la lo vujangi na aria tavera non God sei i pa mai.

Hitahu vara la rani ūilangi atu la isoiso, tamlohi non God sei la jeu, la pa lavi na leřuhu tavera non God sohen harihi:

'Ka hitea! Nake, jaran God sei mo lo toho hinia, i pa toho peresi na tamlohi. I pa toho peresira, ale enira la pa nona tamlohi, ale God hasena i pa toho peresira, sohena nora God. I pa kamoti na wai matara tari na matara, i pa sopo te mateia, ūomsasati teni tangi teni epe varihaji, matan hinau matan tuai la tihai.' (21.3-4)

Hin puku nike

1. Reti mata hinau la pa masese (1.1-8)
2. John mo hite Moli (1.9-20)
3. Leta la vano isan la vao kalesia atu mo limaravrua (2.1-3.22)
4. Haratu la lo lotu na tuka (4.1-11)
5. Viriviri pepa peresi la pulu atu mo limaravrua (5.1-6.17)
6. La lotu God na tuka (7.1-17)
7. Trumpet mo limaravrua (8.1-11.19)
8. Dragon peresi na maji jala sasati mo rua (12.1-13.18)
9. God mo vujangi na nona aria (14.1-15.8)
10. Jilivi mo limaravrua mata talai (16.1-21)
11. God mo jeu na nona meresahi (17.1-20.10)
12. Aria tavera non God (20.11-15)
13. Tuka Paro peresi na Varama Paro (21.1-8)
14. Jerusalem Paro (21.9-22.5)
15. I pa sopo tuai Křisto i pa mele mai (22.6-21)

Reti Mata Hinau I Pa Masese

¹ God mo silea vara Iesu Křisto i vujangi na sava hinau mo vironia vara la pa masese, i pa sopo tuai, isana nona volitusi hin malele sei; Iesu mo ūrule na nona angelo vara i vujangia isan nona volitusi John. ² Ale enia mo vereuli na reti non God, peresi na sava hinau Iesu Křisto mo vujangia isana, hinau tari sei mo hitera.

³ Ale avulahi isan haratu mo evi reti sei isana tamlohi, mata hinau la pa masese i vano isana tamlohi tinapua, ale avulahi isana tamlohi tari sei la rongoa, ale la oloolo hinia, matan pongi atu mo mariviti.

⁴⁻⁵ Uliuli non John mo vano isan la vao kalesia atu, mo limaravrua na province matan Asia.

Romřuhu peresi na tamata la mai isamim, la tai isan God Tama, isan Iesu

Kristo peresi la tanume ūhu atu mo limaravrua sei la lo toho na naho jara sakele nona supe non God. God enia mo lo toho nake, mo lo toho tiroma, ale enia i pa mai hitahu. *Exo 3.14; Zec 4.1-10* Ale Iesu Kristo, haratu sei mo lo turu ūlangi na nona vereulia, enia vora tiroma hin la haratu la pa mele turu na mateia, enia mo aulu na supe tari na varama.

Iesu Kristo enia haratu mo opoīra tavera, ale ūaena mo roro, ale mo volituhi na noīa aria mata noīa hehe. *Isa 55.4; Psa 89.27* ⁶ Ale enia mo vaiā ū Mai na vao matea mata pīs, ū tauri na suiha aulu isan nona God sei Tamana, i pa lavi na hasohaso, ale suihana i lo turu rani tui tui tarea. Amen. ⁷ Ka hitea! Iesu mo lo mai na telangi, ale tamlohi tari la pa hitea na matara, la haratu la lo ūrura tuai sohena, la pa hitea, ale tavitavui tari na varama la pa tangi matana. Enia i pa sohena natu, amen. ⁸ Ale Moli God mo verea mara, “Enau pulo hinau tari, enau na isoiso hinau tari, enau na lo toho nake, ale enau na lo toho tiroma, enau a pa mai. Enau suiha aulu atu mo tavera jea.”

Hinau John Mo Hitea

⁹ Enau John, voraimim matea, ale enā ū lo turu matea na rani ūlangi hin mauri atu God mo aulu hinia, ū lo turu ūlangi na ūromperavu hin Iesu purongo, enau, la tauau na ureuren Patmos matan na lo retivujavujangi na Reti non God, ale matan na lo sorahi Iesu. ¹⁰ Ale, na rani lotu non Moli, Tanumen Moli mo mařivisiau, ale na rongo na leo matea mo tavera mo memera na hařiku sohena leo trumpet matea, ¹¹ leo atu mo verea mara, “O uli na hinau ko lo hitea na lolon te puku hatea, ale o sohaia i vano isan la vao kalesia atu mo limaravrua: isan Ephesus, isan Smyrna, isan Pergamum, isan Thyatira, isan Sardis, isan Philadelphia peresi Laodicea.” ¹² Na posí vara a hitea vara leon hare natu, mo lo retireti isaku, ale na posí moiso, na hite na peri lamu mo limaravrua la vaira na gold la lo turu atu. ¹³ Ale na hite matea mo sohen Natun Tamlohi* mo lo turu na

livuhara. Mo ruru na ruru matea mo peravu mo tikeli na palona atano, ale ruru matea la vaia na gold mo eve ūalihi na ūrumana hinia.

Dan 7.13; Dan 10.5

¹⁴ Patuna peresi na vuluna la lulu sohena katen, matana, o hitea la mera sohena pepe hapu. *Dan 7.9; Dan 10.6* ¹⁵ Palona la lo angiangi sohena bronze aen sei la tunia na hapu tavera, ale leona mo puhoni sohena ūrum tasi tavera matea.

Ezek 1.24; 43.2 ¹⁶ Mo lo tauri na vitusarasara mo limaravrua na matuana, ale sita matea mo voro tavalu rua mo lo malue na jingona. Nahona mo memera mo sohena alo tavera.

¹⁷ Nara na hitea, na jovi na palona sohena tamlohi matea mo mate, pani mo tau na matua limana hiniau mo verea mara, “O sopo matahu, enau natu, Pulo Hinau Tari, ale enau Hitahu, ¹⁸ ale enau sei na lo mauri, na mate, pani ko hitea, nake na mele mauri, ale a pa mauri jejeu, ale na lavi na kia mata mate peresi na kia mata varama mata mateia.”[†] ¹⁹ Ale matan haratu o uli na sava ko hitea. Haratu ko hitea moiso, ale na sava mo lo toho nake peresi na sava la pa masese hitahu. ²⁰ A pa vereuli na ūramin la vitusarasara atu mo limaravrua sei ko lo hitera na matuaku peresi la peri lamu atu mo limaravrua sei la vaira na gold. La vitusarasara atu mo limaravrua, enira angelo matan la vao kalesia atu mo limaravrua, ale la perilamu mo limaravrua atu, enira la vao kalesia atu mo limaravrua.”[‡]

Leta La Vano Isana Vao Kalesia

2

Leta Isan Ephesus

Ale mo verea vara:

¹ “Hinau akerihi natu, o pa ulia i vano isan angelo mata vao kalesia hin Ephesus: ‘Harihi retisohai sei non haratu mo lo tauri na vitusarasara mo limaravrua na matuana, ale mo lo hahau na livuhan la peri lamu mata gold atu mo limaravrua.’

² Mara, ‘Na levosahi na nom vavahinau, nom voko peresi na nom ūromperavu vara

* **1:13:** Natun Tamlohi: enia natu, Iesu. † **1:18:** kia mata mate peresi na kia mata varama mata mateia: Kia mo lo ūrami na suihani Iesu matan mo jeu na suihani mate peresi na jara atu mate la lo toho hinia matan i efi vaira la mele turu. ‡ **1:20:** angelo: Angelo akerihi enia angelo teni patu tamlohi, pani la sopo levosahia i ūhu vara mo lo verea isan hare.

o lo turu ūilangi na mauri rasua. Na levosahia vara ko sopo lavi te tamlohi sasati, ale ko vaihite na tamlohi hai sei la verea lara enira la vaharule, pani mo vono, ale ko vileia vara enira la tamlohi halu. ³ Na levosahia vara ko lo tauri na nom ūomperavu na rani ūilangi mata hijaku, ale ko sopo tinařihi na nom rasua.

⁴ Pani hinau matea na sopo avulahi hinia isam! Enia mo sohen harihi; Nom opoia mo sopo mele ūilangi sohen tiroma.

⁵ Matana, o to ūomromia vara ko jovi epu na nom opoia matan tiroma, o mele posi na nom hehe, ale o vai na nom opoia sohen tiroma. Pani vara i vono, a pa mele sinai a lavi narihi na nom peri lamu vara o sopo posi. ⁶ Pani mele hinau matea ko vaia mo tataholo, ko ūohu na sava hinau tamlohi non Nicholas* la lo vaira, ale enau sohena na ūohu hinira.

⁷ Isan haratu mo lo rongo, o tapurongo na sava Tanume Tapu mo lo verea isan la vao kalesia atu, haratu mo jeu na suihan sasati, ale mo turu ūilangi mo tikeli na isoiso maurina, enau a pa majinga vara i hani na vuan vipahai atu mo lo sile mauri sei mo lo toho Paradise na tuka non God.”

Leta Isan Smyrna

Mo mele verea mara: *Rev 22.2; Ezek 28.13*

⁸ “Hinau akerihi natu, o pa ulia i vano isan angelo mata vao kalesia hin Smyrna: ‘Harihi retisohai sei non haratu enia pulo hinau tari, enia isoiso hinau tari hitahu, mo mate, pani nake mo mele mauri!’

⁹ Mara, ‘Na levosahia vara ko lavi na rani ūilangi sohena sava moiso, ale na levosahia vara ko tilavono, pani engko ko tavytav, na levosahi la retisasati sei la verea matam mo tai isan la haratu la vara enira Jew, pani enira la sopo Jew tataholo, mo vono enira vaon Setan.

¹⁰ O sopo matahu matan la hinau ūilangi sei la tatamahu moiso vara la mai isam, ale ko hitea, i pa sopo tuai, Tiapolo i pa tau te tatuamim na ima ūilangi vara i vaihite kamim, ale ha pa rongo i sati mata rani

i sangavulu, pani vara o ūomturu ūilangi, hina purongo vara o mate matana, pani a pa sileho na nom ūongořongo nona supe mata mauri.

¹¹ Isan haratu mo lo rongo, o tapurongo na sava Tanume Tapu mo lo verea isan la vao kalesia atu, isan haratu mo jeu na suihan sasati, ale mo turu ūilangi mo tikeli na isoiso maurina, i pa sopo eři vano na harua mateia!”

Leta Isan Pergamum

Mo mele verea mara:

¹² “Hinau akerihi natu, o pa ulia i vano isan angelo mata vao kalesia hin Pergamum: ‘Harihi retisohai non haratu sei mo lo tauri na sita voro tavalu rua mata vuro!’

¹³ Mara, ‘Na levosahia vara ko lo toho na jara sei Setan mo supe ea, pani ko lo taurilati na hijaku, ale ko sopo vunvuni na nom rasua hiniau, hina purongo vara la taurilati Antipas noku tuetueni sei mo lo ūomturu ūilangi, la vilia mo mate hin jara atu sei Setan mo lo toho ea.

¹⁴ Pani na hite na hinau hai ko lo vaia mo sopo ūohu: tatuamim la lo usuri na vujangi non Balaam. Tuai mo vere Balak vara i vujangi na natun Israel vara la eři hani na hanhani sei la silea isana tamasi moiso, ale vara la usuri na mauri maji, ¹⁵ ale tatuamim sohena la lo usuri na vujangi non tamlohi non Nicholas,[†] ¹⁶ Ale matana, o posi! Vara i vono, nakerihi purongo vara a mai a pa valum peresi la tamlohi sei la lo usuri Nicholas, ale a pa taira na sita tavalu rua mata vuro na jingoku.

¹⁷ Isan haratu mo lo rongo, o tapurongo na sava Tanume Tapu mo lo verea isan la vao kalesia atu, Isan haratu mo jeu na suihan sasati, ale mo turu ūilangi mo tikeli na isoiso maurina, enau a pa silea hin hanhani atu sei la tovia mana sei la jarohia.[‡] Moiso enau a pa sile na vatu lulu matea isana, ale hin vatu atu hija paro matea mo lo toho hinia, pani haratu mo lavia enia hasena purongo i pa levosahi na ūaramin hija atu.’”

* **2:6:** tamlohi non Nicholas: Tamlohi hai la lo ūomromia lara Iesu mo lo retireti na tamlohi non Nicholas mara Antioch (O hite: Acts 6.5). † **2:15:** tamlohi non Nicholas: hite: 2.6. ‡ **2:17:** mana: Hin rani atu tavytavuin Israel la lo hahau na jara tano koru tuai, God mo vahanira hin hanhani sei la tovia mana. Hai la verea lara matea mo jarohi na sopesopena hai na puhoro tapu, vara i toho i tikeli rani atu Messiah i pa mele mai hinia matan vara i pa vahani na nona tamlohi hinia.

Leta Isan Thyatira

Moli mo mele mauri mo verea mara:

¹⁸ “Hinau akerihi natu, o pa ulia i vano isan angelo mata vao kalesia hin Thyatira: ‘Reti nike enira retin Natun God! Mataku la lo hani sohena pepe hapu, paloku la lo angangi sohena bronze aen mo tutuni.’”

¹⁹ Mara, ‘Na levosahi na nom vavahinau, nom opoia, nom rasua peresi na nom ūromperavu mata turu ūilangi, ale na levosahia vara ko lo vai na hinau nake mo jeu haratu tiroma.

²⁰ Pani hinau matea na sopo avulahi hinia isam: hařai sei Jezebel sei mo lo hase verea vara enia p̄ovet matea, ko majinga vara i lo vujangi na noku volitusi na malele halu matan vara la lo usuri na mauri maji, ale la hani na hanhani sei la silea isana tamasi moiso. ²¹ Na sile na masapa isana moiso vara i posi na nona hehe, pani mo sopo opoia vara i isoiso na nona mauri maji. ²² O lo levosahia vara a pa ari Jezebel na rojo matea na vatana, ale la haratu la lo vaivaileu peresia, la pa lavi na rongohaji tavera vara la sopo isoiso hin nona posposi sei, ²³ ale a pa vilimatei na natuna, ale vao kalesia tari la pa levosahia vara enau haratu mo lo ale na hinau tari na lolo ūomi tamlohi peresi na lolo mapu tamlohi. A pa sile na volimim i tataholo isamim hatehateahi i tataholo na nomim vavahinau.

Psa 7:9; Jer 17:10

²⁴ Pani isana tatuamim Thyatira la haratu la sopo lelevosahi teni la usuri na vujangi non Jezebel sei hai la lo verea vara enia vujangi puhoni non Setan, ale isamim a pa sopo eři mele vere te retileu tinapua hatea isamim matan vara a sopo mele tau te hinau puhoni isamim, ²⁵ pani na verea vara ha lo tauri ūilangi na sava ka lo tauria moiso i tikeli pongi atu a pa mele mai hinia.

²⁶ Isan haratu mo jeu na suihan sasati, ale mo lo turu ūilangi na noku vavahinau mo tikeli na isoiso maurina, a pa silea na suihā vara i aulu na mara jara tinatinapua, *Psa 2:8-9* ²⁷ ale i pa aulu hinira, i pa kilaura na maja aen, ale i pa viliroiroira sohena jilivi lepa purongo, i pa sohen suihā atu

§ **2:28:** majou ūalavuho: Rev 22.16 Hija atu Kristo enia ‘Majou ūalavuho’. * **3:5:** Puku mata Mauri: Puku atu God mo uli na hijan nona tamlohi hinia.

Tamaku mo sileau hinia, ²⁸ ale a pa silera na majou ūalavuho. §

²⁹ Isan haratu mo lo rongo, o tapurongo na sava Tanume Tapu mo lo verea isan la vao kalesia atu.’ ”

3

Leta Isan Sardis

Mo mele verea mara:

¹ “Hinau akerihi natu, o pa ulia i vano isan angelo mata vao kalesia hin Sardis: ‘Harihi enia retisohai non haratu mo lo lavi la tanume ūruhu non God atu mo limaravrua peresi la vitusarasara atu mo limaravrua.’

Mara, ‘Na levosahi na nom vavahinau, ale tamlohi tari la lo rasua vara nom rasua mo lo mauri, pani mo mate! ² O lo kilau! Na hitea sohena vara nom rasua ko sopo oloolo varauhu hin God, ale o mele vai na nom rasua i mele suiha matan vara i vono, i pa tihai. ³ O mele ūomrōmi haratu sei ko lavia moiso peresi haratu ko rongoa moiso, o taurilatia i ūilangi, ale o posi mata nom hehe. Vara o sopo tatamahu, enau a pa mai sohena tamlohi vavanaho matea, o pa sopo levosahia vara a pa mai isam pangisa.

⁴ Pani tatuamim Sardis nomim ruru la sopo lumiha na hehe. La pa hahau peresiau na ruru lulu matan mo tataholo vara la yaia sohena.

⁵ Isan haratu mo jeu na suihan sasati, ale mo turu ūilangi mo tikeli na isoiso maurina, i pa ruru na ruru lulu sohera, a pa sopo jarai na hijana na Puku mata Mauri,* pani enau a pa vere na hijana isan Tamaku peresi na nona angelo vara enia noku. *Psa 69:28; Rev 20:12*

⁶ Isan haratu mo lo rongo, o tapurongo na sava Tanume Tapu mo lo verea isan la vao kalesia atu.’ ”

Leta Isan Philadelphia

Mo mele verea vara:

⁷ “Hinau akerihi natu, o pa ulia i vano isan angelo mata vao kalesia hin Philadelphia: ‘Harihi retisohai sei non haratu mo tapu, enia mo varauhu, ale enia mo lo lavi na kia mata suiha non Supe David, enia mo roi na pelati, i pa sopo te hatea i eři mele pelatia, vara enia mo pelati na matarua, i

pa sopo te hatea i eři mele roia.' *Isa 22.22; Job 12.14*

⁸ Mara, 'Na levosahi na nom vavahinau, ale ko levosahia, enau na tau na matarua mo lo roi na nahom, i pa sopo te hatea i eři pelatia. Na levosahia vara engko ko sopo řilangi, pani ko lo oolo na noku reti, ale ko sopo vunvunia vara engko noku tamlohi. ⁹ Ale ko levosahia, a pa vai haratu la verea vara enira Jew, pani enira tamlohi halu vaon ima lotu non Setan, o pa hitea, enau a pa vaira la mai vara la papaohi na palom matan vara tamlohi la pa hitevosahia vara enau na opoipo. *Isa 49.23; Isa 43.4*

¹⁰ Matan ko lo taurilati na noku reti vara o pa řomperavu mata turu řilangi, ale matana, a pa kilau mamahuniho na rani vahite atu mo lo mai mata tamlohi mo isoiso na varama vara la pa vano hinia. ¹¹ I pa sopo tuai a pa mai, ale o tauri řilangi na sava ko lo tauria matan vara tea i sopo eři lavi nařihi na nom řongorongo nona supe.

¹² Isan haratu mo jeu na suihan sasati, ale mo lo turu řilangi mo tikeli na isoiso maurina, enau a pa vaia i mai peri tavera matea na ima lotu non noku God, ale i pa toho jejeu atu. A pa uli na hijan noku God peresi na hijan taon tavera atu non noku God hinia, jara atu enia Jerusalem Paro atu noku God i pa sohaia i sevuti na tuka i pa mai na varama. Ale enau sohena a pa uli na hijaku paro hin tamlohi atu.

¹³ Isan haratu mo lo rongo, o tapurongo na sava Tanume Tapu mo lo verea isan la vao kalesia atu.'

Leta Isan Laodicea

Mo mele verea vara:

¹⁴ "Hinau akerihi natu, o pa ulia i vano isan angelo mata vao kalesia hin Laodicea: 'Harihi retisohai non haratu la lo tovia Amen! Enia haratu sei enia tuetueni atu mo lo řomturu řilangi enia mo vararuhi, ale enia pulo vavahinau non God.' *Prov 8.22*

¹⁵ Mara, 'Na levosahi na nom vavahinau, pani ko sohena hanhani mo sopo řuhu hin te hinau, ko sopo noha, ale ko sopo koru, pani enau na opoia vara o noha teni o koru, ¹⁶ ale matan ko sopo noha teni koru, pani ko wai wai purongo, a pa hasorihihio na jingoku, ¹⁷ matan, ko verea kora, "Enau na

tavtav, na takonahi na hinau matuvana, na sopo mele opoi te hinau hatea." Pani ko sopo levosahia vara engko tamlohi marua matea, engko tamlohi matea la sopo eři řomřomihio, engko ko tilavono, engko ko matavuso, ale engko ko malamala.

¹⁸ Ale matana, na lo retituetueni vara o voli te gold isaku, gold sei la kuku nařihi na utauta hinia, ale enia i pa vaiho o tavtav, ale vara o voli te ruru lulu isaku matan vara o eři tatavuhoro na nom malamala hinia. O voli te meresin matan vara o eři pasia na matam vara o eři kilau.

¹⁹ Isan haratu na opoira, na vereuli na nora hehe, ale na sile na talai isara. Ale matana, o tuntuni na maurim, ale o posa na nom hehe. ²⁰ O kilau nika! Enau na lo turu na lo řiřingi na pelati; vara tea mo rongo na leoku, ale mo roi na matarua, enau a pa unu, ale a pa hanhani peresia, ale enia i pa hanhani peresiau.

²¹ Isan haratu mo jeu na suihan sasati, ale mo lo turu řilangi mo tikeli na isoiso maurina, a pa majinga vara i sakele peresiau na noku jara sakele nona supe, sohen enau na jeu na noku meresahi moiso, ale na lo sakele peresi Tamaku na nona jara sakele nona supe.

²² Isan haratu mo lo rongo, o tapurongo na sava Tanume Tapu mo lo verea isan la vao kalesia atu.'

4

¹ Hitahun la hinau atu na kilau sahe, e! Matarua matea mo roi na tuka. Ale leo atu tiroma sei mo sohena trumpet mo mele retireti isaku mara, "O sinai nika aulu! A pa vujangihio na sava mo viřonia vara la pa malue hitahu na hinau ko hitera moiso."

² Vahatea atu suihan Tanume Tapu mo mai isaku, e! Jara sakele non supe matea mo lo turu na tuka, ale na hite haratu mo lo sakele hinia, ³ ale haratu mo lo sakele atu mo lo angiangi, majhina mo sohena vatu řuhu sei jasper mo joriha řoroha, ale sohena vatu řuhu sei carnelian mo hahara. Nuenue matea mo řalihi jara sakele non supe atu, majhin nuenue atu mo sohena vatu řuhu sei emerald mo heja rau pahai.

⁴ Moiso, jara sakele non supe mo ngavulu rua mo vati tinapua la toho řalihi jara sakele non supe atu na livuha jara. Ale

hin la jara sakele nona supe hatehateahi atu, tamlohi aulu mo ngavulu rua mo vati la lo sakele hinira, la ruru na ruru lulu, ale la tau na ūrongo ūrongo mata gold nona supe na patura. ⁵ Vaha mo vilasi, piri mo roroa la lo malue hin jara sakele non supe atu na livuhan jara atu. Hapu jilangi mo limaravrua la lo hani na nahon jara sakele non supe atu, enira natu, la tanume ūruhu mo limaravrua atu non God. *Exo 19.16; Ezek 1.13; Zec 4.2*

⁶ Ale na nahon jara sakele non supe atu, lepa mo sohena tasi mata glas mo niro sohena crystal. Ralihi na jara sakele non supe na livuha jara, hinau mauri mo vati la lo turu ea, matara mo lavi vevuhi na epera na nahora peresi na harira. *Ezek 1.5-10, 22; 10.14*

⁷ Ale tiroman la hinau mauri atu mo sohena Lion, haruana mo sohena natu buluk, ale hatoluna mo lavi na naho matea mo sohena naho tamlohi, ale havatina mo sohena mala mo lo avu aulu. ⁸ La hinau mauri atu enira hatehateahi, hapara mo limarave, ale epera tari la mařivi na matara. Ale la lo lalavete tarea na rani peresi na vutepongi mo sopo te isoisona lara, *Ezek 1.18; 10.12; Isa 6.2-3*

“Tapu, tapu, Moli God sei mo tapu,
enia suiha aulu atu mo tavera jea,
mo lo toho moiso,
ale mo lo toho nake, ale i pa mai!”

⁹ Ale vara la hinau mauri atu la lo sile na hasohaso peresi na oloolo, ale la lo vere meje isan haratu sei mo lo sakele na jara sakele non supe atu mo lo mauri mata rani tui tui tarea, ¹⁰ ale la tamlohi aulu atu mo ngavulu rua mo vati *(24)* la lo sakele ūalihi haratu sei mo lo sakele na jara sakele non supe, la lo papaohi na nahona, ale la lo lotu haratu sei mo lo mauri mata rani tui tui, ale la pulahi na nora ūrongo ūrongo mata gold nona supe na naho jara sakele non supe atu, ale la lo verea lara,

¹¹ “Nomam Moli, nomam God,
mo tataholo vara o lavi na hasohaso,
ale oloolo tavera peresi na nom suiha
tavera,
matan engko ko vai na hinau tari,
ale masalom ko vaira la lo toho.”

5

Natu Sipsip Mo Roi Na Viriviri Pepa

¹ Ale na hite na matua liman haratu sei mo lo sakele na jara sakele non supe, na hitea mo lo tauri na viriviri pepa matea sei la uliuli hinia tavalu rua.* ale la puluia na jara mo limaravrua tinatinapua. *Ezek 2.9-10; Isa 29.11*

² Na hite na angelo suiha tavera matea, ale mo verea na leo tavera matea mara, “Hare mo tataholo vara i roi viriviri pepa nike, ale vara i ūrari na puluna?” ³ Pani mo sopo tea na tuka teni na varama teni na lolo varama mata mateia vara i tataholo vara i roi viriviri pepa atu teni i hite na lolona.

⁴ Ale, na tangi tavera matan mo sopo tea mo tataholo vara i roi viriviri pepa atu teni i hite na lolona. ⁵ Ale vonan la tamlohi aulu atu matea mo verea isaku mara, “O sopo tangi, o to kilau vano, haratu la tovia Lion sei enia tavitavuin Judah matea,† ale enia pin David mo jeu na nona meresahi moiso, ale, enia i eři roi viriviri pepa atu peresi la puluna atu mo limaravrua.” *Gen 49.9; Isa 11.1, 10*

⁶ Ale na hite na natu sipsip matea mo lo turu na livuhan jara atu. Hin jara atu natu, la hinau mauri mo vati atu peresi la tamlohi aulu atu mo ngavulu rua mo vati *(24)* la lo sakele ūalihi na jara sakele non supe ea. Ale natu sipsip atu, mo sohena la vilimateia moiso, pani mo lo turu, ale palana mo limaravrua, ale matana mo limaravrua, enira la tanume ūruhu atu mo limaravrua non God sei mo lo ūruleri vara la vano na jara tari na varama. *Isa 53.7; Zec 4.10*

⁷ Ale Natu Sipsip mo sinai mo lavi viriviri pepa atu na matua liman haratu sei mo lo sakele na jara sakele non supe, ⁸ ale mo lavia moiso natu, la hinau mauri mo vati atu peresi la tamlohi aulu atu mo ngavulu rua mo vati *(24)* la juruvi popovi na lepa atano na nahon Natu Sipsip, enira hatehateahi la tauri na pue tangtangi matematea peresi na puru mata gold la mařivi na hasori,‡ hasori sei

* **5:1:** viriviri pepa: Scroll la vaia tuai na huri nani teni pepa, ale la tau puluna peresi wax mata kandeli. † **5:5:** Lion: Lion enia puskat jala mo tavera jea la suiha. Vaon Israel enia Judah la tovia Lion, Supe David mo tai isan tavitavuin Judah. ‡ **5:8:** hasori: Hinau sohena tobak la sulia mata, ale asuna mo hasori mo ūruhu.

natu, enia usiusi non nona tapuhi.

Psa 141.2

⁹ Ale la lavi na vete paro matea lara,
“Engko hasem ko tataholo vara o lavi
viriviri pepa atu,
o roi na puluna matan la vilimateih,
ale ūaem mo volituhi na tautavui tari, na
leo tari,
ale tamlohi purongo peresi na mara
jara tinatinapua tari vara la mai non
God,
¹⁰ ale ko viōnira la mai na vao matea mata
p̄ris
la tauri na suiha aulu isan noā God,
ale la pa tauri na suiha na varama.”

Exo 19.6; Rev 1.6

¹¹ Ale na kilau vano, na rongo na leo an-
gelo matuvana la toho ūalihi na jara sakele
non supe atu peresi na leon hinau mo vati
atu peresi la tamlohi aulu atu, peresi la
vao tavera hajavua atu, tea i sopo eī evira.

Dan 7.10

¹² Ale la lo verea na leo tavera matea
lara,
“Natu Sipsip la vilimateia,
enia mo tataholo matan vara i lavi na
suiha,
tautav, lelevosahi, ūilangi, oloolo,
hija aulu peresi na hasohaso.”

¹³ Ale na rongo na hinau tari la lo mauri
na tuka, na varama, na lolo varama, ale
na tasi, ale hinau mo isoiso sei la lo toho
hinira, la lalavete isan la tupra rua atu lara,
“Isan haratu sei mo lo sakele na jara sakele
non supe,

peresi Natu Sipsip, la pa avulahi ūuhu,
ale la pa lavi na hasohaso,
peresi na hija aulu,
peresi na suiha tavera tarea mata rani tui
tui tarea!”

¹⁴ La hinau atu mo vati atu la verea lara,
“Amen!” Ale la tamlohi aulu atu la juruvi
popovi na lepa atano, ale la lotu.

6

Mo Roi Na Pulu Viriviri Pepa Atu

¹ Na pa lo kilau na hite Natu Sipsip mo roi
na pulu matea vonan la haratu mo limar-
avrua, ale na rongo vonara matea hin la
hinau mauri mo vati atu mo ulo, ale leona
mo sohena roroa piri mo verea mara, “O
mai!” ² Ale na kilau sahe, e! Hos lulu

Psa

matea. Haratu mo lo sakele hinia mo lavi
na paka matea, ale la silea na ūongoōongo
matea nona supe. Ale tarea enia mo lo
jeu na nona meresahi, ale mo malue vara
i mele jeu tea.

Zec 1.8; 6.3, 6

³ Na hite Natu Sipsip mo roi na harua
pulu, ale na rongo na haruan hinau mauri
atu mo verea mara, “O mai!” ⁴ Ale hos
tinapua matea majhina mo hahara mera
mo malue. Ale haratu mo lo sakele hinia
la majinga vara i lavi nārihi na tamata na
varama matan vara tamlohi la pa vilivilira
na vuro, ale la silea na sita tavera matea
mata valum.

Zec 1.8; 6.2

⁵ Natu Sipsip mara mo roi na hatolu
pulu, na rongo na hatolun la hinau mauri
atu mo verea mara, “O mai!” Ale na kilau
sahe, e! Hos viriha matea. Haratu mo lo
sakele hinia mo lo tauri na skele matea mo
lo keho na limana matea.

Zec 6.2, 6

⁶ Ale na rongo na hinau matea sohena leo
matea mo lo malue na livuhan la hinau
mauri mo vati atu, mo verea mara, “Kilo
wit matea volina i pa tataholo na volvoli
mata rani matea. Ale kilo barley mo tolu
volina i pa tataholo na volvoli mata rani
matea. Pani o sopo komo na wel mata olive
peresi na waen.”

⁷ Ale Natu Sipsip mara mo roi na havati
pulu, na rongo na havatin la hinau mauri
atu mo verea mara, “O mai!” ⁸ Ale na
kilau vano, e! Hos matea majhina mo heja
jorihia. Hijan haratu mo lo sakele hinia
enia Mateia, ale varama mata mateia mo
lo usuria. La sile na suiha isara vara la vil-
imatei na tamlohi matea na tamlohi tupu
vati na varama. La pa vilira sohen har-
ihi: peresi na sita vuro, peresi na marua,
peresi na rojoa sati tinatinapua, ale na
maji jala.

Ezek 14.21

⁹ Ale Natu Sipsip mara mo roi na halima
pulu, na hite na pulo votavota na Temple,
tanumen la haratu sei la vilimateira na
varama mata la lo vereuli na reti non God,
ale mata nora rasua. ¹⁰ La ulo ūilangi na
leo matea lara, “Moli Suiha, engko ko tapu,
engko ko varauhu, pangisa o pa sile na
talai isara, pangisa o pa kele na ūaemam
isan la haratu na varama?”

¹¹ Ale la silera hatehateahi na ruru lulu
matematea, ale la verea isara vara la lo
mapu makomona tako, i vano tikeli na rani

evin la voraira volitusi tinapua peresi na voraira na rasua la mate sohera.

¹² Natu Sipsip mara mo roi na halimare pulu, ale na kilau vano, e! Mihi tavera matea, ale alo mo posi mo viriha ūrōoha, ale vitu mo posi mo hahara sohena ūae.

¹³ Ale vitusarasara na masapa la jovi na varama sohena poroti vua pāhai la jovi na langivili. *Isa*

34.4 ¹⁴ Masapa mo mařari mo tihai sohena la viriviri nařihi na epa matea, ale vutivuti tari peresi na ureure tari la juha la rovo na jarara. *Rev 16.20*

¹⁵ Ale supe mata varama peresi na tamlohi la lo lavi na hija tavera, patu tamlohi mata vuro peresi haratu la tavytav peresi la haratu la suiha, ale tamlohi tari, slev peresi tamlohi materi la luhu na papa peresi na patumalo na vutivuti. *Isa 2.19-21* ¹⁶ La ulo isana vutivuti peresi na patumalo lara, “Ha jovi, ha tatavuhi kamam, ale ha jarohi kamam na nahon haratu mo lo sakele na jara sakele non supe peresi na talai lolokoru mata hehe non Natu Sipsip. *Hos*

10.8 ¹⁷ matan rani tavera atu mata talai lolokoru non God mata hehe peresi non Natu Sipsip mo mai, ale hare natu, i pa eři turu hinia?” *Joel 2.11; Mal 3.2*

La Lotu God Na Tuka

7

144,000 Non God

¹ Hitahun haratu na hite la angelo atu mo vati, la lo turu hin la pulo varama atu mo vati, ale la angelo atu la lo taurilati la langi atu mo vati na varama vara i pa sopo te langi hatea i eři sere na varama teni i sere na tasi teni i sere te vipahai hatea. ² Ale na hite na angelo tinapua matea mo lo vele Opae mo tauri na taipulu non God mauri, ale mo ulo tavera isan la angelo atu mo vati sei la lavi na suiha vara la pa eři komo na varama peresi na tasi, *Jer 49.36;*

Dan 7.2; Zec 6.5 ³ mo verea mara, “Ha sopo komo na varama teni tasi teni te vipahai hatea tako matan ūa sopo lo tau na taipulu na punghori volitusi non nořa God.” *Ezek 9.4, 6*

⁴ Ale na rongo na evin la tamlohi atu la tau na taipulu hinira, mo tikeli 144,000 ale la

tamlohi atu la tai na tavytavui tari matan Israel:

⁵ 12,000 na tavytavui Judah,
12,000 na tavytavui Reuben,
12,000 na tavytavui Gad,
⁶ 12,000 na tavytavui Asher,
12,000 na tavytavui Naphtali,
12,000 na tavytavui Manasseh,
⁷ 12,000 na tavytavui Simeon,
12,000 na tavytavui Levi,
12,000 na tavytavui Issachar,
⁸ 12,000 na tavytavui Zebulun,
12,000 na tavytavui Joseph, peresi
12,000 na tavytavui Benjamin.

Vao Tari Na Varama

⁹ Hitahun haratu na kilau vano, e! Vao tavera matea tea i sopo eři evira, la mara jara tinatinapua tari, tavytavui tari, ale tamlohi purongo tari, peresi na leo tari la lo turu na naho jara sakele non supe, ale na nahon Natu Sipsip. La ruru na ruru lulu peravu, ale la lo tauri na rau viniu na limara, ¹⁰ ale la lo ulo lara,
“Suiha mata juri na tamlohi mo lo toho na liman nořa God,
mo lo sakele na jara sakele non supe peresi Natu Sipsip.”

¹¹ Ale angelo tari sei la lo turu ūalihi na jara sakele non supe peresi la tamlohi aulu tari atu peresi la hinau mauri atu mo vati, enira mo isoiso la juruvi popovi na lepa atano na naho jara sakele non supe, ale la lotu God.

¹² Lara,
“Amen! Avulahi isana,
hasohasona, lelevosahi,
vere meje, oloolo,
suiha peresi na ūilangi,
enira non nořa God
mata rani tui tui tarea! Amen!”

¹³ Ale vonan la tamlohi aulu atu matea mo usia isaku mara, “Ko levosahi la tamlohi nike sei la lo ruru na ruru lulu peravu? Ko levosahia vara la tai epu?”

¹⁴ Na ūaramia nara, “Tapala, mo vono, pani engko ko levosahia!”

Ale mo verea isaku mara, “La haranike natu, la jelu hin pongi ūilangi tavera atu. La hoje na nora ruru peravu na ūaen Natu Sipsip ale mo vaira la lulu. ¹⁵ Ale matana, la eři turu na naho jara sakele nona supe non God vara la lotua tarea na nona Temple, ale haratu mo lo sakele na jara sakele

nona supe enia i pa lo kilaura. ¹⁶ La pa sopo eři marohati teni la mařohu hin te rani, ale alo i pa sopo eři vilira, teni langi tutuni i komora, ¹⁷ matan Natu Sipsip sei na livuha jara mata jara sakele nona supe i pa kilaura, ale i pa tiromara la vano na patu wai sei la sile na mauri, ale God i pa kamoti na waimata na matara.”

8

Mo Roi Na Halimavrua Pulu

¹ Ale moiso Natu Sipsip mo roi na halimavruan la pulu atu, ale mo sopo te vaore na tuka korong mata sope aoa matea. ² Ale na hite la angelo atu mo limaravrua sei la lo turu na nahon God la silera na trumpet matematea.

³ Ale angelo tinapua matea mo lavi na jilivi mata gold matea mata i suli na hasori, mo sinai mo turu na votavota atu. Ale la silea na hasori matuvana matan vara i sohaia peresi na usiusi nona tapuhi tari na votavota sei la vaia na gold na naho jara sakele non supe. ⁴ Ale asu hasori peresi na usiusi nona tapuhi la tai na liman angelo atu, la sahe aulu na nahon God.

⁵ Moiso angelo atu mo sohoni na vara hapu hani mata votavota na jilivi hasori, ale mo pulahia na varama, ale piri mo roroa, vaha mo vilasi, ale mihi matea mo hisu.

Trumpet La Tiv

⁶ Ale la angelo atu mo limaravrua la lo tauri na trumpet la tatamahu vara la tiv la trumpet atu.

⁷ Ale tiroma angelo mo tiv na nona trumpet, ale vatu aes peresi na hapu la hoi peresi na ūae la jovi na varama, ale mo suli na hatolu vipahai tari peresi na hatolu ūuvu ūvu tari na varama.

⁸ Harua angelo mo tiv na nona trumpet, ale hinau matea mo sohena vutivuti tavera mata hapu hani, la pulahia mo sivo na lolo tasi, ale hatolu tasi na varama mo mai ūae, ⁹ hatolu maji tasi tari na varama la mate, ale mo komo na hatolu lanis tari sohena.

¹⁰ Hatolu angelo mo tiv na nona trumpet, ale vitusarasara tavera matea mo jovi na masapa mo hani mo pepe tavera mo jovi na hatolu wai roro tari peresi na hatolu patu wai tari na varama. ¹¹ Ale hijan vitusarasara atu enia Hohona, ale hatolu

wai tari atu la mai la hohona, ale tamlohi matuvana la mate matan wai hohona atu. ¹² Havati angelo mo tiv na nona trumpet, ale hinau matea mo vili nařihi na hatolu mera alo, peresi na hatolu mera vitu peresi na hatolu mera vitusarasara. Alo mo sopo mera na hatolu rani matea, ale vitu peresi na vitusarasara la sopo mera na hatolu vutepongi matea.

¹³ Ale na hite na mala matea mo hasena avu roto na masapa, mo lo ulo mara, “Rani sasati, rani sasati, rani sasati isana tamlohi tari sei la lo toho na varama matan la angelo atu mo tolu la tatamahu vara la tiv na nora trumpet.”

9

¹ Halima angelo mo tiv na nona trumpet, ale na hite na vitusarasara matea matan tuka mo jovi na varama, ale la sile vitusarasara atu na kia mata mataruan koko tavera jea atu sei mo sivo atano jea na lolo varama mata mateia. ² Ale mo roi koko tavera jea atu sei mo sivo atano jea na lolo varama mata mateia, ale asuna mo lo malue sohena asu hapu tavera matea. Alo peresi na masapa la ūroha na asun koko atu. ³ Ale hatpoha la malue na asun koko atu la tatayu na varama. La silera na suiha mo tataholo na suiha novu lepa.

⁴ La verea isan la hatpoha atu vara la pa sopo komo na ūuvu teni te hinau mo lo ulua teni te vipahai hatea, pani vara la pa komo la tamlohi atu purongo sei la sopo lavi na matamata non God na pungorira. ⁵ La majinga na hatpoha vara la vailejilejira mata vitu i lima, pani la horora vara la sopo vilimateira, ale epe varihaji la silea mo sohena novu lepa mo hatira. ⁶ Hin la rani atu tamlohi la pa opoi na mate, pani la pa sopo eři mate. La pa ūomtau mata mate, pani mateia i pa rovo hinira.

⁷ La hatpoha atu la sohena hos la tatamahu mata vuro. Na patura la tau na hinau sohena ūongořongo mata gold nona supe, ale la lavi na naho tamlohi, ⁸ vulura mo peravu sohena vulu hařai, ale huřura la sohena huřu lion. ⁹ Na ūumara la ruru na ruru vuro la vaira na aen. Rum hapara mo sohena ūum palo takonahi hos la lo reve na kartira la maro na vuro. ¹⁰ Viřira la sohena viři novu lepa, ale suiha varihaji

matana, i pa tikeli na vitu i lima. ¹¹ Nora supe enia pa angelo atu sei mo lo aulu hin koko tavera jea atu sei mo sivo atano jea na lolo varama mata mateia, hijana na leon tautauin Israel enia ‘Abaddon’, ale na leo mara Greek enia ‘Apollyon’.*

¹² Ale tiroma rani sasati mo masese moiso, pani ka hitea, rani sasati mo rua la lo ususurira la lo mai.

¹³ Halimarave angelo mo tiv na nona trumpet, ale na rongo na leo matea mo malue hin la pala atu mo vati na pingotavota atu la vaia na gold sei mo lo turu na nahon God, ¹⁴ leo atu mo verea isan angelo atu mo lo tauri na trumpet mara, “O uli nařihi la angelo atu mo vati sei la pesilatira na pahisa wai roro tavera Euphrates.” ¹⁵ Ale la tatamahuni la angelo sei mo vati moiso matan aoa akerihi, rani akerihi, vitu akerihi peresi tauni akerihi vara la pa uli nařihira matan vara la pa vilimatei na hatolu tamlohi tari na varama. ¹⁶ Na rongoa vara evin la tamlohi vuro atu la lo sakele na hos mo tikeli 200,000,000.

¹⁷ Na hinau sei God mo vujangiau hinia, na hite la tamlohi atu la lo maro na hos la ruru na ruru vuro mata ūumara, mahira mo hahara mera, ale mo heja tasi, ale mo joriha. Patu hos la sohena patu lion, hapu peresi asu hapu peresi na vatu tutuni mata volkeno la lo malue na jingora. ¹⁸ Ale hatolu tamlohi tari na varama la pa mate matan rongohaji sasati mo tolu sei, ale hapu atu peresi na asu hapu peresi na vatu tutuni mata volkeno mo lo malue na jingora. ¹⁹ Matan suihan la hos atu mo lo toho na jingora peresi na viřira matan viřira la sohena mata, ale patura la sile na epe varihaji.

²⁰ Vao tamlohi na varama la sopo mate hin la rongohaji sasati atu, pani la sopo posa na nora vavahinau, ale la sopo isoiso na nora lotu mata tanume sasati peresi na tamasi sei la vaira na gold, silver, bronze, vatu teni laho pahai atu la sopo eři kilau, teni tea i rorongo teni i hahau. ²¹ La sopo isoiso na nora vilimatei na tamlohi, na nora sui, na nora mauri maji peresi na nora vavanaho.

10

Angelo Atu Peresi Na Viriviri Pepa Rihirihi

¹ Ale na mele hite na angelo suiha tina-pua matea mo lo sevuti na tuka. Telangi matea mo leputia, ale nuenue matea mo lo toho aulu na patuna. Nahona mo sohena alo, ale palona mo sohena peri hapu mo lo hani, ² ale na limana mo lo tauri na viriviri pepa rihirihi matea sei mo roi moiso. Mo lo turu atu, ale matua palona na tasi, ale marau palona na lepa, ³ ale mo ulo na leo matea ūumuna mo puhoni sohena ulo lion, ale na rani mo ulo na rongo la piri atu mo limaravrua la roroa na leora.

⁴ Piri atu mo limaravrua la roroa, ale na pa lo tatamahu vara a uli na sava la verea, pani leo matea mo tai na tuka mo ulo mara, “O sopo uli na hinau la verea! O jarohira vara tea i pa sopo levosahia.”

⁵ Ale angelo atu na hitea mo lo turu na tasi peresi na lepa mo tahe na matua limana na tuka, ⁶ Ale mo vai na retitauhi matea na hijan God atu mo mauri mata rani tui tui sei mo vai na tuka peresi na varama peresi na tasi peresi na hinau tari la mauri. Angelo atu mo verea vara God i pa sopo mele sasaovi, ⁷ ale sava God mo verea moiso isan la nona volitusi sei la p̄ovet mata nona hina luju tavera, mo vara nakerihi hinau tari la pa masese hin rani atu vara halimaravruan la angelo atu i tiv na nona trumpet.

⁸ Ale leo atu mo tai na tuka mo mele retireti isaku mara, “O vano o lavi viriviri pepa atu mo vuhesi moiso na liman angelo atu mo lo turu na tasi peresi na lepa!”

⁹ Ale na vano isan angelo atu na usia vara i sileau hin viriviri pepa rihirihi atu. Ale angelo atu mo verea mara, “O lavi viriviri pepa atu o hania! I pa vai na pangem i nini, pani na jingom i pa memeje sohena wai sugabag.” ¹⁰ Ale na lavi viriviri pepa rihirihi atu na liman angelo atu, ale na hania. Memejina mo sohena wai sugabag, pani na pangeku mo nini.

¹¹ Hitahu la verea isaku lara, “O pa mele vere na hinau la pa masese isana tamlohi purongo matuvana peresi na mara jara

* ^{9:11:} Abaddon: Raramin hija sei Abaddon enia ‘Haratu mata komokomo’.

tinatinapua matuvana peresi na leo matuvana, ale peresi na supe matuvana.”

11

Tuetueni Mo Rua

¹ Hitahun haratu la sileau na vipahai ava matea, ale la verea lara, “O turu o ava ūalihi na Temple non God, ale o sopo ūromalihi na votavota peresi na evi tamlohi la lo lotu ea. ² Pani o sopo ava na jara mo ūalihi hin rope atu na jingoima Temple matan God mo majinga vara i pa toho na lima vao tamlohi jara tinapua tari atu na varama sei la sopo noku tamlohi vara la pa varasi taon tavera tapu atu Jerusalem, i tikeli te vitu i ngavulu vati i rua. ³ A pa sile na suiha isan la noku tuetueni nike mo rua sei la ruru na ruru mata ūromsati sei mo sohena paki niu, vara la pa retimangovi mata rani i tari vahatea i ngav sangavulu rua i ngavulu limarave **(1,260).**”

⁴ La tupra rua nike, enira pulo olive mo rua peresi na peri lamu mo rua la vaira na gold sei la lo turu na nahon Moli God non varama. ⁵ Ale tea vara i vaihitea vara i komora, hapu i pa malue na jingora i pa komo na nora meresahi. Ale vara tea mo opoia vara i komora, enia i pa mate. ⁶ Hin rani atu vara la lo retimangovi, la lavi na suiha vara na sava rani la opoia, la pa horo na masapa matan i sopo sile na usa i jovi, ale la eři posa na wai tavera la mai ūrae, ale la pa eři vili na tamlohi na varama na rongohaji tavera tinatinapu.

⁷ Hin rani atu vara la tamlohi tuetueni tupra rua atu la isoiso na nora vereulia, maji jala sasati atu i pa malue hin koko tavera jea atu sei mo sivo atano jea na lolo varama mata mateia vara i valum peresira, ale i pa jeura i vilimateira.

⁸ Tarapera la plahau hinira na malelen taon tavera atu sei tuai la vosae nora Moli na talopeilopei hinia. Taon tavera atu ūramina mo sohen taon sati atu Sodom teni jara tavera atu Egypt.

⁹ Ale ko hitea, mata rani mo tolu peresi na sope rani matea, tatua tamlohi purongo, tautavui tamlohi, leo tari, ale mara jara tinatinapua la pa lo varoi na tarapen la tamlohi tuetueni tupra rua atu. La pa sopo majinga vara la taura na taptap, ¹⁰ ale tamlohi tari na varama la pa vai na

hanhani tavera, ale la pa avulahi moiso la pa silesilera na otori mata sava mo masese isan la tamlohi tuetueni atu mo rua matan la lo sile na rani ūilangi isan la haratu na varama. ¹¹ Pani rani mo tolu sopena matea mo vano moiso, ale God mo mongovira, ale la mele mauri. La mele turu moiso tamlohi sei la hitera la matahu tavera matara.

¹² Ale la tamlohi tuetueni atu mo rua la rongo na leo tavera matea mo tai na tuka mo verea mara, “Ha mai nike!” Ale nora meresahi la hitera la sahe aulu na tuka na telangi matea. ¹³ Vahatea mihi tavera matea mo komo na sopen taon tavera atu matea hin la haratu mo sangavulu. Evi tamlohi la mate hin mihi tavera atu mo tikeli tari vaha limaravrua **(7,000).** Ale sope vaon taon atu la pa lo mauri, la sile na hasohaso isan God haratu mo aulu na tuka. ¹⁴ Harua rani sasati atu mo masese moiso! Pani ka hitea, hatolu rani sasati mo lo mai vilavila.

Halimaravruan La Trumpet Atu

¹⁵ Halimaravruan la angelo atu mo tiv na nona trumpet, leo tavera hai la retireti na tuka lara, “Suiha mata aulu hin varama nike, nake i pa vano na liman nořa God peresi nona Křisto, ale i pa tauri na suiha mata rani tui tui tarea.”

¹⁶ Ale la tamlohi aulu atu mo ngavulu rua mo vati **(24)** sei la lo sakele na nora jara sakele nona supe na nahon God, la juruvi popovi na lepa atano, ale la lotu God, ¹⁷ lara,

“Moli God engko suiha aulu atu mo tavera jea,

ko lo toho nake, ale ko toho tuai moiso. Kama vere meje isam matan

ko tapulo vara o vavahinau na nom
suiha tavera
vara o aulu na hinau tari.

¹⁸ Mara jara tinatinapua tari na varama la lolokoru,
pani nom talai lolokoru mata hehe mo mai,

ale nake rani mo mai vara o sile na nom
aria isan la haratu la mate,

ale nake rani mo mai vara o sile na
otori isana nom volitusi,

haratu la p̄rovet peresi na tapuhi,

ale isan la haratu la lo oloolo na hijam,
la haratu la tamlohi purongo,

peresi la haratu la tamlohi aulu jea,

ale rani mo mai vara o komo la haratu la lo
komo na varama.”

19 Ale Temple non God aulu na tuka mo roi, ale o eři hite na puhoro mata nona retitauihi mo lo toho na lolo nona Temple, ale vaha mo vilasi, piri mo rorhoa, ale mihi tavera mo hisu, ale ūrōrō batu aes tavera la jovi.

12

Hařai Matea Peresi Na Dragon

¹ Ale matamata mařurahi tavera matea mo pala na tuka: enia hařai matea mo ruru na alo sohena ruruna, ale vitu mo lo toho na ruhuruhu palona, ale vitusarasara mo sangavulu ţomana mo rua la vai na ţongořongo nona supe matea na patuna,
² mo pangepange, ale mo tangi aulu mata rongohaji tavera, mo lo tangi matan mo tatamahu vara i lavilavi.

³ Ale matamata tinapua matea mo pala na tuka, e! Dragon hahara tavera matea. Patuna mo limaravrua la lavi na ūrongo ūrongo matematea, ale palana mo sangavulu. ⁴ Ale viřina mo haro na hatolu vitusarasara tari na tuka mo pulahira la sivo na varama. Moiso dragon atu mo turu na nahon hařai atu mo tatamahu vara i ūrolomi na natuna vara hařai atu i lavilavi.

⁵ Hařai atu mo vasusui na natirihi lamane matea sei enia i pa aulu na mara jara tinatinapua tari na varama, ale i pa tamajira na maja aen matea. La reve narihi natirihi lamane atu mo sahe isan God, ale mo sakele na nona jara sakele nona supe. ⁶ Ale hařai atu mo rovo mo vano na jara hasetoho matea sei God mo tatamahunia matana moiso. Ale la pa kilaua atu mata rani i tari vahatea i ngav sangavulu rua i ngavulu limarave (**1,260**).

Vuro Na Tuka

⁷ Hitahun haratu vuro mo tapulo na tuka, ale Michael patu angelo peresi na nona angelo la valum peresi dragon atu tolu na nona angelo, ale dragon atu peresi na nona angelo la vai na vuro peresi Michael, ⁸ pani enira la jeu na dragon peresi na nona angelo hin vuro atu, ale la titiura na tuka, ⁹ Ale dragon tavera atu, enia mata sasati atu tuai, haratu la tovia Tiapolo teni Setan, tarea enia mo lo halu na

tamlohi tari na varama, la pulahia peresi na nona angelo la sivo na varama.

10 Ale na rongo na leo tavera matea na tuka mo verea mara, "Nake rani mo mai moiso vara vavahinau mata juri non nořa God la masese, nake i pa turu na nona řilangi peresi na nona suiha mata supe, nake rani vara Křisto i tauri na nona suiha, enia sei God mo viřonia vara enia i pa Jujuri. Ale matana, mo pulahi nařihi mere-sahi atu vara i sivo na varama, enia haratu mo le tuvai na vorařa na nabon God tarca,

mo lo tuval na voraira na hanon God tareá.
11 Ale la jeu Setan mata ūaen Natu Sipsip ale mata nora vereulia na retivararūhu matan la tatamahu vara la mate mata nora rasua. **12** Matana, tuka aulu ha pa avulahi peresi la haratu la lo toho atu, pani varama peresi na tasi ha ūomsati matan la pulahi Tiapolo mo sivo isamim, ale mo lolokoru patuna matan mo levosahia vara nona rani mo vejuveju.”

¹³ Na rani dragon atu mo hitevosahia
vara la titiu mo sivo na varama, mo le-
vuti pa hařai atu sei mo lo vasusui natuna
lamane atu. ¹⁴ Pani la sile na hapa mala
tavera mo rua isana vara i avu i rovo i
vano hin jara atu God mo tatamahunia
matana, vara la pa kilaua hin jara hase-
toho atu. Dragon i pa sopo eři komoa hin
jara atu mata tauni i tolū peresi na sope
tauni matea.

¹⁵ Ale dragon atu mo sosoro na wai sohena wai roro matea, mo malue na jingona mo usuri hařai atu, ale mo vaihitea vara i tivesi nařihia hin wai tatave atu, ¹⁶ pani lepa mo tuenia, lepa mo roi, ale mo ţolomi wai tatave atu sei mo lo malue na jingon dragon atu. ¹⁷ Ale dragon atu mo lolokoru sasati hin hařai atu. Ale mo malue mo vano vara i vai na vuro peresi te natun hařai atu tinapua. Enira la tamlohi atu sei la lo ololo na retileu non God, ale la lo usuri na vereulia sei Iesu mo vujangia isara. ¹⁸ Moiso dragon atu mo turu na pahisa tasi na oneone.

13

Maji Jala Sasati Mo Rua La Mai

¹ Ale na kilau vano na hite na maji jala sasati matea mo lo malue na tasi. Palana mo sangavulu, ale patuna mo limaravrua. Ale ūrongo nona supe mo sangavulu

la lo toho na palana matematea. Ale la uli na hija hai na patuna hatehateahi, enira mo isoiso la lo kali God. ² Maji jala sasati atu na hitea mo lavi na epe leopard, palona mo sohena palo bear, ale jingona mo sohena jingo lion. Dragon atu mo silea na nona ūilangi peresi na nona jara sakele nona supe vara i tauri na nona suiha tava. ³ Sola matea mata mate mo lo toho na patuna matea, mo sohena vara i pa mate matana, pani mo mele mavo, ale tamlohi tari na varama la usuria matan la mařurahi hin maji jala sasati atu, ⁴ ale la lotu dragon atu sei mo lo sile na nona suiha isan maji jala sasati atu, ale la lotu maji jala sasati atu lara, "Mo sopo tea i sohena maji jala sasati nike! Tea i pa sopo eři valum peresia!" ⁵ God mo majinga vara maji jala sasati atu i retihapahapa, ale i kalia moiso mo silea na vitu mo ngavulu vati mo rua (**42**) matan vara i vaihite na suihana. ⁶ Maji jala sasati atu mo kali God, ale mo kali na hijan God, ale mo kali jara atu God mo lo toho ea peresi na tamlohi sei la lo toho atu peresia na tuka. ⁷ Ale God mo majinga vara i vai na vuro peresi na nona tapuhi, ale vara i jeura. God mo silea na suiha vara i aulu na tautavui tari, tamlohi purongo, leo tari peresi na mara jara tinatinapua tari, ⁸ ale la haratu la lo toho na varama la pa lotu maji jala sasati atu, enira mo isoiso hijara la sopo ulira na Puku mata Mauri sei la ulia tuai tiroma na vavahinau mata varama.

⁹ Haratu mo lo rongo, i tapurongo!

¹⁰ Vara engko mata la pa taurilatiho,

la pa taurilatiho,

vara engko mata la pa vilimateiho na sita vuro,

la pa vilimateiho na sita vuro.

Raramina mo sohen harihi: tapuhi non God la pa tatamahu mata turu ūilangi na ūromřomi matea na nora hahau mata rasua.

¹¹ Ale na mele hite na maji jala sasati tinapua matea mo malue na lepa. Palana mo rua mo sohena natu sipsip, ale mo retireti sohena dragon. ¹² Mo lavi na suihana maji jala sasati atu tiroma sei solana mo mavo moiso. Ale mo vai na varama peresi na tamlohi hinia la lotu maji jala

sasati atu tiroma. ¹³ Ale mo vai na hina mařurahi tatavera tinatinapua, sohen mo vai na hapu mo tai na masapa mo sinai na varama na naho tamlohi, ¹⁴ ale hin la hinau mařurahi atu God mo majinga hinira vara i vaira na nahon maji jala sasati tiroma atu, mo halu na tamlohi tari la lo toho na varama, ale mo verea mara la vai na tamasin maji jala sasati atu tiroma sei la vilia na sita vuro, pani mo pa lo mauri, ¹⁵ ale God mo majinga vara harua maji jala sasati atu i mangovi tamasi atu vara i mauri matan vara i eři retireti, ale matan vara tamasin maji jala sasati atu i pa vilimatei la haratu la sopo lotu tamasin maji jala sasati atu, ¹⁶ ale enia mo sile na retileu matea vara tamlohi tari la pa lavi na taipulu na matua limara teni na pungorira. Hina purongo vara la aulu, teni la tamlohi purongo, teni la tautav, teni la tilavono, teni la tamlohi materi, teni la slev, ¹⁷ matan vara tea i sopo lavi taipulu atu, enia i sopo eři volvoli teni i hařehi te hinau hatea. Taipulu atu ūaramina enia hijan maji jala sasati atu peresi na evi hijana.

¹⁸ Hinau nike, mo opoi na lelevosahi. Vara ko opoa vara o levosahi na evin maji jala sasati atu, enia evi hija tamlohi matea, ale evina enia 666.

14

Natu Sipsip Peresi Na Vaona 144,000

¹ Ale na kilau vano, e! Natu Sipsip mo lo turu na vutin Zion,* ale tamlohi mo 144,000 la lo turu peresia. Hijana peresi na hijan Tamana la ulia na pungorira. ² Ale na rongo na vaore matea na tuka, mo sohena ūrum tasi tava, ale mo sohena roroa piri tava. Leo atu na lo rongoa mo sohena leo pue tangtangi sei tamlohi mata roro na pue tangtangi la lo roro hinira, ³ la lo lalavete na vete paro matea na naho jara sakele nona supe non God peresi la hinau mauri mo vati atu peresi la tamlohi aulu atu. Tea i sopo eři lelevosahi vete atu, pani la tamlohi atu purongo evira 144,000 sei God mo volituhura na varama. ⁴ Enira mo isoiso la lamane, la sopo lo juruvi peresi te hřai hin te rani, ale vara Natu Sipsip mo haipu, la lo usuria. God mo volituhura na

* **14:1:** Zion: Zion enia Jerusalem.

varama matan vara la mai sohena asitauni mata varama isan God enia Natu Sipsip.
⁵ Enira la sopo eři halu, ale la vokevoke.

Retisohai Nona Angelo Tupu Tolu

⁶ Hitahun haratu na hite na angelo tinapua matea mo lo avu aulu na livuha masapa. Mo lo lavi na Retiruhu matan tui tui matan vara i verea isana mara jara tinatinapua tari, tavavui tari, leo tari, ale tamlohi purongo tari la lo toho na varama,
⁷ angelo atu mo ulo mara, "Ha sile na oolo isan God, ale ha tahe na hijana aulu, matan rani mo maseise moiso matan vara i ari na tamlohi. Ha lotua matan enia haratu sei mo vai na tuka peresi na varama peresi na tasi peresi na patu wai."

⁸ Harua angelo mo usuria mo ulo mara, "Babylon mo tavera mo jovi, mo jovi. Mo reve na mara jara tinatinapua tarila inu na waen nona mauri maji tinatinapua."

⁹ Hatolu angelo mo lo usuri la haratu mo rua tiroma mo pala mo ulo mara, "Hinau nike natu, i pa pala isamim vara tea i lotu maji jala sasati atu teni tamasina teni i lavi na nona taipulu na limana teni na pungorina,
¹⁰ ale enia sohena i pa inu waen atu mata talai lolokoru non God mata hehe sei mo sureia na nona paniken mata nona lolokoru, ale i pa rongohaji na hapu peresi na vatu tutuni mata volkeno, pani i pa sopo eři mate. La pa vaia na naho angelo tapu peresi Natu Sipsip. ¹¹ Ale vara tea i lotu maji jala sasati atu peresi na tamasina teni i lavi na nona taipulu mata hijana, ale i pa sopo eři isoiso na nona rongohaji na hapu mata rani tui tui."

¹² Haranike enia reti matea mo vano isana tamlohi viřoni non God vara la turu řilangi, la haratu la lo taurilati na retileu non God peresi na nora rasua hin Iesu.

¹³ Ale na rongo na leo matea na tuka mo vere mara, "O uli harihi: mo tapulo nake, avulahi tavera isan la haratu non Moli la pa mate."

Ale Tanume Tapu mo řaramia mara, "Enjora! Avulahi řuhu isara matan la pa mapu na nora vavahinau la lo kalvono hinira, ale vua nora vavahinau řuhu la pa lavia hitahu."

Angelo Atu Mo Lo Sakele Na Telangi

¹⁴ Ale na kilau sahe, e! Telangi lulu matea. Na hite matea mo lo sakele hinia sohen Natun Tamlohi. Rongořongo matea la vaia na gold mo lo toho na patuna, ale mo lo tauri na sita kole voro matea na limana. ¹⁵ Ale angelo tinapua matea mo malue na Temple mo ulo isan haratu mo lo sakele na telangi mara, "O tapulo taitai na nom sita kole. Rani mata lavi na asitauni na varama la mena." ¹⁶ Moiso haratu mo lo sakele na telangi mo vuřahi na nona sita kole, ale mo lavi na asitauni na varama.

¹⁷ Hitahun haratu angelo tinapua matea mo malue na Temple, ale enia sohena mo lo tauri na sita kole voro matea. ¹⁸ Ale angelo tinapua matea mo malue na jara votavota enia mo lo kilau na hapuna, ale mo ulo na leo tavera matea mo vano isan angelo atu mo lo tauri na sita kole voro mara, "Vua grape tari na varama la mena! O vuvu na vurungina na nom sita kole voro." ¹⁹ Ale angelo atu mo vuřahi na nona sita kole na varama, ale mo vu na vua grape mo pulahira la sivo na koko varavarasi mata talai lolokoru non God mata hehe. ²⁰ Ale la varasihira na koko varavarasi sei mo lo toho na jingoiman taon tavera, ale ţaera la roro la malue hin koko varavarasi atu mo vano mo tikeli 296 kilometre asau hinia, ale puahana mariviti vara i lovi te hos.

15

Isoiso Talai Tavera La Lo Mai

¹ Hitahun haratu na kilau sahe na tuka, na mele hite na matamata tinapua matea, enia hina mařurahi tavera matea, ale angelo mo limaravrua la lo lavi la isoiso rongohaji sasati tavera atu mo limaravrua, ale enira mo isoiso talai lolokoru non God mata hehe.

² Ale na hite na hinau matea mo sohena tasi mata glas mo hoi peresi na hapu, ale la tamlohi atu sei la jeu na suihan maji jala sasati atu peresi na tamasina peresi na evi hijana, la lo turu na pahisan tasi mata glas atu. La lo tauri na pue tangtangi non God,
³ ale la lo lalavete na vete non Moses volitusi non God peresi na vete non Natu Sipsip lara,

"Moli God engko suiha aulu atu mo tavera jea,
nom vavahinau la tavera jea,

ale la ūruhu jea,
 nom vavahinai la tataholo,
 ale la varauhu,
 engko ko Supe nona vao tamlohi jara
 tinatinapua tari na varama!
⁴ Moli, hare natu, i sopo eři sile na oolo
 tavera isam,
 teni i tahe na hijam aulu?
 Matan engko hasem ko tapu,
 ale mara jara tinatinapua tari
 la pa mai la pa lotuho
 matan ko vujangi nom aria sei,
 mo tataholo mo ūruhu."

⁵ Hitahun haratu, na mele kilau, ale na hite na jara tapu na lolo Temple na tuka mo roi. ⁶ Ale na hite na angelo mo limaravrua sei la lo tauri na jilivi talai mata rongohaji sasati atu mo limaravrua la malue na lolo Temple. La ru na ruru lulu peravu, la eve na ūrumara na oti la vaia na gold. ⁷ Ale vonan pa la hinau mauri atu matea mo sile na jilivi talai mo limaravrua la vaira na gold matematea isan la angelo atu mo limaravrua, jilivi talai atu la lavi na talai lolokoru non God mata hehe sei mo mauri mata rani tui tui, ⁸ ale Temple mo mařivi na asu memeran God mata suihana, ale tea i sopo eři unu na Temple vavano la hinau rongohaji sasati tavera sei la angelo atu mo limaravrua la lo lavira, la pa vaira i isoiso.

16

Jilivi Talai Mata Lolokoru Tavera Non God

¹ Hitahun haratu na rongo na leo tavera matea mo malue na Temple mo verea isan la angelo atu mo limaravrua mara, "Ha vano ha surei la jilivi talai mata talai lolokoru non God mata hehe atu mo limaravrua na varama!"

² Ale tiroma angelo mo vano mo surei na nona jilivi na varama, vahatea vosavosa ūranga la pala isan la tamlohi atu sei la lavi na taipulu non maji jala sasati atu peresi la haratu la lo lotu na tamasina.

³ Harua angelo mo surei na nona jilivi na tasi, vahatea tasi mo posi mo mai sohena ūrae tarape moiso hinau tari na lolo tasi la mate mātana.

⁴ Hatolu angelo mo surei na nona jilivi na wai roro peresi na patu wai moiso la mai ūrae.

⁵ Ale na rongo angelo atu sei wai la lo toho na ruhuruhu suihana, mo verea isan God mara, "God, talai ko silea mo tataholo, matan engko hasem ko tapu, ko lo toho nake, ale ko lo toho tuai moiso. ⁶ Mo tataholo vara tamlohi la inu ūrae sei ko silera hinia matan la vili na tapuhi non God peresi na nom p̄ovet matan ūraera la roro na varama."

⁷ Ale na rongo na leo matea mo tai na votavota mara, "Io, Moli God engko suiha aulu atu mo tavera jea, nom talai tari la vokevole, ale la varauhu."

⁸ Ale havati angelo mo surei na nona jilivi na alo, ale alo mo tapulo suli na tamlohi na hapuna. ⁹ Tamlohi tari tutuni alo mo sulira, ale la kali na hijan God matan mo lo vai la rongohaji sasati tavera sei, pani tea mo sopo pos i vano isan God teni i silea na oolo.

¹⁰ Halima angelo mo surei na nona jilivi na jara sakele nona supe non maji jala sasati atu, vahatea ūroha mo tavuni jara atu mo lo tauri na suihinia, ale nona tamlohi la tapulo hatihati na memera matan la lo rongohaji. ¹¹ Ale matan la lo rongohaji tavera peresi la nora vosavosa ūranga atu la hajira, la kali God na tuka, pani la ūruhu vara la posi na nora hehe.

¹² Halimarave angelo mo surei na nona jilivi hin wai tavera atu Euphrates, ale wai atu mo mamasa matan vara la supe atu la tai Opae, la eři hahau rotoa. ¹³ Ale na hite na tanume sasati mo tolu la sohena puroko, matea mo malue na jingon dragon atu, matea na jingon maji jala sasati atu, ale matea isan nona p̄ovet haluhalu. ¹⁴ Matan la tanume sasati atu la lavi na suihinia matan vara la vai na hinau mařurahi, ale la vano isana supe tari na varama vara la takonahira matan vara la pa vai na vuro peresi God, enia suihin aulu atu mo tavera jea na nona rani tavera.

¹⁵ Ale Moli mara, "Ha levosahia! A pa mai sohena tamlohi vavanaho matea, avulahi tavera isan haratu mo sopo juruvi, pani mo lo kilau moiso mo tatamahu na nona ruru matan vara i vono i pa hahau ūralihi i malamala, ale i mahanuhanu matana."

16 Ale la tanume sasati atu la takonahira na jara matea la lo tovia Armageddon na leon tavitavui Israel.

17 Ale halimaravruan la angelo atu mo surei na nona jilivi na masapa, ale leo tavera matea mo tai na jara sakele nona supe aulu na lolo Temple mara, "Mo isoiso!" **18** Moiso piri mo roroa, ale vaha mo vilasi, ale mihi tavera matea mo sopo lo tea i sohena na varama i jeu haratu, matan enia mo tavera jea. **19** Mihi atu mo vuhan na taon tavera matan Babylon tavaluna mo tolu, ale mo sohena isana taon tavera tari nona mara jara tinatinapua tari la jovi. God mo mele ūromūromi na hehe tari non Babylon taon tavera atu, ale mo vaia mo inu vevuhi na waen mata nona lolokoru sasati na nona talai lolokoru mata hehe sei mo mařivi hin paniken atu. **20** Ale ureure tari la tihai, ale vutivuti tari la tihai. **21** Vatu aes tatavera na tuka la jojovi sivo isana tamlohi, puhonira matematea la tikeli na kilo mo ngavulu vati **(40)**. Pani tamlohi la kali God matan rongohaji sasati atu mo tavera jea.

17

Hařai Malele Peresi Pa Maji Jala Sasati Atu

1 Ale vonan la angelo atu matea hin la haratu mo limaravrua sei la lo tauri na nora jilivi, mo mai isaku mara, "O mai, a pa vujangihio na talai non hařai malele atu sei mo lo sakele na wai matuvana, **2** ale supe mata varama la vai na mauri maji peresia, ale tamlohi na varama la drong na nona mauri maji tinatinapua." **3** Ale angelo atu mo layiau na vano na suiha Tanume Tapu na jara hasetoho matea. Hin jara atu na hite na hařai matea mo lo sakele na maji jala sasati hahara ūrořoha matea, ale maji jala sasati atu mo lavi na hija matuvana na epena la lo kali God, ale na hite na patuna mo limaravrua, ale palana mo sangavulu. **4** Hařai atu mo ruru na ruru peravu majhina mo perpel, ale mo hahara ūrořoha, ale mo ruru na gold peresi na vatu vilasi ūruřuhu peresi na huřutavila. Na limana mo lo tauri na paniken waen matea la vaia na gold mo mařivi na nona posposi lumiha peresi na nona posposi viriu. **5** La

uli na hija matea na pungorina ūramina mo vara:

Enau Taon Tavera Matan Babylon Tina Ha Rai Malele Peresi Na Posposi Lumiha Mata Varama

6 Ale na hite hařai sati atu mo drong na ūrae tapuhi non God peresi na ūrae tuetueni non Iesu. Na hitea na mařurahi tavera hinia.

7 Pani angelo atu mo vereau hinia mara, "Ko mařurahi mata sava? A pa vereulihon na ūramin hařai nike peresi maji jala sasati atu mo lo sakele hinia sei patuna mo limaravrua, ale palana mo sangavulu.

8 Maji jala sasati atu ko lo hitea mo lo toho, pani nake mo tihai, ale i sopo tuai i pa malue hin koko tavera jea atu sei mo sivo atano jea na lolo varama mata mateia i mai, ale i pa vano na nona komo. Ale tamlohi tari na varama sei God mo sopo uli na hijara na Puku mata Mauri tiroma moiso mo pa tapulo vai na varama, la haratu natu, la pa mařurahi tavera hin maji jala sasati atu matan mo lo toho tiroma moiso, ale mo tihai, ale i pa mele pala.

9 Ale tea vara i tamlohi lelevosahi, i pa lelevosahi hinau nike. La patuna sei mo limaravrua enira vutivuti atu mo limaravrua sei hařai atu mo lo sakele hinira. La vutivuti atu la ūrami na supe mo limaravrua. **10** Supe mo lima hin la haratu la jovi moiso, ale matea mo lo toho nake, ale matea mo sopo lo mai, ale i pa mai, pani God i pa majinga hinia mata makomo rani purongo. **11** Ale maji jala sasati atu sei mo lo toho tiroma moiso, pani nake mo tihai, enia i pa halimaravtolura, pani enia vonan la haratu mo limaravrua atu, ale enia i pa vano na nona komo. **12** Ale la palana atu mo sangavulu ko lo hitera enira supe mo sangavulu sei la sopo lo lavi na suiha, pani la pa tauri na suiha sohena supe peresi maji jala sasati atu mata makomo rani purongo. **13** La supe atu ūromira mo matea, ale la sile na nora suiha isan maji jala sasati atu vara i tauri na suiha. **14** La pa vaila na vuro peresi Natu Sipsip, pani Natu Sipsip i pa jeura matan enia Moli nona Moli, ale Supe nona Supe, ale la haratu la lo toho peresia, enia mo tovira, ale mo viřonira, ale ūromira la ūromturu ūrlangi."

¹⁵ Ale angelo atu mo verea isaku mara, "Wai matuvana atu ko lo hitera sei hařai malele atu mo lo sakele hinira, enira tamlohi purongo peresi na vao matuvana, peresi na mara jara tinatinapua peresi na leo tinatinapua. ¹⁶ Ale la palana mo sangavulu atu ko lo hitera peresi maji jala sasati atu, la pa ūahu hin hařai malele atu, ale la pa komoa, ale la pa vaia i malamala, ale la pa hania moiso la pa sulia na hapu. ¹⁷ Matan God mo taua na mapura vara la vai na masalona vara la mai matea na ūomira, ale la pa sile na nora suiha isan maji jala sasati atu vara i tauri na suiha, vavano reti non God la masese.

¹⁸ Ale hařai atu ko lo hitea, enia taon tavera sei suihana mo aulu na supe tari na varama."

18

Babylon Mo Jovi

¹ Hitahun harihi, na mele hite na angelo tinapua matea mo lo sevuti na tuka. Enia mo lavi na suiha tavera jea, ale sasaramina mo vai na varama mo mera, ² ale enia mo ulo na leo tavera matea mara, "Babylon tavera, mo jovi, mo jovi! Enia mo mai jara luhu nona tanume sasati, jara luhu nona tanume lumiha tari, tau maji avuavu lumiha tari, ale jara luhu nona maji jala sasati sei la lumiha, tamlohi la nukehira. ³ Matan mara jara tinatinapua la inu na waen mata opoia ūilangi mata nona mauri maji, supe tari na varama la vai na hehe peresia, ale tamlohi ařeařehi, la tavytav mata nona mauri maji."

⁴ Ale na mele rongo na leo tinapua matea mo tai na tuka mara, "Noku tamlohi, ha rovo hinia! Ha sopo pulutahi peresia na nona hehe matan vara ha pa sopo lavi nona ūongohaji sasati peresia, ⁵ matan nona hehe la takonahia mo sahe vara la tikeli na tuka, ale God mo tatamahu vara i aria mata nona hehe. ⁶ O vaia isana sohen haratu mo vaia isana nom tamlohi. O mele kelea aulu vaha rua hin haratu mo silea isara. O vaia i inu na mana wai mata ūongohaji i vaha rua hin haratu mo lo silea isara. ⁷ Hařai atu mo ūomaulu hinia hasena na nona hina tavytav matuvana, ale o vailejilejia, o vai na ūomina i sati matan enia mo verea mara, 'Na sakele sohena

vesupe matea, enau a pa sopo malepu hin te rani teni a pa ūomsati'. ⁸ Matan hinau atu nona ūongohaji sasati la pa mai isana na rani matelete purongo, mateia, ūomsati, ale marua, hapu i pa komo na tarapena, matan Moli God suiha, enia haratu mo aria."

⁹ Ale supe mata varama sei la vai na mauri maji peresia, ale la lavi na tavytav matana, la pa tangisia hin rani atu vara la hite na asu tarapena i lo koru. ¹⁰ Ale la lo turu asau hinia matan la matahuni na nona ūongohaji, ale lara, "Rani sasati, rani sasati mo mai isam taon tavera, ko taon suiha, Babylon! Matan, vila ūahu purongo, nom talai mo mai isam." ¹¹ Tamlohi ařeařehi na varama la pa tangi, ale la tangtangi matana, matan tea mo sopo voli na nora hinahinau, ¹² nora gold, silver, vatu ūuhuřuhu, huřutavila, ruru ūahu, ruru perpel, silk, ruru hahara ūořoha, vipahai pona ūahu tinatinapua, hinau la tai nařihira na huřu elephant, hinau la vaira na vipahai ūuhuřuhu jea, bronze, aen peresi na vatu sei marble, ¹³ cinnamon peresi na spaes sei tamlohi la lo hanhani peresira, hasori, hasori sohena myrrh peresi na frankincense, waen, wel mata olive, flaua ūahu, wit, buluk, sipsip, hos, kart mata vuro peresi na slev, enira tamlohi mauri.

¹⁴ Ale leo atu mo mele verea mara, "La vua atu sei mapum mo lo opoira la rovo hiniho moiso peresi na nom hina ūuhuřuhu peresi na nom lakolako ūuhuřuhu la tihai isam, ale o pa sopo eri mele hitera hin te rani."

¹⁵ Tamlohi ařeařehi matan la hinau sei, la tavytav matana, la pa turu asau matan la matahuni na nona ūongohaji, la tangi la tangtangi, ¹⁶ lara, "Rani sasati, rani sasati isan taon tavera, haratu sei mo lo ru na ruru ūahu, ale mo lo ru na ruru perpel, ale ruru hahara ūořoha. Mo ru na gold peresi na vatu ūuhuřuhu, peresi na huřutavila, ¹⁷ pani vila ūahu purongo, nona tavytav la tihai!"

Captain mata lanis tari peresi na tamlohi voko na lanis peresi na tamlohi la lo lingira peresi la haratu la lo vai na mania na tasi la turu asau, ¹⁸ ale la tangi aulu matan la hite

na asuna mo lo koru lara, "Sava taon mo sohen taon tavera akerihil!"

¹⁹ Ale la lo tangi aulu, ale na nora ūomsati la pulahi na tangotango na patura, ale lara, "Rani sasati rani sasati isan taon tavera! Haratu sei la lo maro na lanis na tasi la tavytav matan nona tavytav, pani vila ūruhu purongo, mo maroe, ²⁰ ale matana, tuka o avulahi peresi na tapuhi non God peresi na vahařule peresi na p̄ovet, matan God mo sile na talai isana matamim."

²¹ Ale angelo ūilangi matea mo lavi na vatu matea sohena vatu tavera matea mata pete na piri wit, ale mo pulahia mo sivo na lolo tasi, ale mo ulo mara, "Hin malele ūilangi akerihil natu, taon tavera matan Babylon i pa jovi hinia, ale la pa sopo eři mele hitea hin te rani, ²² ale Babylon, roroan la haratu la lo roro na pue tangtangi, ale tamlohi roro, ale haratu la lo roro na flute, ale haratu la lo tiv na trumpet la pa sopo eři mele rongora na lolom, ale tamlohi eřierěi la lo vai na nora vayahinau hiniho, la pa sopo mele hitera hiniho hin te rani, ale roroa mata pete na wit la pa sopo mele rongoa hiniho hin te rani, ²³ lamu la sopo eři mele memera hiniho hin te rani, ale leo tamlohi i pa lahi peresi na nona hařai la pa sopo eři mele rongora hiniho hin te rani, matan nom tamlohi ařeařehi tiroma enira tamlohi tatavera mata varama, pani nake sava? Ale nom mahu mo halu na mara jara tinatinapua tari, ²⁴ ale ūae p̄ovet peresi na ūae tapuhi non God peresi na ūae la haratu ko vili mateira na varama mo lo toho hiniho."

19

La Lalavete Na Tuka

¹ Hitahun haratu na rongo na hinau matea mo sohena leo vao tavera matea na tuka mo ulo mara, "Hasohaso God! God enia Jujuri! Hasohasona tavera peresi na suiha, enira non norā God, ² matan nona aria la tataholo, ale la vokevoke matan enia mo ari tina hařai malele atu sei mo lo komo na varama na nona posposi viriu, ale God mo kele na ūae nona volitusi sei la lo toho na liman hařai malele atu." ³ Ale vao tavera atu la mele ulo lara, "Hasohaso God! Asun hařai malele atu i pa sahe aulu, rani tui tui tarea."

⁴ Ale la tamlohi aulu atu mo ngavulu rua mo vati (24)

peresi la hinau mauri atu mo vati la juruvi popovi atano na lepa, ale la lotu God mo lo sakele na nona jara sakele nona supe. La ulo aulu lara, "Amen! Hasohaso God!"

⁵ Ale leo matea mo tai na jara sakele nona supe mara, "Hasohaso norā God kamim mo isoiso nona volitusi sei ka lo sile na oloolo isana, haratu la aulu peresi la haratu sei la atano."

⁶ Ale na rongo na vavaore nona vao tavera matea mo sohena ūum tasi tavera, mo sohena roroa piri matuvana, mo ulo mara, "Hasohaso Moli norā God, enia suiha aulu atu mo tavera jea mo lo sakele na nona suiha. ⁷ Ra avulahi ūa avulahi tavera, ale ūa sile na hasohaso tavera isana matan lahi non Natu Sipsip mo masese, ale nona hařai mo hase tatamahunia. ⁸ God mo silea vara i ruru na ruru lulu mera mo vokevoke." Matan ruru lulu atu, mo lo ūarami na vavahinau ūruhu nona tapuhi.

⁹ Ale angelo atu mo verea isaku mara, "O uli harihi: Avulahi isan la haratu la usira vara la pa mai na hanhani lahi non Natu Sipsip." Ale mo mele verea mara, "Retivarařuhu sei la tai isan God."

¹⁰ Ale na jovi na juruvi popovi atano na palona vara a lotua, pani mo verea isaku mara, "O pa sopo vai hinau atu! Enau volitusi matea sohem peresi na vorai peresi na vevorai, la haratu la lo taurilati na vujangi non Iesu. O lotu God." Vara tamlohi la lo vereuli Iesu enira la lo retimangovi na suihan Tanume Tapu.

Reti Non God Mo Vai Na Vuro

¹¹ Ale na hite tuka mo roi, e! Hos lulu matea, ale haratu mo lo sakele na hos la tovia:

Romturū Rilangi

ale

Vara Ruhu

ale nona aria mo tataholo, ale mo vai na vuro. ¹² Ale matana mo sohena pepe hapu matea, ale ūongořongo matuvana nona supe aulu jea la lo toho na patuna, ale hija matea mo lo toho hinia, pani enia hasena purongo mo levosahia.

¹³ Mo ruru na ruru peravu matea la ūrunia na ūae, ale hija sei la tovia hinia enia:

Reti Non God

¹⁴ Ale vao tamlohi vuro tavera na tuka la lo usuria hin hos lulu atu, la ruru na ruru lulu ūahu la vokevoke. ¹⁵ Na jingona, sita voro tavalu rua matea mo lo malue hinia vara i vilijovjovi na mara jara tinatinapua. I pa kilaura peresi na maj aen mata tamajira hinia, mo varasi na koko varavarasi mata lolokoru sasati mata talai lolokoru non God mata hehe sei enia suiha aulu atu mo tavera jea. ¹⁶ Ale hija matea la ulia na nona ruru peresi na vosena mara:

**Supe nona Supe
Moli nona Moli**

¹⁷ Moiso, na hite na angelo matea mo lo turu na alo, ale mo ulo na leo tavera matea isana maji avuavu tari sei la lo avuavu aulu na masapa mara, “Ha sinai! Ha pulutahi mata hanhani tavera non God, ¹⁸ matan vara ha pa hani na visihon la haratu la supe, peresi la haratu la patu tamlohi mata vuro, peresi la haratu la lo tauri na suiha, peresi na hos peresi na tamlohire, peresi la haratu la materi, haratu la slev, tamlohi aulu peresi na tamlohi purongo.”

¹⁹ Ale na hite pa maji jala sasati atu peresi na supe tari na varama peresi na nora vao tamlohi vuro la mai jara matea vara la vai na vuro peresi haratu mo lo sakele na hos tolu na nona vao tamlohi vuro. ²⁰ Ale la tauri maji jala sasati atu peresi p̄rovet haluhalu atu, enia haratu mo lo vai na matamata tavera na nahon maji jala sasati atu sei mo lo halu la haratu la lo lavi na nona taipulu, ale la lo lotu na tamasina. La pulahi maji jala sasati atu peresi p̄rovet haluhalu atu la pa lo mauri, la sivo hin tasi hapu sei mo lo hani na vatutuni mata volkeno. ²¹ Ale isoisor, la mate hin pa sita tavalu rua atu sei mo lo malue na jingon haratu mo lo sakele hin pa hos atu, ale maji avuavu tari la masu mařari na visihora.

20

Tauni 1000

¹ Moiso, na hite na angelo matea mo tai na tuka mo lo lavi na kia matan koko tavera jea atu sei mo sivo atano jea na lolo varama mata mateia na limana, ale mo lo tauri na jen tavera matea. ² Mo taurilati dragon atu, enia mata sasati atu matan tuai sei la tovia Tiapolo teni Setan, ³ ale

angelo atu mo pulahia mo sivo hin koko tavera jea atu sei mo sivo atano jea na lolo varama mata mateia, ale mo pelati horoa, ale mo ringea vara dragon atu i pa sopo eři mele halu na mara jara tinatinapua vano i tikeli na tauni i tari vahatea **(1000)** i vano, ale hitahuna i pa mele materi mata makomo rani purongo.

⁴ Ale na hite te jara sakele nona supe peresi haratu la lo sakele hinira sei la silera na suiha vara la ari, ale na hite na maurin la tamlohi atu sei la tai roto na patura matan la lo vereuli Iesu, ale mata reti non God. Enira la sopo lotu maji jala sasati atu teni tamasina teni la lavi na nona taipulu na pungorira teni na limara. Enira purongo la mele mauri vara la tauri na suiha vara la aulu peresi Křisto mata tauni i tari vahatea **(1000)**.

⁵ Haranike enia tiroma sauteterahi. Haratu la sopo mauri la pa sopo eři mele mauri i tikeli na isoison tauni atu mo tari vahatea **(1000)**. ⁶ Avulahi tavera isan la haratu la tapuhi non God sei la turu na tiroma sauteterahi, matan harua mateia i pa sopo eři taurira na suihana. Enira la pa p̄ris non God peresi Křisto, ale la pa aulu peresira mata tauni i tari vahatea **(1000)**.

Isoison Setan

⁷ Ale na isoison tauni atu mo tari vahatea **(1000)**, la pa teri Setan na nona ima ūilangi, ⁸ ale i pa malue vara i halu na mara jara tinatinapua la tovira Gog peresi Magog vara i pulutahira na jara matea vara la vai na vuro; evira mo sohena evi oneone na tasi. ⁹ Ale enira la hahau roto na jara tari na varama vara la ūalihi vao tapuhi tavera atu la lo toho ūalihi hin taon tavera atu God mo opoia, pani hapu mo tai na tuka mo jovi isan la haratu la lo mai mo hani tihira. ¹⁰ Ale la pulahi Tiapolo haratu mo lo halura peresi pa maji jala sasati atu peresi pa p̄rovet haluhalu atu, la sivo hin tasi atu sei mo lo hani na vatutuni mata volkeno, ale la pa vailejlejira na rani na pongi ea mata rani tui tarea.

Aria Tavera Non God

¹¹ Ale na hite na jara sakele mo lulu non God, ale enia mo lo sakele hinia. Varama peresi na tuka la rovo na nahona, la tihai jejeu. ¹² Ale na hite la haratu la mate,

haratu la tamlohi aulu peresi la haratu la tamlohi purongo, la lo turu na naho jara sakele nona supe, ale puku la roi, ale puku tinapua matea mo roi enia — Puku mata Mauri. La ari la haratu la mate na sava la ulia hin la puku atu, mo tataholo na hinau tari la lo vaira na maurira.

¹³ Tasi mo sile la haratu la mate hinia, ale mateia peresi na varama mata mateia la sile la haratu la mate hinira. Ale la arira enira hatehateahi usuri na sava la lo vaira na maurira. ¹⁴ Moiso, la pulahi mateia peresi na varama mata mateia na tasi hapu. Nipu hapu atu la tovia Harua Mateia. ¹⁵ Vara tea hijana la sopo hitea na Puku mata Mauri, enia, la pulahia mo sivo na tasi hapu.

21

Tuka Paro Peresi Na Varama Paro

¹ Hitahuna, na hite na tuka paro matea peresi na varama paro matea. Tuka tuai peresi na varama tuai la tihai moiso, ale mo sopo te tasi hinia. ² Ale na hite taon tapu atu — Jerusalem Paro, mo lo tai aulu na tuka isan God. Mo sohena hařai matea mo ruru na ruru lahi mo tatamahu matan tuana.

³ Ale na rongo na leo tavera matea mo tai na jara sakele nona supe, mo verea mara, “Ka hitea! Nake, jaran God sei mo lo toho hinia, i pa toho peresi na tamlohi. I pa toho peresira, ale enira la pa nona tamlohi, ale God hasena i pa toho peresira, sohena nora God. ⁴ I pa kamoti na wai matara tari na matara, i pa sopo te mateia, ūromsasati teni tangi teni epe varihaji, matan hinau matan tuai la tihai.”

⁵ Ale haratu mo lo sakele na jara sakele nona supe mo verea mara, “Ale ha levosahia! Na lo vai na hinau tari la paro.” Ale mo verea isaku mara, “Ouli hinau nike, matan la reti nike, o pa eři rasura, ale la varařuhu.” ⁶ Ale mo mele verea isaku mara, “Mo isoiso! Enau pulo hinau tari! Enau isoisona! Enau tapulo hinau tari! Enau hitahu hinau tari! Isan haratu mo mařohu, a pa silea hin patu wai mauri atu, mo sopo te volina. ⁷ Haratu mo jeu na nona meresahi i pa lavi la hinau atu. Enau a pa nona God, ale enia i pa natuku.

⁸ Pani isan la haratu ūromira mo sopo ūrilangi; teni haratu la lo vahaři na nora rasua; haratu posira la lumiha; teni haratu la lo vilimatei na tamlohi; teni haratu la lo vai na posposi viriu; teni haratu la lo mahumahu na suiha tanume; teni haratu la lo lotu na hinau mo sopo God, ale haratu la lo halu, jarara enia tasi hapu atu sei mo lo hani na vatu tutuni mata volkeno, enia Harua Mateia.”

Jerusalem Paro Mo Tai Na Tuka

⁹ Ale na hite na angelo matea mo mai isaku, enia vonan la angelo atu mo limaravrua sei, tiroma la lo lavi na jilivi mo limaravrua sei la mařivi na rongohaji sasati mo limaravrua, ale mo verea isaku mara, “O mai, a pa vujangihio hin hařai atu i pa lahi, enia naroun Natu Sipsip.” ¹⁰ Ale angelo atu mo laviau na suihan Tanume Tapu na sahe aulu na patu vutivuti tavera matea. Angelo atu mo vujangiau hin taon tapu atu Jerusalem, mo lo tai aulu na tuka isan God, ¹¹ sasaramin God mo lo malue hinia, mo mera ūruh sohen datu vilasi ūruh ūruh matea, sohen datu atu jasper majhina mo heja rau, ale mo hahara, mo niro ūruh sohena crystal glas. ¹² Taon tavera atu ropena mo tavera mo aulu, ale mataruana mo sangavulu ūromana mo rua, ale angelo mo sangavulu ūromana mo rua la lo turu hin la mataruana atu. Hin la mataruana atu la uli la hija tavitavuun Israel atu mo sangavulu ūromana mo rua na ¹³ tavalauna vano Opae mataruana mo tolu, tavalauna sahe Auta mataruana mo tolu, tavalauna sivo Tahuna mataruana mo tolu, ale tavalauna sivo Marino mo tolu. ¹⁴ Ropen taon tavera atu, pulona mo sangavulu ūromana mo rua, ale hija vahařule mo sangavulu ūromana mo rua non Natu Sipsip la lo toho hinira.

¹⁵ Haratu mo lo retireti isaku mo tauri na ava matea la vaia na gold vara i ava na taveran taon tavera atu tolu na mataruana peresi na ropena. ¹⁶ Ale avana mo sohen harihi: taverana peresi na peravuna la sohesohera purongo, ale taverana peresi na peravuna peresi na auluna avara mo tikeli 12,000 stadia (*2,220 km*) enira hatehatea. ¹⁷ Moiso mo ava na aulun rope atu mo tikeli 144 cubit (*66 m*) angelo sei

mo ava harihi mo tataholo na tamlohi la lo ava hin pongi atu.

¹⁸ Ropena la voroa na vatu ūruhu sei jasper, ale taon tavera atu la vaia na gold vokevoke mo niro sohena glas. ¹⁹ La pulo ropaen taon tavera atu la lakolakora na vatu vilasi ūruhu sei majhira la tinatinapua. Tiroma vatu enia jasper, haruana enia sapphire, hatolura enia agate, havatira enia emerald, ²⁰ halimara enia onyx, halimaravera enia carnelian, halimaravruara enia chrysolite, halimaravtolura enia beryl, halimaravatira enia topaz, sangavulura enia chrysoprase, sangavulu ūromana mateara enia jacinth, sangavulu ūromana mo ruara enia amethyst. ²¹ La vai la mataruua atu mo sangavulu ūromana mo rua na huſutavila tavera mo sangavulu ūromana mo rua, ale malele na lolon taon tavera atu la vaia na gold mo niro sohena glas.

²² Na sopo hite te Temple na lolon taon tavera atu, matan Moli God enia suiha atu mo tavera jea peresi Natu Sipsip enira natu, nona Temple. ²³ Ale taon tavera atu mo sopo opoi na alo peresi na vitu vara la sasarami hinia matan memeran God mo lo sasarami hin taon tavera atu, ale Natu Sipsip enia nona lamu.

²⁴ Mara jara tinatinapua la pa hahau na memerana, ale supe tari na varama la pa lavi na nora tavitav la sivo hinia, ²⁵ Ale mataruana la pa sopo pelati hin te rani hatea matan mo sopo te ūroha mata vutepongi.

²⁶ Mara jara tinatinapua la pa lavi na nora tavitav peresi nora na nora oloolo la unu na lolona. ²⁷ Pani i pa sopo te hina lumiha hatea i eri unu hinia teni haratu posira mo lumiha teni haratu la halu, pani la haratu purongo sei la lo uli na hijara na lolo Puku mata Mauri non Natu Sipsip.

22

¹ Ale angelo atu mo vujangiau hin wai roro mata mauri atu sei mo niro sohena glas sei crystal, ale mo lo roro mo lo malue na jara sakele nona supe non God enia Natu Sipsip. ² Ale mo roro usuri na livuha malele tavera hin taon tavera atu. Na tavavalun wai roro atu hatehateahi vipahai sei mo lo sile na mauri peresi na vuana mo

sangavulu ūromana mo rua tinatinapua, la mena na vitu hatehateahi na tauni matea, ale raura la pa vai mamahuni na rojoa nona mara jara tinatinapua. ^{Gen 2.9}

³ I pa sopo te hinau hatea God i pa ūrohu hinia atu, matan jara sakele nona supe non God peresi Natu Sipsip i pa lo toho ea, ale nona volitusi la pa lotua. ^{Zec 14.11; Gen 3.17}

⁴ Ale la pa lo hite na nahona, ale hijana i pa toho na pungorira. ⁵ Vutepongi i sopo eri mele pala, ale la haratu la lo toho ea, la pa sopo eri opoi na memera lamu teni alo matan Moli God enia i pa sasarami isara moiso, enira la pa tauri na suiha mata rani tui tui tarea. ^{Isa 60.19; Dan 7.18}

I Pa Sopo Tuai Kristo I Pa Mai

⁶ Ale angelo atu mo verea isaku mara, “La reti atu o pa eri rasura, ale la vararuhu. Ale Moli enia God mata tanume p̄rovet, ale enia natu, mo ūrule na nona angelo vara i vujangi na sava God mo viřonia vara i pa masese i pa sopo tuai isana nona volitusi.”

⁷ Iesu mo verea mara, “Ha lo levosahia! A pa mele mai i sopo tuai! Avulahi isan la haratu la lo taurilati la reti hin puku mata retimangovi nike.”

⁸ Enau John, enau natu na hitea, ale na rongo la hinau nike, nara na rongora, ale na hitera, na juruvi popovi atano na palon angelo atu mo lo vujangiau hin la hinau sei vara a lotua, ⁹ pani angelo atu mo verea isaku mara, “O sopo vaia sohena! Enau volitusi matea sohem peresi na voraim la p̄rovet tolu la haratu la oloolo na reti hin puku nike. O lotu God!”

¹⁰ Ale mo verea isaku mara, “O sopo jarohi na reti mata retimangovi hin puku nike, matan i pa sopo tuai la pa masese.

¹¹ Haratu mo lo vai na hehe, i pa lo vai na hehe; haratu ūromina mo lumiha, ūromina i pa lo lumiha; ale tamlohi tataholo i pa lo vai na hina tataholo, ale haratu mo tapu i pa lo tapu.”

¹² Ale Moli mara, “Ka levosahia! Enau na lo mai vila, ale a pa sile na voli tamlohi tari i tataholo na sava la vaia moiso. ¹³ Enau na tiroma na hinau tari, enau na isoiso hinau tari, enau pulo hinau tari, enau na hitahu, enau tapulo hinau tari, enau isoiso hinau tari.”

¹⁴ Avulahi isana tamlohi tari sei la lo hoje na nora ruru peravu matan vara la pa tataholo vara la hani na vuan vipahai atu sei mo lo sile na mauri, ale la pa eři unu hin taon tavera atu na mataruna.

Gen 2.9; 3.22

¹⁵ Pani na jingoima hin taon tavera atu, viriu sei haratu la lumiha peresi na tamlohi mahumahu na suiha tanume peresi haratu posira la lumiha peresi na tamlohi vilimatei na tamlohi peresi la haratu la lo lotulotu vono, ale tamlohi tari sei tarea la opoia vara la lo halu.

¹⁶ “Enau Iesu, enau na ūrule na noku angelo vara i vereuli la hinau tari sei isamim mata vao kalesia tari. Enau tahisan maphapin Supe David, ale enau na majou ūralavuho sei mo memera.”

Isa 11.1, 10

¹⁷ Ale, Tanume Tapu peresi hařai atu i pa lahi lara, “O mai!” Ale isan haratu

mo eři rongo, o verea vara “O mai!” Ale isan haratu mo mařohu, “O mai!” Ale isan haratu mo opoia, o lavi na wai mata mauri mo sopo te volina.

¹⁸ Haranike enia noku retiroařoahai isana tamlohi tari sei la rongo la reti mata retimangovi hin puku nike.

Deut 4.2; 12.32

Vara tea i mele tau te reti tinapua na sava la ulia moiso, God i pa tau la rongohaji sasati atu puku nike, mo lo verea isana.

¹⁹ Ale vara tea i lavi nařihi te reti hin retimangovi nike, God i pa lavi nařihi na rungana hin vipahai atu mata mauri peresi taon tapu atu sei la uliuli matana hin puku nike.

²⁰ Ale haratu mo lo vereuli la hinau nike mara,

“Io, enau na lo mai vila!”

Amen! O mai Moli Iesu!

²¹ Romřuhu non Moli Iesu i toho isamim mo isoiso. Amen.